


Tata Diospa Mushuk

Rimanán



New Testament in Quechua, San Martín (PE:qvs:Quechua, San
Martín)

Tata Diospa Mushuk Rimanan

New Testament in Quechua, San Martín (PE:qvs:Quechua, San Martín)

copyright © 2008 Wycliffe Bible Translators, Inc.

Language: Quechua, San Martín

Translation by: Wycliffe Bible Translators, Inc.

Quechua, San Martin

qvs

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Quechua, San Martín

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
9ea4ef1e-a918-53b9-8a27-dffea7bcf6f6

Contents

SALMO	1
SAN MATEO	27
SAN MARKOS	102
SAN LUKAS	146
SAN JUAN	225
HECHOS	284
ROMANOS	351
1 KORINTIOS	381
2 KORINTIOS	411
GALATAS	430
EFEOS	441
FILIPENSES	452
KOLOSENSESES	459
1 TESALONISESES	466
2 TESALONISESES	472
1 TIMOTEO	476
2 TIMOTEO	484
TITO	490
FILEMON	494
HEBREOS	496
SANTIAGO	519
1 PEDRU	527
2 PEDRU	536
1 JUAN	541
2 JUAN	550
3 JUAN	551
JUDAS	553
APOKALIPSIS	556

SALMOS**1**

Tata Diosta kasushpanchikuna kushikushpa kawsanchisapa.

1 Ŧukanchikuna mana sakra runakuna willawananchikunata
kushikushpa kawsanchisapa.

Mana uchallikuk runakunashina kawsashpa
mana uchata rurashpa kawsashpanchikuna
kushikushpa kawsanchisapa.

Mana Tata Diosta asichik runakunapa yuyanankunata rurashpanchikuna
kushikushpa kawsanchisapa.

2 Tata Diospa rimananta kuyashpanchikuna tutapi diyapi chay rimanani
yuyaykushpa
kushikushpa kawsanchisapa.

3 Chashna Tata Diospa rimananta kuyashpanchikuna
yaku mañampi tarpudu kaspishina allimata wiñanchisapa.
Wayuchakunan tiempu aypata wayuchakuk kaspishina kanchisapa.
Aypa allima pankayuk kaspishina kanchisapa.

Chayrayku tukuy ima rurananchikunata allita ruranchisapa.

4 Chay mana alli rurak runakuna mana chashnachu kawsansapa.

Paykunaka wayra pushanan kutadu murupa karapanshina kunanlla an-
chunsapa.

5 Chayrayku chay mana alli rurak runakuna
Tata Diospa kastigunmanta mana kishpinkasapachu.
Paykunaka Tata Diosta kasushpa kawsak runakunawan
mana tantanakunkasapachu.

6 Tata Dios alli rurak runakunata kuydansapa
alli ñanta purikshina allita rurashpa kawsanankunapa.
Tukuy uchallikushpa kawsak runakunata
Tata Dios sukaman kastigankasapa.

2

Tata Dios akllashkan wambran kamachikun.

1 Sukaman yuyani: ¿Imapatí Tata Diosta mana kasuk runakuna turbakun-
sapa?

¿Imapatí mana valekkunata yuyaykunsapa ruraya?

2 Tukuy allpapi sinchi kamachikukkuna awtoridarkuna
Tata Diosta mana kasunayansapachu.

Chashna mana kasunayashpapkuna
Tata Dios akllashkan sinchi kamachikukwan makanakuk tantanakunsapa.

3 Tantanakushpa kaparishpa rimansapa:

“Akuychi Tata Dios akllashkan kamachikuk runawan makanakuk.

Akuychi paymanta kishpichinakuk amana kamachiwananchikunapana.”

4 Chashna rimaptinkuna
sielupi kawsak Tata Dios
paykunata asichinsapa.

5 Chaymanta Tata Dios rabyakushpa manchachinsapa.
Sinchita piñakushpa willansapa:

6 “Ñukami akllashkayni Sion urkupi sinchi kamachikukta churashkani tukuy layata kamachinanpa.”

7 Kunanka ñuka willaykichi Tata Dios munananta.

Payka willawashka:

“Kanka wambraynimi kanki.

Kantami churashkayki sinchi kamachikuk kanaykipa.

8 Chayrayku tukuy llaktakunata mañaway.

Ñukami allpa kuchun mañanta kushkayki chaypi kamachikunaykipa.

9 Sinchi kamachikuk kashpayki suk runakuna mana kasushunayaptinkuna kastigankisapa.

Yerumanta ruradu varawan

metomanta ruradu ollata pakikshina paykunata kastigankisapa.”

10 Chashna Tata Dios wambranta willaptin

Kankuna sinchi kamachikukkuna, awtoridarkuna,
willanaynita allita entiendiaychi.

Yachachinaynita yachakuychi.

11 Tata Diosta manchashpa sirviyichi.

Kushikushpa payta kuyaychi.

12 Tata Dios kunanllami sinchita rabyakun.

Chayrayku chukchukushpa ñawpakinipi kumurayaychi

ama Tata Dios rabyashpa mana allita rurashkaykichirayku wañuchishunaykichipa.

Tata Dios amachawanañchikunata yachashpanchikuna
kushikushpa kawsanchisapa.

3

Tata Dioska kuyak runakunata yanapansapa.

1 A, Tata Dios,
aypa chikniwak runakunami tiyan.

2 Chikniwashpa ñukawan makanakunayansapa.
Chay runakuna ñukapa rimansapa:

“Tata Dios manami yanapankachu.”

3 Chashna rimaptinkunapish,
Tata Dios, kanmi arkanashina arkawanki.
Kanmi kuyawashpa yanapawashpa animuchiwanki.

4 Ñuka Tata Diosta sinchita roygaptini
payka sielipi kawsananmanta yanapawan.

5 Sirishpayni kunanlla puñuni.
Puñushkaynimanta kashkan rikchamuni
Tata Dios yanapawaptin.

6 Aypa chikniwak runakuna tukuy maypi wañuchiwanayaptinkunapish
Tata Dios yanapawaptin mana manchakunichu.

7 A, Tata Dios,
yanapawashpayki favorninipi atarimuy.

Chikniwak runakunamanta salvaway.
Kanmi chikniwak runakunata makashkankisapa.
Tukuy mana alli rurak runakunapa armankunata wakllichishkanki.

8 Kanmi, Tata Dios, ñukaykunata salvawankisapa.
Chayrayku kanta kuyaptinikuna yanapawaysapa.

4*Tata Diosta kreyiptinchikuna allita yanapawanchisapa.*

1 A, Tata Dios,
kanmi allita amachawanki.
Chayrayku kanta roygaptini yanapaway.
Sukaman llakiptini kanmi kushichiwanki.
Chayrayku roygaptini llakichiwashpa uyariway.

2 Kankuna, chikniwak runakuna,
¿aykapikamantí llullakushpa chatawankichi?
¿Aykapikamantí mana kuskata yuyashpa llullakuyllata munankichi?

3 Allita yachaychi
Tata Dios payllata kasushpa kawsak runakunallata yanapananta.
Allita yuyaychi ñuka Tata Diosta roygaptini yanapawananta.

4 Chayta yakashpa manchakushpa chukchukuychi
amana ashwanta uchallikunaykichipa.
Sirishpaykichi kasillayashpa mana alli rurashkaykichita yuyaychi.

5 Chayta yuyashpa
tukuy shunku Tata Diosta kuyashpa
animalkunata altarpi wañuchiaychi.
Allita yachaychi amachashunaykichita.

6 Aypa runakuna rimansapa:
Manami ni pi ñukanchikunata kushichiwanayanchisapachu.
Chashna rimaptinkunapish
kan, Tata Dios, ñukaykunata llakichiwaysapa.
7 Aypa mikunayuk aypa upyanayuk runakuna sukmaman kushikunsapa.
Kan, Tata Dios, paykunamanta ashwanta kushichiwashkanki.
8 Kan kuydawaptiki mana manchakushpa sirishpayni kunanlla gustu
puñuni.

5*Roygapachi Tata Dios yanapawananchikunapa.*

1-2 Kamachiwak Tatayni Dios,
parlachiptini uyariway.
Llakishpa roygaptini yanapaway.
A, Tata Dios,
kantami tukuy ima yuyanaynita parlachiayki.

3 A, Tata Dios,
unay unay parlachiptini uyariwanki.
Pakarinanta ima munanaynita willayki.
Chaymanta yanapawanaykipa shuyani.

4 A, Tata Dios,
runakuna mana allita ruraptinkuna
sukaman piñakunki.
Chayrayku mana alli rurak runakuna
mana ñawpaknikipi kawsankasapachu.
5 Kikinkunalla kreyinakuk runakuna mana ñawpaknikipi kawsankasapachu.
Mana alli rurak runakunata

sukaman chikninkisapa.

6 Llullakuk runakunata kulluchinkisapa.
Allipi tukushpa chiknikuk runakunata
wañuchikunayak runakunata chikninkisapa.

7 A, Tata Dios,
kuyawashpa llakichiwaptiki ñuka atipani wasikipi yaykushpa
tukuy shunku kuyaynikita.
Akllashkayki wasikita yuyashpayni kuyayki.

8 A, Tata Dios,
alli rurak kashpayki
yachachiway allita rurashpa kawsanaynipa
ama chikniwak runakuna chatawanankunapa.
Yanapaway allita rurashpa
alli ñanta purikshina kawsanaynipa.

9 Chay chikniwak runakuna
tukuy tiempu llullata rimansapa.
Tukuy shunku mana allita yuyashpalla kawsansapa.
Chashna sukaman uchasapa kashpankuna
kicharidu asnak sepulturashinami.

10 A, Tata Dios,
chay runakunata kastigaysapa
tukuy mana alli yuyanankuna nimapi tukunankunapa.
Uchasapa kashpankuna
mana kasushunayashkankunaryku
ñawpaknikimanta paykunata karkuysapa.

11 Ñukaykuna amachawanaykipasapa munashpaynikuna kushikunisapa.
Kushikushpa kantanisapa
kan, Tata Dios, amachawaptikisapa.
Kanta kuyashpaynikuna kushikunisapa
kan yanapawaptikisapa.

12 Allita rurashpa kawsaptinikuna
kan, Tata Dios, yanapawankisapa.
Yanapawashpaykisapa suk arkanashina amachawankisapa.

6

Llakishpanchikuna Tata Dioswan parlanchisapa.

1 A, Tata Dios,
ama rabyakushpa piñayawaychu.
Ama rabyakushpa kastigawaychu.

2 A, Tata Dios,
mana fersasyukmi mallinakuni.
Chayrayku llakichiway.
Tukuy kuerpuynimi chukchukun.
Chayrayku alliyachiway.

3 Manchakushpayni chukchukuni.
A, Tata Dios,
sukaman munani yanapawanaykipa.

4 A, Tata Dios,
shamuy yanapawak.
Kuyawashpayki wañuymanta salvaway.

5 Wañushpayni manana kay allpapi yuyashkaykinachu.
 Pampadu kashpayni manana atipashanachu alabaynikita.
6 Chayta yuyashpa sukaman wakakushpa shaykuni.
 Tukuy tuta sukaman wakakuptini
 almadayni ñawini illiwan ñuyun.
7 Chikniwak runakuna sufrichiaptinkuna
 wakakuptini ñawini shaykushpa puyuyashka.

8 Kankuna, mana alli rurak runakuna,
 ñukamanta anchuychi.
 Sukaman llakiptini ñami Tata Dios uyariwashkana.
9 Oraptini Tata Dios uyariwashkana.
 Tukuy mañashkaynita
 ñami Tata Dios almitiwashkana.
10 Chayrayku chikniwak runakuna
 pinkakushpa turbakunkasapa.
 Tata Dios yanapawaptin
 pinkakuywan raslla kallpankasapa.

7

Tata Dios kuskanpi kastigakun.

1-2 A, Señor Tatayni Dios,
 kantami maskayki amachawanaykipa.
 Sufrichiawak runakunamanta salvaway.
 Paykunamanta kishpichichiway.
 Mana amachawaptikika llullakushpa chatawashpa
 pumashina wakllichewanmansapa.
3 A, Tata Dios,
 ¿ima mana allita rurashpatí uchallikushkani?
4 Purikmasini allita rurawaptin manami chiknishkanichu.
 Chikniwak runata mana nimanachiwaykaptin
 manami payta sufrichishkanichu.
5 Payta sufrichishka kaptinika ñukatapish sufrichiawchun.
 Payta chiknishka kaptinika ñukatapish mana nimatashina kawawachun.
6 A, Tata Dios,
 piñakushpa atariy.
 Favorninipi chikniwak runakunata tinkuysapa.
 Kanmi rimashkanki mana alli rurak runakunata kastiganaykipa.
 Chayrayku favorninipi llukshiy.
7 Tukuy llaktakunata tantanachishpayki
 paykunata kamachiysapa.
8 A, Tata Dios,
 kanmi tukuy llaktakunapi kawsak runakunata
 willanki allitachu mana allitachu rurashkasapa nishpa.
 Chayrayku allita rurashpa kawsashkaynirayku
 willaway allita rurashkaynita.
9 A, Tata Dios,
 kanmi allillata rurak kanki.
 Tukuy runakunapa yuyayninta riksinki.
 Chayrayku tukuy mana alli rurak runakunata kulluchi.
 Ñukaykuna alli rurak runakuna kaptinikuna
 sinchichiwashpa yanapawaysapa

ama uchallikunaynikunapa.

10 Altu sielupi kawsak Tata Dios
tukuy alli shunkuyuk runakunata amachan.
Chayrayku ñukata amachawan.

11 Tata Dios kuskanpi kastigakun.
Tukuy tiempu tukuy mana alli rurak runakunata kastigansapa.

17 Tata Dios alli rurak kaptin
payta alabasha.
Altu sielupi kamachikuk Tata Diosta yuyashpa
payta kuyashpa himnokunata kantasha.

8

Tata Dios runakunata rurarkan kamachikunankunapa.

1 A, Tata Dios,
ashwan sinchi kamachiwakninkunami kanki.
Kanmi tukuy allpapi kamachikunki.
Sieluta kawashpaynikuna yachanisapa
sukaman tukuy laya atipak kanaykita.

2 Taksha wambrakuna ñuñukuk wambrakuna alabashuptinkuna
riksichinakunki tukuy laya atipak kanaykita.
Chaymanta chiknishuk runakunata
mana kasushunayak runakunata upallayachinki.

3 Rurashkayki sieluta kawashpayni
chaypi churashkayki killata luserukunata kawashpayni
4 yuyani rurashkayki runakuna mana nima kanankunata.
Chashna mana nima kaptinkunka
¿imapati yuyawashpa llakichiwankisapa?

5 Nukaykunata rurawashkankisapa yaka angelkunashina yachakta.
Angelkunamanta ashwanta kuyawankisapa kushichiwankisapa.

6 Alli yachakta rurawashpaykisapa
willawashkankisapa rurashkaykikunata kamachinaynikunapa.

7 Ovejakunata torokunata sachapi mana wiwa animalkunata
kuwashkankisapa ñukaykunapa kanankunapa.

8 Sielupi pawak animalkunata
yakupi kawsak challwakunata
tukuy ima yakupi tiyakta
churashkankisapa kamachinaynikunapa.

9 A, Tata Dios,
ashwan sinchi kamachikunkinikunami kanki.
Tukuy allpapi kamachikunki.

10

Roygaptinchikuna Tata Dios yanapawanchisapa.

1 A, Tata Dios,
mallinakuni karuyawashkaykita.
Llakiptini mallinakuni mana yanapawanaykita.

2 Mana alli rurak runakuna sukaman kikinkunalla kreyinakushpankuna
rabyakushpa alli rurak runakunata sufrichinsapa.

Chashna kreyinakushpankunapish
kikinkuna churashkankuna trampallapi urmankasapa.

³ Mana alli rurak runakuna
kikinkunapa munanankunallata rurashpa kawsansapa.
Tukuy layata kikinkunallapa munashpa
Tata Diosta maldisishpa washanchansapa.

⁴ Chashna washanchashpa kikinkunalla kreyinakushpa rimansapa:
“Manami Tata Dios tiyanchu.
Manami ni pi ruranaynikunata tapuwankasapachu.”

⁵ A, Tata Dios,
chay runakuna sukaman mana allita rurashpa
chashnalla tukuy tiempu kawsansapa.
Kanpa, Tata Dios, kamachikunaykita
mana nimatashina kawansapa.
Chikninakukmasinkunata
mana kreyishpankuna rabyachinsapa.

⁶ Yuyansapa mana ni pi atipananta
chashna kawsanankunamanta michayta.
Rimansapa mana nimapi sufrinankunata.

⁷ Chaykunata rimashpa sukaman maldisikunsapa
llullakunsapa llullachikunsapa.
Runamasinkunata rabyachishpa sufrihinsapa.

⁸ Llaktankuna washapi mana nimanachik runata chapashpa
pakallalla wañuchinsapa.
Mana amachanakuy atipak runakunata kawashpa
shuyansapa wañuchiinankunapa.

⁹ Chay mana alli rurak runakuna
pumakunashina machayninpí pakakudunkunamanta
mana amachanakuy atipak runakunata chapansapa.
Chapashpa shuyansapa imay orami apinkasapa nishpa.
Chashna apishpa munashkankuna layata paykunata ruransapa.

¹⁰ Pumakunashina pakchanakushpa takshayansapa
mana amachanakuy atipak runakunata apinankunapa.

¹¹ A, Tata Dios,
chay runakuna yuyansapa
kan mana alli ruranankunata kunkanaykita.
Yuyansapa uyaykita wickashpa mana kawanaykita.

¹² A, Tata Dios, atarimuy. Yanapawaysapa.
Ama sufrik runakunata kunkaychu.

¹³ A, Tatayni Dios
¿imapatí mana alli rurak runakuna
burlata rurashunkisapa?
Paykunaka yuyansapa kan mana kastigakunaykita.

¹⁴ A, Tata Dios,
kikiki kawashkanki
sakra mana allikunata ruraptinkuna.
Chayrayku paykunata kastiganayki tiyan.
Chashna kastigakuk kaptiki
mana amachanakuy atipak runakuna
kanta maskashunkisapa amachakunaykipa.
Kanmi tukuy wakcha runakunata yanapankisapa.

- 15** A, Tata Dios,
chay mana alli rurak runakunata kastigaysapa
amana sufrichikushpa kawsanankunapa.
Tukuy paykunata kastigaysapa kullunankunakaman.
16 Kanmi, Tata Dios, mana tukuy niyukta kamachikunki.
Mana kreyishuk runakunata llaktankunamanta wishchunkisapa.
17 A, Tata Dios,
mana kikinlla kreyinakushpa kuyashuk runakuna
roygashuptinkuna uyarinkisapa.
Paykunata animuchishpa yanapankisapa.
18 A, Tata Dios,
tukuy wakchakunata sufrik runakunata yanapaysapa
wañuy yachak runakuna
amana runamasinkunata sufrichinankunapa.

11

Tata Dios tukuy alli rurak runakunata amachansapa.

- 1** Nukaka Tata Diostami shuyani amachawanana.
Yankamantami chikniwak runakuna willawansapa:
“Pawak animalkuna urkukunaman manchakushpa nitikukshina nitikuy.”
2 Paykunaka willawansapa:
“Mana alli rurak runakunata kawaychi.
Paykunaka wachinkunata balista waskapi churashpa
balistankunata pataransapa.
Pakakudunkunamanta alli rurak runakunata shitansapa.”
3 Willawansapa: “Mana awtoridarkuna tiyaptin
¿imatati alli rurak runakuna rurankasapa?”
- 4** Chashna willawaptinkunapish ñuka yachani
Tata Dios wasinpi kawsananta.
Sielupi tiyananmanta tukuy runakunata allita kawaykan.
5 Tata Dios alli mana alli rurak runakunata kawan.
Wañuchikunayashpalla kawsak runakunata
Tata Dios tukuy shunkunmanta sukaman chikninsapa.
6 Tata Dios mana alli rurak runakunapa sawanpi
asufriwan rawraykak ninata tamyachinka.
Wayrawan chay ninata rawrachinka
chay sakra runakunata rupachinankunapa.
Chashna rupachishpa kastigankasapa.
7 Tata Dios alli rurakmi.
Ñukanchikuna allita rurashpa kawsaptinchikuna kuyawanchisapa.
Tata Diosta tukuy shunku kuyashpanchikuna
payta uya uya kawashunchisapa.

19

Sieluta kawashpa yachanchisapa Tata Dios tukuy laya atipak kananta.

- 1** Kawananchi sielu yachachiwanchisapa
Tata Dios tukuy laya atipak kananta.
Sieluta kawashpanchikuna yachanchisapa
Tata Dios tukuy layata rurashkanta.
2 Diyan diyan sieluka yachachiwanchisapa

Tata Dioslla tukuy layata rurashkanta.
 Tutapipis sieluka yachachiwanchisapa
 Tata Dios alli yachak kananta.

³ Sielu mana rimakuptin uyarishpanchikunapish
 allita yachanchisapa
 Tata Dios tukuy layata rurashkanta.

⁴ Tukuy allpa kuchun mañanpi kawsak runakuna
 sieluta kawashpa yachanchisapa
 Tata Dios tukuy layata rurashkanta.

Payka intita sielupi wasinpishina churashka.

⁵ Intika suk novioshina
 kasaranan diya kushikushpa
 wasinmanta kallpan.
 Premyunta chaskinarpa kallpak runashina
 kushikushpa llukshin.

⁶ Intika llukshimunan ladumanta
 yakyunana ladukaman purin.

Mana ni pi rupaynimanta kishpinchu.

⁷ Tata Diospa kamachikunankuna sukaman allimami.
 Sampayaptinchani animuchiwanchi.

Paypa rimananka mana llullachiwanchisapachu.
 Mana yachaptinchikuna
 yachachiwanchisapa alli yachak kananchikunapa.

⁸ Tata Diospa rimanan allima kashpa
 kushichiwanchisapa.
 Paypa kamachikunankuna sukaman allima kashpa
 lampara llipyakshina lusichiwanchi
 yachananchikunapa allita rurashpa kawsayta.

⁹ Tata Diosta kuyashpanchikuna
 mana tukuyniyukta
 allita rurashpa kawsanchisapa.
 Tata Dios kuskanpi mana llullakushpa kamachiwanchisapa.

¹⁰ Paypa rimananka
 kurimanta ashwan allimami.
 Amu mishkinta munananchikunamanta
 Tata Diospa rimananta ashwanta munanchisapa.

¹¹ A, Tata Dios,
 kamachikunaykikuna yachachiwan
 ama uchallikushpa kawsanaynipa.
 Chaykunata kasuptini sukaman yanapawanki.

¹² Mana ni pi kikinmanta yachanchu uchallikushkanta.
 A, Tata Dios,
 mana yuyashpa uchallikuptini
 perdonaway.

¹³ Yanapaway ama kikinilla kreyinakunaynipa.
 Ama munaychu kreyinakushpa kawsanaynipa.
 Yanapawaptiki mana uchayuk runa kasha
 amana uchallikunaynipa.

¹⁴ A, Tata Dios,
 kanmi amachawashpa uchaynimanta salvawanki.
 Chayrayku munani
 tukuy rimanayni tukuy yuyanayni kushichishunaykipa.

23

Tata Dios ovejakuna kuydakshina kuydawanchisapa.

- 1** Tata Dios ovejakuna kuydakshina kuydawan.
Chayrayku mana nima illawanchu.
- 2** Chashna kuydawashpa
allima pastukunapi samachiwan.
Chuya likidu ñukñuk yakukunaman pushawan.
- 3** Chashna kuydawashpa animuchiwan.
Kuska ñankunata pushawan riksinaynipa alli kuydakuk kananta.
- 4** Kan, Tata Dios, kuydawaptiki
tuta likidu urku sikinkunata puriptinipish
mana wañuya manchakunichu.
Kan, Tata Dios, ñukawan kaptiki
varaykiwan bastonni kiwan kuydawaptiki
kushikushpalla kawsasha.
- 5** Chikniwak runakuna tiyaptinpish
aypa allima mikunata rurapashkanki.
Kuyawashpa mishkilla asnak wirata
umaynipi tallishkanki sukaman kushichiwanaykipa.
Chaymanta upyakunayni kopata untachikshina sukaman yanapawanki.
- 6** A, Tata Dios,
wañunayni diyakaman sukaman kuyawashpa llakichiwanki.
Chayrayku wasikipi mana tukuyniyukta kawsasha.

27

Tata Dios yanapawaptinchikuna mana nimata manchanchisapachu.

- 1** Tata Dios lusninishina kashpa
chikniwak runakunamanta salvawan.
Chashna salvawaptin mana ni pita manchanichu.
Tata Dios amachawaptin
mana ni pita manchashachu.
- 2** Chay chikniwak mana alli rurak runakuna tantanakunsapa
makawashpa wañuchiwanankunapa.
Chashna wañuchiwayta yuyashpankunapish
mana atipansapachu.
- 3** Chay aypa chikniwak runakuna wañuchiwanayashpa chawpichawaptinku-
napish
mana paykunata manchanichu.
Sukaman makawanayaptinkunapish mana turbakunichu.
- 4** Ñuka Tata Diosta suk imallata mañashkani.
Sukaman munani tukuy diya paypa wasinpi yaykuya payta kuyanaynipa.
Chaypi sukaman munani kuyawananta yuyayta.
- 5** Sukaman sufrishpa kawsaptini
Tata Dios amachawashpa yanapawanka.
Chikniwak runakunamanta wasinpi pakawanka.
Manllayba rumi sawanpishina churawanka
ama ni pi wakllichewanana.
- 6** Chashna Tata Dios salvawaptin
atipani chikniwak runakunata kallpachiyya.
Chaypina payta agradesishpayni paypa wasinpi

ofrendakunata kusha kuyanaynipa.
Kushikushpa himnokunata Tata Diosta kantasha.

7 A, Tata Dios,
kanta roygaptini uyariway.
Llakichiwashpa yanapaway.

8 Kikini yuyanakushpa rimani:
“Tata Diosta roygasha yanapawanana.”
Chayrayku, Tata Dios, roygayki yanapawanaykipa.

9 A, Tata Dios, yanapaway.
Ama piñakushpa karkuwaychu.
Kanlla atipanki salvawayta.
Ama sapallayniita sakiwaychu.

Kanmi kanki salvawak Tatayni Dios.
10 Tatayni mamayni sakiwaptinkunapish
kan, Tata Dios, mana sakiwashpa yanapawanki.

11 A, Tata Dios,
chikniwak runakuna makawanayaptinkuna
yanapaway allita rurashpa alli ñanpi purikshina kawsanaynipa.
12 Chay sakra runakuna llullakushpa chatawansapa
mana alli rurak kanaynita.

Chayrayku ama munaychu munashkunkunata rurawanankunapa.
13 Chashna chatawaptinkunapish
ñuka allita yachani tukuy diya
kan, Tata Dios, kuyawashpayki yanapawanaykita.

14 Chayrayku akuychi Tata Dios yanapawananchikunata shuyaypachi.
Valorchinakushpa ama sampayaypachichu.
Ariya, Tata Dios yanapawananchikunata shuyaypachi.

34

Tata Diosta roygaptinchikuna payka yanapawanachisapa.

1 Tukuy oras ñuka Tata Diosta willasha alli rurak kananta.
Mana shaykushpa Tata Diosta alabasha.

2 Tata Dios yanapawaptin sukaman kushikuni.
Kankuna, alli modoyuk runakuna,
chayta yakashpa kushikuychi.

3 Tata Dios sukaman tukuy laya atipak kaptin
akuychi tantalla payllata alabaypachi.

4 Tata Diosta yanapawanana mañaptini
payka uyariwashka.
Uyariwashpa yanapawashka
amana manchakunaynipa.

5 Tata Diosta shuyashpanchikuna yanapawananchikunapa
sukaman kushikunchisapa.
Tata Dios yanapawaptinchikuna
mana pinkakunchisapachu.

6 Ñuka sukaman sufrishpayni
Tata Dios yanapawanana
roygaptini uyariwashka.

Yanapawashpa llakidu kashkaynimanta kushichiwashka.

7 Tata Diospa angelninkuna
tukuy Tata Diosta kasuk runakunata amachansapa.

8 Kankuna mishkik mikunata mallikshina
Tata Diosta kuyaychi yachanaykichipa alli rurak kananta.
Tata Dios yanapashunaykichita yachashpaykichi
sukaman kushikunkichi.

9 Kankuna, Tata Diosta kasuk runakuna,
payta kuyaychi.

Chashna kuyaptikichi manami nima illapushunkichichu.

10 Pumakuna sinchi kashpankunapish yarkansapa.
Chashnapish kaptin ūukanchikuna Tata Diosta kasuptinchikuna
aypa allikunata kuwanchisapa.

11 Wambraynikuna, shamuychi uyariwak.

Kunanka yachachiykichi
imashnami Tata Diosta kuyankichi nishpa.

12 Kunanka tapuykichi:

¿Munankichichu unayta kawsayta?
¿Munankichichu kushikushpalla kawsayta?

13 Chashna kawsanayashpaykichika
ama munaychichu mana allikunata rimaya nima llullakuyta.

14 Mana alli ruranaykichita sakishpa
allikunallata ruraychi.

Tukuy piwan allillapi kushikushpa kawsaychi.

15 Allita rurashpa kawsaptikichi
Tata Dios kuydashunkichi.

Roygaptikichi yanapashunkichi.

16 Chaymanta Tata Dios

tukuy mana alli rurak runakunata chikninsapa.
Paykunata kulluchinkasapa

amana ni pi paykunata yuyanankunapa.

17 Allita rurashpa kawsaptinchikuna

Tata Diosta roygaptinchikuna payka yanapawanchisapa.

Llakishpa surfrishpa kawsaptinchikuna

payka yanapawashpanchikuna kushichiwanchisapa.

18 Tukuy uchanchikunata wanayashpa llakiptinchikuna

Tata Dios llakichiwashpanchikuna perdonawashpanchikuna kushichiwan-
chisapa.

19 Allita rurashpa kawsashpanchikunapish
sukaman padesinchisapa.

Chashna padesiptinchikunapish

Tata Dios yanapawanchisapa

kushikushpalla kawsananchikunapa.

20 Tata Dios yanapawashpanchikuna

amachawanchisapa ama chikniwakninchu runakuna
tullunchikunata polvonankunapa.

21 Chaymanta sakra runakuna runamasinkunata wañuchinayashpa
kikinkunalla wañuyta
maskaykansapa.

Tata Dios tukuy alli rurakta chiknik runakunata kastigankasapa.

²² Chaymanta Tata Diosta kasushpa kawsaptinchikuna

payka llakichiwashpanchikuna salvawanchisapa.

Tata Dios amachawananchikuna munaptinchikuna

payka mana kastigawanchisapachu.

37

Runakuna mana allita ruraptinkunapish ama turbakuychu.

¹ Runakuna mana allita ruraptinkunapish
ama turbakuychu.

Chay mana alli rurak runakunata kawashpa
ama paykunashina kawsanayaychu.

² Chay runakunata Tata Dioska
utka kastigankasapa.

Kastigaptinkuna tipido kiwashina tukunkasapa.

³ Tata Dios yanapashunaykita yachashpa
allita rurashpalla kawsay.

Kay allpapi kawsashpaykira

Tata Díosllata allita kasushpa kawsay.

⁴ Payta tukuy shunku kuyashpa kawsay.

Chashna payta kuyaptiki

alli munanaykita almitishunki.

⁵ Tata Diosta kuyashpa

payta willay munananta ruranayanaykita.

Chashna payta willaptiki yanapashunki.

⁶ Tata Dios yanapashuptiki

tukuy runakuna alli ruranaykita
lustashina Kawankasapa.

Alli ruranaykita ruraptiki

inti llipyantanashina Kawankasapa

paykunapish yachanankunapa

allita rurashpa kawsaya.

⁷ Allita rurashpa mana turbakushpa

Tata Dios yanapashunanta shuyay.

Suk runakuna tukuy imayuk kaptinkuna

ama llakishpa rabyakuychu.

Mana allita yuyaykuptinkuna

ama rabyakuychu.

⁸ Ama rabyakushpa piñakuychu.

Ama munaychu turbakushpa

mana allita rurayta.

⁹ Tata Dios tukuy mana allita rurak runakunata kastigankasapa.

Chaymanta Tata Dios yanapashunanta

shuyaptiki payka yanapashunki.

²³ Tata Dios tukuy runakunata yachachiwanchisapa.

Yanapawanchisapa paypa munananta rurananchikunapa.

²⁴ Mana allita ruraptinchikuna

Tata Dios makinchikunamanta apiwakninchishina yanapawanchisapa

ama uchallikushpa kawsananchikunapa.

25 Wayna kashkaynimanta
ñami viejuyashkanina.
Manami kawashkanichu
Tata Dios alli rurak runakunata sakiptin.
Paykunapa wambrankunapish
mana nimata mañakushpachu kawsansapa.

26 Alli rurak runakuna kashpanchikuna
tukuy oras llakichikushpa
runamasinchikunata yanapanchisapa.
Chay runakunapa wambrankunaka
tukuy pita sukaman kushichinsapa.

27 Chayrayku mana alli rurashkaykimanta wanashpa
allikunallata rurashpa kawsay.
Chashnarami Tata Dios mana tukuyniyukta yanapashunki
allita rurashpa kawsanaykipa.

28 Tata Dios alli rurak runakunata kuyansapa.
Payta kasushpa kawsaptinchikuna
mana sakiwanchisapachu.
Chaymanta mana alli rurak runakunata kulluchin.
Tukuy wambrankunatapish kulluchin.

46

Tukuy laya atipak Tata Dios ñukanchikunawan kawsan.

- 1** Tata Dios animuchiwanchisapa.
Chikniwakninchu runakunamanta amachawanchisapa.
Llakishpa sufriptinchikuna yanapawanchisapa.
- 2** Chashna Tata Dios amachawaptinchikuna
alipa chukchukushpa waklliptinpish
mana manchakushunchisapachu.
Urkukuna manllayba kochapi sumiptinkunapish
mana manchakushunchisapachu.
- 3** Yakukuna olasyashpa kaparikuptinpish
urkukuna chukchukuptinkunapish
mana manchakushunchisapachu.
- 4** Suk yaku kallpasshpakushichiwanchisapa
Tata Dios chay yakushina yanapawashpanchikuna kushichiwanchisapa.
Kamachiwakninchikuna Tata Dios ñukanchikunapi kawsan.
- 5** Chashna Tata Dios ñukanchikunapi kawsashpa
sufriptinchikunapish tukuy diya yanapawanchisapa.
- 6** Chayta kawashpa mana Tata Diosta kasuk runakuna
manchakushpa kaparinkasapa.
Sinchi kamachikukkuna sukwana sukwana makanakushpa kawsansapa.
Tata Dios rimakuptin
tukuy llaktakuna wakllichinakunsapa.
- 7** Tukuy laya atipak Tata Dios
ñukanchikunawanmi kawsan.
Jakobopa Tata Diosnimi amachawanchisapa.
- 8** Payka almirana milagrukunatami rurashka.
Shamuychi kawak kay allpapi rurashkanta.
- 9** Kuchun mañan allpapi kamachikushka

amana makanakunankunapa.
 Ñami balistankunata pakishkana.
 Makanakunankuna lansankunata
 ñami paki pakina rurashka.
 Makanakunankuna karrunkunata
 ñami rupachishkana.

10 Chayrayku Tata Dios willawanchisapa:
 “Kasillayaychi.
 Riksiwaychi sinchi kamachikuk Tata Dios kanaynita.
 Yachaychi tukuy allpapi tukuy llaktakunata sinchita kamachinaynita.”

11 Tukuy laya atipak Tata Dios
 ñukanchikunawanmi kawsan.
 Jakobopa Tata Diosninmi amachawanchisapa.

51

Tata Diosta roygaypachi perdonawananchikunapa.

- 1** A, Tata Dios,
 kuyawashpayki llakichiway.
 Llakichiwashpayki uchallikushkaynimanta perdonaway.
- 2** Kuyawashpayki mana alli rurashkaynimanta perdonawashpa mayllaway.
 Tukuy uchaynikunamanta pichaway.
- 3** Allita yachani kanta mana kasunayashpayni uchallikushkaynita.
 Uchallikushkaynita mana atipanichu kunkayta.
- 4** A, Tata Dios,
 uchallikushpayni mana allikunata rurashpayni
 kanta mana kasunayashkaykichu.
 Chashna mana kasunayashpayni rabyachishkayki.
 Uchallikushkaynirayku kastigawanayki tiyan.
 Kan kastigawashpayki
 allinipi kastigawanki.
- 5** Nasishkaynimantapacha
 mana alli rurakmi kani.
 Mamaynipa wiksan ukumantapacha uchasapami kani.
- 6** A, Tata Dios, kanka alli shunkuyuk runata kuyanki.
 Shunkuynipi allita yachachiwashkanki.
- 7** Uchaynikunamanta pichaway
 ñawpaknikipi chuya chuya rikurinaynipa.
 Mana alli rurashkaynimanta mayllaway.
 Chashna mayllawaptiki yurak puyushina kiparisha
 allita rurashpa kawsanaynipa.
- 8** A, Tata Dios, kushichiway.
 Kastigawashkaykimanta kashkan kushichiway.
- 9** Amana uchaynita yuyaynachu.
 Mana alli rurashkaynita kunkay.
- 10** A, Tata Dios,
 uchasapa yuyayninita pichay.
 Yanapaway kanta kuyashpa
 allita rurashpa kawsanaynipa.
- 11** A, Tata Dios,
 ama ñawpaknikimanta karkuwaychu.
 Ama Espirituykita kichuwaychu.

12 Perdonawashpa kashkan kushichiway.

Chashna kushichiwashpayki yanapaway allita rurashpa kawsanaynipa.

13 Chashna yanapawaptiki

mana kasushunayak runakunata rimanaykita yachachisha
munanaykita rurashpa kawsanankunapa.

Chashna yachachikuptini

uchasapa runakuna uchankunata wanashpa kasushushpa kawsankasapa.

53

Tukuy runakuna uchallikunchisapa.

1 Mana alli yuyayuk runakuna

yuyansapa Tata Dios mana tiyananta.

Chashna yuyashpa uchallikushpa
wakllichinakushkasapa.

Uchallikushpa kawsashpankuna
manana allikunata rurayta atipansapanachu.

2 Anak sielumantapacha

Tata Dios tukuy runakunata kawamunsapa

ichará maykan alli yuyayuk

payta kasunayan nishpa.

3 Chashna Tata Dios alli rurak runakunata maskashpapish

mana niman suk alli rurak runata tarinchu.

Tukuy runakuna uchallikushpa wakllichinakushkasapa.

Mana ni pi alli rurak tiyanchu.

Manami niman suk tiyanchu.

4 Chay mana alli rurak runakuna

mana allikunata yuyaykunsapa.

Tata Diosta mana kasunayashpankuna

payta kuyakmasinkunata

chiknishpa sufrichinsapa.

5 Chayrayku mana manchakuna oras kaptinpish

chay mana alli rurak runakuna

manchakushpa chukchukunkasapa.

Tata Dios kastigashpa karkuptinkuna

sukaman pinkakunkasapa.

6 Sukaman munani Tata Dios tukuy israel runakunata kuyawash-
panchikuna

chikniwakninchu runakunamanta salvawananchikunapa.

Tata Dios llakichiwaptingchikuna

tukuy Jakobopa mirakninkuna

israel runakuna kushikushunchisapa.

55

Tata Diosta roygappachi chikniwakninchu runakunamanta amachawananchikunapa.

1 A, Tatayni Dios,

roygaptini uyariway.

Ama nimatashina royanaynita uyariychu.

2-3 A, Tata Dios,

uyariwashpa yanapaway.

Llakishpayni roygayki.

Chikniwak runakuna rimakuptinkuna

mana alli rurak runakuna kaparikuptinkuna
uyarishpa sukaman manchakuni.

Paykunaka chikniwashpa sufrichiwansapa.
Sukaman piñakushpa makawanayansapa.

4 Chayta kawashpa manchakuptini
shunkuyni sinchita waktanakun.
Wañuchiwanankunata yuyashpa
sukaman manchakuni.

5 Chashna sukaman manchakushpayni chukchukuykani.

6 Chayta yuyashpa rimani:
¿Imapatí mana urpayshina rikrayuk kani?
Rikrayuk kashpaynika
nitikushpa payawayman samak rinaynipa.

7 Pawashpayni karuta riyman.
Chakidu pampapi kipariyman
chaypi kawsanaynipa.

8 Chikniwak runakuna sinchita sufrichiwaptinkuna
Tata Diosta sukaman mañasha
sinchi wayramantashina amachawanana.

12 Manami chikniwak runachu sufrichiwashka.
Chikniwak runa sufrichiwaptinka
mana nimachu kanman.

Sufrichiwak runamanta ñukaka pakakuyman.

13 Chay sufrichiwak runaka
kuyanakushpa purikmasinimi kashka.

14 Paywanmi Tata Diospa wasinpi yaykushpaynikuna parlak kanisapa.
Paywanmi kushikushpa aypa runakunapa chawpinkunapi purik kanisapa.

15 Tukuy chikniwak runakuna
mana yuyashkankuna oras wañuchunsapa.
Mana alli rurak kashpankuna
raslla wañuchunsapa.

16 Ñuka sufrishpayni
Tata Diostami roygasha.
Roygaptini yanapawanka.

17 Pakarinanta chishita tutata wakaptini
Tata Dios llakichiwashpa yanapawanka.

18 Chikniwak runakunawan makanakuptini
ama wañuchiwanankunapa
Tata Dios yanapawanka.

Paykuna aypa kaptikunapish yanapawanka.

19 Paykuna mana Tata Diosta manchashpa
mana allikunallata rurashpa kawsansapa.
Chayrayku mana tukuyniyukta
sinchi kamachikuk Tata Dios

chikniwak runakunata kastigashpa upallayachinka.

20 Paykunaka kuyanakukmasinkunawan makanakunsapa.
Allimata kawsanankunapa parlashkankunawasha
chikninakunsapa.

kunkashpa

21 Mishki shimi tukushpa parlansapa.
Chashna parlashpankunapish
makanakuyllata yuyansapa.

Mishki shimi tukushpa parlashpankunapish
chikninakushpalla kawsansapa.

22 Akuychi tukuy yuyananchikunata
Tata Diosta willaypachi.
Chashna willaptinchikuna payka yanapawashunchisapa
allillata rurashpa kawsananchikunapa.
Tata Diosta kasuptinchikuna
payka yanapawanchisapa ama uchallikunanchikunapa.

23 A, Tata Diosnini,
wañuchikuk llullakuk runakuna
mana unaytachu kawsankasapa.
Paykunata kulluchinkisapa.
Chashnapish kaptin
ñukaka yachani yanapawanaykita.

61

Tata Dios amachawanchisapa.

1 A, Tata Dios,
sukaman llakishpayni kaparikuptini
uyariway.

Roygaptini uyariwashpa yanapaway.

2 Kay allpapi kuchun mañanpi kashpaynipish
manana yachashpa imatami rurasha nishpa kanta rogayaki.
Roygaptini manllayba rumi sawanpishina churawashpayki
chikniwak runakunamanta salvaway.

3 A, Tata Dios,
kanmi amachawanki.
Amachawashpayki allima pirkashina
chay chikniwak runakunamanta arkawanki.

4 Tukuy tiempu wasikipi kawsanayani
wallpa wawankunata rikran sikipi amachakshina kuydawanaykipa.

5 A, Tata Dios,
kanmi tukuy promesakushkaynita uyarishkanki.
Chayrayku yanapawashkanki.
Kanka tukuy kuyashushpa kawsak runakunata yanapankisapa.

6 A, Tata Dios,
kamachikuk kaptini yanapaway
sukaman unayta kawsanaynipa.

7 Yanapaway allita kamachikunaynipa.
Kuyawashpayki ama shaykushpa kuydaway.

8 Chashna yanapawaptiki
tukuy tiempu kanllata alabashpayni kawsasha.
Tukuy diya promesakushkaynita rurasha.

73

Tata Dios sukmán kuyawanchisapa.

1 Tata Dios tukuy israel runakunata kuyashpa yanapansapa.

Tukuy shunku allita yuyashpa kawsak runakunata yanapansapa.

2 Chashna Tata Dios yanapakuk kaptinpish

yaka yaka mana allita rurashpa mitkakukshina urmanayarkani.

³ Kikinkunalla kreyinakuk tukuy imayuk
mana allita rurashpa kawsak runakunata kawarkani.

Ñukapish paykunashina kanayashpayni yakallapa uchallikurkani.

⁴ Paykunaka wañuya mana manchansapachu.

Mana ni unkushpa shaykunsapachu.

⁵ Mana yachansapachu imami llakina nishpa.

Mana runamasinkunashinachu
sufrishpa kawsansapa.

⁶ Sukaman kikinkunalla kreyinakushpangkuna
sufrichikushpalla kawsansapa.

⁷ Tukuy layayuk kashpangkuna
tukuy mana alli munanankunallata ruransapa.

⁸ Tukuy pita mana nimatashina kawansapa.
Mana pinkakushpa kikinkunalla alabanakunsapa.

Tukuy pita jorachinsapa
mana allita ruranankunapa sufrichinankunapa.

⁹ Sukaman mana allita rurashpangkuna
willansapa Tata Diosta mana kasunayanankunata.
Runakunatapish washanchansapa.

¹⁰ Chayrayku runamasinkuna
paykunata alabansapa.

Paykunata sukaman kreyinsapa.

¹¹ Rimansapa: “Tata Dios mana alli rurananchikunata
mana yachankachu.

Sielupí kawsak Tata Dios mana nimata yachanchu.”

¹² Chay mana alli rurak runakuna
mana nimapi sufrishpangkuna kullkiyansapa.

¹³ Chayta kawashpa yuyarkani:
“Llullakushpa alli shunkuyuk runa kawsaykani.
Llullakushpa allillata rurashpa kawsaykani.

¹⁴ Tukuy oras sufrini.
Tukuy diya Tata Dios kastigawan.”

¹⁵ A, Tata Dios,
chay mana alli rurak runakunashina chayta rimashpaynika
kreyishukmasinkunata llullachiymansapa karkan.

¹⁶ Chayta yuyashpayni
mana atiparkanichu entiendiyta imapami Tata Dios mana uchankunaryku
kastigansapa nishpa.

¹⁷ Tata Diospa wasinpi yaykushpaynira
allita yacharkani Tata Dios chay mana alli rurak runakunata kastigananku-
nata.

¹⁸ A, Tata Dios,
kanmi chay mana alli rurak runakunata
churashkanki llukchak ñanpishina
uchallikuptinkuna kullchinaykipasapa.

¹⁹ Raslla paykunata kastigankisapa.
Paykunaka manchakuywan wafunkasapa.

²⁰ Paykuna llullachinakuptinkunapish
kan, Tata Dios, kastigakunayki diya chayamuptin

tukuy mana alli rurashkankunata
tukuy runakunata kawachinkisapa.

21 Chay mana alli rurak runakunata kawashpa
sukaman turbakurkani.
Turbakushpa sukaman llakirkani.

22 A, Tata Dios,
mana nima yachak Kashpayni
ñawpaknikipi suk animalshina karkani.

23 Chashna mana entiendiptinipish
kanka kuyawashpa mana sakiwashkankichu.
Makinimanta apiwashpa purichiwashchina yanapawashkanki.

24 Yachachiwashpa yanapawashkanki
allita rurashpa kawsanaynipa.
Chaymanta kawsanaykipi
kushikushpa chaskiwanki.

25 Kanlla sielumanta yanapawanki.
Kanwan kawsashpayni
mana nima ashwanta munanichu.

26 Sukaman sampayaptinipish, kan tata Dios,
mana tukuyniyukta kuyawashpa yanapawanki.

27 A, Tata Dios,
mana kasushunayak runakuna wañunkasapa.
Kanmi mana kreyishuk runakunata kulluchinkisapa.

28 Paykuna mana kreyishuptinkunapish
ñukaka kanwan tantalla kawsanayani.
Kanmi, Tata Dios, amachawanki.
Chayrayku runamasinikunata willashasapa
alli rurak kanaykita.

100

Tata Dios rurawashkanchikunaryku paypa wambrankuna kanchisapa.

1 Tukuy allpapi kawsak runakuna,
Tata Diosta kushichishpa kantaypachi.

2 Kushikushpa Tata Diosta kuyaypachi.
Kushikuywan kaparikushpa ñawpakninman shamuypachi.

3 Tata Diosta riksipyachi sinchi kamachikuk kananta.
Pay rurawashkanchikunaryku
paypa wambrankunami kanchisapa.

Paypa pastunpi ovejankunashina kanchisapa.

4 Chayrayku Tata Diospa wasinman shamuypachi.
Kushikushpa payta alabashpa kantukunata kantashpa
punkunta yaykuypachi.

Tata Dios sukaman yanapawaptinchikuna
kushichishpa kuyaypachi.

5 Tata Dios alli rurak kaptin
mana tukuyniyukta kuyakuk kaptin
kushikushpa payta kuyaypachi.

104

Tukuy layata rurak Tata Diosta alabaypachi.

1 Tata Diosta tukuy shunku kushichishpa alabasha.

A, Tatayni Dios,
ashwan sinchi kamachikukmi kanki.
Tukuy laya atipak kashpayki
sukaman allimami kanki.

2 Luswan sawa llachapawanshina wankunakushkanki.
Sieluta warkudu llachapatashina churashkanki.

3 Kan tukuy layata kamachishpa
sielupi wasikipa orkonninkunatashina
manllayba kochapi sinchichishkanki.
Puyukunata rurashkanki purinayki karrukunashina kanankunapa.
Wayrashina maytapish rinayashpa rinki.

4 Sinchi wayra yachachiwanchisapa sukaman atipak kanaykita.
Rawraykak ninakunapish kanllapami.

5 A, Tata Dios,
allpata allimata sinchichirkanki.
ama churashkaykimanta kuyunanpa.

6 Yakukuna suk llachapashina allpata kirparkan.
Yakukuna tukuy urkukunata kirparkan.

7 Kan, Tata Dios, yakukunata willaptiki kallparkansapa.
Troynoshina rimakuptiki
yakukuna uyarishpa nitikurkansapa.

8 Urkukunata llukashpa bajadakunata urayashpa
rinkansapa maypicha willashkaykipi kanankunapa.

9 Willarkankisapa amana chaymanta llukshinankunapa
ama kashkan allpata kirpanankunapa.

10 Chaymanta yaku pachyamunankunamanta
urkukunata pasashpa yakuta kallpachishkanki
atun yakukunaman rinankunapa.

11 Chay yakukunamanta tukuy sachakunapi kawsak animalkuna yakukun-
sapa.
Chayta upyashpa sachapi kawsak burrukuna yakunayayninta samachin-
sapa.

12 Pawak animalkuna yaku mañankunapi wasichakunsapa.
Kaspikuna ramanpi kantansapa.

13 A, Tata Dios,
kanmi anak sielupi wasikimantapacha
yakuta tamyachishpa sachakunata fiuyuchinki.
Altumanta urmamuk yakuwan allpata saksachinki.

14 Chay yakuwan pastukunata wiñachinki
animalkuna mikunankunapa.
Runakuna tarpunan murukunata wiñachinki
wayuchakuptin mikunankunapa.

15 Chay wayukunata mikunsapa fersasyuk kanankunapa.
Vinuta upyansapa kushikunankunapa.

16 Kan, Tata Dios, chay yakullawan kaspikunata saksachinki.
Libano partipi tarpushkayki sedrukunatapish saksachinkisapa.

17 Chay kaspikunapi taksha pishkillukuna wasichakunsapa.
Pino kaspikunapi garsakuna kawsansapa.

18 Altu urkukunata kabrakunapa rurashkanki.
Rumikuna sikipi achunikuna pakakunsapa.

19 Killata rurashkanki yachanaynikunapa
ima laya tiempumi nishpa.

Intipish yachan
imay orasmi urkukunapi chinkanka nishpa.

20 Chaymanta yana llachapatashina mantanki tutayanana.
Tutayaptin sachapi animalkuna llukshinsapa.

21 Pumakuna mana mikunankunata tarishpa kaparinsapa.
Tata Diosta mañansapa mikunankunata kunankunapa.

22 Inti kashkan llukshimuptin
machayninkunapi sirik kutinsapa.

23 Chashna diyayaptin ullkukuna trabajunkunaman rinsapa.
Tutayanankaman trabajansapa.

24 A, Tata Dios,
rikchak layata rurashkanki.
Kay allpaka tukuy rurashkaykiwan untami.

25 Allpapi tiyan manllayba kocha.
Chay kochapi mana yupapya atun animalkuna taksha animalkuna tiyan.

26 Chay manllayba kochapi barkukuna purinsapa.
Yaku ukupi manllayba manchanapa animal kawsan
chaypi pukllanana.

27 A, Tata Dios,
tukuy chay animalkuna
kanta shuyashunkisapa mikunankunata
munashkankuna oras kunaykipasapa.

28 Kan, Tata Dios, mikunankunata kunkisapa.
Chashna kuptiki chay animalkuna apinsapa.
Paykunata kuptiki
munashkankunawan saksansapa.

29 Chay animalkunata manana yanapaptiki manchakunsapa.
Manana kawsanankunapa samaya kuptiki wañunsapa.
Usushpa polvo tukunsapa.

30 Munashpayki kashkan kawsachinkisapa.
Chashna kawsachikushpa allichanki
allpa kashkan allima rikurinanpa.

31 Mash uyariwaychi.
Tata Dios mana tukuyniyukta kamachikun.
Tukuy rurashkanta kawashpa sukaman kushikun.

32 Tata Dios munaptin allpa chukchukun.
Tata Dios urkukunata llankaptin kusninsapa.

33 Ñuka chaykunata kawashpa wañunayni diyakaman
kantukunata kantashpa Tata Diosta kushichisha.

34 Allita yuyashpayni munani Tata Diosta kushichiyta.
Paymi ñukata kushichiwan.

35 Kushikushpa rimani:
Allpamanta tukuy ucha rurak runakuna chinkachunsapa.
Mana alli rurak runakuna amana kawsachunsapanachu.
Ñukaka Tata Diosta tukuy shunku kuyashpa alabani.
Munani tukuy runakuna Tata Diosta alabanankunapa.

119

Tata Diospa rimanan sukaman allima.

⁹ A, Tata Dios

¿imashnatí wayna runa atipanman
mana uchallikushpa kawsayta?
Waynaka rimanaykita kasushpa
mana uchallikushpa kawsanka.

¹⁰ Ñuka tukuy shunku yanapawanaykipa munani.

Yanapaway kamachikunaykikunata kasushpa kawsanaynipa.

¹¹ Tukuy rimanaykitami tukuy shunku allita kasushkani
ama uchallikushpa kanta rabyachinaynipa.

¹² A, Tata Dios,

kanta sukaman alabayki.

Kamachikunaykikunata yachachiway.

¹³ Tukuy yachachiwanaykita

ñukapish runamasinikunata parlachisha.

¹⁴ Aypa imakuna tiyapaptin kushikunaynimanta
rimanaykita kasushpayni ashwanta kushikusha.

¹⁵ Tukuy rimanaykita yuyashpa kawsasha.

Chayta yuyashpa allita rurashpa kawsashpayni
ñannikipi purisha.

¹⁶ Rimanykita yachashpayni sukaman kushikusha.

Mana kutin kunkashachu.

⁹⁷ A, Tata Dios,

sukaman yachachiwashkaykita kuyani.

Tukuy diya chayta yuyashpa chishyani.

⁹⁸ Tukuy kamachikunaykikunata ñami yachanina.

Rimanaykika chikniwak runakunamanta
ashwan alli yachaktami rurawashka.

⁹⁹ Kamachikunaykikunata yuyashpa kawsashpayni
rimanaykita yachachiwak runakunamanta ashwan allita entiendini.

¹⁰⁰ Rimanykita kasushpa kawsashpayni
kamachikuk ansianukunamanta ashwan allita entiendini.

¹⁰¹ Tukuy mana alli ruranakunatami sakishkani
rimanaykita kasushpa kawsanaynipa.

¹⁰² Rimanykita kan yachachiwaptiki
mana chaykunata sakishkanichu.

¹⁰³ Rimanykipi willawanki yanapawanaykipa.
Rimanayki ñukñushina allimami.

Chayrayku ñukñumanta ashwanta rimanaykita munani.

¹⁰⁴ Rimanykimi tukuy alli ruranakunata yachachiwashka.

Chayrayku chay mana alli ruranakunata
manana munaninachu rurayta.

¹⁰⁵ Rimanykika allima lamparashinami
purinayni ñanpi allima lusshina.

121

Tata Dios amachawanchisapa.

¹ Urkukunata kawashpayni tapunakuni:

¿Pití ñukata yanapawanman?

² Tukuy kay allpata sieluta rurak Tata Diosmi yanapawanka.

- ³ Tata Diosmi kantapish yanapashunki
ama uchata rurashpa urmanaykipa.
Kuydashuk Tata Dios manami puñunchu.
- ⁴ Israel runakunata kuydak Tata Dios
manami shaykunchu nima puñunchu.
- ⁵ Tata Diosmi allita kuydashunki.
Tata Diosmi amachashunki.
Laduykillapi kashpa yanapashunka.
- ⁶ Chashna Tata Dios amachashuptin
mana diyapi rupay
nima tutapi killa wakllichishunkachu.
- ⁷ Tata Dios yanapashunka
ama nima wakllichishunarpa.
Payka sukaman allita amachashunki.
- ⁸ Maymanpish riptiki
tukuy tiempu Tata Dios yanapashunki.

133

Kuyanakushpa kawsananchikuna tiyan.

- ¹ Mash allita yuyaychi.
Sukaman allimami wawkinchikunawan paninchikunawan
kushikushpa kuyanakushpa kawsananchikunapa.
- ² Tata Dios Aronta akllaptin saserdote kananpa
wawkin Moiseska umanpi mishkilla wirata tallirkan.
Chashna talliptin Aronká runamasinkunata yachachirkansapa
sukwan sukwan kuyanakushpa kawsanankunapa.
Chay wira tukuy saserdote kunapa barbarkunata surushpa
tukuy llachapankunata ñuyuchin.
Chashnashina Tata Dios ñukanchikunatapish yachachiwanchisapa
sukwan sukwan kuyanakushpa kawsananchikunapa.
- ³ Chashna kuyanakushpa kawsashpanchikuna
Hermon urkupi serenushina kanchisapa.
Sion urkuta ñuyuchik serenushina kanchisapa.
Chashna kuyanakushpa kawsaptinchikuna
Tata Dios kushikushpa sukaman yanapawanchisapa
mana tuku niyukta paywan tantalla kawsananchikunapa.

139

Tata Dios allita riksiwanchisapa.

- ¹ A, Tata Dios,
sukaman allita kawawashkanki
yachanaykipa allitachu manachu ruraykani nishpa.
Sukaman allita riksiwanki.
- ² Kan yachanki tukuy ima ruranaynita.
Kanmanta karupi kapitinipish
tukuy yuyanaynita yachanki.
- ³ Maymanpish riptini
maypipish samaptini
tukuy ruranaynita yachanki.
- ⁴ Manara nimata rimaptinira
kan yachanki imatamí rimanayani nishpa.

5 Allita chawpichawashpa kuydawanki.
 Makikita ñukapi churanki yanapawanaykipa.
6 Chaykunata yachashpayni
 sukaman almirani.
 Mana atipanichu entiendiyta
 imashnami hashna kuydawanki nishpa.

7 Chashna sukaman kuydawaptiki
 mana atipanichu Espirituykimanta pakakuya.
 Ñawpaknikimanta mana atipanichu pakakuya.

8 Sielman riptinipish
 chaypimi kawawanki.
 Wañudukuna rinankunaman riptinipish
 chaypimi kawawanki.

9 Inti llukshimunan partiman riptinipish
 inti yaykunan partipi
 manllayba kochaman riptinipish
 chaypipish kawawanki.

10 Tukuy maymanpish riptini tariwanki.
 Alli ladu makikiwan apiwashpa purichiwanki.

11 Yuyaptini tutami pakawanka nishpa
 chaypipish tariwanki.
 Diya tutayaptinpish chaypimi tariwanki.

12 Sukaman tutayaptinpish
 mana kanmanta atipanichu pakakuya.
 Tuta kaptinpish diyapishina kawakunki.
 Tutapi diyapi hashnallami kawakunki.

13 Kanmi mamaynipa wiksanpi rurawashkanki.
 Tukuy kuerpuynita rurashkanki.

14 Chaykunata yachashpa almirashpa alabayki.
 Sukaman almirana layakunata rurashkanki.
 Allita yachani tukuy layata rurashkaykita.

15 Mamaynipa wiksanpi kuerpuyni wiñaptin
 mana ni pi kawawaptinpish
 kanmi kawawashkanki.

16 Kuerpuyni wiñaykaptin kawawashkanki.
 Libruyki tukuy chaykunata killkashkanki.
 Manara kawsaptinira yachashkanki
 mashna diyakunatami kawsasha nishpa.

17 A, Tata Dios,
 favorninipa allimata yuyaykanki.
 Yuyanaykikunaka sukaman mana yupaypa layami.

18 Rurashkaykita yupanayashpayni
 playatashina mana atipanichu yupayta.
 Puñushkaynimanta atarishtpayni kanllawan kani.

19 A, Tata Dios,
 tukuy sakra mana alli rurak runakunata kastigaysapa.
 Chay wañuchiwanayak runakunata
 ñukamanta anchuchiysapa.

20 Washanchashuk runakunata

yankamanta chiknishuk runakunata kastigaysapa.

21 A, Tata Dios,
chiknishuk runakunata chiknini.

Mana kasushunayak runakunata mana nimatashina kawanisapa.

22 Tukuy shunku paykunata chiknisisapa.

Chay chiknishuk runakunata yuyani
chikniwak runakuna kanankunata.

23 A, Tata Dios,
allita kawaway yachanaykipa
allitachu manachu kuyayki nishpa.

Riksiway allitachu manachu yuyaykuni nishpa.

24 Kawaway ichará mana allikunata ruraykani nishpa.

Chashna mana allita ruraptini
yanapaway allita rurashpa
alli ñannikita katinaynipa.

JESUKRISTU KAY ALLPAPI KAWSASHKANTA SAN MATEO KILLKARKAN

Kaymi Jesukristupa ayllunkuna.
(Lk 3.23-38)

¹ Ñawpa tiempu Jesukristu nasirkan alli kamachikuk Davidpa ñawpa awilunchi Abrahampa ayllunkunamanta. ² Abrahamka karkan Isakpa tatan. Isakka karkan Jakobopa tatan. Jakoboka karkan Judapa wawkiñkunapa tatan. ³ Judaka karkan Farespa Sarapa tatan. Farespa Sarapa maman karkan Tamar. Fareska karkan Esrompa tatan. Esromka karkan Arampa tatan. ⁴ Aramka karkan Aminadabpa tatan. Payka karkan Naasonpa tatan. Naasonka karkan Salmonpa tatan. ⁵ Salmonka karkan Boospa tatan. Boospa maman karkan Rahab. Booska karkan Obedpa tatan. Paypa mamanka karkan Ruti. Obedka karkan Isayipa tatan. ⁶ Isayika karkan alli kamachikuk Davidpa tatan. Davidka karkan Salomonpa tatan. Salomonpa maman manara Davidpa warmin kashpa Uriyaspa warmin karkan. ⁷ Salomonka karkan Roboampa tatan. Roboamka karkan Abiyaspa tatan. Payka karkan Asapa tatan. ⁸ Asaka karkanna Josafatpa tatan. Josafatka karkan Joramapa tatan. Joramka karkanna Usiyaspa tatan. ⁹ Usiyaska karkan Jotampa tatan. Jotamka karkan Akaspa tatan. Akaska karkan Esekiyaspa tatan. ¹⁰ Esekiyaska karkan Manasespa tatan. Manaseska karkan Amonpa tatan. Amonka karkan Josiyaspa tatan. ¹¹ Josiyaska karkan Jekoniyaspa wawkinkunapa tatan. Chay pachana Babilonia llaktamanta runakuna israel runakunata apishpana pusharkansapa llaktanman chaypi paykunapa munanankunata rurashpa kawsanankunapana.

¹² Chaymanta Babilonia llaktamanta kutimuptinkuna Jekoniyaska karkan Salatielpa tatan. Salatielka karkan Sorobabelpa tatan. ¹³ Sorobabelka karkan Abiyupa tatan. Abiyuka Eliakimpa tatan karkan. Eliakimka Asorpa tatan karkan. ¹⁴ Asorka Sadokpa tatan karkan. Sadokka karkan Akimpa tatan. Akimka Eliyupa tatan karkan. ¹⁵ Eliyuka karkan Eleasarpa tatan. Eleasarka Matanpa tatan karkan. Matanka Jakobopa tatan karkan. ¹⁶ Jakoboka Josepa tatan karkan. Joseka Mariyapa kusan karkan. Mariyaka karkan Jesuspa maman. Tata Dios Jesustaka kachamurkan kay allpaman runakunata uchankunamanta salvanankunapa. Chayrayku Jesuspa suk shutin karkan Kristu.

¹⁷ Ñawpa awilunchi Abrahammantapacha kamachikuk Davidkaman chunka chusku kuti chay runakuna mirarkansapa. Chaymanta Davidmantapacha Babilonia llaktaman israel runakunata pushashkankuna pachakaman chunka chusku kuti chay runakuna mirarkansapa. Babilonianam pushashkankunamantapacha Tata Diosmanta salvakuk runa nasishkan tiempukaman chunka chusku kuti chay runakuna mirarkansapa.

Jesukristu nasirkan.
(Lk 2.1-7)

¹⁸ Jesukristu kashna nasirkan. Tiyarkan suk shipash Mariya. Chay shipash mañaduna karkan kasarakunamanta Josewan. Manara Josewan tanta-nakushpara Mariyaka okupadana karkan Tata Dirosa Espiritunpa. ¹⁹ Joseka

novian Mariya okupada kananta yachashpa manana munarkannachu paywan kasaraya. Alli rurak runa kashpa mana munarkanchu demandayta ama llaktamasinkunapi pinkachinanpa. Yuyaykurkan upallalla sakiyta.

²⁰ Sakinampa yuyaykuyaptinna suk tuta muskuyinpi Tata Diospa angelin willarkan: "Kanmi ñawpa Davidpa miraknin kanki. Chayrayku Tata Dios munan noviyaki Mariyawan kasaranaykipa. Chay wawanka Tata Diospa Espiritunpami. Manami ullkupachu. Ama pinkakuychu noviyaki Mariyawan kasaraya. ²¹ Mariyaka suk ullku wambrata wawayanka. Chay wambra llaktamasinkunata kástigumanta salvankasapa. Chayrayku chay wambrata shutiyachinki Jesus." Chayta willashpa chay angelka Josetaka sakirkan.

²²⁻²³ Ñawpa pacha Tata Dioska suk yachachikuk runata willarkan: "Suk sensilla shipashmi ullku wambrata wawayanka. Payta shutiyachinkichi Emanuel."

Emanuel riman "Tata Dios ñukanchikunawan." Chay killkadun rimashkanshina Mariyaka wawayarkan.

²⁴ Joseka puñuymanta rikchashpa Tata Diospa angelin willashkanta kasushpa Mariyawan kasararkan. ²⁵ Kasarashkankunawasha Mariyaka wawayanankaman manami Josewanka puñurkanrachu. Mariyapa wawan nasiptin Joseka shutiyachirkan Jesus.

2

Alli yachaysapa runakuna shamurkansapa Jesusta kuyak.

¹ Sinchi kamachikuk Herodes chay llaktakunapi kamachikushkan tiempu Belen llaktapi Jesuska nasirkhan. Chay Belen llaktaka Judea partipi karkan. Jesus nasiptinna inti llukshimunan partimanta luserukunata yachakuk yachaysapa runakuna shamurkansapa. ² Jerusalen llaktapi chayash-punkuna chaypi kawsak runakunata willarkansapa:

—Chay karu llaktaynikunapi suk llipyak luseruta kawashkanisapa. Chay luseruta kawashpaynikuna yachanisapa suk wambra nasishkanta kankuna judiyu runakunata kamachishunaykichi. Chayrayku shamushkanisapa payta kuyanaynikunapa. ¿Maypiti nasishka?

³ Chayta uyarishpa kamachikuk Herodeska sukaman turbakurkan. Sukaman manchakurkan. Jerusalen llaktapi kawsak runakunapish turbakurkansapa.

⁴ Chaypina Herodeska tukuy saserdotekunapa kamachikukninkunata Moisespa killkadunta yachachikkunata kayachishpa tapurkansapa:

—Kankunaka Tata Diospa rimananta yachashpaykichi willawaychi ¿maypiti nasinka Tata Diosmanta shamuk salvakuk runa?

⁵ Chaypina chay runakuna aynirkansapa:

—Kay Judea partipi Belen llaktapi nasinka. Ñawpa yachachikuk runa Tata Dios rimashkanta killkarkan:

⁶ "Judea partipi aypa atun llaktakuna tiyaptinpish taksha Belen llaktapi suk wambra nasinka alli kamachikuk kananpa.

Paymi israel wambraynikunata allita yachachinkasapa."

⁷ Chayta uyarishpa Herodeska chay alli yachak runakunata pakallalla kayachirkan. Paykunata tapurkansapa:

—¿Aykapiti rikurimushka chay alli llipyak luseruka?

⁸ Paykuna willaptinkuna Herodeska willarkansapa:

—Rillaryachi Belen llaktaman. Chaypi chay nasidu wambrata allita maskamuychi. Payta tarishpaykichi shamuychi willawak ñukapish rinaynipa payta kuyak.

⁹ Chashna Herodes willaptinkuna Belen llaktaman chay yachaysapa runakunaka rirkansapa. Riyakashpangkuna llaktankunapi kawashkankuna luseruta kashkan kawarkansapa. Chay luseruka ñawpakaninkunata rishpa shayarirkan maypicha Jesus kananpi. ¹⁰ Paykunaka chay luseruta kawashpangkuna sukmaman kushikurkansapa. ¹¹ Chaymanta chay wasipi yaykushpangkuna mamanwan wambra Jesusta kawarkansapa. Chaypina paykunaka kunkurikushpangkuna chay wambrataka kuyarkansapa. Chaypina apamushkan kajonninkunamanta surkurkansapa kurita, kaspi wikin mishkiklla asnakta, ampinakuna kaspi wikinta. Chay kimsa layakunata wambra Jesusta kuyashpa kurkansapa.

¹² Chaymanta Tata Dioska paykunata muskuyninkunapi willarkansapa amana Herodesman rinankunapa. Chayrayku Tata Diosta allita kasushpa suk chikan ñianta llaktankunaman kutirkansapa.

Jose Mariyawan Jesusta pusharkan Egipo llaktaman.

¹³ Chaypina chay yachaysapa runakuna llaktankunaman rishkankunawasha Tata Diospa angelnin Josefaka muskuyninpi rikurishpa willarkan: —Herodeska kay wambra Jesustaka maskachinka wañuchichinanpa. Chayrayku utkana atarishpayki wambrata mamanwan tantallata pushay Egipo llaktaman. Chaypi kipariyichi ñuka willanaynikaman kutimunaykichipa.

¹⁴ Chashna chay angel willaptin Joseka atarimushpa chay tutalla wambra Jesusta mamanwan tantallata pusharkan Egipo llaktaman.

¹⁵ Ñawpa yachachikuk runa Tata Diospa rimashkanta killkarkan: “Egipo llaktamanta wambraynita kayarkani.” Tata Dios killkadunpi rimashkanshina paykunaka Egipo llaktapi kawsarkansapa Herodes wañunankaman.

Herodes aypa wambrakunata wañuchichirkan.

¹⁶ Chaypina kamachikuk Herodeska yacharkan yachaysapa runakuna llullachishpa chikan ñanta llaktankunaman kutishkankunata. Chayrayku sukmaman piñakurkan. Jerusalenpi kashpangkuna chay yachaysapa runakunaka payta willarkansapa aykapimi chay luseruka rikurimushka nishpa. Chayta willaptinkuna Herodeska yacharkan mashna watayukna Jesus kananta. Chaypina Jesusta wañuchinayashpa Belen llaktaman soldadunkunata kacharkan. Paykunaka Belenpi tukuy ladunpi tiyak llaktillukunapipish tukuy manara ishkay watayuk wambrillukunata wañuchirkansapa.

¹⁷⁻¹⁸ Ñawpa yachachikuk Jeremiyas killkarkan:
“Rama llaktapi tukuy warmikuna ñawpa Rakelshina sukmaman llakishpa kaparishpa wakakurkansapa wawankunata wañuchiaptinkuna.
Mana munarkansapachu ni pi kushichinankunapa wawankuna wañushka kaptinkuna.”

Chay killkadunpi rimashkanshina llullukunata wañuchirkansapa.

¹⁹ Chaymanta Herodes wañuptin Egipo llaktapi Jose puñuykaptin Tata Diospa angelnin willarkan: ²⁰ “Atariyna. Chay wambrata mamanwan tantallata pushashpayki kutiy Israel llaktaykichiman. Chay wambra wañuchinayak runakunaka ñami wañushkasapan.”

²¹ Chaypina Joseka angelta kasushpana wambrataka mamanwan pusharkan Israel llaktaman. ²² Chayashpangkuna Joseka yacharkan Herodespa wambran Arkelao Judea partipi kamachikuk kananta. Chayrayku manchakurkan Judeaman riýta. Tata Dios muskuyninpi willaptin Galilea partiman rirkansapa. ²³ Ñawpa yachachikuk runakuna rimarkansapa: “Nasaret llaktapi kawsaptin Tata Diosmanta shamudu

runata shutiyachinkasapa Nasareno.” Chayrayku Jose Galilea partipi chayashpa Nasaret llaktapi rirkansapa kawsak.

3

*Juan Bawtista kallarirkan yachachikuyta.
(Mr 1.1-8; Lk 3.1-9, 15-17; Jn 1.19-28)*

¹ Chaymanta aypa watakuna washan Judea partiman suk runa Juan rirkana chunlla chakidu pampapi yachachikuk. Aypa runakunata Juan bawtisaptinkuna payta shutiyachirkansapa Juan Bawtista.

² Chaypina Juanka willarkansapa:

—Tata Dios suaman munan mandunpi yaykunaykichipa. Chayrayku tukuy mana alli rurashkaykichimanta wanaychi.

³ Ñawpa alli yachachikuk Isaiyas killkarkan:

“Chunlla chakidu pampapi suk runa sinchita yachachikuykan:
‘Señorninchipa suk ñanta allichaychi.

Suk ñanta kuskachaychi chayta purinanpa.’”

Chashna killkashpa Isaiyaska Juanpami killkarkan.

⁴ Juanpa llachapan kamellu millwanmanta awadu karkan. Karapamanta ruradu chumbiwan sinturanta watak. Atun marukunata sachá amukunapa mishkinta mikuk.

⁵ Chaypina aypa runakuna Jerusalen llaktamanta Judea partimanta Jordan yaku ladun llaktakunamanta llukshiksapa Juanta uyarinankunapa.

⁶ Chaypina chay runakuna Juanta uchankunata willarkansapa. Chashna uchankunata willaptinkuna Jordan yakupi Juanka bawtisarkansapa.

⁷ Chaymanta Fariseo runakunawan Saduseo runakuna rirkansapa Juanta willak bawtisanankunapa. Chaypina Juanka paykunata willarkansapa:

—Kankuna suaman llullachikushpaykichi machakuysina kankichi. Tata Dios kankunata utkana suaman kastigashunkichi.

¿Pítí willashushkankichi kastiguycichimanta kishpinaykichipa? ⁸ Manara bawtisakushpaykichira allita rurashpa kawsaychi tukuy runakuna yachanankunapa wanashkaykichita.

⁹ Amana yuyanakuyuchinachu: “Ñukaykuna ñawpa awilunchi Abrahampa miraknin kaptinikuna Tata Dios mana kastigawankasapachu.” Ñuka willaykichi: Tata Dios kay rumikunamanta atipanman Abrahampa mirakninta rurayta. ¹⁰ Suk kaspi mana allita wayuchakuptinka doyñun sapinpi achawan kuchushpa rupachin. Chashnamí Tata Dios kankunata mana alli rurashkaykichirayku utkana kastigashunkichi.

¹¹ Chaymanta Juanka willarkansapa:

—Ñukaka yakullawan bawtisaykichi mana alli rurashkaykichimanta wanaykichipa. Chaymanta washaynita ñukamanta ashwan alli yachachikuk runa shamun. Payka Tata Diospa Espiritunwan ninawanshina bawtisashunkichi uchaykichimanta pichashunaykichipa. Chay yachachikuk runa ñukamanta ashwan tukuy laya atipakmi. Chayrayku mana animukunichu ushutanta apayta.

¹² Triguta waktashpa murukunata surkunchi. Chaypina murukunata wakaychanchi. Trigupa tullunkunata rupachinchí. Chay ñukamanta ashwan yachaysapa runaka chay trigu murukuna surkuk runashinami. Paymi tukuy kreyikukkunata allita kuydan. Mana kreyikukkunata churankasapa mana tukuyniyuk ninapi.

*Juan Jesusta bawtisarkan.
(Mr 1.9-11; Lk 3.21-22)*

¹³ Chaymanta Jesuska Galilea partimanta llukshirkan Jordan yakuman rinanpa. Jordan yakupi Juanka aypa runakunata bawtisaykarkan. Chaypina Jesuska Juantaka willarkan bawtisananpa. ¹⁴ Chashna willaptinna Juan mana bawtisanayashpa Jesusta willarkan:

—Ashwan alli kanman ūukata bawtisawanaykipa. Úimapati ūukata shamunki willawak bawtisanaynipa?

¹⁵ Chaypina Jesuska willarkan:

—Tata Dios kamachiwashkanchikunata kasunanchikuna tiyan. Chayrayku bawtisaway.

Chashna willaptin Juanka payta bawtisarkan.

¹⁶ Chaymanta bawtisakushkanwasha Jesuska yakumanta llukshirkan. Chaypina sielu kicharikuptin Jesuska kawarkan Tata Diospa Espiritunta suk urpaytashina paypa sawanman urayamuptin. ¹⁷ Chaypina sielumanta Tata Dioska willarkan:

—Kay Jesuska sukaman munanayni wambraynimi. Paymi sukaman kushichiwan.

4

*Supay Jesusta llullachinayarkan.
(Mr 1.12-13; Lk 4.1-13)*

¹ Chaymanta Jesus bawtisakushkanwasha Tata Diospa Espiritun suk chunlla chakidu pampaman pusharkan. Chaypi supay munarkan Jesusta mana allikunata rurachiyta. ² Chay chunlla pampapi kashpa Jesus chusku chunka diyata chusku chunka tutata mana nimata mikurkanchu. Chaypina sukaman yarkarkan. ³ Supay llullachinayashpa rirkhan Jesustaka willak:

—Tata Diospa wambran kashpaykika kay rumikunata willay pankuna tukunarpa chaykunata mikunaykipa.

⁴ Chaypina Jesuska aynirkan:

—Tata Diospa killkadunpi willawanchi: “Runakuna Tata Diospa rimananta kasushpa kawsanankuna tiyan. Manami panta mikushpallachu kawsankasapa.”

⁵ Chaymanta supayka Jesustaka pusharkan Tata Dios akllashkan Jerusalen llaktaman. Chaypi Tata Diospa manllayba altu wasin sawaman pusharkan. ⁶ Chaypina Jesusta willarkan:

—Tata Diospa wambran kashpaykika kay altumanta allpaman wishchunakuy. Tata Dios killkadunpi willawanchi:

“Tata Dioska angelninkunata kachanka amachashunaykipa.

Paykuna makinkunawan chaskishunkisapa ama rumikunapi mitkakunaykipa.”

⁷ Chaypina Jesuska aynirkan:

—Chaymantapish Tata Diospa killkadunpi willawanchi: “Ama nimata yankamanta rurachichu yachanayashpa Tata Dios yanapawankachu manachu nishpa.”

⁸ Chashna willaptin supayka Jesustaka pusharkan manllayba altu urkuman. Chay altumanta tukuy kay allpapi llaktakunata tukuy chaykunapi alli tiyakkunata kawachirkan. ⁹ Willarkan:

—Kan kunkurikushpa ūukata kuyawaptikika tukuy kay kawashkaykitami kushkayki.

¹⁰ Chaypina Jesuska willarkan:

—Ñukamanta ashuy, Satanas. Tata Diospa killkadunpi willawanchi: “Señorniki Tata Diosllata kuyay. Payllata sirvishpa kawsay.”

11 Chashna Jesus sinchita willaptin supayka ashurkan. Chaypina Tata Diospa angelinkuna Jesustaka laduncharkansapa yanapak.

*Galileapi Jesus kallarirkan yachachikuyta.
(Mr 1.14-15; Lk 4.14-15)*

12 Chaymanta kamachikuk Herodeska yachachikuk Juanta karselpi churkaran. Jesuska chayta yachashpa Galilea partiman rirkana. **13** Galileapi kashpa manana Nasaret llaktapi kawsarkannachu. Rirkana kawsak Kaper-naum llaktapi. Chay llaktaka karkan Sabulon Neptali partipi Galilea kocha ladunpi. **14** Nawpa tiempu Tata Dios rimashkanta yachachikuk Isaiyas killkarikan:

15 “Sabulon partipi Neptali partipi Galilea kocha ladunpi Jordan yaku ladunpi chay mana judiyu runakuna kawsansapa.

16 Chay partikunapi kawsak runakuna mana allita rurashpa tutapishina kawsarkansapa.

Paykunaka sukaman ilipyak lusta kawarkansapa.

Chay runakuna wañunankunata manchashpa kawsarkansapa.

Paykunapa allima lus ilipyamurkan.”

Chayta killkarkan Isaiyaska. Chaypina chay killkadunpi rimashkanshina Jesus allita yachachikushpa lusshina karkan.

17 Chaymanta Jesus chay Kaper-naum llaktapi kawsashpana kallarirkan yachachikuyta:

—Tata Dios sukaman munan mandunpi kawsanaykichipa. Chayrayku tukuy mana alli ruranaykichimanta wanaychi.

*Jesus chusku challwakuk runakunata willarkan katinankunapa.
(Mr 1.16-20; Lk 5.1-11)*

18 Chaymanta Galilea kocha mañanpi puriyakashpa Jesuska ishkay runakunata kawarkan. Paykunaka atun redninkunawan challwakyarkansapa. Suk karkan Andres. Suk karkan wawkin Simon. Paypa suk shutin karkan Pedru. **19** Chaypina Jesuska paykunata willarkansapa:

—Kankuna allita yachankichi challwakunata apiyta. Kunanmantapacha ñukata katiwaychi. Katiwaptikichi ñuka allita yachachishkaykichi runakunata yachachinaykichipa.

20 Chay ratulla chay challwakuk runakunaka redninkunata sakish-pankuna Jesusta katirkansapa. **21** Chaymanta chay kocha mañanta riyakash-pankuna Jesuska Santigota wawkin Juanwan tantallata kawarkan. Chay ishkay runakuna Sebedeopa wambrankuna karkansapa. Suk kanowapi chay ishkay runakuna tatanwan redninkunata allichaykarkansapa. Chaypina Jesuska chay ishkay runakunata kayarkansapa paywan tantalla puri-nankunapa. **22** Chay ratulla paykunaka kanowanpi tatanta sakishpa Jesuswan rirkansapa.

*Jesus aya runakunata yachachirkansapa.
(Lk 6.17-19)*

23 Chaymanta Galilea partipi tukuy llaktakunaman rishpa Jesuska yachachikurkan. Judiyu runakunapa tantanakunankuna wasinkunapi yachachikurkan. Chay runakunata willarkansapa:

—Tata Diosmi munan mandunpi kawsanaykichipa.

Chashna willashpa Jesuska runakunata tukuy laya unkuyinkunamanta nanayninkunamanta alliyachirkansapa. **24** Chaymanta Siria partipi suka-man famakurkansapa Jesus unkudukunata alliyachiyananta. Chayrayku

Siriapi kawsak runakuna Jesusman pusharkansapa rikchak laya unkuuniyuk runakunata, nanayuk runakunata, supayuk runakunata. Chaymanta pusharkansapa manchariyuk runakunata, kaspirayadu runakunata. Chaypina Jesuska tukuy chay unkudu runakunata alliyachirkansapa. ²⁵ Chaymanta Jesusman rirkansapa aypa runakuna Galilea partimanta, Dekapolis partimanta, Jerusalen llaktamanta, Judea partimanta, Jordan yaku suk ladunmanta.

5

Jesus disipulunkunata yachachirkansapa imata rurashpami kushikunkasapa nishpa.

(Lk 6.20-23)

¹ Chaymanta Jesuska chay aypa runakunata kawashpa suk taksha urku sawanman rirkan. Chaypi tiyariptin disipulunkuna laduncharkansapa.

² Chaypina Jesus kallarirkan yachachiysapata. ³ Willarkansapa:

—Kankuna kikikichi mana kreyinakushpaykichi Tata Dios yanapashunaykichita yuyashpa kushikupuru kawsankichi. Chashna kawsashpaykichi Tata Diospa mandunpi kawsaykankichi.

⁴ Llakidu Kashpaykichi kushikupuru kankichi. Kankunata Tata Dios kuyashushpaykichi kushichishunkichi.

⁵ Kankuna kikikichi mana alabanakushpaykichi runamasikichiwan mana piñanakushpaykichi kushikupuru kankichi. Tukuy allpapi maypipish kaptikichi Tata Dios yanapashunkichi kushichishunkichi.

⁶ Kankuna yakuta munakshina mikuya munakshina Tata Diospa munananta ruranayashpaykichi kushikupuru kankichi. Tata Dios kankunata kushichishunkichi.

⁷ Kankuna runamasikichita llakichishpa yanapashpaykichi kushikupuru kankichi. Tata Dios kankunatapish llakichishushpaykichi yanapashunkichi.

⁸ Tukuy shunku Tata Dioslata kuyashpaykichi kushikupuru kankichi. Kankunaka Tata Diostami kawankichi.

⁹ Kankuna runamasikichita yanapashpaykichi kuyanakushpa kawsanankunapa kushikupuru kankichi. Tata Dios kankunata willashunkichi wambrankuna kanaykichita.

¹⁰ Tata Diospa munananta rurashkaykichirayku runakuna chiknishuptikichi kushikuypuru kankichi. Tata Diospa mandunpi kawsaykankichi.

¹¹ Ñukata kreyiwashkaykichirayku runamasikichi piñayashuptikichi makashuptikichi llullakushpa yuyashuptikichi kushikupuru kankichi.

¹² Kankunatashina ñiawpa yachachikkunatapish chiknishpalkuna sufrichirkansapa. Tata Dios kankunata sielipi premyuykichita kushunkichi. Chayrayku sukaman kushikuychi. Kushikushpalla kawsaychi.

Jesus yachachikurkan alli kachishina alli lusshina kananchikunata.
(Mr 9.50; Lk 14.34-35)

¹³ Kankuna runamasikichita yachachishpa yanapashpaykichi alli kachishinami kankichi. Allipayadu kachi mananami nima layapi kachiyamunkanachu. Chashna mana alli kaptin wishchunchi tukuy pi sarunianpa.

¹⁴⁻¹⁵ Chaymanta suk alkusata apichishpanchikuna churanchisapa altipi tukuy wasita lusichinanpa. Chay apichidu alkusata mana churanchichu kajon ukupi. Kankunaka iden chay apichidu alkusashinami kankichi. Chaymanta suk llakta urku sawanpi kaptin mana atipanchu pakakuya. Tukuy pi

chay llaktata allimata kawan. Iden chay llaktatashina kankunatapish runamasikichi kawashunaykichi tiyan. ¹⁶ Chayrayku allillata rurashpa kawsaychi. Tukuy runamasikichita yanapaychi paykunapish sielipi kawsak Tata Diosnikichita kuyashpa alabanankunapa.

Jesus Tata Diospa kamachikunankunata yachachikurkan.

¹⁷ Ñawpa tiempu Tata Dioska awilunchikunata yachachirkansapa kamachikunankunata kasushpa kawsanankunapa. Tukuy chayta alli yachachikuk runakuna killkarkansapa. Ñukaka shamushkani tukuy chay killkadunkunapi rimashkanta rurak. Manami shamushkanichu willaknikichi amana chay killkadunkunata kasunaykichipa.

¹⁸ Mash allita uyariwaychi. Tata Dios tukuy rimashkanta ruranan tiyan. Allpa sielu kullunan diyakaman mana ni pi Tata Diospa rimashkanta chinkachinkachu.

¹⁹ Chaymanta ichara kankuna Tata Dios kamachikushkanta mana kasunkichimanchu chayka manami kasunapachu nishpa. Chaymanta ichara runamasikichitapish yachachinkichiman ama kasunankunapa. Chashna mana kasuptikichi Tata Dios willashunkichi mandunpi mana alli sirvikuk kanaykichita.

Chaymanta ichara kankuna Tata Dios kamachikushkanta allita kasushpa kawsankichiman. Chaymanta ichara runamasikichitapish yachachinkichiman allita kasunankunapa. Chashna kasuptikichi Tata Dios willashunkichi mandunpi ashwan alli sirvikuk kanaykichita.

²⁰ Allita willaykichi. Moisespa killkadunta yachachikuk runakunawan fariseo runakuna rimansapa Tata Dios kamachikushkankunata kasuykanankunata. Chashna rimashpapish manami allitachu kasuykansapa. Kankuna paykunamanta ashwan allita kasunaykichi tiyan. Mana paykunamanta ashwan allita kasushpaykichika manami Tata Diospa mandunpichu kawsankichi.

Jesus yachachikurkan sukwana sukwana perdonanakushpa kawsananchikunapa.
(Lk 12.57-59)

²¹ Kankuna yachashkankichi Moises awilunchikunata willashkankunata: "Ama runamasikichita wañuchiychiku. Wañuchiaptikichika llakta kamachikuk runa kankunatapish kastigashunaykichi tiyan."

²² Chayta yachaptikichipish ñukami willaykichi: Kankuna runamasikichita chikiptikichika llakta kamachikuk runa kastigachishunaykichi tiyan. Chaymanta kankuna runamasikichita mana allita willashpa piñachiaptikichika chay ashwan sinchi awtoridarkuna kastigachishunaykichi tiyan. Chaymanta runamasikichita maldisiptikichika Tata Dios mana tukuyniyuk ninapi kastigashunaykichi tiyan.

²³ Tata Diospa wasinman ofrendata apashpayki ichara yuyankiman suk runata sientichishkaykita. ²⁴ Chayta yuyashpayki manarapish ofrenda churanapi ofrendaykita churashpara rillary chay sientichishkayki runawan perdonanakuk. Chashna perdonanakushpana kutiy ofrendaykita Tata Diospa churak.

²⁵ Ichara suk runata debiptiki payka awtoridarpí mañakukushunkiman. Manarapish awtoridarpí chayashpaykichira paywan allita parlashpa allichay amana awtoridarpí yaykuchishunaykipa. Awtoridarpí chatashuptikika guardiyata willanka karselpi churashunaykipa. ²⁶ Allita willayki: Tukuy debinaykita kutichinaykikaman karselmanta mana llukshinkimanchu.

Jesus yachachikurkan ama munananchipa chikan warmiwan uchallikuya.

²⁷ Chaymanta kankuna yachashkankichi Moises awilunchikunata willashkanta: "Ama chikan warmiwan uchallikushpa kawsaychichu."

²⁸ Chayta yachaptikichipish ñukami willaykichi: Suk warmiwan puñuya munashpaykichika ñami yuyaynikichipi uchallikushkankichina.

²⁹ Chayrayku ñawiki uchallichishuptikika surkushpa wishchuy ama kashkan uchallichishunarpa. Ashwan alli kanman suk ñawikillawan kawsanaykipa ama chay mana tukuyniyuk ninaman rinaykipa.

³⁰ Chaymanta ichara makikiwan sukaman mana allita rurayta munankiman. Chay makikita tipiy amana nima mana allita ruranaykipana. Ashwan alli kanman suk makikillawan kawsanaykipa ama tukuy kuerpuysiwan mana tukuyniyuk ninaman rinaykipa.

*Jesus yachachikurkan kasaradu ullku ama warminta wishchunarpa.
(Mt 19.9; Mr 10.11-12; Lk 16.18)*

³¹ Chaymanta ñawpa awilunchikuna rimarkansapa: Warmikichita wishchunayashpaykichika rillarychi awtoridarpi killkachinakuk: "Kay warmitaka mananami munaninachu." ³² Chashna awilunchikuna rimaptinkunapish ñukami willaykichi: Warmikichi mana chikan ullkuwan uchallikuptinka ama wishchuychichu. Mana uchallikuk warmikita wishchushpaykichika kachaykankichi chikan ullkuwan uchallikunarpa. Wishchudu warmiwan kasarak ullkupish uchallikunmi.

Jesus yachachikurkan mana jurashpa rimananchikunapa.

³³ Chaymanta Jesuska willarkansapa:

—Kankuna yachashkankichi Moises awilunchikunata willashkankunata: "Tata Diosta jurashpa suk imata ruranaykichipa willashpaykichika chay willashkaykichita ruranaykichi tiyan."

³⁴ Chayta yachaptikichipish ñukami willaykichi: Suk imata ruranaykichipa rimashpaykichika mana jurashpalla ruraychi. Tata Dios sielumanta kamachikuykan. Chayrayku suk imata ruranaykichipa ama sielupa shutinpi juraychichu. ³⁵ Kay allpapipish Tata Dios kamachikuykan. Chayrayku suk imata ruranaykichipa rimashpaykichika ama allpapa shutinpi juraychichu. Jerusalen llakta sukaman sinchi kamachikuk Tata Diospa llaktanmi. Chayrayku ama Jerusalenpa shutinpi juraychichu. ³⁶ Chaymanta mana chukchaykichita atipankichichu yanayachiya nima yurakyachiya. Chayrayku ama kikikichipa shutikichipi juraychichu.

³⁷ Kankuna willashpaykichika ariya rurasha nishpa ruranaykichi tiyan. Willashpaykichika manami rurashachu nishpa ama ruraychichu. Ashwanta rimashpaykichika mana allitachu rimaykankichi.

Jesus yachachikurkan suk runa mana allita rurawaptinchikuna ama kutipananchikunapa.

(Lk 6.29-30)

³⁸ Ñawpa awilunchikuna yachachikurkansapa: "Makanakushpa suk runa llaktamasinpa ñawinta surkupuptinka kirunta polvoptinka paypapish awtoridar ñawinta surkuchipunan tiyan kirunta polvochipunan tiyan."

³⁹ Chayta yachaptinkunapish willaykichi: Suk sakra runa imatapish kaptin rurashuptikichi ama kutipaychichu. Suk ladu uyaykichipi sakmashuptikichika suk ladutapish kuychi.

⁴⁰ Chaymanta suk runa mañakukushuptikichi kamisaykichita kichushunaykipa ama michaychichu apananpa. Sakuykichitapish kuychi.

⁴¹ Chaymanta ichara suk kamachikuk runa mana pagarashushpaykichi suk kargata aparichishunkichiman suk kilometruta. Chay kargata ishkay kilometruta apapuychi.

⁴² Chaymanta llaktamasikichi ima tiyashuknikichita mañashuptikichi kuychilla. Suk imata mañashuptikichi suknin diya kutichishunaykichipa mana michashpa kuychilla.

Jesus yachachikurkan tukuy chikniwakninchikunata kuyananchikunapa.
(Lk 6.27-28, 32-36)

⁴³ Chaymanta Jesuska willarkansapa:

—Ñawpa awilunchikuna yachachikurkansapa: “Yanapanakukmasikichita kuyaychi. Chiknishuknikichita chikniyichi.”

⁴⁴ Chashna yachachiptinkunapish ūukami willaykichi: Kankuna chiknishuk runakunatapish kuyaychilla. Maldisishuptikichika Tata Diosta roygaychi yanapanankunapa. Chiknishuptikichika allita yanapaychi. Sufrichishuptikichika paykunapa oraychi. ⁴⁵ Kankunaka allita rurashpa kawsashpaykichi sielipi kawsak Tata Diospa wambrankuna kankichi. Paymi intita llukshichimun alli rurak runakunapa mana alli rurak runakunapapish. Tata Dios tamyachimun tukuy alli rurak runakunapa tukuy mana alli rurak runakunapapish.

⁴⁶ Chay romano awtoridarpa kobrauk runakuna mana alli rurak kash-punkunapish yanapanakukmasinkunallawan kuyanakunsapa. Kankuna kuyanakukmasikichillata kuyashpaykichika paykunamanta mana ashwan allitachu ruraykankichi. Tata Dioska mana nima premyuta kushunkichichu.

⁴⁷ Kankuna ayllupuralla rimachinakushpaykichika Tata Diosta mana riksik runakunamanta mana ashwan allitachu ruraykankichi. Paykunapish kuyanakukmasinkunallata rimachinsapa. ⁴⁸ Kankunaka sielipi kawsak Tata Diosnikichishina tukuy runakunata kuyashpa kawsanaykichi tiyan.

6

Jesus yachachikurkan tukuy runakunata yanapananchikunapa mana ni pi kawaptin.

¹ Chaymanta ama ni pita yanapaychichu runakuna alabashunankunnallapa. Alabashunankunnallapa yanapaptikichi sielipi kawsak Tata Dioska manami nima premyuta kushunkichichu. ² Chayrayku mana nimayuk runakunata yanapashpaykichi ama ni pita willaychichu. Llullachikuk runakuna kallikunapi tantanakunankuna wasikunapi tukuy pita willansapa mana nimayukkunata yanapashkankunata. Munansapa tukuy runakuna rimanankunapa alli rurak kanankunata. Ņuka willaykichi chay alabanakunankunalla premyunkuna kananta.

³ Kankuna mana nimayuk runata yanapashpaykichi ama ni pita nima kuyadu amiguykichita willaychichu. ⁴ Pakallalla yanapaptikichi Tata Dioska tukuy alli rurashkaykichita yachashpa premyuykichita kushunkichi.

Jesus yachachikurkan imashnami Tata Dioswan parlashunchisapa nishpa.

(Lk 11.2-4)

⁵ Chaymanta Jesuska willarkansapa:

—Allipi tukushpa llullachikuk runakuna tantanakunankuna wasiku-napi plasakunapi shayarinsapa oranankunapa. Chayta ruransapa runamasinkuna kawashpa rimanankunapa alli rurak kanankunata. Chashna runamasinkuna alabashpankuna premyuntashina kunsapa. Tata Dios

mana nimata kunkasapachu. Kankuna ama paykunashina ruraychichu. ⁶ Kankuna orashpaykichi wasikichi ukupi yaykuyichi. Punkuta wichkashpa sapallaykichilla Tata Diosnikichiwan parlaychi. Pakallalla oraptikichi paypa uyarishpa premuyukichita kushunkichi.

⁷ Ama oraychichu chay mana judiyu runakunashina. Paykunaka amañansapa Tata Diosta mañayta kuti kuti chayllata rimashpa. Yuyansapa kuti kuti chayllata mañashpa Tata Dios ashwan allita uyarinankunata.

⁸ Kankuna orashpaykichi ama paykunashina mañaychichu. Manara mañaptikichira Tataykichi Dios tukuy munanaykichita yachan.

⁹ Chayrayku kashna oraychi:

“A Tata Dios, kanmi kanki altu sielipi kawsak Tataynikuna.

Munanisapa tukuy runakuna rimanankunapa kan sukaman alli rurak kanaykita.

¹⁰ Munanisapa tukuy runakunata kamachinaykipa.

Roygaykisapa sielipi kawsakkuna munanaykita ruranankunashina kay all-papiish tukuy runakuna munanaykita ruranankunapa.

¹¹ Tukuy diya mikunaynikunata kuwaysapa.

¹² Runamasinkuna mana allita rurawaptinkuna ñukaykuna perdonanisapa. Chashna perdonashkaynikunashina kanpish uchaynikunamanta perdon-awaysapa.

¹³ Supaymanta amachawaysapa.

Yanapawaysapa ama supay llullachiwashpangkuna mana allita rurachianankunapa.

Kanmi mana tukuñiyukta tukuy laya atipak alli kamachikuk kuyakuk kanki.

Chashna kachun.”

¹⁴ Chaymanta willaykichi: Runamasikichi mana allita rurashuptikichika perdonanaykichi tiyan. Kankuna perdonaptikichika sielipi kawsak Tata Dios kankunatapish mana alli rurashkaykichimanta perdonashunkichi.

¹⁵ Mana alli rurashunkikichita mana perdonaptikichika Tata Diospish manami kankunataka perdonashunkichichu.

Jesus yachachikurkan Tata Diosta kuyashpa mikunata sasinanchikunapa.

¹⁶ Allipi tukushpa llullachikuk runakuna churadu diyakunapi mikunata sasinsapa Tata Diosta kushichinankunapa. Paykuna sukaman munansapa tukuy pi yachanankunapa sasiykanankunata. Llakidu uyayuk tukunsapa tukuy pi kawashpa llakichinankunapa. Chashna runamasinkuna alabash-pangkuna premuyuntashina kunsapa. Tata Dios manami nimata kunkasapanachu. Kankunaka mikunata sasishtaykichiama paykunashina ruraychichu. ¹⁷ Tata Diosta kushichinaykichiha mikunata sasishtaykichiha chuya chuyata uyaykichita mayllaychi. ¹⁸ Allita allichanakuychi ama ni pi yachanankunapa sasiykanaykichita. Tataykichi Diosllami mikunata sasisaykichita yachashpa premuyukichita kushunkichi.

Jesus yachachikurkan sielipi tiyawakninchikunallata yuyananchikunapa.

(Lk 12.33-34)

¹⁹ Ama kay allpapi rikchak layaykichita mirachishpa kawsaychichu. Tukuy laya kay allpapi kuruyan ismayan. Chaymanta suwa runakuna yaykushpankuna chay tiyakkunata apansapa. ²⁰ Kankuna Tata Diosta allita kasushpa kawsaptikichi sielipi tiyapushunaykichi aypayaykan. Chaypi suwakuna manana yaykunkasapanachu apanankunapa. Chaypi mana

nima laya kuruyanchu nima ismayanchu. ²¹ Sielipi tiyapushunaykichita tukuy shunku munashpaykichi chayllata yuyashpa kawsankichi.

*Jesus yachachikurkan luspishina kawsananchikunapa.
(Lk 11.34-36)*

²² Ñawinchikuna kuerpunchikunapa lusninshina. Yuyayninchikuna shunkunchikunapa lusninshina. Kankuna allikunata yuyashpaykichi allita rurashpa kawsankichi. Allita rurashpa kawsashpaykichi luspishina kawsaykankichi.

²³ Chaymanta ñawikichi mana allita kawakuptinkuna tutapishina kawsankichi. Kankuna mana allikunata yuyashpaykichi mana allita rurashpa tutapishina kawsankichi. Chaymanta mana allikunata yuyashpaykichika allita rurashpa kawsashkaykichimanta Tata Dirosmanta ashushpaykichi sukaman ashwan tuta likidupishina kawsankichi.

*Jesus yachachikurkan ama tiyawakninchikunallata yuyashpa kawsananchikunapa.
(Lk 16.13)*

²⁴ Suk runa mana atipanchu chay ratulla ishkay patronpi trabajayta. Sukllallata kasunan tiyan. Suk patronninta kasushpa sukta manana kasunanchu. Kankuna chay trabajador runashina kankichi. Kullkiyayta munash-palla kawsashpaykichika manana atipankichinachu Tata Diosta kasushpa kawsayta.

*Jesus yachachikurkan Tata Dios tukuy wambrankunata kuydanankunata.
(Lk 12.22-31)*

²⁵ Chayrayku allita willaykichi: Ama turbachinakushpa yuyaychichu imatami mikusha upyasha imatami llachapakusha nishpa. Tata Dios na-sishkanchikuna diyamanta wiwawanchisapa. ¿Manachu mikunanchikunatapish llachapanchikunatapish kuwanchisapa?

²⁶ Mash kawaychi imashnami pishkillukuna pawashpa kawsansapa nishpa. Paykunaka mana nima murukunata tarpuンsapachu. Paykunapa nima muru wakaychana wasinkuna tiyapunsapachu. Mana nima murukunata tarputtinkunapish sielipi kawsak Tata Dirosnikihi aypa mikunankunata kunsapa. Tata Diroska pishkillukunamanta kankunata ashwan allita kuyashunkichi. Chayrayku rikchak layata kushunkichi.

²⁷ Kankunaka sukaman turbachinakushpa ¿atipankichimanchu ashwanta kawsayta? ²⁸ Mana ni chayta atipashpaykichika ¿imapati llachapaykichillapi yuyashpa turbakunkichi? Mash kawaychi chay allima sisakunata. Chayku-na mana nima trabajansapachu nima puchkakunsapachu. Mana trabajashpankunapish sukaman allima rikurinsapa.

²⁹ Ñawpa kamachikuk Salomonpa llachapankuna sukaman allima rikurirkanki. Kay sisakuna paypa llachapanmanta ashwan allimata rikurinsapa. ³⁰ Tata Dios kiwakunata wiñachin sisanankunapa. Chay sisakuna suk diyallapa allimata rikurinsapa. Chaymanta ñukanchikuna rupachinchisapa. ¿Imapati mana kreyikunkichi Tata Dios chay sisakunamanta kankunata ashwan allimata mudachishunaykichita? ³¹ Chayrayku ama sukaman turbachinakuychichu yuyaykushpa imatami mikusha imatami upyasha imatami mudakusha nishpa.

³² Tata Diosta mana kasushpa kawsak runakuna chaykunallata yuyaykushpalla kawsansapa. Ama paykunashina kawsaychichu. Kankunapaka tiyanmi alli kuydakuk yanapakuk Tata Dirosnikihi. Paymi allita yachan imakunami illashunkichi nishpa. ³³ Kankunapa kuydakuk Tata Dirosnikihi tiyaptin ashwanta munaychi paypa mandunpi kawsayta.

Paypa munashkankunata rurashpa kawsaptikichi paymi tukuy layata kushunkichi. ³⁴ Tukuy diya Tata Dios rikchak layata kushuptikichi ama turbakushpa rimaychichu: "Kaya ɿimatá mikuni imatá llachapakuni?" nishpa. Kayantinpish Tata Dioska kuyashushpaykichi yanapashunkichi. Chayrayku kayapa kaya washanpa ama sukaman turbachinakushpa llakiychichu.

7

*Jesus yachachikurkan ama sukta sukta yuyananchikunapa.
(Lk 6:37-38, 41-42)*

¹ Chaymanta Jesuska willarkansapa:

—Ama ni pita washanchashpa yuyaychichu ama Tata Dios kankunatapish willashunaykichipa mana alli rurak kanaykichita. ² Kankuna imashnacha runamasikichita washanchanaykichishina chashnallami Tata Diospish kankunata willashunkichi mana alli rurak kanaykichita. Runamasikichita rurashkaykichishinalla Tata Dioska kankunatapish rurashunkichi.

³ Kankuna uchaykichita mana riksinayaptikichi ñawikichipi kaspishina tiyan. Ñawikichipi kaspi tiyaykaptin munankichi wawkikichipa ñawinmanta takshasillu susyata surkuya. ⁴ Kankunapa ñawikichipi kaspishina tiyaykaptin ɿimashnatí animukunkichi wawkikichita willayta: "Ñuka ñawikimanta chay susilluta surkunayani" nishpa? ⁵ Chayta rimashpaykichi allipi tukushpa mana allikunata ruraykankichi. Chayrayku willaykichi: Kikikichipa ñawikichimanta chay kaspitashina surkuychi. Chaypira atipankichi wawkikichipa ñawinmanta chay taksha susillutashina surkupuya.

⁶ Chaymanta Tata Diospa rimananta sinchi shunkuyuk mana kasunayak runakunata ama yachachiychichu. Chay laya runakunata yachachiptikichika iden piña allkushina chiknishushpaykichi makashunkichiman. Paykunata yachachishpaykichika kuchikunapa alli perlaskunatashina wishchuykankichi. Chay laya runakuna Tata Diospa rimananta mana nimatashina kawansapa. Chayrayku ama paykunata yachachiychichu.

Jesus yachachikurkan tukuy munananchikunata Tata Diosta mañananchikunapa.

(Lk 11:9-13; 6:31)

⁷ Chaymanta munanaykichita Tata Diosta mañaychi. Chashna mañaptikichi payka kushunkichi. Munanaykichita maskaychi. Maskashpaykichi tarinkichi. Tata Dios yanapashunaykichipa munashpaykichi payta roygaychi. Chashna roygaptikichi payka punkuta kicharikshina yanapashunkichi. ⁸ Tata Diosta mañashpaykichi chaskinkichi. Tata Diosta maskashpaykichi tarinkichi. Tata Diosta roygaptikichi payka punkuta kicharikshina yanapashunkichi.

⁹ Kankunapa wambraykichi panta mañashuptikichi ɿariya rumitachu kunkichiman? ¹⁰ Challwata mañashuptikichi ɿariya machakuytachu kunkichiman? ¹¹ Kankuna mana alli rurak kayakashpaykichipish wambraykichita allikunata kunkichi. Sielupi kawsak Tata Diostikichita mañaptikichi payka ashwan allimakunata kushunkichi.

¹² Kankuna munankichi runamasikichi kuyashushpaykichi allita yanapashunaykichipa. Chashnashina kankunapish runamasikichita allita yanayachi. Moises kamachikunkunapi ñawpa yachachikuk runakuna killkadunpi chayllata yachachikurkansapa.

Tata Diosta katishpanchikuna iden llañu ñantashina purinchisapa.
(Lk 13.24)

¹³ Kankuna llañu punkutashina yaykuychi. Aypa runakuna kikinkunapa munanankunallata rurashpa kawsansapa. Paykunaka iden anchu punkutashina yaykushpa alli kicharidu ñantashina puriykansapa. Chay alli kicharidu ñantashina purishpankuna mana tukuyniyuk ninapi chayankasapa. ¹⁴ Chaymanta mana aypa runakunachu Tata Diospa munananllata rurashpa kawsansapa. Paykunaka iden llañu punkutashina yaykushpa llañu ñantashina padesishpura purinsapa. Chay llañu ñantashina purishpankuna sielipi chayankasapa.

Jesus yachachikurkan llullachikuk runakunamanta kuydanakunanchikunapa.

(Lk 6.43-44)

¹⁵ Llulla yachachikuk runakuna rimansapa Tata Diospa rimananta allita yachachikuykanankunata. Kankunaka paykunamanta allita kuydanakuychi ama llullachishunaykichipa. Paykunaka iden ovejashina alli modoyuk tukunsapa. Chaykamanka manchanapa pumashina llullachikushpa waklichishunayankichi.

¹⁶ Llullachikuk runakunata kawsanankunamanta riksinkichi. Mash yuyaychi. Kashayuk kaspi mana uvakunatachu wayuchakun. Nima chupukasha wayuchakunchu igo wayuta. Chashnashinami chay llulla yachachikuk runakunapish Tata Diospa rimananta mana kuskatachu yachachikunsapa. ¹⁷ Suk alli kaspi alli wayukunata wayuchakun. Mana alli kaspi mana alli wayukunata wayuchakun. ¹⁸ Suk alli kaspika manami wayuchakunchu mana alli wayukunata. Mana alli kaspika manami wayuchakunchu alli wayukunata. ¹⁹ Ñukanchi mana alli wayuyuk kaspikunata kuchushpa rupachinchiri. Chashnashina llulla yachachikukkunata Tata Dios churanku mana tukuyniyuk ninapi. ²⁰ Kankuna chay mana alli yachachikukkunata mana alli ruranankunamanta riksinkichi llulla yachachikukkuna kanankunata.

Jesus yachachikurkan Tata Diosta kasushpa kawsak runakunalla mandunpi yaykunkunapa.

(Lk 13.25-27)

²¹ Tatayni Diospa munananta rurak runakunalla paypa mandunpi yaykunkasapa. Chay llullakuk runakuna: “Señor, Señor” willawashpankunapish mana allita rurashpa kawsansapa. Chayrayku paykunaka manami Tata Diospa mandunpi yaykunkasapachu.

²² Ñuka kashkan shamuptini chay llullachikuk runakuna willawankasapa: “Señor, ñukaykuna shutikita rimashpa yachachikurkanisapa. Shutikita rimashpa runakunamanta supaykunata llukshichirkanisapa. Shutikita rimashpa aypa milagrukunata rurarkanisapa.” ²³ Chashna willawaptinkunapish willashasapa: “Kankunataka manami riksiykichichu. Mana allita rurashpa kawsashkaykichirayku ñukamanta ashuychi.”

Jesus yachachikurkan ishkay laya ruradu wasikunapa ejemplunta.
(Mr 1.22; Lk 6.47-49)

²⁴ Chayrayku willaykichi: Kankuna yachachikuskaynita uyarishpa chayta kasunaykichi tiyan. Chashna kasushpa kawsashpaykichi

yachaysapa runa kankichi. Suk yachaysapa runa wasinta rurashpa sinchi allpapi uku ukuta asipishpa ruran. ²⁵ Chaymanta sukanaman tamyaptin yaku llokllashpa wasita kiraptin sinchita wayraptin chay alli ruradu wasika mana urmankachu. Kankuna allita kasuwashpa kawsashpaykichika sinchi allpapi wasinta rurak runakunashinami kankichi.

²⁶ Chaymanta kankuna yachachikunaynita uyarishpalla mana kasuwashpaykichika suk mana alli yuyaykuk runashina kankichi. Suk mana alli yuyaykuk runa wasinta rurashpa ñupu likidu allpapi ruran. Chay laya ruradu wasika mana sinchikunchu. ²⁷ Sukaman tamyaptin yaku llokllaptin sinchita wayraptin chay mana alli yuyaykuk runapa wasin kunanlla urmapun. Sukaman allita waklin. Kankunaka yachachikunaynita mana kasushpaykichika wakllichinakunkichi.

²⁸⁻²⁹ Chaymanta Jesus yachachikuya tukuchaptin chay runakunaka almirashpankuna parlarkansapa:

—Kay Jesuska kamachikuk runashina yachachiwanchisapa. Mana Moisespa killkadunta yachachikuk runakunashinachu yachachiwanchisapa.

8

Jesus lasaruyak runata alliyachirkan.

(Mr 1.40-45; Lk 5.12-16)

¹ Chaymanta Jesus chay urkumanta urayamuptin aypa runakuna katirkansapa. ² Chaypina suk lasaruyak runa Jesusta ladunchashpa ñawpakninpí kunkurikushpa willarkan:

—Señor, munashpaykika kay unkuyninimanta alliyachiway.

³ Chashna willaptin Jesuska chay runataka llankashpa willarkan:

—Ariya, munani alliyachiynikita. Ñami alliyaduna kanki.

Chayta willaptinlla chay runapa tukuy kirinkuna chinkarkan. ⁴ Chaypina Jesuska willarkan:

—Amara ni pita willayrachu alliyachishkaynita. Saserdoteman rillary kawashunanpa alliyaduna kanaykita. Chaymanta ñawpa Moises killkashkanpi kamachikunanta allita kasushpa suk ofrendata apay. Chayta apaptiki tukuy runakuna yachankasapa unkuynikimanta sanuyashkaykita.

Jesus suk kapitanpa wiwachunta alliyachirkan.

(Lk 7.1-10)

⁵ Chaymanta Kapernaum llaktapi chayaptin suk runa Jesusta laduncharkan. Payka Roma llaktamanta soldadukunapa kapitannin karkan. Jesusta sukanaman roygashpa willarkan:

⁶ —Señor, suk wiwachuyni wasinipi sukanaman unkudulla kawsan. Manana nima kuyuya atipannachu. Mana muchunapa laya nanaywan sukanaman sufriykan.

⁷ Chashna willaptin Jesuska chay kapitanta willarkan:

—Wasikiman risha payta alliyachinaynipa.

⁸ Chaypina chay kapitanka willarkan:

—Señor, ñuka mana nimachu kani wasinipi yaykunaykipa. Kayllamanta atipanki wiwachuynita alliyachiyyta. ⁹ Tata Diosmi kamachishunki. Chayrayku sinchi kamachikuk kanki. Ñukapapish tiyan kamachiwakninkuna. Paykuna kamachiwaptinkuna kasunayni tiyan. Chaymanta ñuka soldadukunata kamachiptini paykunapish kasuwansapa. Suk soldaduta suk mayman rinanpa willaptini rin. Sukta shamanunpa willaptini shamun. Suk wiwachuyni imatapish rurananpa willaptini ruran.

Chayrayku sinchi kamachikuk kashpayki karullamanta wiwachuynita alliyachipay.

¹⁰ Chashna chay kapitan willaptin Jesuska sukaman almirarkan. Chaypina tukuy chay katik runakunata willarkansapa:

—Allita willaykichi. Tukuy judiyumasinikunamanta mana niman suk runa kay romano kapitanshina ūukata kreyiwashkachu. ¹¹ Chayrayku willaykichi: Inti llukshimunamanta inti yaykunanmanta tukuy kreyiwakkuna Tata Diospa mandunpi yaykunkasapa. Chaypina tiyarinkasapa ūawpa awilunchi Abrahamwan Isakwan Jakobowan tantalla mikunankunapa. ¹² Chaykamanka kankuna Tata Diospa mandunpi yaykunaykichi kaykaptin mana ūukata kreyiwashkaykichirayku mana yaykunkichichu. Tata Dioska tukuy mana kreyiwakkuna sielu washaman tutayaduman churankasapa. Chaypina paykunaka llakishpankuna kirunkunata mukush-pankuna sukaman wakanicasapa.

¹³ Chayta willashkanwashana Jesuska chay kapitanta willarkan:

—Rillaryna wasikiman. Tukuy shunku kreyiwashkaykiraykumi wi-wachuykitaka alliyachishkani.

Jesus willashkan oraslla chay unkudu wiwachunka wasinllapi alliyarkan.

Jesus Pedrupa suedranta alliyachirkiran.

(*Mr 1.29-31; Lk 4.38-39*)

¹⁴ Chaymanta Jesuska disipulunkunawan rirkansapa Pedrupa wasinman. Chaypi yaykusha Jesuska Pedrupa suedranta tarirkan unkuduta. Chay warmika kawitunpi kalentorawan siridu karkan. ¹⁵ Chaypina Jesuska chay unkudu warmipa makinta llankaptin kalentorranka chiriyapurkan. Chashna alliyashpa atarimushpa kallarirkan Jesusta disipulunkunata karaysapata.

Jesus aypa unkudukunata alliyachirkansapa.

(*Mr 1.32-34; Lk 4.40-41*)

¹⁶ Chaymanta amusayaykaptinna Jesusman supayadu runakunata pushamurkansapa. Jesuska rimashpalla chay supaykunata llukshichirkansapa. Tukuy unkudukunatapish alliyachirkansapa.

¹⁷ Chayta Jesus rurarkan Tata Dios willashkanta rurananpa. Chay ūawpa yachachikuk Isaiyas killkarkan: “Payka rikchak laya unkuyninchikunamanta alliyachiwashkanchisapa. Tukuy laya nanayninchikunata kichuwarkanchisapa.” Chay killkadunpi rimashkanshina Jesus unkudukunata alliyachirkansapa.

Aypa runakuna munarkansapa Jesusta katiya.

(*Lk 9.57-62*)

¹⁸ Chaymanta aypa runakuna Jesuspa ladunpi tantanakurkansapa. Jesuska chay runakunata kawashpa disipulunkunata willarkansapa:

—Akuychi kay kochata chimbaypachi.

¹⁹ Manara kanowapi yaykuptinkunara Moisespa killkadunta yachachikuk runa Jesusta ladunchashpa willarkan:

—Maestru, maytapish riptiki chaytami katishkayki.

²⁰ Chaypina Jesuska willarkan:

—Atukkunapa machaykunapi wasinkuna tiyan. Pishkillukunapapish wasinkuna tiyan. ūuka sielumanta shamudu runa kashpaynipish mana nima wasiyukchu kani chaypi samanaynipa.

²¹ Chaypina Jesusta katik runa willarkan:

—Señor, tatayni wañuptin pampashpaynira katishkayki.

²² Chashna willaptin Jesus willarkan:

—Kunanlla aku ūukawan. Tata Diosta mana kasunayak runakunaka paykunapura pampanakuchunsapa.

Jesus sinchi wayrata sampayachirkan.
(*Mr 4:35-41; Lk 8:22-25*)

23 Chashna parlashkankunawasha Jesuska disipulunkunawan suku kanowapi yaykurkansapa kochata chimbanankunapa.

24 Chimbayaptinkuna kallarirkana sukaman wayrayta. Chay wayrawan yakuka sukaman olasyarkan yakallapa kanowata untachinankaman. Chay yaku wayrawan kuyuykaptinpish Jesuska kanowapi puñuykarkan.

25 Chaypina disipulunkunaka rirkansapa rikchachik. Sukaman manchakushpankuna willarkansapa:

—¡Señor, salvawaysapa! Ñami suminayaykanchisapana.

26 Jesuska willarkansapa:

—¿Imapatí sukaman manchakunkichi? ¿Manachu allitara kreyiwan-kichira?

Chashna willashpa Jesuska atarishpa wayrata yakuta sinchita willarkan sampayanana. Willaptinlla sampayarkan.

27 Chayta kawashpankuna disipulunkunaka sukaman almirashpa tapunakurkansapa:

—¿Pítí kay runaka? Rimashpalla wayrata yakuta kasillayachin.

Jesus supayadu runakunata alliyachirkan.
(*Mr 5:1-20; Lk 8:26-39*)

28 Chaymanta chay kochata chimbashpankuna Gadara llaktapi Jesuska disipulunkunawan chayarkansapa. Chaypi ishkay supayadu ullukunkuna tiyarkan. Paykuna sukaman supayadu karkansapa. Chay ishkay runakunaka wañudukunata pampashkankunapi kawsarkansapa. Paykuna sukaman sakra likidu kaptinkuna mana ni pi atiparkansapachu chay ñanta puriya. Chaypina chay ishkay runakunaka Jesústa kawashpankuna laduncharkansapa. **29** Sinchita rimashpa willarkansapa:

—Tata Diospa wambran Jesus ¿manara kastigawanaykipasapa tiempu chayamuptinra shamushkankichu kastigawaksapa?

30 Chay supayadu runakunamanta mana karupichu aypa kuchikuna mikukuykarkansapa. **31** Chaypina chay runakunapi kawsak supaykunaka Jesustaka willarkansapa:

—Kay runakunamanta llukshichiwashpaykisapa almitiwaysapa chay kuchikunapi yaykunaynikunapa.

32 Chashna willaptinkuna Jesus almitishpa willarkansapa:

—¡Rillarychi!

Jesus willaptinkunana chay supaykuna chay ishkay runakunamanta llukshirkansapa. Rirkansapa kuchikunapi yaykuk. Chaypina kuchikunaka kalppashpankuna urkumanta sinkushpa yakupi sipikurkansapa.

33 Chayta kawashpankuna kuchikuna kuydak runakuna manchakuywan llaktankunaman kallparkansapa. Chaypi chayashpankuna tukuy llaktamasinkunata willarkansapa Jesus chay supayadu runakunata alliyachishkanta. Kuchikuna yakupi sipikushkankunata parlachikurkansapa.

34 Chayta uyarishpankuna tukuy chay llaktapi kawsak runakuna rirkansapa Jesústa tarik. Jesústa kawashpankuna roygarkansapa llaktankunamanta llukshinanpa.

9

Jesus mana kuyuy atipak runata alliyachirkan.
(Mr 2.1-12; Lk 5.17-26)

1 Chaymanta suk atun kanowapi yaykushpa Jesuska chimbarkan chay kochata. Chimbashpa kawsanan Nasaret llaktapi chayarkan.

2 Chaypina runakuna suk mana kuyuy atipak runata kamillapi payman pusharkansapa. Chay unkuduta pushamuk runakuna tukuy shunku kreyirkansapa Jesus alliyachinanta. Jesus kreyikushkankunata yachashpa chay unkuduta willarkan:

—Wambrayni, ama manchakuychu. Tukuy uchaykikunamanta perdonayki.

3 Chashna chay unkuduta willaptin Moisespa killkashkankunata yachachikuk runakuna piñakushpankuna yuyayninkunapi rimarkansapa: “Kay runaka Tata Diostami sukaman piñachiyyan. Payka iden Tata Diosschina tukushpa kay unkuduta willashka tukuy uchankunamanta perdonananta.”

4 Jesus chay runakunapa yuyayninkunata yachashpa willarkansapa:

—¿Imapatí washanchawaykankichi? **5** Kay unkuduta ishkay layata atipayman willayta. Munashpayni willayman: “Uchaykikunamanta perdonayki.” Munashpayni willayman: “Atarimushpa rillary.” **6** Kunanlla kay unkuduta alliyachisha. Alliyachiptini yachankichi ñuka sielumanta shamudu runa kanaynita. Yachankichi tukuy runakunapa uchankunata perdonayta atipanaynita.

Chashna willashpa Jesuska chay mana kuyuy atipak runata willarkan:

—¡Atarimuy! Kamillaykita apishpa wasikiman rillary.

7 Chashna Jesus willaptinna chay unkudu runaka alliyaduna atarimushpa wasinman kutirkan. **8** Chayta kawashpankuna chay runakuna sukaman manchakurkansapa. Chaymanta Jesus runakunata alliyachishkanrayku Tata Diosta alabarkansapa.

Jesus Mateota kayarkan.
(Mr 2.13-17; Lk 5.27-32)

9 Chaymanta Jesus pasaykashpa ñuka Mateota kawawarkan. Maypicha romano awtoridarkunapa kullkiti chaskikunaynipi tiyariyu karkani. Chaypina Jesuska kawawashpa willawarkan:

—Shamuy ñukawan.

Chashna willawaptin atarishpa Jesusta katirkani. **10** Chaymanta disipulunkunawan Jesusta pusharkani wasinipi mikuk. Chaypina kullki chaskikukmasinikunawan mana alli rurak runakuna shamurkansapa tiyariy Jesuswan disipulunkunawan tantalla mikunaynikunapa. **11** Chaypina fariseo runakuna chayta kawashpankuna ñukaykunata willawarkansapa:

—¿Imapatí maestruykichi Jesus kullki chaskikukkunawan uchasapa runakunawan tantalla mikuykan?

12 Chaypina Jesus yuyaykanankunata uyarishpa suk ejempluwan yachachirkansapa:

—Unkudu runa ampik runata sukaman maskan alliyachinanpa. Sanu runa mana nima ampik runata maskanchu sanu kashpa. **13** Rillarychi allita yachakumuychi imatami Tata Dios rimananpi yachachiwanchisapa nishpa. Paymi willawanchisapa: “Animalkunata kuyawashpa wañuchinaykichimanta ashwanta munani runamasikichita llakichishpa yanapanaykichipa.” Chayrayku ñuka shamushkani uchasapakunata uchankunamanta salvanaynipa. Manami shamushkanichu mana uchayuk yuyanakuk runakunata salvanaynipa.

Fariseokuna amañaksapa mana mikushpa Tata Diosta kuyayta.

(Mr 2.18-22; Lk 5.33-39)

¹⁴ Chaymanta Juan Bawtistapa disipulunkuna ladunchashpangkuna Jesusta tapurkansapa:

—Ñukaykunawan fariseo runakuna Tata Diosta kuyashpaynikuna churadu diyakuna amañanisapa mana nimata mikuyta. ¿Imapatí disipuluykikuna mana ñukaykunashina amañansapa?

¹⁵ Chayta tapuptinkuna Jesuska aynirkansapa:

—Suk funsiapi invitadu runakuna noviowan tantalla kashpangkuna mana llakinsapachu. Funsia washa novio sakiptinkuna chaypira churadu diyakuna mikunata mana mikunkasapachu.

¹⁶ Chaymanta Jesus ashwanta entiendichinayashpa willarkansapa:

—Maná ni pi mawka llachapata tipi mushuk telawan remiendanmanchu. Chay llachapata takshaptin mushuk tela kintikushpa mawka llachapata ashwanta llikichin. ¹⁷ Chaymanta mana ni pi llullu vinuta churanmanchu vinu churana mawka kapachupi. Chaypi churaptin llullu vinuka timbushpá mawka kapachuta pachyachimán. Kapachu llikikuptin vinuka usumán. Chay llikikudu kapachupish wakllidu kiparin. Chayrayku llullu vinuta mushuk kapachupi churansapa ama vinu ichakunarpa.

Jesus yawar unkuyuk warmita alliyachirkan. Chaymanta Jairopa shipash-ninta kawsachimurkan.

(Mr 5.21-43; Lk 8.40-56)

¹⁸ Jesus chay runakunata yachachiykaptin suk runa laduncharkan. Payka tantanakunkunkuna wasipi kamachikuk runa karkan. Jesuspa ñawpaknippi kunkurikushpa willarkan:

—Chaylla shipashnini chayrak wañushka. Aku wasiniman. Llankaptiki shipashnini kashkan kawsamunka.

¹⁹ Chashna willaptin disipulunkunawan tantalla Jesuska chay kamachikuk runata katirkan. ²⁰ Jesus riykaptin suk warmi katishpa laduncharkan. Payka yawar unkuywan chunka ishkay watata kawsarkan. Chay warmi washanmanta Jesuspa llachapan mañanta llankarkan. ²¹ Yuyarkan: “Jesuspa llachapanta llankashpaynila alliyasha.” ²² Chashna llankaptin Jesus washashcha pashsha chay warmita kawarkan. Chaypina llakichishpa willarkan:

—Wambrayni, kushikuyna. Tukuy shunku kreyiwashkaykirayku sanuy-achiysi.

Chayta willaptin alliyarkan.

²³ Chaymanta chay kamachikuk runapa wasinpi Jesuska chayarkan. Chaypi aya runakuna sukaman kaparikushpa wakakuykarkansapa. Kena pukuk runakunapish listuna karkansapa chay wañuduta pampak pushanankunapa. ²⁴ Paykunata kawashpa Jesuska willarkansapa:

—Kaymanta llukshiychi. Kay shipashka puñuykanmi. Manami wañuduchu.

Puñukananta willaptinkuna chay runakuna Jesusta sukaman asichirkansapa. ²⁵ Chaypina Jesuska tukuya washaman llukshirkansapa. Chaymanta yaykushpa chay shipashta makinmanta apiptin kawsamushpa atarimurkan. ²⁶ Chaymanta tukuy llaktakunapi sukaman famakurkansapa Jesus chay shipashta kawsachimushkanta.

Jesus ishkay mana kawakuk runakunata alliyachirkan.

²⁷ Chaymanta riykaptinna ishkay mana kawakuk runakuna sinchita ka-parishpa Jesustaka katirkansapa. Willarkansapa:

—¡Davidpa miraknin Jesus, ñukaykunatapish llakichiwaysapa!

²⁸ Jesus suki wasipi yaykuptin chay ishkay biskukunapish yaykushpa laduncharkansapa. Jesuska paykunata tapurkansapa:

—¿Ariya kreyiwankichihu atipanaynita alliyachiynikichita?

Paykunaka aynirkansapa:

—Ariya, Señor, kreyiykisapami.

²⁹ Chaypina Jesuska ñawinkunata llankashpa willarkansapa:

—Tukuy shunku kreyiwashkaykichirayku alliyachiykichi.

³⁰ Chashna willaptinna chay ishkay runakunaka allitana kawakurkansapa. Chaypina Jesuska paykunata sinchita willarkansapa:

—Ama ni pita willaychichu ñuka alliyachishkaynita.

³¹ Chashna willaptinpish paykunaka tukuy chay llaktakunapi kawsak runakunata parlachirkansapa Jesus alliyachishkankunata.

Jesus mana rimakuy atipak runata alliyachirkan.

³² Chay ishkay runakuna llukshiykaptinkuna sukkuna Jesusman pushamurkansapa suki mana rimakuk runata. Chay runaka supayadu kashpa mana rimakuya atiparkanchu. ³³ Jesuska chay runamanta supayta llukshichirkan. Chaypina chay runaka atiparkan rimakuya. Chayta kawashpankuna chay runakuna sukaman almirashpankuna willanakurkansapa:

—Mana niman suki kuti kay Israel llaktapi kay laya alliyachikuk runata kawashkanchisapachu.

³⁴ Chaypina fariseokuna Jesusta sukaman washanchashpankuna willanakurkansapa:

—Supaykunapa kamachikuknin kay runata yanapaptin supaykunata atipan llukshichiyta.

Jesus chay llaktapi kawsak runakunata llakichirkan.

³⁵ Chaymanta Jesuska llaktan llaktan alliyachikupi purirkana. Rikchak laya unkuywan nanaywan runakunata alliyachirkansapa. Tukuy llaktaku-napi chayashpa tantanakunankuna wasikunapi yaykurkan yachachikunapa. Yachachikushpa willarkansapa Tata Dióspa mandunpi yaykunapa.

³⁶ Jesuska chay aypa runakunata kawashpa llakichirkansapa iden llakidu wishchudu ovejakunashina kaptinkuna ni pi kuydaptinkuna. ³⁷ Chaypina Jesuska ñukaykunata willawarkansapa:

—Chay aypa runakunaka iden pallanapa wayukunashinami. Tata Dióspa rimananta yachachikuk runakunaka iden pallak peonkunashinami. Yachachikuk runakuna pishinsapa kay aypa runakunata yachachinankunapa. ³⁸ Chayrayku Tata Diosta roygaychi aypa yachachikukkunata kachanankunapa.

10

Jesus chunka ishkay disipulunkunata akllarkan.

(*Mr 3.13-19; Lk 6.12-16*)

¹ Chaymanta Jesuska ñukaykunata chunka ishkay disipulunkunata kayawashpankuna willawarkansapa:

—Kunanmantapacha ñuka yanapaptini kankuna atipankichi runakunamanta supaykunata llukshichiyta. Chaymanta atipankichi tukuy laya unkuyninkunamanta nanayninkunamanta alliyachiyyta.

² Jesuspacha chunka ishkay disipulunkunapa shutinikuna kaykunami: Primeru karkan Simon. Paypa suki shutin karkan Pedru. Chaymanta Pedrupa wawkin Andres, Sebedeopa ishkay wambrankuna Santiagowan

Juan karkansapa. ³ Chaymanta Felipi, Bartolome, Tomas, Mateo karkanisapa. Ñuka Mateo romano awtoridarkunapa kullki chaskikuk karkani. Chaymanta Alfeopa wambran Santigowan Tadeo karkansapa. ⁴ Chaymanta suk karkan Simon. Payka romano gobiernta mana kasunayak runa karkan. Chaymanta Judas Iskariote karkan. Payka Jesusta apichichirkan wañuchichinankunapa.

*Jesus disipulunkunata kacharkansapa rinankunapa yachachikuk.
(Mr 6.7-13; Lk 9.1-6)*

⁵ Jesuska ñukaykunata ishkay chunka disipulunkunata kachawash-pankuna willawarksapa:

—Rillaychi judiyu runakunapa llaktankunallaman. Ama rillaychichu mana judiyukunapa llaktankunaman. Ama Samaria parti llaktakunapi yaykuychichu. ⁶ Rillaychi israelmasikichillata yachachik. Paykunaka iden chinkadu ovejakunashina kawsaykansapa. ⁷ Rishpaykichi paykunata willaychi: “Tata Diosmi munan mandunpi kawsanaykicipa.” ⁸ Chashna yachachikushpa lasaruyak runakunata alliyachichu. Rikchak laya unkuyuk runakunatapish alliyachichu. Wañudukunata kawsachimuychi. Supayadu runakunamanta supaykunata llukshichichu. Tata Dios yanapashuptikichi tukuy chaykunata atipankichi rurayta. Payka mana chanimpachu sukaman yanapashunkichi. Chayrayku kankunapish mana kobrakushpalla tukuy kay willashkaynita ruraychi. ⁹ Rishpaykichi ama nima kullkita apaychichu. ¹⁰ Ama nima pikshaykichita nima ushutaykichita nima bastonnikichita apaychichu. Rillaychi mudakushkaykichi llachapallawan. Chay runakunata yachachiptikichi paykuna karashunaykichi tiyan. Chayrayku ama nimata apaychichu.

¹¹ Maykan llaktapi chayashpaykichi alli chaskikuk runata maskaychi. Paypa wasinpi kipariychi suk llaktaman rinaykichi diyakaman. ¹² Chay runapa wasinpi chayashpaykichi tukuy chaypi kawsakkunata allimata rimachichichi. ¹³ Paykuna allita chaskishuptikichika Tata Diosta roygaychi kushichinankunapa. Mana allita chaskishuptikichika Tata Dios mana kushichinkasapachu. ¹⁴ Chay runakuna wasinkunapi mana chaskishunayaptikichika mana uyarishunayaptikichika wasinkunamanta llaktankunamanta chakikichi susyanta urmachishpa llukshichichu. ¹⁵ Allita willaykichi: Tata Dios kastigakunan diya chay ñawpa Sodoma Gomorra llaktakunapi kawsak runakunata kastigankasapa. Chaymanta chay mana uyarishu-nayak runakunata ashwan sinchita kastigankasapa.

Jesus willarkansapa runakuna disipulunkunata chikninankunata.

¹⁶ Manara riptinikuna Jesuska yachachiwaysapallapi katirkan:

—Mash allita uyariwaychi. Kankunata ovejatashina kachaykichi sakra likidu pumashina runakunata yachachinaykicipa. Chayrayku machakuyshina yachaysapa likidu kaychi. Yachaysapa kashpaykichi urpayshina alli modoyuk kuskata rurashpa kawsaychi.

¹⁷ Sakra runakunamanta kuydanakushpa kawsaychi. Chiknishuk runakuna awtoridarkunapi chatashunkichi. Chaymanta tantanakunankuna wasikunapi makashunkichi. ¹⁸ Chashna rimanaynita yachachikuptikichi chay chiknishuk runakuna awtoridarkunaman ashwan sinchi kamachikukkunaman pushashunkichi. Tukuy paykunata mana judiyukunatapish atipankichi yachachiyasapata. ¹⁹ Awtoridarkunaman pushashuptikichi ama manchakushpa yuyaychichu imatami willankichi nishpa. Chashna oras Tata Diosmi yachachishunkichi imatami rimankichi nishpa. ²⁰ Tata Diospa Espiritun yanapashuptikichi atipankichi

awtoridarkunata allita ayniita. Manami kikikichipa yuyaynikichitachu rimankichi.

²¹ Chaymanta chay chiknikuk runakuna wawkinkunata awtoridarkunapi chatankasapa wañuchichinankunapa. Chiknikuk tatakuna wambrankunata awtoridarkunapi chatankasapa. Chiknikuk wambrakuna tatankunata mamankunata awtoridarkunapi chatankasapa wañuchichinankunapa.

²² Tukuy runakuna ñukata kreyiwashpa kawsashkaykichirayku kankunata chiknishunkichi. Chiknishuptikichipish wañunaykichi diyakaman ñukata mana shaykushpa kreyiwashpa kawsanaykichi tiyan. Chashna kreyiwashpa kawsaptikichi Tata Diosmi sielman pushashunkichi. ²³ Suk llaktapi kawsak runakuna wañuchishunayaptikichika chikan llaktaman nitikuychi. Allita willaykichi: Manara kankuna tukuy Israel llaktakunapi yachachikuptikichira ñuka sielumanta shamudu runa kashkan shamusha.

²⁴ Mana niman suk disipulu maestrunkanta ashwanta yachanchu. Mana niman suk peon patronninkanta ashwanta kamachikunchu. ²⁵ Suk disipulu maestrunksha yachachikushpa kushikun. Chaymanta suk peon patronninkshina kamachikushpa kushikun. Ñuka maestruykichi kaykaptini runakuna chikniwashpankuna rimansapa Satanas kanaynita. Chashna ñukapa rimashpankuna kankunapapish idenllata rimankasapa.

Jesus yachachikurkan chiknik runakunata ama manchanankunapa. (Lk 12.2-7)

²⁶ Ama chiknishuk runakunata manchaychichu. Tata Diosmi paykunapa upallalla rimashkankunata pakallalla rurashkankunata yachashpa tukuy runakunapi rikurichinkasapa. ²⁷ Ñuka kankunata pakallalla yachachishkaynita tukuy runakunata ama pakakushpa parlachiychi. Chaymanta upallalla willashkaynikunata tukuy runakunata sukaman yachachiychi. ²⁸ Runakuna wañuchishunayaptikichi ama manchaychichu. Paykunaka wañuchishushpaykichipish mana atipansapachu mana tukuyniyuk ninaman churashuynikichita. Tata Diosllami tukuy uchasapa runakunata mana tukuyniyuk ninapi churankasapa. Chayrayku payllata manchashpa kasushpa kawsaychi.

²⁹ ¿Manachu ishkay pishkillukunata rantinsapa suk kullkillawan? Chay pishkillukuna mana ashwan chaniyuk Kashpankunapish Tata Dios mana munaptin mana niman suk wañunmanchu. ³⁰⁻³¹ Tata Dioska tukuy kankunatapish allita kuydashunkichi. Pishkillukunamanta kankunata ashwanta kuyashunkichi. Sukaman kuyashushpaykichi allita yachan mashnami chukchaykichi tiyan nishpa. Chayrayku ama ni pita manchaychichu.

Tukuy runakunata parlachinanchikuna tiyan Jesus salvawakninchikuna kananta. (Lk 12.8-9)

³² Jesus yachachiwaysapallapi katirkana:

—Kankuna mana pinkakushpa runamasikichita willanaykichi tiyan kreyiwak runakuna kanaykichita. Chashna rimaptikichi ñukapish sielipi kawsak Tatayni Diosta willasha kankuna kreyiwak kanaykichita. ³³ Chaymanta ichara runamasikichita pinkakushpa mana munankichimanchu rimayta ñukata kreyiwanaykichita. Chashna mana kreyiwanaykichita rimaptikichi ñukapish sielipi kawsak Tataynita willasha kankunata mana riksinaynita.

Jesusta katiptinchikuna familyanchi chikniwashunchisapa. (Lk 12.51-53; 14.26-27)

³⁴ Jesuska ñukaykuna disipulunkunata willawarkansapa:

—Ñuka kay allpaman shamushkaynirayku aypa runakuna makanakunkasapa. Ama yuyachichu ñuka shamushkaynirayku tukuy runakuna manana makanakushpana kawsanankunata. ³⁵ Ñuka shamushkaynirayku mana kreyiwak runakuna kreyiwak runakunata sukmanta chikninkasapa. Ñukarayku suk wambra tatanta, suk shipash mamanta, suk nuera suedranta chiknishpa kawsankasapa. ³⁶ Ñukata kreyiwashpa kawsaptikichi kikin familyaykichi chiknishunkichi.

³⁷ Chaymanta tataykichimanta mamaykichimanta wambraykichimanta ñukata ashwan allita kuyawanaykichi tiyan. Ñukata mana ashwan allita kuyawashpaykichika mana ñukapa disipuluynikunachu kankichi. ³⁸ Runakuna chiknishushpaykichi padescichishuptikichipish ñukallata allita kasuwashpa katiwanaykichi tiyan. Mana katiwashpaykichika mana ñukapa disipuluynikunachu kankichi. ³⁹ Kankuna wañuymanta kishpinayashpa sakiwashpaykichika mana tukuyniyuq ninamanta mana kishpinkichichu. Chaymanta ñukata kreyiwashkaykichirayku runakuna padescichishushpaykichi wañuchishuptikichika Tata Dioswan mana tukuyniyukta kawsankichi.

Runakuna chaskiaptinchikuna Tata Dios paykunata yanapankasapa. (Mr 9.41)

⁴⁰ Kankuna rimanaynita yachachikuk riptykichi suk runakuna chaskishushpaykichi ñukatapish chaskiwaykansapa. Ñukata chaskiwashpankuna kachamuwak Tatayni Diostapish chaskiykansapa. ⁴¹ Kankuna rimanaynita yachachikuk riptykichi sukkuna chaskishunkichi. Tata Dioska paykunata kankunatashina premyunta kunkasapa. Chaymanta alli rurak runakuna kaptikichi sukkuna chaskishunkichi. Paykunatapish kankunatashina Tata Dios premyunta kunkasapa. ⁴² Ñukata katiwashkaykichirayku ichara suk runa suk tipi chirik yakuta kushunkichiman. Tata Dios chay upyachishuk runata premyunta kunka.

11

Juanpa disipulunkuna rirkansapa Jesuswan parlak. (Lk 7.18-35)

¹ Jesuska chunka ishkay ñukaykuna disipulunkunata yachachiwashkankunawasha rirkana Galilea parti llaktakunapi yachachikuk.

² Chay tiempu Juan Bawtista karselpi karkan. Chaypi kashpa yacharkan Jesus rikchak almirana ruranakunata rurashkanta. Chaypina Juanka ishkay disipulunkunata kacharkansapa Jesusta tapuk:

³ —¿Deveraschu Tata Diosmanta shamudu runa kanki? ¿Suktachu shuyashasapa?

⁴ Chashma tapuptinkuna Jesuska aynirkansapa:

—Rillarychi Juanta willak uyarishkaykichita kawashkaykichita. ⁵ Juanta willaychi ñuka alliyachiptini mana kawakukkuna kawakuykanankunata kojokuna puriykanankunata upakuna uyariykanankunata. Willaychi lasaruyak runakunatapish alliyachishkaynita. Willaychi wañudu runakunata kawsachimushkaynita. Chaymanta tukuy mana nimayuk runakunata yachachiykanisapa Tata Dios salvakuk kananta. ⁶ Chaymanta Juanta willaychi tukuy runakuna mana pinkakushpa ñukata allita kreyiwashpa kushikuypurulla kanankunata.

⁷ Chaymanta Juanpa disipulunkuna kutiptinkuna Jesuska chay aypa runakunata willarkansapa:

—¿Imatati rishkankichi kawak chunlla pampapi? ¿Rishkankichichu kawak pintuta wayra kuyuchiptin? ⁸ Mana chayta kawak rishpaykichika ¿imatati kawak rishkankichi? ¿Allima llachapayuk runatachu? Kankunaka allita yachankichi allima llachapayuk runakuna kamachikuk runakunapa wasinkunallapi kawsanankunata. ⁹ Ariya ¿imatati rishkankichi kawak? ¿Alli yachachikuk runatachu? Ariya deverasmi rishkankichi alli yachachikuk runata kawak. Payka tukuy alli yachachikukkunamanta ashwan alli yachachikukmi. ¹⁰ Ñawpa tiempu Tata Dioska killkadunpi Juanpa rimarkan: “Ñukaka suk alli yachachikukta kachasha tukuy runakunata willanankunapa kachamushkayni runata allita chaskinankunapa.”

¹¹ Mash allita uyariwaychi. Chay yachachikuk Juanka tukuy runakunamanta ashwan alli yachachikukmi karkan. Chashna kaptinpish Tata Diospa mandunpi tukuy mana kreyinakuk runakuna Juanmanta ashwan yachaysapakunami kankasapa.

¹² Juan Bawtista shamushkanmantapacha kunankaman aypa runakuna Tata Diospa mandunpi sukaman sinchikushpa yaykunsapa. Paykunaka sukaman sufrishpankunapish mana manchakushpa sukaman munashpa yaykunsapa. ¹³ Manarapish Juan Bawtista shamuptinra Moiseswan ñawpa yachachikuk runakuna yachachikurkansapa Tata Dios tukuy maypi kachachikunanta.

¹⁴ Chaymanta Tata Dios killkadunpi willawanchisapa: “Suk alli yachachikukta ñawpa Eliyastashina kachasha.” Chay Eliyashina alli yachachikuk runaka Juanmi. Munashpaykichika kay yachachishkaynita kasuychi. ¹⁵ Tukuy kay yachachikushkaynita allita rinrillikuchi.

¹⁶ ¿Imashna kanaykichita willaykichiman? ¿Ima ejempluwantí yachachiy-kichiman? Kankunaka plasapi tiyarishpa pukllak wambrakunashinami kankichi. Chay wambrakuna pukllak wambramasinkunata kaparishpa willansapa: ¹⁷ “Ñukykuna kenata pukuptinikuna kankuna mana tushushkankichichu. Llakinapa laya kantukunata kantaptinikuna mana wakashkankichichu.” ¹⁸ Kankuna chay pukllak wambrakunashina mana nimawan agradakunkichichu. Juanka Tata Diosta kuyashpa aypa diyakunata mana nimata mikushpa nimata upyashpa kawsarkan. Chashna Juan amañaptin kankuna rimankichi supayadu kananta. ¹⁹ Ñuka sielumanta shamudu runa mikuptini upyaptini rimankichi illu likidu kanaynita. Chaymanta rimankichi uchasapa runakunawan romano awtoridarkunapa kullki chaskikkunapa purikmasinkuna kanaynita. Chashna rimaptikichipish willaykichi: Tukuy pi allita rurashpa kawsashpa runamasinkunata kawachinsapa yachaysapa kanankunata.

*Jesus chay mana kreyikunayak runakunata llakichirkan.
(Lk 10.13-15)*

²⁰ Chaymanta Jesuska suk llaktakunapi kawsak runakunata kallarirkan piñayaysapata. Chay llaktakunapi aypa almirana milagrukunata rurashka kaptinpish chay runakuna mana uchankunamanta wanarkansapachu. Jesus piñakushpa sinchita willarkansapa:

²¹ —¡Alaw! Korasinpi Betsaidapi kawsak runakunata llakichini. Chay ishkay llaktakunapi kashpayni aypa almirana milagrukunata rurashkani. Chaykunata kawashpankunapish uchankunamanta mana nima wanayansapachu. Chayrayku Tata Dioska paykunata sukaman kastigankasapa. Tiro llaktapi Sidon llaktapi almirana milagrukunata rurashka kaptini chaypi kawsakkuna uchankunamanta wanmansapa karkan Tata Diosta kreyinankunapa. Llakina llachapakunata

churakushpankuna uchpata umankunapi churanmansapa karkan llakinankunapa. ²² Chayrayku kastigakunan diya Tata Dioska chay Tiropi Sidonpi kawsak runakunamanta Korasinpi Betsaidapi kawsak runakunata ashwanta kastigankasapa.

²³ Chaymanta Kapernaumpi kawsak runakuna yuyansapa sieluman riyta Tata Dioswan kawsak. Chashna yuyashpankunapish Tata Dios manami sielumanka pushankasapachu. Mana ñukata kreyiwashkankunaryaku manllayba tuta likidu uchkuman kachankasapa. Chay ñawpa Sodoma llaktapi almirana milagrunkunata rurashka kaptinika chay llaktapi kawsak runakuna kreyiwanmansapa karkan. Kreyiwashpankuna chay llakta kunnankaman tiyanmanlla karkan. ²⁴ Chayrayku willaykichi: Tata Dios kastigakunan diya ñawpa Sodoma llaktapi kawsak runakunamanta ashwan sincita Kapernaumpi kawsak runakunata kastigankasapa.

Jesus tukuy runakunata kayarkan payta katishpa kushikushpa kawsanankunapa.

(Lk 10.21-22)

²⁵ Jesus chay runakunata yachachishkankunawasha Tatan Diosta willarkan:

—Tatayni, kay allpapi chay sielupi allima kamachikukmi kanki. Kanka tukuy mana kreyinakuk runakunallata allita yachachinki. Chaymanta kikinkunallamanta yachak runakunata mana nimata yachachishkankichu. Chayrayku, Tatayni, sukanan alabayki. ²⁶ Ariya, Tatayni, kushikushpa chashna munashkanki ruraya.

²⁷ Jesus Tatanwan parlashkanwasha chay runakunata yachachirkansapa:

—Tataynika willawarkan ñukalla tukuy layata kamachikunaynipa. Paylلامي ñukata allita riksiwan. Kankunaka manami allitachu riksiwankichi. Tata Diospa wambran kashpayni ñukallami payta allita riksini. Nuka munashkayni runakunata riksichtiptini paykunalla Tataynita riksinsapa.

²⁸ Kankuna llakidu shaykudu kashpaykichika ñukaman shamuychi. Shamuptikichi tukuy llakinaykichimanta samachishkaykichi.

²⁹ Ñuka yachachikunaynika iden animal aysanan timonshinami. Yachachikunaynita kasushpaykichi timonta aysakshina kankichi. Chayrayku ñukamanta yachakuychi. Ñukaka mana piñakushpa allillapi yachachiykichi. Ñukaman shamushpaykichi ñukata kasuwashpaykichi kushikuypuru kawsankichi. ³⁰ Atipanaykichi layallata yachachiykichi ruranaykichipa. Ñuka yanapaptini atipankichi kasuwashpa kawsayta.

12

Suk samana diya Jesuspas disipulunkuna tipi triguta pallaspa mikurkansapa.

(Mr 2.23-28; Lk 6.1-5)

¹ Chaymanta suk samana diya Jesuska ñukaykunawan suk trigu chakra chawpinta pasarkanisapa. Chaypina yarkashpaynikuna triguta tipirkanisapa mikunaynikunapa. ² Mikuykaptinikuna fariseo runakuna kawawarkansapa. Chashna kawawashpankuna Jesusta willarkansapa:

—Mash kaway. Disipuluykikuna samana diya kaykaptin triguta tipishpa Moisespa kamachikunankunata mana kasuykansapachu.

³ Chashna willaptinkuna Jesuska aynirkansapa:

—Ariya, kawaykani imatami ruraykansapa nishpa. Samana diya palashpankunapish manami uchallikuykansapachu. *¿Manachu leyishkankichi*

ñawpa kamachikuk David rurashkanta? Suk kuti payka purikmasinkunawan sukanan purishpankuna yarkarkansapa. ⁴ Yarkaymanta kashpa Tata Diospa wasinpi yaykurkansapa. Chaypi Davidka Tata Diospa churadu pankunata mikurkan. Purikmasinkunatapish kararkan. Chay laya pankunaka saserdotekunallapa karkan. Chayta mikushpankunapish mana uchallikurkunasapachu.

⁵ ¿Manachu leyishkankichi ñawpa Moisespa killkadunpi rimashkunkunata? Chaypi willawanchisapa saserdotekuna Tata Diospa wasinpi tukuy diya trabajañkunata. Paykuna samana diyakuna mana samashpapish manami uchallikunsapachu.

⁶ Mash uyariwaychi. Chay Tata Diospa wasinpi trabajak saserdotekunamanta ñukami ashwan kamachikuk kani.

⁷ Tata Diospa rimanapi willawanchisapa: "Kankuna wiwa animalnikichita wañuchishpa rupachinaykichi tiyan ñukata kuyawanaykichipa. Chay animalnikichita rupachishkaykichimanta ashwanta munani runamasikichita llakichishpa yanapanaykichipa." Chashna Tata Dios rimaptinpish kunkunaka mana entiendishkankichichu. Allita entiendishpaykichika kay disipuluynikunata mana willankichimanchu karkan samana diya tipi triguta tipishpa uchallikuykanankunata. ⁸ Ñuka sielumanta shamudu runa kashpayni ashwan alli kamachikuk kani willanaynipa imakunatami samana diya rurankichi nishpa.

Jesus kaspirayadu makiyuk runata alliyachirkan.

(Mr 3:1-6; Lk 6:6-11)

⁹ Chay chakramanta llukshishpa Jesuska suk tantanakunankuna wasipi yaykurkan. ¹⁰ Chaypi suk kaspirayadu makiyuk runa karkan. Chaypina fariseo runakuna Jesusta chiknishpa chapaykarkansapa chatanankunapa. Pantachinayashpankuna Jesusta tapurkansapa:

—¿Ariya Moisespa killkadun willawanchichu samana diya suk unkuduta alliyachinanchikunapa?

¹¹ Chaypina Jesuska aynirkan:

—Samana diya suk ovejaykichi uchkupi urmaptin ¿manachu surkunkichiman? ¹² Ñukanchikuna ovejanchimanta ashwan allita runamasinchikunata kuyanchisapa. Chayrayku alli kanman samana diya runamasinchikunata yanapananchikunapa.

¹³ Chashna paykunata willashpa Jesuska chay kaspirayadu makiyuk runata willarkan:

—¡Makikita chutachiy!

Chaypina chay runaka Jesusta kasushpa kaspirayadu makinta chutachiptin iden suk ladu makinshina alliyarkan.

¹⁴ Samana diya Jesus chay runata alliyachiptin fariseo runakuna chay tantanakunankuna wasimanta llukshishpankuna kallarirkansapa yuyaykuya Jesusta wañuchinankunapa.

Ñawpa yachachikuk Isaiyas killkarkan Jesus rurananta.

¹⁵ Jesus fariseo runakuna wañuchinayanankunata yachashpa chay llakmanta llukshirkan. Llukshiptin aypa runakuna katirkansapa. Chaypina tukuy unkudukunata alliyachirkan. ¹⁶ Chaymanta chay alliyachishkan runakunata willarkansapa:

—Amara famakunkichirachu alliyachishkaynita.

¹⁷ Jesus chayta rurashpa chay ñawpa yachachikuk Isaiyas rimashkantashina ruraykarkan. Kashna Tata Dios rimashkanta Isaiyas killkarkan:

¹⁸ “Kaypimi sirviwaknini.

Ñukami paytaka kuyashpa akllarkani.

Paymi ñukata kushichiwan.

Paytami Espirituynita kusha.

Payka tukuy allpapi kawsak runakunata yachachinkasapa ñuka alli rurak kanaynita.

19 Payka manami ni pita piñayankachu ni pita kaparichinkachu.

Kallikunapi mana ni piwan ayninakuptin uyarinkasapachu.

20 Payka pataranakuk pintuta mana pakinkachu.

Wañunayak alkusata mana wañuchinkachu.

Tukuy llakishpa shaykushpa kawsak runakunata mana washanchashpa llakichishpa yanapankasapa.

Sukaman allita kamachikunka tukuy runakuna yachanankunapa allillata rurashpa kawsyta.

21 Chaypina aypa llaktakunapi kawsak runakuna payta shuyankasapa salvanankunapa."

Ñawpa yachachikuk Isaiyaska chayta killkarkan.

Fariseo runakuna rimarkansapa Jesusta supay yanapananta.

(*Mr 3:20-30; Lk 11:14-23; 12:10*)

22 Chaymanta Jesusman supayadu runata pushamurkansapa. Chayrunaka supayadu kashpa mana nima kawakuya nima rimakuya atiparkanchu. Jesus payta alliyachiptin atiparkanna kawakuya rimakuya.

23 Chayta kawashpangkuna tukuy runakuna sukaman almirashpangkuna tapunakurkansapa:

—¿Kay runachu shuyakananchi ñawpa kamachikuk Davidpa mirakni?

24 Chashna chay runakuna tapunakuptinkuna fariseo runakuna Jesusta mana kreyishpangkuna rimarkansapa:

—Kay Jesuska atipan runakunamanta supaykunata llukshichiyya supaykunapa kamachikuknin Belsebu yanapaptin.

25 Chay fariseo runakuna yuyashkankunata yachashpa Jesuska willarkansapa:

—Suk llaktapi kawsak runakuna chikninakushpa makanakushpangkuna kikinkunapura kulluchinakunsapa. Chaymanta suk wasipi kawsak runakuna chikninakushpa makanakushpangkuna chayta chayta anchunsapa. **26** Chashnallami supaykunapish kikinkunapura karkunakushpangkuna wakllichinakunsapa. Kikinkunalla kulluchinakunmansapa.

27 Kankunaka rimankichi supaykunapa kamachikuknin Belsebu yanapawaptin supaykunata llukshichinaynita. Chashna rimashpaykichi mana kuskatachu rimaykankichi. Belsebu yanapawaptinka ¿pití kankunapa disipulyukikunata yanapan supaykunata llukshichinankunapa? Allita yachankichi Tata Dios yanapanankunata. Chayrayku ñukata yuyawashpaykichi sukaman llullachinakuykankichi. **28** Tata Diospa Espirituñi yanapawaptin supaykunata atipani llukshichiyya. Chayrayku allita yachanaykichi tiyan Tata Dios ñukata kachamuwashkanta. Ñuka yachachiykichi Tata Dios kankunata kamachishunaykichita.

29 Mana ni pi suk sinchi runapa wasinmanta atipanmanchu nimata apaya manara payta allita watashpara. Chay sinchi runata watashpara tukuy laya tiyapunkunata atipanman kichuyta.

30 Kankuna mana kreyiwashpaykichi chikniwankichi. Mana yanapawashpaykichi sukkunata ñukamanta ashuchiykankichi.

31 Mash allita uyariwaychi. Tata Dioska runakunata tukuy uchankunamanta tukuy mana alli rimashkankunamantapish perdonankasapa. Chaymanta mana kutin perdonankachu Tata Diospa Espiritunta washanchashpa

sakra mana alli kananta rimaptinkuna. ³² Ñukaka sielumanta shamudu runami kani. Chashna kaptinpish suk runa mana alli kanaynita rimaptinpish Tata Dioska payta perdonanka. Chaymanta suk runa Tata Diospa Espiritunta washanchashpa chiknishpa sakra mana alli kananta rimaptin Tata Dioska manami paytaka perdonankachu. Nima kunan kay tiempu nima wañushkanwasha perdonankachu.

*Jesus wayuchakuk kaspipa ejemplunta yachachikurkan.
(Lk 6.43-45)*

³³ Chaymanta Jesuska yachachikuyllapi katirkan:

—Kankuna alli wayuchakuk kaspita kuydashpaykichi alli wayukunata pallankichi. Mana allita kuydaptikichi mana allitachu wayuchakun. Kaspikunapa wayunkunata kawashpaykichira riksinkichi chay kaspi allichu manachu nishpa. Allita rurashpa kawsaptini riksiwankichi alli wayuchakuk kaspishina kanaynita.

³⁴ Kankuna fariseokuna sukaman llullachikushpaykichi machakuyschina kankichi. Mana alli rurak runakuna kashpaykichi mana atipankichichu allikunata rimayta. Tukuy runa shunkunpi yuyanalallata riman. ³⁵ Tukuy alli yuyayuk runa allikunallata rimashpa kawsan. Tukuy mana alli yuyayuk runa mana allikunata rimashpa kawsan.

³⁶ Mash allita uyariwaychi. Kastigakunan diya Tata Dioska tukuy mana alli rimashkankunaryku runakunata kastigankasapa. ³⁷ Tata Dioska willashunkichi rimashkaykichi allichu manachu nishpa. Chaypina rimashkaykichi alli kaptinka payka mana kastigashunkichichu. Rimashkaykichi mana alli kaptinka sukaman kastigashunkichi.

Mana kreyinayak runakuna Jesusta mañarkansapa almirana milagruta rurananpa.

(Mr 8.12; Lk 11.29-32)

³⁸ Jesus yachachikuykaptin fariseo runakuna Moisespa killkadunta yachachikuk runakuna uyarirkansapa. Chaypina willarkansapa:

—Maestru, yachanayanisapa deveraschu manachu Tata Diosmanta shamudu runa kanaykita. Chayrayku munanisapa kawayta almirana milagrukunata ruraptiki.

³⁹ Chaypina Jesuska willarkansapa:

—Kankuna Tata Diosta mana kreyishpa mana alli rurak runakuna kashpaykichi mañawankichi almirana milagruta ruranaynipa. Kankunapaka manami rurashachu chay laya milagruta. Tata Dios ñawpa yachachikuk Jonaspa suk milagruta rurarkan. Ñukapapish chay layallata ruranka. ⁴⁰ Suk atun challwa Jonasta millpurkan. Chaypina chay challwa wiksanpi kimsa diyata kimsa tutata payka karkan. Chay kimsa diya paktaptinma chay challwaka Jonasta kipnamurkan. Ñuka sielumanta shamudu runa iden Jonasshina kimsa diyata kimsa tutata allpa ukupi kashkaynimanta atarimusha.

⁴¹ Chay ñawpa Ninive llaktapi kawsak runakuna sukaman mana allikunata rurashpankuna kawsarkansapa. Chaymanta chay yachachikuk Jonas yachachikuptin paykunaka uchankunamanta wanarkansapa Tata Diosta allita kasushpaa kawsanankunapa. Chay kastigakunan diya chay ñawpa Ninivemanta runakuna kankunata chatashunkichi mana kreyiwashkaykichirayku. Ñuka Jonasmanta ashwan alli yachachikuk kaptinipish mana kreyiwanayankichichu.

⁴² Chaymanta ñawpa tiempu suk karu llaktamanta suk kamachikuk warmi shamurkan yachaysapa Salomonta uyari. Ñuka Salomonmanta ashwan alli yachaysapa kaptinipish kankunaka mana kreyiwanayankichichu.

Chayrayku Tata Dios kastigakunan diya chay kamachikuk warmi kankunata chatashunkichi mana kreyiwashkaykichirayku.

Jesus supayadu runapa ejemplunta yachachikurkan.
(Lk 11.24-26)

⁴³ Chaymanta Jesuska willarkansapa:

—Suk runamanta supay llukshishpa chakidu chunlla allpapi purin samanayashpa. Mana ni maypi samananta tarishpa yuyaykushpa riman: ⁴⁴ “Shu kutishalla chay llukshimushkayni runallaman.” Chay runaman kutishpa tarin iden suk chunlla wasi chuya chuya pichadutashina. ⁴⁵ Chaypina kanchis ashwan mana alli rurak supaymasinkunata rin kayak. Tukuy paykuna rinsapa chay runapi kawsak. Chashna modomanta chay runaka ashwan mana allikunata rurashpana kawsan. Kankuna sukaman mana alli rurak kashpaykichi iden chay aypa supayuk runashinami kankichi.

Jesuspa wawkinkunawan maman rirkansapa paywan parlak.
(Mr 3.31-35; Lk 8.19-21)

⁴⁶ Jesus chay runakunata yachachiykaptin paypa mamanwan wawkinkuna chay wasiman rirkansapa. Paykunaka Jesuswan parlanayashpankuna wasi washallamanta kayachirkansapa. ⁴⁷ Chaypina suk runa Jesusta willarkan:

—Mamaykiwan wawkipikuna parlachishunayankisapa. Washapi shuyashuykansapa.

⁴⁸ Chaypina Jesuska chay runataka willarkan:

—¿Pítí mamayni? ¿Pítí wawkinikunaka?

⁴⁹ Chaymanta disipulunkunata makinwan apuntashpa tukuy runakunata willarkansapa:

—Kaykunami mamayni. Kaykunami wawkinikuna. ⁵⁰ Kankuna paykunashina sielipi kawsak Tatayni Diospa munananta rurashpa kawsashpaykichi ñukapa wawkinikuna panikuna mamaynikuna kankichi.

13

Jesus tarpukuk runapa ejemplunta yachachikurkan.
(Mr 4.1-9; Lk 8.4-8)

¹ Chay diyalla Jesuska chay wasimanta llukshishpa rirkana kocha mañanpi tiyarik. ² Chaypi tiyariptin aypa runakuna laduncharkansapa. Chaypina suk kanowapi Jesuska yaykurkan tiyarik chay kanowamanta yachachikunapta. Yachachikuptin tukuy chay runakuna kocha mañanmanta uyarirkansapa.

³ Chaypina Jesuska chay aypa runakunata rikchak laya ejemplukunata parlachishpa yachachirkansapa. Willarkansapa:

—Mash uyariwaychi. Suk runa rirkana murukunata chakranpi tarpuk. ⁴ Chaypina murukunata shikwashpa tarpuptin sukkuna ñanpi urmarkansapa. Pishkillukuna chay ñanpi urmadu murukunata mikurkansapa. ⁵ Suk murukuna urmarkansapa rumisapa allpapi. Chay murukuna allpa sawallapi kashpa utka shurayarkansapa allpa mana rakta kaptin. ⁶ Chay allpa rumisapa kaptin chay murukuna mana atiparkansapachu sapichakuyta. Chayrayku rupay nanaptin chakirkansapa.

⁷ Chaymanta suk murukuna urmarkansapa kashasapa allpapi. Chaypina kashakuna ashwanta wiñashpa chay wiñaykak murukunata makarkansapa.

⁸ Suk murukuna urmarkansapa allima allpapi. Chaypina wiñashpankuna sukaman allita wayuchakurkansapa. Suk murukuna mirarkansapa pachak

murukunata. Sukkuna mirarkansapa sokta chunka murukunata. Sukkuna mirarkansapa kimsa chunka murukunata. ⁹ Kankuna uyariwashpay-kichika allita rinrillikuychi.

Jesus disipulunkunata willarkan imaraykumi ejemplukunawan yachachikurkan nishpa.
(*Mr 4.10-12; Lk 8.9-10*)

¹⁰ Chaymanta ūukaykuna disipulunkuna Jesusta ladunchashpaynikuna tapurkanisapa:

—¿Imaraykuti chay runakunata ejemplukunata parlachishpa yachachinkisapa?

¹¹ Chaypina Jesuska ayniwarkansapa:

—Tata Dios kankunallata yachachishuykankichi paypa mandunpi yaykunaykichi. Manara kutin yachachishushkaykichita kunanka yachachishuykankichi. Suk runakuna mana kasunayaptinkuna Tata Dios mana kankunatashinachu yachachinsapa. ¹² Tata Dioska tukuy kreyikukkunata sukmaman yanapanka ashwanta entiendinankunapa. Chaypina ashwanta kreyikunkasapa. Mana kreyikukkunata tipi yachashkankunatapish kunkachinkasapa. ¹³ Chay runakunata yachachiptinipish mana entiendinsapachu. Tukuy alli rurashkaynikunata kawashpapish mana yachansapachu imaraykumi chaykunata rurashkani nishpa. Chayrayku ejemplukunallawan paykunata yachachini.

¹⁴ Ñawpa tiempu alli yachachikuk Isaiyas kay mana uyarinayak runakunapa killkarkan:

“Kay runakuna alli yachachikunaynita uyarishpapish mana nima entiendinkasapachu.

Alli rurashkaynita kawashpankunapish mana entiendinkasapachu imaraykumi rurashkani nishpa.

¹⁵ Kay runakunapa shunkunkuna sinchi likidumi.

Rinrinkunata wichkansapa ama uyariwanankunapa.

Ñawinkunatapish wichkansapa alli rurashkaynita ama kawanankunapa.

Mana munansapachu rimashkaynita entiendiya.

Mana munansapachu ūukaman shamuya sanuyachinaynipasapa.”

¹⁶ Chaymanta Jesuska ūukaykunallata willawarkansapa:

—Kankuna sukmaman kushikuypuru kankichi rurashkaynita kawash-paykichi. Sukman kushikuypuru kankichi yachachikuptini uyarishpakykichi. ¹⁷ Allita willaykichi. Ñawpa yachachikuk runakuna alli rurak runakunapish sukmaman munarkansapa kawanaykichita kawayta. Munarkansapa uyarinaykichita uvaryita. Chashna munashpankunapish mana kawarkansapachu nima uyarirkansapachu.

Jesus chay murukuna tarpukuk runapa ejemplunta entiendichikurkan.
(*Mr 4.13-20; Lk 8.11-15*)

¹⁸ Mash uyarivaychi. Yachachiykichi chay muru tarpukuk runapa ejemplun imatami riman nishpa. ¹⁹ Aypa runakuna sinchi shunkuyuk kashpa iden ūanpi chakidu sarudu allpashina. Chay laya runakuna Tata Diospa rimananta uyarishpankunapish mana entiendinsapachu. Chaypina chay pishkillukuna ūanpi urmadu murukunata mikukschina supay shamun Tata Diospa rimananta kunkachinanza.

²⁰ Chaymanta suk runakuna Tata Diospa rimananta kushikushpa uyarin-sapa. Chay laya runakuna iden rumisapa allpapi wiñak murukunashinami.

²¹ Mana ukupi sapiyukshina kashpankuna suk tiempullata kushikushpa Tata Diosta katinsapa. Paykuna kreyikushkankunaratayku sufriashpankuna

nanayta llakita mallishpankuna manana munansapanachu Tata Diosta katiyta.

²² Chaymanta suk runakuna Tata Diospa rimananta uyarishkankunamanta munanankunallata rurashpa kawsansapa. Sukaman kullkiyata munashpalla kawsansapa. Chay laya runakunaka iden kashasapa allpapi wiñak murukunashinami. Mana nima wayuchakunsapachu.

²³ Chaymanta suk runakuna Tata Diospa rimananta uyarishpa tukuy shunku kreyishpa entiendinsapa. Chay laya runakuna iden chay alli allpapi wayuchakuk murukunashinami. Súkkunaka pachak murukunata wayuchakuksinami. Sukkunaka sokta chunka murukunata wayuchakuksinami. Sukkunaka kimsa chunka murukunata wayuchakuksinami.

Jesus triguwan pakta mana alli kiwakuna wiñashkanta yachachikurkan.

²⁴ Chaymanta Jesuska yachachikushpa chay aypa runakunata willarkansapa:

—Mash uyariwaychi. Tata Dios mandunpi kamachikushpa iden suk runa chakranpi alli trigu murukunata tarpuksinami. ²⁵ Chaymanta suk tuta tukuy pi puñuykaptinkuna chakrayukta chiknik runa chay trigu tarpuđu chakraman rishpa mana alli kiwa murukunata tarpurkan. ²⁶ Chaymanta trigu wiñaykaptin chay mana alli kiwapish sukaman wiñarkan. ²⁷ Chaypina trabajadorkuna chakrayuk runata willarkansapa: “Señor, kan alli murukunata tarpučiptiki ¿imapati mana alli kiwakuna wiñaykansapa?”

²⁸ Chay chakrayuk runa aynirkansapa: “Suk chikniwak runami mana alli kiwa murukunata tarpushka.”

Chashna willaptin trabajadorkuna tapurkansapa: “¿Munankichu rinaynikunapa chay mana alli kiwakunata tipik?”

²⁹ Chaypina chakrayuk runaka willarkansapa: “Amara tipiychirachu. Mana alli kiwakunata tipishpaykichika ichara trigukunatapish tipinkichiman. ³⁰ Tantalla wiñachunsapa trigu pallananchi diyakaman. Alli trigu pukuptinra pallak runakunata willasha tukuy mana alli kiwakunata tipishpa tantanachinankunapa. Chay mana alli kiwata wata wata rurashpa rupachinkasapa. Chaymanta alli triguta pallashpa wakaychankasapa murukuna churana wasinipi.”

Jesus mostasa murillupa ejemplunta yachachikurkan.

(Mr 4:30-32; Lk 13:18-19)

³¹⁻³² Chaymanta Jesuska chay runakunata suk ejempluta yachachirkansapa:

—Kunan yachachiykichi imashnami Tata Diospa mandunpi kawsankichi nishpa. Mostasa murillun tukuy laya murukunamanta ashwan kishnisillu. Suk runa chakranpi tarpuptin chay murilluka allita wiñan. Kishnisillu kashpapish chay muruka tukuy kiwakunamanta ashwan atunta wiñan. Iden kaspishina sukaman ramachakun. Chay ramankunapi aypa pishkillukuna wasiskunata ruransapa. Kankuna chay kishnisillu murukunashinami kankichi.

Jesus levadurapa ejemplunta yachachikurkan.

(Lk 13:20-21)

³³ Chaymanta Jesuska kashkan yachachikushpa chay runakunata willarkansapa:

—Yachachiykichi imashnami Tata Diospa mandunpi kawsankichi nishpa. Suk warmi panta rurashpa kimsa pati trigupa machkanta yakuwan chakrun. Chaymanta tipi levaduratapish churan chay chapuduta allita punkichinanpa. Kankuna Tata Diospa mandunpi kawsashpaykichi chay alli levadurashina kankichi.

Jesus willarkan imaraykumi ejemplukunata parlachikushpa yachachikurkan nishpa.
(Mr 4:33-34)

³⁴ Jesuska rikchak laya ejemplukunawan parlachikushpa chay runakunata yachachirkansapa. Mana ejempluta parlachikushpa mana yachachikukchu. ³⁵ Ñawpa tiempu suk yachachikuk runa killkashpa rimarkan Jesus ejemplukunata parlachikushpa yachachikunanta. Chay killkadunpi riman:

“Ñuka rikchak laya ejemplukunata parlachishpayni runakunata yachachisha.”

Tata Dios kay allpata rurashkanmantapacha mana ni pi yachashkanta yachachikusha.”

Jesus yachachikurkan imami chay mana alli kiwakuna nishpa.

³⁶ Chaymanta Jesus chay aya runakunata wasinkunaman kutinankunapa willashpa suk wasipi yaykurkan. Chaypi ñukaykuna ladunchashpaynikuna willarkanisapa:

—Chay mana alli kiwakunapa ejemplunta parlachiwashpaykisapa ¿imatati yachachiwashkankisapa?

³⁷ Chaypina Jesuska ayniarkansapa:

—Ñuka sielumanta shamudu runa kashpayni alli murukunata tarpukuk runashinami kani. ³⁸ Kay allpapi kawsak runakuna iden chakrashinami. Tata Diosta kasushpa kawsak runakunaka iden chay alli murukunashinami. Supaypa mandunpi kawsakkunaka iden chay mana alli kiwakunashinami.

³⁹ Supayka iden chay chakrapi mana alli murukunata tarpuk runashinami. Kay allpa tukunan diya iden chay trigu pallana diyashinami. Chaymanta angelkuna iden triguta pallak trabajadorkunashinami. ⁴⁰ Kay allpa tukunan diya Tata Dioska tukuy uchasapa runakunata kastigankasapa. Payka iden chay mana alli kiwakunata shuntushpa rupachik runashinami. ⁴¹ Ñuka sielumanta shamudu runa kashpayni angelninkunata kachamusha tukuy maymanta mana alli rurak runakunata tantachinankunapa. Chaymanta runamasinkunata uchallichikuk runakunatapish tantachishasapa. ⁴² Chaypina mana tukuyniyuk ninaman paykunata wishchushasapa. Chaypi chay runakuna nanaya mana muchushpankuna kirunkunata mukushpankuna sukanan wakankasapa.

⁴³ Chaymanta Tata Diospa munananta rurak runakuna Tatankunapa mandunpi yaykushpa iden intishina llipyankasapa.

Kankuna rinriyuk kashpaykichi allita uyariwaychi.

Jesus pakadu kuripa ejemplunta aya chaniyuk perlas ejemplunta yachachikurkan.

⁴⁴ Chaymanta kashkan yachachikushpa Jesuska willarkansapa:

—Tata Diospa mandunka iden aya chaniyuk kurishinami. Suk runa chikanpa chakranpi pakadu kurita tarirkana. Chayta tarishpa kashkan chayllapi pakarkan. Kushikupuru chay kuriyuk chakrata rantinanpa tukuy tiyapushkankunata rantikurkan. Chaypina chay kuriyuk chakrata rantirkan. Chashnashina kankuna sukanan munanaykichi tiyan Tata Diospa mandunpi kawsaya.

⁴⁵ Chaymanta chikan ejempluta willaykichi. Tata Diospa mandunka iden aya chaniyuk perlashinami. Suk rantikuk runa allima yurak perlaskunata maskashpa purirkana rantinanpa. ⁴⁶ Sukaman maskashpa suk aya

chaniyuk ashwan allima perlasta tarirkan. Chaypina tukuy tiyapushkankuna rantikurkan chaypa chaninwan chay ashwan allima perlasta ranti-narpa. Chashnashina kankuna sukaman munanaykichi tiyan Tata Diospa mandunpi kawsayta.

Jesus atun redpa ejemplunta yachachikurkan.

⁴⁷ Chaymanta Jesuska kashkan yachachikushpa willarkansapa:

—Kunan yachachiykichi imashnami Tata Diospa mandunpi yaykunkichi nishpa. Aypa runakuna atun redniinwan rikchak laya challwakunata apinsapa. ⁴⁸ Chaymanta aypa challwakuna redniinwan wickashpa chay runakuna kocha mañanman aysansapa. Chaypi tiyarishpa challwakunata aklansapa. Alli challwakunata sestunkunapi churansapa. Mana alli challwakunata wishchunsapa. ⁴⁹ Chaymanta kay allpa tukunan diyapish iden chay challwakunata apik runakunashina angelkuna runakunata akl-lankasapa. Tata Diosta kuyashpa kawsak runakunamanta mana alli rurak runakunata suchuchinkasapa. ⁵⁰ Chaymanta tukuy mana alli rurak runakunata wishchunkasapa mana tukuyníyuk ninaman. Chaypi nanaya mana muchushpankuna kirunkunata mukushpankuna sukaman wakankasapa.

Jesus tukuy laya wakaychadukunapa ejemplunta yachachikurkan.

⁵¹ Chaymanta Jesuska ñukykuna disipulunkunata tapuwarkansapa:

—¿Entiendinkichichu tukuy chay yachachishkaynikunata?

Chaypina aynirkanisapa:

—Ariya entiendinispamami.

⁵² Chaypina Jesuska willawarkansapa:

—Suk wasiyuk runa wasinpi aypa mushuk aypa mawka wakaychadu tiyapunankunata surkumun suk runata kawachinanpa. Chay kawachikuk runaka Tata Diospa killkadunta yachachikuk runakunashinami. Paykunaka Tata Diospa mandunpi yaykushpa yachansapa mushuk layata ñawpa yachashkankunata yachachikuuya.

Llaktamasinkuna Jesusta mana kreyinayarkansapachu.

(Mr 6.1-6; Lk 4.16-30)

⁵³ Chaymanta tukuy chay ejemplukunawan yachachikushkanwasha chay llaktamanta Jesuska llukshirkan. ⁵⁴ Chaypina kikinpa llaktanpi chayashpa tantanakunankuna wasipi Tata Diospa rimananta yachachikurkan. Chaypina tukuy chay runakuna sukaman almirashpankuna rimarkansapa:

—¿Maypití kay runaka tukuy layata yachakushka? ¿Imashnatí atipan almirana milagrukunata rurayta? ⁵⁵ ¿Manachu kay runaka karpinterupa wambran? ¿Manachu paypa maman Mariya? ¿Manachu wawkinkuna Jakobo, Jose, Simon, Judas? ⁵⁶ ¿Manachu paninkuna llaktamasinchikunalla? ¿Pítí payta yachachishka chay layata yachananpa?

⁵⁷ Chay runakuna Jesus llaktamasinkuna kaptinkunapish mana nima kasunayarkansapachu. Chaypina Jesuska willarkansapa:

—Suk runa Tata Diospa rimananta yachachikuptin llaktamasinkuna familyankuna mana kreyinsapachu. Chikan llaktakunapi yachachikuptin chaypira sukaman allita uyarinsapa.

⁵⁸ Chashna llaktamasinkuna mana kreyinayaptinkuna Jesuska llaktanpi mana aypa almirana milagrukunata turarkanchu.

¹ Chay tiempu Galilea partipi sinchi kamachikuk Herodes uyarirkan Jesus aypa almirana milagrukunata rurashkanta. ² Chaypina Herodeska sirvikninkunata willarkansapa:

—Ichará chay Jesuska wañuchichishkayni Juan. Ichará Juan Bawtista wañushkanmanta kawsamushka. Chayrayku atipan almirana milagrukunata rurayta.

³ Herodeska tukuy chayta rimarkan Juanta wañuchichishkanta yuyashpa. Ñawpana Juanta kadenakunawan watachishpa karselpi wichkachirkan. Chayta rurarkan warmin Herodiyas munaptin. Chay wärmin Herodiyaska ñawpa Herodespa wawkin Felipipa warmin karkan. ⁴ Kuñadanwan kawsaptin Juanka Herodesta willarkan:

—Kuñadaykiwan uchalllikushpa kawsashpayki mana allitachu ruraykanki.

⁵ Chayta willashkanrayku Herodes Juantaka wañuchichinayarkan. Wañuchichinayaptinpish tukuy runakuna yuyarkansapa Juan Tata Diospa rimananta yachachikuk kananta. Chayrayku chay runakunata manchashspa mana animukurkanchu wañuchichiyyta.

⁶ Chaymanta Herodeska watan paktashkanrayku suk fiestata rurarkan. Chay fiestapi warmin Herodiyaspa shipashnnin tushurkan tukuy konvidadukunapa ñawpkninkunapi. Chashna tushushpa Herodestaka sukaman kushichirkan. ⁷ Chayrayku Herodes chay shipashtaka jurashpa prometirkian: “Imatapish mañawaptiki kushkayki.”

⁸ Chashna Herodes willaptin chay shipashka mamanta tapurkan imatami mañanka nishpa. Chaypina mamanka yachachirkan mañananpa Juan Bawtistapa umanta suk källanapi churashpa kunanpa.

⁹ Chashna mañaptin Herodeska sukaman llakirkkan. Llakishpapish konvidadukuna prometinakushkanta uyarishkankunaryku mana atiparkanchu llullachiyyta. ¹⁰ Chayrayku Herodeska soldadunkunata willarkansapa karselman rishpankuna Juanpa umanta tipinankunapa. ¹¹ Chaymanta soldadukuna Herodes willashkankunata rurarkansapa. Juanpa umanta tipishpankuna suk atun källanapi churashpa aparkansapa chay shipashta chaskichik. Chaypina payka mamanta kurkan.

¹² Chaymanta Juanpa disipulunkuna rirkansapa kuerpunta pampak. Pampashkankunawasha rirkansapa Jesusta willak.

*Jesus mikunata mirachirkan pichka waranka runakunapa.
(Mr 6.30-44; Lk 9.10-17; Jn 6.1-14)*

¹³ Juan Bawtistata wañuchishkankunata yachashpa Jesuska sapallan suk kanowapi chay kochata chimbarkan chunlla likidu pampaman rinanpa. Jesus rishkanta yachashpankuna chay llaktakunamanta aypa runakuna kocha mañanta purishpankuna katirkansapa. ¹⁴ Chay kanowamanta llukshishpa Jesuska chay aypa katik runakunata kawarkan. Paykunata kawashpa sukaman llakichirkansapa. Chaypina tukuy chay pushadu unkudukunata alliyachirkansapa.

¹⁵ Chaymanta amusayaptin ñukaykuna Jesusta ladunchashpaynikuna willarkanisapa:

—Ñami amusayaykanna. Manami ni pi kaypika kawsanchu. Chayrayku tukuy kay runakunata willay chay llaktakunaman utka rinankunapa miku-nankunata rantik.

¹⁶ Chaypina Jesuska ñukaykunata willawarkansapa:

—Mana munanichu rinankunapa. Kankunalla karaychi.

¹⁷ Chashna Jesus willawaptinkuna willarkanisapa:

—Manami aypachu mikunaynikuna. Pichka pan ishkay challwallami tiyawansapa.

18 Chaypina Jesuska willawarkansapa:

—Apamuychi chay mikunaykichita.

19 Apamuptinikuna Jesuska tukuy chay runakunata willarkansapa uksha sawanpi tiyarinankunapa. Chaymanta chay pichka panta chay ishkay challwata apishpa sieluta chàpashpa Tata Diosta agradesirkana. Agradesishkanwashcha chay pankunata paki paki rurashpa ñukaykunata kuwarkansapa. Chaypina ñukaykuna runakunata charichirkanisapa. **20** Chay aypa runakuna mikurkansapa saksanankunakaman. Chaymanta mikushkunkunawasha ñukaykuna puchukunata tantachirkanisapa chunka ishkay sestu untata. **21** Chay mikuk ullkukunaka pichka waranka karkansapa. Aypa warmikuna wambrakunapish mikurkansapa. Paykunata mana yuparkanisapachu.

Jesus yaku sawanta purirkana.

(*Mr 6.45-52; Jn 6.16-21*)

22 Chaymanta Jesuska ñukaykunata willawarkansapa:

—Ñukaka tukuy kay runakunata willasha wasinkunaman kutinankunapa. Willanaynikaman kankuna kay kanowapi kochata chimbaychi.

23 Chay runakuna rishkankunawasha Jesuska sapallan suk urkuman rirkan chaypi Tatan Dioswan parlananpa. Tutayanankaman chaypi sapallan karkan.

24 Jesus chay urkupi kaptin ñukaykuna kanowapi chawpi kochata riykarkanisapa. Chimbaykaptinikuna sinchita wayraptin olaskuna kanowaynikunata sukaman kuyuchirkan. **25** Chaymanta pakariyakaptin Jesuska yaku sawanta purishpa ladunchawarkansapa. **26** Ñukaykuna Jesusta mana riksishpaynikuna sukaman manchakurkanisapa. Manchakuywan sinchita rimarkanisapa:

—¡Supaychi imachami shamuykan!

27 Chashna kapariptinikuna Jesuska willawarkansapa:

—¡Ama manchawaychichu! Ñukami kani.

28 Chaypina Pedru aynirkana:

—Kan Señornini kashpaykika willaway yaku sawanta purishpa laduykiman rinaynipa.

29 Chaypina Jesuska willarkan:

—Ariya shamuy.

Rinanpa willaptinna Pedruka kanowamanta llukshishpa yaku sawanta purirkana Jesupsa ladunman rinanpa. **30** Riyakashpana chay sinchi wayrata mallishpa sukaman manchakurkan. Kallarishpa sumiyta sinchita rimashpa willarkan:

—¡Salvaway, Señor!

31 Chashna Pedru willaptin Jesuska makinmanta apishpa willarkan:

—¿Imapatí mana tukuy shunku ñukata kreyiwanki yanapanaynipa?

32 Chaymanta Jesuswan Pedru kanowapi yaykuptinkuna chay sinchi wayraka kasillayarkan. **33** Chaypina tukuy ñukaykuna kanowa ukupi Jesupsa ñawpakninpi kunkurikushpa willarkanisapa:

—Deverasmi Tata Diospa wambran kanki.

Genesaret partipi Jesus aypa unkudu runakunata alliyachirkansapa.

(*Mr 6.53-56*)

³⁴ Chaymanta Jesuswan tantalla chay kochata chimbashpaynikuna Genesaret partipi chayarkanisapa. ³⁵ Chaypi kawsak runakuna Jesusta rikishpankunka chayta chayta rishpankunka famakurkansapa Jesus llaktankunapi kananta. Chaypina Jesusman tukuy laya unkuyuk runakunata pusharkansapa alliyachinankunapa. ³⁶ Chay unkudukuna alliyayta munashpankunka Jesusta roygarkansapa:

—Llachapaykipa mañanta llankanayanisapa alliyanaynikunapa.

Chaypina llachapanpa mañanta llankakkunka unkuyninkunamanta alliyarkansapa.

15

Jesus yachachikurkan imata rurashpanchi uchallikunchi.

(Mr 7.1-23)

¹ Chaymanta fariseo runakunawan Moisespa killkadunta yachachikkunka Jerusalen llaktamanta rishpankunka Jesusta tapurkansapa:

² —¿Imapatí disipulyukikuna mana ruransapa ñawpa awiluchikunapa amañashkankunata? ¿Imapatí paykunaka makinkunata mana allita mayllashpankunka mikunsapa?

³ Chaypina Jesuska tapurkansapa:

—¿Imapatí kankuna Tata Diospa munananta mana rurashpa ñawpa awiluykichiapa amañashkankunallata rurankichi? ⁴ Tata Diomsi rimarkan: “Tataykita mamaykita allita kuyashpa kawsaychi.” Chaymanta rimarkan: “Ichara su runa tatanta mamanta sukaman chiknishpa maldisinman. Chay maldisikuk runataka awtoridarkuna wañuchichinankuna tiyan.”

⁵ Chashna Tata Dios rimaptinpish kankuna chikan layatana yachachikuykankichi. Yachachikunkichi atipanaykichita mamaykichita tataykichita willaya: “Kankunata yanapanayni kullkita Tata Diostami kushkani. Chayrayku manana tiyawannachu kankunata yanapanaynipa.”

⁶ Chashna rimashpaykichiapa rimaykankichi tataykichita mamaykichita mana yanapaptikichipish mana nimananchu. Yachachikuykankichi Tata Dios kamachikushkan mana alli kananta. Tata Diosta mana kasushpaykichi ñawpa awiluykichi amañashkankunallata ruraykankichi.

⁷ Chaymanta Jesuska chay fariseokunata willarkansapa:

—Tukuy kankuna allipi tukushpa llulla likidu kankichi. Kankunapa ñawpa yachachikuk Isaiyas killkarkan:

⁸ “Kay runakuna mishkik shimi tukushpa kuyawansapa. Mana tukuy shunkuchu kuyawansapa.

⁹ Runakunapa yachachikunallata yachachikunsapa.

Llullakushpa kuyawakshina tantanakushpankunapish mana kushchiwansapachu.”

¹⁰ Chashna willashpa Jesuska tukuy chay runakunata ladunman kayashpankunka willarkansapa:

—Mash uyariwaychi allita entiendinaykichiapa: ¹¹ Imatapish kaptin mikushpaykichi mana uchallikunkichichu. Måna allita rimashpaykichi chaypimi esika uchallikunkichi.

¹² Chaypina ñukaykuna Jesusta ladunchashpaynikuna willarkanisapa:

—¿Yachankichu fariseo runakuna chay yachachikushkaykita uyarishpankunka sukaman piñakushkankunata?

¹³ Chaypina Jesuska ayniwarkansapa:

—Chay fariseo runakuna Tata Diospa rimananta yachachikuykashpa aypa amañashkankunatapish yachachikunsapa. Sielupi kawsak Tataynika

mana alli kiwata sapintinta tirakshina chay runakunapa mana alli yachachikushkanta kulluchinan tiyan. ¹⁴ Ama llakichichu chay fariseokuna piñakuptinkuna. Paykunaka Tata Diospa kamachikunankunata mana allita entiendishpankuna mana yachak runakunata pantachichin-sapa. Paykunaka maña kawakuk runakunashina kashpankuna mana kawakukmasinkunata pushashpa ishkantin uchkupi urmanmansapa.

¹⁵ Chaymanta Pedruka Jesusta willarkan:

—Chay yachachiwashkaykisapata ashwan allita entiendichiwaysapa.

¹⁶ Chaypina Jesuska willarkan:

—¿Ariya kankunapish manarachu entiendinkichira? ¹⁷ Tukuy laya mikuna shiminchita yaykushpa wiwsanchiman rin. Chaymanta letrinaman rin. Imatapish kapitn mikushpa manami uchallikunchichu. ¹⁸ Tukuy runa mana allita yuyaykushpa mana allita rimashpa uchallikun. ¹⁹ Tukuy runa shunkunpi mana allita yuyaykushpa chayta ruran. Chayta yuyashpa runamasinta wañuchin, chikan warmiwan uchallikun. Suk wayna suk shipashwan manara kasarashpara uchallikunsapa. Chaymanta suwakun, llullachikun, runamasinta chiknishpa piñachin. ²⁰ Suk runa chay mana allikunata rurashpa uchallikun. Mana makinta mayllashpa mikushpa man-ami uchallikunchu.

*Manajudiwa warmi Jesusta roygarkan shipashninta alliyachipunarpa.
(Mr 7.24-30)*

²¹ Jesuska chay llaktamanta rirkana Tiro llaktaman Sidon llaktaman.

²² Chaypina suk warmi payta laduncharkan. Chay warmika kananea kashpa mana judiyachu karkan. Payka sinchita rimashpa Jesusta roygarkan:

—Señor, ñawpa kamachikuk Davidpa miraknini kanki. Llakichiwashpa shipashninita alliyachipay. Shipashninita supay sukaman turbachishpa unkuchin.

²³ Chashna chay warmi sukaman willaptinpish Jesuska mana nimata aynirkanchu. Chaypina ñukaykuna Jesusta ladunchashpaynikuna roygarkanisapa:

—Señor, kay warmita ashuchi. Payka sukaman kaparikushpa kati-waykanchisapa.

²⁴ Chaypina Jesuska chay warmita willarkan:

—Tata Dioska kachamuwashka israel llaktamasinikunallata yanapanaynipasapa. Paykunaka iden chinkadu ovejakunashina kawsaykansapa.

²⁵ Chayta uyarishpa chay warmika Jesuspa ñawpaknini kunkurikushpa willarkan:

—Señor, yanapaway.

²⁶ Chashna chay warmi willaptinpish Jesuska willarkan:

—Manarapish ni pita chikan llaktakunamanta alliyachishpaynira judiyu-masinikunatarra yanapanayni tiyan. Mana allichu suk runa wambranku-nata panta kichushpa allkukunata karananpa.

²⁷ Chashna Jesus willaptinpish chay warmika willarkan:

—Ariya Señor, wambrakuna mesapi mikuptinkuna mesamanta puchudukuna urmaptin allkukunapish mikunsapa. Ñuka allkushina kaptinipish yanapaway.

²⁸ Chaypina Jesuska willarkan:

—Tukuy shunku kreyiwashkaykirayku shipashnikita alliyachini. Chay oramantapacha shipashnin sanuna karkan.

Jesus aypa unkudu runakunata alliyachirkansapa.

²⁹ Chaymanta chay llaktakunamanta llukshishpa Jesuska ūukaykunawan rirkana Galilea kocha mañanman. Chaypina suk urku sawanman rishpa tiyarirkan. ³⁰ Chay urkupi kaptinikuna aypa runakuna tukuy laya unkuyuk runakunata pushashpangkuna shamurkansapa. Jesuspa ūawpakiñipi churarkansapa mana puriy atipakkunata, mana kawakukkunata, mana rimakuy atipakkunata, wakllidu makiyukkunata, rikchak laya unkuyukkunata. Chaypina Jesuska tukuy chay unkudu runakunata alliyachirkansapa. ³¹ Chashna alliyachiptinkuna mana rimakuy atipakkuna allitana rimakurkansapa. Wakllidu makiyukkunata alliyarkansapa. Mana puriy atipakkuna allitana purirkansapa. Mana kawakukkunata allitana kawakurkansapa. Jesus tukuy paykunata alliyachishkanta kawashpangkuna chay runakuna israel runakunata Tata Diosninta sukaman alabarkansapa.

*Jesus mikunata mirachirkan chusku waranka runakunata karananpa.
(Mr 8.1-10)*

³² Chaymanta Jesus ūukaykunata kayawashpangkuna willawarkansapa:
—Sukaman kay runakunata llakichinisapa. Ņami kimsa diyatana ūukawan kashpangkuna tukuy mikunankunata tukuchashkasapa. Mana willanayanichu wasinkunaman kutinankunata. Ichará mana mikushpa rishpangkuna ūanpi shaykunmansapa.

³³ Chaypina ūukaykunaka Jesusta willarkanisapa:
—Kaypika manami niman suk runa kawsanchu. Manami kay chunllapika nima mikunata tarishunchisapachu kay aypa runakunata karananchikunapa.

³⁴ Chashna willaptinikuna Jesuska tapuwarkansapa:
—¿Mashna pannikichití tiyan?
Ñukaykuna aynirkanisapa:
—Kanchis pan challwillukunapish tiyawansapa.

³⁵ Chaypina Jesuska tukuy chay runakunata willarkansapa allpapi tiyarinankunata. ³⁶ Tiyariptinkuna chay kanchis pankunata chay challwillukunata apishpa Tata Diosta agradesirkan. Chaymanta chay pankunata chay challwillukunata ūukaykunata kuwarkansapa. ūukaykuna chay runakunata kararkanisapa. ³⁷ Karaptinkuna mikurkansapa saksanankunakaman. Chaymanta puchushkankunata kanchis sestu uñtata tantachirkanisapa. ³⁸ Chay mikuk ullukkuna chusku waranka karkansapa. Warmikunata wambrakunata mana yuparkanisapachu.

³⁹ Chaymanta mikushkankunawasha Jesuska tukuy runakunata willarkansapa wasinkunaman kutinankunata. Riptinkuna Jesuska ūukaykunawan rirkana suk kanowapi Magadan partiman.

16

Fariseokunawan saduseokuna Jesusta roygarkansapa suk milagruta runanpa.

(Mr 8.11-13; Lk 12.54-56)

¹ Chaymanta fariseo runakunawan saduseo runakuna Jesustaka ladun-charkansapa. Jesusta pantachichinayashpa willarkansapa:

—Tata Diosmanta shamudu runa kashpaykika suk almirana milagruta ruray kanta kreyinaynikunata.

² Chashna willaptinkuna Jesuska willarkansapa:

—Inti puka likidu yaykuptin kankuna rimankichi allima diya pakari-nanta. ³ Chaymanta chikan diya puka likidu puyu wichkanakuptin rimankichi diya wakllinanta. Kankuna sielupi puyukunata kawashpa yachankichi ima laya diyami kanka nishpa. Tukuy chayta allita yachashpaykichi-pish ūnka rurashkaynikunata kawashpaykichi mana entiendinkichichu Tata Diosmanta shamudu runa kanaynita. ⁴ Kankuna Tata Diosta mana ka-sushpa mana alli rurak kayakashpaykichi willawankichi almirana milagruta ruranaynipa. ūnaka manami nimata rurashachu kawanaykichillapa. Tata Dios ūnwa yachachikuk Jonaspa suk almirana milagruta rurarkan. Chay layallata ruranka kawanaykichipa.

Jesus chashna willashpa paykunata sakishpa chikanman rirkana.

Jesus yachachikurkan ama fariseokunapa yachachikunankunata kasunankunapa.
(Mr 8.14-21)

⁵ Chaymanta chay kocha chimbapi chayashpaynikuna yuyarkanisapa panninikunata kunkashkaynikunata. ⁶ Chaypina Jesuska willawarkansapa:

—Mash allita uyariwaychi. Ama munaychichu fariseokunapa nima saduseokunapa levdurawan ruradu panninkunata.

⁷ Chashna Jesus willawaptinkuna mana entiendishpaynikuna willanakurkanisapa:

—Pankunata mana apamushkanchikunarayku chayta willawanchisapa.

⁸ Willanakushkaynikunata yachashpa Jesuska willawarkansapa:

—¿Imapatí chashnaka willanakunkichi? Mana chaytaka willashkay-chichu pannikichita kunkashkaykichirayku. Kankunaka manara al-litarachu kreyiwaykankichi. ⁹ ¿Manarachu entiendinkichira? ¿Nachu kunkashkankichina pichka pankunawan pichka waranka runakunata paktachishpa karashkaynita? ¿Manachu yuyankichi mashna sestutami mikuna puchuduta tantachishkaykichita? ¹⁰ Chaymanta ¿manachu yuyankichi chusku waranka runakunata kanchis pankunawan karashkaynita? ¿Manachu yuyankichi mashna sestutami puchudu pankunata tantachishkaykichita? ¹¹ ¿Imapatí kankunaka mana allita entiendiwashkankichi? Manami fariseokunapa saduseokunapa panninkunapachu willashkaykichi. Kashkan willaykichi: Ama munaychichu chay runakunapa levdurawan ruradu panninkunata.

¹² Chaypina ūnaykuna chayrak allita entiendirkanisapa Jesus rimashkanta fariseokunapa saduseokunapa mana alli yachachikunankunamanta kuydakunaynikunapa. Mana willawarkansapachu paykunapa levdurawan ruradu panninkunamanta kuydakunaynikunapa.

Pedru rimarkan Jesus Tata Diosmanta shamudu salvakuk runa kananta.
(Mr 8.27-30; Lk 9.18-21)

¹³ Chaymanta Sesarea Filipo partipi chayaptinikuna Jesus ūnaykunata tapuwarkansapa:

—Runakuna parlashpankuna ¿pi kanaynitati rimansapa?

¹⁴ ūnaykuna aynirkanisapa:

—Sukkuna rimansapa Juan Bawtista kanaykita. Sukkuna rimansapa ūnwa yachachikuk Eliyas kanaykita. Sukkuna rimansapa ūnwa yachachikuk Jeremiyas kanaykita. Sukkuna rimansapa Tata Diospa rimananta yachachikuk kanaykita.

¹⁵ Chaypina Jesuska tapuwarkansapa:

—Kankunaka ¿pi kanaynitati yuyankichi?

16 Chashna tapuwaptinkuna Simon Pedruka aynirkan:

—Kanka mana tukuyniyuk kawsak Tata Diospa wambranmi kanki. Paymi kachamushushka salvakuk kanaykipa.

17 Chaypina Jesuska Pedruta willarkan:

—Jonaspa wambran Simon, sielipi kawsak Tataynimi yachachishushka chayta willawanaykipa. Mana niman suk runachu chaytaka yachachishushka. Chayrayku Tata Dios kushichishunki.

18 Mash allita uyariway. Kanka Pedrumi kanki. Sinchita kreyiwashkaykirayku sinchi rumishina kanki. Aypa runakuna kanshina sinchita kreyiwankasapa. Tukuy kreyiwakkuna ūukapa wasinishinga kankasapa. ūukaka sinchi rumi sawanpi wasinita rurasha. Tukuy kreyiwak runakuna wañushpankunapish manana wañudukuna churanankunaman rinkasapachu. Mana ni pi atipankachu kreyiwakkunata kulluchiyya.

19 ūukaka Tata Diospa mandunpi yakyuna llavita kushkayki. Chay llavika yachachikunaynishinami. Kan yachachikuptiki suk runakuna kreyikuptinkuna willankisapa uchankunamanta kacharidu kanankunata. Sielipi kawsak Tata Diospish willankasapa kacharidu kanankunata. Chaymanta yachachikuptiki sukkuna mana kreyikuptinkuna willankisapa watadushinalla kiparinankunapa. Chashnalla sielipi kawsak Tata Diospish willankasapa watadutashinalla kiparinankunapa.

20 Chayta Pedruta willashkanwashana Jesuska tukuy ūukaykunata willawarkansapa:

—Amara ni pita willankichirachu ūuka sielumanta shamudu salvakuk runa kanaynita.

Jesus willarkansapa chiknik runakuna payta wañuchinankunata.

(*Mr 8.31-9.1; Lk 9.22-27*)

21 Chaymanta Jesuska ūukaykunata allita entiendichiwashpankuna willawarkansapa:

—ūukaka Jerusaleman rinayni tiyan. Chaypi ansianukunawan, saserdotekunapa kamachikukninkunawan, Moisespa killkadunta yachachikuk runakuna sukaman sufrichiwashpa wañuchiwankasapa. Chaymanta wañushkaynimanta kimsa diya ukun kawsamusha.

22 Chashna wañuchinankunata willawaptinkuna Pedruka suk chikanman Jesusta pushashpa willarkan:

—Señor, ama chaytaka yuyaychu. Tata Dioska manami munankachu wañuchishunankunapa.

23 Chashna willaptin Jesuska Pedruta chapashpa willarkan:

—ūukamanta ashuy, Satanás. Llullachiwanayanki ama Tata Diosta kasunaynipa. Manami Tata Diospa munanantachu willawaykanki. Runaku-napa munananllata yuyashpa willawaykanki ama wañunaynipa.

24 Chaymanta Jesuska tukuy ūukaykunata willawarkansapa:

—Kankuna ūukapa disipuluunikuna kanayashpaykichika amana kikichipa munanaykichita ruraychinachu. Chiknishuk runakuna ūukaryku wañuchishunayaptikichipish ūukallata kreyiwashpa katiwayaychi. **25** Kankuna wañuymanta kishpinayashpa sakiwashpaykichika mana tukuyniyuk nimantama kishpinkichichu. Chaymanta kreyiwashkaykichirayku runakuna wañuchishuptikichipish sieluman rinkichi Tata Diowan mana tukuyniyukta kawsak. **26** Suk runa rikchak laya tiyapuptinpish mana sielipi yakyushpaka yankamanta tukuy layayuk kawsashka. Aypa kullkiyuk kash-pipish mana atipanchu chaninta paktachiyya sielipi kawsanarpa.

27 Ñuka sielumanta shamudu runa Tataynipa llipyayninpí angelinku-nawan tantalla kashkan shamusha. Shamushpayni tukuy runakunata pagarashasapa allita mana allita rurashkankunapa. **28** Mash allita uyari-waychi. Ñuka sielumanta shamudu runa kashpayni tukuy runakunata kamachishasapa. Suk kankuna manara wañushpaykichira kawawankichi sinchita kamachikuptini.

17

*Jesus chikan laya tukushpa sukaman llipyarkan.
(Mr 9.2-13; Lk 9.28-36)*

1 Chaymanta sokta diya washan Jesus rirkana sukatun urkuman Pedruta, Jakobota, Jakobopa wawkin Juanta pushashpankuna. **2** Chay urkupi kashpankuna chay kimsa disipulunkuna kawaptinkuna Jesuska chikan laya tukurkan. Uyan intishina llipyarkan. Llachapanpish yurak lusshina llipyarkan. **3** Chay kimsa disipulunkuna kawarkansapa ñawpa tiempu kawashsha Eliyasta Moisesta Jesuswan parlaykaptinkuna. **4** Chayta kawashpa Pedruka Jesusta willarkan:

—Señor, allipaka kanwan tantalla kanisapa. Munaptikika rurashasapa kimsa ranchukunata, sukta kampa, sukta Moisespa, sukta Eliyaspa.

5 Chashna Pedru rimaykaptin sukyurak likidu puyu sirishpa paykunata wickkamurkansapa. Chay puyu ukumanta uyarirkansapa Tata Dios rimakuptin:

—Kay Jesuska munanayni wambraynimi. Paytami akllashkani. Chayrayku kankuna payta allita uyariyichi.

6 Chay kimsa disipulunkuna chayta uyarishpa sukaman manchakushpankuna allpapi pakchanakurkansapa. **7** Chaypina Jesus ladunchashpa paykunata llankashpankuna willarkansapa:

—Atarimuychi. Ama manchakuychichu.

8 Paykuna atarimushpa Jesusta chapashpankuna sapallantana kawarkansapa. **9** Chaymanta chay urkumanta urayamuykashpankuna Jesuska willarkansapa:

—Amara ni pita kay urkupi kawashkaykichita parlachiychirachu. Ñuka sielumanta shamudu runa kashpayni wañushkaynimanta kawsamuptinira chayta parlachikuychi.

10 Chaypina chay kimsa disipulunkuna Jesusta tapurkansapa:

—¿Imapati Moisespa killkadunta yachachikuk runakuna rimansapa manara Tata Diosmanta runa shamuptin ñawpa yachachikuk Eliyas shamunanta?

11 Chaypina Jesuska willarkansapa:

—Deverasmi Moiseska rimarkan Eliyas shamunanta runakunata willak Tata Dios kachamushkan runata shuyanankunapa. **12** Allita willaykichi. Eliyaska ñami shamushkana. Fariseo runakuna mana riksirkansapachu Eliyas kananta. Mana riksishpankuna chiknishpa sufričirkansapa. Sielumanta shamudu runa kaykaptini ñukatapish chikniwashpankuna sufričiwankasapa.

13 Chaypina chay disipulunkunaka allita entiendishpankuna willanakurkansapa:

—Deverasmi willawaykanchisapa Juan Bawtista Eliyasshina kananta.

*Jesus supayadu wambrata alliyachirkan.
(Mr 9.14-29; Lk 9.37-43)*

¹⁴ Chay urkumanta kutimushpankuna Jesuska chay kimsa disipulunkunawana aypa tantanakudu runakunapi chayarkansapa. Chaypina suk runa Jesusta ladunchashpa ñawpaknini kunkurikushpa willarkan:

¹⁵ —Señor, wambraynita llakichishpa alliyachipay. Payka gota unkuywan sukaman sufrishpa kawsan. Kuti kuti chay unkuyin apiptin ninapi yakupi urman. ¹⁶ Kay disipuluykikunaman pushamuptini mana atipashkasapachu alliyachiya.

¹⁷ Chaypina Jesuska chay runakunata aynirkansapa:

—Kankuna mana kuska yuyayuk kankichi. Tata Diosta mana kreyinayankichichu. ¿Aykapikamantí kankunawan kanayni tiyan? ¿Aykapikamantí amichiwankichi? Kayman chay unkudu wambrata pushamuychi.

¹⁸ Chay wambrata pushamuptinkuna Jesuska unkuchik supayta sinchita willarkan chay wambramanta llukshinanpa. Supayta llukshichiptin chay wambra sanuna kiparirkan.

¹⁹ Chaymanta chikanman rishpaynikuna ñukaykuna Jesusta tapurkanisapa:

—¿Imapati ñukaykuna chay unkuchik supayta mana atipashkanisapa chay wambramanta llukshichiyta?

²⁰ Chaypina Jesuska willawarkansapa:

—Kankunaka mana atipashkankichichu chay wambrata alliyachiya mana Tata Diosta tukuy shunku kreyishpaykichi. Allitami willaykichi. Mostasa murushina tipisitullatapish Tata Diosta kreyishpaykichika kay urkuta willankichiman kaymanta suchunanpa. Chashna willaptikichika kay urkuka suchunka. Tata Dios yanapashuptikichi rikchak layata atipankichi rayatura. ²¹ Mana nimata mikushpaykichira tukuy shunku Tata Diosta roygashpaykichira chay laya supayta atipankichi llukshichiyta.

Jesus kashkan willarkansapa wañunanta.

(Mr 9.30-32; Lk 9.43-45)

²² Chaymanta Galilea partipi ñukaykunawan puriyakashpa Jesuska willawarkansapa:

—Chikniwak runakuna ñuka sielumanta shamudu runata awtoridarkunaman pushawankasapa. ²³ Paykunaka wañuchiwankasapa. Wañushkaynimanta kimsaynin diyapi kashkan kawsamusha.

Chashna willawaptinkuna ñukaykuna sukaman llakirkhanisapa.

Jesus yachachikurkan Tata Diospa wasinpa pagarakunankunapa.

²⁴ Chaymanta Jesuska ñukaykunawan Kapernaum llaktapi chayaptinikuna suk runakuna ladunchawarkansapa. Paykunaka Tata Diospa wasinpa kulkiti kobrauk kashpankuna Pedruta tapurkansapa:

—¿Manachu maestruykichi Tata Diospa wasinpa pagarakun?

²⁵ Chashna tapuptinkuna Pedruka aynirkansapa:

—Ariya payka pagarakunmi.

Chaypina Pedru chay wasipi yaykushpa manara nimata willaptinra Jesuska tápurkan:

—Simon, willaway ¿imatati yuyanki? Kamachikuk runakuna ¿pijunatati rikchak layapa pagarachinsapa? ¿Kikinkunapa kastankunatachu? ¿Chikan llaktakunamanta runakunatachu?

²⁶ Chaypina Pedruka aynirkiran:

—Chay chikan llaktamanta runakunallata pagarachinsapa.

Chaymanta Jesuska willarkan:

—Chayrayku kikin kastankunaka mana nimata pagarakunkasapachu. ²⁷ Nuka Tata Diospa wambran kashpayni paypa wasinpa mana pagarakuy-manchu. Chashna kaptinpish ama ni pita piñachinanchipa aku pagarakuyupa. Rillay kochapi ansuelakuk. Chay kallarinan challwa apinaykita surkush-payki shimiñpi suk kullkita tarinki. Chayta apashpaykì kanpa ñukapa pagarakunki.

18

Jesus yachachikurkan maykanmi ashwan sinchi kamachikuk kanka nishpa.

(*Mr 9.33-37; Lk 9.46-48*)

¹ Chaypina ñukaykuna Jesusta ladunchashpaynikuna tapurkanisapa:
—Señor, Tata Diospa mandunpi ¿maykan ñukaykunati ashwan alli kamachikuk kaymansapa?

² Chashna tapuptinikuna Jesuska suk taksha wambrilluta kayashpa chawpinikunapi shayachirkan. Payta kawachiwashpankuna yachachiwarkansapa:

³ —Mash allita uyariwaychi. Tata Diospa mandunpi yaykunayashpay-kichika ama munaychichu ashwan sinchi kamachikuk kayta. Mana kay wambrillushina allíkasukuk kashpaykichika manami Tata Diospa mandun-pika yaykunkichichu. ⁴ Tata Diospa mandunpi ashwan alli kamachikuk kashpaykichi kay wambrillushina allillapi mana kreyinakushpa kawsanay-kichi tiyan. ⁵ Chaymanta ñukata kuyawashpa kay laya wambrata chaskish-paykichika ñukatapish chaskiwaykankichi.

Jesus yachachikurkan uchallichikuk runa sukanan kastigadu kananta.

(*Mr 9.42-48; Lk 17.1-2*)

⁶ Chaymanta Jesuska ñukaykunata willawarkansapa:
—Suk runa ñukata kreyiwak wambrilluta uchallichiptin Tata Dios suka-man kastiganka. Ashwan alli kanman payta atun rumi makita kunkanpi watashpa atun yakupi wishchukunankunapa.

⁷ Sukaman llakini kay allpapi rikchak laya uchallichikuk runakuna tiyaptin. Chay laya runakuna aypampi tiyanka. Ñuka sukanan llakini uchallichikuk runakuna tiyaptin. Tata Dios paykunata sukanan kastigankasapa.

⁸ Chayrayku willaykichi: Ichara makikichiwan chakikichiwan suka-man uchallikuya munankichiman. Ama uchallikunaykichipa makikichita chakikichita tipishpa chikanman wishchukuychi. Chayta ruraychi ama ishkantin chakikichiwan ishkantin makikichiwan mana tukuyniyuk ninaman rinaykichipa. Ashwan alli kanman suk makikichillawan suk chaki-kichillawan sielman rinaykichipa. ⁹ Chaymanta ichara ñawikichiwan ima mana allita kawashpa munashpa uchallikunkichiman. Chay uchallichishuk ñawikichiwan surkushpa wishchukuychi. Chayta ruraychi ama ishkantin ñawikichiwan mana tukuyniyuk ninaman rinaykichipa. Ashwan alli kanman suk ñawikichillawan sielipi yaykunaykichipa.

Jesus yachachikurkan chinkadu ovejapa ejemplunta.

(*Lk 15.3-7*)

¹⁰ Chaymanta Jesuska ñukaykunata willawarkansapa:
—Chayrayku ama niman suk kreyiwak runakunata mana nimatashina kawaychichu. Tatayni Dios tukuy mana kreyinakushpa ñukata kreyiwak runakunata kuyansapa. Tukuy tiempu sielipi paykunata kuy-dak angelkuna paypa ñawpknippi kawsansapa. ¹¹ Ñuka Tata Diosmanta

shamushkani paymanta ashudu runakunata kastigumanta salvanaynikuna-pa.

¹² Chayrayku ama ni pita ignoraychichu. ¿Imatati yuyankichi? Ichara suk runapa tiyanman pachak ovejankuna. Chay pachakmanta suklalla chinkaptin ¿imatati ruranka? ¿Manachu tukuy ovejankunata urkupi sakishpa rinka chay chinkaduta maskak? ¹³ Chay chinkadu ovejanta tarishpa suka-man kushikunka. Allita willaykichi. Chay aypa mana chinkadu ovejakunayku kushikun. Chaymanta chay chinkadu ovejanta tarishkanrayku ashwanta kushikun. ¹⁴ Chay ovejanta tarik runashina sielipi kawsak Tataykichika tukuy runakunata sukaman kuyan. Payka manami munanchu niman suk runa paymanta ashushpa mana tukuyniyuk ninaman rinanpa.

Jesus yachachikurkan rabyachiwakninchu runakunata perdonananchiku-napa.

(Lk 17.3)

¹⁵ Chaymanta Jesuska yachachiwaysapallapi katirkan:

—Ichara Tata Diosta kreyikmasikichi rabyachishunkichiman. Chashna rabyachishuptikichi rillaychi sapallaykichi mana alli rurashkanta willak. Pay kasushuptikichi perdonaychi. Chashna perdonashpaykichi chay kreyikmasikichita yanapashkankichi. ¹⁶ Chaymanta chay runa mana kasushuptikichi ishkay kimsa runakunata payman pushaychi. Chay ishkay kimsa runakuna uyariptinkuna chay mana alli rurak runata mana alli rurashkanta willaychi. ¹⁷ Chay runa chay pushashkaykichi runakunata mana kasunayaptinka tantanakuk Tata Diosta kreyikmasikichita willay-chi. Chay runa paykunata mana kasunayaptinka mana Tata Diosta kreyik runatashinana kawaychi.

¹⁸ Allita willaykichi: Kankuna kay allpapi chay mana kasushuk runata mana Tata Díosta kreyik runatashina kawaptikichika watadushina kiparinka. Chaypina sielipi kawsak Tata Diospish watadutashina kawanka. Chaymanta chay runa kasushuptikichi perdonaychi. Chashna perdonaptikichika kacharidushina kanka. Tata Diospish kacharidutashina kawanka.

¹⁹ Allita willaykichi: Kankuna ishkaymanta idenllata yuyaykushpa sielipi kawsak Tatayni Diosta suk imata roygaptikichika payka uyarishushpay-kichi yanapashunkichi. ²⁰ Kankuna ūñkata kreyiwashpa ishkaymanta kim-samanta tantanakuptikichi chaypi kankunawan tantalla kani.

Jesus yachachikurkan mana perdonakunayk runapa ejemplunta.

²¹ Chaypina Pedru ladunchashpa tapurkan:

—Señor, suk runamasini kuti kuti rabyachiwaptinka ¿mashna kutitiya perdonasha? ¿Kanchis kutichu perdonasha?

²² Jesuska aynirkana:

—Manami willaykichi kanchis kutilla perdonanaykipa. Willaykimi kuti kuti mana nima yupashpa perdonanaykipa. Kanchis kuti kanchis chunkakaman perdonanayki tiyan.

²³ Chaymanta Jesuska ūñkaykunata willawarkansapa:

—Mash uyariwaychi suk ejempluta parlachiptini. Tata Diospa mandunpi kawsashpaykichi perdonakunaykichi tiyan. Suk sinchi kamachikuk runa tukuy trabajadorninkunata kayachirkan willanankunapa mashnatami payta debinsapa nishpa. ²⁴ Kobrakuya kallariyaktin suk runata pushamurkansapa. Payka chay alli kamachikuk runata sukaman aypa waranka kullkita debirkana. ²⁵ Chay debikuk runaka mana nima kul-likuykchu karkan kutichikunampa. Chayrayku chay kamachikukka trabajadornin runakunata willarkan: “Mana kutichiwayta atipaptin kay runata

warmintinta tukuy wambrankunatapish rantikuychi. Rikchak laya tiyapushkankunatapish rantikuychi. Chay rantikushkaykichi chaninta ñukata kuwaychi debiwashkanta pagarawananapa.”

²⁶ Chashna willaptin chay debikuk runaka kamachikuknina ñawpakinpi kunkurikushpa roygarkan: “Señor, mana piñakushpa shuyaway. Tukuy debishkaynita kutichishkayki.”

²⁷ Chashna sukaman roygaptin chay sinchi kamachikuk runaka llachishsha debishkanta perdonarkan wasinman kutinanapa.

²⁸ Chashna debishkanta perdonaptin chay runa llukshishpa suk trabajadormasinwan tinkunakurkan. Chay tinkushkan runaka suk tipi kullkita payta debirkana. Chaypina chay perdonadu runaka sukaman piñakushpa chay tipisitu debiknin runata kunkanmanta apishpa sipinayarkan. Chaypina willarkan: “Kunanlla pagaraway tukuy debiwashkaykita.”

²⁹ Chashna willaptin chay debikninka ñawpakinpi kunkurikushpa roygarkan: “Mana piñakushpa shuyaway. Ñukaka tukuy debishkaynitami kutichishkayki.” ³⁰ Chashna roygaptinpish chay sipinayak runaka mana nima uyariyta munarkanchu. Pusharkan karselpi wichkachik tukuy debishkanta kutichinankaman.

³¹ Karselpi wichkachiptin kawashpankuna trabajadormasinkuna llakichishpa rirkansapa chay sinchi kamachikukpi chatakuk. ³² Chaypina payka chay perdonashkan trabajadorninta kayachishpa willarkan: “Kanka sukaman sakra mana alli runami kanki. Sukaman roygawaptiki ñuka llakichishpayni chay aypa waranka kullki debiwashkaykimanta perdonashkayki. ³³ Kanta perdonashkaynishina kanpish chay debishuknikita llakichinkiman karkan.”

³⁴ Chaypina chay kamachikuk runaka sukaman piñakushpa willarkan chay perdonashkan runata karselpi wichkanankunapa tukuy debikushkanta pagarunankaman.

³⁵ Chay debikuk runapa ejemplunta Jesuska allita entiendichiwashpankuna willawarkansapa:

—Suk runamasikichi mana allikunata rurashuptikichika tukuy shunku perdonanaykichi tiyan. Mana perdonaptikichika sielipi kawsak Tatayni Dioska kankunatapish mana perdonashpa sukaman kastigashunkichi.

19

*Jesus yachachikurkan kasaradukuna ama warminta wishchunankunapa.
(Mr 10.1-12; Lk 16.18)*

¹ Tukuy chaykunata yachachiwashkankunawasha Jesus Galilea partimanta llukshishpa rirkana ura Judea partiman. Chaymanta rirkana Jordan yaku chimbaman. ² Jesus Judea partiman riptin aypa runakuna katirkansapa. Chaypina aypa unkudukunata alliyachirkan. ³ Chaymanta fariseo runakuna Jesusta ladunchashpankuna sukaman pantachichinayashpankuna tapurkansapa:

—¿Ariya Tata Diospa rimananpi almitiwansapachu imapapish kaptin warminikunata wishchunaynikunapa?

⁴ Chashna tapuptinkuna Jesus aynirkansapa:

—¿Manachu Tata Diospa killkadunpi leyishkankichi kallarinan tiempu ullkuta warmita rurashkanta? ⁵ Tata Dios warmita ullkuta rurashpa

willarkansapa: "Tukuy ullku tatanta mamanta sakinka warminwan tantanakushpa kawsanarpa. Chashna warminwan tantanakushpa sukkllashina kawsankasapa." ⁶ Chayrayku suk ullku warminwan tantalla sukkllashina kawsashpánkuna manana ishkaynachu. Chayrayku mana allichu niman suk runa warminta wishchunarpa.

⁷ Chashna Jesus yachachikuptin chay fariseokuna tapurkansapa:

—Chashna kaptinka *¿imapati* Moises yachachikurkan suk runa warminta wishchunayashpa awtoridarpi killkaduta payta kushpa atipananta wishchuya?

⁸ Chaypina Jesuska willarkansapa:

—Sinchi shunkuyuk kaptikichi Moiseska kankunata almitishurkankichi warmikichita killkaduta kushpa wishchunaykicipa. Kallarinanmantapacha Tata Dioska manami munarkanchu wishchunaykicipa. ⁹ Allita willaykichi: Warmikichi chikan ullkuwan mana uchallikuptinka ama wishchuychichu. Payta wishchushpaykichi chikan warmiwan kasarashpaykichi uchallikuykankichi. Chay wishchudu warmiwan kasarak runapish uchallikuykan.

¹⁰ Chaypina ūukaykunaka Jesusta willarkanisapa:

—Tata Dios mana munaptin warminikunata wishchunaynikunapa ashwan alli kanman ama kasaranaynikunapa.

¹¹ Chashna willaptinikuna Jesuska willawarkansapa:

—Aypa runakuna kay willashkaynita mana atipansapachu entiendiyta. Tata Dios yanapashuptikichira entiendinkichiman. ¹² Wakin ullkukuna nasirkansapa mana kasarayta atipanankunapa. Chikan ullkukuna mana kasaransapachu runamasinkuna kapashka kaptinkuna. Sukkuna mana kasaranayansapachu ashwan allita Tata Diosta sirvinankunapa. Kankuna kay yachachishkaynita atipashpaykichi chaskiyya chaskiyychi.

Jesus wambrakunata kuyashpa llankarkansapa.

(*Mr 10.13-16; Lk 18.15-17*)

¹³ Chaymanta Jesusman wambrakunata pushamurkansapa llankashpa paykunapa Tata Diosta oranarpa. ūukaykuna wambrakunata pushamuk runakunata michashpa willarkanisapa:

—Ama Jesusman chay wambrillukunata pushamuychichu.

¹⁴ Chashna michaptinikuna Jesuska ūukaykunata willawarkansapa:

—Ama michaychichu ūukaman chay wambrakunata pushamuptinkuna. Wambrakuna mana kreyinakushpa tatankunapa munayninpí kawsansapa. Kankunapish wambrakunashina kawsaptikichira Tata Diospa mandunpi yakyunkichi.

¹⁵ Chashna willawashpánkuna Jesuska tukuy chay wambrakunata kuyashpa llankarkansapa. Chaymanta rirkán chikan llaktakunapi yachachikuk.

Tukuy layayuk runa Jesusta tapurkan imashnami mana tukuuniyukta kawsanka nishpa.

(*Mr 10.17-31; Lk 18.18-30*)

¹⁶ Chaymanta suk runa Jesusta ladunchashpa tapurkan:

—Alli maestru *¿imata* rurashpati mana tukuuniyukta Tata Dioswan kawsayman?

¹⁷ Chashna tapuptin Jesuska aynirkan:

—*¿Imapati* alli kanaynita willawanki? Tata Diosllami alli rurak. Paywan kawsak rinayashpaykika tukuy kamachikushkanta allita kasushpa kawsay.

¹⁸ Chaypina chay runaka tapurkan:

—Tata Dios kamachikunankunamanta ¿maykantati rurasha?

Chashna tapuptin Jesuska willarkan:

—“Ama runamasikita wañuchiychu. Ama chikan warmiwan uchallikuy-chu. Ama suwakuychu. Ama ni pita llullakushpa tumbaychu.¹⁹ Tataykita mamaykita kuyashpa kawsay. Chaymanta kikiki kuyanakukshina tukuy runamasikunata kuyay.”

²⁰ Chaypina chay runaka willarkan:

—Ñukaka tukuy chaykunata kasushpa kawsaykani. ¿Ima ashwantati rurasha?

²¹ Chaypina Jesuska aynirkana:

—Tata Diospa munananta allita ruranayashpaykika rillay tukuy laya tiyapushunaykita rantikumuy. Chaypa chaninta mana nimayuk runakunata kuysapa. Chayta rurashpa sielipi tukuy layayuk kanki. Chaymanta shamuy ñukata katiwak.

²² Chayta uyarishpa chay runaka sukaman llakishpa wasinman kutirkan rikchak layayuk kashpa. ²³ Chay runa llakishpa riptinna Jesuska ñukaykunata willawarkansapa:

—Allita yachachiykichi. Chay laya kullkinlapi kreyinakuk runakuna mana atipankasapachu Tata Diospa mandunpi yaykuya. ²⁴ Kashkan willaykichi: Suk kamellu animal suk aguja uchkunta mana atipanmanchu pasayta. Chashnami kullki likidu runa kullkinta ashwanta munashpa mana atipankachu Tata Diospa mandunpi yaykuya.

²⁵ Chayta uyarishpa ñukaykuna sukaman almirashpaynikuna tapunakurkanisapa:

—Chashna kaptinka ¿pikunati Tata Diospa mandunpi yaykunka?

²⁶ Chaypina Jesuska ñukaykunata chapawashpangkuna willawarkansapa:

—Manami niman suk runa atipanchu kikinllamanta Tata Diospa mandunpi yaykuya. Tata Diosllami atipan runakunata mandunpi yaykuchiya.

²⁷ Chaypina Pedruka willarkan:

—Ñukaykuna tukuy tiyapakninizkunata sakimushpaynikuna kanta katimuykaykisapa. ¿Imatati ñukaykunata kuwankisapa?

²⁸ Jesuska willawarkansapa:

—Allita willaykichi. Tata Dios kay allpapi tukuy layata mushukta rupatin ñukata sielumanta shamudu runa tiyarisha allíma llipyak tiyarinaynipi. Ñuka kamachikuk kaptini kankunapish tiyarinkichi chunka ishkay allíma tiyarinaykichi. Chaypina chunka ishkay israel aylluylukunata kamachishpa willankichi allitachu manachu rurashkasapa nishpa.

²⁹ Kankuna ñukata katiwanaykichirayku wasikichita, wawkikichita, mamaikichita, tataykichita, wambraykichita, terrenuykichita sakiptikichi Tata Diosmi sakishkaykichimanta ashwan aypata kushunkichi. Chaymanta wañushpaykichi mana tukuyniyukta Tata Dioswan sielupi kawsankichi.

³⁰ Kunan kay tiempu aypa runakuna kikinkuna yuyanakunsapa ashwan alli kanankunata. Paykuna Tata Diospa mandunpi washeru kankasapa. Chaymanta kankuna mana munadu kashpaykichipish Tata Diospa mandunpi primeru kankichi.

20

Jesus yachachikurkan alli trabajachikuk patronpa ejemplunta.

¹ Chaymanta Jesuska chay runakunata yachachirkansapa:

—Akuychi yuyaypachi imashnami Tata Dios mandunpi kamachikun nishpa. Suk patronpua atun uva chakran tiyarkan. Suk diya tuta tutalla

payka llukshirkan peonkunata maskak chakranpi trabajanankunapa. ² Trabajadorkunata tarishpa willarkansapa: “Diya entero chakraynipi trabajaptikichi paktadutami pagarashkaykichi.” Chayta willashpa kacharkansapa trabajanankunapa.

³ Chaymanta inti altupina captin chay patronka kashkan llukshirkan ashwan peonkunata maskak. Plasapi aypa mana trabajuyuk runakunata tarirkana. ⁴ Paykunata willarkansapa: “Kankunapish rillarychi uva chakraynipi trabajak. Trabajashkaykichipa pagarashkaykichi.” Chashna willaptinkuna paykunapish rirkansapa trabajak.

⁵ Chawpi diyata chaymanta tarditapish chay chakrayuk runaka kashkan rirkana peonkunata maskak. Paykunatapish kacharkansapa chakranpi trabajanankunapa. ⁶ Chaymanta tardiyaykaptin chay patronka kashkan rirkana peonkunata maskak. Plasapika kashkan mana trabajuyuk runakunata tarirkansapa. Paykunata willarkansapa: “¿Imapati diya entero kaypi kankichi mana nimata rurashpa?”

⁷ Chashna tapuptin willarkansapa: “Mana ni pi maskawashkasapachu trabajachiwanankunapa.” Chaypina chay patronka willarkansapa: “Kankunapish rillarychi uva chakraynipi trabajak.”

⁸ Chaymanta chishyaptinna chay patronka kapatasta willarkan: “Tukuy trabajadorkunata kayay pagaranaykipasapa. Chay washashamudu trabajadorkunata kallariy pagaraysapata.” Chay diya entero trabajashkakunata washata pagaraysapa. ⁹ Chaypina suk oralla trabajashka runakunata pagararkansapa diya entero trabajaktashina. ¹⁰ Chayta kawashpa tuta pachamanta trabajakkuna rimarkansapa: “Ñukaykunata diya entero trabajashkaynikunaryku ashwan aypata pagarawankasapa.” Chashna yuyashpangunapish suk diya trabajashkunkunallapa chaskirkansapa. ¹¹ Chayrayku piñakushpankuna patronta yuyarkansapa mana alli pagaraku patron kananta. ¹² Willarkansapa: “¿Imapati ñukaykunata kay washashamudu trabajashkunkunallapa pagarawankisapa? Paykunaka suk orallata trabajashkasapa. Ñukaykunata diya entero rupayta muchushpa trabajashkaynikunaryku ashwan aypata pagarawankimansapa karkan.”

¹³ Chashna piñakushpa willaptinkuna chay patronka sukta willarkan: “Amigu, ñukaka manami llullachiykichu. ¿Manachu parlashkanchi suk diya entero trabajashkaykipa pagaranaynipa? Paktaduta pagaraptini ¿ima ashwantati munanki? ¹⁴ Chay chaskishkayki kullkikita apashpana rillary. Ñuka kankunawan paktallata chay washashamudu trabajashkasapa. ¹⁵ Ñuka kullkiniwan munashkaynita rurani. ¿Imapata piñakushpa evidianki chay trabajadormasikita kantashina idenllata pagaraptini?”

¹⁶ Chay ejempluta yachachikushkanwasha Jesuska willarkansapa: —Kay allpapi mana kreyinakuk runakuna Tata Diospa mandunpi primeru kankasapa. Chaymanta alli munadu yuyanakuk runakuna Tata Diospa mandunpi washeru kankasapa.

*Jesus kimsaynin kuti rimarkan wañunanta.
(Mr 10.32-34; Lk 18.31-34)*

¹⁷ Chaypina Jesus Jerusalen llaktaman riyakashpa ñukaykunallata chikan partiman pushawashpankuna willawarkansapa:

¹⁸ —Allita yachankichi Jerusalen llaktaman riyakananchikunata. Chaypi suk runa saserdotekunapa kamachikukninkunaman Moisespa killkadunta

yachachikuk runakunaman ūukata pushawanka rantikuwak. Chaypina ūuka sielumanta shamudu runa kaptinipish paykunaka yuyankasapa wañuchiwanankunapa. ¹⁹ Chaypina romano runakunapa makinpi kukuwankasapa. Chay romano runakuna sukaman asichiwāshpankuna makawankasapa. Chakatawashpankuna wañuchiwanakasapa. Chaymanta wañushkaynimanta kimsaynin diya kashkan kawsamussha.

Jakobopa Juanpa maman Jesusta roygarkan kamachikunan tiempu wawankunata ladunpi tiyachinankunapa.

(Mr 10.35-45)

²⁰ Chaymanta Sebedeopa warmin ishkay wawankunawan Jesusta laduncharkansapa. Sebedeopa wambrankuna Jakobowan Juan karkansapa. Paykunapa maman Jesuspa ūawpaknippi kunkurikushpa suk favorita mañarkan. ²¹ Chaypina Jesuska payta tapurkan:

—¿Imatati munanki?

Payka aynirkan:

—Kan allimata kamachikuykaptiki kay ishkay wawaynikunata tiyachipay kada laduylkipi paykunapish kamachikunankunapa.

²² Chaypina Jesuska willarkan:

—Kankunaka mana yachankichichu imatami mañawaykankichi nishpa. Ņukami tukuy layata sukaman sufrinayni tiyan wañunaynikaman. Chashna sufrishpa iden suk ayak likiduta upyakshina kasha. Kankunaka manami atipankichimanchu ūukashina nanaykunata muchuya.

Chashna willaptinkuna paykunaka aynirkansapa:

—Ariya, atipashasapa muchuya.

²³ Chaypina Jesuska aynirkansapa:

—Ariya kankunapish ūukashina sukaman sufrinaykichi tiyan. Ņukaka manami ni pita willashachu laduynipi tiyarishpa kamachikunaykichipa. Tatayni Diosmi akllanka pikunami laduynipi tiyarinkasapa nishpa.

²⁴ Chashna chay warmi ishkay wawankunapa mañaptin ūukaykunaka uyarishpa sukaman piñakurkanisapa. ²⁵ Piñakushkaynikunata uyarishpa Jesuska tukuy ūukaykunata kayawashpankuna willawarkansapa:

—Kankuna allita yachankichi tukuy llaktakunapi sinchi kamachikuk runakuna sukamañ sinchita kamachikunankunata. Paykunaka mandunpi kawsak runakunata sukaman sufrichinsapa kasunankunapa.

²⁶ Kankunaka ama chay sinchi kamachikuk runakunashina kanayaychichu. Alli kamachikuk kanayashpaykichika tukuy runamasikichita allita yanapaychi. ²⁷ Chaymanta tukuy runakunamanta ashwan sinchi kamachikuk kanayashpaykichika iden rantidu runakunashina pitapish kapiton yanapanaykichi tiyan.

²⁸ Ņukapish sielumanta kay allpaman shamushkani tukuy runakunata yanapanaynipasapa. Mana shamushkanichu sukkuna sirviwanankunapa. Shamushkanimi wañushpa aypa runakunata kastigumanta salvanaynipa.

Jesus ishkay mana kawakuk runakunata alliyachirkan.

(Mr 10.46-52; Lk 18.35-43)

²⁹ Chaymanta Jesus Jeriko llaktamanta llukshiykaptin aypa runakuna katirkansapa. ³⁰ Chaypina ishkay mana kawakuk runakuna ūan ladunpi tiyaridu karkansapa. Paykuna Jesus pasaykananta uyarishpa sinchita kayashpa willarkansapa:

—Señor, ūawpa Davidpa miraknin, llakichiwashpa yanapawaysapa!

³¹ Chashna sinchita kayaptinkuna Jesuswan rik runakuna micharkansapa ama kaparinankunapa. Chaypina paykunaka ashwan sinchita kaparikushpa willarkansapa:

—¡Señor, ñawpa Davidpa miraknin, llakichiwashpa yanapawaysapa!

³² Chaypina Jesus riykashkanmanta shayarishpa chay ishkay runakunata kayashpa tapurkansapa:

—¿Imatati munankichi ruranaynipa?

³³ Chaypina paykunaka willarkansapa:

—¡Señor, munanisapa kawakuyta!

³⁴ Chayta willaptinkuna Jesuska llakichishpankuna ishkantinpa ñawinkunata llankapurkansapa. Chay oralla kawakurkansapa. Paykunaka kawakushpankunana Jesusta katirkansapa.

21

*Jesus Jerusalen llaktapi yaykurkan.
(Mr 11.1-11; Lk 19.28-40; Jn 12.12-19)*

¹ Jerusalen llaktaman ñukaykuna Jesuswan tantalla rishpaynikuna chayarkanisapa Betfage llaktapi. Chay llaktillu Olivos urku ladunpi karkan. Chaypi chayashpaynikuna Jesus ishkay disipulunkunata willarkansapa:

² —Rillarychi chay kawananchi llaktaman. Chaypi chayashpaykichi tarinkichi suk wawayuk watadu burrata. Chayta paskashpaykichi wawantinta ñukaman pushamuychi. ³ Ichara suk runa tapushunkichiman: “¿Imapatí kay burrata paskankichi?” Chashna tapushuptikichi willaychi: “Señornini munan montanana. Suk ratukaman kútichimushkaykisapa.”

⁴ Chayta rurashpa ñawpa yachachikuk runa killkashkantashina ruraykarkan. Kashna killkarkan:

⁵ “Sion llaktapi kawsak runakunata willaychi:
‘Mash kawaychi.

Kankunapa sinchi kamachikuknikichi ñami shamuykanna.

Mana alabanakuk runa kashpa shamuykanna suk taksha burrupa sawanpi. Suk burra wawanpa sawanpi shamuykan.”

⁶ Chashna burruuta pushamunankunapa willaptinkuna chay ishkay disipulunkuna rirkansapa willashkanta rurak. ⁷ Chaypina Jesusman burrata wawantinta pushamuptinkuna ñukaykuna burritupa sawanpi llachapaynikunata churarkanisapa. Chaypina Jesuska chay burrituta montarkan Jerusalen llaktapi yaykunanpa. ⁸ Jesus riykaptinna aypa runakuna kuyashpankuna katirkansapa. Sukkuna sawa llachapankunata surkukushpankuna Jesuspa rinan ñanpi mantarkansapa. Sukkuna pankayuk ramakunata ñanpi mantarkansapa. ⁹ Chaypina Jesuspa ñawpakenita rik runakuna washanta katik runakunapish sukaman kushikushpankuna sinchita willarkansapa:

—¡Akuychi kuyaypachi Jesusta ñawpa alli kamachikuk Davidpa miraknin kaptin! Tata Dioska payta kachamushka kamachiwananchikunapa. ¡Akuychi altu sielipi kawsak Tata Diosta sukaman kuyaypachi!

¹⁰ Jesus Jerusalenpi yaykuptin chaypi kawsak runakuna sukaman turbakushpankuna tapukurkansapa:

—¿Piti kay runaka?

¹¹ Jesusta katik runakuna willarkansapa:

—Kay runaka Tata Diospa rimananta alli yachachikuk Jesusmi. Payka Galilea partipi Nasaret llaktamanta shamushka.

*Tata Diospa wasinmanta Jesus rantikuk runakunata karkurkansapa.
(Mr 11.15-19; Lk 19.45-48; Jn 2.13-22)*

12 Jerusalen llaktapi kashpana Jesuska Tata Diospa wasinpi yaykurkan. Chay wasi pampapi aypa runakuna rantikuykarkansapa rantikuykarkansapa. Tukuy chayta kawashpa Jesuska sukaman piñakushpa chay rantikuykak runakunata rantik runakunatapish karkurkansapa. Chaymanta kulkitka kambiakuk runakunapa urpayta rantikuk runakunapa mesankunata tirkachipurkansapa. **13** Paykunata willarkansapa:

—Tata Dios killkadunpi willawanchisapa: “Tukuy runakuna rimankasapa wasini oranankuna wasi kananta.” Tata Dios chayta willawaptinchiku-napish kankuna paypa wasinta ruraykankichi suwakunaykichi wasita.

14 Chaymanta mana kawakuk runakuna kojo runakuna Jesusta laduncharkansapa. Paykunata llakichishpankuna alliyachirkansapa.

15 Chaypina kamachikuk saserdotekunawan Moisespa killkadunta yachachikuk runakuna chay milagruta kawashpankuna sukaman piñakurkansapa. Chaymanta uyarirkansapa Tata Diospa wasinpi wambrakuna kaparikushpa rimaptinkuna:

—¡Akuychi kuyaypachi ñawpa alli kamachikuk Davidpa miraknin Jesusta!

Chayta uyarishpa saserdotekuna sukaman piñakushpa Jesusta willarkansapa:

16 —¿Manachu uyarinki chay wambrakuna kuyashushpa willashuykanankunata?

Chaypina Jesuska willarkansapa:

—Ariya uyarinimi. ¿Manachu kankuna leyishkankichi Tata Diospa killkadunta? Kashna riman:

“Kanmi, Tata Dios, sukaman yanapankisapa taksha wambrakunata ñuñukuk wambrakunata kuyashushpa allimata kantanankunapa.”

17 Chayta willashpana Jesuska chay runakunata sakirkan. Jerusalen-manta Betania llaktaman rirkana chay tuta samanana.

*Jesus mana wayuchakuk igo kaspita willarkan chakinanpa.
(Mr 11.12-14, 20-26)*

18 Chaymanta tutapacha Betaniamanta Jerusalen llaktaman kutishpa Jesuska sukaman yarkarkan. **19** Chay riyanan ñan ladunpi suk igo kaspita kawarkan. Chayta laduncharkan wayunta mikunayashpa. Wayunta maskashpa mana niman sukta tarirkanchu. Pankankunallata tarirkan. Chaypina chay igo kaspita willarkan:

—Kunanmantapacha manana kutin wayuchakunkinachu.

Chashna willaptinlla chay igo kaspika chakirkan. **20** Ñukaykuna chayta kawashpaynikuna sukaman almirashpa Jesusta tapurkanisapa:

—¿Imashnatí kay igo kasi willashkayki ratulla chakishka?

21 Chaypina Jesuska ayniwarkansapa:

—Allitami willaykichi. Kankunapish tukuy shunku Tata Diosta kreyishpa atipankichiman ñukashina rurayta. Mana suk igo kaspillatachu atipankichiman chakichiyta. Kay urkutapish willankichiman: “Kaymanta suchush-payki rillay atun yakupi sumík.” Tukuy shunku Tata Diosta kreyishpa willaptikichika kay urkuka suchunka. **22** Tukuy shunku Tata Diosta kreyishpa mañaptikichi payka tukuy mañashkaykichita kushunkichi.

*Chiknik runakuna Jesusta tapurkansapa pimi kachamushka nishpa.
(Mr 11.27-33; Lk 20.1-8)*

23 Chayta yachachikushkanwasha Jesuska Jerusalen llaktapi chayashpa Tata Diospa wasinpi yaykurkan. Chaypi yachachikuykaptin saserdote kuna napa kamachikukninkunawan judiyu awtoridarkuna Jesusta ladunchashpankuna tapurkansapa:

—¿Pití kanki chashna yachachikunaykipa? ¿Pití kachamushushka kaykunata yachachikunaykipa?

24 Chashna tapuptinkuna Jesuska willarkansapa:

—Ñukapish kankunata tapuykichi. Ayniawptikichika willashkaykichi pimi kachamuwashka nishpa. **25** May willawaychi. ¿Pití Juanta kachamurkan runakunata bawtisanankunapa? ¿Tata Dioschu suk runachu kachamurkan?

Chashna Jesus tapuptinkuna chay runakuna sukwana sukwana willanakurkansapa:

—Ayniptinchikuna Tata Dios Juanta kachamushkanta payka willawashunchisapa: “Tata Dios kachamushka kaptin ¿imapatí mana kasushkankichi?” **26** Chaymanta ayniptinchikuna runakuna kachamushkanta tukuy kay runakuna sukaman piñyawashunchisapa. Paykunaka kreyinsapa Tata Dios kachamuptin yachachikushkanta.

27 Chashna willanakushpankuna chay runakunaka Jesusta willarkansapa:

—Mana yachanisapachu pimi Juanta kachamushka nishpa.

Chaypina Jesuska willarkansapa:

—Ñukapish manami willaykichichu pimi kachamuwashka tukuy chaykunata ruranaynipa.

Jesus yachachikurkan ishkay wambrakunapa ejemplunta.

28 Chaymanta Jesuska chay runakunata willarkansapa:

—Mash allita uyariwaychi kay ejempluta parlachiptini: Suk runapa tiyarkan ishkay ullku wambrankuna. Suk diya suk wambranta willarkan: “Kunan rillary uva chakraynipi trabajak.” **29** Chashna tatan willaptin chay wambraka aynirkan: “Mana rinayanichu.” Chaymanta suk ratukaman allita yuyakushpa rirkana trabajak. **30** Chaymanta chay runaka suknin wambranta willarkan uva chakranpi trabajak rinanpa. Payna almitishpa willarkan: “Ariya, kunanlla rini.” Chashna rimashpapist mana rirkanchu. **31** Kunanka willawaychi. ¿Chay ishkay wambrankunamanta maykanti tatpana munananta rurarkan?

Chashna tapuptin paykunaka willarkansapa:

—Chay trabajak rik wambra tatpana munananta rurarkan.

Chaypina Jesuska willarkansapa:

—Allitamí ayniwashkankichi. Kankuna yuyankichi chay romano awtoridarkunapa kobraukukninkuna waynandera warmikuna mana alli rurak kanankunata. Ñukaka willaykichi. Paykuna kankunamanta ñawpakte Tata Diospa mandunpi yaykunkasapa. **32** Juan Bawtista shamushka yachachishuknikichi allita rurashpa kawsanaykichipa. Kankunaka mana nima kreyishkankichichu. Chaykamanka waynandera warmikuna romanokunapa kobraukukninkuna Tata Diospa rimananta allita kreyishpana kawsarkansapa.

Jesus yachachikurkan mana alli trabajadorkunapa ejemplunta.

(Mr 12.1-12; Lk 20.9-19)

33 Chaymanta Jesuska chay runakunata kashkan willarkansapa:

—Kunanka yachachiykichi chikan ejempluta. Tiyarkan suk chakrayuk runa. Chay runaka chakranpi uvakunata tarpuçishkanwasha wertata rurachirkan. Chaymanta churarkan suk manllaya batanta chaypi uva

wayukunata sarushpankuna illinta kapinankunapa. Chaymanta suk manlayba altu wasita rurachirkana altuyininmanta suk runa kuydananpa. Tukuy chaykunata rurashpana suk runakunawan paktanakurkansapa uvakanata pallashpa paywan patumanakunankunapa. Chashna paktanakushpankuna chay runaka rirkan suk karu llaktaman.

³⁴ Chaymanta pallana tiempu chayamuptinna chay runaka wiwachunkunata kacharkansapa patuma palladu uvata chaskik.

³⁵ Chaypina chay chakrata kuydak runakuna patron kachashkan wiwachunkunata apishpankuna sukkunata makarkansapa, sukkunata wañuchirkansapa, sukkunata rumincharkansapa. ³⁶ Chaypina chay chakrayuk runaka kashkan ashwan aypa wiwachunkunata kacharkansapa. Paykunatapish chay trabajadorninkuna idenllata rurarkansapa. ³⁷ Chaymanta patronka kacharkan chaylla wambranta. Yuyarkan: "Kay wambraynita manchashpankuna kasunkasapa."

³⁸ Chaypina chay trabajadorkuna patronpa wambranta kawashpankuna willanakurkansapa: "Mash kawaychi. Chay shamuykak runa chakrayuk runapa wambranmi. Tatan wañuptin kay chakraka paypa kiparinan tiyan. Kunanlla akuychi wañuchiypachi ñukanchikunapa tukuy kay uva chakra kiparinanpa." ³⁹ Chashna willanakushpankuna chay runapa wambranta apirkansapa. Uva chakra washaman pushashpankuna wañuchirkansapa.

⁴⁰ Jesus chayta yachachikushkanwasha chiknik runakunata tapurkansapa:

—¿Imatati yuyankichi? Chay chakrayuk runa kutimushpa ¿imatati ruranka chay mana alli rurak trabajadorninkunata?

⁴¹ Paykunaka aynirkansapa:

—Chay runaka mana nima llakichishpa tukuy chay mana alli rurak runakunata wañuchinkasapa. Chaymanta chikan trabajadorkunata chakranta kunkasapa kuydanankunapa. Chaypina uva pallana tiempu kaptin paykuna tukuy pallashkankuna uvata patumata kunkasapa.

⁴² Chashna willaptinkuna Jesuska willarkansapa:

—Kankunaka ¿manachu Tata Diospa killkadunta leyishkankichi? Chay killkadunpi Tata Dioska riman:

"Suk runa wasinta rumimanta ruraptin trabajadorninkuna suk alli sinchi rumita wishchurkansapa mana alli nishpa.

Chay wasichakuk runaka chay wishchudu rumita wasi kallarinanpi churarkan.

Chashna Tata Dios ruraptin sukaman almiranchisapa."

⁴³ Chashna Tata Dios killkadunpi rimaptin ñukaka willaykichi: Payka mananami kankunata munashunkichinachu mandunpi kawsanaykichipa. Suk chikan llaktamanta runakunatami kayanka. Paykunami Tata Diosta kushichishpa kawsankasapa. ⁴⁴ Pipish kashpa mitkakushpa chay sinchi rumipi ur mashpa paki paki tukunka. Chaymanta chay wishchudu rumi ur mashpa pitapish kaptin apyachishpa wañuchinka.

⁴⁵ Chaypina kamachikuk saserdotekunawan fariseo runakunaka Jesus yachachikushkanta uyarishpa willanakurkansapa:

—Payka willawaykanchisapa iden chay mana alli rurak trabajadorkunashina kananchikunata.

⁴⁶ Chashna willanakushpankuna sukaman piñakushpa Jesusta apinayarkansapa wañuchinankunapa. Chashna munashpankunapish mancharkansapa apiya tukuy runakuna kreyiptinkuna Jesus Tata Dios rimashkanta yachachikuk runa kananta.

22

Jesus sukfensiapa ejempluta yachachikurkan.
(Lk 14.15-24)

¹ Chaymanta Jesus kashkan suk ejempluta rimashpa chay runakunata yachachirkansapa:

² —Yachachiykichi imashnami Tata Diospa mandunpi yaykunkichi nishpa. Suk alli kamachikuk runa wambranca funsiati rurarkan.

³ Payka wiwachunkunata kacharkan tukuy konvidadukunata kayanankunapa. Kayaptinkunapish chay konvidadukunata mana rinayarkansapachu. ⁴ Mana rinayaptinkuna chay alli kamachikuk runaka chikan wiwachunkunata kayashpa willarkansapa; “Rillarychi tukuy konvidadukunata willak: ‘Patronnikunaka vakankunata raku animalnikunata ñami wañuchichishkana. Mikunaka ñami ruraduna. Chayrayku chay funsiapi rinkichishi mikuk.’”

⁵ Chashna chay wiwachunkuna willaptinkuna chay konvidadukunata mana rinayarkansapachu. Sukkunaka chakrankunaman rirkansapa. Sukkunaka rirkansapa negosyunkunata rurak. ⁶ Sukkunaka chay kayak rikkunata apishpa makarkansapa wañuchinankunakaman. ⁷ Chaypina chay alli kamachikukka sukaman piñakushpa soldadunkunata kacharkansapa chay wañuchikuk runakunata wañuchinankunapa. Willarkansapa llaktankunatapish rupachinankunapa.

⁸ Chaymanta wiwachunkunata willarkansapa: “Fensiapa mikuna ñami ruraduna. Chay konvidashkayni runakuna mana alli rurak kashpanguna manami wasinipi yaykunkasapachu. ⁹ Chayrayku rillarychi kallikunapi kawanaykichi runakunata kayak funsiaman shamunankunapa.” ¹⁰ Chashna willaptinkuna chay wiwachunkunata rirkansapa kallikunapi purik runakunata konvidak funsiaman rinankunapa. Alli rurak mana alli rurak runakunata konvidaptinkuna chay manllayba wasinipi aypa runakuna tantanakurkansapa.

¹¹ Chaypina chay alli kamachikuk runaka konvidadukunata kawak yaykurkan. Chaypi sukta kawarkan mana funsiapi yaykunapa laya llachapayukta. ¹² Payta kawashpa willarkan: “Amigu ¿imapati yaykumushkanki mana funsiapi yaykunapa laya llachapayuk?” Chashna tapuptin chay runaka mana nima ayniyya atiparkanchu. ¹³ Chaypina chay alli kamachikuk runaka mesaman mikuna apak runakunata willarkan: “Kay runata chakinta makinta watashpa wishchukuychi wasi washa tutayaduman. Chaypi kastigunta mana muchushpa sukaman kirunkunata mukushpa wakanka.”

¹⁴ Chashna Jesus yachachikushpa willarkansapa:
 —Tata Dioska aypa runakunata kayansapa mandunpi yaykunkunapa. Chashna kayaptinkunapish sukkunalla aklladu kashpa yaykunkasapa.

Chiknik runakuna Jesusta pantachichinayarkansapa.
(Mr 12.13-17; Lk 20.20-26)

¹⁵ Jesus yachachikushkanwasha fariseo runakuna chikanpi tantanakushpankuna willanakurkansapa:

—Akuychi Jesusta pantachichiypachi mana allita rimananpa. Mana kuskanpi rimaptin awtoridarkunapi chatakushunchisapa.

¹⁶ Chayta ruranayashpanguna fariseokunaka kikinkunapa disipulunkunawan Herodespa partidunta katikkunata kacharkansapa Jesusta tapuk:

—Maestru, ñukaykuna yachanisapa mana llullakushpa allimallata yachachikunaykita. Tukuy runakunata yachachinki Tata Diospa munananta rurashpa kawsanankunapa. Kanmi tukuy laya runakunapa

yuyayninkunata allimata riksinki. Chayrayku ni pita manchashpa yachachikunki. ¹⁷ Kunanka willawaysapa: Chay romano sinchi kamachikuk kullkinikunata mañawaptinkuna Ɂalichu manachu pagarakunaynikunapa?

¹⁸ Chashna tapuptinkuna Jesuska yacharkan pantachichinayashpa tapushkankunata. Chaypina willarkansapa:

—Kankunaka allipi tukushpa llullachiwanayaykankichi. ¿Imapatí chashna tapuwashpa pantachichiwanayankichi? ¹⁹ Mash chay pagarakunaykichi kullkita kawachiwaychi.

Chayta mañaptinkuna suk kullkita kurkansapa.

²⁰ Jesus chay kullkita kawashpana tapurkansapa:

—¿Pipa uyantí pipa shutintí killkadu kay kullkipika?

²¹ Chaypina paykunaka aynirkansapa:

—Romano ashwan sinchi kamachikuk Sesarpa.

Chashna ayniptinkuna Jesuska willarkansapa:

—Chay kamachikuk Sesarpa kaktaka payta kuychi. Tata Diospa kaktaka payta kuychi.

²² Chayta willaptinkuna chay pantachichinayak runakunaka sukanaman almirashpankuna upallalla Jesumanta anchurkansapa.

Jesus yachachikurkan wañudukuna kawsamunankunata.

(*Mr 12.18-27; Lk 20.27-40*)

²³ Chaymanta chay diyalla saduseo runakuna rirkansapa Jesuswan parlak. Saduseokunaka yachachikunapa mana ni pi wañushkanmanta kawsamunanta. Chayrayku paykunaka Jesusta willarkansapa:

²⁴ —Maestru, ñawpa yachachikuk Moises kashna yachachikurkan: “Suk kasadu ullku manara ni suk wambrayuk kashpa wañuptin wawkin chay viyudawan kasaranan tiyan. Chaypina ullku wambrata wawayaptin wañudupa wambranshina kanan tiyan.” ²⁵ Kunanka willayki. Kay llaktaynikunapi kanchis wawkipura tiyarkan. Chaypina mayor wawki kasararkan. Chay ullku manara niman suk wambrayuk kashpa wañurkan. Chay mayor wañuptin wawkin viyuda kuñadanwan kasararkan. ²⁶ Paypish wañurkan niman suk wambrayuk kashpa. Chaypina chay viyudaka kashkan kasararkan ishkaynin mashanwan. Paypish mana niman suk wambrayuk kashpa wañurkan. Chashna kusankuna wañuptin wañuptinlla chay warmika tukuy mashankunawan kasararkan. ²⁷ Tukuy kusankuna wañuptinkuna chay warmipish wañurkanna. ²⁸ Kunanka willawaysapa. Tukuy chay runakuna chay viyudawan kasararkan. Wañudu runakuna kawsamushpankuna chay kanchis wawkipuramanta ¿maykan kakpatí kan-man warminka?

²⁹ Chashna tapuptinkuna Jesuska aynirkansapa:

—Kankunaka Tata Diospa killkadunta mana entiendishpa kikichilla llullachinakuykankichi. Manami yachankichichu Tata Dios sukanaman atipak kashpa wañudukunata kawsachimunanta. ³⁰ Tata Dios wañudu runakunata kawsachimushkanwasha mana niman suk ullku niman suk warmi kasarankasapanachu. Sielipi kawsak angelkunashina kawsankasapa.

³¹ ¿Manachu leyishkankichi Tata Diospa killkadunta? Chaypi riman wañudukuna kawsamunankunata. Tata Dios kashna riman: ³² “Ñuka Abrahampa Isakpa Jakobopa Tata Diosninmi kani.” Chashna Tata Dios rimaptin yachanchisapa chay ñawpa awilunchikuna wañushkankunamanta kawsamushkankunata. Tata Dios kawsak runakunallapa Diosninmi.

³³ Chayta uyarishpankuna chay runakuna sukanaman almirarkansapa Jesus allimata yachachikuptin.

Jesusyachachikurkan Tata Diospa kamachikunankunamanta suka ashwan alli kananta.

(Mr 12.28-34)

³⁴ Chaymanta fariseo runakuna yachashpa Jesus saduseokunata upallay-achishkankunata tantanakurkansapa. ³⁵ Suk fariseoka ñawpa Moisespa killkashkanta yachachikuk runa karkan. Payka Jesusta pantachichinayashpa tapurkan:

³⁶ —Maestru, Tata Diospa tukuy kamachikunankunamanta ¿maykanti ashwan alli kasunaynikunapa?

³⁷⁻³⁸ Chayta tapuptin Jesuska willarkansapa:

—Tukuy kamachikunankunamanta kaymi ashwan alli: “Kamachikuk Tata Diosnikita tukuy shunku kuyanayki tiyan. Payta sukaman munashpa allita yuyakushpa kawsanayki tiyan.” ³⁹ Chaymanta chay ishkaynin kamachikunanka chay layallami: “Kikiki kuyanakuksina tukuy runamasikunata kuyashpa kawsay.” ⁴⁰ Kay ishkay kamachikunankuna tukuy Moisespa kamachikunankuna tukuy ñawpa alli yachachikukkunapa killka-shkankuna orkonkunashina sinchichin.

Jesus yachachikurkan ashwan alli kamachikuk kananta.

(Mr 12.35-37; Lk 20.41-44)

⁴¹ Chaylapi tantanakudu kaptinkuna Jesuska fariseokunata tapurkansapa:

⁴² —Kankunaka ¿imatati yuyankichi sielumanta shamuk salvakuk runapa? ¿Maykan runapa mirakninti?

Chashna tapuptinkuna fariseokunaka aynirkansapa:

—Payka ñawpa awilunchi Davidpa mirakninti.

⁴³ Chaypina Jesuska willarkansapa:

—Davidpa mirakninti kaptinka ¿imapati Tata Diospa Espiritu yanapaptin Davidka rimarkan paypa kamachikuknин kananta? Davidka kashna killka-kurkan:

⁴⁴ “Tata Dioska kamachiwak runata willarkan:

‘Kay alli laduynipi tiyariy ñukawan kamachikunaykipa
ñuka tukuy chiknishuk runakunata saru saru ruranaynikaman kanta ka-sushunankunapa.’ ”

⁴⁵ Chay killkadu rimananpi Davidka willarkan sielumanta shamuk salvakuk runa paypa sinchi kamachikuknин kananta. Davidpa kamachikuknин kaykaptinka ¿imashnatí paypa mirakninti kanman?

⁴⁶ Chashna Jesus yachachikuptin chay fariseokuna mana nima ayniyta atiparkansapanachu. Chay tiempumantapacha niman suk runa ani-mukurkannachu Jesusta nimata tapuya.

23

Jesus fariseo runakunata piñayarkansapa.

(Mr 12.38-40; Lk 11.37-54; 20.45-47)

¹ Chaymanta Jesus chay fariseo runakunata yachachishkankunawasha chay tantanakudu runakunawan ñukaykunata yachachiwarkansapa:

² —Moisespa killkadunkunata yachachikuk runakunawan fariseo runakuna tantanakunankuna wasipi tiyarinsapa chay killkadukunata yachachikunankunapa. ³ Paykunapa yachachikunankunata kasuchi. Tukuy willashushkaykichita ruraychi. Chayta rurashpaykichi ama paykuna ruranankunatashina ruraychichu. Paykuna sukaman allita yachachishushpaykichiish kikinkuna mana yachachishunaykichita

ruransapachu. ⁴ Paykunaka tukuy runakunata sukaman kamachinsapa. Chay rikchak laya yachachikunankunata willashpankuna paykunaka mana atipana laya sukaman llashak kargata aparichikshinami. Chaypina kikinkuna yachachikushkankunata mana niman suk tipisita ruranayansapachu. ⁵ Paykunaka tukuy layata ruransapa runamasinkuna kawanankunallapa. Tata Diospa rimananta tipi llañu karapakunapi killkansapa. Chaykunata urkunkunapi brasunkunapi watashpankuna purinsapa. Chaymanta llachapankuna mañanpi sumachishpankuna mudakunsapa. ⁶ Fiestakuna tiyaptin ashwan allima tiyarinakunapi munansapa tiyariyta. Tantanakunankuna wasikunapi ashwan allima bankukunapi tiyarinayansapa. ⁷ Kallikunapi purishpankuna sukaman munansapa tukuy runakuna kuyashpa “maestro” nishpa rimachinankunapa.

⁸ Kankuna ama paykunashina munaychichu “maestruynikuna” nishpa willashunaykichita. Kankunaka wawkipurallami kankichi. Ñukallami maestruykichi kani.

⁹ Chaymanta kay alppapi kawsak runakunata ama niman supta Tata Diostashina “Tatayni” nishpa willaychichu. Tata Diosnikichika suklallami. Payka sielupimi kawsan. ¹⁰ Chaymanta ama nima munaychichu runamasikichi willashunaykichipa “kanmi kanki kamachiwakninkuna” nishpa. Ñukallami kamachikuknikichi kani.

¹¹ Chaymanta kankuna ashwan alli kamachikuk kanayashpaykichi tukuy runamasikichita sukaman yanapanaykichi tiyan. ¹² Kankuna kikichilla kreyinakushpa kawsaptikichi Tata Dios sukaman pinkachishunkichi. Chaymanta allillapi mana kreyinakushpa runamasikichita kuyashpa yanapaptikichi Tata Dios sukaman kushikushpa yanapashunkichi.

¹³ Chaypina Jesuska willarkansapa:

—Alaw, kankuna fariseokunata Moisespa killkadunta yachachikuk runakunata sukaman llakichiykichi. Kankunaka allipi tukushpa llullakuykankichi. Tata Diosta mana nima kasunayashpa kawsankichi. Chaymanta chay kasunayak runakunata sukaman michashpa pantachichinkichi ama Tata Diospa mandunpi yayunkunkunapa.

¹⁴ Alaw, kankuna fariseokunata Moisespa killkadunta yachachikuk runakunata sukaman llakichiykichi. Kankunaka allipi tukushpa llullakuykankichi. Viyuda warmikunata mana nima llakichishpaykichi wasinkunata doyñuyapunkichi. Chayta rurashpaykichiish allipi tukushpa Tata Diosta unayta orankichi. Chayrayku Tata Dios sukkunamanta ashwanta kastigashunkichi.

¹⁵ Alaw, kankuna fariseokunata Moisespa killkadunta yachachikukkunata sukaman llakichiykichi. Kankuna allipi tukushpa llullakuykankichi. Ariya yakuta allpata purinkichi suk runata yachachinaykichipa kankunashina kawsanarpa. Chaymanta chay runata sukaman pantachichiptikichi payka kankunamanta ashwanta uchallikun. Chayrayku Tata Dios mana tukuyniyuk ninapi kankunamanta paykunata ashwanta kastigankasapa.

¹⁶ Alaw, kankunata llakichiykichi. Kankuna iden mana kawakuksina kaykashpaykichiish sukkunata ñanta riksichinayankichi. Llullakushpa yachachinkichi: “Suk runa Tata Diospa wasinpa jurashpaka mana ruraptinpish mana nimananchu. Chaymanta Tata Diospa wasinpi tiyak kuripa jurashpa tukuy jurashkanta ruranan tiyan.” ¹⁷ Chashna yachachikushpaykichi mana alli yuyaykuk mana nima entiendik runakuna kankichi. ¿Maykantí ashwan alli? ¿Tata Diospa wasinchu? ¿chay wasipi kurichu? Chay

kuri Tata Diospa wasinpi churadu kashpara paypa kiparin. Chayrayku Tata Diospa wasinka chay churadu kurimanta ashwan allimami.

¹⁸ Chaymanta kankuna llullakushpa yachachikunkichi: “Suk runa altarpa jurashpa mana ruraptinpish mana nimananchu. Chaymanta altarpi ofrendapa jurashpa tukuy rimashkanta ruranan tiyan.” ¹⁹ Chayta yachachikuskaykichi mana nima entiendik runakuna kankichi. ¿Maykantí ashwan alli? ¿Altarchu? ¿chay altarpi churadu ofrendachu? Chay ofrenda altarpi churadu kashpara Tata Diospa kiparin. Chayrayku ofrendakunamanta altar ashwan alli.

²⁰ Suk runa altarpa jurashpa mana altarllapachu juran. Tukuy chay altar sawanpi churadukunapapish juran. ²¹ Chaymanta suk runa Tata Diospa wasinpa jurashpaka mana wasinllapachu juran. Tata Dios chay wasinpi kawsaptin chay runaka kikin Tata Diospa shutinpi juraykan. ²² Sielipi Tata Dioska allima tiyarinanpi tiyariidumi. Chayrayku suk runa sielupa jurashpa mana sielullapachu juraykan. Kikin Tata Diospa shutinpi tiyarinanpapish juraykan.

²³ Chaymanta Jesuska willarkansapa:

—Alaw, kankuna Moisespa killkadunta yachachikuk runakunata fariseo runakunata sukaman llakichiykichi. Kankuna allipi tukushpa llullakuykankichi. Mentapa kominospa anispa chunkamanta supta suchuchinkichi Tata Diosta kunaykicipa. Chaykamanka ashwan kasunaykicipa kamachikunankunata mana kasunkichichu. Tata Dios willawanchisapa allillata rurashpa runamasinchikunata llakichishpa kawsananchikunapa. Chaymanta rimashkanchikunata rurananchikuna tiyan. Chay kamachikunankunata alli kanman ruranaykicipa. Chaymanta chunka tiyapushunaykichimantapish sukta Tata Diosta kuychi.

²⁴ Kankunaka mana allita entiendishpaykichi iden mana kawakuk runakunashina kayakashpaykichi suk runakunata munankichi ñanta rikschiyta. Chaymanta suk kishnisillu moskitu yakuykicipi sipikuptin shushunkichi ama millpunaykicipa. Chaykamanka mana nimatashina yuyankichi suk manllayba kamellu animalta millpunaykicipa.

²⁵ Chaymanta Jesuska willarkansapa:

—Alaw, kankuna Moisespa killkadunta yachachikuk runakunata fariseo runakunata sukaman llakichiykichi. Kankuna allipi tukushpa llullakuykankichi. Suk vasu suk kallana washanla mayladushina kankichi. Kankuna alli rurak runa tukushpaykichi tukuy layakunata kikikichillapa munankichi. Tukuy layakunata munankichi suwayta. ²⁶ Kankuna fariseo runakuna mana nima entiendik kashpaykichi iden mana kawakuk runakunashina kankichi. Suk susya vasupa ukunta mayllaychi washantapish chuya chuya kiparinanpa. Tata Diosta roygaychi tukuy uchaykichimanta perdonashunaykicipa. Chaypirami allita rurashpa kawsankichi.

²⁷ Alaw, kankuna fariseo runakunata Moisespa killkadunta yachachikuk runakunata sukaman llakichiykichi. Kankunaka allipi tukushpa llullakuykankichi. Iden yurakyachidu bovedashinami kankichi. Chay boveda allimata rikurishpapish ukunpi millanapa laya wañdupa tulunkuna kiparinsapa. ²⁸ Chay bovedashina kankuna allimata rikurinkichi. Alli rurakshina tukunkichi runakuna kreyishunankunapa. Kankunapa tukuy yuyaynikichi sukaman mana alli kashpa mana alli rurak runakuna kankichi.

²⁹ Alaw, kankuna Moisespa killkadunta yachachikuk runakunata fariseo runakunata sukaman llakichiykichi. Kankunaka allipi tukushpa llullakuykankichi. Nawpa yachachikuk runakunapa allima bovedankunata

rurankichi ama paykunata kunkanaykichipa. Chaymanta ñawpa alli rurak runakunata yuyashpa monumentunkunata sumachinkichi. ³⁰ Chayta rurashpa rimankichi: “Ñawpa awilunchikuna yachachikuk runakunata wañuchirkansapa. Ñukanchikuna ñawpa tiempu kawsashpanchikunaka manami wañuchiyyta yanapanchimansapachu karkan.” ³¹ Chashna rimashpaykichi yuyanakuykankichi iden chay wañuchikuk awiluykichishina kanaykichta. ³² Paykunamanta ashwan sakra wañuchikuk runakuna kankichi.

³³ Kankunaka iden machakuykunashina sakra likidumi kankichi. ¿Imashnatí chay mana tukuyniyuk nina kastigumanta kishpinkichiman?

³⁴ Chayrayku ñukaka Tata Dios rimashkanta yachachikuk runakunata kachashasapa yachachishunaykichi. Yachaysapa runakunatapish kachashasapa. Kankuna sakra mana allita rurakkuna kashpaykichi sukkunata wañuchinkichi. Sukkunata chiknishpa tantanakunankuna wasikunapi makankichi. Chaymanta llaktan llaktapi sukkunata chiknishpa padesichiypi katinkichi.

³⁵ Chay mana alli rurashkaykichirayku Tata Dioska kastigashunaykichi tiyan. Kayin chay ñawpa alli rurak wawkin Abelta wañuchirkan. Chay tiempumantapacha chiknikuk runakuna allita rurashpa kawsak runakunata wañuchirkansapa. Tata Diospa wasin altarpa ladunpi kankunapish Berekiyaspa wambran Sakariyasta wañuchirkankichi. Tukuy chay wañuchidu runakunarayku Tata Dioska kankunata sukaman kastigashunkichi. ³⁶ Allita willaykichi: Aypa runakuna runamasinkunata wañuchishkankunaryku Tata Dioska kay tiempupi kawsak runakunata kastigankasapa.

*Jesus Jerusalenpi kawsak runakunata llakichirkansapa.
(Lk 13.34-35)*

³⁷ Chaymanta Jesuska Jerusalen llaktapi kawsak runakunata sukaman llakichishpankuna willarkansapa:

—Sukaman kankunata llakichiykichi. Tata Dios rimashkanta yachachikukkunata wañuchinkichi. Tata Dios kachashikan yachachikuk runakunatapish ruminchashpa wañuchinkichi. Ñuka aypa kuti kankunata amachanayashkaykichi iden suk wallpa wawankunata rikran sikipi tantanachishpa amachakshina. Sukaman kankunata amachanayaptinipish mana nima layapi munankichchu. ³⁸ Mash uyariwaychi. Mana munawashkaykichirayku llaktaykichi chunlla likidu kiparinka.

³⁹ Chaymanta willaykichi. Suknir diya kankunaka willawanaykichi tiyan: “Kanka sukaman allima kanki Tata Diosmanta shamudu runa kashpayki.” Chashna willawanaykichi diyakaman mananami kawawankichinachu.

24

*Jesus rimarkan Tata Diospa wasinta runakuna urmachinankunata.
(Mr 13.1-2; Lk 21.5-6)*

¹ Chayta yachachikushkanwasha Jesuska Tata Diospa wasinmanta llukshirkan. Riyaktin ñukaykuna ladunchashpa willarkanisapa:

—Mash kaway kay allima ruradu Tata Diospa wasinta.

² Chashna kawachiptinikuna Jesuska willawarkansapa:

—Kunan kawachiwaykankichi kay allima ruradu wasita. Mash allita uyariwaychi. Shamunkasapa chiknishuk runakuna tukuy kay kawashkaykichi allima pirkakunata urmachik. Urmachiptinkuna mana niman suk rumi sawapura kiparinkanachu.

Jesus yachachikurkan manara kay allpa tukuptinra imakunatami kawankasapa nishpa.

(*Mr 13.3-23; Lk 21.7-24; 17.22-24*)

³ Chaymanta Jesus Olivos urkuman rirkana. Chaypi tiyariptin ñukaykunalla ladunchashpaynikuna tapurkanisapa:

—¿Aykapiti Tata Diospa wasinta urmachinkasapa? ¿Imata kawashpati yachaymansapa kutimunayki tiempu kananta? ¿Imashnati yachaymansapa kay allpa kullunan tiempu kananta?

⁴ Chaypina Jesuska willawarkansapa:

—Allita kuydanakuychi ama ni pi llullachishunaykichipa. ⁵ Manara kutimuptinira aypa runakuna shamunkasapa ñukapi tukushpa willashuknikichi: “Ñukami kani Tata Diosmanta shamudu salvavuk runa.” Chashna rimashpankuna aypa runakunata llullachinkasapa. ⁶ Kankuna uyarinkichi runakuna chikninakushpankuna kaypi chaypi makanakushpa wañuchinakunkunata. Chayta uyarishpaykichi ama manchakuychichu. Chashna makanakushpa wañuchinakushpalla kawsanankuna tiyan. Chashna kaptinpish manara tukunan tiempurachu. ⁷ Suk partipi kawsak runakuna chikan llaktapi kawsakkunawan sukaman chikninakushpankuna makanakushpa wañuchinakunkasapa. Chaymanta aypa llaktakunapi sinchi yarkay tiyanka. Aypa llaktakunapi allpa sinchita kuyunka. ⁸ Chashna runakuna chaykunawan sukaman sufrishpankuna ashwantara sufrinkasapa.

⁹ Chaypina chiknishuk runakuna awtoridarkunapi chatashunkichi sufrichishunaykichipa. Ñukata kreyiwashpa kawsashkaykichirayku tukuy llaktakunapi aypa runakuna chiknishushpaykichi wañuchishunkichi. ¹⁰ Chay tiempu runakuna manana munankasapanachu kreyiwashpa kawsaya. Chaymanta sukwan sukwan chikninakushpankuna awtoridarkunapi chatanakushpa kawsankasapa. ¹¹ Aypa llullachikuk runakuna rimankasapa Tata Dios rimashkanta yachachikuykanankunata. Chashna yachachikushpa aypa runakunata llullachinkasapa. ¹² Aypa runakuna sukaman ashwan ashwanta uchallikushpalla kawsaptinkuna aypa ñukata kreyiwakkunapish manana kuyanakushpanachu kawsankasapa. ¹³ Kankuna wañunaykichi diyakaman allita ñukallata kreyiwashpa kawsaptikichi Tata Dioska salvashunkichi rinaykichipa sielupi kawsak. ¹⁴ Chayrayku tukuy kay allpapi kawsak runakunata yachachinaykichi tiyan ñukata kreyiwashpa Tata Diospa mandunpi yaykunankunapa. Chaymanta tukuy llaktakunapi rimanaynita uyariptinkunara kay allpa tukunan tiyan.

¹⁵ Chaymanta Jesuska ñukaykunata willawarkansapa:

—Ñawpa yachachikuk Daniel Tata Dios rimashkanta killkarkan: “Tata Diospa wasinpi suk chiknikuk runa sukaman sakra millanapa layata ruranká.” Chaymanta Tata Diospa wasinpi chay runa yaykuptin chay Daniel killkashkanta leyishpaykichi allita yuyaychi. ¹⁶ Chashna Tata Diospa wasinpi chay millanapa layata ruraptin kawashpaykichi Judeapi kawsakkuna urkukunaman nitikuychi. ¹⁷ Wasi altuyninpi kashpaykichika chayllamanta nitikuychi. Amana wasikichipi yaykuychinachu nima tiyapushunaykichita surkuk. ¹⁸ Chakraykichipi trabajaykashpaykichika chayllamanta nitikuychi. Ama wasikichiman kutiyichichu alli llachapaykichita surkuk. ¹⁹ Chay sinchi llakina tiempu okupada warmikuna ñuñuchik warmikuna sukaman sufrinkasapa. Chayrayku paykunata sukaman llakichini.

²⁰ Kankuna Tata Diosta roygaychi ama tamya tiempu nima samana diya nitikunaykichipa. ²¹ Chay sinchi llakina tiempu tukuy runakuna suka-man sufrinkasapa. Tata Dios kay allpata rurashkanmantapacha manara chay laya llakina tiempu tiyarkanrachu. Nima chay tiempu washan chay laya llakina tiyankachu. ²² Tata Dioska tukuy akllashkan runakunata kuyashkanrayku chay llakina tiempata tukuchanka. Mana utka tukuchap-tinka tukuy runakuna wafunmansapa.

²³ Chaymanta Jesuska ñukaykunata yachachiwaysapallapi katirkan:

—Chay tiempu ichara suk runakuna willashunkichiman: “Mash kaway-chi. Kaypinami chaypinami Tata Diosmanta shamudu salvakuk runa.” Chashna willashuptinkuna ama kreyiychichu.

²⁴ Chay tiempu aypa runakuna llullachikushpa rimankasapa Tata Diosmanta shamudu salvakuk runakuna kanankunata. Sukkuna llullachikushpa rimankasapa Tata Dios kachamushkanta yachachikunanpa. Paykunaka rikchak laya almirana milagrukunata runakasapa. Chayta rurashpangkuna munankasapa Tata Dios akllashkan runakunatapish llullachiysapata.

²⁵ Ñami yachachishkaykichina ama chay llullachikuk runakunata kreyinaykichipa. ²⁶ Sukkuna willashunkichiman: “Rillarychi payta kawak chunlla chakidu pampapi.” Chashna willashuptikichika ama rillarychichu. Sukkuna willashunkichiman: “Mash shamuychi kay wasi ukupimi pakakudu.” Chashna willashuptikichika ama kreyiychichu.

²⁷ Ñuka sielumanta shamudu runa kashkan shamuptini tukuy runakuna kawawankasapa. Imashnacha puyukunapi llipyak suk ladumanta chikan laduta raslla llipyana chashnamí ñukapish shamusha.

²⁸ Wañudukuna kananpi siyukakuna tantanakunsapa. Ñukapish tukuy mana alli rurakunata tantanachishasapa kastiganaynipasapa.

Jesus yachachikurkan imashnami kutimunka nishpa.

(*Mr 13.24-37; Lk 21.25-33; 17.26-30, 34-36*)

²⁹ Chaymanta Jesuska ñukaykunalla yachachiwashpa willawarkansapa:

—Chay sinchi llakina tiempu tukuptinna inti tutayanka. Killa manana lusichikunkanachu. Luserukuna sielumanta urmamunkasapa. Sielipi llipyakkuna kuyunkasapa. ³⁰ Chaypina ñuka sielumanta shamudu runa manarapish kutimuptinira suk señalta sielupi rikurichisha. Chayta kawashpa tukuy kay allpapi kawsak runakuna sukaman manchakushpangkuna sin-chita wakankasapa. Puyukuna ukunpi llipyashpa sielumanta kutimuptini tukuy pi kawawashpangkuna yachankasapa tukuy laya atipak kanaynita.

³¹ Chaypina angelninikunata kay allpaman kachamushasapa trompetata sinchita pukunankunapa. Pukushpangkuna kay allpapi tukuy kuchun mañankunamanta tukuy aklladuynikuñata tantanachinkasapa.

³² Mash uyariwaychi. Suk igo tronkota kawashpa yachakuychi. Igo ramanekuna velachakushpa aypata pankayaptin yachankichi veranu tiempu kananta. ³³ Chashnashina tukuy kay willashkaynita kawashpaykichi yachankichi ñuka utka shamunaynita.

³⁴ Allita willaykichi: Kunan kay tiempupi kawsakkuna manarapish wañushpankunara tukuy kay willashkaynita kawankasapa. ³⁵ Tukuy kay allpaka sielukunapish kullunankuna tiyan. Chashna kulluptinpish ñuka tukuy rimashkaynita rurasha.

³⁶ Tata Diosllami yachan imay diyami imay orami ñuka kutimusha nishpa. Mana ni suk runa nima sielupi kawsak angelkuna yachansapachu. Nima

ñuka Tata Diospa wambran kayakashpaynipish mana yachanichu aykapimi kutimusha nishpa.

³⁷ Noepa tiempunpi runakuna Tata Diosta mana nima yuyashpa kawsarkansapa. Chashnami ñuka sielumanta shamudu runa kashkan kutimuptini runakuna Tata Diosta mana nima yuyashpa kawsankasapa.

³⁸ Chay tiempu manara Tata Dios allpata yakuwan untachiptinra tukuy runakuna mikushpankunalla upyashpankunalla kasarakushpankunalla kawsarkansapa. Noe manllayba barkupi yaykunan diyakaman chashnalla kawsarkansapa. ³⁹ Chay runakuna mana nima yuyashkankuna oras Tata Dios allpata yakuwan untachiptin tukuy sipikurkansapa. Ñuka sielumanta shamudu runa kutimuptini mana nima yuyashkankuna oras runakuna kullunkasapa.

⁴⁰ Chay oras ishkay runakuna chakranpi tantalla trabajaptinkuna sukta pushasha sukta sakisha. ⁴¹ Ishkay warmi suk batanllapi kutakuykaptinkuna sukta pushasha sukta sakisha.

⁴² Kankunaka mana yachankichichu ñuka kamachiknikichi imay orami kashkan shamusha nishpa. Chayrayku shamenaynita yuyashpalla kawsaychi.

⁴³ Mash allita uyariwaychi. Suk runa yachashpa imay oratami tutapi suwa shamenman nishpa mana puñushpa uyari uyari shuyanman. Chashna shuyaptin chay suwa runa mana wasinpi yaykunmanchu suwakanpa. ⁴⁴ Chayrayku kankunapish prontanakushpa shuyawaychi. Mana yuyashkaykichi oras ñuka sielumanta shamudu runa kutimusha.

Jesus yachachikurkan ishkay laya wiwachukunapa ejemplunta. (Lk 12.41-48)

⁴⁵ Chaymanta Jesuska ñukaykunallata yachachiwaysapallapi katirkan:

—Suk patron chikan llaktaman rinanpa suk alli rurak yachaysapa wiwachunta willan tukuy wiwachumasinkunata trabajachinankunapa. Chaymanta willan oranpi karanankunapa. ⁴⁶ Chay wiwachu kushikunka patronnin willashkanta allita rurashkanta tarimuptin. ⁴⁷ Alli kasukuk runa kaptin patronninka tukuy laya tiyapunanta kuydapunarpa sakinka.

⁴⁸ Chaymanta ichara chay wiwachun yuyenman patronnin mana utka kutimunanta. ⁴⁹ Chayta yuyashpa kallarinman wiwachumasinkunata makashpa sufrichiyta. Chaymanta machadu runakunawan tantanakushpa mikunaman upyanman. ⁵⁰ Mana allita rurashpa kawsaykaptin mana yuyashkan oras patronninka kutimushpa sukaman kastiganka. ⁵¹ Mana nima llakichishpa tukuy llullachikuk runakunawan tantallata kastiganka. Chaypina chay mana alli rurak runa kastigunta mana muchushpaa kirunta mukushpa sukaman wakanka.

25

Jesus yachachikurkan chunka shipashkunapa ejemplunta.

¹ Chaymanta Jesuska ñukaykunata yachachiwaysapallapi katirkan:

—Kunan parlachiykichi chunka shipashkunapa ejemplunta yachanaykichipa imashnami ñukata shuyawankichi Tata Diospa mandunpi yaykunaykichipa.

Chunka shipashkuna alkusankunata apashpankuna rirkansapa noviota tinkuk paywan tantalla funsia wasiman rinankunapa. ² Chay chunka shipashkunamanta pichka yachaysapakuna karkansapa. Pichka mana

yachaysapakuna karkansapa. ³ Chay pichka mana yachaysapakuna alkusankunata apashpa mana wirata aparkansapachu kashkan wirachanankunapa. ⁴ Chay pichka yachaysapa shipashkunaka alkusankunata apashpa botellankunapi wirata aparkansapa.

⁵ Chaypina novio mana utka chayaptin puñunayashpankuna chunkantin shipashkuna puñurkansapa. ⁶ Yaka chawpi tutata sunipi uyarirkansapa suk runa kayakuptin: “Ñami novioka shamuykanna. Llukshimuychina tinkuk.” ⁷ Chaypina chay shipashkunaka utka atarishpankuna alkusankunata kallarirkansapa allichayta. ⁸ Chay pichka mana yachaysapa shipashkunaka chay pichka shuyakmasinkunata willarkansapa: “Alkuśaynikunapa wiranka ñami tukushkana. Suk tipi wiraykichita kuwaysapa.” ⁹ Chashna mañaptinkuna chay pichka yachaysapa shipashkunaka willarkansapa: “Wirata munashpaykichika rillarychi rantik. Wirata kuptinikunaka ñukaykunapish pishinman.”

¹⁰ Mana kunayaptinkuna chay pichka mana yachaysapa shipashkunaka rirkansapa wirata rantik. Rinankunakaman novioka chayarkan. Chaypina paywan tantalla chay pichka yachaysapa shipashkunaka funsia wasipi yaykurkansapa. Tukuy yaykuptinkunana novioka wasi punkuta wickarkan. ¹¹ Chaymanta chay pichka mana yachaysapa shipashkunaka chayarkansapa. Punkuta takashpankuna noviota kayarkansapa: “¡Señor, Señor, kichariy ñukaykunapish yaykunaynikunapa!” ¹² Chaypina payka ukumanta willarkansapa: “¡Manami kankunata riksiykichichu!”

¹³ Chay ejempluta willashkanwasha Jesuska ñukaykunata willawarkansapa:

—Kankuna mana yachankichichu imay orami imay diyami ñuka kutmisha nishpa. Chayrayku allita prontanakushpa mana shaykushpa shuyawanaykichi tiyan.

Jesus yachachikurkan suk patron trabajadorninkunata kullkita kushpa sakishkanta.

(Lk 19.11-27)

¹⁴ Chaymanta Jesuska ñukaykunallata yachachiwaysapallapi katirkan:

—Suk ejemplunta parlachiykichi yachanaykichipa imata rurashpami Tata Diospa mandunpi kawsankichi nishpa.

Suk patron karu llaktaman rinanpa trabajadorninkunata kayashpa kulkinta kurkansapa mirachipunkunapa. ¹⁵ Chay patronka suk trabajadorninta pichka waranka kullkita kurkan. Sukta ishkay waranka kullkita kurkan. Sukta suk waranka kullkita kurkan. Kimsantin trabajadorninta kullkita kurkan mirachiyyta atipananta riksishpa. Ashwan alli trabajak runata ashwan aypa kullkita kurkan. Chay kullkita kushpana suk karu llaktaman rirkankunata.

¹⁶ Chaypina chay pichka warankata chaskishka runaka chay kullkiwan negosyunta rurashpa suk pichka warankata mirachirkan. ¹⁷ Chashnashina chay ishkay warankata chaskishka runapish negosyunta rurashpa suk ishkay warankata mirachirkan. ¹⁸ Chaymanta chay suk warankata chaskishka runaka mana chay kullkiwan trabajanayashpa allpapi pamparkan.

¹⁹ Chaymanta unay tiempumanta chay patronka kutimurkan. Chaypina kullki chaskishka runakunata tapurkansapa mashnatami mirachishkasa nishpa. ²⁰ Chaypina pichka waranka kullkita chaskishka runaka chunka warankata apamushpa patronninta willarkan: “Señor, kutichiyki kay pichka waranká kuwashkayki ullkikita. Chaymanta kuyki kay

pichka waranka mirachishkayni kullkitapish.” ²¹ Chay mirachidu kullkita kuptinna patronka willarkan: “Allitami rurashkanki. Kanmi alli kasuwak alli rurak runa kashkanki. Kay tipi kushkayni kullkiwan allita trabajashkanki. Chayrayku ashwanta kushkayki chaywan ashwanta trabajanaykipa. Kunanka ūukawan tantalla wasinipi yaykumuy kushikunaykipa.”

²² Chaypina chay ishkay waranka kullkita chaskik runaka patronninta ladunchashpa willarkan: “Señor, ūukata kuwashkanki ishkay warankata trabajachinaynipa. Kunanka chaytami kutichiyki. Chaymanta kay mirachishkayni ishkay warankatapish kuyki.” ²³ Chashna chusku waranka kullkita kuptinna patronka willarkan: “Allitami rurashkanki. Kanmi alli kasuwak alli rurak runa kashkanki. Kay tipi kushkayni kullkiwan allita trabajashkanki. Chayrayku ashwanta kushkayki chaywan ashwanta trabajanaykipa. Kunanka ūukawan tantalla wasinipi yaykumuy kushikunaykipa.”

²⁴ Chaymanta suk waranka kullkita chaskik runaka patronninta ladunchashpa willarkan: “Señor, ūuka allita riksiyki sukaman trabajachikuk sinchi patron kanaykita. Kanka chikan runapa tarpushkankunata pallanki. Chikan runapa mirachishkanta apinki. ²⁵ Sakra kanaykita yachashpayni manchakushkanki. Chayrayku kuwashkayki kullkita allpapi pampashkanki. Kay waranka kullki kuwashkaykillata kutichiyki.”

²⁶ Chashna kuptinna patronninka willarkan: “Kanka mana kasuwak sukaman killa likidu runa kashkanki. Yachashkanki ūuka chikan runapa trabajashkankunata pallanaynita chikan runapa mirachishkanta apinaynita.

²⁷ Chayta yachaykashpayki ¿imapatí kullkinita mana suk banku ofisinapi churarkanki chaypi mirachipanankunapa? ūuka kutimuptini kullki mraduta surkunkiman karkan kuwanaykipa.”

²⁸ Chayta willashpa patronka chaypi kak runakunata willarkansapa: “Kay runata chay waranka kushkayni kullkita kichuychi chay chunka waranka mirachik runata kunaykichipa. ²⁹ Tata Dios allita rurayta yachak runata ashwanta kunka puchunankaman tiyapunpanpa. Mana allita rurak runapa tipi tiyapushkanta kichunka. ³⁰ Chayrayku tutayadu washaman kay killa likidu mana kasuwak runata wishchuychi. Chaypina kastigunta mana muchushpa kirunta mukushpa sukaman wakanka.”

Jesus kashkan shamushpa willankasapa pitami kastiganka pitami kushichinka nishpa.

³¹ Chaymanta Jesuska ūukaykunallata yachachiwaysapallapi katirkan:

—ūuka sielumanta shamudu runa tukuy angelnikunawan tantalla kutimusha. Chaypina llipyak likidu allima tiyarinaynipe tiyarisha kamachikunaynipe. ³² Chaypi tiyariptini tukuy llaktakunamanta runakuna ūwpakninipi tantanakunkasapa. Iden suk runa chivunkunamanta ovejankunata ashuchikshina ūukapish mana alli rurak runakunamanta alli rurak runakunata ashuchisha. ³³ ūukata kasuwak runakunata ovejankunatashina alli laduynipi churashasapa. Mana kasuwak runakunata chivukunatashina lluki laduynipi churashasapa.

³⁴ Chaypina ūuka sinchi kamachikuk kashpayni alli laduynipi churashkayni runakunata willashasapa: “Tatayni kankunata kushichishuptikichi shamuychi ūukawan tantalla kamachikunaykichipa. Tata Dios kay allpata rurashkanmantapacha kankunapa llaktaykichita rurarkan chaypi kamachikunaykichipa. ³⁵ ūukata yarkaptini kankuna karawarkankichi. Yakunayaptini yakuchiwarkankichi. Karu llaktamanta llaktaykichipi chayaptini wasikichipi chaskiwashpa samachiwarkankichi. ³⁶ Llachapayni mana tiyawaptin kankunaka

kuwarkankichi mudakunaynipa. Unkudu kaptini chapawak rirkankichi. Karselpi kaptini chapawak rirkankichi.”

³⁷ Chashna willaptini chay alli rurak runakuna tapuwankasapa: “Señor ¿aykapiti yarkaymanta kaptiki karashkaykisapa? ¿Aykapiti yakunayaptiki yakuchishkaykisapa? ³⁸ ¿Aykapiti karumanta llaktaynikunapi chayamuptiki wasinikunapi chaskishpa samachishkaykisapa? ¿Aykapiti llachapayki pi-shiptin llachapata kushkaykisapa? ³⁹ ¿Aykapiti unkudu kaptiki karselpi kaptiki chapashkaykisapa?” ⁴⁰ Chashna tapuwaptinkuna ñuka alli kamachikuk kashpayni willashasapa: “Kankunaka sufrikmasinikunata yanapashipay-kichi ñukatami yanapawashkankichi.”

⁴¹ Chaymanta lluki laduynipi churashkayni runakunata willashasapa: “Ñukamanta anchuychi Tata Dios kastigashunaykichipa. Rillarychi mana tukuyniyuk ninaman. Tata Dios chay ninata rurashká tukuy supaykunata paykunapa kamachikunkinta kastiganankunapa. ⁴² Ñuka yarkaptini mana karawarkankichichu. Yakunayaptini mana yakuchiwarkankichichu. ⁴³ Llaktaykichipi chayaptini mana wasikichipi chaskiwarkankichichu samanaynipa. Llachapayni mana tiyaptin mana nimata kuwarkankichichu mudakunaynipa. Unkudu kaptini karselpi kaptini mana nima chapawarkankichichu.”

⁴⁴ Chashna willaptini tapuwankasapa: “Señor ¿aykapiti yarkaymanta kaptiki mana kararkaykisapa? ¿Aykapiti yakumanta kaptiki mana yakuta kurkaykisapa? ¿Aykapiti llaktaynikunapi chayaptiki wasinikunapi mana yaykuchirkaykisapa? ¿Aykapiti llachapayki mana tiyaptin llachapata mana kurkaykisapa? ¿Aykapiti unkudu kaptiki karselpi kaptiki mana yanaparkaykisapa?” ⁴⁵ Chashna tapuwaptinkuna ñuka sinchi kamachikuk kashpayni willashasapa: “Sufrikmasinikunata mana yanapashipaykichi ñukatapis mana yanapawarkankichichu. ⁴⁶ Chayrayku kankuna rinaykichi tiyan mana tukuyniyuk ninaman. Tata Diosta kasushpa kawsak runakuna riñankuna tiyan mana tukuyniyukta sielupi kawsak.”

26

*Chiknik runakuna parlarkansapa Jesusta wañuchinankunapa.
(Mr 14.1-2; Lk 22.1-2; Jn 11.45-53)*

¹ Chaymanta chaykunata ñukaykunata yachachiwashkankunawasha Jesuska willawarkansapa:

² —Kankuna yachankichi Paskua fiestapa ishkay diyallana illananta. Chay fiesta ukun chikniwak runakuna ñuka sielumanta shamudu runata awtoridarkunaman pushawankasapa paykuna chakatawashpa wañuchiwanankunapa.

³ Jesus chayta willawashkankuna diyalla Kayfaspa wasinpi kamachikuk saserdote kunawan judiyukunapa ánsianunkuna tantañakurkansapa. Kayfaska saserdote kunapa ashwan sinchi kamachikuknin karkan.

⁴ Paykuna yuyarkansapa Jesusta pantachichishpa apichiyta wañuchichinankunapa. ⁵ Willanakurkansapa:

—Ama Paskua fiesta ukunka wañuchichiypachichu fiestaman shamudu runakuna ama turbakushpa piñayawananchikunapa.

*Suk warmi Jesuspa umanpi mishkiklla asnak wirata icharkan.
(Mr 14.3-9; Jn 12.1-8)*

6 Betania llaktapi lasaru unkuymanta alliyadu runa Simon kawsarkan. **7** Jesus Simonpa wasinpi mikuykaptin suk warmi yaykurkan. Chay warmika apamurkan yurak rumimanta ruradu botellapi aypa chaniyuk mishkiklla asnak wirata. Chay warmika Jesusta ladunchashpa umanpi chay mishkiklla asnak wirata icharkan. **8** Chayta kawashpa ūukaykuna piñakushpaynikuna willanakurkanisapa:

—¿Imapati chay warmi chay mishkiklla asnak wirata usuchiyan? **9** Ashwan alli kanman karkan aypa kullkipi rantikushpa chaypa chaninta mana nimayuk runakunata kunanpa.

10 Jesus chayta uyarishpa willawarkansapa:

—¿Imapati piñakushpa kay warmita washanchankichi? Kay wirata umaynipi ichashpa allitami rurashka. **11** Mana nimayuk runakunata tukuy maytapish rishpa tarinkichi. ūukata manami tukuy tiempunachu kawawankichi. **12** Kay warmika kay mishkiklla asnak wirawanka armachiwashkana wañuptini pampawanankunapa. **13** Allita willaykichi: Kankuna tukuy maypi yachachikushpa ūuka salvakuk kanaynita kay warmi rurashkantapish parlachikunkichi. Chashnamanta tukuy pi paytaka allita yuyankasapa.

Judas Jesusta rantikurkan wañuchinankunapa.

(*Mr 14.10-11; Lk 22.3-6*)

14 Jesuspa chunka ishkay disipulunkunamanta suk karkan Judas Iskariote. Payka Jesusta rantikunayashpa rirkana kamachikuk saserdotekekunawan parlak. **15** Paykunata willarkansapa:

—Ūuka willaptini imashnami Jesusta apinkichiman nishpa ¿mashnatati pagarawankichiman?

Chashna Judas willaptinkuna paykuna willarkansapa kimsa chunka kullkita kunankunapa.

16 Chay kullkita chaskishkan oramantapacha Judaska sukaman Jesusta chaparkan apichichinanpa.

Jesus disipulunkunawan Paskua fiesta mikunata mikurkansapa.

(*Mr 14.12-25; Lk 22.7-23; Jn 13.21-30; 1 Kor 11.23-26*)

17 Chay Paskua fiesta kallarinan diyapi tukuy judiyu runakuna amañak kanisapa mana levadurayuk panta mikuya. Chay diya Jesusta ladunchashpaynikuna tapurkanisapa:

—Maypiti munanki Paskua fiesta mikunata rinaynikunapa rurak?

18 Chashna tapuptinkuna Jesuska willawarkansapa:

—Rillyachi Jerusalen llaktaman. Suk runapa wasinpi chayashpa willaychi: “Maestruynikuna willachimushunki ūashi wañunan diya chayamuykanna. Chayrayku wasikimansi disipulunkunawan shamunayan Paskua fiesta mikunata mikuk.”

19 Chaypina rirkanisapa Paskua fiesta mikunata rurak. **20** Tutayaptinna Jesuswan ūukaykuna suk mesapi mikuykarkanisapa. **21** Chaypina Jesuska willawarkansapa:

—Allita willaykichi. Chikniwak runakuna apiwankasapa wañuchawanankunapa. Kankunamanta sukmi paykunapi apichichiwanka wañuchichiwanankunapa.

22 Chashna willawaptinkuna sukaman llakishpaynikuna sukmanta sukmanta payta tapurkanisapa:

—Señor ¿ariya ūukachu kani?

23 Chaypina Jesuska willawarkansapa:

—Ñukawan tantalla kay kallanapi panninta ñuyuchik runami apichichiwanka. ²⁴ Tata Diospa killkadunpi riman runakuna wañuchiwanankunata. Chayrayku ñukaka sielumanta shamudu runa kashpayni wañusha. Wañunaynipa kaptinpish chay apichichiwak runataka sukaman llakichini. Ashwan alli kanman karkan ama nasinanpa.

²⁵ Chaypina chay apichichinayak Judaska Jesusta tapurkan:

—Maestru ¿ariya ñukachu kan?

Chashna tapuptin Jesuska aynirkana:

—Ariya kanmi kanki.

²⁶ Chaymanta mikuykaptinikuna Jesus suk panta apishpa Tata Diosta agradesirkan. Chay panta pakishpa ñukaykunata kuwarkansapa. Chaskichi-washpankuna willawarkansapa:

—Kay panta mikuychi. Kay panka kuerpuynimi.

²⁷ Chaymanta Jesuska suk vasu vinuta apishpa Tatan Diosta agradesirkan. Chay vasu vinuta kuwashpankuna willawarkansapa:

—Tukuy kankuna kay vinuta upyaychi. ²⁸ Kay vinuka yawarninimi. Yawarniruwan mushuk paktuta rurasha. Wañuptini yawarnini ichakuptin Tata Dios aypa runakunata uchankunamanta perdonankasapa. ²⁹ Allitami willaykichi. Uvamanta vinuta mana kutin upyashanachu Tatayni Diospa mandunpi kankunawan tantalla kashpa mushuk vinuta upyanaynikaman.

Jesus Pedruta willarkan kimsa kuti mana riksinanta rimananta.

(*Mr 14.26-31; Lk 22.31-34; Jn 13.36-38*)

³⁰ Chaymanta salmo kantukunata kantashkaynikunawasha rirkanisapa Olivos urkuman. ³¹ Chaypina Jesuska willawarkansapa:

—Tata Dios rimanapi willawanchisapa: “Ovejakuna kuydak runata wañuchiptini tukuy ovejankuna chayta chayta kalpankasapa.” Tata Dios rimashkanshina kunan tuta tukuy kankuna ñukarayku manchakushpa saki-wankichi. ³² Chaymanta ñuka wañushkaynimanta kashkan kawsamushpayni Galilea partiman kankunamanta ñawpakte risha.

³³ Chaypina Pedruka Jesusta willarkan:

—Tukuy katishukmasinikuna turbakushpa sakishuptinkunapish ñukaka manami nima layapi sakishkaykichi.

³⁴ Chashna Pedru willaptin Jesuska willarkan:

—Allitami willayki. Kay tuta manarapish gallo kantapin kimsa kuti rimanki mana riksiwanaykita.

³⁵ Chaypina Pedruka willarkan:

—Kanwan tantalla wañunayni kaptinpish manami nima layapi rimashachu kanta mana riksinyaynita.

Chashna Pedru willaptin tukuy ñukaykuna idenllata willarkanisapa.

Getsemani wertapi Jesus Tatan Dioswan parlarkan.

(*Mr 14.32-42; Lk 22.39-46*)

³⁶ Chaymanta Getsemani wertaman Jesuswan tantalla rirkanisapa. Chaypi chayaptinikuna Jesuska willawarkansapa:

—Tatayni Dioswan parlak rinaynikaman kaypi tiyarishpa shuyawaychi.

³⁷ Chashna willawashpankuna suk chikan laduman Jesuska Pedruta Sebedeopa ishkay wambrankunata pusharkansapa. Chaypina Jesuska sukaman turbakushpa llakishpa paykunata willarkanisapa:

³⁸ —Sukaman llakishpayni wañukshina mallinakuni. Kankuna mana nima puñushpa kayllapi kiparishpaykichi Tata Diosta roygaychi yanapawanapanpa.

³⁹ Chashna willashpankuna Jesuska urasituman rirkana. Chaypi kumuraykan allpapi urkun takakunankaman. Tatan Diosta willarkan:

—A, Tatayni, munashpaykika salvaway ama sukaman sufrinaynipa. Chaymanta sufrishpaynipish munani kanpa munanaykillata rurayta. Manami munanichu ñukapa munanaynita rurayta.

40 Chayta Tata Diosta willashkanwasha Jesuska chay kimsa disipulunkunapa ladunman kutirkan. Puñuykaptinkuna tarishpankuna Pedruta willarkan:

—¿Manachu niman suk orata mana puñushpa atipankichi ñukawan pakta Tata Dioswan parlayta? **41** Mana nima puñushpa Tata Diosta roygaychi supay ama uchallichishunaykicipa. Kankunaka sukaman munankichi Tata Dioswan parlayta. Chaykamanka kumanlla shaykunkichi.

42 Chashna willashpankuna Jesuska kashkan rirkana Tatan Diosta roygak. Chaypina willarkan:

—A, Tatayni, sufrinaynimanta mana amachawayta munashpaykika munanaykillata ruray.

43 Tatan Diosta rogashkanwasha Jesuska kashkan kutishpa chay kimsa disipulunkunata tarirkansapa sukaman puñuykaptinkuna. Puñuyllavensirkansapa. **44** Puñuykaptinkuna sakishpankuna Jesuska kimsaynin kuti rirkana Tatan Diosta idenllata willak. **45** Chaypina disipulunkunaman kutishpa willarkansapa:

—¿Ariya puñushpalla chay samaykankichi? Ñami orana suk runa ñukata uchasapa runakunapi rantikuwananpa. **46** ¡Atarimuychina! Akuychina. Ñami shamuykanna chay rantikuwak runaka.

*Chiknik runakuna Jesusta apishpa Kayfaspa wasinman pusharkansapa.
(Mr 14:43-50; Lk 22:47-53; Jn 18:2-11)*

47 Jesus chayta willaykaptinkuna disipulun Judaska aypa runakunata pushamushpa chayarkan. Chay runakuna kaspikunata ishkantin ladupi filuyuk machetikunata apashpankuna rirkansapa Jesusta apik. Rirkansapa kamachikuk saserdotekunawan judiyukunapa ansianunkuna kachaptinkuna. **48** Judas manara chay runakunata Jesusman pushashpa allita yachachirkansapa: “Suk runata muchaptini yachankichi pay kananta. Paytami apishpa pushankichi.”

49 Chaypina Jesusta ladunchashpana willarkan:

—Buenas noches, maestra.

Chashna rimachishpa mucharkan. **50** Muchaptinna Jesuska willarkan:

—Amigo, surak shamushkaykita rurayna.

Chaypina chay runakuna Jesusta apirkansapa pushanankunapa.

51 Chayta kawashpa Jesuswan tantalla purik runa machetinta apirkan. Chaywan sinchi kamachikuk saserdotepa wiwachunpa suk ladu rinrinta tipipurkan. **52** Chashna tipipuptin Jesuska willarkan:

—Chay machetikitaka macheti churanayki Kashkan churay. Machetewan makanakuk runakuna machetillawan wañuchinakunkasapa. **53** ¿Manachu yachanki Tatayni Diosta roygaptinika kumanlla kanchis chünka waranka angelninkunata kachamunman amachawanankunapa? **54** Tata Dioska kilkadunpi riman ñuka wañunaynita. Mana wañushpaynika mana Tata Diospa rimashkanta ruraymanchu karkan. Chayrayku Tata Diosta mana roygashachu wañuymanta amachawananpa.

55 Chayta willashpa Jesuska chay pushanayak runakunata willarkansapa:

—¿Imapatí kaspikunata machetikunata apamushkankichi apiwanaykicipa? ¿Ariya suwa wañuchikuk runachu kani? Tukuy diya Tata Diospa wasinpi yachachikuptini ¿imapatí mana chaypi apiwashkankichi?

56 Ñawpa yachachikkuna Tata Dios rimashkanta killkarkansapa kashna apiwanaykichipa. Chay killkadunpi rimashkanshina kunan kankuna apiyawankichi wañuchichiwanaykichipa.

Chashna oras ñukaykuna disipulkunkuna manchakushpaynikuna Jesusta sapallanta sakishpaynikuna nitikurkanisapa.

*Jesusta pusharkansapa ashwan sinchi kamachikuk Kayfasman.
(Mr 14.53-65; Lk 22.54-55, 63-71; Jn 18.12-14, 19-24)*

57 Chay aypa runakuna Jesusta apishpa Kayfaspa wasinman pusharkansapa. Kayfaska ashwan sinchi kamachikuk saserdote karkan. Paypa wasinpi Moisespa killkadunta yachachikkunkunawan judiyukunapa ansianunkuna tantanakudu shuyaykarkansapa.

58 Jesusta pushaptinkuna Pedruka washallata katishpa chay wasi pampapi yaykurkan. Tata Diospa wasinta kuydak runakunapish chay pampapi tiyaridu karkansapa. Pedruka paykunapa ladunkunapi rirkana tiyrik kawanayashpa imatami Jesusta rurankasapa nishpa.

59 Chay wasi ukupi tukuy awtoridarkuna tantanakushpangkuna chiknik runakunata maskarkansapa llullakushpa Jesusta chatanankunapa. Sukan munarkansapa Jesusta wañuchichiyyta. **60** Chaypina aypa runakuna llullakushpa Jesusta chatashpangkunapish mana nima wañuchinankuna layattachu chatarkansapa. Aypa runakuna chatakushkunkunawasha ishkay chatakukkuna chayashpangkuna willarkansapa:

61 —Kay Jesuska rimarkan: “Ñuka atipani Tata Diospa manllayba wasinta urmachiyyta. Chayta urmachishkayniwasha kimsa diya ukun tukuchasha kashkan rurayta.”

62 Chashna rimaptinkuna Kayfaska shayarishpa Jesusta tapurkan:

—¿Chashna chatashuptinkuna manachu aynikunki? **63** ¿Imatati chatashuykansapa?

63 Chaypina Jesuska upallalla uyarirkan. Mana nimata ayniptin chay sinchi kamachikuk saserdote kashkan willarkan:

—Sielupi kawsak Tata Diospa shutinpi willayki: Mana llullakushpa willawaysapa ¿kanchu kanki shuyanaynikuna salvakuk Tata Diospa wambran?

64 Chaypina Jesuska willarkan:

—Ariya, ñukami kani. Kunan willaykichi: Kankunaka ñuka sielumanta shamudu runata kawawankichi tukuy laya atipak Tatayni Diospa ladunpi tiyariptini. Kawawankichi puyukuna ukunpi kashkan shamuptini.

65 Chashna Jesus willaptin chay sinchi kamachikuk Kayfaska sukaman piñakushpa churakunan sawa llachapanta llikirkan. Chayta rurarkan tukuy chay runakuna yachanankunapa sukaman piñakunanta. Chaymanta chay kamachikukmasinkunata willarkansapa:

—Kay runaka chashna rimashpa Tata Diostami sukaman piñachiyykan. Ama ashwan chatakuk runakunata maskaypachinachu. Tukuy kankuna Tata Diosta piñachinan laya rimashkanta uyarishkankichi. **66** ¿Imatati yuyankichi?

Chashna Kayfas willaptin paykunaka aynirkansapa:

—Uchanpi kashpa wañunan tiyan.

67 Chaypina Jesusta uyanpi tukaychashpangkuna kasiwan waktarkansapa. Sukkuna uyanpi lapyarkansapa. **68** Asichishpangkuna willarkansapa:

—Salvakuk runa kashpaykika willawaysapa pimi lapyashuykan nishpa.

*Pedru rimarkan Jesusta mana riksinanta.
(Mr 14.66-72; Lk 22.56-62; Jn 18.15-18, 25-27)*

69 Chay wasi ukupi Jesusta asichiykaptinkuna Pedruka pampapi ti-yaridu karkan. Chaypi kaptin chay wasipi sirvikuk warmi ladunchashpa willarkan:

—Kanpish Galileamanta runa Jesuswan tantalla purishkanki.

70 Chashna willaptin Pedruka tukuy chay runakuna uyariptinkuna aynirkan:

—Manami yachanichu pipami willawaykanki.

71 Chaymanta Pedruka chay wasi punkuman rirkhan. Chaypina suk sirvikuk warmi payta kawashpa sukkunata willarkansapa:

—Kay runaka Nasaretmanta runa Jesuswan tantalla purishka.

72 Chaypina Pedruka jurashpa kashkan willarkansapa:

—Ñuka manami chay runata riksinichu.

73 Chaymanta chaypi kak runakuna Pedruta ladunchashpangkuna willarkansapa:

—Deverasmi kanpish chay runapa purikmasin kanki. Rimanaykimanta riksiyakisapa.

74 Chashna willaptinkuna Pedruka jurashpa maldisishpa willarkansapa:

—Manami chay runata riksinichu.

Pedru chayta rimaykaptinlla suk gallo kantarkan. **75** Chayta uyariashpana Pedruka yuyarkan Jesus willashkanta: “Manarapish gallo kantaptin kimsa kuti rimanki mana riksiwanaykita.” Chayta yuyashpana Pedruka washaman llukshishpa sukmaman llakishpa mana upallayak layata wakakurkan.

27

Chiknik runakuna Jesusta pusharkansapa Pilatoman.

(Mr 15:1; Lk 23.1-2; Jn 18.28-32)

1 Chaymanta pakariyikaptin tukuy kamachikuk saserdotekekunawan tukuy judiyukunapa ansianunkuna parlashpangkuna yuyarkansapa Jesusta wañuchinankunapa. **2** Chaypina Jesusta watashpangkuna pusharkansapa kamachikuk Pilatoman. Pilatoka karkan romano gobernador.

Judas sipinakushpa wañuchinakurkan.

3 Chaypina Jesusta Pilatoman wañuchichinankunapa pushaptinkuna Judaska kawarkan. Jesusta apichichishkanrayku sukmaman turbakushsha rirkhan rantikushkan chanin kullkita kutichikuk. Chay kamachikuk saserdotekekunapi judiyukunapa ansianunkunapi chayashpa willarkansapa:

4 —Chay mana nima uchayuk runata wañuchinaykichipa rantikushpayni uchallikushkani.

Chaypina paykunaka willarkansapa:

—Chayka kanpa uchaykimi. Ñukaykunapa mana nimachu.

5 Chashna willaptinkuna Judaska chay kullkita Tata Diospa wasinpi wishchukurkan. Chaymanta llukshishpa waskawan sipinakushpa wañuchinakurkan.

6 Chaypina chay kamachikuk saserdotekekuna chay wishchudu kullkita apishpankuna willanakurkansapa:

—Kay kullkika wañuchinanchikuna runapa chaninmi. Chayrayku mana allichu churananchikunapa ofrenda churana kajapi. **7** Ashwan alli kanman kay kullkiwan suk terrenuta rantananchikunapa chikan llaktamanta runakuna wañuptinkuna chaypi pampanankunapa.

Chashna parlanakushpangkuna puyñukuna rurak runapa terrenunta rantirkansapa.⁸ Chay kullkiwan rantishkankunaryku kunankaman chay pampapa shutin kiparishka Yawar Pampa.

⁹ Chayta rurarkansapa chay ñawpa yachachikuk Jeremiyas rimashkan-shina: "Israel runakuna kimsa chunka kullkillata chanicharkansapa chay alli rurak runapa pagarakunankunapa.¹⁰ Chay kullkiwan puyñukuna rurak runapa terrenunta rantirkansapa Tata Dios rimashkanshina."

*Chay runakuna Pilatoman Jesusta pusharkansapa.
(Mr 15.2-5; Lk 23.3-5; Jn 18.33-38)*

¹¹ Chaymanta Jesusta pusharkansapa gobernador Pilatopi chatakuk. Chaypi Pilatoka Jesusta tapurkan:

—¿Kanchu kanki judiyu runakunapa ashwan sinchi kamachikunkinkuna? Chashna tapuptin Jesuska aynirkan:

—Ariya ñukami kani.

¹² Chaypina kamachikuk saserdote kunawan judiyukunapa ansianunkuna Jesusta sukaman chataykaptinkuna Jesuska mana aynikushpa upallalla uyarirkan.¹³ Chayrayku Pilato Jesusta tapurkan:

—¿Manachu uyarinki tukuy kay runakuna chatashuptinkuna?

¹⁴ Chashna tapuptin Jesuska mana nimata aynirkanchu. Chayrayku Pilatoka sukaman almirarkan.

*Chiknik runakuna Pilatota willarkansapa Jesusta wañuchichinanpa.
(Mr 15.6-20; Lk 23.13-25; Jn 18.38-19.16)*

¹⁵ Tukuy wata Paskua fiesta ukun Pilato amañarkan karsel manta suk runata kacharichiya. Runakunata willaksapa akllanankunapa maykan runatami kacharinka nishpa.¹⁶ Chay tiempu karselpi karkan suk runa Barrabas. Tukuy pi yacharkansapa Barrabas sukaman mana alli rurak runa kananta.¹⁷ Chaypina Pilatoka chay aypa tantanakudu runakunata tapurkansapa:

—¿Maykan runatati munankichi kacharinaynipa? ¿Barrabastachu kacharisha? ¿Kay Tata Diosmanta shamudu rimanankunatachu kacharisha?

¹⁸ Pilato chayta tapurkansapa allita yachashpa Jesusta chiknishpangkuna chatakushkankunata.

¹⁹ Chaymanta kamachikunan tiyarinanpi Pilato tiyari du kaptin warmin willachirkan: "Ama nimanachiychu chay mana nima uchayuk runata. Kayna tutapi payrayku manchanapa layata muskukushkani."

²⁰ Chaypina chay kamachikuk saserdote kunaka chay aypa tantanakudu runakunata sinchita willarkansapa:

—Pilatota willaychi Barrabasta kacharinanpa Jesusta wañuchichinanpa.

²¹ Chaypina Pilato kashan tapurkansapa:

—¿Pitati munankichi kacharinaynipa?

Chaypina chay tantanakudu runakunata willarkansapa:

—¡Barrabasta kachari!

²² Pilatoka tapurkansapa:

—¿Imatati rurasha kay rimanankuna Tata Diosmanta shamudu Jesusta?

Chashna tapukuptinkuna tukuy runakuna aynirkansapa:

—¡Kruspi chakatachi!

²³ Pilatoka willarkansapa:

—¿Ima mana allitati rurashka?

Paykunaka ashwan sukaman sinchita rimashpangkuna kashkan willarkansapa:

—¡Kruspi chakatachi!

²⁴ Chay runakuna sukaman piñakushpa kapariptinkuna Pilatoka mana nima layapi upallayachiya atipashpana yakuta apachimurkan. Chaywan makinkunata mayllarkan tukuy runakuna kawanankunapa. Chaypina willarkansapa:

—Ñukaka makinita mayllani yachanaykichipa kay runa wañuptin mana nima uchayuk kanaynita. Wañuptinka kankunami uchayuk kankichi.

²⁵ Chashna willaptinkuna tukuy chay runakuna willarkansapa:

—Chay runa wañuptinka ñukaykuna tukuy wambraynikunawan uchayuk kanisapa.

²⁶ Chaypina Pilatoka Barrabasta kacharishkanwasha Jesusta suk karawaskawan asutichirkan. Chaymanta kukurkan suk kruspi chakatashpwa wañuchinankunapa.

²⁷ Chaypina Pilatopa soldadunkuna Jesusta pusharkansapa paypa wasinman. Chaypi chayashpangkuna aypa soldadumasinkunata tantanachirkansapa Jesusta asichinankunapa. ²⁸ Jesuspa sawa llachapanta llatanachishpa kamachikukpa puka llachapanta churachirkansapa.

²⁹ Umanpi kashayuk waskamanta awadu koronata churapurkansapa. Chaymanta alli ladu makinpi suk varata churapurkansapa kamachikunan vara nishpa. Sukaman asichishpangkuna ñawpakanipi kunkurikurkansapa. Kuyak tukushpangkuna willarkansapa:

—¡Kanmi judiyu runakunapa ashwan sinchi kamachikuknin kanki!

³⁰ Chaypina tukaycharkansapa. Chay varallawan umanpi waktarkansapa. ³¹ Sukaman asichishkankunawasha kashkan kikinpa llachapanta churachirkansapa. Chaymanta pusharkansapa suk kruspi chakatak.

Suk kruspi Jesusta chakatashpangkuna wañuchirkansapa.

(Mr 15.21-32; Lk 23.26-43; Jn 19.17-27)

³² Jesusta chakatak pushashpangkuna suk runa Simonta tinkurkansapa. Chay Simon Sirene llaktamanta karkan. Soldadukunaka payta apishpankuna Jesuspa krusninta aparichirkansapa.

³³ Rishpankuna suk taksha urku Golgotapi chayarkansapa. Chay Golgota shuti judiyukuna rimanaynikunapi riman Úma Poto. ³⁴ Chaypina soldadukuna Jesusta upyachinayarkansapa ayakwan chakrudu vinuta. Jesuska chayta mallishpa mana upyanayarkanchu.

³⁵ Chaypina soldadukuna Jesusta kruspi chakatarkansapa. Chaymanta Jesuspa llachapanta pukllashpa patumanakurkansapa yachanankunapa pimi apanka nishpa. ³⁶ Chay washa chayllapi tiyarirkansapa Jesusta allita kuydanankunapa.

³⁷ Jesuspa uman kuskapi churarkansapa suk killkaduta tukuy runakuna yachanankunapa imapami wañuchishkasapa nishpa. Chay killkadupi rimarkan: “Kay Jesuska judiyu runakunapa ashwan sinchi kamachikuknim.”

³⁸ Jesuspa ishkantin ladunpi ishkay suwa runakunatapish chakatarkansapa. ³⁹ Aypa runakuna rirkansapa Jesusta kawak. Paykunaka chikallayachishpangkuna willarkansapa:

⁴⁰—Kanmi rimashkanki Tata Diospa manllayba wasinta urmachishpayki kimsa diya ukunlla kashkan ruranaykita. Kunanka kikikilla salvanakuy. Tata Diospa wambran kashpaykika chay krusmanta urayamuy.

⁴¹ Chashnalla kamachikuk saserdotekunawan Moisespa killkadunta yachachikuk runakunawan judiyukunapa ansianunkuna Jesusta asichirkansapa. Paykuna Jesusta pinkachishpangkuna willanakurkansapa:

⁴² —Payka aypa runakunata unkuyninkunamanta supaykunamanta sal-vashkasapa. Kunanka kikin mana atipanchu wañuymana salvanakuyta. Israel llaktanchikunapa sinchi kamachikuknin kashpaka kay krusmanta urayamuchun. Chaypira kreyishunchisapa. ⁴³ Payka rimarkan Tata Diospa wambran kananta. Rimarkan Tata Dios tukuy layapi yanapananta. Tata Dios deverasta kuyashpanka kunanlla chay krusmanta urayachimuchun.

⁴⁴ Chashna asichiptinkuna chay ishkay ladunpi chakatadu suwakunapish Jesusta asichirkansapa.

Jesus kruspi chakatadu wañurkan.
(Mr 15.33-41; Lk 23.44-49; Jn 19.28-30)

⁴⁵ Jesus kruspi chakatadu kaptin chawpi diyamantapacha las tres de la tardikaman sukaman tuta likidu tukurkan. ⁴⁶ Chay oraslla Jesuska sinchita rimarkan: “Eli, Eli, ¿lama sabaktani?” Chay rimakushkan judiyu rimanaynikunapi riman: “Tata Diosnini, Tata Diosnini ¿imapati saki-washkanki?”

⁴⁷ Chay rimashkanta uyarishpana chay runakunaka willanakurkansapa:

—Kay runaka ñawpa yachachikuk Eliyastami kayaykan.

⁴⁸ Chaypina suk runa kallpashpa pintupa puntanta chiktarkan utkuta churanaarpa. Chayta ayak likidu vinupi sumichishpa Jesuspa shiminpi churarkan shukunarpa. ⁴⁹ Chayta kawashpa sukkuna willarkansapa:

—¡Ama upyachiychu! Akuychi kawaypachi Eliyas shamunkachu salvak manachu nishpa.

⁵⁰ Chaypina Jesuska kashkan sinchita kaparikurkan. Chashna kaparikushpa wañurkan. ⁵¹ Jesus wañushkan oraslla Tata Diospa wasinpi warkudu arkana llachapa llikikurkan. Anaknimanta urayninkaman llikikurkan chay alli arkadu kuarto rikurinarpa. Chaypina allpa sukaman kuyurkan. Atun urkukunapish chiktakurkansapa. ⁵² Chaymanta panteyunpi sepulturakuna kicharinakurkansapa. Tata Diosta kreyik wañudu runakuna aypa kawsamurkansapa. ⁵³ Chaymanta Jesus kawsamushkanwasha chay kawsamuk runakuna Jerusalen llaktapi yaykurkansapa. Chaypi yaykuptinkuna aypa runakuna kawarkansapa.

⁵⁴ Allpa sukaman kuyuptin Jesusta kuydak soldadukunawan kapitan-ninkuna tukuy chay almirana layakunata kawashpankuna sukaman man-chakurkansapa. Chaypina paykunaka rimarkansapa:

—Deverasmi key runaka Tata Diospa wambran kashka.

⁵⁵ Jesus chakatadu kaptin Galileamanta katishpa yanapak warmikuna chikanmanta kawarkansapa. ⁵⁶ Chay kawak warmikuna aypa karkansapa. Paykunamanta suk karkan Mariya Magdalena. Suk karkan Jakobopa Josepa maman. Suk karkan Sebedeopa warmin.

Suk machaypi Jesusta pamparkansapa.
(Mr 15.42-47; Lk 23.50-56; Jn 19.38-42)

⁵⁷ Chaymanta amusayaykaptinna Jesus wañushkanpi Jose chayamurkan. Chay Joseka Arimatea llaktamanta aypa kullkiyuk runa karkan. Jesusta kreyik karkan. ⁵⁸ Joseka rirkan Pilatota mañak Jesuspa kuerpunta pam-pachinanpa. Chashna mañaptin Pilatoka soldadunkunata willarkansapa kunankunapa. ⁵⁹ Chaypina Joseka Jesuspa kuerpunta suk allima mushuk sabanaswan wankurkan.

⁶⁰ Allita wankushpa pusharkansapa atun rumipi chayrak aspidu machay ukunpi churak. Chay rumi machayta Joseka kikinpa terrenunpi rurachirkan. Jesuspa kuerpunta chay ukupi churashkankunawasha manlaya rumiwan allita wichkarkan. Chaymanta sakirkan. ⁶¹ Chay machay ladunpi Mariya Magdalena suknin Mariyawan tiyarishpa kawarkansapa.

Pilato kacharkan soldadunkunata Jesuspa sepulturanta kuydanankunapana.

⁶² Jesusta wañuchishkankuna kayantin judiyu runakunapa samanankuna diya karkan. Chay diyaka kamachikuk saserdoteckuna fariseo runakunawan tantalla rirkansapa Pilatota kawak. ⁶³ Chaypina willarkansapa:

—Señor, ñukaykuna yuyanisapa chay llullachikuk runa rimashkanta. Payka kawsashspa rimarkan wañushkankunta kimsa diya ukun kashkan kawsamunanta. ⁶⁴ Chayrayku roygaykisapa kimsa diyata soldadukunawan Jesuspa sepulturanta kuydachinaykipa ama tutapi disipulunkuna kuerpunta suwanankunapa. Chashna suwashpankuna rimanmansapa Jesuska kawsamushkanta. Chashna llullakushpa kashkan tukuy runakunata ashwanta llullachinmansapa.

⁶⁵ Chaypina Pilatoka willarkansapa:

—Aypa soldadukunata pushaychi. Chay machayta atipanaykichi layata kuydaychi.

⁶⁶ Chaypina chay kamachikuk runakuna rirkansapa machaypa punkunta selluchak ama ni pi chay wichkanan rumita suchuchinankunapa. Chaymanta chay soldadukunata sakirkansapa allita kuydanankunapa.

28

Wañushkanmanta Jesus kawsamurkan.

(Mr 16.1-8; Lk 24.1-12; Jn 20.1-10)

¹ Chaymanta samana diya kayantin pakariyakapta Mariya Magdalena suknin Mariyawan rirkansapa chay machayta kawak. ² Chay warmikuna chayaptinkuna allpa sukaman kuyurkan. Tata Diospa angelin sielumanta urayamushpa chay machaypa wichkanan rumita suchuchirkan. Ashuchishpana sawanpi tiyarirkan. ³ Chay angelka sukaman llipyak likidu karkan. Tukuy llachapan nieveshina yurak likidu karkan. ⁴ Chay angelta kawashpankuna chay kuydakuk soldadukuna manchakuywan chukchukushpankuna wañudushina urmarkansapa. ⁵ Chaypina chay angelka chay ishkantin warmikunata willarkansapa:

—Ama manchakuychichu. Ñuka yachani chakatadu kashka Jesusta maskaykanaykichita. ⁶ Payka mananami kaypinachu. Rimashkanshina ñami kawsamushkana. Mash shamuychi kawak maypicha churashkankunata. ⁷ Chaymanta utkakushpaykichi rillarychi kawsamushkanta disipulunkunata willak. Galilea partiman manara riptikichira payka rinka. Kankunapish rillarychi chaypi kawanaykicipa. Chayllatami willashkaykichi.

⁸ Chaypina chay ishkay warmikunaka manchakushpapish sukaman kushikurkansapa. Kushikushpa kallparkansapa Jesuspa disipulunkunata willak. ⁹ Chashna riykaptinkunana Jesuska chay warmikunapi rikurishpa rimachirkansapa. Chaypina paykunaka Jesussta ladunchashpa kumurayashpankuna chakinta abrasashpa sukaman kuyarkansapa. ¹⁰ Chaypina Jesuska willarkansapa:

—¡Ama manchakuychichu! Kunanlla rillarychi wawkinikunata willak Galilea partiman rinankunapa. Chaypimi kawawankasapa.

Soldadukuna llullakushpa rimarkansapa disipulunkuna Jesuspa kuer-punta suwashkankunata.

¹¹ Chaymanta chay warmikuna Jerusalen llaktaman riyaptinkuna chay kuydak soldadukunapish chaypi chayarkansapa. Paykunaka kamachikuk saserdoteckunata willarkansapa tukuy kawashkankunata. ¹² Chaypina chay kamachikukkuna rirkansapa judiyukunapa ansianunkunawan parlanankunapa imatami rurankasapa nishpa. Parlashkankunawasha chay soldadukunata aypa kullkita pagararkansapa. ¹³ Pagarashpa willarkansapa:

—Kankuna tukuy pita willanaykichi tiyan tutapi puñuykaptikichi Jesuspa disipulunkuna kuerpunta suwashkankunata. ¹⁴ Chashna rimaptikichi ichará Pilato rimashkaykichita yachanka. Chaypina kastigashunayaptikichi ūukaykuna willashasapa ama nimata rurashunaykichi.

¹⁵ Llullakuya almitishpankuna chay soldadukunaka aypa kullkita chaskirkansapa. Chaymanta chay parlashkankunata famakurkansapa. Chayrayku kunankaman judiyu runakuna rimansapa disipulunkuna Jesuspa kuerpunta suwashkankunata.

*Jesus disipulunkunata willarkan tukuy mayta rinankunapa yachachikuk.
(Mr 16.14-18; Lk 24.36-49; Jn 20.19-23)*

¹⁶ Chaymanta ūukaykuna chunka suk disipulunkuna Galilea partiman Jesus rimashkan urkuman rirkaniisapa. ¹⁷ Chaypi chayashpaynikuna Jesusta Kawarkanisapa. Payta kawashpa kuyarkanisapa. Sukkuna yuyayniniku-napi rimarkanisapa: “Ichará mana paychu” nishpa. ¹⁸ Chaypina Jesuska ladunchawashpankuna willawarkansapa:

—Tata Dioska churawashka sielupi allpapi kamachikunaynipa. ¹⁹ Chayrayku rillaychi tukuy allpapi kawsak runakunata yachachik paykunapish disipuluynikuna kanankunapa. Chaymanta ūukata kreyiwak runakunata bawtisaychi Tata Diospa shutinpi ūukapa shutinipi Tata Diospa Espiritunpa shutinpi. ²⁰ Chay kreyiwak runakunata tukuy yachachishkaynikunata yachachiychi paykunapish allita kasuwanankunapa. Ūuka tukuy diya kankunawan kasha kay allpa kullunan diyakaman.

JESUKRISTU KAY ALLPAPI KAWSASHKANTA SAN MARKOS KILLKARKAN

*Juan kallarirkan yachachikuyta.
(Mt 3.1-12; Lk 3.1-9, 15-17; Jn 1.19-28)*

¹ Jesukristu Tata Diospa wambran kay allpaman shamurkan kastigumanta salvawananchikunapa. Kunanka chay allima rimanata yachachiykichi.

² Nawpa alli yachachikuk Isaiyas Tata Dios Juanpa willash-kanta killkarkan:

“Nuka suk alli yachachikukta kachasha tukuy runakunata willanankunapa kachamushkayni runata allita chaskinankunapa.

³ Chunlla chakidu pampapi suk runa sinchita yachachikuykan:
‘Señorninchipa suk ñanta allichaychi.

Suk ñanta kuskachaychi chayta purinanca.’ ”

⁴ Chay Isaiyas rimashkanshina suk diya Juanka chunlla pampapi kallarirkan runakunata bawtisayta. Willarkansapa tukuy uchankunata wanashpankuna Tata Diosta kasushpa kawsanankunapa. Willarkansapa bawtisakunankunapa tukuy mana alli rurashkankunamanta Tata Dios perdonanankunapa. ⁵ Chashna Juan yachachikuptin Judea partimanta Jerusalen llaktamanta aypa runakuna rirkansapa uyarik. Chaypina Juanta willarkansapa uchaspasa kanankunata. Chashna willaptinkuna Jordan yakupi Juanka bawtisarkansapa.

⁶ Juanpa llachapan kamellu millwanmanta awadu karkan. Chaymanta sinturan watana karapamanta karkan. Atun marukunata mikurkan. Sachamanta amukunapa mishkinta upyarkan. ⁷ Juanka yachachikushpa willarkansapa:

—Ñukamanta ashwan alli yachachikuk runa washata shamen. Payka ñukamanta tukuy laya ashwan alli yachakmi. Chayrayku mana payshina kashpayni mana animukunichu ni ushutanta kumurayashpa paskapuya.

⁸ Nukaka yakullawanmi bawtisashkaykichi. Paymi Tata Diospa Espiritunwan bawtisashunkichi.

*Jesus bawtisakurkan.
(Mt 3.13-17; Lk 3.21-22)*

⁹ Chay tiempu Jesuska Galilea partipi Nasaret llaktamanta llukshirkan Jordan yakuman rinanpa. Chaypi Juanka Jesusta bawtisarkan. ¹⁰ Jesus yakumanta llukshiyakashpa kawarkan sieluta kicharinakuptin. Chaypina kawarkan Tata Diospa Espiritun iden suk urpaytashina payman urayamuptin. ¹¹ Chashna orana sielumanta Tatan Dios Jesusta willarkan:

—Kanmi kuyanayni wambrayni kanki. Kanmi sukaman kushichiwanki.

*Supay Jesusta llullachinayarkan.
(Mt 4.1-11; Lk 4.1-13)*

¹² Bawtisakushkanwasha suk chunlla chakidu allpaman Tata Diospa Espiritun Jesusta pusharkan. ¹³ Chay chunlla chakidu allpapi manchanapa laya animalkuna tiyarkan. Chaypina chusku chunka diyata Jesus chaypi kaptin supay ladunchashpa llullachinayarkan. Mana nima layapi supayta kasuptin angelkuna Jesusta yanaparkansapa.

*Jesus kallarirkana yachachikuya.
(Mt 4.12-17; Lk 4.14-15)*

¹⁴ Chaymanta kamachikuk Herodes Juanta karselpi churarkan. Chay washa Jesuska Galilea partiman rirkan Tata Diospa alli rimananta yachachikuk. ¹⁵ Willarkansapa:

—Chay ñawpa yachachikuk runakuna rimashkanshina ñami shamushkana. Tata Dios sukaman munan kumanmantapacha mandunpina kawsanaykicipa. Chayrayku tukuy mana alli ruranaykichimanta wanaychi. Tata Dios tukuy willashushkaykichita tukuy shunku kreyiyichi.

*Jesus challwa apik runakunata kayarkan.
(Mt 4.18-22; Lk 5.1-11)*

¹⁶ Chaymanta Galilea kocha mañanpi puriyakashpa Jesuska Pedruta wawkin Andresta kawarkansapa. Paykunaka atun redninkunawan challwakuykarkansapa challwa apik runakuna kashpankuna. ¹⁷ Chaypina Jesuska paykunata willarkansapa:

—Kankuna allita yachankichi challwakunata apiya. Kunanmantapacha ñukata katiwaychi. Katiwaptikichi ñuka allita yachachishkaykichi runakunata yachachinaykicipa paykunapish ñukata kreyiwashpa kawsanankunapa.

¹⁸ Chashna willaptinkuna chay ratulla chay challwakuk runakuna redninkunata sakishpankuna Jesusta katirkansapa. ¹⁹ Chaymanta chay kocha mañanta puriyakashpankuna Jesuska Santiago wawkin Juanwan tantalla kawarkansapa. Chay ishkay runakuna Sebedeopa wambrankuna karkansapa. Suk kanowapi chay ishkay runakuna redninkunata allichaykarkansapa. ²⁰ Chaypina Jesuska chay ishkay runakunataka karyaksapa paywan tantalla purinankunapa. Paykunapish tatanta trabajadorninkunata kanowapi sakishpankuna Jesuswan rirkansapa.

*Jesus supayadu runata alliyachirkan.
(Lk 4.31-37)*

²¹ Chaymanta Kapernaum llaktapi Jesus disipulunkunawan chayarkansapa. Chayashpankuna samana diya kaptin tantanakunankuna wasipi Jesuska yaykurkan. Chaypi yaykushpa runakunata yachachirkansapa. ²² Chay runakuna sukaman almirarkansapa allita kuskanpi sinchi kamachikukshina yachachikuptin. Maña yachachikurkanchu Moisespa killkadunta yachachikuk runakunashina.

²³ Chay tantanakunankuna wasipi tiyarkan suk supayadu runa. Jesus yachachikuptin uyarishpana supay sinchita rimakushpa Jesusta willarkan:

²⁴ —¡Nasaret llaktamanta Jesus! ¿Imapatí ñukaykunaman shamushkanki? ¡Sakiwaysapa! ¿Mana tukuuniyuk ninamanchu kachawanayaykankisapa? Ñuka yachani Tata Diomanta shamudu runa kanaykita.

²⁵ Chashna chay supay willaptin Jesuska piñayashpa willarkan:

—¡Upallay! ¡Kunanlla kay runamanta llukshiy!

²⁶ Chashna Jesus willaptinna chay supayka chay supayadu runata sukaman chukchuchishpa manllaybata kaparikushpa paymanta llukshirkan. ²⁷ Chayta kawashpa chay runakuna sukaman manchakushpangkuna willanakurkansapa:

—¿Ima laya mushuk yachanatati yachachiwaykanchisapa? Kay Jesuska sinchita kamachikushpa atipan supaykunatapish llukshichiyta.

²⁸ Chaypina chay runakuna tukuy llaktakunapi famakurkansapa Jesus sinchita willashpa supaya runamanta llukshichishkanta.

Jesus Pedrupa suedranta alliyachirkan.
(Mt 8.14-15; Lk 4.38-39)

²⁹ Chaymanta tantanakunankuna wasimanta llukshishpa Jesuska Santiagowan Juanwan rirkansapa yaykuk Simonpa Andrespa wasinpi.

³⁰ Chaypi Simonpa suedran kalentorawan unkudu karkan. Chay warmipa familyankuna Jesusta willarkansapa unkudu kananta. ³¹ Chashna willaptinkuna Jesuska unkudutada ladtashpa makinmanta apishpa atarichirkan. Chay ratulla kalentoranka chiriyapurkan. Chaypina chay warmi atarishpa mikunankunata rurashpa kararkansapa.

Jesus aypa unkudu runakunata alliyachirkan.
(Mt 8.16-17; Lk 4.40-41)

³² Chaymanta amusayaykaptin inti yaykuptin Jesusman aypa runakuna unkudu familyankunata pusharkansapa. Paykuna rikchak laya unkuyuk karkansapa. Sukkuna supayadu karkansapa. ³³ Chay wasi punkupi chay llaktapi kawsak runakuna tukuy tantanakurkansapa. ³⁴ Chaypina Jesuska aypa unkudukunata alliyachirkansapa. Supaykunata aypa runakunamanta llukshichipurkansapa. Chay supaykuna yacharkansapa Jesus Tata Diosmanta shamudu runa kananta. Chayrayku Jesus mana munarkanchu nimata willanankunata:

Aypa llaktakunapi Jesus yachachikurkan.
(Lk 4.42-44)

³⁵ Chaymanta pakariptinna chay llaktamanta Jesuska llukshirkan suk chunlla likidu pampapi Tata Dioswan parlak. ³⁶ Chayman riptin Simonka purikmasinkunawan rirkansapa Jesusta maskak. ³⁷ Tarishpa willarkansapa:

—Tukuy runakuna maskashuykansapa.

³⁸ Chaypina Jesuska willarkansapa:

—Akuychi chikan llaktakunaman chaypipish kay alli kushichina rimanata yachachikunaynipa. Ñuka shamushkani aypa runakunata yachachiksapa.

³⁹ Chashna Jesus willashpangkuna Galilea partipi tukuy llaktakunapi yachachikupi purirkan. Tukuy llaktapi tantanakunankuna wasikunapi yachachikurkan. Chaymanta aypa runakunamanta supaykunata llukshichirkan.

Jesus lasaruyak runata alliyachirkan.
(Mt 8.1-4; Lk 5.12-16)

⁴⁰ Suk diya lasaruyak runa Jesusta laduncharkan. Ñawpakninpi kumurayashpa willarkan:

—Maestru, munashpaykika kay unkuyninimanta alliyachiway.

⁴¹ Chashna willaptin Jesuska chay runata llakichirkan. Llankashpa willarkan:

—Ariya, munani alliyachiynikita. Ñami sanuna kanki.

⁴² Chayta willashkan oralla chay runapa tukuy kirinkuna alliyarkan.

⁴³ Chaypina Jesus despidishpa sinchita allita willarkan:

⁴⁴ —Amara ni pita parlachinkirachu ñuka alliyachishkaynita. Rillay saserdoteman pay allita kawashunanpa yachananpa alliyadunachu manachu kanki nishpa. Alliyaduta kawashuptinna Moises killkashkanpi kamachikushkanta allita kasushpa suk ofrendata apay. Chayta apaptiki tukuy runakuna yachankasapa unkuynikimanta alliyashkaykitana.

⁴⁵ Jesus ama ni pita parlachinanpa willaptinpish chay runaka tukuy pita parlachirkan Jesus alliyachishkanta. Chayrayku Jesuska mana atiparkanchu ni maykan llaktapi yaykuya. Llakta washankunallapi mana ni pi kawsanani kiparik. Tukuy maymanta aypa runakuna riksapa Jesusta kawak.

2

Jesus mana kuyuy atipak runata alliyachirkan. (Mt 9.1-8; Lk 5.17-26)

¹ Chaymanta suk diyakuna washan Kapernaum llaktaman Jesuska kashkan rirkana. Suk wasipi kaptin aypa runakuna yachashpankuna rirkansapa kawak. ² Sukaman aypa runakuna niti niti tantanakuptinkuna mana ni pi punkuta yaykuya atiparkannachu. Chaypina Jesus chay runakuna yachachirkan. ³ Chashna yachachikuykaptin chusku runakuna suk mana kuyuy atipak runata kamillapi pushamurkansapa. ⁴ Chay wasipi aypa runakuna tiyaptin paykunaka mana yaykuya atiparkansapachu. Chayrayku wasi sawaman chay unkuduta kamillanpi pusharkansapa. Chaypina tejakunata Jesuspa kuskunpi surkushpankuna chay uchkuta chay unkuduta kamillanpi urayachirkansapa. ⁵ Chay yanapak runakuna allita tukuy shunku kreyirkansapa Jesus alliyachinanta. Jesus kreyinankunata yachashpa chay unkuduta willarkan:

—Wambrayni, uchaykikunamanta perdonayki.

⁶ Chaypina Moisespa killkadunkunata yachachikuk runakuna chaypi ti-yaridu Kashpankuna shunkunkunallapi rimarkansapa:

⁷ —¿Imapatí kay runaka chayta riman? Kay unkuduta willashpa uchankunata perdonanarpa Tata Diosta piñachiyan iden Tata Diossinha kanayashpa. Tata Diosllami atipan runakunapa uchankunata perdonayta.

⁸ Jesuska chay ratulla yacharkan shunkunkunapi yuyashpa washanchakanankunata. Chayrayku tapurkansapa:

—¿Imapatí kankuna washanchawaykankichi? ⁹ Ñuka kay unkuduta ishkay layata atipayman willayta. Munashpayni willayman: “Uchaykikunamanta perdonayki.” Chaymanta willayman: “Atarishpa kamillaykita apashpa rillay.” ¹⁰ Kunanlla kay unkuduta alliyachisha yachanaykichiha sielumanta shamudu runa kanaynita. Alliyachiptini yachankichi atipanaynita tukuy runakunapa uchankunata perdonayta.

Chashna rimashpa Jesuska chay mana kuyuy atipak runata willarkan:

¹¹ —Kanta willayki, atarimuy. Kamillaykita apashpa wasikiman rillay.

¹² Chashna Jesus willaptin chay unkudu runaka atarimurkan. Chay aypa runakuna kawaykaptinkuna kamillanta apishpa wasinman rirkana. Chayta kawashpa tukuy runakuna sukaman almirashpankuna Tata Diosta alabarkansapa. Willarkansapa:

—¡Manami niman suk kuti kay laya almirana ruranata kawashkanchis-apachu!

Jesus Levita willarkan katinanpa. (Mt 9.9-13; Lk 5.27-32)

¹³ Chaymanta manllayba kocha mañanman Jesuska kashkan rirkana. Chaypi aypa runakuna ladunchaptinkuna yachachirkansapa. ¹⁴ Chaymanta puriyashpa Alfeopa wambran Levita kawarkan. Levika romano awtoridarkunapa kullki kobrauk runa kashpa tiyariyu karkan maypicha kullkiti kobraukusapa. Jesuska payta kawashpa willarkan:

—Ñukata katiway.

Chashna willaptin Levika atarishpa Jesusta katirkan.

15 Suknin diya Levipa wasinpi Jesuska mikuykarkan. Aypa runakuna payta katishpunkuna chaypi karkansapa. Levipa kobrakukmasinkunawan mana alli rurak runakuna chay mesallapi Jesuswan disipulunkunawan tantalla mikuykarkansapa. **16** Chaypina fariseo runakuna kawarkansapa Jesusta mana alli rurak runakunawan kullki kobrakukkunawan tantalla mikuykaptin. Chayta kawashpangkuna disipulunkunata willarkansapa:

—¿Imapatí yachachishuknikichi Jesuska kullki chaskikukkunawan uchasapa runakunawan tantalla mikuykan?

17 Jesuska chayta uyarishpa willarkansapa:

—Mash uyariwaychi. Únkudu runa ampikninta sukan maskan aliyachinanpa. Sanu runa mana nima ampikninta maskanchu sanu likidu kashpa. Ñukaka shamushkanimi uchasapa runakunata kayak uchankunata sakishpa katiwanankunapa. Manamí shamushkanichu alli yuyanakuk runakunata kayak.

Runakuna amañaksapa mana mikushpa Tata Diosta kuyayta.

(Mt 9.14-17; Lk 5.33-39)

18 Chaymanta Juan Bawtistapa disipulunkuna fariseokunapa disipulunkunawan amañaksapa churadu diyakuna mana nimata mikuya nimata upayta. Suk diya mana mikuptinkuna kawashpangkuna suk runakuna Jesusta tapurkansapa:

—¿Imapatí disipuluykikuna mana mikunata sasinsapa? Juanpa disipulunkunawan fariseokunapa disipulunkuna amañansapa churadu diyakuna mana nimata mikuya.

19 Chashna tapuptinkuna Jesuska aynirkansapa:

—Funsapi invitadu runakuna noviowan tantalla kashpangkuna mana llakinsapachu. Novio paykunawan kaptin rikchak layata mikunsapa upyansapa. **20** Funsia washanna novio sakiptinkunana chaypira llakishpa churadu diyakuna mana mikunkasapanachu.

21 Chaymanta Jesus ashwanta entiendichinayashpa willarkansapa:

—Manami ni pi mawka llachapata tipi mushuk telawan remiendanmanchu. Chay llachapata takshaptin mushuk tela kintikushpa mawka llachapata ashwanta llikichin. **22** Chaymanta mana ni pi mawka kapachupi llullu vinuta churanmanchu. Chaypi churaptin llullu vinu timbushpma mawka kapachutha pachyachin. Kapachu llikikuptin vinupish ichakun. Llikidu kapachupish mana nimapa allinachu. Chayrayku llullu vinuta mushuk kapachupi churansapa.

Samana diya Jesuspa disipulunkuna triguta tipirkansapa.

(Mt 12.1-8; Lk 6.1-5)

23 Chaymanta suk samana diya Jesuska disipulunkunawan suk chakra chawpinta pasarkansapa. Chayta rishpangkuna disipulunkunaka tipi triguta pallarkansapa.

24 Chaypina fariseo runakuna Jesusta willarkansapa:

—Mash kaway. ¿Imapatí samana diya kaykaptin disipuluykikuna triguta tipiykansapa? Moisespa killkadunpi willawanchisapa samana diya mana nimata pallananchikunapa.

25 Chashna willaptinkuna Jesuska aynirkansapa:

—¿Manachu kankuna leyishkankichi ñawpa awilunchikuna David rurashkanta? Payka purikmasinkunawan purishpangkuna sukan maskan yarkarkansapa. **26** Abiatar kamachikuk saserdote kaptin payka yaykurkan maypicha tantanakuksapa Tata Diosta kuyanankunapa. Chaypi Davídka Tata Diosllapa churadu pankunata mikurkan. Chaymanta

purikmasinkunatapish chay pankunata kararkansapa. Chay laya pankuna saserdotekekunallapa karkan. Chay laya panta David mikushpapish mana uchallikurkanchu.

²⁷ Chaymanta Jesuska willarkansapa:

—Mash uyariwaychi. Tata Diospa samana diyata rurarkan runakuna samanankunapa. Mana runakunatachu rurarkan samana diya tiyashkan-rayku. ²⁸ Ñuka sielumanta shamudu runa willaykichi samana diya imakunami alli ruranaykichipa imakunami mana allichu ruranaykichipa.

3

Jesus kaspirayadu makiyuk runata alliyachirkan.

(Mt 12.9-14; Lk 6.6-11)

¹ Chaymanta samana diya kaptin Jesuska kashkan yaykurkan tanta-nakunankuna wasipi. Chaypi tiyarkan suk kaspirayadu makiyuk runa.

² Chaypina Jesusta chiknik runakuna chapaykarkansapa chatanankunapa. Kawanayarkansapa samana diya kaptin chay runata alliyachinkachu man-achu nishpa. Paykunaka awtoridarkunapi Jesusta sukaman chatana-yarkansapa samana diya unkuduta alliyachiptin.

³ Chaypina Jesuska chay kaspirayadu makiyuk runata willarkan:

—Rillay chay runakunapa chawpinkunapi shayarik. ⁴ Chay runa chawpinkunapi shayariptinna Jesuska chay chatanayak runakunata willarkansapa:

—Moisespa killkadunpi ¿imatati willawanchisapa? ¿Willawanchisapachu samana diya allita mana allita rurananchikunapa? ¿Samana diya suk runata alliyachinchimanchu? ¿Suk runata kawapayanchimanchu wañunarpa?

⁵ Chashna tapuptinkuna chay runakuna mana nimata aynirkansapachu. Mana nimata ayniptinkuna Jesuska sukaman piñakushpa tukuya chaprakansapa. Sukaman llakirkan sinchi shunku kaptinkuna. Chaypina chay kaspirayadu makiyuk runata willarkan:

—¡Makikita chutachiy!

Chay runaka Jesusta kasushpa kaspirayadu makinta chutachiptin alliyarkan. ⁶ Jesus chay runata alliyachishkan-rayku fariseo runakuna piñakushpa chay tantanakunankuna wasimanta llukshirkansapa. Paykunaka rirkansapa Herodespa partidun runakunawan parlak Jesusta wañuchinankunapa.

Kocha mañanpi Jesus aypa runakunata alliyachirkansapa.

⁷ Chaymanta Jesuska disipulunkunawan rirkana kocha mañanman. Galilea partimanta aypa runakuna Jesusta katirkansapa. ⁸ Chaypina Jesus almi-rana milagrukunata rurashkankunata yachashpankuna aypa runakuna rirkansapa kawak. Judea partimanta, Jerusalen llaktamanta, Idumea partimanta, Jordan yaku chimbamanta, Tiro llaktamanta, Sidon llaktamanta rirkansapa. ⁹ Aypa runakuna katiptinkuna Jesuska disipulunkunata willarkansapa suk kanowata prontapunankunapa ama payta nit-nankunapa. ¹⁰ Aypa runakunata alliyachishkan-rayku rikchak laya unkuyuk runakuna alliyayanayashpa Jesusta nitirkansapa llankanankunapa.

¹¹ Supayadu runakuna Jesusta kawashpankuna ñawpaknippi kunkurikushpankuna sinchita rimashpa willaksapa:

—Kanmi kanki Tata Diospa chaylla wambran.

¹² Chashna willaptinkuna Jesuska sinchita willarkansapa ama ni pita willanankunapa Tata Diospa wambran kananta.

*Jesus chunka ishkay disipulunkunata akllarkan.
(Mt 10.1-4; Lk 6.12-16)*

¹³ Chaymanta Jesus suk urkuman rishpa suk runakunata willarkansapa paywan tantalla rinankunapa. ¹⁴ Paykunamanta chunka ishkayta akllarkan paywan tantalla purinankunapa. Paykunata akllarksapa rinankunapa yachachikuk. ¹⁵ Chaypina willarkansapa Tata Dios yanapaptinkuna runakunamanta supaykunata llukshichinankunapa. ¹⁶ Chay chunka ishkay aklladukunapa shutinkuna kaykunami: Sukka karkan Simon. Paytaka Jesus shutiyachirkhan Pedru. ¹⁷ Chaymanta Sebedeopa ishkay wambrankuna Jakobowan Juan karkansapa. Paykunata Jesus shutiyachirkansapa Boanerges. Chay shutika riman “Troynoshina Sinchi Rimakuk.” ¹⁸ Suk aklladukuna karkansapa Andres, Felipi, Bartolome, Mateo, Tomas, Alfeopa wambran Santiago, Tadeo, Simon. Chay Simonka romano gobierntuta mana kasunayak runa karkan. ¹⁹ Chaymanta karkan Judas Iskariote. Payka suk tiempu washa rasantikurkan wañuchinankunapa.

Runakuna Jesusta mana kreyishpankuna rimarkansapa supay yanapananta.

(Mt 12.22-32; Lk 11.14-23; 12.10)

²⁰ Chaymanta Jesuska suk wasipi yakyuptin kashkan aypa runakuna katirkansapa. Sukaman tantanakuptinkuna mana nima Jesus nima disipulunkuna atiparkansapachu mikuyta. ²¹ Chayta yachashpankuna Jesuspa ayllunkuna rirkansapa pushamuk. Pushanayarkansapa runakuna rimaptinkuna Jesus dementuyashkanta.

²² Jerusalen llaktamanta Moisespa killkadunta yachachikuk runakunapish Jesusman riykarkansapa. Paykunaka Jesusta yuyashpa rimarkansapa:

—Supaykunapa kamachikuknin Belsebu kay runata yanapaptin atipan runakunamanta supaykunata llukshichiyyta.

²³ Chashna yuyak runakunata kayashpankuna Jesuska suk ejempluta rimashpa yachachirkansapa:

—Mash uyariwaychi. Satanas mana atipanchu kikinlla llukshichinakuyta. ²⁴ Suk llaktapi kawsak runakuna chikninakushpa makanakushpankuna kikinkunapura kulluchinakunsapa. ²⁵ Chaymanta suk wasillapi kawsak runakuna chikninakushpa makanakushpankuna chayta chayta anchunsapa. ²⁶ Chashnami supaykunapish kikinkunapura karkunakushpankuna wakllichinakunsapa. Kikinkunalla kulluchinakunmansapa.

²⁷ Mash uyariwaychi. Mana ni pi suk sinchi runapa wasinmanta nimata apaya atipanmanchu manara payta allita watashpara. Chay sinchi runata watashpara tukuy laya tiyapunankunata atipanman kichuyta.

²⁸ Mash allita uyariwaychi. Tata Dioska runakunata tukuy uchankunamanta perdonankasapa. Tata Diosta piñachishpa mana alli rimashkankunatapish perdonankasapa. ²⁹ Chaymanta Tata Dios mana kutin perdonankachu paypa Espiritunta washanchashpa sakra mana alli kananta rimaptinkuna. Chay laya runakunata Tata Dios mana kutin perdonankasapachu.

³⁰ Jesus chayta willarkansapa chay runakuna llullakushpa rimaptinkuna supayadu kananta.

*Jesuspa maman wawkinkunawan rirkansapa paywan parlak.
(Mt 12.46-50; Lk 8.19-21)*

³¹ Jesus chay runakunata yachachiykaptin paypa mamanwan wawkinkuna chay wasiman rirkansapa. Paykunaka Jesuswan

parlanayashpangkuna wasi washallamanta kayachirkansapa. ³² Chaypina ladunpi tiyarik runakuna Jesusta willarkansapa:

—Mamayki wawkikikunawan washapi maskamushuykansapa.

³³ Chaypina Jesuska willarkansapa:

—¿Pítí mamaynka? ¿Pikunatí wawkinikunaka?

³⁴ Chaymanta ladunpi tiyarik runakunata kawashpa willarkansapa:

—Kaykunami mamayni. Kaykunami wawkinikuna. ³⁵ Kankuna Tata Diospa munananta rurashpa kawsashpaykichi ñukapa wawkinikuna, paninikuna, mamaynikuna kankichi.

4

Jesus yachachikurkan tarpukuk runapa ejemplunta.

(Mt 13.1-9; Lk 8.4-8)

¹ Chaymanta suknin diya Jesuska kashkan rirkan kocha mañanpi yachachikuk. Aypa runakuna chaypi tantanakuptinkuna Jesuska suk kanowapi yaykurkan tiyarik. Tukuy chay runakuna kocha mañanmanta uyarirkansapa. ² Paykunata rikchak laya ejemplukunata parlachishpa yachachirkansapa. ³ Willarkansapa:

—Mash uyariwaychi. Suk runa rirkan murukunata tarpuk. ⁴ Chaypina murukunata shikwashpa tarpuptin sukkuna ñanpi urmarkansapa. Piškil-lukuna chay ñanpi urmadu murukunata mikurkansapa. ⁵ Suk murukuna rumisapa allpapi urmarkansapa. Chay murukuna allpa sawallapi kashpa utka shurayarkansapa allpa mana rakta kaptin. ⁶ Chay allpa rumisapa kaptin chay murukuna mana atiparkansapachu sapichakuyta. Chayrayku rupay nanaptin chakirkansapa. ⁷ Chaymanta suk murukuna kashasapa allpapi urmarkansapa. Chaypina kashakuna alli murukunamanta ashwanta wiñashpa chay wiñaykak murukunata makarkansapa. Chayrayku mana nimata wayuchakurkansapachu. ⁸ Chaymanta suk murukuna allima allpapi urmarkansapa. Chaypina wiñashpangkuna sukaman aypata wayuchakurkansapa. Suk murukuna kimsa chunkata mirarkansapa. Sukkuna sokta chunkata mirarkansapa. Sukkuna pachakta mirarkansapa.

⁹ Chay ejempluta parlachikushkanwasha Jesuska willarkansapa:

—Kankuna kay yachachishkaynita uyarishpaykichika allita rinrillikuychi.

Jesus disipulunkunata willarkan imaraykumi ejemplukunawan yachachikurkan nishpa.

(Mt 13.10-17; Lk 8.9-10)

¹⁰ Chaymanta aypa runakuna Jesusta sakiptinkuna ladunpi kak runakuna chay chunka ishkay disipulunkunawan tapurkansapa:

—Chay ejempluta yachachiwashpaykisapa ¿imatáti yachachiwankisapa?

¹¹ Chaypina Jesus aynirkansapa:

—Kankunallata Tata Dios yachachishunkichi paypa mandunpi yaykunaykicipa. Manara yachachishushkaykichita kunan sukaman allitana yachachishuykankichi. Chay mana kreyiwak runakunata Tata Dios ejemplukunallawan yachachinsapa. ¹² Ejemplukunallata yachachishpa paykunata yachachinsapa kawashpapish mana kawakuk runakunashina kiparinankunapa. Uyarishpapish mana entiendinsapachu. Mana uchankunata wanananayaptinkuna Tata Dioska manami perdonankasapachu.

Jesus tarpukuk runapa ejemplunta entiendichikurkan.

(Mt 13.18-23; Lk 8.11-15)

¹³ Jesuska willarkansapa:

—Mana kay ejempluta entiendishpaykichika *ξimashnatí* entiendinkichi chikan ejemplukunata? ¹⁴ Mash uyariwaychi. Tata Diospa rimananta yachachikuk runaka iden chay murukunata tarpukuk runashinami. ¹⁵ Suk runakuna sinchi shunkuyuk kashpa iden ūnapi chakidu sarudu allpashinami. Chay laya runakuna Tata Diospa rimananta uyariptinkuna supay shamushpa chay uyarishkankuna rimanata kunkachin.

¹⁶ Chaymanta suk runakuna Tata Diospa rimananta kushikushpa uyarinsapa. Chay laya runakunaka iden rumisapa allpashinami. ¹⁷ Rumisapa allpapi urmadu murukuna mana allita sapichakuyta atipansapachu rumi sawanpi kashpankuna. Chay laya runakuna nanayta llakita mallishpankuna mana unaypichu Tata Diospa rimananta sakinsapa. Runamasinkuna chiknishpa asichtiptinkuna manana kreyikunsapanachu.

¹⁸ Chaymanta suk runakuna Tata Diospa rimananta uyarishpa kunalla chaskinsapa. Chay laya runakunaka iden kashasapa allpashinami. ¹⁹ Paykunaka Tata Diospa rimananta allita yachashpapish ashwanta kulkuyta munansapa. Sukman munashpankuna tukuy layayuk kayta mana munansapanachu Tata Diospa rimananta uyariyta. Chayrayku mana nimata wayuchakunsapanachu.

²⁰ Chaymanta suk runakuna Tata Diospa rimananta uyarishpa tukuy shunku kreyikunsapa. Paykunaka Tata Diosta kuyashpa kawsansapa. Chay laya runakunaka iden chay alli allpapi wayuchakuk murukunashinami. Sukkunaka kimsa chunka murukunata wayuchakukshinami. Sukkunaka sokta chunka murukunata wayuchakukshinami. Sukkunaka pachak murukunata wayuchakukshinami.

Jesus alkusapa ejemplunta yachachikurkan.
(Lk 8.16-18)

²¹ Jesuska ejemplukunawan yachachikuylapi katirkan:

—Suk alkusata apichishpa mana ni pi suk kajonwan wickashpa nima kawitu sikinpi churashpachu pakanchiman. Apichidu alkusata altupi churanchi tukuyta lusichinpana. ²² Chashnashina Tata Dios tukuy runakuna upallalla rimashkankunata pakallalla rurashkankunata yachan. Chayta tukuy runakunata riksichinkasapa. ²³ Kay yachachishkaynita uyarishpaykichika allita rinrillikuychi.

²⁴ Chaymanta Jesus willarkansapa:

—Kay yachachishkaynukunata allita kasushpa kawsaychi. Kankuna allita mana allita runamasikichita rurashkaykichishinata Tata Dios kankunatapish rurashunkichi. Kankuna runamasikichita ima tiyapushuknikichita kuptikichi Tata Dios ashwanta kushunkichi. ²⁵ Kankuna allita Tata Diospa rimananta chaskiptikichi payka yanapashunkichi ashwan allita entiendinaykichipa. Mana allita Tata Diospa rimananta chaskiptikichi payka chay tipi yachashkaykichita kichushunkichi.

Jesus yachachikurkan wiñak murupa ejemplunta.

²⁶ Jesuska yachachikuylapi katishpa willarkansapa:

—Kay ejempluta parlachiykichi yachanaykichipa imashnami Tata Diospa mandunpi kawsankichi nishpa. Suk runa murukunata tarpuk rin. ²⁷ Chay runaka mana yachanchu imashnami wiñan nishpa. Puñuykaptin rikchadu kaptinpish diyapi tutapi chay murukunaka wiñayan. ²⁸ Chay murukuna allpapi kashpa kikinllamanta wiñan. Kallarin shurayamushpa wiñayta. Atunyashpa masetayan. Chaymanta murukuna pukunsapa. ²⁹ Allita pukuptinkuna pallana tiempu chayamuptin chay runaka pallan.

Jesus yachachikurkan mostasa murupa ejemplunta.
(Mt 13.31-32; Lk 13.18-19)

³⁰ Chaymanta Jesuska chay runakunata kashkan yachachirkansapa:
 —Suk ejempluta parlachiykichi yachanaykichipa imashnami Tata Diospa mandunpi kawsankichi nishpa. ³¹ Kankuna Tata Diospa mandunpi kawsashpaykichi takshasillu mostasa murillukunashina kankichi. Chay mostasa murillukuna rikchak laya murukunamanta ashwan kishnisillu.

³² Suk runa chakranpi tarpuptin chay murilluka allita wiñan. Kishnisillu kashpapish chay murillu tuküy kiwakunamanta ashwan atunta wiñan. Iden suk atun kaspishina sukaman ramachakun. Chay ramankunapi pishkil-lukuna wasinkunata ruransapa.

Jesus ejemplukunata parlachikushpa yachachikurkan.
(Mt 13.34-35)

³³ Jesus rikchak laya ejemplukunawan parlachikushpa chay runakunata yachachirkansapa. Paykuna entiendinankuna layallata yachachirkansapa.

³⁴ Mana ejempluwanka mana yachachikukchu. Disipulunkunallata tukuy yachachikunanta allita entiendichirkansapa.

Jesus sinchi wayrata sampayachirkan.
(Mt 8.23-27; Lk 8.22-25)

³⁵ Chay diyalla amusayaykaptin Jesuska disipulunkunata willarkansapa:
 —Akuychi chimbaypachi kay kochata.

³⁶ Chashna willaptinkuna disipulunkunaka tukuy chay runakunata sakishpankuna chay tiyarishkan kanowallapi Jesusta pusharkansapa. Suk runakuna chikan kanowakunapi katirkansapa. ³⁷ Chashna chimbaykaptinkuna kallarirkan sukaman wayrayta. Chay wayrawan yakuka sukaman olasyashpa yakallapa kanowataka untachirkan. ³⁸ Chay yaku wayrawan kuyuykaptinpish Jesuska kanowa popa partipi sawananta churashpa puñuykarkan. Chaypina disipulunkunaka rirkansapa rikchachik. Sukaman manchakushpankuna willarkansapa:

—Maestru ¿imapati mana yanapawankisapa? ¡Ñami sipikunchisapana!

³⁹ Chaypina Jesus atarimushpa wayrata yakuta sinchita willarkan:

—¡Sampay! ¡Amana wayraynachu!

Chayta willaptin wayra sampayarkan. Yaku kasillayarkan.

⁴⁰ Jesuska sinchi wayrata sampayachishkanwasha disipulunkunata willarkansapa:

—¿Imapati sukaman manchakunkichi? ¿Ariya manarachu allita kreyiwan-kichi?

⁴¹ Chaypina disipulunkuna sukaman manchakushpankuna tapunakurkansapa:

—¿Ima laya runatiya kayka? Rimashpalla wayrata yakuta kasillayachin.

5

Jesus supayadu runata alliyachirkan.
(Mt 8.28-34; Lk 8.26-39)

¹ Chaymanta chay manllayba kochata chimbashpankuna Gadara llak-tapi Jesus disipulunkunawan chayarkansapa. ² Jesus kanowamanta lluk-shiykaptin suk supayadu runa tinkurkan. Chay runaka machaykunapi maypicha wañudukunata pampashkankunapi kawsak. ³ Supayadu kaptin mana ni pi atipaksapachu nima kadenawan watayta. ⁴ Aypa kuti llaktamasinkuna makinta chakinta kadenawan watarkansapa. Chaykunata mana nimatashinalla tipik. Mana ni pi chay supayadu runata atipakchu

sinchichiyya. ⁵ Diyapi tutapi chay runaka urkukunapi wañudukuna pampanankuna machaykunapi kaparikushpa purik. Kikinlla rumikunawan ñutuchinakushpa purik. ⁶ Chaypina chay runa Jesusta kawashpa kallparkan tinkuk. Ñawpkninpi kunkurikushpa sinchita rimashpa willarkan:

⁷ —¡Kanka sielupi kawsak Tata Diospa wambran kashpayki ama ñukata amichiwaychu! ¡Tata Diospa shutinpi roygayki ama padescihiwanaykipa!

⁸ Chay runa chayta willarkan yachashpa Jesus supaykunata llukshichinayananta. Chashna chay runa willaptin Jesuska tapurkan:

⁹ —¿Ima shutití kanki?

Chaypina payka aynirkan:

—Aypa supaykuna kanisapa chayrayku shutinika Legion.

¹⁰ Chaypina chay supaykunaka Jesusta sukaman roygarkansapa ama chay llaktamanta ashwan karuman kachanankunapa. ¹¹ Mana karupichu chay urku ladunllapi aypa kuchikuna mikukuykarkansapa. ¹² Chaypina chay runapi kawsak supaykuna Jesusta roygarkansapa:

—Kachawaysapa rinayníkunapa chay kuchikunapi yayuk.

¹³ Chaypina Jesus rinankunapa almitiptin paykunaka chay runamanta llukshishpankuna rirkansapa chay yaka ishkay waranka kuchikunapi yayuk. Chaypina chay kuchikuna kallpasshpankuna urkumanta sinkushpankuna yakupi sipikurkansapa.

¹⁴ Chay kuchikuna kuydak runakuna chayta kawashpa sukaman manchakurkansapa. Kallparkansapa llaktapi chakrakunapi kawsak runakunata tukuy kawashkankunata parlachikuk. Chayta uyarishpankuna tukuy runakuna rirkansapa chay willashkankunata kawak. ¹⁵ Chayashpana tarirkansapa Jesuspa ladunpi chay aypa supayuk kashka runata tiyariduta. Payka alli llachapakudu sanuyaduna karkan. Payta kawashpankuna suka-man manchakurkansapa.

¹⁶ Chaypina Jesus rurashkanta kawak chay chayrak shamushka runakunata tukuy kawashkankunata parlachirkansapa. ¹⁷ Chayta uyarishpankuna Gadara partipi kawsak runakuna Jesusta roygarkansapa chayllamanta kutinapan.

¹⁸ Chaypina Jesus kanowaman riykaptin chay sanuyadu runaka roygarkan pushananpa. ¹⁹ Chashna roygaptin Jesus mana pushanayashpa willarkan:

—Kutiwasikiman tukuy ayluykikunata parlachinaykipa Tata Dios llakichishushpa sanuyachishushkanta.

²⁰ Chashna Jesus willaptinna chay runaka kushikuypuru Dekapolis partipi tukuy llaktakunapi parlachikuypi purirkana. Willarkansapa Jesus sanuyachishuskanta. Chayta uyarishpankuna tukuy runakuna sukaman almirarkansapa.

Jesus yawar unkuyuk warmita alliyachirkan. Chaymanta Jairopa shipash-ninta kawsachimurkan.

(Mt 9.18-26; Lk 8.40-56)

²¹ Chaymanta Jesus kanowapi kochata chimbaptin aypa runakuna tantanakurkansapa. ²² Jesus kocha mañanllapi kaptin suk runa Jairo laduncharkan. Jairoka tantanakunankuna wasipi kamachikuk runa karkan.

²³ Payka Jesuspa ñawpkninpi kunkurikushpa sukaman roygarkan:

—Chaylla shipashnini wañunayakan. Aku wasiniman. Kan llankaptiki shipashnininika alliyashpa kawsanka.

²⁴ Chashna willaptin Jesuska chay kamachikuk runata katirkana. Sukaman aypa runakunapish niti niti katirkansapa.

²⁵ Chay aypa nitik runakunapa chawpinkunapi suk unkudu warmi karkan. Chay warmika chunka ishkay watatana yawar unkuywan kawsarkan. ²⁶ Tukuy kullkintana tukucharkan doktorkunata katishpa. Mana ni pi alliyachiyya atipapit ashwanta anchayarkan. ²⁷ Chay unkudu warmika uyarirkan Jesus unkudukunata alliyachiyyakananta. Chayrayku washanmanta ladunchashpa llachapan mañanta llankarkan. ²⁸ Payka yuarkan: “Llachapanllatapish llankaptini alliyachiwanka.” ²⁹ Chashna llankashkan ratulla yawarnin tipikuptin alliyaduna mallinakurkan. ³⁰ Suk unkuduta alliyachishkananta mallishpa Jesus washanta chapashpa tapukurkan:

—¿Piti llachapaynita llankashkankichi?

³¹ Chashna tapukuptin disipulunkuna willarkansapa:

—Aypa runakuna laduykipi sukaman nitishushpa kayta chayta tankanakushpankuna llankashuykansapa. ¿Imapatí tapuwankisapa “piti llankawashka” nishpa? ³² Chashna willaptinkunapish Jesuska supta supta chaparkansapa yachanayashpa maykanmi alliyanayashpa llankashka nishpa. ³³ Chaypina chay warmika yachashpana sanuyadu kananta sukaman manchakuywan chukchukushpa rirkana Jesuspa ñawpkninpi kunkurikuk. Chaypina Jesusta willarkan alliyashkanta.

³⁴ Chashna chay warmi willaptinna Jesuska willarkan:

—Wambrayni, allita ñukata kreyiwashkaykirayku alliyachishkayki. Kunanka kushikushpa wasikiman alliyaduna kutiy.

³⁵ Jesus chay warmiwan parlaykaptinllara Jairopa wasinmanta suk runakuna chayarkansapa willak:

—Wambraykika ñami wañushkana. ¿Imapanatí wasikiman Jesusta pushanki?

³⁶ Chayta uyarishpapish Jesuska Jairota willarkan:

—Ama manchakuychu. Tukuy shunku ñukata kreyiway.

³⁷ Jesuska mana munarkanchu katiyakak runakuna paywan rinankunapa. Pedruwan Santiago paypa wakin Juanllata pusharkan. ³⁸ Chaypina Jairopa wasinpi chayashpa uyarirkan sukaman turbakushpankuna aypa runakuna kaparishpa wakakuykaptinkuna. ³⁹ Wasipi yaykushpa paykunata willarkansapa:

—¿Imapatí sukaman turbakushpa sinchita wakakuykankichi? Kay shipashka puñuykanmi. Manami wañuduchi.

⁴⁰ Chashna willaptinkuna chay wakakuk runakuna Jesusta mana kreyishpankuna asichirkansapa. Jesuska tukuy paykunata llukshichishpankuna pushashkan disipulunkunallawan shipashpa tatan mamanwan yaykurkan chay kuartupi. ⁴¹ Chaypina wañuduta makimanta apishpa willarkan:

—Talita kumi.

Chay rimanapi riman: “Wambrayni, atarimuy.”

⁴² Chashna Jesus willaptinna chay chunka ishkay watayuk shipashka atarimushpa purirkana. Chay runakuna kawsamuduta kawashpankuna sukaman almirarkansapa. ⁴³ Chaypina Jesuska paykunata sukaman willarkansapa ama ni pita parlachinankunapa chay shipashta wañushkanmanta kawsachimushkanta. Chaymanta willarkansapa chay shipashta karanankunapanapa.

¹ Chaymanta Jesuska chay llaktamanta llukshishpa kikinpa llaktanpi chayarkan. Disipulunkuna paywan tantalla rirkansapa. ² Chaypina samana diya kaptin Jesuska rirkan tantanakunankuna wasipi yachachikuk. Allita yachachikuptin tukuy runakuna sukaman almirashpangkuna tapunakurkansapa:

—¿Maypití kay runaka tukuy layata yachakushka? ¿Pití yachachishka chay layata yachananpa? ¿Imashnatí yachan almirana milagrukunata rurayta? ³ ¿Manachu kay runaka karpinterupa wambran? Paypa mamanka Mariyami. Chaymanta wawinkunkuna Jakobo, Jose, Judas, Simon. ¿Manachu paninkunapish llaktamasinchikunalla?

LLaktamasinkuna kaptin Jesusta mana kreyinayarkansapachu. ⁴ Chaypina Jesuska willarkansapa:

—Tata Diospa rimananta yachachikuk runa chikan llaktakunapi yachachikuptin sukaman allita uyarinapa. Kikinpa llaktanpi yachachikuptin mana nima llaktamasinkuna nima ayllunkuna kreyinsapachu.

⁵ Mana kreyishkankunarayku kikin llaktanpi Jesuska mana aypa almirana milagrukunata rurarkanchu. Suk runakunallata alliyachirkir llankashpangkuna. ⁶ Sukaman almirarkan llaktamasinkuna mana kreyiptinkuna. Chaymanta Jesuska tukuy llaktan ladupi llaktillukunapi yachachikupi purirkana.

*Jesus disipulunkunata kacharkansapa yachachikuk rinankunapa.
(Mt 10.5-15; Lk 9.1-6)*

⁷ Suknin diya chunka ishkay disipulunkunata tantanachishpa ishkaymanta ishkaymanta kacharkansapa. Atipachirkansapa tukuy laya supaykunata runakunamanta llukshichinankunapa. ⁸ Paykunata willarkansapa ama nimata apashpa rinankunapa. Willarkansapa ama nima pikshata nima mirkapankunata nima kullkita apanankunapa. Willarkansapa suk bastonninllata apanankunapa. ⁹ Willarkansapa ushutanllawan sawankunapi llachapallawan rinankunapa. ¹⁰ Chaymanta willarkansapa:

—Maykan llaktapi chayashpaykichi suk runapa wasinpi kipariyichi chikan llaktaman rinaykichi diyakaman. ¹¹ Ichara chayashkaykichi llaktapi kawsak runakuna wasinkunapi mana chaskishunayankichimanchu. Paykuna mana chaskishuptikichi mana uyarishuptikichi chakikichi susyata tapsishpa chay llaktamanta llukshiychi. Chayta rurashpa willaykankichi paykunallapi uchankuna kiparinanta.

¹² Chashna Jesus kachaptinkunana disipulunkunaka llaktan llaktan yachachikupi purirkansapa. Yachachikurkansapa uchankunata wanashpa Tata Diosta kasushpa kawsanankunapa. ¹³ Chaymanta runakunamanta aypa supaykunata llukshichirkansapa. Rikchak laya unkuyuk runakunata alliyachirkansapa tipi wirawan tupashpangkuna.

*Kamachikuk Herodes Juan Bawtistata wañuchichirkana.
(Mt 14.1-12; Lk 9.7-9)*

¹⁴ Chay tiempu aypa runakuna sukaman famakurkansapa Jesus aypa almirana milagrukunata rurashkanta. Chay kamachikuk Herodes chayta uyarishpa rimarkan:

—Ichará chay Jesuska wañuchichishkayni Juan. Paychá wañushkanmanta kawsamushka. Chayrayku atipan almirana milagrukunata rurayta.

¹⁵ Suk runakuna rimarkansapa:

—Kay runaka ñawpa alli yachachikuk Eliyasmí. Sukkuna rimarkansapa:

—Kay runaka ñawpa yachachikuk runakunashinami.

¹⁶ Chayta uyarishpa Herodeska rimarkan:

—Kay runaka Juanmi. Ñuka payta wañuchichishkani umanta tipichipushpa. Kunanka wañushkanmanta kawsamushkana.

¹⁷ Herodes chayta rimarkan Juanta wañuchichishkanta yuyashpa. Ñawpaka Juanta kadenakunawan watachishpa karselpi wichkachirkhan. Chayta rurarkan warmin Herodiyas munaptin. Herodiyaska ñawpaka wawkin Felipepa warmin karkan. Herodeska chay kuñadantaka warminpa apirkhan.

¹⁸ Chayrayku Juanka Herodeska willarkan:

—Mana allitachu ruraykanki wawkipa warminwan uchallikushpa kawsashpayki.

¹⁹ Chashna willashkanrayku chay warmi Herodiyaska Juanta sukaman chiknishpa wañuchinayarkan. Mana wañuchiya atiparkanchu Herodes michaptin. ²⁰ Herodeska Juanta mancharkan Tata Diosta kuyak alli rurak runa kananta yachashpa. Juan yachachikushkanta uyarishpa Herodeska mana yacharkanchu imatami ruranka nishpa. Mana allita entiendishpapish munarkanlla uaryiata.

²¹ Chaymanta su diya Herodiyaska munashkan layata rurarkan. Herodeska fiestakurkan watan paktashkanrayku. Fiestaman invitarkan soldadukunapa kapitanninkunata Galileapi ashwan sinchi awtoridarkunata. ²² Chay fiestapi warmin Herodiyasca shipashnin tushurkan tukuy invitadukunapa ñawpkninkunapi. Tushushkanta kawashpa Herodeswan tukuy invitadunkuna sukaman kushikurkansapa. Chayrayku Herodeska chay shipashtaka willarkan:

—Imatapish captin mañaway. Mañawashkaykita kushkayki.

²³ Sukaman jurashpa kuti kuti willarkan mañashkanta kunanpa. Chay kamachikunan llaktata patumata mañaptinpish willarkan kunanpa.

²⁴ Chashna Herodes willaptin chay shipashka llukshishpa mamanta tapurkan:

—¿Imatati mañasha?

Chaypina mamanka willarkan:

—Juan Bawtistapa umanta mañay.

²⁵ Chashna maman yachachiptin chay shipashka utkakushpa Herodesman rishpa willarkan:

—Kunanlla munani Juan Bawtistapa umanta su kallanapi kuwanaykipa.

²⁶ Chayta mañaptin Herodeska sukaman llakirkan. Llakishhpapish mana llullachiyta atiparkanchu invitadunkuna ñawpkninpi jurashpa willashkanrayku. ²⁷ Chayrayku Herodeska su soldadunta willarkan Juanpa umanta tipishpa apamunanpa. ²⁸ Chay soldaduka Herodes willashkanta rurarkan. Karselman rishpa Juanpa umanta tipishpa su kallanapi churashpa aparkan. Herodeska chay shipashta chaskichiptin payka mamanta kurkan.

²⁹ Chaypina Juanpa katikninkuna wañuchishkanta yachashpankuna rirkansapa kuerpunta apak pampanankunapa.

Jesus mikunata mirachirkan pichka waranka runakunata karananpa.

(Mt 14.13-21; Lk 9.10-17; Jn 6.1-14)

³⁰ Chaymanta chunka ishkay disipulkunkuna Jesusman kutishpankuna parlachirkansapa runakunata yachachishkankunata alliyachishkankunata. ³¹ Chaypina Jesuska willarkansapa:

—Akuychi ñukanchikunalla su chunllapi samak.

Jesus chayta willarkansapa sukaman aypa runakuna sukpish sukpish shamuptinkuna riptinkuna. Chayrayku disipulkunkuna mana

atiparkansapachu mikuyta. ³² Chaypina Jesuska disipulunkunawan suk kanowapi rirkansapa suk chunllapi samak. ³³ Chayman riykaptinkuna aypa runakuna kawarkansapa. Paykunaka Jesusta disipulunkunata rikshispankuna yacharkansapa maytami riykansapa nishpa. Tukuy chay llaktakunamanta kallparkansapa Jesusta tinkuk. Paykunaka ñawpaka chay chunllapi chayarkansapa. ³⁴ Jesuska kanowamanta llukshishpa paykunata kawashpa sukanaman llakichirkansapa. Paykuna iden mana doyñuyuk ovejakunashina karkansapa mana ni pi kuydaptin. Chaypina Jesuska rikchak layata yachachirkansapa. ³⁵ Chaymanta amusayaptin disipulunkuna Jesusta ladunchashpangkuna willarkansapa:

—Ñami amusayaykanna. Manami ni pi kaypika kawsanchu. ³⁶ Chayrayku tukuy kay runakunata willay chayllapi tiyak llaktillukunaman chakrakuman rinankunapa mikunankunata rantik.

³⁷ Chaypina Jesuska willarkansapa:

—Kankuna karaychi.

Chashna Jesus willaptinkuna tapurkansapa:

—¿Munankichu ishkay pachak kullkiwan panta rantinaynikunapa tukuy paykunata karananchikunapa?

³⁸ Chaypina Jesuska willarkansapa:

—¿Mashna pannikichiti tiyan? Rillarychi kawak.

Tapushkankunawasha willarkansapa:

—Pichka pan ishkay challwillukuna tiyawansapa.

³⁹ Chaypina Jesuska tukuy chay runakunata willarkansapa uksha swanpi tiyarinankunapa. ⁴⁰ Tukuy chay aypa runakuna manada manada tiyarirkansapa. Sukkunaka pichka chunkamanta sukkunaka pachakmanta tiyarirkansapa. ⁴¹ Chaymanta Jesuska chay pichka panta chay ishkay challwata apishpa sieluta chapashpa Tata Diosta agradesirkan. Chaymanta chay challwakunata chay pankunata paki paki rurashpa disipulunkunata kurkansapa runakunata charichinankunapa. ⁴² Tukuy runakuna mikurkansapa saksanankunakaman. ⁴³ Chaymanta mikushkankunawasha puchushkan panta challwata tantachirkansapa chunka ishkay setu untata.

⁴⁴ Chay mikuk ullukukuna pichka waranka karkansapa.

Jesus yaku sawanta purirkan.

(Mt 14.22-27; Jn 6.16-21)

⁴⁵ Chaymanta Jesuska disipulunkunata willarkansapa kanowapi kochata chimbankunapa. Willarkansapa Betsaida llaktamañ ñawpanankunapa pay runakunata willanankaman wasinkunaman kutinankunapa.

⁴⁶ Chay runakunata despidishkankunawasha Jesuska sapallan suk urkuman rirkan chaypi Tatan Dioswan parlananpa. ⁴⁷ Tutayaptinna disipulunkuna kanowapi chawpi kochata riykarkansapa. Jesuska chay urkupi kashpa disipulunkunata kawarkan mana atipanankunata chimbayta sinchi wayra chikanman pushanayaptinkuna. ⁴⁸ Chaymanta pakariyaptinna Jesuska yaku sawanta purishpa paykunaman rirkan ladunta pasaykshinalla. ⁴⁹ Jesus yaku sawanta puriptin disipulunkuna kawashpangkuna yu-yarkansapa supay kananra. Chayrayku sukanaman kaparirkansapa. ⁵⁰ Tukuy paykuna Jesusta kawashpangkuna sukanaman manchakurkansapa. Manchakuywan kapariptinkuna Jesuska willarkansapa:

—¡Ama manchakuychihu! ¡Ñukami kani!

⁵¹ Jesus kanowapi yaykuptinna chay sinchi wayraka kasillayarkan. Chayta kawashpangkuna sukanan almirarkansapa. ⁵² Paykuna Jesus pankunata mirachishkanta kawashpapish manara entiendirkansaparachu sinchi yachak kananta. Chayrayku mana atiparkansapachu payta kreyiita.

*Genesaret partipi Jesus aypa unkudu runakunata alliyachirkansapa.
(Mt 14.34-36)*

⁵³ Chay sinchi wayrata kasillayachiptinna Jesuswan tantalla chay kochata chimbashpa Genesaret partipi chayarkansapa. Chay kocha mañanpi kanowata watarkansapa. ⁵⁴ Jesus kanowamanta llukshiykaptin chaypi kawsak runakuna riksirkansapa. ⁵⁵ Kayta chayta kalpasshpangkuna famakurkansapa Jesus llaktankunapi kananta. Chaypina Jesusman tukuy laya unkudu runakunata kamillakunapi pusharkansapa alliyachinankunapa. ⁵⁶ Tukuy atun taksha llaktapipish chakrakunapipish Jesus chayaptin unkudukunata ñankunapi churaksapa. Sukaman Jesusta roygaksapa llachapanllatapish llankanankunapa. Chashna llankashpangkuna alliyarkansapa.

7

*Jesus yachachikurkan imata rurashpami uchallikunchi nishpa.
(Mt 15.1-20)*

¹ Chaymanta fariseo runakunawan Moisespa killkadunta yachachikkuna Jerusalen llaktamanta rishpangkuna Jesusta laduncharkansapa. ² Paykunaka kawarkansapa Jesuspa disipulunkunata manara amañashkankunashina makinkunata mayllashpangkunara mikuykaptinkuna. Chayrayku paykunata washancharkansapa.

³ Chay fariseokunawan tukuy judiyu runakuna Tata Diospi chuya chuya rikurinankunapa amañaksapa sukanan allita makinkunata mayllayta. Manara makinkunata mayllashpa mana mikuksapachu. Ñawpa awilunkunapa tiempunmantapacha chayta amañaksapa. ⁴ Merkadumanta kutishpangkuna manara makinkunata mayllashpara mana mikuksapachu. Chashnalla mayllaksapa puyñunkunata, kallanankunata, patinkunata, katanankunata. ⁵ Tukuy chayta amañashkankunaryku fariseokunawan Moisespa killkadunta yachachikuk runakuna Jesusta tapurkansapa:

—¿Imapatí disipuluykikuna mana ñawpa awilunchikunapa amañashkankunata ruransapa? ¿Imapatí paykunaka makinkunata mana mayllashpangkuna mikunsapa?

⁶ Chaypina Jesuska willarkansapa:

—Kankunaka allipi tukushpa llulla likidu kankichi. Kankunapa ñawpa yachachikuk Isaiyas killkarkan:

“Kay runakuna mishki shimi tukushpa kuyawansapa.
Mana tukuy shunkuchu kuyawansapa.

⁷ Runakunapa yachachikunankunallata yachachikunsapa.

Kuyawakshina tantanakushpangkunapish mana kushichiwansapachu.”

⁸ Kankuna Tata Diospa munananta mana rurashpaykichi ñawpa awiluy-kichipa amañashkankunallata rurankichi.

⁹ Chaymanta Jesuska willarkansapa:

—Kankunaka Tata Diospa kamachikunankunata mana nimatashina kawankichi amañashkaykichillata ruranaykichipa. ¹⁰ Moiseska killkarkan: “Tataykita mamaykita allita kuyashpa kawsay.” Chaymanta killkarkan: “Suk runa tatanta mamanta maldisiptin wañuchichinaykichi tiyan.”

11 Chashna Moises killkaptinpish kankunaka chikan layata yachachiykichi. Runakunata yachachinkichi: “Tataykichita mamaykichita mana yanapanayashpaykichi paykunata willankichi: ‘Kankunata yanapanayni kullkiti Tata Diostanami kushkani. Chayrayku manana tiyawannachu kankunata yanapanaynipa.’”

12 Chashna yachachikushpaykichi chay runakunata willaykankichi ama tatanta mamanta yanapanankunapa. **13** Chashna yachachikushpaykichi Tata Dios kamachikushkankunata mana nimatashina kawaykankichi. Tata Diosta mana kasunayashpaykichi ñawpa awiluykichipa amañashkunkallata ruraykankichi. Chaymanta chayta yachachikushpaykichi chashnalla aypa layakunallata yachachikunkichi.

14 Chashna willashpa Jesuska tukuy chay runakunata ladunman kayash-pankuna willarkansapa:

—Mash allita uyariwaychi entiendinaykichipa. **15** Imatapish kaptin mikushpaykichi mana uchallikunkichichu. Mana alli yuyanaykichita rurashpaykichi chaypi esika uchallikunkichi. **16** Allita uyariwashpaykichi allita rinrillikuychi.

17 Chaymanta Jesuska chay runakunata sakishpa wasipi yaykurkan. Chaypiná disipulunkunaka roýgarkansapa chay yachachikushkanta entien-dichinankunapa. **18** Jesuska willarkansapa:

—¿Ariya kankunapish manarachu entiendinkichira? Mana uchallikunchichu nima laya mikunata mikushpa. **19** Mikunanchi wiksanchillaman rin. Chaymanta llukshin. Mana yuyayninchipi yaykunchu.

Chayta rimashpa Jesuska yachachikurkan tukuy laya mikuna alli kananta. Chayrayku imatapish mikuptinchikuna manami uchallikunchisapachu. **20** Chaymanta willarkansapa:

—Suk runa mana allita yuyashpa mana allita rimashpa esika uchallikun. **21** Manara uchallikushpa shunkunpi yuyan imatami ruranka nishpa. Chaykunata yuyashpara manara kasarashpara warmiwan uchallikun. Chaymanta kasaradu kashpapish chikan warmiwan uchallikun, suwakun, runamasinta wañuchin. **22** Chikanpa tiyapunankunata kichunayan, sakra likidu tukun, llullachikun, mana allikunata rurashpa kawsan, sukpa tiyapunanta kawashpa munashpa llakin, tukuy pita yuyaypi purin, kikinlla kreyinakun, mana alli yuyayuk tukun. **23** Suk runa tukuy chay mana allikunata shunkunpi yuyashpa chaykunata ruran. Tukuy chaykunata rurashpa uchallikun.

Manajudiya warmi Jesusta roygarkan shipashninta alliyachipunanpa. (Mt 15.21-28)

24 Chaymanta Tiro partiman Jesuska rirkana. Jesus suk wasipi yaykurkan ama ni pi yachananpa chaypi kananta. Chashna munashpapish mana pakakuya atiparkanchu. **25** Chay wasipi chayaptinlla suk warmi kunanlla yacharkan Jesus chaypi kananta. Paypa shipashnin supayadu karkan. Chay warmika Jesuspa ñawpakniñpi rirkana kunkurikuk. **26** Payka Sirofenisia partimanta kashpa mana judiyu kastachu karkan. Jesuspa ñawpakniñpi kunkurikushpa sukaman roygarkan shipashninmanta supayta llukshichinanpa. **27** Chaypina Jesuska willarkan:

—Manarapish ni pita chikan llaktakunamanta alliyachishpaynira judiyu-masnikunatara yanapanayni tiyan. Mana allichu wambrakunata pankuna-kata kichushpa allkukunata karanaynipa.

28 Chashna Jesus willaptin chay warmika willarkan:

—Ariya Señor, wambrakuna mesapi churaduta mikuptinkuna mesamanta puchudukuna urmaptin allkukunapish mikunsapa. Ñuka allkushina kaptinipish yanapaway.

29 Chaypina Jesuska willarkan:

—Tukuy shunku kreyiwashkaykirayku shipashnikimanta supayta ñami llukshichishkanina.

30 Chaymanta chay warmi wasinpi chayashpa shipashninta tarirkan kawitunpi sirduta supayt llukshidutana.

Jesus mana uyarikuk mana rimakuy atipak runata alliyachirkan.

31 Tiro partimanta Jesus llukshishpa Sidon partita Dekapolis partipi llak-takunata pasashpa Galilea kochapi chayarkan. **32** Chaypina runakuna payman pushamurkansapa suk mana uyarik mana rimakuy atipak runata. Jesusta roygarkansapa llankashpa alliyachinanpa. **33** Chaypina Jesuska chay runata suk laduman pushashpa rinrinkunapi dedunkunata satirkan. Tukayninwan kallunta tupapurkan. **34** Chayta rurashpa Jesuska sieluta chapashpa samayninta surkurkan. Chaymanta chay runata willarkan:

—Efata!

Chay rimana riman: “Kicharinakuy.”

35 Chayta Jesus willaptinlla atiparkan uyarikuya. Kallunpish alliyapting allitana rimakurkan.

36 Chaymanta Jesuska tukuy runakunata sukaman willarkansapa ama ni pita parlachinankunapa chay runata alliyachishkanta. Sükaman willaptinkunapish paykunaka ashwanllata parlachikurkansapa.

37 Paykuna sukaman almirashpangkuna rimarkansapa:

—Jesuska tukuy layata allita ruran. Payka upa runakunatapish alliyachin uyarinankunapa. Mana rimakukkunatapish alliyachin rimakunankunapa.

8

Jesus mikunata mirachirkan chusku waranka runakunata karananpa.

(Mt 15.32-39)

1 Chaymanta suknin diya kashkan aypa runakuna tantanakurkansapa Jesus yachachikuptin uyarinankunapa. Paykunapa mana nima mikunankuna tiyaptin Jesuska disipulunkunata kayashpangkuna willarkansapa:

2 —Sukaman kay runakunata llakichinisapa. Ñami kimsa diyatana ñukawan kashpangkuna tukuy mikunankunata tukuchashkasapa. **3** Sukkuna sukaman karu llaktakunamanta shamushkasapa. Chayrayku mana willanayanisapachu wasinkunaman kutinankunapa mana nimata karashpayni. Ichará mana mikushpa rishpangkuna ñanpi shaykunmansapa.

4 Chayta willaptinkuna disipulunkunaka Jesusta willarkansapa:

—Kaypika manami niman suk runa kawsanchu. ¿Imashnatí kay chunllapi kay aypa runakunata karanchimansapa?

5 Chaypina Jesuska tapurkansapa:

—¿Mashna pannikichití tiyan?

Paykunaka aynirkansapa:

—Kanchislla tiyawansapa.

6 Chaypina Jesuska tukuy chay runakunata willarkansapa allpapi tiyari-nankunapa. Tiyariptinkuna chay kanchis pankunata apishpa Tata Diosta agradesirkan. Chaymanta chay pankunata paki paki rurashpa disipulunkunata kurkansapa runakunata charichinankunapa.

7 Chaymanta paykunapa tiyapurkansapa challwillunkuna. Jesus chaytapish apishpa Tata Diosta agradesirkan. Chaypina disipulunkunata

willarkansapa chaytapis karanankunapa. ⁸ Tukuy chay runakuna mikurkansapa saksanankunakaman. Chaymanta mikushkankuna puchushkata kanchis sestu untata tantachirkansapa. ⁹ Chay mikuk ullukuna yaka chusku waranka karkansapā. Chaymanta mikushkankunawasha Jesuska willarkansapa wasinkunaman kutinankunapa. ¹⁰ Rishkankunawasha Jesuska disipulunkunawan suk kanowapi Dalmanuta partiman rirkan.

*Fariseokuna Jesusta roygarkansapa suk milagruta rurananpa.
(Mt 16.1-4; Lk 12.54-56)*

¹¹ Chaymanta fariseo runakuna Jesusta laduncharkansapa. Paykunaka Jesusta llullachinayashpa kallarirkansapa sukaman tapuya. Roygarkansapa suk almirana milagruta rurananpa yachanankunapa Tata Diomanta shamuđu runa kananta.

¹² Chaypina Jesuska llakishpa sinchita samaykushpa willarkansapa:
—¿Imapatí roygawankichi suk almirana milagruta ruranaynipa? Kankuna roygawaptikichipish mana nimata rurashachu.

¹³ Chaymanta Jesuska paykunata sakirkansapa. Shamushkan kanowapi yaykushpa chay kochata chimbarkan.

*Jesus yachachikurkan ama fariseokunapa yachachikunankunata uyarinankunapa.
(Mt 16.5-12)*

¹⁴ Manara chay kanowapi chimbashpankuna disipulunkuna kunkansapa mirkapankunata apayta. Kanowapika suk pansillulla tiyapurkansapa. ¹⁵ Chashna riyashpankuna Jesuska willarkansapa:
—Mash allita uyariwaychi. Ama munaychihu fariseokunapa nima Herodespa levadurawan ruradu pankunata.

¹⁶ Chashna Jesus willaptinkuna mana entiendishpankuna willanakurkansapa:

—Pankunata mana apamushkanchikunaryakumi chaytaka willawan-chisapa.

¹⁷ Chay rimashkankunata yachashpa Jesuska willarkansapa:
—¿Imapatí rimankichi mana nima pan tiyashunaykichi? Mana pan-nikichi illashkanraykuchu chayta willashkaykichi. ¿Ariya manarachu entiendinkichira? ¿Manarachu allitara riksiwankichi? ¿Imapatí sukaman sinchi shunku kankichi? ¹⁸ Ñawiyuk kashpaykichi ¿manachu rurashkaynita kawashkankichi? Rinriyuk kashpaykichi ¿manachu yachachikushkaynita uyarishkankichi? ¿Manachu yuyankichi? ¹⁹ Pichka pankunawan pichka waranka runakunata karaptini ¿mashna sestutatí mikuna puchuduta tanta-chirkankichi?

Chaypina paykuna aynirkansapa:

—Chunka ishkay sestuta.

²⁰ Chaypina Jesuska kashkan tapurkansapa:

—Chaymanta chusku waranka runakunata kanchis panta mirachishpa karaptini ¿mashna sestu untatati puchudu pankunata tantachirkankichi?

Chashna tapuptinkuna disipulunkunaka aynirkansapa:

—Kanchis sestuta.

²¹ Chaypina Jesuska willarkansapa:

—¿Manarachu allitara entiendiwankichi?

Betsaida llaktapi Jesus mana kawakuk runata alliyachirkan.

²² Chaymanta Betsaida llaktapi Jesuska disipulunkunawan chayarkansapa. Chaypina Jesusman suk mana kawakuk runata

pushamurkansapa. Roygarkansapa llankashpa alliyachinanpa. ²³ Jesuska chay mana kawakuk runata makinmanta apishpa pusharkan llakta washaman. Chaypina tukaynininwan ñawinkunata ñuyuchishpa umanpi makinta churashpa tapurkan:

—¿Atipankichu kawakuya?

²⁴ Chay mana kawakuk runaka suk tipisituta kawakushpana willarkan:

—Kawani runakunata kaspikuna puriktashina.

²⁵ Jesuska kashkan ñawinta llankapuptin chay runaka alliyashpana tukuy layata sukaman allitana kawarkan. ²⁶ Chaypina Jesuska willarkan:

—Kuskalla wasikiman rillay. Amana llaktaman kutiynachu.

*Pedru rimarkan Jesus Tata Diosmanta shamudu salvakuk runa kananta.
(Mt 16.13-20; Lk 9.18-21)*

²⁷ Chaymanta Sesarea Filipo partipi llaktakunaman Jesuska disipulunkunawan rirkansapa. Ñanta riÿakashpankuna Jesuska tapurkansapa:

—Runakuna parlashpankuna ¿pi kanaynitati rimaykansapa?

²⁸ Chaypina paykunaka aynirkansapa:

—Sukkuna rimansapa Juan Bawtista kanaykita. Sukkuna rimansapa ñawpa yachachikuk Eliyas kanaykita. Sukkuna rimansapa Tata Diospa rimananta yachachikuk runa kanaykita.

²⁹ Chaypina Jesuska tapurkansapa:

—Kankunaka ¿pi kanaynitati yuyankichi?

Chashna tapuptinkuna Pedruka aynirkana:

—Kanka Tata Diosmanta shamudu salvakuk runami kanki.

³⁰ Chaypina Jesuska willarkansapa amara ni pita willanankunapa Tata Diosmanta shamudu salvakuk runa kananta.

*Jesus rimarkan chiknik runakuna wañuchinankunata.
(Mt 16.21-28; Lk 9.22-27)*

³¹ Chaymanta Jesus allita entiendichishpankuna willarkansapa sielumanta shamudu runa kashpa sukaman padesinanta. Willarkansapa ansianukunawan saserdote kunapa kamachikukninkunawan Moïsespa killkadunta yachachikuk runakuna sukaman chiknishpankuna padescchinankunata. Willarkansapa paykuna chiknishpankuna wañuchinankunatapish. Chaymanta willarkansapa wañuchiaptinkuna kimsa diyapi kawsamunanta.

³² Tukuy chayta kuskata yachachirkansapa. Chaypina Pedruka suk chikanman Jesusta pushashpa willarkan:

—Señor, ama chaytaka yuyaychu.

³³ Chashna willaptin Jesuska disipulunkunata chapashpa Pedruta piñayashpa willarkan:

—Ñukamanta anchuy, Satanás. Runakunapa munananllata yuyashpa willawaykanki ama wañunaynipa. Manami Tata Diospa munanantachu willawaykanki.

³⁴ Chaymanta Jesuska tukuy disipulunkunata chaypi tiyak runakunat-apish kayashpankuna willarkansapa:

—Kankuna disipuluynikuna kanayashpaykichika amana kikikichipa munanaykichita rurashpanachu kawsaychi. Chiknishuk runakuna ñukarayku wañuchishunayaptikichipish ñukallata kreyiwashpa katiwayaychi. ³⁵ Kankuna wañuymanta kishpinayashpa sakiwashpaykichika mana tukuuniyuk nianamanta mana kishpinkichichu. Chaymanta kreyiwashkaykichirayku runakuna wañuchishuptikichipish sieluman rinkichi Tata Dioswan mana tukuyuniyukta kawsak.

³⁶ Suk runa rikchak laya tiyapuptin mana sielupi yaykushpaka yankamanta kay allpapi tukuy layayuk kashka. ³⁷ Tukuy tiyapukninkuna mana nimapi yanapankachu ninamanta kishpinanpa. ³⁸ Suk runakuna mana alli rurak mana kreyiwak runakunapa ñawpakaninkunapi ñukata pinkakuwansapa. Rimanaynitapish mana munansapachu. Chashna pinkakuwaptinkuna kay allpaman kashkan shamuptini ñukapish chay pinkakuwak runakunata willashasapa mana ñukapa kanankunata. Chay diyaka Tatayni Diospa llipyayninpí yanapawak angelkunawan tantalla kashkan shamusha.

9

¹ Chaymanta Jesuska willarkansapa:

—Mash allita uyariwaychi. Suk kankuna manara wañushpaykichira kawankichi Tata Diospa mandunpi ñuka sinchita kamachikuptini.

*Jesus chikan laya tukushpa sukaman llipyarkan.
(Mt 17.1-13; Lk 9.28-36)*

² Chaymanta sokta diya yachachikushkanwasha Jesuska rirkana suk atun urkuman Pedruta Jakobota Juanta pushashpankuna. Chaypi paykunalla kawaptinkuna Jesuska chikan laya tukurkan. ³ Llachapan yurak likidu tukushpa sukaman llipyarkan. Mana ni pi nima sukaman takshashpa chay laya yurakta ruranmanchu. ⁴ Chaypina chay kimsa disipulunkunaka chapashpankuna kawarkansapa Eliyasta Moisesta Jesuswan parlaykaptinkuna. ⁵ Paykunata kawashpa Pedruka Jesusta willarkan:

—Maestru, allipaka kanwan tantalla shamushkanisapa. Munaptiki kimsa ranchituita rurashasapa, sukta kanpa, sukta Moisespa, sukta Eliyaspa.

⁶ Chay kimsa disipulunkunaka sukaman manchakurkansapa. Chayrayku Pedruka chayta rimarkan mana yuyashpa imatami riman nishpa.

⁷ Chaypina puyu sirishpa paykunata wickamurkansapa. Chay puyu ukunmanta uyarirkansapa Tata Dios willaptin:

—Kay Jesuska munanayni wambraynimi. Chayrayku payta allita uyariy-chi.

⁸ Chayta uyarishkankunawasha disipulunkuna tukuy mayta chapashpankuna Jesusta sapallanta kawarkansapa.

⁹ Chaymanta chay urkumanta urayaykashpankuna Jesuska willarkansapa amara ni pita parlachinankunapa chay urkupi kawashkankunata. Willarkansapa sielumanta shamudu runa wañushkanmanta kawsamuptinra parlachikunankunapa. ¹⁰ Chayta willashkankunaryku paykunata mana ni pita parlachirkansaparachu. Mana entiendishpankuna tapunakurkansapa imapati Jesuska rimashka wañushkanmanta kawsamunanta. ¹¹ Chaypina Jesusta tapurkansapa:

—¿Imapati Moisespa killkadunta yachachikuk runakuna rimansapa manara Tata Diosmanta shamuk runa shamuptin Eliyas shamenanta?

¹² Chashna tapuptinkuna Jesuska willarkansapa:

—Deverasmi Moiseska rimarkan Eliyas shamunanta runakunata willak sielumanta shamuk runata shuyanankunapa. Tata Diospa killkadunpi riman runakuna ñuka sielumanta shamudu runata mana munawashpa padeschikanankunata. ¹³ Mash uyariwaychi. Eliyaska ñiami shamushkana. Runakuna mana riksishpankuna chiknishpa padeschirkansapa wañuchinankunakanaman. Tata Diospa killkadunpi rimarkan chashna padeschishpankuna wañuchinankunapa.

*Jesus supayadu wambrata alliyachirkan.
(Mt 17.14-21; Lk 9.37-43)*

14 Chaymanta Jesuska chay kimsa disipulunkunawan urkumanta kumishpankuna chayarkansapa maypicha suk disipulunkuna karkansapa. Paykuna aypa tantanakudu runakunapa chawpikunapi Moisespa kilkadunta yachachikuk runakunawan ayninakuykarkansapa. **15** Jesusta kawashpangkuna tukuy runakuna almirashpangkuna kallparkansapa rimachik. **16** Chaypina Jesuska tapurkansapa:

—¿Imaraykutí ayninakuykankichi?

17 Chaypina suk runa Jesusta aynirkan:

—Maestru, kanman pushamushkani wambraynita. Payka supayadu kashpa mana nima rimakuya atipanchu. **18** Maypipish kaptin supay apishpa waktakun. Shiminnmanta sukaman pusuk llukshin. Kirunta mukushpa soynachin. Chaymanta kasperayadu tukun. Disipuluykikunata roygashkanina supayta llukshichinankunapa. Chashna roygaptini mana atipashkasapachu llukshichiyyta.

19 Chaypina Jesuska willarkansapa:

—Sakra mana kreyikuk runakuna kankichi. ¿Aykapikamantí kankunawan kanayni tiyan? ¿Aykapikamantí amichiwankichi? Kayman pushamuyuchi chay unkudu wambrata.

20 Chashna pushamuptinkuna supayka Jesusta kawashpa chay wambrata kashkan unkuchishpa allpapi urmachirkan. Chaypi chay wambrapa shimin pusukyarkan. Sukaman kuchpapurkan. **21** Chaypina Jesuska wambrapa tatanta tapurkan:

—¿Mashna tiemputanatí chashna kawsan?

Payka aynirkan:

—Takshillunmantapacha unkudu kawsan. **22** Chay supayka wambraynita wañuchinayashpa yakupi ninapi urmachin. Chayrayku rogyayki llakichiwaysapa. Atipashpaykika yanapawaysapa.

23 Jesuska chay runata willarkan:

—¿Manarachu kreyiwanki atipanaynita alliyachiyyta? Ñukata tukuy shunku kreyiwaptiki rikchak layata rurasha.

24 Chayta willaptin chay wambrapa tatanka sinchita willarkan:

—Kreyini yanapawanaykita. Yanapaway tukuy shunku ashwanta kreyinaynipa.

25 Chaypina Jesuska kawarkan ashwan aypa runakuna shamuykanankunata. Chayta kawashpa supayta sinchita willarkan:

—Kan kay wambrata unkuchishkanki mana rimakunanza nima uyariukanpa. Kunanka willayki: ¡Kay wambraramanta llukshiy! ¡Amana kutin paypika yaykuynachu!

26 Chashna Jesus willaptin chay supayka sukaman kaparishpa kashkan chay wambrata chukchuchirkan. Paymanta llukshishpa iden wañudutashina sakirkan. Chayta kawashpa chay runakuna rimarkansapa wañushkanta.

27 Chaypina Jesuska makinmanta apishpa chay wambrata sanutana atarichirkan.

28 Chaymanta suk wasiman Jesus yaykuptin disipulunkuna sapallanta tapurkansapa:

—¿Imapatí ñukaykuna chay supayta mana atipashkanisapa llukshichiyyta?

29 Chaypina Jesuska willarkansapa:

—Chay laya supayta atipanchisapa llukshichiyyta mana nimata mikushpa tukuy shunku Tata Diosta roygashpa.

*Jesus kashkan willarkansapa wañunanta.
(Mt 17.22-23; Lk 9.43-45)*

30 Chay llaktamanta rishpankuna Galilea partipi puriykarkansapa. Jesuska mana munarkanchu ni pi yachananpa chaypi kananta. **31** Chashna riyakashpankuna disipulunkunata yachachirkansapa:

—Chikniwak runakuna ūuka sielumanta shamudú runata awtoridarkunapi kukuwankasapa. Paykuna wañuchiwankasapa. Chaymanta kimsa diyapi kashkan kawsamusha.

32 Chaypina disipulunkuna chay yachachikunanta mana nima entiendish-pankunapish manchakurkansapa tapuya.

Jesus yachachikurkan maykanmi ashwan sinchi kamachikuk kanka nishpa.

(Mt 18.1-5; Lk 9.46-48)

33 Chaymanta Jesuska disipulunkunawan Kapernaum llaktapi chayarkansapa. Chaypina wasipi kashpankuna Jesuska disipulunkunata tapurkansapa:

—Ñanpi shamuykaptinchikuna ¿imatati ayninakuykashkankichi?

34 Paykunaka pinkakushpankuna mana nimata aynirkansapachu. Ñanpika sukaman ayninakushkasapa tukuy paykunamanta maykanmi ashwan alli kamachikuk kanka nishpa. **35** Chaypina Jesuska tiyarissha tukuy chunka ishkay disipulunkunata ladunman kayarkansapa. Paykunata willarkansapa:

—Kankuna ashwan alli kamachikuk kanayashpaykichi mana kreyi-nakushpa sukkunata sirvinaykichi tiyan.

36 Chashna willashpankuna Jesuska suk taksha wambrilluta kayashpa chawpinkunapi shayachirkan. Chaymanta payta markashpa willarkansapa:

37 —Kankuna ūukata kuyawashpa suk wambrata chaskishpaykichi ūukatami chaskiwaykankichi. ūukata chaskiwashpaykichi mana ūukallatachu chaskiwaykankichi. Kachamuwak Tatayni Diostapish chaskiykankichi.

Suk runa mana chikniwashpanchikuna yanapawaykanchisapami.

(Mt 10.42; Lk 9.49-50)

38 Chaymanta disipul Juan Jesusta willarkan:

—Maestru, suk runata kawashkanisapa kanpa shutikita rimashpa runakunamanta supaykunata llukshichiptin. ūukaykuna payta michashkanisapa mana ūukanchikunawan tantalla puriptin.

39 Chaypina Jesuska willarkansapa:

—Ama michaychichu. Suk runa shutinita rimashpa suk almirana milagruta rurashpa mana washanchawankachu. **40** Suk runa mana chikniwashpanchikunaka yanapawaykanchisapami. **41** ūukata katiwashkaykichirayku ichara suk runa suk tipi chirik yakuta kushunkichiman. Allita willaykichi. Tata Dios chay upyachishuk runata suk premyunta kunka.

Jesus yachachikurkan Tata Dios uchallichikuk runakunata sukaman kastigananta.

(Mt 18.6-9; Lk 17.1-2)

42 Chaymanta Jesuska willarkansapa:

—Maykan runa ūukata kreyiwak mana alabanakuk runata uchallichiptin Tata Dioska sukaman kastiganka. Ashwan alli kanman payta atun rumi makita kunkanpi watashpa atun yakupi wishchukunankunapa.

43-44 Chayrayku willaykichi: Ichara makikichiwan mana allita rurankichiman. Chay uchallichishuk makikita tipiychi ama ishkantin makikichiwan mana tukuyniyuk ninaman rinaykichiwa. Ashwan alli kanman suk

makikichillawan sielman rinaykichipa. ⁴⁵⁻⁴⁶ Ichara chakikichi pushashunkichiman mana allita ruranaykichipa. Chay uchallichishuk chakikchita tipiychi ama ishkantin chakikichiwan mana tukuyniyuk ninaman rinaykichipa. Ashwan alli kanman suk chakikichillawan sielman rinaykichipa. ⁴⁷ Chaymanta ichara ñawikichiwan imatapish kaptin kawashpa uchallichikichiman. Chay uchallichishuk ñawikichiwan surkuychi ama ishkantin ñawikichiwan mana tukuyniyuk ninaman rinaykichipa. Ashwan alli kanman suk ñawikichillawan sielipi yaykunaykichipa Tata Dioswan kawsak. ⁴⁸ Chay ninapi kurukuna mana wañunchu. Chay nina mana wañunchu.

⁴⁹ Chaypina yachachikuylapi Jesuska katirkana:

—Tukuy ñukata kreyiwak runakuna iden ninapishina sufrinankuna tiyan ama uchallikushpa kawsanankunapa. Tata Diosta rupachinan ofrendata kuptinchikuna alli kachichadu kanan tiyan. ⁵⁰ Alli kachika tukuy layapa alli. Allpayuk kachi manami kashkan kachi tukunkanachu. Kankuna alli kachishina kashpaykichi kushikuypuru sukwan sukwan yanapanakushpa kawsaychi.

10

*Jesus yachachikurkan kasaradukuna ama warminta wishchunankunapa.
(Mt 19.1-12; Lk 16.18)*

¹ Tukuy chaykunata yachachikushkankunawasha Kapernaum llaktamanta Judea partiman Jesus rirkan. Chaymanta Jordan yaku chimbaman rirkan. Chaypi aypa runakuna tantanakuptinkuna payka amañashkanshina yachachikurkan. ² Chaypina fariseo runakuna Jesusta sukaman panta-chichinayarkansapa. Paykunaka ladunchashpankuna tapurkansapa:

—¿Moisespa killkadunka rimanchu suk runa mana warminta munashpa wishchunarpa?

³ Chaypina Jesuspish tapurkansapa:

—¿Imatati Moises killkadunpi willashunkichi?

⁴ Paykunaka aynirkansapa:

—Moiseska willawarkanchisapa maykan runapish warminta wishchunayashpa awtoridarpi killkadu papelta chaskichishpa atipananta wishchuyta.

⁵ Chaypina Jesuska willarkansapa:

—Kankuna sinchi shunku kaptikichi Moiseska almitishurkankichi warmikichita wishchunaykichipa. ⁶ Tata Dios kay allpata rurashkanwasha warmita ullkuta rurarkan. ⁷ Chayrayku willarkan: “Tukuy ullku tatanta mamanta sakinka warminwan tantanakushpa kawsananpa. ⁸ Chashna tantanakushpangkuna suklallahshina kankasapa.” Chashna Tata Dios willaptin suk ullku warminwan tantalla kawsashpangkuna suklallahshina kawsankasapa. Manana ishkaynachu. ⁹ Tata Dios chayta rimashkanrayku mana allichu niman suk runa warminta wishchunarpa.

¹⁰ Chayta Jesus yachachikushkanwasha wasipi yaykushpangkuna disipulunkunaka Jesusta yachachikushkanta kashkan tapurkansapa. ¹¹ Chaypina Jesuska paykunata willarkansapa:

—Suk ullku warminta wishchushpa chikan warmiwan kasarashpa uchalikushpa kawsan. ¹² Warmipish kusanta sakishpa chikan ullkuwan kasarashpa uchalikushpa kawsan.

*Jesus munarkan wambrillukuna payman shamunankunapa.
(Mt 19.13-15; Lk 18.15-17)*

¹³ Chaymanta Jesusman aypa runakuna wambrankunata pushamurkansapa llankanankunapa. Chaypina Jesuspa disipulunkuna piñayashpa micharkansapa ama pushamunankunapa. ¹⁴ Chayta kawashpa Jesuska piñakushpa willarkansapa:

—Ama chay wambrakunata michaychichu ūukaman shamenankunapa. Wambrakuna mana kreyinakushpa tatanpa munayninpí kawsansapa. Kankunapish wambrakunashina kawsashpaykichira Tata Diospa mandunpi yaykunkichi. ¹⁵ Mash allita uyariwaychi. Kay wambrakunashina kankunapish Tata Diospa munananta ruranaykichi tiyan. Mana paypa munananta rurashpaykichika mana mandunpika yaykunkichichu.

¹⁶ Chashna Jesus willashpankuna tukuy chay wambrakunata markarkansapa. Chaymanta umankunapi llankashpa Tata Diosta roygarkan yanapanankunapa.

Tukuy layayuk runa Jesuswan parlarkan.

(Mt 19.16-30; Lk 18.18-30)

¹⁷ Chaymanta Jesus riykaptin suk runa kallpashpa laduncharkan. Ñawpakinipi kunkuriykuhpá tapurkan:

—Alli maestru ¿imata rurashpatí Tata Dioswan mana tukuuniyukta kawsayman?

¹⁸ Chashna tapuptin Jesuska willarkan:

—¿Imapatí alli kanaynita willawanki? Tata Diosllami alli. ¹⁹ Tata Diospa kamachikunankunata allita yachanki. Kashna willawanchisapa: “Ama runamasikichita wañuchiychu. Ama chikan warmiwan uchallikushpa kawsaychu. Ama nimata suwaychu. Ama ni pita llullakushpa tumbaychu. Ama ni pita llullachiychu. Tataykita mamaykita kuyashpa kawsay.”

²⁰ Chashna Jesus willaptinna chay runaka willarkan:

—Maestru, ūuka wayna kashkaynimantapachami chaykunata allita kasshpa kawsaykani.

²¹ Chaypina Jesuska kuyashpa kawarkan. Willarkan:

—Sukllananami illashunki ruranaykipa. Rillay tukuy laya tiyapushuknikita rantikumuy. Chay rantikushkayki chaninta mana nimayuk runakunata kuysapa. Chaypira sielipi tukuy layayuk kanki. Chaymanta shamuy ūukata katiway.

²² Chayta uyarishpa chay runaka sukaman llakishpa wasinman kutirkan sukaman rikchak layayuk kashpa. ²³ Chay runa llakishpa riptinna Jesuska tukuy chay runakunata kawashpa disipulunkunata willarkansapa:

—Chay laya kullkinllapi kreyinakuk runakuna mana atipankasapachu Tata Diospa mandunpi yaykuyta.

²⁴ Chayta uyarishpankuna disipulunkunaka sukaman almirarkansapa. Chaypina Jesuska kashkan willarkansapa:

—Wambraynikuna, suk runa kullkinllapi kreyinakushpa mana atipanchu Tata Diospa mandunpi yaykuyta. ²⁵ Suk kamellu animal suk aguja uchkupta mana atipanmanchu pasayta. Chashnamí kullki likidu runa kullkinta ashwanta munashpa mana atipankachu Tata Diospa mandunpi yaykuyta.

²⁶ Chayta uyarishpa disipulunkuna ashwanta almirashpankuna tapunakurkansapa:

—Chashna kaptinka ¿pikunatí atipanka Tata Diospa mandunpi yaykuyta?

²⁷ Chaypina Jesuska chapashpankuna willarkansapa:

—Manami ni suk runa atipanmanchu kikinllamanta yaykuyta. Tata Diosllami atipan runakunata mandunpi yaykuchiyta. Paymi tukuyta atipan rurayta.

²⁸ Chaypina Pedru willarkan:

—Ñukaykuna tukuy tiyawakninizunata sakimushpaynikuna kanta katiykaykisapa.

29 Jesuska willarkan:

—Allita willaykichi. Kankuna katiwashpa ñuka salvakuk kanaynita yachachikushpa wasikichita, wawkikichita, panikichita, mamaykichita, tataykichita, wambraykichita, terrenuykichita sakishkankichi. **30** Chashna sakiptikichi Tata Diosmi kushunkichi sakishkaykichimanta ashwan aypa wasikichita, wawkikichita, panikichita, mamaykichita, wambraykichita, terrenuykichita. Kay allpapi sufrishpaykipish wañushkaykichiwasha mana tukuyuniyukta Tata Dioswan sielipi kawsankichi. **31** Kunan kay tiempu aypa runakuna yuyanakunsapa ashwan alli kanankunata. Paykuna Tata Diospa mandunpi washeru kankasapa. Chaymanta kankuna mana munadu kashpaykichipish Tata Diospa mandunpi kamachikkuna kankichi.

Jesus kimsaynin kuti willarkansapa wañunanta.

(Mt 20.17-19; Lk 18.31-34)

32 Chaymanta Jerusalen llaktaman riykaptinkuna Jesuska disipulunku-namanta ñawpaka riykarkan. Paykunaka sukaman almirarkansapa Jesus Jerusalenman riptyin. Manchakuypuru Jesusta katiykarkansapa. Chaypina Jesuska chunka ishkay disipulunkunallata chikanman pushashpankuna kashkan willarkansapa wañunanta:

33 —Allita yachankichi Jerusalen llaktaman riykananchikunata. Chaypi suk runakuna saserdotekunapa kamachikkunkinaman Moisespa killkadunta yachachikuk runakunaman pushawankasapa rantikuwak. Chaypina ñuka sielumanta shamudu runa kaptinipish paykunaka tantanakushpa yuyankasapa wañuchiwanankunapa. Chaypina romano runakunapa makinpi kukuwankasapa wañuchiwanankunapa. **34** Paykunaka sukaman asichiwashpankuna tukaychawankasapa makawankasapa wañuchiwanankasapa. Chaymanta wañuchiwashkankunamanta kimsa diya ukun kashkan kawsamusha.

Santiagowan Juan Jesusta roygarkansapa kamachikunan tiempu ladunpi tiyarinankunapa.

(Mt 20.20-28)

35 Chaymanta Sebedeopa wambrankuna Santiagowan Juan Jesusta ladun-chashpa willarkansapa:

—Maestru, munanisapa mañanaynikunata rurapanaykipasapa.

36 Payka tapurkan:

—¿Imatati munankichi kankunapa ruranaynipa?

37 Paykunaka willarkansapa:

—Kan allimata tukuy layata kamachikushpayki tiyachiwaysapa sukta alli laduykipi sukta lluki laduykipi ñukaykunapish kamachikunaynikunapa.

38 Chaypina Jesuska aynirkansapa:

—Kankunaka mana yachankichichu imatami mañawaykankichi nishpa. Ñukami tukuy layata sukaman padesinayni tiyan wañunaynikaman. Chashna padesishpida iden, suk ayak likidutashina upyasha. Kankunaka manami atipankichimanchu ñukashina nanaykunata muchuya.

39 Chashna willaptinkuna paykunaka aynirkansapa:

—Ariya, atipashasapa muchuya.

Chaypina Jesuska willarkansapa:

—Deverasmi ñukatashina kankunatapish sukaman padesichishunkichi. Ñukatashina chiknishushpaykichi wañuchishunkichi. **40** Tatayni Diosmi akl-lanka pikunami laduynipi tiyarinkasapa nishpa. Ñukaka manami ni pita willashachu laduynipi tiyarishpa kamachikunarpa.

41 Chayta willaptinkuna chay chunka disipulunkuna uyarishpankuna Santiagota Juanta sukaman piñayarkansapa. **42** Chaypina piñayashkankunata kawashpa Jesuska kayashpankuna willarkansapa:

—Kankunaka allita yachankichi tukuy llaktakunapi kamachikuk runakuna sukaman sinchita kamachikunankunata. Paykunaka mandunpi kawsak runakunata sukaman padesichinsapa kasunankunapa. **43** Kankunaka ama chay sinchi kamachikuk runakunashina kanayaychichu. Alli kamachikuk kanayashpaykichika tukuy runamasikichita sirvinaykichi tiyan. **44** Chaymanta tukuy runakunamanta ashwan kamachikuk kanayashpaykichika iden rantidu runakunashina tukuya yanapanaykichi tiyan. **45** Ñukapish sielumanta kay allpaman shamushkani tukuy runakunata sirvinaynipasapa. Mana shamushkanichu sirviwanankunapa. Shamushkani wañushpa aypa runakunata kastigumanta salvanaynipasapa.

Jesus mana kawakuk runata alliyachirkan.

(Mt 20.29-34; Lk 18.35-43)

46 Chaymanta Jesus disipulunkunawan Jeriko llaktapi chayarkansapa. Chaymanta chay llaktamanta disipulunkunawan llukshiptinkuna aypa runakuna Jesusta katirkansapa. Chay ñanpi suk mana kawakuk runa Timeopa wambran Bartimeo tiyarishpa kullkita mañakuykarkan. **47** Chaypina chay runaka Nasaretmanta Jesus pasaykananta uyarishpa sinchita rimashpa Jesusta willarkan:

—¡Jesus, ñawpa Davidpa miraknin, ñukatapish llakichiway!

48 Chayta uyarishpankuna chay aypa runakuna michashpankuna willarkansapa upallayananpa. Chaypina ashwan sinchita willarkan:

—¡Jesus, ñawpa Davidpa miraknin, ñukatapish llakichiway!

49 Chaypina Jesuska riyakashkanmanta shayarishpa willarkansapa:

—Chay runata kayaychi.

Chashna willaptin chay mana kawakuk runata kayashpankuna willarkansapa:

—Ama llakichiway. Atarimuy. Jesus kayashunki.

50 Chayta uyarishpa chay mana kawakuk runaka kapanta wishchukushpa brinkashpa Jesusta laduncharkan. **51** Chaypina Jesuska tapurkan:

—¿Imapiti munanki yanapananyipa?

Chaypina chay runaka willarkan:

—Maestru, ñawinita alliyachipay kashkan kawakunaynipa.

52 Chaypina Jesuska chay runata willarkan:

—Kan allita kreyiwashkaykirayku alliyachiway. Allita kawakushpana rillay.

Jesus chayta willaptinlla chay runaka kashkan kawakurkan. Chay ratumantapacha Jesusta katirkana chay ñanta riaption.

11

Jerusalen llaktapi Jesus yaykurkan.

(Mt 21.1-11; Lk 19.28-40; Jn 12.12-19)

1 Jerusalen llaktaman Jesus riyashpa Olivos urkupi chayarkan. Chay urku karkan Betfage Betania llaktakunapa ladunkunapi. Chaypi chayaptinkuna Jesuska ishkay disipulunkunata kacharkansapa.

2 Kachashpankuna willarkansapa:

—Rillarychi chay kawananchi llaktaman. Chaypi chayashpaykichi suk watadu burruta tarinkichi. Chay burrutaka manara ni pi montanrachu. Chayta paskashpaykichi pushamuychi. **3** Maykan tapushuptikichi: Imapati

paskankichi nishpa willaychi: "Señornini munan montananpa. Suk ratukaman kutichimushkaykisapa."

⁴ Chaypina disipulkunkuna rishpankuna suk kallipi suk punku ladunpi watadu burruta tarirkansapa. ⁵ Chay burruta paskaykaptinkuna kawashpa suk runakuna tapurkansapa:

—¿Imatáti ruraykankichi? ¿Imapatí chay burruta paskaykankichi?

⁶ Paykunaka Jesus willashkantashina aynirkansapa. Chaypina almitirkansapa pushanankunapa. ⁷ Chaypina Jesusman disipulkunkuna chay burruta pusharkansapa. Burrupa sawanpi llachapankunata churarkansapa Jesus montananpa. ⁸ Chaymanta Jesus chay burrupi Jerusalenman riykaptin aypa runakuna chay rinan ñanpi sawa llachapankunata mantarkansapa. Sukkuna chakrankunamanta aypa pankayuk ramakunata apamushpankunkuna ñanpi mantarkansapa. ⁹ Chaypina Jesusspa ñawpaktinta rik runakuna washanta katik runakunapish sukaman kushikushpankunkuna sinchita willarkansapa:

—¡Akuychi kuyaypachi Tata Diospa shutinpi shamuk runata!

¹⁰ Kushikupachi Jesus ñawpa alli kamachikuk Davidshina sinchi kamachikuk kaptin. ¡Akuychi altu sielupi kawsak Tata Diosta sukaman kuyaypachi!

¹¹ Chaymanta Jerusalenpi yaykushpa Jesuska Tata Diospa wasinman rirkan. Chaypi tukuy layata kawashpa disipulkunkawan rirkan Betania llaktaman tardina kaptin.

Jesus mana wayuchakuk igo kaspita willarkan chakinanpa.

(Mt 21.18-19)

¹² Chaymanta kayantin Betaniamanta Jerusalen llaktaman kutishpa Jesuska sukaman yarkarkan. ¹³ Chaypina karullamanta pankasapa igo kaspita kawarkan. Chayta laduncharkan kawak wayuyukchu manachu nishpa. Chay kaspita tarirkana pankasapallata mana nimana suk wayuyukta manara wayuchakunan tiempu kaptin. ¹⁴ Chaypina Jesuska chay igo kaspita willarkan:

—Kunanmantapacha manana kutin ni pi wayuykita mikunkanachu.

Chayta willaptin tukuy disipulkunkana uyarirkansapa.

Tata Diospa wasinmanta Jesus rantiyakak rantikuykak runakunata karkurkansapa.

(Mt 21.12-17; Lk 19.45-48; Jn 2.13-22)

¹⁵ Jerusalenpi chayashpankunkuna Tata Diospa wasinpi Jesuska yaykurkan. Chaypi kawarkan rantiyakak rantikuykak runakunata. Tukuy paykunata karkurkansapa. Chaymanta kullkita kambiakuk runakunapa mesankunata tikrachipurkansapa. Urpaykuna rantikuk runakunapa bänkunkunata tikrachipurkansapa. ¹⁶ Mana munarkanchu Tata Diospa wasinpi ni pi imatapish apashpa purinankunapa. ¹⁷ Chaypina tukuy chay runakunata yachachishpa willarkansapa:

—Tata Dioska killkadunpi willawanchi: "Tukuy llaktakunamanta runakuna shamushpankunkuna rimankasapa kay wasini oranankuna wasi kananta." Tata Dios chayta willawaptinchikunapish kankuna paypa wasinta ruraykankichi suwakunaykichi wasita.

¹⁸ Chayta uyarishpankunkuna saserotekunapa kamachikukninkunawan Moisespa killkadunta yachachikukkuna kallarirkansapa yuyaykuya imashnamí Jesusta wañuchinkasapa nishpa. Chashna wañuchinayashpankunkunapish manchakurkansapa apiyta tukuy runakuna

Jesuspa yachachikunanta sukmanta almiraptinkuna. ¹⁹ Chaymanta tutayaptinna Jesuska disipulunkunawan Jerusalenmanta llukshirkansapa.

Mana wayuyuk igo kaspi chakirkan.
(Mt 21.20-22)

²⁰ Kayantin tutapacha Jesuska disipulunkunawan chay igo kaspi ladunta pasashpankuna kawarkansapa sapintinta chakidutana. ²¹ Chayta kawashpa Pedru yuyarkan Jesus mana wayunta tarishpa rimashkanta. Chayrayku willarkan:

—Maestru, kayna willashkanki kay igo kaspita amana kutin wayuchakanpana. Mash kaway. Ñami chakishkana.

²² Jesuska willarkansapa:

—Tukuy shunku Tata Diosta kreyiyichi. ²³ Allita willaykichi. Kankunapish Tata Diosta allita kreyishpa atipankichiman iden ūukashina rurayta. Kay urkuta willankichiman: “Kaymanta suchushpayki rillary atun yakupi sumik.” Tukuy shunku Tata Diosta kreyishpa chayta willaptikichi kay urku suchunman. Ama shunkuykichipi yuyaychihu suchunkachu manachu nishpa. ²⁴ Tukuy shunku kreyikushpa Tata Diosta mañashpaykichi allita kreyiyichi chaskinaykichita. Chaypira Tata Dioska tukuy mañashkaykichita kushunkichi. ²⁵ Chaymanta Tata Dioswan parlaykashpaykichi runamasikichi rabyachishushkaykichita yuyashpa perdonaychi sielipi kawsak Tataykichi kankunatapish uchaykichimanta perdonashunaykicipa. ²⁶ Kankuna mana perdonaptikichika Tata Diospish manami perdonashunkichichu.

Jesus chiknik runakunata upallayachirkansapa.
(Mt 21.23-27; Lk 20.1-8)

²⁷ Chayta yachachikushkanwasha Jerusalen llaktaman Jesuska disipulunkunawan kutirkun. Chaypina Tata Diospa wasinpi puriyaptin saserdotekunapa kamachikukninkunawan Moisespa killkadunta yachachikukkunawan judiyukunapa ansianunkuna laduncharkansapa.

²⁸ Chaypina Jesusta tapurkansapa:

—¿Pití kanki chashna yachachikunaykipa? ¿Pití kachamushushka Tata Diospa wasinmanta chay rantikuk runakunata karkunaykipa?

²⁹⁻³⁰ Chashna tapuptinkuna Jesuska willarkansapa:

—Ñukapish kankunata tapuykichi. Ayniwaptikichika willashkaykichi pimi kachamuwashka nishpa. May willawaychi ¿pití Juantaka kachamurkan runakunata bawtisanankunapa? ¿Tata Dioschu kachamurkan? ¿Suk runachu kachamurkan? May ayniwaychi.

³¹ Chashna Jesus tapuptinkuna chay runakunaka sukwana sukwana ayniakushpa willanakurkansapa:

—Ayniptinchikuna Tata Dios Juanta kachamushkanta payka willawashunchisapa: “Tata Dios kachamushka kaptin ¿imapatí mana payta kasushkankichi?” ³² Chaymanta ayniptinchikuna runakuna kachamushkanta tukuy kay runakuna sukmanta piñyawashunchisapa. Paykunaka kreyinsapa Tata Dios kachamuptin yachachikushkanta.

³³ Chashna willanakushpankuna Jesusta willarkansapa:

—Mana yachanisapachu pimi Juantaka kachamushka nishpa. Chaypina Jesuska willarkansapa:

—Ñukapish manami willaykichichu pimi kachamuwashka tukuy kaykunata ruranaynipa.

12

Jesus yachachikurkan mana alli rurak trabajadorkunapa ejemplunta.
(Mt 21.33-46; Lk 20.9-19)

¹ Chaymanta Jesuska kallarirkan ejemplukunata parlachikushpa yachachikuuta. Willarkansapa:

—Suk runa chakranpi uvakunata tarpuchishkanwasha wertanta rurachirkan. Chaymanta suk manllayba atun batanta churarkan chaypi uva wayukunapa illinta kapinankunapa. Chaymanta suk manllayba altu wasita rurachirkan altuynimnanta suk runa kuydananpa. Tukuy chaykunata rurashpana suk runakunawan paktanakurkansapa uvata pallashpankuna paywan patumanakunankunapa. Chashna paktanakushpankuna chay runaka rirkana suk karu llaktaman.

² Chaymanta pallana tiempu chayamuptin chay runaka suk wiwachunta kacharkan patuma palladu uvata chaskik. ³ Paykunaka chay wiwachuta apishpankuna makarkansapa. Mana nimata kushpankuna kacharkansapa. ⁴ Chaypina chay chakrayuk runaka suk wiwachunta kacharkan. Chaypina chay trabajadorkuna rabyakushpa umanpi wakta shpa llikipurkansapa.

⁵ Chaypina chay chakrayuk runa kashkan suk wiwachunta kachaptin paytaka wañuchirkansapa. Chaymanta aypa wiwachunkunata kacharkan. Sukkunata makarkansapa sukkunata wañuchirkansapa.

⁶ Chay chakrayuk runapa tiyarkanlla suk runa kachananpa. Paymi karkan sukaman kuyashkan wambran. Paytana kachashpa yuyarkan: “Kay wambraynita manchashpankuna kasunkasapa.” ⁷ Chaypina chay chakra kuydak runakuna patronpa wambranta kawashpankuna willanakurkansapa: “Mash kawaychi. Chay shamuykak runaka chakrayuk runapa wambranmi. Tatan wañuptin kay chakra paypa kiparinan tiyan. Kunanlla akuychi wañuchiypachi kay uva chakra ūukanchikunapa kiparinanpa.” ⁸ Chashna willanakushpankuna chay runapa wambranta apirkansapa. Chaymanta wañuchishpankuna uva chakra washaman wishchurkansapa.

⁹ Chaypina Jesuska tapurkansapa:

—¿Imatáti yuyankichi? Chay chakrayuk runaka ¿imatáti ruranka? Chay chakranman rishpa tukuy kuydak runakunata wañuchinka. Chaymanta chikan runakunata chakranta kunan tiyan kuydanankunapa. ¹⁰ Kankuna ¿manachu Tata Diospa killkadunta leyishkankichi? Chay killkadunpi riman: “Suk runa wasinta rumimanta ruraptin trabajadorninkuna suk alli sinchi rumita wishchurkansapa mana alli nishpa. Chashna wishchukuptinkunapish chay wasichakuk runaka chay wishchudu rumita wasi kallarinanpi churarkan.

¹¹ Chashna Tata Dios ruraptin sukaman almiranchisapa.”

¹² Chashna Jesus rimaptin chay chiknik runakuna allita entiendirkansapa paykunapa rimashpa chay ejempluta yachachikushkanta. Chayrayku apinayarkansapa. Apiyta munashpapish mana apirkansapachu runakunata manchashpankuna. Chayrayku Jesusta sakishpankuna kutirkansapa.

Jesusta tapurkansapa romano kamachikukta pagarankasapachu manachu nishpa.

(Mt 22.15-22; Lk 20.20-26)

¹³ Chaypina chay chiknik runakunaka sukaman Jesusta chatayta munashpankuna suk fariseokunawan Herodespa partidaryunkunata

kacharkansapa pantachichik mana allita rimananpa. ¹⁴ Chaypina chay kachadu runakunaka allipi tukushpangkuna Jesusta willarkansapa:

—Maestru, ñukaykuna yachanisapa mana llullakushpa allimallata yachachikunaykita. Tukuy runakunata yachachinki Tata Diospa munanana rurashpa kawsanankunapa. Kanmi tukuy runakunapa yuyayninkunata allita riksinki. Chayrayku ni pita manchashpa yachachikunki. Kunanka willawaysapa: Roma llaktapi sinchi kamachikuk kullkinikunata mañawaptinkuna ¿allichu manachu pagarakunaynikunapa? ¿Pagarakushasapachu manachu?

¹⁵ Chashna tapuptinkuna Jesuska allita yacharkan allipi tukushpangkuna pantachichinayanankunata. Chaypina willarkansapa:

—¿Imapatí pantachichiwanayaykankichi? Apamuychi suk kullkita kawanaynipa.

¹⁶ Chay runakuna kullkita kawachiptinkuna Jesuska tapurkansapa:

—¿Pipa uyantatí pipa shutintati killkaduta kawanaykichi?

Paykunaka aynirkansapa:

—Roma llaktapi kamachikuk Sesarpa uyanta shutinta kawanisapa.

¹⁷ Chashna ayniptinkuna Jesuska willarkansapa:

—Chay kamachikuk Sesarpa kaktaka payta kuychi. Chaymanta tukuy laya Tata Diospa kaktaka Tata Diösslata kuychi.

Jesus allimata ayniptinkuna chay pantachichinayak runakunaka suka-man almirarkansapa.

Jesus yachachikurkan wañudukuna kawsamunankunata.

(Mt 22.23-33; Lk 20.27-40)

¹⁸ Chaymanta saduseo runakuna rirkansapa Jesuswan parlak. Saduseokunaka yachachikuksapa mana ni pi wañushkanmanta kawsamunanta. Chayrayku paykunaka Jesusta willarkansapa:

¹⁹ —Maestru, ñawpa yachachikuk Moiseska yachachikurkan: “Suk kasadu ullku manara ni suk wambrayuk kashpa wañuptin wawkin viyuda kuñadanwan kasaranan tiyan. Chaypina chay warmi ullku wambrata wawayaptin wañudupa wambranshina kanan tiyan.” ²⁰ Mash uyariway. Tiyarkan kanchis wawkipura. Chaypina mayor wawkin kasararkan. Chay ullku manara niman suk wambrayuk kashpa wañurkan. ²¹ Chaymanta chay ishkaynin wawkin viyuda kuñadanwan kasararkan. Paypish wañurkan mana niman suk wambrayuk kashpa. Chaypina chay kimsaynin wawkin viyuda kuñadanwan kasararkan. Paypish wañurkan. ²² Tukuy chay wawkinkuna sukmanta sukmanta chay viyuda kuñadanllawan kasararkansapa. Kanchisnintin mana niman suk wambrayuklla wañurkansapa. Chaymanta chay warmipish wañurkan. ²³ Kunanka willawaysapa. Wañudu runakuna kawsamuptinkuna chay kanchis kusanmanta ¿maykan kakpati kanman warminka? Tukuy paykuna chay warmiwan kasaradu karkansapa.

²⁴ Chashna tapuptinkuna Jesuska willarkansapa:

—Kankunaka Tata Diospa killkadunta mana entiendishpa kikichilla llullachinakunkichi. Manami yachankichichu Tata Dios sukmanta atipak kashpa wañudukunata kawsachimunanta. ²⁵ Tata Dios wañudu runakunata kawsachimushkanwasha mana niman suk ullku niman suk warmi kasarankasapanachu. Sielupi kawsak angelkunashina kawsankasapa.

²⁶ ¿Manachu leyishkankichi Tata Diospa killkadunta? Chaypi riman wañudukuna kawsamunankunata. Chay ramasapa taksha kaspi rawraykak ukumanta Tata Dios Moisesta willarkan: “Ñuka Abrahampa Isakpa Jakobopa Tata Dios ninmi kani.” ²⁷ Chashna Tata Dios rimaptin yachanchisapa chay ñawpa awilunchikuna wañushkankunamanta kawsamushpankuna Tata

Dioswan kawsaykanankunata. Tata Dioska kawsak runakunallapa Dios-nimmi. Chayrayku kankunaka sukaman pantakudu kankichi.

Jesus yachachikurkan Tata Diospa kamachikunankunamanta su ashwan alli kananta.

(Mt 22.34-40)

²⁸ Chaymanta Moisespa killkadunta yachachikuk runa Jesus saduseokunata allita aynishkanta uyarishpa tapurkan:

—Maestru, Tata Diospa kamachikunankunamanta ¿maykantí ashwan alli kasunaynikunapa?

²⁹ Chaya tapuptin Jesuska willarkan:

—Tata Diospa kamachikunankunamanta ashwan alli kamachikunan riman: “Israel runakuna, uyariyichi: Kamachiwakninch Tata Dios suklal-lami. ³⁰ Tukuy shunku kamachikuk Tata Diosnikita kuyay. Tukuy layata allita rurashpa sukaman munashpa allita yuyaykushpa payta kuyanayki tiyan.” ³¹ Chaymanta chay ishkaynin kamachikunan riman: “Kikiki kuyanakukshina tukuy runamasikita kuyashpa kawsay.” Kay ishkay kamachikunankuna tukuy kamachikunankunamanta ashwan allima.

³² Chashna willaptin chay yachachikuk runaka willarkan:

—Maestru, allitami rimashkanki. Mana llullakushpa rimanki suklalla Tata Dios tiyananta. Manami paymanta chikan dios tiyanchu. ³³ Tata Diosta kuyashpa animalkunata wañuchishpa altarpri rupachishpa payta kushichinchisapa. Chaymanta ashwan allita Tata Diosta kushichinchisapa tukuy shunku payta kuyashpa sukaman munashpa tukuy layata allita rurashpa allita yuyaykushpa. Tata Diosta ashwanta kushichinchisapa kikinchi kuyanakukshina runamasinchikunata kuyashpa.

³⁴ Chay yachachikuk runa allita kuskanpi aynishkanta uyarishpa Jesuska willarkan:

—Tipillami illashunki Tata Diospa mandunpi yakyunaykipa.

Chashna Jesus willaptin manana ni pi animukurkannachu nimata tapuya.

Jesus yachachikurkan ashwan sinchi kamachikuk kananta.

(Mt 22.41-46; Lk 20.41-44)

³⁵ Chaymanta Jesuska Tata Diospa wasinpi yachachikuykashpa tapurkansapa:

—¿Imapatí Tata Diospa rimananta yachachikuk runakuna rimansapa Tata Diomsanta shamuk salvakuk runa Davidpa miraknin kananta? ³⁶ Tata Diospa Espiritun yanapaptin David rimarkan:

“Tata Dioska kamachiwak runata willarkan:

‘Alli laduynipi ñukawan tantalla tiyariy kamachikunaykipa tukuy chiknishuk runakunata saru saru ruranaynikaman kanta kasushunankunapa.’ ”

³⁷ Chay killkadu rimananpi Davidka rimarkan Tata Diomsanta shamuk salvakuk runa paypa sinchi kamachikuknin kananta. Kikin Davidpa kamachikuknin kaptinka ¿imashnatí paypa miraknin kanman?

Chashna Jesus yachachikuptin aypa runakuna sukaman kushikushpa uyarirkansapa.

Jesus Moisespa killkadunta yachachikuk runakunata piñayarkansapa.

(Mt 23.1-36; Lk 11.37-54; 20.45-47)

³⁸ Jesus yachachikuykashpa willarkansapa:

—Ama munaychichu Moisespa killkadunta yachachikuk runakunata uyariyta. Paykunaka suni llachapankunata churakushpangkuna plasaku-napi purinsapa. Sukaman munansapa tukuy runakuna manchashpangkuna

rimachinankunapa. ³⁹ Chaymanta tantanakunankuna wasikunapi ashwan alli bankukunapi tiyarinsapa. Suk fiestaman rishpankuna ashwan alli bankukunapi tiyarishpankuna mikunsapa. ⁴⁰ Paykunaka alli rurakshina yuyanakushpankunapish viyuda warmikunapa wasinkunata kichunsapa. Chay mana allita ruraykashpa sukaman sunita Tata Dioswan parlansapa runakuna rimanankunapa alli rurak kanankunata. Llullachikuk kaptinkuna Tata Dioska paykunata ashwan sinchita kastiganankuna tiyan.

*Mana nimayuk warmi chaylla tiyapushkanta Tata Diosta kurkan.
(Lk 21.1-4)*

⁴¹ Chaymanta suk diya Tata Diospa wasinpi ofrendata churanankuna kajon ladunpi Jesus tiyaridu karkan. Chaypi kawarkan aypa runakuna ofrendankunata churaykaptinkuna. Aypa tukuy layayuk runakunapish aypa kullkita churaykarkansapa. ⁴² Chaypina mana nimayuk viyuda warmi chayarkan. Payka ishkay kullkisillunkunata mana yaka chaniyukta churarkan. ⁴³ Chayta kawashpa Jesuska disipulunkunata kayashpa willarkansapa:

—Ñuka allita willaykichi. Kay viyuda warmika mana nimayuk kayakashpa chay aypa kullkiyuk runakunamanta ashwan alli ofrendata kukushka. ⁴⁴ Chay aypa kullkiyuk runakunaka puchushkan kullkinta Tata Diosta kun-sapa. Chay mana nimayuk warmika tukuy tiyapushkanta Tata Diosta kuyashpa kushka. Chayrayku payka Tata Diosta ashwanta kushichin.

13

Jesus rimarkan Tata Diospa wasin urmananta.

(Mt 24.1-2; Lk 21.5-6)

¹ Jesuska Tata Diospa wasinmanta llukshiykaptin suk disipulun willarkan: —Maestru, mash kaway kay allima rumikunawan ruradu Tata Diospa wasinta.

² Chashna kawachiptin Jesuska aynirkan:

—¿Allitachu kawaykanki kay allima ruradu manllayba wasita? Suk tiempukaman chiknik runakuna tukuy kay rumimanta ruradu wasita urmachingkasapa. Mana niman suk rumi sawapura kiparinkanachu.

Jesus yachachikurkan manara kay alpa kulluptinra imakunatami kawankasapa nishpa.

(Mt 24.3-28; Lk 21.7-24; 17.22-24)

³ Chaymanta Olivos urkuman rishpankuna Jesuska chaypi tiyarirkan. Chay urkuka Tata Diospa wasinmanta kuskanpi karkan. Chaypina Pedruwan Jakobowan Juanwan Andres chikanman rishpa Jesusta tapurkansapa:

⁴ —¿Aykapít Tata Diospa wasinta urmachinkasapa? ¿Imakunata kawashpatí yachaymansapa chay rimashkaykita ruranankunata?

⁵ Chaypina Jesuska aynirkansapa:

—Kuydanakuychi ama ni pi llullachishunaykichi. ⁶ Manara kutimuptinira aypa runakuna shamunkasapa ñukapi tukushpa willashuknikichi: “Ñukami Tata Diosmanta shamudu salvakuk runa kani.” Chashna rimashpankuna aypa runakunata llullachinkasapa.

⁷ Runakuna chikninakushpankuna kaypi chaypi makanakushpa wañuchinakunkasapa. Chayta yachashpaykichi ama manchakuychichu. Wañuchinakushpa kawsaptinkunapish manara tukunan tiempurachu. ⁸ Suk partipi kawsak runakuna chikan llaktapi kawsakkunawan sukaman chikninakushpa makanakushpa wañuchinakunkasapa. Aypa llaktakunapi alpa sinchita kuyunka. Chaymanta kaypi chaypi sinchi yarkay tiyanka.

Chashna runakuna chaykunawan sukaman sufrishpankuna ashwantara sufrinkasapa.

⁹ Kikikichi kuydanakuychi. Chay tiempu chiknishuk runakuna awtoridarkunapi chatashunkichi. Tantanakunankuna wasikunapi makashunkichi. Ñukata kreyiwashpa kawsashkaykichirayku awtoridarkunapi llaktakunapa ashwan sinchi kamachikukkunapi chatashuk pushashunkichi. Chaypina chay awtoridarkunata atipankichi willayta ñuka salvakuk kanaynita. ¹⁰ Manara kay alpapulluptin tukuy llaktakunapi yachachikunaykichi tiyan ñuka salvakuk kanaynita.

¹¹ Chay runakuna awtoridarkunaman chatashuk pushashuptikichi ama manchakushpa yuyaychichu imatami willankichi nishpa. Chashna oras Tata Dios yanapashunkichi kuskata rimanaykicipa. Manami kikikichimantachu rimankichi. Tata Diospa Espiritu yanapashunkichi allita rimanaykicipa.

¹² Chaymanta chay tiempu chay runakuna wawkinkunata chiknishpa awtoridarkunapi chatankasapa wañuchinankunapa. Suk runakuna wambrankunata chiknishpankuna chatankasapa. Sukkuna tatatanamanta chiknishpankuna wañuchinkasapa. ¹³ Tukuy pi kankunatapish chiknishunkichi ñukata kreyiwashkaykichirayku. Kankuna wañunaykichi diyakaman allita kreyiwashpa kawsaptikichi Tata Dioska kastigumanta salvashunkichi.

¹⁴ Chaymanta Jesuska willarkansapa:

—Tata Diospa wasinpi suk runa sukaman millanapa layata ruranka. Chayta ruraptin kawashpaykichi Judeapi kawsashpaykichi urukunaman nitikuychi. Kayta leyishpa allita entiendiychi. ¹⁵ Wasikichi altuyninpi kashpaykichika chayllamanta nitikuychi. Ama wasikichipi yaykuychichu nima tiyapushuknikichita surkuk. ¹⁶ Chashna oras chakraykicipi trabajaykashpaykichika chayllamanta nitikuychi. Ama wasikichiman kutiychichu nima llachapaykichita surkuk.

¹⁷ Chay sinchi llakina tiempu okupada warmikuna ñuñuchikuk warmikuna sukaman padesinkasapa. Chayrayku paykunata sukaman llakichini.

¹⁸ Kankunaka Tata Diosta roygaychi ama tamya tiempu nima samana diya nitikunaykicipa. ¹⁹ Chay tiempu sinchi llakina tiyaptin tukuy runakuna sukaman padesinkasapa. Tata Dios kay allpata rurashkanmantapacha manara chay laya llakina tiempu tiyashkanrachu. Nima chay tiempu washan chay laya llakina tiyankachu. ²⁰ Tata Dioska tukuy akllashkan runakunata kuyashkanrayku chay llakina tiempata tukuchanka. Mana utka tukuchaptinka tukuy runakuna wañunmansapa.

²¹ Chaymanta Jesuska yachachikuyllapi katirkana:

—Chay tiempu ichara suk runakuna willashunkichiman: “Mash kawaychi. Kaypinami chaypinami Tata Diomanta shamudu salvakuk runa.” Chashna willashuptinkuna ama kreyiychichu. ²² Aypa runakuna llullachikushpa rimankasapa Tata Diomanta shamudu salvakuk runakuna kanankunata. Sukkuna llullachikushpa rimankasapa Tata Dios kachamushkanta yachachikunankunapa. Paykunaka rikchak laya almirana milagrukunata rurankasapa. Chayta rurashpankuna Tata Dios akllashkankunatapish llullachinkasapa. ²³ Chay runakuna manara shamtinkunara ñiami willashkaykichina ama paykunata kreyinaykicipa. Chayrayku kuydanakushpa kawsaychi.

Jesus yachachikurkan imashnami kutimunka.

(Mt 24.29-35,42,44; Lk 21.25-36)

²⁴ Jesuska yachachikuyllapi katirkana:

—Chay sinchi sufrina tiempu tukuptinna inti tutayanka. Killa manana lusichikunkanachu. ²⁵ Luserukuna sielumanta urmamunkasapa. Sielipi llipyakkuna kuyunkasapa. ²⁶ Chaypina tukuy pi ñukata sielumanta shamudu runata kawawankasapa puyukuna ukunpi shamuptini. Sukaman llipyashpa shamuptini kawawashpankuna yachankasapa tukuy layata ruraya atipak kanaynita. ²⁷ Chaymanta angelnikunata kachashasapa allpapi sielipi kuchun mañankunamanta tukuy aklladuynikunata tantanachinankunapa.

²⁸ Suk igo kasrita kawashpa yachakuychi. Igo ramankuna velachakushpa aypata pankayaptin yachankichi veranu tiempu kananta. ²⁹ Chashnashina tukuy kay willashkaynita kawashpaykichi yachankichi ñuka utka kutimunaynita. ³⁰ Allita willaykichi: Manarapish kunan kawsak runakuna wañushpankunara tukuy kay willashkaynita kawankasapa. ³¹ Tukuy kay allpa sielukunapish kullunankuna tiyan. Kulluptinkunapish rimashkayni manami tukunkachu. Tukuy rimashkaynita rurasha. ³² Tata Diosllami yachan imay diyami imay orami kutimusha nishpa. Mana ni suk runa nima sielipi kawsak angelkuna yachansapachu. Ñuka Tata Diospa wambran kashpaynipish mana yachanichu aykapimi kutimusha nishpa.

³³ Kankuna mana yachankichichu imay orami shamusha nishpa. Chayrayku allita yuyaykushpa prontanakushpa shuyawaychi.

³⁴ Suk runapa ejemplunta uyariyichi. Chay runaka karu llaktaman riñanpa wiwachunkunata kayashpa willan wasinta allita kuydapunankunapa. Sukta supta willan imatami rurankasapa nishpa. Chaymanta supta willan punkuta allita kuydananpa. ³⁵ Ñuka iden chay wasiyuk runa kashpayni kankunata sakiykichi. Chayrayku uyari uyari shuyawaychi. Mana yachankichichu imay diyami kutimusha nishpa. Ichara chawpí tutata ichara gallo kantanan oras ichara diyapina kutimusha. ³⁶ Tukuy kayta willaykichi shamushpayni ama tarimunaynipa mana allita ruraykaptikichi. ³⁷ Kankunata willanaynita tukuy kreyiwak runakunatapish willaykani: Tukuy tiempu alli prontanakudu shuyawaychi.

14

Chiknik runakuna paktanakurkansapa Jesusta wañuchinankunapa.

(Mt 26.1-5; Lk 22.1-2; Jn 11.45-53)

¹ Chay tiempu Paskua fiestapa ishkay diyallana illarkan. Tukuy wata Paskua fiesta ukunpi judiyu runakuna amañaksapa mana levadurayuk pankunata mikuyta. Chaypina saserdotekunapa kamachikukninkunawan Moisespa killkadunta yachachikkuna yuyaykurkansapa llullachishpa Jesusta apishpa wañuchinankunapa. ² Sukkuna rimarkansapa:

—Ama Paskua fiesta ukun wañuchichiypachichu fiestaman shamudu runakuna ama turbakushpa piñayawananchikunapa.

Suk warmi Jesuspa umanpi mishkilla asnak wirata icharkan.

(Mt 26.6-13; Jn 12.1-8)

³ Jesuska Betania llaktaman rishpa suk runa Simonpa wasinpi yaykurkan. Simonka lasaru unkuymanta alliyadu karkan. Chaypina Jesus mesapi mikuykaptin suk warmi yaykurkan. Chay warmika apamurkan yurak rumimanta ruradu botellapi aypa chaniyuk mishkilla asnak wirata. Chay wira nardo shuti kaspimanta ruradu karkan.

Chay warmika chay botellata pakishpa chay mishkilla asnak wirata Jesuspa umanpi icharkan. ⁴ Chayta kawashpa chaypi kak runakunamanta sukkuna piñakushpankuna willanakurkansapa:

—¿Imapatí chay mishkilla asnak wirata usuchishka? ⁵ Ashwan alli kanman karkan kimsa pachak kullkipi rantikushpa chay chaninta mana nimayuk runakunata kunanpa.

Chashna rimashpa chay warmitaka washancharkansapa. ⁶ Jesus washanchashkankunata uyarishpa Jesus willarkansapa:

—¿Imapatí piñayashpa kay warmitaka michankichi? Kay wirata umaynipi ichashpa allitami rurashka. ⁷ Mana nimayuk runakunata tukuy maytapish rishpa tarinkichi munashkaykichi ora yanapanaykichipa. Ñukataka manami tukuy tiempunachu kawawankichi. ⁸ Kay warmika atipashkanta rurashka. Kay mishkilla asnak wirawanka ñami armachiwashkana wañluptini pam-pawanankunapa. ⁹ Allita willaykichi: Tukuy maypi runakuna ñuka salvakuk kanaynita yachachikushpankuna kay warmi kuyawashpa rurashkantapish parlachikunkasapa. Chashna modomanta tukuy pi paytaka yuyankasapa.

Judas Jesusta rantikurkan wañuchinankunapa.

(Mt 26.14-16; Lk 22.3-6)

¹⁰ Jesuspa chunka ishkay disipulunkunamanta suk karkan Judas Iskariote. Payka Jesusta rantikunayashpa rirkana saserdote awtoridarkunawan parlak. ¹¹ Paykunaka Judas rantikunayananta yachashpankuna suka-man kushikushpa willarkansapa kullkiti kunankunapa. Chay oramantapacha Judaska sukaman Jesusta apichichinayarkan. Maskarkan maypimi apichichinka nishpa.

Jesus disipulunkunawan Paskua fiesta mikunata mikurkansapa.

(Mt 26.17-29; Lk 22.7-23; Jn 13.21-30; 1 Kor 11.23-26)

¹² Chay Paskua fiesta kallarinan diya tukuy judiyu runakuna amañanisapa mana nima levadurayuk pankunata mikuya. Chaymanta Tata Diosta kuyashpaynikuna amañanisapa oveja wawanta wañuchiyyta. Chay diyana disipulunkuna Jesusta tapurkansapa:

—¿Maypití munanki rinaynikunapa Paskua fiesta mikunanchikunata rurak?

¹³ Chashna tapuptinkuna Jesuska ishkay disipulunkunata willarkansapa: —Rillyachi llaktaman. Chaypi tinkunakunkichi yaku puyñuta apaykak ullkuwan. Payta kataychi. ¹⁴ Chay runa suk wasipi yaykuptin chay wasiyuk runata willaychi: “Maestruynikuna yachanayan maypishi kay Paskua fiesta disipulunkunawan mikunkasapa.” ¹⁵ Chashna chay wasiyuk runata willaptikichi payka wasi altuyninpi allichadu kuartuta kawachishunkichi. Chaypi mikunanchikunata ruraychi.

¹⁶ Chashna Jesus willaptinkuna paykunaka llaktaman rirkansapa. Chaypina Jesus willashkankunatashina tukuya tarishpankuna Paskua fiesta mikunata rurarkansapa. ¹⁷ Chaymanta tutayaptinna Jesuska chunka ishkay disipulunkunawan chaypi chayarkan. ¹⁸ Chay mesapi tantalla mikuykashpankuna Jesus willarkansapa:

—Allita willaykichi. Ñukawan tantalla mikuykankichi. Kankunamanta sukmichaikniwak runakunapi rantikuwanka.

¹⁹ Chashna willaptinkuna chay disipulunkuna sukaman llakishpankuna sukmanta sukmanta Jesusta tapurkansapa:

—Ñukachu rantikushkayki?

²⁰ Chaypina Jesuska aynirkansapa:

—Chunka ishkay kankunamanta ñukawan tantalla kay kallanapi panninta ñuyuchik runami rantikuwanka. ²¹ Tata Diospa killkadunpi riman runakuna wañuchiwanankunata. Chayrayku ñuka sielumanta shamudu runa kashpayni wañusha. Wañunaynipe kaptinpish chay rantikuwak runata sukaman llaki-chini. Ashwan alli kanman karkan ama nasinanpa.

²² Chaymanta mikuykashpankuna Jesuska suk panta apishpa Tata Diosta agradesirkan. Chay panta pakishpa disipulunkunata kushpankuna willarkansapa:

—Kay panta mikuychi. Kay panka kuerpuynimi.

²³ Chaymanta Jesus suk vasu vinuta apishpa Tata Diosta agradesirkan. Chayta chaskichiptinkuna disipulunkuna upyarkansapa. ²⁴ Chaypina Jesuska willarkansapa:

—Kaymi yawarnini. Kaywanmi mushuk paktuta rurani. Wañushpayni yawarnini ichakuptin Tata Dioska aypa runakunata uchankunamanta perdonankasapa. ²⁵ Allita willaykichi. Uvamanta ruradu vinuta mana kutin upyashanachu Tatayni Diospa mandunpi kankunawan tantalla mushuk vinuta upyanaynikaman.

Jesus Pedruta willarkan mana riksinanta rimananta.

(Mt 26.30-35; Lk 22.31-34; Jn 13.36-38)

²⁶ Chaymanta Tata Diosta kuyashpankuna salmo kantukunata kantarkansapa. Kantashkankunawasha rirkansapa Olivo urkuman.

²⁷ Chaypina Jesuska disipulunkunata willarkansapa:

—Tata Diospa rimananpi willawanchisapa: “Ovejakuna kuydak runata wañuchisha. Chayrayku tukuy ovejankuna chayta chayta kallpankasapa.” Chay killkadupi rimashkanshina kunan tuta tukuy kankuna mana kreyiwakshina tukushpa sakiwankichi. ²⁸ Chaymanta ñuka wañushkaynimanta kashkan kawsamushpayni Galilea partiman kankunamanta ñawpakte risha.

²⁹ Chaypina Pedruka Jesusta willarkan:

—Tukuy katishukmasinikuna turbakushpa sakishuptinkunapish ñuka mana nima layapi sakishkaykichi.

³⁰ Chashna Pedru willaptinna Jesuska willarkan:

—Allita willayki. Kunan tutami manarapish gallo ishkay kuti kantaptin kimsa kuti rimanki mana riksiwanaykita.

³¹ Chaypina Pedruka sinchita willarkan:

—Kanwan tantalla wañunaynipish kaptin manami nima layapi rimashachu mana kanta riksinaynita.

Chashna Pedru willaptin tukuy disipulunkunapish idenllata rimarkansapa.

Getsemani wertapi Jesus Tatan Diosta roygarkan yanapananpa.

(Mt 26.36-46; Lk 22.39-46)

³² Chaymanta Getsemani wertaman rirkansapa. Chaypi chayashpankuna Jesuska disipulunkunata willarkansapa:

—Tatayni Dioswan parlak rinaynikaman kaypi tiyarishpa shuyawayachi.

³³ Chashna willashpa suk chikan laduman Pedruwan Santiagowan Juanta pusharkansapa. Chaypina sukaman turbakushpa sinchita llakirkan.

³⁴ Paykunata willarkansapa:

—Sukaman llakishpayni wañukshina mallinakuni. Kankuna kayllapi kiparishpa rikchadulla shuyawaychi.

³⁵ Chaypina urasilluman Jesuska rirkana. Chaypi kumurayarkan urkun allpapi takakunankaman. Tatan Diosta roygarkan pay munaptin ama chay sinchi nanayta mallinanpa. ³⁶ Tatan Diosta roygarkan:

—A, Tatayni, kan tukuy layata atipanki rurayta. Munashpaykika salvaway ama sukaman padesinaynipa. Padesishpaynipish munani kanpa munanaykillata rurayta. Manami munanichu ūukapa munanaynita rurayta.

³⁷ Chayta Tata Diosta willashkanwasha Jesuska chay kimsa disipulunkunapa ladunman kutirkan. Puñuykaptinkuna tarishpankuna Pedruta willarkan:

—Simon, ¿puñuykankichi? ¿Manachu niman suk orata mana puñushpa atipashkanki Tata Dioswan parlayta? ³⁸ Mana nima puñushpa Tata Diosta mañaychi supay ama uchallichishunaykichipa. Kankunaka sukaman munankichi Tata Diosta mañayta. Chaykamanka utka shaykunkichi.

³⁹ Chashna willashpankuna Jesuska kashkan rirkana Tatan Diosta roygashkan layallata roygak. ⁴⁰ Chaymanta chay kimsa disipulunkunaman kutishpa kashkan tarirkansapa sukaman puñuykaptinkuna. Paykunaka puñuya mana muchurkansapachu. Chayrayku mana yacharkansapachu imatami ayninkasapa nishpa. ⁴¹ Chaymanta Jesus kimsaynin kuti puñuduta tarishpankuna willarkansapa:

—¿Kunankamanchu puñuykashpa samaykankichi? Chaylla kachun. Ñami orayni chayamushkana ūukata sielumanta shamudu runata uchasapa runakunapi apichichiwanankunapa. ⁴² Atarimuychi. Akuychina. Ñami shamuykanna chay rantikuwak runaka.

Chiknik runakuna Jesusta apishpa pusharkansapa.

(Mt 26.47-56; Lk 22.47-53; Jn 18.2-11)

⁴³ Jesus chayta rimaykaptinllara disipulun Judaska aypa runakunata pushashpankuna chayarkan. Paykuna kaspikunawan ishkantin ladupi filuyuk machetikunata apashpa rirkansapa Jesusta pushak. Rirkansapa kamachikuk saserdotekunawan Moisespa kamachikunankunata yachachikuk runakunawan judiyukunapa ansianunkuna kachaptinkuna. ⁴⁴ Judaska pusharkan chay runakunata allita yachachishpankuna: “Suk runata muchaptini yachankichi pay kananta. Paytami allita apishpa pushankichi.” ⁴⁵ Chashna Judas paykunata yachachishpa Jesusta ladunchashpa willarkan:

—¡Maestro!

Chashna willashpa mucharkan.

⁴⁶ Chaypina chay runakuna Jesustaka apirkansapa pushanankunapa.

⁴⁷ Chayta kawashpa Jesuswan purik runa machetinta apishpa suk runapa rinrinta tipipurkan. Chay runa karkan sinchi kamachikuk saserdotepa wiwachun.

⁴⁸ Chaypina Jesuska chay pushanayak runakunata tapurkansapa:

—¿Imapatí kaspikunata machetikunata apamushkankichi apiwanaykichipa? ¿Ariya ūukachu suwa wañuchikuk runa kani? ⁴⁹ Tukuy diya Tata Diospa wasinpi yachachikuykaptini mana chaypi apiwashkankichichu. Ñawpa yachachikukkuna Tata Dios rimashkanta killkarkansapa kashna apiwanaykichipa. Chay killkashkankunashina kunan apiwaykankichi wañuchiwanaykichipa.

⁵⁰ Tukuy disipulunkuna Jesusta apishkankunata kawashpankuna sapal-lanta sakishpankuna nitikurkansapa. ⁵¹ Suk wayna sabanasllanwan wankunakushpa katiykarkan. Chay Jesusta pushak runakuna payta apirkansapa. ⁵² Chashna apiptinkuna chay sabanasninta sakishpa llatanlla nitikurkan.

Chay ashwan sinchi kamachikuk saserdoteman Jesusta pusharkansapa.
(Mt 26.57-68; Lk 22.54-55, 63-71; Jn 18.12-14, 19-24)

⁵³ Chay aypa runakuna Jesusta apishpa pusharkansapa ashwan sinchi kamachikuk saserdotepa wasinman. Chaypi saserdotekunapa kamachikuknawan Moisespa killkadunta yachachikuk runakunawan judiyukunapa ansianunkuna tantanakurkansapa.

⁵⁴ Jesusta pushaptinkuna Pedruka karumanta katishpa kamachikuk saserdotepa wasin pampapi yaykurkan. Tata Diospa wasinta kuydak runakuna chay pampapi tiyaridu ninapi mashakuykarkansapa. Pedrupish paykunapa ladunkunapi rirkana tiyari kashkan.

⁵⁵ Chay wasi ukupi saserdotekunapa kamachikukninkunawan tukuy awtoridarkuna tantanakurkansapa. Chaypina tapunakurkansapa imashnami Jesusta chatankasapa wañuchinankunapa. Chashna tapunakushpankunapish mana nima uchanta tarirkansapachu chatanankunapa. ⁵⁶ Aypa runakuna llullakushpa Jesusta chataptinkunapish sukfish sukfish chikan layata rimarkansapa. ⁵⁷ Chaypina suk runakuna shayarishpa llullakushpa Jesusta chatarkansapa:

⁵⁸ —Ñukaykuna uyarishkanisapa kay Jesus rimashkanta: “Ñukami runakuna rurashkankuna Tata Diospa manllayba wasinta urmachisha. Chayta urmachishkayniwasha kimsa diya ukun tukuchasha kashkan rurayta. Mana runakuna rurashkan layatachu rurasha.”

⁵⁹ Chashna chatashpankunapish mana atiparkansapachu chay layallata chataya. ⁶⁰ Chaypina saserdotekunapa ashwan sinchi kamachikukninkuna chawpinkunapi shayarishpa Jesusta tapurkan:

—¿Manachu nimata aynikunki? ¿Imatati chatashuykankisapa?

⁶¹ Chaypina Jesuska upallalla uyarirkan. Mana nimata ayniptin chay sinchi kamachikuk saserdoteka kashkan tapurkan:

—¿Ariya kanchu kanki shuyaykanaynikuna salvakuk kuyanaynikuna Tata Diospa wambran?

⁶² Chashna tapuptin Jesuska aynirkana:

—Ariya, ñukami kani. Kankuna ñukata sielumanta shamudu runata kawawankichi tukuy laya atipak Tatayni Diospa ladunpi tiyariptini. Kawawankichi puyukuna ukunpi kashkan shamuptini.

⁶³ Chashna Jesus willaptin chay sinchi kamachikuk saserdoteka suka-man piñakushpa sawa llachapanta llikirkan. Chayta rurarkan tukuy chay runakuna yachanankunapa sukaman piñakunanta. Chaymanta chay kamachikukmasinkunata willarkansapa:

—¿Imapatí ashwan chatakuk runakunata maskashunchisapa?

⁶⁴ Kankunami rimashkanta allita uyarishkankichi. Kay runaka chashna rimashpa Tata Diostami sukaman piñachishka. ¿Imatati yuyankichi?

Chashna tapuptinkuna paykunaka suk layallata aynirkansapa:

—¿Payka uchayukmi chayrayku wañunan tiyan!

⁶⁵ Chaypina sukkuna Jesustaka tukaycharkansapa. Sukkuna ñawinta arka-pushpankuna makashpa willarkansapa:

—May willawaysapa pimi waktashuykan.

Tata Diospa wasinta kuydak runakunapish Jesusta uyanpi lapyarkansapa.

Pedru kimsa kuti rimarkan Jesusta mana riksinanta.

(Mt 26.69-75; Lk 22.56-62; Jn 18.15-18, 25-29)

⁶⁶ Chay wasi altuyninpi Jesusta asichiykaptinkuna Pedruka uray pampapi karkan. Chaypina chay sinchi kamachikuk saserdotepa shipash wiwachan

shamurkan. ⁶⁷ Pedru ninapi mashakuykaptin chay warmika kawashpa willarkan:

—Nasaretmanta runa Jesuswan kanpish tantalla purishkanki.

⁶⁸ Chashna willaptin Pedruka llullakushpa willarkan:

—Mana riksinichu. Nima yachanichu pipami willawaykanki nishpa.

Chayta rimashpa chay wasi punkuman llukshirkana. Chaypi kaptin suk gallo kantarkan.

⁶⁹ Chaymanta chay shipash Pedruta kashkan kawashpa chay runakunata willarkansapa:

—Kay runapish Jesuspa purikmasinmi.

⁷⁰ Pedru kashkan llullakushpa rimarkan mana riksinanta. Chay washan chaypi runakuna Pedrutaka kashkan willarkansapa:

—Deverasmi kanpish kanki Jesuspa purikmasin. Galileamanta runami kanki.

⁷¹ Chaypina Pedruka jurashpa rimarkan:

—Ñukaka manami riksinichu chay willawaykanaykichi runata.

⁷² Pedruka chayta rimaykaptinlla kashkan gallo kantarkan. Chayta uyarishpana Pedruka yuyarkan Jesus willashkanta: “Manarapish gallo ishkay kuti kantaptin kimsa kuti rimanki mana riksiwanaykita.” Chayta yuyashpa sukaman llakishpa wakakurkan.

15

*Jesusta pusharkansapa Pilatoman.
(Mt 27.1-2, 11-14; Lk 23.1-5; Jn 18.28-38)*

¹ Chaymanta pakariykapitina kamachikuk saserdotekunawan judiyu ansianukunawan Moisespa killkadunkunata yachachikukkuna tantanakurkansapa. Paykunaka Jesusta watashpa pusharkansapa gobernador Pilatoman. ² Chaypina Pilatoka Jesusta tapurkan:

—¿Kanchu judiyu runakunapa ashwan sinchi kamachikuknin runa kanki?

Chashna tapuptin Jesuska aynirkan:

—Ariya, ñukami kani.

³ Chaypina kamachikuk saserdotekunawan judiyu ansianukuna Jesusta sukaman chatarkansapa. ⁴ Chashna chataptinkuna Pilatoka Jesusta kashkan tapurkan:

—¿Imapatí chatashuk runakunata mana ayninki? Mash uyariy. Kay runakunaka rikchak layata chatashuykankisapa.

⁵ Pilato tapuptinpish Jesuska mana nimata aynirkanchu. Chayrayku Pilatoka sukaman almirarkan.

*Chiknik runakuna Pilatota roygarkansapa Jesusta wañuchichinanpa.
(Mt 27.15-31; Lk 23.13-25; Jn 18.38-19.16)*

⁶ Tukuy wata Paskua fiesta ukun Pilato amañarkan karselmanta suk runata kachariyta. Runakunata tapuksapa maykan runatami kacharinka nishpa. ⁷ Chay tiempu karselpi aypa wichkadu runakunawan su runa Barrabas karkan. Chay runakuna romano gobiernuta mana kasunayashpankuna soldadunkunawan makanakurkansapa. Chay makanakuypi soldadukunata wañuchirkansapa. Chayrayku karselpi wichkadu karkansapa.

⁸ Chaypina aypa runakuna tantanakushpankuna Pilatota roygarkansapa amañashkantashina suk runata karselmanta kacharinanpa. ⁹ Chayta roygaptinkuna Pilatoka tapurkansapa:

—¿Munankichichu kay sinchi kamachishuknikichita kacharinaynipa?

10 Pilatoka allita yacharkan kamachikuk saserdoteckuna Jesusta chiknish-pankuna chatashkankunata. Chayrayku chayta tapurkansapa.

11 Chaypina kamachikuk saserdoteckunaka chay aypa tantanakudu runakunata sukaman willarkansapa Pilatota royanankunapa Barrabasta kacharinanpa. **12** Barrabasta kacharinanpa roygaptinkuna Pilatoka kashkan tapurkansapa:

—¿Imatáti kay Jesusta rurasha? Paypa rimankichi sinchi kamachishuknichi kananta.

13 Chashna tapuptinkuna kashkan sinchita rimashpa willarkansapa:

—¡Kruspi chakatachiy!

14 Chaypina Pilatoka tapurkansapa:

—¿Ima mana allitáti rurashka wañuchichinaynipa?

Chaypina chay runakuna ashwan sukaman sinchita rimashpankuna kashkan willarkansapa:

—¡Kruspi chakatachiy!

15 Chay runakuna sukaman piñakushpa kapariptinkuna Pilatoka paykunata kushichinayashpa Barrabasta kacharirkan. Chaymanta Jesusta suk karawaskawan asutichishkanwasha soldadukunata willarkan suk kruspi chakatashtpa wañuchinankunapa.

16 Chaypina soldadukuna Pilatopa wasin pampanman Jesusta pusharkansapa. Chaypi aypa soldadumasinkunata tantanachirkansapa Jesusta asichinankunapa. **17** Kamachikkunapa puka llachapata mudachishpankuna umanpi kashayuk waskamanta awadu koronata churapurkansapa. **18** Sukaman asichishpankuna ñawpkainipi kunkurikushpa willarkansapa:

—Kanmi judiyu runakunapa ashwan sinchi kamachikuknini kanki.

19 Chaypina soldadukuna Jesusta tukaycharkansapa. Suk pintuwan umanpi waktarkansapa. Kuyak tukushpankuna ñawpkainipi kunkurikurkansapa. **20** Sukaman asichishkankunawasha chay puka llachapata surkupushpankuna kashkan kikinpa llachapanta mudachirkansapa. Chaymanta pusharkansapa suk kruspi chakatak.

Kruspi chakatashtpa Jesusta wañuchirkansapa.

(Mt 27.32-44; Lk 23.26-43; Jn 19.17-27)

21 Chaymanta Sirene llaktamanta runa Simon chakranmanta kutiykarkan. Jesusta kruspi chakatak pushaykaptinkuna Simonka chayta riykarkan. Paypa wambrankuna Alejandrowan Rufo karkansapa. Chay soldadukuna Simonta apishpankuna Jesuspa krusninta wantuchirkansapa.

22 Jesusta pusharkansapa suk taksha urku Golgotaman. Chay Golgota shuti judiyu rimananpi riman Uma Poto. **23** Chaypina ayakwan chakrudu vinuta Jesusta upyachinayarkansapa susuchinanpa. Upyachinayaptinkunapish Jesuska mana munrankanchu upyayta.

24 Chaypina soldadukunaka Jesusta kruspi chakatarkansapa. Paypa llachapunkunata patumanakunankunapa pukllarkansapa yachanankunapa pipami kiparinka nishpa.

25 Las nueve oras kaptin Jesusta chakatarkansapa. **26** Jesuspa uman kuskapi churarkansapa suk killkaduta tukuy runakuna yachanankunapa imapami wañuchishkasapa nishpa. Chay killkadupi rimarkan: “Kay runaka judiyu runakunapa ashwan sinchi kamachikuknimi.”

27 Jesuspa ishkantin ladunpi ishkay suwa runakunatapish chakatarkansapa. **28** Tata Diospa rimananpi killkadu karkan: “Mana alli rurak runakunawan tantallata wañuchinkasapa.”

29 Aypa runakuna rirkansapa Jesusta kawak. Paykunaka umankunata kuyuchishpankuna Jesusta asichishpankuna willarkansapa:

—Ja, mash kaway! Kanmi rimashkanki Tata Diospa manllayba wasinta urmachishpayki kimsa diya ukunlla kashkan ruranaykipa. **30** Kunanka kikillakachay krusmanta urayamushpa salvanakuy.

31 Chashnalla kamachikuk saserdote kunawan Moisespa killkadunta yachachikuk runakunaka Jesusta asichishpa willarkansapa:

—Payka aypa runakunata salvashkasapa. Kunanka kikin mana atipanchu salvanakuya. **32** Shuyananchikuna salvakuk runa kashpaka krusmanta urayamuchun. Urayamushkanta kawashpanchikunara kreyishunchisapa sinchi kamachiwakninchikuna kananta.

Chaypina chay ishkay ladunpi chakatadu suwakunapish Jesusta asichirkansapa.

Jesus kruspi wañurkan.

(Mt 27.45-56; Lk 23.44-49; Jn 19.28-30)

33 Jesus kruspi chakataduna kaptin chawpi diyamantapacha las tres de la tardikaman sukaman tuta likidu tukurkan. **34** Chay oraslla Jesuska sinchita rimarkan: “Eloi, Eloi ¿lama sabaktani?” Chay rimakushkan judiyu rimananpi riman: “Tata Diosnini, Tata Diosnini ¿imapatí sakiwashkanki?”

35 Chay rimashkanta uyarishpana chay runakuna willanakurkansapa:

—Uyariyichi, kay runaka ñawpa yachachikuk Eliyastami kayaykan.

36 Chaypina suk runa kallpassha pintupa puntanta chiktarkan utkuta churana nampa. Chayta ayak likidu vinupi sumichishpa Jesuspa shiminpi churarkan shukunanza. Chayta rurashpa sukkunata willarkansapa:

—¡Upallayaychi! Akuychi kawaypachi Eliyas shamunkachu manachu krusmanta urayachik.

37 Chaypina Jesuska sinchita kaparikushpa wañurkan. **38** Jesus wañushkan oralla Tata Diospa wasinpi warkudu arkana llachapa llikikurkan. Anaknina nampa urayinkaman llikikurkan chay alli arkadu kuartu rikurinanpa.

39 Soldadukunapa kapitanninkunka Jesuspa ñawpakninpí shayaridu karkan. Jesus wañuptin kawashpa rimarkan:

—¡Deverasmi kay runaka Tata Diospa wambran kashka!

40 Aypa warmikunapish karullamanta Jesus wañushkanta kawarkansapa. Chay kawak warmikunamanta Mariya Magdalena wan chay wayna Santiago Josepa mamankunka Mariyawan Salome karkansapa. **41** Jesus Galileapi yachachikuykaptin tukuy chay warmikuna payta katishpankuna sukaman sirvirkansapa. Chaymanta Jesus Jerusalenman riptin aypa warmikunka katirkansapa.

Suk machaypi Jesusta pamparkansapa.

(Mt 27.57-61; Lk 23.50-56; Jn 19.38-42)

42 Manara samana diya kallariptin chay fiestapa prontanakunankuna diya amusayaykarkan. **43** Chaypi tiyarkan Arimatea llaktamanta Jose. Chay Jose judiyukunapa sinchi kamachikukninkunka karkan. Paypish shuyaykarkan Tata Diosmanta sinchi kamachikuk runa shamusnanta. Chay Joseka Pilatoman rirkanku Jesuspua kuerpunta mañakuk. **44** Chayta mañaptin Pilatoka Jesus utka wañushkanta yachashpa sukaman almirarkan. Chaypina allita yachanayashpa soldadunkunapa kapitanninkunka kayachirkan tapunanza deveraschu Jesus wañushkana nishpa. **45** Chay kapitan deveras wañushkanta willaptin Pilatoka willarkan Jesuspua kuerpunta Joseta kunanpa.

⁴⁶ Chaypina Joseka suk allima yurak sabanasta rantirkan. Chaywan Jesuspa kuerpunta krusmanta urayachimushpa wankurkan. Allita wankushpa pusharkan atun rumipi aspidu machaypi churak. Chaypi churashkanawasha punkunta manllayba rumiwan allita wichkarkan.
⁴⁷ Mariya Magdalenawan Josepa maman Mariya chaypi churashkanta kawarkansapa.

16

Jesus wañushkanmanta kawsamurkan.
(Mt 28.1-10; Lk 24.1-12; Jn 20.1-10)

¹ Chaymanta samana diya washan Mariya Magdalena Santigopa mamañ Mariyawan Salomewan rirkansapa mishkilla asnak wirata rantik Jesuspa kuerpunta tupapunankunapa. ² Chaypina semana kallarinan diya pakariyaptin inti chayrak llukshimuykaptin Jesusta pampashkankuman rirkansapa. ³ Paykunaka riyakashpankuna willanakurkansapa:

—¿Pití machaypa punkunmanta chay manllayba rumita ashuchipanchimansapa?

⁴ Chaypi chayashpankuna kawarkansapa chay punku wichkana manllayba rumita ña ashuchidutana. ⁵ Chay machay ukuman yaykushpankuna aliñ ladunpi suk wayna tiyariduta kawarkansapa. Payka suni yurak llachaypuk karkan. Chay warmikuna payta kawashpankuna sukaman manchakurkansapa. ⁶ Chaypina chay waynaka willarkansapa:

—¡Ama manchakuychichu! Ñuka yachani shamushkaykichita Nasaretmanta Jesusta kruspi chakatadu kashkata kawak. ¡Ñami payka kawsamushkana! Mananami kaypinachu. Mash kawaychi maypicha churashkankunata. ⁷ Kunanka disipulunkunata Pedrutapish rillarychi willak Jesus Galileaman kankunamanta ñawpakta rinanta. Chaypi willashushkaykichishina payta kawankichi.

⁸ Chayta willaptinkuna chay warmikunaka chay machaymanta llukshishpa kallparkansapa. Manchakuyninkunawan sükaman chukchukushpankuna manara ni pita kawashkankunata parlachirkansaparachu.

Jesus Mariya Magdalenapi ishkay disipulunkunapi rikurirkan.
(Jn 20.11-18)

⁹ Chaymanta semana kallarinan diya Jesus kawsamushkanawasha tutapachalla Mariya Magdalenapi rikurirkan. Chay Mariyamanta ñawpa tiempu Jesus kanchis supaykunata llukshichipurkan. ¹⁰ Chaypina Mariyaka Jesuspa purikmasinkunata rirkana willak paypi Jesus rikurishkanta. Paykuna manara kawsamushkanta yachashpara llakishpa wakaykarkansapa. ¹¹ Mariya Jesusta kawsamuduta kawashkanta willaptinkunapish mana kreyirkansapachu.

Jesus ishkay purikmasinkunapi rikurirkan.
(Lk 24.13-35)

¹² Chaymanta ishkay purikmasinkunapi Jesuska rikurirkan. Paykunaka chakraman riyatkansapa. ¹³ Jesus paykunapi rikuriptin kutirkansapa purikmasinkunata willak Jesusta kawashkankunata. Chashna willaptinkunapish mana nima kreyirkansapachu.

Jesus disipulunkunata yachachirkansapa.
(Mt 28.16-20; Lk 24.36-49; Jn 20.19-23)

¹⁴ Chay washa chunka suk disipulunkuna mesapi mikuykaptinkuna paykunapi Jesuska rikurirkan. Paykunata piñayarkansapa mana kreyikuk

sinchi shunku kashpa kawsamushkanta kawashka runakunata mana kreyiptinkuna. ¹⁵ Chaypina willarkansapa:

—Rillaychi tukuy allpapi kawsak runakunata willak ūukata kreyiwak runakunata kastigumanta salvanaynita. ¹⁶ Suk runakuna kreyiwashpa bawtisakuptinkuna uchankunamanta salvasha. Suk runakuna mana kreyiwaptinkuna kastigasha. ¹⁷ Ņukata kreyiwashpa kawsashpaykichi atipankichi shutinipi supaykunata runakunamanta ūukshichiyta. Mana yachashkaykichi laya rimanakunapi rimakunkichi. ¹⁸ Machakuykuna mana nimanachishunkichichu. Ima venenotapish upyachishuptikichi mana nimanachishunkichichu. Chaymanta unkudukunapa umankunapi makikichita churaptikichi alliyankasapa.

*Jesus sielman kutirkan.
(Lk 24.50-53)*

¹⁹ Jesus tukuy chayta disipulunkunata willashkankunawasha Tata Dioska sielman pusharkan. Chaypi alli ladunpi tiyachirkan. ²⁰ Chaymanta Jesus willashkankunashina disipulunkuna tukuy mayta rirkansapa yachachikuk. Jesus yanaparkansapa milagrukunata ruranankunapa runakuna yachachikuskankunata kreyinankunapa.

Chayllami kashka.

JESUKRISTU KAY ALLPAPI KAWSASHKANTA SAN LUKAS KILLKARKAN

¹⁻³ Munanayni Teofilo, ūuka Lukas kayta killkaykayki allita yachanaykipa Jesus tukuy rurashkankunata yachachikushkankunatapish. Aypa runakuna Jesus kallarinanmantapacha rurashkankunata kawarkansapa. Paykunaka ūukaykunata allita yachachiwarkansapa. Chaymanta paykuna Jesus rurashkankunata allita yachachikushpa killkarkansapa. Chashna yachachikuptinkuna kanpish uyarishkanki. Ñawpamantapacha ūukapish Jesus tukuy rurashkankunata allita yachanayashpa chay kawashka runakunata tapushkani. Paykuna willawaptinkuna allita killkashkani. ⁴ Kunanka kay killkaduynita kachaykayki kanpish allita yachanaykipa chay runakuna kuskata yachachishushkankuna deveras kananta.

Suk angel saserdote Sakariyasta willarkan wambran nasinanta.

⁵ Ñawpa tiempu Judea partipi sinchi kamachikuk Herodes kamachikuykaptin suk saserdote tiyarkan. Paypa shutin karkan Sakariyas. Sakariyaspa ayllunpa shutin karkan Abiyas. Warmin karkan Isabel. Isabelka ñawpa tiempu saserdote Aronmanta mirashkan ayllun karkan.

⁶ Sakariyaska warmintin Tata Diosta allita kasushpankuna kawsaksapa. Chayrayku mana ni pi paykunata chatayta atiparkansapachu. ⁷ Paykunaka mana niman suk wambrayukchu karkansapa. Isabelka mana ni suk kuti wawayarkanchu. Paykunaka mana ni suk wambrayukna viejuyarkansapa.

⁸ Tata Diospa manllayba wasinpi saserdoteckuna sukmanta sukmanta akllanakushpa suk semanata trabajaksapa. Chaypina suk diya Sakariyaska ayllunkunawan tantalla rirkansapa Tata Diospa wasinpi trabajak. ⁹ Chay saserdoteckunapura akllanakusapa yachanankunapa ima laya trabajutami rurankasapa nishpa. Chashna akllanakushpankuna Sakariyasta akllarkansapa ashwan ukuman Tata Diospa wasinpi yaykunarpa. Akllarkansapa taksha altarpis mishkilla asnak wikita rupachinanpa. ¹⁰ Sakariyas wikita rupachiykaptin Tata Diospa wasin pampapi aypa runakuna oraykarkansapa. ¹¹ Chaypina Sakariyapi rikurirkan Tata Diospa angelin. Chay angelka shayarirkan altarpa alli ladunpi. ¹² Payta kawashpana Sakariyaska almirashpa sukaman manchakurkan. ¹³ Chashna manchakuptin angelka willarkan:

—Sakariyas, ama manchakuychu. Kanka sukaman Tata Diosta mañashkanki suk wambraykita kushunarpa. Chashna mañaptiki Tata Dioska ñami uyarishushkana. Warmiki Isabelka ullku wambratami wawayanka. Paypa shutinka Juanmi kanka. ¹⁴ Wambrayki nasiptin sukamanmi kushikunki. Aypa runakunapish kawashpankuna kushikunkasapa. ¹⁵ Wambraykika alli yachaysapami kanka. Manarapish nasiptin Tata Diospa Espiritun paypi kawsanka. Niman suk kuti payka nima vinuta nima traguta upyankachu.

¹⁶ Wambraykika wiñashpana aypa israelmasinkunata yanapankasapa mana kasushkankunamanta Tata Diosta allita kasushpana kawsanankunapa. ¹⁷ Tata Dios sukaman yanapaptin wambraykika ñawpa alli yachachikuk Elyasshina sukaman yachaysapa runa kanka. Tata Diosta mana kasuk runakunata kuskata yachachinkasapa payta kasushpa kawsanankunapa. Tatakunata yachachinkasapa wambrankunawan

mana kuyanakushkankunamanta allita kuyanakushpa kawsanankunapa. Manarapish Tata Dios kachamushkan wambran yachachikuptinra wambraykika runakunata yachachinkasapa pay chayamuptin allita chaskinankunapa.

¹⁸ Chashna willaptin Sakariyaska angelta willarkan:

—Ñukaka warminiwan viejuna kanisapa. ¿Imashnati allita yachayman wambrayuk kanaynikunata?

¹⁹ Chashna Sakariyas tapuptin angelka willarkan:

—Ñukami kani Tata Diospa sirviknin Gabriel. Payka kachamuwashka kanta willanaynipa wambrayki tiyananta. ²⁰ Mana kreyiwashkaykirayku kunanmantapacha wambrayki nasinan diyakaman mana rimakuy atipak kiparinki.

²¹ Chashna angel parlachiyyaptin aypa runakuna Sakariyas llukshimunanta shuyaykarkansapa. Paykunaka tapunakurkansapa:

—¿Imapati sukamanka unayan?

²² Chaypina Sakariyaska llukshimurkan mana rimakuy atipakna. Chayrayku makinwan umanwan chay runakunataka entiendichirkansapa angelwan parlashkanta.

Chaymanta Sakariyaska mana rimakuy atipak karkan chay wambran nasinan diyakaman. ²³ Payka Tata Diospa wasinpi trabajunta paktachishpa wasinman kutirkan. ²⁴ Wasinman kutishkanwasha warmin Isabelka okupadana kiparirkan. Chashna okupada kashpa pichka killata wasinmanta mana nima llukshirkannachu. Wasinpi kiparishpa yuyanakurkan:

²⁵ —Tata Diosmi yanapawashka wawayanaynipa ama runakuna pinkachiwanankunapa mana wawayuk kaptini.

Angel Gabriel suk shipash Mariyata willarkan Jesus nasinanta.

²⁶⁻²⁷ Galilea partipi Nasaret llaktapi tiyarkan suk sensilla shipash. Shutin karkan Mariya. Payka suk runa Josewan kasarananpa mañadu karkan. Joseka karkan ñawpa kamachikuk Davidmanta mirashkan runa. Chaypina Isabel sokta killa okupada kaptin Tata Dioska kacharkan angel Gabrielta chay shipash Mariawan parlak. ²⁸ Chay angelka Mariyapi rikurishpa willarkan:

—Tata Diospa shutinpi rimachiyyki. Tata Diosmi sukaman kuyashush-payki yanapashunki.

²⁹ Chashna angel willaptin Mariyaka sukaman manchakurkan. Shunkunpi yuyaykushpa rimarkan: “¿Imapati kay angelka chashna willawan?”

³⁰ Chaypina angelka willarkan:

—Mariya, ama manchakuychu. Tata Dios kuyashushpa akllashushka.

³¹ Kunanmantapacha okupada kiparinki. Suk ullku wambrata wawayanki. Chay wawaykita shutiyachinki Jesus. ³² Payka alli yachaysapa runami kanka. Runakuna payta riksinkasapa tukuy laya atipak Tata Diospa wambran kananta. Tata Dios paytaka churanka sinchi kamachikuk kananpa. Iden ñawpa tiempu awiluyki Davidshina sukaman allita kamachikunka. ³³ Payka israelmasinkunata mana tukuyniyukta kamachinka.

³⁴ Chashna angel willaptin Mariyaka willarkan:

—¿Imashnatiya wawayasha manara nima ullkuwan tantanakushpaynira?

³⁵ Chashna Mariya tapuptin angelka willarkan:

—Tata Diospa Espiritunmi tukuy laya atipak kashpa puyushina kuskalla kanman urayamunka. Chashnamanta okupada kiparinki. Chayrayku wawaykika Tata Diospa kachamushkan wambran kanka. Payka Tata Diospa

munananllata ruranka. ³⁶ Chaymanta aylluuki Isabelpish sokta killa okupadana. Payka mana nima wawayukchu kashka. Kunan viejana kaykash-pipish ullku wambratami wawayanka. ³⁷ Tata Dios tukuy layatami atipan ruraya.

³⁸ Chashna angel willaptin Mariyaka willarkan:

—Ñuka Tata Dios willawananta tukuya almitikuni. Tukuy willawashkaykitashina ñukapi payka rurachun.

Chashna Mariya almitiptin angelka sakirkan.

Mariya ayllun Isabelta rirkana pasyak.

³⁹ Chay angel sakishkanwasha Mariyaka utkakushpa rirkana chay aylun Isabelta pasyak. Isabelta kusan Sakariyaswan kawsarkan suk llaktapi chay Judea partipi urkukunapa chawpinpi. ⁴⁰ Sakariyaspa wasinpi chayashpa Mariyaka Isabeltaka rimachirkan. ⁴¹ Chashna Mariya rimachiptinna Isabelpa wawanka wiksan ukupi kaykashpa kushikuyninwan sukaman kuyurkan. Chashna oras Tata Diospa Espiritun Isabelta sukaman kushichirkan. ⁴² Chaypina Isabelta Mariyataka sinchita rimashpa willarkan:

—Tata Dioska tukuy warmikunamanta kantami ashwan allita kushichishushka. Wawaykitapish sukaman allita kushichishka. ⁴³ Kanka kamachiwak Señorninipa mamanmi kanki. Chayrayku ñuka mana igualmasikichu kani shamusaykipa pasyawak. ⁴⁴ Rimachiwashkaykita uyariptinilla wawaynika kushikushpa wiksayni ukupi sukaman kuyushka. ⁴⁵ Kanka tukuy Tata Dios willashushkanta allita kreyishpa almitishkanki. Chayrayku Tata Dioska sukaman kushichishunki.

⁴⁶ Chashna Isabel willaptin Mariyaka willarkan:

Sukaman kushikushpa rimani Tata Dios tukuy laya atipak kananta.

⁴⁷⁻⁴⁹ Tata Dios sukaman alli salvawknini kashpa ñukataka munawashka tukuy willawashkanta almitiptini.

Chashna Tata Dios munawaptin sukaman kushikuni.

Tata Dios sukaman tukuy laya alli yachak kashpa ñukataka akllawashka paypa wambranta wawayanaynipa.

Chayrayku kunanmantapacha tukuy runakuna rimankasapa Tata Dios ñukata sukaman kushichiwashkanta.

Payka sukaman allimami.

⁵⁰ Tukuy tiempu Tata Dios tukuy kuyak runakunata llakichishpa yanapansapa.

⁵¹ Tata Dios rikchak laya yachak kashpa sukaman almiranakunata rurashka. Chaymanta tukuy kikinlla yuyanakuk runakunapa yuyayninkunata waklichipushka.

⁵² Tata Dioska sinchi kamachikuk runakunata kamachikunankunamanta sampayachishkasapa.

Chaymanta alli modoyuk runakunata kushichishkasapa.

⁵³ Tata Dioska chay yarkashpa kawsak runakunata tukuy layapi yanapashkasapa.

Chaymanta tukuy laya tiyapuk runakunata mana nimayukta karkushkasapa.

⁵⁴ Payta sirvik israel runakunata sukaman yanapashkasapa.

Mana kunkashkachu llakichishpa yanapayta.

⁵⁵ Ñawpa tiempu Tata Dios awilunchi Abrahama willarkan tukuy paypa mirakninkunata kuyashpa yanapanankunata.

56 Chashna rimashpa Mariya Tata Diosta alabarkan. Chaypina kimsa killata Isabelwan kawsarkan.

Isabel ullku wambrata wawayarkan.

57 Chaymanta wawayanan tiempu paktaptin Isabelka ullku wambrata wawayarkan. **58** Wawayashkanta yachashpangkuna ayllunkuna llaktamasinkunawan rirkansapa kushikushpa wawanta kawak. Willarkansapa Tata Dios Isabelta kuyashpa sukaman yanapashkanta.

59 Chaymanta chay wambra pusak diyayuk kaptin tantanakurkansapa pishkitunta señalapunkunapa. Chaypina tukuy ayllunkuna munarkansapa tatana shutin kananpa. **60** Chaypina maman willarkansapa:

—Manami tatanpa shutinchu kanka. Shutinka Juan kanan tiyan.

61 Chashna Isabel willaptinkuna ayllunkunaka willarkansapa:

—¿Imapati Juan shutita munanki? Mana ni pi Juan shutiyuk aylluykichi tiyanchu.

62 Chaypina paykuna Sakariyasta makinkunawan tapurkansapa ima shutitami munan nishpa.

63 Chashna tapuptinkuna suk tablata mañarkan wambranpa shutinta kilkananpa. Chaypina killkakurkan: “Kay wambraynipa shutinka Juanmi.”

Chayta killkakuptin tukuy ayllunkunaka sukaman almirarkansapa.

64 Sakariyas killkakushkanwasha mana rimakuya atipashkanmanta kashkan rimakurkan. Chaypina kushikuypuru Tata Diosta alabashpa willarkan:

—Kanka, Tata Dios, tukuy laya yachakmi kanki.

65 Chashna Sakariyas rimakuptin uyarishpana tukuy llaktamasinkuna sukaman almirarkansapa. Paykuna tukuy chay urku llaktakunapi kawsak runakunata parlachirkansapa imashnami chay wambra nasishka nishpa.

66 Chayta uyarik runakuna sukwan sukwan parlarkansapa:

—Tata Dioska chay wambratka sukaman kuyashpa almirana layata rurashpa yanapashka. Payka wiñashpaka rikchak laya yachakmi kanka.

Sakariyas kushikuyninwan Tata Diosta alabarkan.

67 Tata Diospa Espiritun yachachiptin chay wambrapa tatan Sakariyaska llaktamasinkunata willarkansapa:

68 Israel runakuna kaptinchikuna Tata Diosninchika ñami shamushkana salvawananchikunapanpa.

Chashna shamuptinna akuychi alabaypachi.

69 Tata Dios sirvik Davidmanta mirashkan runata kachamushka.

Payka tukuy laya atipak salvawakninchu runami.

70 Ñawpa tiempu alli yachachikuk runakuna yachachikurkansapa Tata Dios suk alli'salvakuk runata kachamunanta.

71 Paykuna killkarkansapa chikniwakninchu runakunamanta salvawananchikunapanpa.

72 Chaymanta yachachirkansapa Tata Dios awilunchikunata kuyashpa yanapanankunata.

Tata Dioska rurashkan paktuta mana kunkashpa ruranan tiyan.

73 Tata Dios jurashpa Abramwan paktuta rurarkan.

74 Chay paktuta rurashkanrayku chikniwakninchu runakunamanta salvawanachisapa.

Chayrayku kushikushpa mana ni pita manchashpa Tata Diospa munananta rurashpa kawsashunchisapa.

75 Wañunanchi diyakaman Tata Diospa ñawpakninpi allillata rurashpa payllata kasushpa kawsashunchisapa.

76 Chaymanta munanayni wambrayni, rikchak laya yachak Tata Dioska kanta kachashunki rimananta yachachikunaykipa.

Manarapish Tata Dios kachamushkan runa shamuptin kanka allita yachachikunki runakuna payta chaskinankunapa.

77 Israelmasinchikunata yachachinki

Tata Dios uchankunata perdonashpa salvanankunata.

78 Tata Diosninchikunata sukaman kuyawashpanchikuna kanta kachamushushka yachachikunaykipa sielumanta chaylla wambranta kachamushkanta.

Payka yachachiwashpanchikuna inti llipyakshina lusichiwashunchisapa.

79 Paymi lusichiwashpanchikuna mana alli rurashkanchikunata riksichwashunchisapa.

Yachachiwashunchisapa amana yana likidu tutapishina purinanchikunapa.

Yachachiwashunchisapa sukaman allita kushikushpa kawsananchikunapa. Chayta Sakariyas kushikushpa rimarkan.

80 Chaymanta wambran Juan Tata Diosta allita riksishpa wiñarkan. Payka israelmasinkunata yachachinan diyakaman chunlla chakidu allpapi kawsarkan.

2

Mariya Jesusta wawayarkan.

(Mt 1.18-25)

1 Chay tiempu Sesar Augusto tukuy kamachikukkunamanta ashwan sinchi kamachikuk karkan. Payka kamachikurkan tukuy runakuna kikinkunapa llaktankunapi shutinkunata killkachinakunakunapa. Sesar Augusto yachanayarkan mashna runakunami tiyansapa nishpa. **2** Chashna Sesar kallarinan kuti tukuy runakunata yupachiptin Siria partipi Sirenio kamachikuk runa karkan. **3** Sesar Augustoka kamachikurkan tukuy runakuna kikinkunapa llaktankunaman rinankunapa shutinkunata killkachinakuk. **4** Chay pacha Joseka Galilea partipi Nasaret llaktapi kawsaykarkan. Paymi karkan ñawpa kamachikuk Davidmanta mirashkan runa. Chay ñawpa kamachikuk Davidka Judea partipi Belen llaktamanta karkan. Chayrayku Nasaret llaktamanta Joseka rirkan chay ñawpa awilun Davidpa Belen llaktanman. Chaypi rirkan shutinta killkachinakuk. **5** Chay tiempu Joseka Mariyawan kasaranankunapa mañaduna karkan. Mariya okupada kashpa Josewan tantallana rirkan shutinkunata killkachinakunakunapa.

6-7 Belen llaktapi chayashpankuna mana niman suk wasita tarirkansapachu chaypi chayanankunapa. Chashna mana nima wasita tarishpankuna ovejakuna wasinpi chayarkansapa. Chaypi kaptinkuna Mariyapa paktamurkan wawayanan tiempu. Wawayarkan piwi wawanta. Mariyaka wawantaka pintunankunawan wankushpa ovejakuna wasinpi sirichirkan.

Angelkuna ovejakuna kuydak runakunata Jesus nasishkanta willarkansapa.

8 Belen llakta ladunpi Jesus nasinan tuta suk pastupi runakuna ovejankunata kuydaykarkansapa. **9** Chay runakunapi Tata Diospa angelnin raslla rikurimuptin sukaman allimata llipyarkan. Chayta kawashpa ovejakuna kuydak runakuna sukaman manchakurkansapa. **10** Paykunata angelka willarkansapa:

—Tata Diósmantami suk alli rimanata willaykichi. Kayta uyarishpa tukuy runakuna kushikunkichi. Chayrayku ama manchakuychichu. **11** Kunan

tuta ñawpa kamachikuk Davidpa Belen llaktanpi salvashuknikichi ñami nasishkana. Payka Tata Dios kachamushkan sinchi kamachikukmi. 12 Rillaychi chay wambrata riksik. Paytaka tarinkichimi pintunanwan wankuduta ovejakuna wasinpi siriduta.

13 Chashna angel willaykaptin sielumanta aypa angelkuna rikurimurkansapa. Tukuy paykuna sukaman Tata Diosta kushichishpankuna willarkansapa:

14 Altu sielipi kawsak Tata Diosta kuyashpa alabaypachi.

Tata Dios allpapi kawsak runakunata kuyansapa.

Chayrayku payka kushichishunkichi.

15 Chay angelkuna kantashkankunawasha sieluman kutirkansapa. Chaypina chay runakuna sukwana sukwana parlanakurkansapa:

—Akuychina Belen llaktaman chay angel willawashkanchikunata kawak.

16 Chay runakuna utkakushpa rishpankuna tarirkansapa chay wambrata oveja wasinpi sirichiduta Mariya Jose kuydaykaptin. 17 Chay runakuna wambrata kawashpankuna tukuy pita parlachirkansapa angel willashkankunata. 18 Chayta uyarishpankuna tukuy runakuna sukaman almirarkansapa. 19-20 Chaypina chay ovejakuna kuydak runakuna Tata Diosta sukaman kuyashpa alabarkansapa. Paykunaka sukaman almirarkansapa chay angel willashkankunatashina kawashpankuna. Kushikushpa chay ovejankuna kuydanankunaman kutirkansapa. Paykuna kutiptinkuna Mariya tukuy willashkankunata shunkullikushpa kuti kuti allita yuyaykurkan.

Tata Diospa wasinman Josewan Mariya Jesusta pusharkansapa.

21 Chaymanta chay wambra pusak diyayuk kaptinna pishkitun punta karapanta tipichipurkansapa señaladu kananpa. Chaypina shutiyachirkansapa Jesus shutin kananpa. Manarapish Mariya okupada kaptin chay angel willarkan wawanpa shutin Jesus kananpa.

22 Wambran nasishkan diyamanta chusku chunka diyata wasinmanta Mariyaka mana lluksirkanchu. Chay diyakuna paktaptinna ñawpa Moisespa killkadunpi willashkanta kasushpa allita armakurkan. Armakushkanwasha Mariyaka Josewan wambrata Jerusalenman pusharkansapa Tata Diosta kuk. 23 Tata Dios ñawpa killkadunpi rimarkan: "Tukuy piwi wambra ullku nasiptin ñukapami kanan tiyan." Chayta Tata Dios rimashkanrayku Mariyaka Josewan chay wambrata pusharkansapa Tata Diosta kukna. 24 Chaymanta Tata Diospa killkadunpi riman mana ishkay rimarikuykunata apashpa ishkay urpaykunata apanankunapa Tata Diosta kuyashpa kunankunapa. Chayrayku Mariya Josewan wambra Jesusta pushashpa ishkay urpayta aparkansapa.

25 Chay pacha Jerusalenpi kawsarkan suk runa Simeon. Tata Diospa Espiritun yanapaptin paykä alli rurak runa karkan. Tata Diosta sukaman kuyashpa kawsak. Payka israelmasinkunapa salvakukninkuna runata sukaman shuyaykarkan. 26 Chayrayku Tata Diospa Espiritun Simeontaka willarkan: "Manara wañushpaykira Tata Diospa kachamushkan salvakuk runata kawanki."

27 Mariyaka Josewan wambra Jesusta pusharkansapa Tata Diospa wasinman. Chayman pusharkansapa Tata Diospa killkadunpi willashkankunata kasushpankuna. Chaypina Tata Diospa Espiritun Simeonta willarkan Tata Diospa wasinman rinanpa chay wambrata riksik. 28 Chaypi chayashpa Simeonka chay wambrata markarkan. Payta markashpa Tata Diosta suka man kuyashpa willarkan:

29 A Tata Dios, kanka willawashkanki manara wañushpaynira kachamushkayki wambraykita kawanaynipa.

Kunanka kushikushpana wañusha.

Ñami paytaka kawashkanina.

30 Ñami kawashkanina kay salvakuk kachamushkayki wambraykitaka.

31 Tukuy llaktakunamanta aypa runakuna yachankasapa salvakuk runa kananta.

32 Payka alli lusshina tukuy runakunata yachachinkasapa kanta kuyashushpa kawsanankunapa.

Chaypina runakuna yachankasapa israel runakunamanta salvakuk runa shamushkanta.

33 Chashna Simeon willaptin uyarishpana Mariya Josewan sukaman almirarkansapa. 34 Chaypina Simeonka Tata Diosta roygarkan paykunata yanapanankunapa. Chaymanta Jesuspa mamantaka willarkan:

—Israel llaktamanta aypa runakuna wawaykita chiknishpa rimankasapa mana alli kananta. Tukuy paykunata Tata Dioska kastigankasapa. Chaymanta wawaykita kreyik runakunata Tata Dios perdonankasapa. 35 Wawaykika tukuy runakunata riksichinkasapa imalayami yuyayninkuna nishpa. Aypa runakuna wawaykita mana kreyishpa chikniptinkuna kanka sukaman llakishpa turbakunki.

Chashna Simeonka Mariyataka willarkan.

36 Chaymanta Tata Diospa wasinpi tiyarkan suk alli yachachikuk warmi. Paypa shutin karkan Ana. Tatanka karkan Fanuel. Ñawpa awilun karkan Aser. Payka shipashlla kashpa kasararkan. Chaymanta kanchis wata kasarashkanwasha kusan wañurkan.

37 Chay warmika pusak chunka chusku watata viyudana karkan. Payka Tata Diospa wasinmanta mana llukshishpa suk diyakuna mana mikushpa kawsarkan. Diyapi tutapi Tata Diosta orashpa sirvirkan. 38 Chay yachachikuk Ana tarirkan Simeonta Mariyawan Josewan parlaykaptin. Paykunata tarishpa wambra Jesusta kawashpa Tata Diosta sukaman agradesirkan. Chaypi tiyarkan Jerusalen llaktata salvak runata shuyak runakuna. Tukuy paykunata Ana willarkansapa chay wambra Jesus shuyashkankuna salvakuk runa kananta.

Nasaret llaktaman Mariyawan Jose Jesusta pushashpa kutirkansapa.

39 Chaymanta Tata Diospa killkadunpi willashkanta rurashpankuna Nasaret llaktanman Mariyawan Jose Jesusta pushashpa kutirkansapa. Chay Nasaret llakta Galilea partipi karkan. 40 Chaypi kawsaptinkuna Jesuska allita wiñarkan. Tata Dios payta sukaman yanapaptin sukaman yuyaylla untadu yachaysapa likidu karkan.

Jesus wayna kashpa Tata Diospa wasinman rirkana.

41 Kada wata Jerusalenman Mariyaka kusanwan riksapa Paskua fiestata pasak. 42 Chaymanta Jesus chunka ishkay watayuk kaptinna maman tatan payta pusharkansapa Jerusalenpi fiestakuk. 43 Chay fiesta tukuptinna wasinkunaman tukuy runakuna kutiptinkuna wayna Jesuska Jerusalenpi kiparirkan. Chashna kipariptin Mariya kusanwan yuyarkansapa washankunata katiyakananta. 44 Mariya kusanwan llaktamasinkunawan puriykananta yuyashpa mana watukushpankuna suk diyata purirkansapa. Amusayaykaptinna Jesusta chayrak watukushpana llaktamasinkunapi ayllunkunapi ñanllapi maskarkansapa. 45 Sukaman maskashpa mana tarirkansapachu. Mana tarishpa kutirkansapa Jerusalenpi maskak.

⁴⁶ Chaypina kimsa diyata maskashpana Tata Diospa wasinpi Jesus-taka tarirkansapa. Payka Tatan Diospa rimananta yachachikuk runaku-napa chawpinkunapi tiyaridu karkan. Chaypi yachachikuptinkuna Je-suska paykunata uyariykarkansapa tapuykarkansapa. ⁴⁷ Chashna Jesus paykunawan parlaaptinkuna chay yachachikuk runakunaka sukaman almi-rarkansapa alli yachaysapa kaptin. Almirarkansapa Tata Diospa rimananta sukaman allita yachaptin. ⁴⁸ Chashna chay runakunawan tantalla sukaman parlaykaptinkuna tarishpa mamanka kusanwan sukaman almirarkansapa. Chaypina mamanka willarkan:

—Wawituyni ¿imapati washaynikunamanta kiparishkanki? Ñukaykuna sukaman llakishpaynikuna maskamuykaykisapa.

⁴⁹ Chashna willaptinna Jesus willarkan:

—¿Imapati maskawashkankichi? Ñuka Tatayni willawashkanta ruranayni tiyan. ¿Manachu chayta yachankichi?

⁵⁰ Chashna willaptinna paykuna mana entiendirkansapachu imapami chashnaka willansapa nishpa. ⁵¹ Chaypina Jesuska paykunawan Nasaret llaktaman kutirkan. Chaypina paykunata tukuy layapi kasushpa kawsarkan. Mariyaka wawan willashkanta tukuya shunkunpi wakaycharkan. ⁵² Jesuska ashwan yuyaylla untadu wiñarkan Tata Dios yanapaptin. Chashna alli yuyayuk kaptin tukuy runakuna payta munarkansapa.

3

Juan kallarirkan yachachikuyta. (Mt 3:1-12; Mr 1:1-8; Jn 1:19-28)

¹ Jesus atun runa kaptinna tukuy kamachikuk runakunamanta Tiberio ashwan sinchi kamachikuk karkan. Chay Tiberioka chunka pichka watatana kamachikuk karkan. Chay tiempu Judea partipi Ponsio Pilato kamachikuk karkan. Galilea partipi Herodes kamachikuk karkan. Iturea partipi Trakonite partipi Herodespa wawkin Felipi kamachikuk karkan. Abilinia partipi Lisalias kamachikuk karkan. ² Chaymanta Anas Kayfaswan tukuy saserdotekekunapa ashwan sinchi kamachikukninkuna karkansapa.

Chaymanta Sakariyaspa wambran Juan chunlla chakidu allpapi kawsarkan. Chaypi kawsaptinna Tata Dioska willarkan yachachikuk rinanpa. ³ Chashna Tata Dios willaptinna chay Jordan yaku mañanpi tiyak llaktakunapi yachachikupi purirkan. Chay llaktakunapi kawsak runakunata yachachirkansapa tukuy mana alli rurashkankunamanta wanankununapa. Yachachirkansapa tukuy uchankunata Tata Dios perdonaptinkuna bawtisakunankunapa.

⁴ Ñawpa tiempu yachachikuk Isaiyas Tata Diospa rimananta killkarkan: “Chunlla chakidu allpapi suk runa sinchita rimashpa kashna yachachikunka:

‘Tata Dios kachamushkan runa yachachikuyta kallarinanpa kankuna suk kuska ñanta kichariyichi.

⁵ Tukuy ñannikichipa rarkanta allpachaychi.

Tukuy ñannikichipa urkukunata pampayachiychi.

Tukuy wiksu wiksu ñannikichita kuskachaychi.

Kankuna uchallikushpa kawsashpaykichi mana alli ñanshina kankichi.

Amana ñawpashina uchallikushpa kawsaychinachu.

⁶ Kankuna allita kawsaptikichi tukuy runakuna Tata Dios kachamushkan salvakuk runata riksinkasapa.’”

⁷ Chashna Juan yachachikuptin aypa runakuna laduncharkansapa munashpa bawtisanankunapa. Juanka paykunata willarkansapa:

—Kunkuna llulla likidu kankichi. Tata Dios tukuy mana alli rurak runakunata sukanan kastiganan tiyan. Kunkuna manami bawtisakushpallachu kishpinkichi Tata Diospa kastigumanta. ⁸ Allita rurashpa kawsanaykichi tiyan tukuy kawashuknikichi yachanankunapa. Tata Diosta kreyishpana kawsaykanaykichita. Ama kikikichilla llullachinakushpa rimaychichu: Ñukaykuna ñawpa tiempu awiluynikuna Abrahammanta miradu kaptinikuna Tata Dios kastiguynikunamanta salvawankasapa nishpa. Allita willaykichi Tata Dios kay rumikunamantapish atipanman Abrahampa mirakninta rurayta. ⁹ Suk kaspi mana allita wayuchakuptinka doyñun sapinpi achawan kuchushpa rupachin. Chashnami Tata Dioska kankunata mana alli rurashkaykichirayku utkana kastigashunkichi.

¹⁰ Chashna Juan yachachikuptin chay runakuna tapurkansapa:

—¿Imatati rurashasapa Tata Dios kastigumanta salvawanankunapa?

¹¹ Chaypina Juanka willarkansapa:

—Ishkay llachapayuk Kashpaykichi mana llachapayuk runata suk llachapaykichi kuychi. Chaymanta mikunaykichi tiyaptin mana mikunayuk rununata karaychi.

¹² Chaymanta romano gobiernupa kullki chaskikuk runakuna Juanta laduncharkansapa bawtisakuya munashpankuna. Paykuna Juanta willarkansapa:

—Maestru ¿imatati rurashasapa Tata Dios kastigumanta salvawanankunapa?

¹³ Chaypina Juan willarkansapa:

—Romano gobiernu willashushkaykichillata kobra kuychi. Ama kankunapawanka kobra kuychichu.

¹⁴ Chaymanta soldadukuna ladunchashpankuna Juanta tapurkansapa:

—Ñukaykunapish ¿imatati rurashasapa Tata Dios kastigumanta salvawanankunapa?

Chashna tapuptinkuna Juanka willarkansapa:

—Ama ni pita ima tiyapukninta kichuchichu. Ama ni pita llullakushpa chatashpa nimata kichuchichu. Chaymanta kamachishuknikichi parashushkaykichillan kushikushpa kawsaychi.

¹⁵ Aypa runakuna Tata Dios kachamushkan salvakuk runata shuyashpa kawsaykarkansapa. Paykuna tapunakurkansapa:

—Ichará kay Juanka Tata Dios kachamushkan runa.

¹⁶ Chayta uyarishpa Juan willarkansapa:

—Ñukaka yakullawanmi bawtisaykichi. Chaymanta washaynita shamun ñukamanta ashwan alli yachachikuk runa. Payka Tata Diospa Espiritunwan bawtisashunkichi. Chay Espiritunka rawraykak ninawanshina bawtisashunkichi uchaykichimanta pichashunaykichipa. Chay yachachikuk runaka ñukamanta tukuy laya ashwan alli yachachikukmi. Ñukaka mana animukunichu ushutan waskanta paskaya.

¹⁷ Triguta waktashpa murukunata surkunchi. Chaypina murukunata wakaychanchi. Trigupa tullunkunata wishchushpa rupachinchii. Chay ñukamanta ashwan yachaysapa runaka trigu murukunata surkuk runashinami. Paymi tukuy kreyik runakunata allita kuydan. Mana kreyik runakunata churankasapa mana tukuuniyuk ninapi.

¹⁸ Chashna aypata yachachikushpa Juan chay runakunata willarkansapa Tata Dios kachamushkan runa shamunanta.

19 Chaymanta Juanka chay sinchi kamachikuk Herodesta piñayarkan wawkin Felipipa warmin Herodiyawan uchallikushpa kawsaykaptin. Chaymanta piñayarkan aypa mana allikunata rurashpa kawsaykaptin. **20** Chashna piñayaptinpish Herodeska mana allita rurayllapi katirkan. Mana alli rurak kashpa karselpi Juantaka wichkachirkan.

Jesus bawtisakurkan.

(Mt 3.13-17; Mr 1.9-11)

21 Manarapish Herodes karselpi Juanta wichkachiptin aypa runakunata bawtisayllapi katirkan. Jesuspish rirkana Juan bawtisananpa. Jesus bawtisakushkanwasha Tatan Dioswan parlarkan. **22** Chaypina sielu kicharinakuptin Tata Diospa Espiritun iden urpayshina urayamurkan Jesuspitiyari. Chashna orana sielumanta Tatan Diós Jesusta willarkan:

—Kanka kuyanayni wambraynimi kanki. Sukamanmi kushichiwanki.

Jesuspa awilunkuna.

(Mt 1.1-17)

23 Jesuska kimsa chunka watayuk kashpa kallarirkan yachachikuya. Tukuy runakuna yuyarkansapa Josepa wambran kananta. Joseka karkan Elipa wambran. **24** Elika karkan Matatpa wambran. Matatka karkan Levipa wambran. Levika karkan Melkipa wambran. Melkika karkan Janapa wambran. Janaka karkan Josepa wambran. **25** Chaymanta Joseka karkan Matatiyaspa wambran. Matatiyaska karkan Amospa wambran. Amoska karkan Nahunpa wambran. Nahunka karkan Eslipa wambran. Eslika karkan Nagaypa wambran. **26** Nagayka karkan Maatpa wambran. Maatka karkan Matatiyaspa wambran. Matatiyaska karkan Semeypa wambran. Semeyka karkan Josekpa wambran. Josekka karkan Judapa wambran. **27** Chay Judaka karkan Joananpa wambran. Joananka karkan Resapa wambran. Resaka karkan Sorobabelpa wambran. Sorobabelka karkan Salatielpa wambran. Salatielka karkan Neripa wambran. **28** Nerika karkan Melkipa wambran. Melkika karkan Adipa wambran. Adika karkan Kosampa wambran. Kosamka karkan Elmadampa wambran. Elmadamka karkan Erpa wambran. **29** Erka karkan Josuepa wambran. Josueka karkan Elieserpa wambran. Elieserka karkan Jorimpa wambran. Jorimka karkan Matatpa wambran. Matatka karkan Levipa wambran. **30** Levika karkan Simeonpa wambran. Simeonka karkan Judapa wambran. Judaka karkan Josepa wambran. Joseka karkan Jonampa wambran. Jonamka karkan Eliakimpa wambran. **31** Eliakimka karkan Meleapa wambran. Meleaka karkan Menapa wambran. Menaka karkan Matatapa wambran. Matataka karkan Natarpa wambran. **32** Natanka karkan Davidpa wambran. Davidka karkan Isayipa wambran. Isayika karkan Obedpa wambran. Obedka karkan Boospa wambran. Booska karkan Salapa wambran. Salaka karkan Naasonpa wambran. **33** Naasonka karkan Aminadabpa wambran. Aminadabka karkan Adminipa wambran. Admininka karkan Arnipa wambran. Arnika karkan Esrompa wambran. Esromka karkan Farespa wambran. Fareska karkan Judapa wambran. **34** Judaka karkan Jakobopa wambran. Jakoboka karkan Isakpa wambran. Isakka karkan Abrahampa wambran. Abrahamka karkan Tarepa wambran. Tareka karkan Nakorpa wambran. **35** Nakorka karkan Serukpa wambran. Serukka karkan Ragawpa wambran. Ragawka karkan Pelekpa wambran. Pelekka karkan Heberpa wambran. Heberka karkan Salapa wambran. **36** Salaka karkan Kaynanpa wambran. Kaynanka karkan Arfakapa wambran. Arfakaka karkan Sempa wambran. Semka karkan Noepa wambran. Noeka karkan Lamekpa wambran.

³⁷ Lamekka karkan Matusalenpa wambran. Matusalenka karkan Enokpa wambran. Enokka karkan Jaredpa wambran. Jaredka karkan Mahalalelpa wambran. Mahalalelka karkan Kaynpana wambran. ³⁸ Kaynanka karkan Enospa wambran. Enoska karkan Setpa wambran. Setka karkan Adanpa wambran. Adanka karkan Tata Diospa wambran.

4

Supay Jesusta llullachinayarkan. (Mt 4.1-11; Mr 1.12-13)

¹ Jesus bawtisakushkanwasha Tata Diospa Espiritun atipachiptin Jordan yakumanta kutirkan. Chaypina chunlla chakidu allpaman Tata Diospa Espiritunka pusharkan. ² Chaypi kashpana chusku chunka diyata Jesuska mana nimata mikurkanchu. Supay tukuy chay diyakunata Jesusta mana allikunata rurachinayarkan. Chaypina Jesus sukanan yarkarkan. ³ Sukaman yarkaptinna supayka willarkan:

—Kanka Tata Diospa wambran kashpaykika kay rumita willay pan tukanpana chayta mikunaykipa.

⁴ Chashna supay willaptinna Jesuska mana nima kreyishpa willarkan:

—Tata Diospa killkadunpi willawanchi: “Tukuy runakuna Tata Diospa rimananta kasushpa kawsanankuna tiyan. Manami panta mikushpallachu kawsankasapa.”

⁵ Chaypina supayka Jesustaka suk urku sawanman pusharkan. Chay urkumanta tukuy allpapi llaktakunata raslla kawachirkan. ⁶ Chayta kawachishpana willarkan:

—Tukuy kay allima kawanayki llaktakuna tukuy chaypi tiyakkuna ūukata kuwashka kaptin kuyki. ūuka munashkayni runatami kusha. ⁷ Kanka kunkurikushpa ūukata kuyaway. Chashna kuyawaptikika tukuy chay llak-takunata kanta kushkayki chaypi kamachikuk kanaykipa.

⁸ Chashna supay willaptinna Jesuska mana kasushpa willarkan:

—Tata Diospa killkadunpi willawanchi: “Señorniki Tata Diosllata kuyay. Payllata sirvishpa kawsay.”

⁹ Chashna Jesus willaptinna Jerusalen llaktaman supayka pusharkan. Chaypina Tata Diospa manllayba altu wasin sawanman pushashpa willarkan:

—Tata Diospa wambran kashpaykika kay altumanta allpaman wishchunakuy. Urmashpaka manami nimanachinakunkichu. ¹⁰ Tata Diospa killkadunpi willawanchi: “Tata Dioska angelinkunata willankasapa kanta amachashushpa kuydashunankunapa. ¹¹ Urmanayaptikika paykuna makinkunawan chaskishunkisapa ama rumikunapi mitkakunaykipa.”

¹² Chaypina Jesuska supayta willarkan:

—Chaymantapish Tata Diospa killkadunpi willawanchi: “Ama nimata yankamanta ruraychichu yachanayashpa Tata Dios yanapawankachu manachu nishpa.”

¹³ Chashna Jesus mana kasunayaptin supayka manana yacharkannachu imashnami llullachinka nishpa. Chayrayku suk tiemputa Jesusmanta ashurkan.

Galilea partipi Jesus kallarirkan yachachikuyta.

(Mt 4.12-17; Mr 1.14-15)

¹⁴⁻¹⁵ Chaymanta chay chunlla chakidu allpamanta Jesus kutirkan Galilea partiman. Tata Diospa Espiritun sukanan yanapaptin rikchak laya yachak karkan. Tukuy llaktakunapi tantanakunankuna wasikunapi Jesuska yachachikurkan. Chashna yachachikuptin tukuy runakuna alabarkansapa.

Jesus kutirkan Nasaret llaktanman.
(Mt 13.53-58; Mr 6.1-6)

¹⁶ Chashna llaktan llaktan yachachikuypi purishpa Jesuska wiñashkan Nasaret llaktanman kutirkan. Chaypi kashpa amañananshina samana diya tantanakunankuna wasiman rirkhan. Chay wasipi kashpa shayarirkan Tata Diospa killkadunta leyinapta. ¹⁷ Chay wasi kuydak runa Jesusta suk libruta kurkan. Chay libruba karkan ñawpa yachachikuk Isaiyaspa killkashkan. Jesuska chay libruba kicharishpa kay killkaduta tarishpa leyirkan:

¹⁸ “Tata Diospa Espiritunka ñukatami akllawashka.

Willawashka tukuy mana nimayuk llakishpa kawsak runakunata yachachinaynipa.

Churawashka paykunata yachachinaynipa kushikushpa kawsanankunapa. Chaymanta kachamuwashka tukuy supapya makinpí kawsak runakunata salvanaynipasapa.

Kachamuwashka mana kawakuk runakunata kawachichinaynipa.

Chaymanta kachamuwashka padesik runakunata padesichinankunamanta kichukunaynipa.

¹⁹ Tata Dios kachamuwashka runakunata willanaynipa sukaman kuyashpa yanapanankunata.”

²⁰ Jesus chay killkaduta leyishkanwasha chay libruta kurkan wasi kuydak runata. Chashna kushpana tiyarirkan. Tiyariptinna tukuy pi paytaka chaparkansapa. ²¹ Chaypina willarkansapa:

—Kay leyishkayni killkaduka ñukapami rimashka. Ñukaka Tata Dios kachamuwashkan runami kani.

²² Chashna Jesus yachachikuptin tukuy runakuna almirashpankuna tapunakurkansapa:

—¿Manachu kay runaka Josepa wambran?

²³ Chashna tapunakuptinkuna Jesuska willarkansapa:

—Ariya kankunaka mana kreyiwashpa willawaykankichi: “Kanka amzikup runa kashpaykika kikikilla ampinakuy. Kanka Kapernaum llaktapi milagruta rurashkaykita kay llaktanchipipish ruray yachanaynikunapa Tata Diosmanta shamudu runa kanaykita.”

²⁴ Kunan allita willaykichi. Tata Diospa rimananta yachachikuk runa kikin llaktanpi yachachikuptin llaktamasinkuna mana kreyinsapachu.

²⁵⁻²⁶ Ñawpa alli yachachikuk Eliyas yachachikushkan tiempu kimsa wata sokta killata mana nima tamyarkanchu. Chashna mana tamyaptin tukuy Israel llaktapi sinchi yarkay tiempu karkan. Chay yarkay tiempupi Tata Dios Eliyasta kacharkan Sidon llakta ladunpi. Eliyasta kacharkan chay Sareta llaktapi kawsak viyuda warmiman payna Eliyasta karananpa. Deverasmi kikin Israel llaktanpi aypa viyudakuna tiyarkan. Mana paykunamanchu Tata Dios Eliyasta kacharkan.

²⁷ Chaymanta ñawpa alli yachachikuk Eliseopa tiempupi Siria partipi kawsarkan suk sinchi kamachikuk runa. Paypa shutin karkan Naaman. Chay kamachikuk runa lasaru unkuyuk karkan. Chaypina yachachikuk Eliseoka paytaka alliyachirkan. Deverasmi llaktankunapi aypa runakuna chay unkuywan karkansapa. Eliseoka mana paykunataka alliyachirkansapachu mana Tata Diosta kreyiptinkuna.

²⁸ Chashna Jesus yachachikuptin uyarishpana chay wasipi tantanakudu runakuna sukaman piñakurkansapa. ²⁹ Paykunaka llaktankunamanta Jesususta pusharkansapa suk manllayba waykuman. Chay waykuka karkan chay llakta washanman. Chayman pushashpankuna wañuchinayarkansapa altumanta tankakushpa. ³⁰ Chaypina Jesuska chay aypa runakunapa chawpinkunata pasashpa rirkhan.

Jesus supayuk runata alliyachirkan.
(Mr 1.21-28)

³¹ Chaymanta Jesuska Nasaret llaktamanta llukshishpa rirkana Galilea parti llakta Kapernaumman. Chaypina samana diya kaptin tantanakunankuna wasipi yachachikuykarkan. ³² Chaypi allita yachachikuptin runakuna sukaman almirarkansapa sinchi kamachikuk runashina yachachikuptin. ³³ Chaypi tiyarkan suk unkudu runa. Payka supayuk karkan. Jesus yachachikuptin uyarishpana chay supay sinchita rimakushpa Jesusta willarkan:

³⁴ —¿Imapatí ūukaykunamanka shamushkanki, Nasaretmanta Jesus? ¡Sakiwaysapa! ¿Mana tukuyniyuk ninamanchu kachawanayaykankisapa? ūukaka yachani Tata Diosmanta shamudu runa kanaykita.

³⁵ Chashna chay supay willaptin Jesuska piñayashpa willarkan:

—¡Upallayyna! ¡Kunanlla kay runamanta llukshiy!

Chashna Jesus willaptinna tukuy pi kawaykaptinkuna supayka chay unkudutaka waktakurkan. Chaypina mana nimanachishpanachu paymanta llukshirkan. ³⁶ Chayta kawashpa runakunaka sukaman manchakurkansapa. Chaypina willanakurkansapa:

—Kay Jesuška sinchi kamachikuk kashpa atipan supaykunatapish llukshiyita.

³⁷ Chaymanta chay runakuna famakurkansapa tukuy llaktakunapi Jesus supayta sinchita willashpa runamanta llukshichishkanta.

Jesus Pedrupa suedranta alliyachirkan.
(Mt 8.14-15; Mr 1.29-31)

³⁸ Chaymanta Jesuska chay tantanakunankuna wasimanta llukshishpa rirkana yaykuk Simon Pedrupa wasinpi. Chaypi Simonpa suedran kalentorawan unkudu karkan. Pay unkudu kaptinna familyankuna Jesusta willarkansapa kalentoranta chiriyachipunarpa. ³⁹ Chashna willaptinkunana Jesuska chay unkudu warmipa ladunpi shayarishpa kumurayarkan. Kumurayashpa sinchita willarkan kalentoran chiriyananpa. Chaypina kalentoranka raslla chiriyarkan. Chay warmika atarishpa paykunapa miku-nankunata rurashpa kararkansapa.

Jesus aypa unkudu runakunata alliyachirkan.
(Mt 8.16-17; Mr 1.32-34)

⁴⁰ Chaymanta inti yaykuptin Jesusman aypa runakuna unkudu familyankunata pusharkansapa. Paykuna rikchak laya unkuyuk karkansapa. Chaypina Jesuska chay unkudukunapa umankunapi makinta churashpa tukuya alliyachirkansapa. ⁴¹ Chaymanta aypa runakunamanta Jesuska supaykunata llukshichirkana. Chay supaykuna llukshishpankuna kaparishpa rimarkansapa:

—¡Kanka Tata Diospa wambranmi kanki!

Chashna willaptinkuna Jesuska piñayashpa willarkansapa:

—¡Upallaychi!

Jesus mana munarkanchu supaykuna nimata willanankunapa. Paykunaka yacharkansapa Jesus Tata Diosmanta shamudu salvakuk runa kananta.

Aypa llaktakunapi Jesus yachachikurkan.
(Mr 1.35-39)

⁴² Chaymanta pakariyaptin Jesus chay llaktamanta llukshishpa rirkana suk chunlla likudu pampaman. Chayman riptin aypa runakuna maskarkansapa. Sukaman maskashpana tarirkansapa. Willarkansapa

ama ni mayta suchushpa llaktankunallapi kiparinanpa. ⁴³ Chaypina Jesuska willarkansapa:

—Chikan llaktakunapipish kay alli kushichina rimanata yachachiku-nayni tiyan. Tata Dioska kachamuwashkami tukuy runakunata yachachi-naynipa alli kamachikuk kananta.

⁴⁴ Chashna willashpankuna Jesuska tukuy judiyu runakunapa llaktankunapi yachachikuypi purirkana. Tantanakunankuna wasikunapi yachachikurkan.

5

*Jesus willaptinkuna disipulunkuna aypa challwakunata apirkansapa.
(Mt 4.18-22; Mr 1.16-20)*

¹ Suk diya Genesaret kocha mañapi Jesuska Tata Diospa rimananta yachachikuykarkan. Chaypina aypa runakuna uyarinayashpankuna tankanakushpa Jesusta nitirkansapa. ² Chashna niti niti kaptinkuna chay kocha mañapi Jesus kawarkan ishkay atun kanowakunata. Chay kanowakunapi mana nima tiyarkanchu. Challwa apik runakuna kanowankunata sakishpankuna atun redninkunata takshaykarkansapa. ³ Suk kanowaka Simonpa karkan. Chay Simonpa kanowanpina Jesuska yaykurkan. Yaykushpana Simontaka willarkan:

—Suk tipita chawpiyachipay.

Tankaputtinna Jesus chaypi tiyarirkan. Chay kanowamanta Jesuska chay runakunata yachachirkansapa. ⁴ Chay aypa runakunata yachachishkan-washana Simontaka willarkan:

—Kay kanowaykita ashwanta chawpiyachiy. Chaypi chay rednikikunata sirichiychi challwata apinaykichipa.

⁵ Chaypina Simonka willarkan:

—Maestru, tuta entero manami niman suk challwata apishkanisapachu. Mana nimata tuta entero apishpaynikunapish willawaptikisapa kashkan sirichishasapa.

⁶ Paykunkuna Jesusta uyarishpa redninkunata sirichirkansapa. Chaypina aypa challwakunata apirkansapa chay redninkuna llikikunayanankaman. ⁷ Simonka makinwan kayarkansapa challwa apikmasinkunata chikan kanowankunata apashpa yanapak rinankunapa. Chay aypa challwakunawan ishkantin kanowankunata untachirkansapa yaka suminayanankaman.

⁸⁻⁹ Jesusta kasushkanrayku aypa challwata apirkansapa. Tukuy chayta kawashpa Pedruka tukuy challwa apikmasinkunawan sukaman manchakunkansapa. Chaypina manchakushpa Pedruka Jesuspa ñawpakinipi kunkurikushpa willarkan:

—Maestru, ñukaka uchasapami kani. Chayrayku pinkakuni kanwan talla puriya.

¹⁰ Sebedeopa wambrankuna Jakobowan Juan Simonpa challwa apikmasinkuna karkansapa. Chashna tukuy paykuna sukaman manchakuptinkuna Jesus Simonta willarkan:

—Ama manchakuychu. Kunanmantapacha aypa runakunata Tata Diospa rimananta yachachishpa kawsanki. Yachachinkisapa paykunapish Tata Diosta kreyishpa kawsanankunapa.

¹¹ Chashna Jesus willaptinkuna chay runakunaka chawpi yakumanta kanowankunata mañayachirkansapa. Chaypina tukuya sakishpankuna chay oramantapacha Jesusta katirkansapa.

Jesus lasaruyak runata alliyachirkan.
(Mt 8.1-4; Mr 1.40-45)

¹² Suk diya Jesus suk llaktapi chayarkan. Chaypina suk lasaruyak runa Jesusta kawashpa ñawpakniipi kumurayashpa willarkan:

—Maestru, munashpaykika atipanki kay unkuyninimanta alliyachiyawta.

¹³ Chashna willaptinna Jesuska makinwan llankashpa willarkan:

—Ariya, munani alliyachiynikita. Kunanmantapacha alliyaduna kiparinki.

Chashna willaptinna chay runapa kirinka raslla alliyapurkan.

¹⁴ Chaypina Jesuska willarkan:

—Amara ni pita willayrachu alliyachishkaynita. Ñawpa yachachikuk Moises killkadunpi willashunkichi lasaru unkuynikichimanta alliyashpaykichi saserdoteman rinaykichi tiyan ofrendaykita apashpa. Sanuna kanaykita kawashuptin chay ofrendaykita Tata Diosta kunayki tiyan uchaykita perdonanpana. Chaypina tukuy runakuna yachankasapa sanu kanaykita.

¹⁵ Chashna Jesus chay alliyachishkan runata ama ni pita parlachinanpa willaykaptinpish aypa runakunata parlachirkan. Chaymanta chay aypa runakunapish famakurkansapa alliyadu kananta. Chay almirana rurashkanta yachashpangkuna aypa runakuna rirkansapa Jesusta uyarnayashpangkuna. Paykunapish munarkansapa unkuyninkunamanta alliyachinankunapa. ¹⁶ Chashna aypa runakuna payman riptyinkuna chunllaman Jesuska rirkana chaypi Tata Dioswan parlak.

Jesus mana kuyuy atipak runata alliyachirkan.
(Mt 9.1-8; Mr 2.1-12)

¹⁷ Chaymanta suk diya Jesus yachachikuykarkan. Chaypina fariseo runakuna Tata Diospa rimananta yachachikuk runakunapish chayarkansapa. Paykunaka shamurkansapa tukuy Galilea parti Judea parti llaktakunamanta. Jerusalen llaktamantapish shamurkansapa. Chaykunamanta shamushpa Jesusta laduncharkansapa. Payka aypa unkudukunata alliyachirkan Tata Dios sukaman yanapaptin.

¹⁸ Chay diya Jesusman suk mana nima kuyuy atipak unkuduta kamillapi pusharkansapa. Chay pushak runakuna munarkansapa Jesuspa ñawpakniipi churayta. ¹⁹ Chay wasipi aypa runakuna tiyaptin paykunaka mana yaykuya atiparkansapachu. Chayrayku wasi sawanman chay unkudutaka kamillanpi pusharkansapa. Chaypina chay tejakunata surkushpa uchkurkansapa. Chaytana unkuduta kamillanpi urayachirkansapa Jesuspa ñawpakniipi churak. ²⁰ Chay yanapak runakunaka allita tukuy shunku kreyirkansapa Jesus alliyachinanta. Jesuska kreyinankunata yachashpa chay unkudutaka willarkan:

—Wambrayni, tukuy uchaykikunamanta perdonayki.

²¹ Chashna Jesus willaptin Moisespa killkadunkunata yachachikuk runakunaka fariseo runakunawan yuyayninkunapi rimarkansapa: “Kay runaka Tata Diosta piñachiyan. Iden Tata Dioshina kanayashpa kay unkuduta willashka tukuy uchankunamanta perdonananta. Tata Diosllami atipan uchakunata perdonayta.”

²² Chashna yuyayninkunapi rimaptinkuna Jesuska chayta yacharkan. Chayrayku willarkansapa:

—¿Imapatí washanchawaykankichi? ²³ Ñuka kay unkuduta ishkay layata atipayman willayta. Munashpayni willayman: “Uchaykikunamanta perdonayki.” Chaymanta willayman: “Atarimushpa puriy.” Allita puriptin

kawashpa yachankichi alliyachishkaynita. ²⁴ Kunanlla kay unkuduta alliyachisha. Alliyachiptini yachankichi ūuka sielumanta shamudu runa kanaynita. Yachankichi kay allpapi tukuy runakunapa uchankunata perdonayta atipanaynita.

Chayta rimashkanwasha Jesuska chay mana kuyuy atipak runata willarkan:

—¡Atarimuy! Kamillaykita apashpa wasikiman rillay.

²⁵ Chashna Jesus willaptinna chay unkudu runaka utkakushpa alliyaduna atarimurkan chay aypa runakuna kawaykaptinkuna. Atarimushpa chay sirishkan kamillanta apishpa wasinman rirkana. Sukaman kushikushpa rirkana Tata Diosta alabaypi.

²⁶ Chashna chay unkudu runa alliyaptinna tukuy kawak runakuna suka-man almirashpankuna Tata Diosta sukaman alabarkansapa. Chaypina manchakushpankuna willanakurkansapa:

—Kunanka almirana layakunata kawashkanchisapa.

Jesus Levita willarkan paywan tantalla purinanpa.

(Mt 9.9-13; Mr 2.13-17)

²⁷ Chay unkudu runata alliyachishkanwasha suk llaktaman Jesus rirkana. Chaypi chayashpa suk kullki kobrauk runawan kawanakurkan. Chay runaka romano gobiernupa kullkita kobraukuykarkan. Paypa shutin karkan Levi. Levi ka kullki chaškikan mesa ladunpi tiyariyu karkan. Payta kawashpana Jesuska willarkan:

—Shamuy, ūukata katiway.

²⁸ Chashna Jesus willaptinna Leviya tiyariyu kashkanmanta atarirkan. Payka tukuy chay kullki kobraukushkanta sakishpa Jesuswan tantalla purirkan disipulun kananpa.

²⁹ Suknin diya Jesusta sukaman kuyashpa Leviya suk fiestata ru-rarkan wasinpi. Chay fiestata rurashpa Leviya kullki kobraukmasinkunata llaktamasinkunatapish konvidarkansapa. Jesuska disipulunkunawan chay runakunawan tantalla suk mesallapi mikurkansapa. ³⁰ Chaypina fariseo runakuna Tata Diospa rimananta yachachikuk runakunawan Jesusta kawarkansapa. Paykuñaka Jesuspa disipulunkunata kallarirkansapa yuyayta. Willarkansapa:

—¿Imapatí kankunaka kobrauk runakunawan uchasapa runakunawan tantalla mikuykankichi upyaykankichi?

³¹ Chashna disipulunkunata willaptinkuna Jesuska willarkansapa:

—Sanu runa mana ampic runata maskanchu mana unkudu kašhpaa. Un-kudu runa ampic runata maskan alliyayta munashpa. Kankuna mana alli rurak runakuna kashpaykichi unkudu runakunashina kawsankichi. ³² Ūuka shamushkani tukuy uchasapakunata kayak. Manami shamushkanichu mana uchayuk yuyanakuk runakunata kayak.

Runakuna Jesuspaa disipulunkunata repararkansapa mana mikunata sasiptinkuna.

(Mt 9.14-17; Mr 2.18-22)

³³ Chashna Jesus yachachikuptin runakuna piňakushpa willarkansapa:

—Juanpa disipulunkuna chaymanta fariseokunapa disipulunkuna churu-dru diyakunapi Tata Diosta kuyanankunaryku mana nimata mikun-sapachu. Sukaman orashpankuna kawsansapa. Kanpa disipuluykikunaka tukuy layata mikushpa upyashpankuna kawsansapa.

³⁴ Chashna willaptinkuna Jesus kay ejempluta willarkansapa:

—Suk funsiata rurashpaykichi noviowan tantalla kashpaykichi kushikushpa mikunkichi. Mana kasaranan diyachu konvidadukunaka

sasinsapa. ³⁵ Funsia tukuptinna novio sakiptinkuna chaypira churadu diyakunata mikunata mana mikunkasapachu.

³⁶ Chashna Jesus yachachikushpa chikan ejemplutapish willarkansapa:

—Mana ni pi mushuk llachapata tipishpa mawka llachapapi apichin manchu. Chashna mushuk llachapata tipiptin wakllidu kiparin. Chaymanta mawka llachapapika mushuk retaso mana allichu rikurin.

³⁷ Mana ni pi churanmanchu llullu vinuta mawka vinu churana kapachupi. Chaypi churaptin llullu vinu timbushpma mawka kapachuta pachyachinman. Kapachu llikikuptin vinuka usunman.

Chay llikikudu kapachupish wakllidu kiparin. ³⁸ Chayrayku llullu vinuta mushuk vinu churana kapachupi churansapa ama vinu usunana. Ñukapa yachachikunaynika mushuk vinushinami.

Kankunapa yachachikunaykichika mawka kapachushinami. Chayrayku yachachikuptini mana munankichichu kasuwaya. ³⁹ Chaymanta yachachikunaykichi mawka vinushina kaptin chayllata munankichi. Chayrayku mana munankichichu ñukapa yachachikunaynita mushuk vinushina kaptin.

6

Samana diya Jesuspa disipulunkuna tipi triguta pallarkansapa.

(Mt 12.1-8; Mr 2.23-28)

¹ Chaymanta suk samana diya Jesus disipulunkunawan suk llaktaman rirkansapa. Rishpankuna trigu chakra chawpinta purirkansapa. Chaypina Jesuspa disipulunkuna triguta tipishpankuna makinkunapi ishkushpa mikurkansapa. ² Chayta kawashpankuna fariseokuna willarkansapa:

—¿Imapatí disipuluykikuna samana diya kaykaptin triguta pallaykansapa? Chayta rurashpa Moisespa kamachikunankunata mana kasuykansapachu.

³ Chashna fariseokuna willaptinkuna Jesuska willarkansapa:

—¿Manachu leyishkankichi ñawpa kamachikuk David rurashkanta? Suk diya payka purikmasinkunawan sukaman purishpankuna yarkarkansapa.

⁴ Yarkaymanta kashpa Tata Diospa wasinpi yaykurkansapa. Chaypi Davidka mikurkan Tata Diospa churadu pankunata. Purikmasinkunatapish kararkan. Chay laya pankunaka saserdotekunallapa karkan. Chayta mikushpankunapish mana uchallikurkansapachu. Chashnashina disipuluynikunata ama willaychichu uchallikuykanankunata. ⁵ Ñuka sielumanta shamudu runa kashpayni allita yachachiykichi samana diya imakunami alli ruranaykicipha imakunami mana allichu ruranaykicipha nishpa.

Jesus suk kasperayadu makiyuk runata alliyachirkan.

(Mt 12.9-14; Mr 3.1-6)

⁶ Chaymanta suknin samana diya Jesus tantanakunankuna wasipi yaykurkan. Chaypina kashkan kallarirkan yachachikuya. Chay wasipika suk kasperayadu alli ladu makiyuk runa karkan. ⁷ Chaypina Moisespa killkadunta yachachikuk runakuna fariseokunawan sukaman Jesusta chapapayarkansapa. Kawanayarkansapa samana diya chay runata alliyachinkachu manachu nishpa. Paykunaka awtoridarkunapi Jesusta sukaman chatanayarkansapa samana diya unkuduta alliyachiptin.

⁸ Jesuska yacharkan chatanayaykanankunata. Chaypina paykunata mana manchashpa chay kasperayadu makiyuk runataka willarkan:

—Rillay chay runakunapa chawpinkunapi shayarik.

Chashna Jesus willaptin payka shayarik rirkan. ⁹ Chawpinkunapi shayaripinna Jesuska chay chatanayak runakunata willarkansapa:

—Ñuka kankunata tapuykichi: Moisespa killkadunpi ¿imatati willawan-chisapa? ¿Willawanchisapachu samana diya allita mana allita rurananchikunapa? ¿Samana diya suk runata alliyachinchimanchu? ¿Suk runata kawapayanchimanchu wañunarpa?

¹⁰ Mana nimata ayniptinkuna Jesuska tukuy chay chatanayak runakunata supta supta kawarkansapa. Chaypina chay kaspirayadu makiyuk runataka willarkan:

—Makikita chutachiy.

Chay runa Jesusta kasushpa makinta chutachishkan oras alliyarkan.

¹¹ Jesus chay runata alliyachiptin chay chatakunayak runakuna kawashpankuna sukaman piñakurkansapa. Chaypina sukwana sukwana willanakurkansapa:

—¿Imatati rurashunchisapa kay runataka?

Jesus chunka ishkay disipulunkunata akllarkan.

(Mt 10.1-4; Mr 3.13-19)

¹² Chaymanta suk diya Jesus suk urkuman rirkan orak. Chay urkupi tuta entero Tata Dioswan parlarkan. ¹³ Chaymanta punchawyaptin ladunman tukuy disipulunkunata kayarkansapa. Tukuy paykunamanta chunka ishkayta akllarkan paywan tantalla purinankunapa. Chay aklladu disipulunkunata willarkansapa paykunapish yachachikunankunapa. ¹⁴ Suk aklladu disipulun karkan Simon. Jesuska paytaka shutiyachirkhan Pedru kananpa. Chaymanta karkansapa Simonpa wawkin Andres, Santiago, Juan, Felipi, Bartolome, ¹⁵ Mateo, Tomas. Chaymanta suk karkan Alfeopa wambran Santiago. Chaymanta suk karkan Simon. Payka romano gobiernta mana munarkanchu nima kasuya. ¹⁶ Chaymanta suk disipulun karkan Santiagopa wawkin Judas. Suk karkan Judas Iskariote. Payka suk tiempu washan Jesusta rantikurkan wañuchinankunapa.

Jesus aypa unkudu runakunata alliyachirkhan.

(Mt 4.23-25)

¹⁷ Chay chunka ishkay disipulunkunata akllashkanwasha chay urkumanta suk pampayninman Jesuska paykunawan tantalla urayamurkan. Chay pampapi aypa runakuna Judea partimanta Jerusalen llaktamanta atun kocha ladunpi Tiro Sidon llaktakunamatapish tantanakurkansapa. Chay aypa runakuna rirkansapa Jesusta uyarinankunapa. Aypa unkudukunapish rirkansapa Jesus alliyachinankunapa. ¹⁸⁻¹⁹ Chaypina kikin atipashpa Jesuska aypa unkudu runakunata alliyachirkansapa. Supaykuna unkuchishkan runakunatapish alliyachirkansapa. Aypa runakuna Jesusta llankanayarkansapa unkuyninkunamanta alliyayta munashpankuna.

Jesus disipulunkunata yachachirkansapa imashnami kushikushpa kawsankasapa nishpa.

(Mt 5.1-12)

²⁰ Chaymanta tukuy chay aypa runakunata alliyachishkanwasha Jesuska disipulunkunata chapashpa willarkansapa:

—Mana nimayuk kashpaykichipish kushikuypuru kankichi. Kankunami Tata Diospa mandunpi kawsaykankichi.

²¹ Kunan tiempu yarkashpa kawsashpaykichipish kushikuypuru kankichi. Tata Dios kankunata saksachishunkichi.

Kunan tiempu wakashpa kawsashpaykichi kushikuypuru kankichi. Tata Dios kushichishuptikichi asikunkichi.

²² Ñuka sielumanta shamudu runami kani. Runamasikichi kankunata sukaman ñukarayku chiknishuptinkuna Tata Dios kushichishunkichi. Paykuna washanchashushpaykichi tantanakunankunamanta karkushuptikichi Tata Dios kushichishunkichi. Ñukarayku runakuna mana alli kanaykichita rimaptinkunapish Tata Dios kushichishunkichi. ²³ Chashna chiknishuptikichipish sukamanlla kushikuychi. Yachankichi sielupi premyuykichita chaskinaykichita. Chay chiknishuknichipa ñawpa awilunkunapish idenllata Tata Diospa rimananta yachachikuk runakunata chiknirkansapa.

²⁴ Kankuna tukuy layayuk kaptikichi llakichiykichi. Kay tiempullapa tiyapushunaykichillawan kushikuykankichi.

²⁵ Kay tiempulla saksadu kawsaptikichi llakichiykichi. Suk tiempukaman yarkankichi.

Kay tiempulla asikushpa kawsaptikichi llakichiykichi. Suk tiempukaman llakishpa kawsankichi.

²⁶ Tukuy runakuna kankunata sukaman alabashuptikichi llakichiykichi. Paykunapa ñawpa awilunkuna idenllata alabarkansapa llulla yachachikuk runakunata.

Jesuska disipulunkunata yachachirkansapa chiknik runakunata kuyanankunapa.

(Mt 5.38-48; 7.12)

²⁷ Jesuska yachachikuypi katishpa willarkansapa:

—Kankuna kreyiwak runakuna kaptikichi allita yachachiykichi. Tukuy chiknishuknikichi runakunata kuyaychi. Paykunata yanapashpalla kawsaychi. ²⁸ Tukuy mana alli yuyashuknikichi runakunata allillata kuyashpa yanapaychi. Tukuy piñachishuknikichi runakunapa Tata Diosta roygaychi yanapanankunapa.

²⁹ Suk runa chiknishushpa uaykipi sakmashuptinka ama kutipaychu. Suk ladu uaykitapish kuy sakmashunanpa. Suk runa sakuykita kichushuptikika ama michaychu kamisaykitapish apananpa. ³⁰ Pipish kashpa suk imata mañashuptiki ama michashpalla kuy. Chaymanta suk runa imaykita kichushuptikika ama kutin mañaynachu. ³¹ Kankuna munankichi runamasikichi kuyashushpaykichi allita rurashunaykichipa. Chashnashina kankunapish runamasikichita allita rurashpa kawsaychi.

³² Kankunaka kuyashuknikichi runakunallata kuyashpaykichika Tata Diosta mana kushichiykankichichu. Tukuy uchasapa runakunapish kuyak runakunallata kuyansapa.

³³ Kuyanakukmasikichillawan yanapanakushpaykichika iden uchasapakunashinalla kawsankichi. Chashna kawsashpaykichi Tata Diosta mana kushichinkichichu. Kankunaka chiknishuknikichitapish kuyanaykichilla tiyan.

³⁴ Chaymanta kankuna kullkikichita kutichikuk runakunallata prestadu kushpaykichika Tata Diosta mana kushichiykankichichu. Tukuy uchasapa runakuna sukwana sukwana prestanakunsapa ashwan aypata chaskiyta munashpangkuna.

³⁵ Chayrayku kankunaka chiknishuknikichitapish kuyanaykichilla tiyan. Tukuy runakunata yanapanaykichi tiyan. Pipish kaptin suk imata mañashuptikichika kuychilla ama kutichishunanta yuyashpa. Kankuna tukuy pi kuyashpa kawsaptikichi Tata Dios sukaman yanapashunkichi kushichishunkichi. Paymi sukaman yachaysapa kashpa tukuy mana alli rurak runakunata tukuy mana kuyakuk runakunata kuyashpalla yanapan.

Chashna kankuna Tata Diosshina kuyashpa yanapashpa kawsashpay-kichika paypa wambrankuna kankichi.³⁶ Tata Diosnikichi tukuy runakunata llakichishpa yanapan. Chashnashina kankunapish Tata Diospa wambrankuna kashpaykichi payshina llakichikuk runakuna kaychi.

*Jesus disipulunkunata yachachirkan ama ni pita yuyanankunapa.
(Mt 7.1-5)*

³⁷ Chaypina Jesuska yachachikuyllapi katishpa willarkansapa:

—Ama ni pita washanchashpa yuyaychihu. Kankuna mana ni pita yuyaptikichi Tata Diospish kankunapa allillata yuyanka. Chaymanta ama ni pita chiknishpa kastigachinayaychihu. Mana kastigachinayaptikichi Tata Diospish kankunata mana kastigashunkichichi. Tukuy pita perdonanaykichi tiyan. Chashna perdonaptikichi Tata Dios kankunatapish perdonashunkichi.³⁸ Pitapish kaptin mana michashpa yanapaychi. Chashna mana michashpa yanapaptikichika Tata Dioska kankunatapish ashwan sukaman allita yanapashunkichi. Kankuna runamasikichita rurashkay-kichishina Tata Dios kankunatapish rurashunkichi.

³⁹ Chashna Jesus yachachikushpa suk ejempluta parlachikurkan:

—Suk runa mana kawakuk kashpa mana kawakumasisinta mana ni mayta atipanchu pushayta. Pushanayashpaka suk rarkapi ishkantin urmanmansapa. Kankuna mana kreyiwashpaykichika iden mana kawakuk runakunashina kankichi.

⁴⁰ Suk disipulu maestrunkanta mana ashwan alli yachakchu. Disipulu allita yachakushpa maestrunkhinala yachan. Chayrayku ñuka yachachikup-tini allita uyariwaychi kankunapish allita yachanaykicipa.

⁴¹ Kankuna mana uchaykichita riksinyayashpaykichi ñawinipi kaspi tiyapuk runashina kankichi. Ñawikichipi suk kaspi tiyaptin munankichi runamasikichipa ñawinmanta takshasillu susyata surkuya. Chaykamanka kikikichipa ñawikichipi kaspi tiyaykaptin mana nima mallinkichichi.

⁴² Kankunapa ñawikichipi kaspi tiyaykaptin *¿imashnatí animukunkichi wawkikichita willayta?* “Ñuka ñawikimanta chay susilluta surkunayani” nishpa? Kankuna allipi tukushpa mana allikunata ruraykankichi. Chayrayku uchallikuykankichi. Kikikichipa ñawikichimantara kaspita surkushpara wawkikichipa ñawinmanta taksha susilluta atipankichiman surkuya. Uchaykichita sakishpa kawsashpaykichira wawkikichita atipankichi yanapashpa yachachiyta.

*Jesus yachachikurkan wayuchakuk kaspipa ejemplunta.
(Mt 7.17-20; 12.34-35)*

⁴³ Jesuska yachachikuyllapi katishpa willarkansapa:

—Tukuy allima kaspi sukaman allimata wayuchakun. Mana alli kaspika mana valekta wayuchakun.⁴⁴ Tukuy alli wayuchakuk kaspitami wayun-manta riksinch. Kashayuk kaspika mana wayuchakunchu igo wayuta. Chaymanta sarsa waska mana wayuchakunchu uva wayuta.

⁴⁵ Chashnami alli yuyayuk runa allikunallata rimashpa kawsan. Mana alli yuyayuk runaka mana allikunata rimashpa kawsan. Rimananllamanta riksinch suk runata alli yuyayukchu manachu nishpa.

*Jesus ishkay laya wasikunapa ejemplunta yachachikurkan.
(Mt 7.24-27)*

⁴⁶ Chaymanta Jesuska yachachikuyllapi katishpa chay runakunata willarkansapa:

—Willashkaynita mana ruranayashpaykichika *¿imapati* “Maestro, Maestro” niwankichi?⁴⁷ Mash uyariwaychi. Suk ejempluta parlachiykichi

yachanaykichipa maykan runami ūukaman shamushpa kasuwashpa willanaynita ruran.

⁴⁸ Suk runa alli yuyayuk kashpa wasinta ruran sinchi allpapi ukuta aspissha. Payka uku aspidupi pirkata churaptin alli ruradu wāsi kiparin. Yaku untaptin sukaman kallpaptinpish chay wasi mana nima tikranchu alli ruradu kashpa. Kankuna willashkaynita allita rurashpa kawsashpaykichika sinchi allpapi wasinta rurak runashina kankichi. ⁴⁹ Chaymanta suk mana alli yuyayuk runa wasinta mana ukuta aspissha ruran. Chaymanta tamyaptin yaku untaptin sukaman kallpaptin chay wasika urman mana alli ruradu kashpa. Kankunaka willashkaynita mana rurashpaykichika iden mana alli wasinta rurak runashina kankichi. Yuyaynikichi kunanlla wakllin.

7

*Jesus romano kapitanpa wiwachunta unkuyininmanta alliyachirkan.
(Mt 8.5-13)*

¹ Chay aypa runakunata yachachishkanwasha Kapernaum llaktaman Jesuska rirkana. ² Chay llaktapi tiyarkan romano gobiernapa soldadukunapa kapitannin. Paypa tiyarkan alli kuyadu wiwachun. Chay wiwachunka fatal unkudu kashpa wañunayakarkan. ³ Chay kapitanka yacharkan Jesus aypa unkudukunata alliyachiyananta. Chayta yachashpa judiyu ansianukunata kacharkan Jesústa willanankunapa wasinman shamuñanpa wiwachunta alliyachik. ⁴ Chay ansianukuna Jesusta ladunchashpankuna sukaman willarkansapa rinanpa chay kapitanpa wiwachunta alliyachik. Willarkansapa:

—Alli kanman chay kapitanta yanapanaykipa. ⁵ Payka romano kaykash-papish sukaman munawashpankuna yanapawashkasapa. Paymi tanta-nukunaynikuna wasita rurachishka.

⁶ Chashna willaptinkunana chay kapitanpa wasinman Jesuska payku-nawan rirkana. Manarapish wasinpi chayaptin chay kapitanka amigunku-nata kacharkan Jesusta willak:

—Maestru, chay kapitanka pinkakunshi wasinpi chayanaykipa.

⁷ Manashi nimachu payka kanwan parlananpaka. Chayrayku judiyu ansianukunallata kachashka willashunarpa wiwachunta alliyachipunaykipa. Karullamantashi willaptiki wiwachunka alliyanka.

⁸ Kashnami willachishunki: “Tata Diosmi kantaka kamachishunki. Ñukapish tiyan kamachiwakinikuna. Paykuna kamachiwaptinkuna kasunayni tiyan. Chaymanta ūuka soldadukunata kamachiptini paykuna kasuwansapa. Suk soldaduta suk mayman rinanpa willaptini rin. Sukta shamuñanpa willaptini shamen. Suk wiwachuyni imatapish rurananpa willaptini ruran. Chayrayku karullamanta wiwachuynita alliyachipay.”

⁹ Chay kapitan willachishkanta uyarishpa Jesuska sukaman almirarkan. Chaypina chay aypa katik runakunata chapashpa willarkansapa:

—Allita willaykichi. Tukuy judiyumasinikunamanta mana niman suk runa kay romano kapitanshina ūukata kreyiwankichichu.

¹⁰ Chashna Jesus willaptinna chay kapitan kachashkan runakunaka kutirkansapana. Kapitanpa wasinpi chayashpankuna tarirkansapa wi-wachuntaka alliyadutana.

Jesus suk viyuda warmipa wawanta wañushkanmanta kawsachimurkan.

¹¹ Jesus chay kapitanpa wiwachunta alliyachishkanwasha Nayin llakta-man rirkana. Chay llaktaman Jesuswan tantalla disipulunkuna chaymanta aypa runakuna rirkansapa. ¹² Jesus chay llaktapi chayashpa kawarkan

suk wañudu pampak pushaykaptinkuna. Chay wañudu karkan viyuda warmipa chaylla wawan. Chay viyudata llakichishpa aypa llaktamasinkuna tantalla riyarkansapa wañudu pampak. ¹³ Chaypina Jesuska chay warmita kawashpa sukaman llakichishpa willarkan:

—Amana wakakuynachu.

¹⁴ Chashna chay warmita willashpa Jesuska wañudu laduncharkan. Chaypina wañudu pushaykak runakunaka shayarirkansapa. Jesus wañudupa kamillanta llankashpa willarkan:

—Wambrayni, atarimuyuna.

¹⁵ Chashna willaptin chay wañudu waynaka kawsamurkan. Tiyarimushpa kallarirkan rimakuyta. Chaypina Jesuska chay kawsachimushkan waynata mamanta kurkan. ¹⁶ Chayta kawashpankunana tukuy chay aypa runakuna sukaman manchakurkansapa. Tata Diosta alabashpankuna willarkansapa:

—Kay wañudu kawsachimushpa Jesuska sukaman alli yachachikuk runami.

Sukkunaka rimarkansapa:

—Tata Diosmi shamushka yanapawakninchikuna.

¹⁷ Tukuy Judea partipi kawsak runakuna yacharkansapa Jesus chay wañudu waynata kawsachimushkanta.

Juan Bawtista yachanayarkan Jesus Tata Diosmanta shamudu runachu manachu nishpa.

(Mt 11.2-19)

¹⁸ Chaypina Juanpa disipulkunkuna payta willarkansapa Jesus ruraykananta aypa almirana ruranata. Chayta yachashpa Juanka ishkay disipulkunata kayarkan. ¹⁹ Paykunata Jesusman kacharkansapa yachanayashpa pay Tata Diosmanta shamudu runachu manachu nishpa. Mana pay kaptinka chikanta shuyanankunapa.

²⁰ Juanpa disipulkunkuna Jesusta tapuk rirkansapa. Ladunchashpankuna willarkansapa:

—Juan ñukaykunata kachamuwashkasapa tapukniki: ¿Kanchu deveras Tata Diosmanta shamudu runa kanki? Mana kan kaptikika chikanta shuyashasapa.

²¹ Mana aynishpara chay diya Jesuska aypa runakunata unkuyinkunamanta nanayninkunamanta alliyachiykarkansapa. Chaymanta supay unkuchishkan runakunata alliyachiykarkan. Chaymanta aypa mana kawakuk runakunapa ñawinkunata alliyachiptin allitana kawakurkansapa. ²² Chay rikchak laya unkuyuk runakunata alliyachishkanwasha Jesuska chay ishkay runakunata willarkansapa:

—Rillarychi Juanta willak tukuy kawashkaykichita tukuy uyarishkaykicha. Willaychi mana kawakuy atipakkunata alliyachishkaynita. Willaychi mana puriy atipakkunata lasaruyak runakunatapish alliyachishkaynita. Ñuka alliyachiptini upa runakunapish uyarikunsapana. Chaymanta willaychi wañudukunata kawsachimushkaynita. Ñuka tukuy mana nimayuk runakunata yachachiykansapa Tata Dios salvakuk kananta. ²³ Chaymanta Juantaka willaychi pipish kashpa mana pinkakushpa ñukata allita kreyiwashpa kushikuypurumi kawsanka.

²⁴ Juanpa disipulkunkuna kutiptinkuna Jesuska tukuy paywan kiparik runakunata willarkansapa:

—¿Imatati chunlla pampapika rishkankichi kawak? ¿Rishkankichichu pintuta wayra kuyuchiption kawak? ²⁵ Mana chayta kawak rishpaykichika

¿imatatí rishkankichi kawak? ¿Allima llachapayuk runatachu? Kankunaka yachankichi allima llachapayuk runakuna rinankunata sinchi kamachikkunapa wasinkunallaman. ²⁶ ¿Imatati rishkankichi kawak? ¿Alli yachachikuk runatachu? Ariya, deverasmi rishkankichi alli yachachikuk runata kawak. Payka tukuy alli yachachikkunamanta ashwan alli yachachikukmi.

²⁷ Tata Dios killkadunpi Juanpa rimarkan: “Ñukaka suk alli yachachikukta kachasha tukuy runakunata willananpa kachamushkayni runata allita chaskinankunapa.”

²⁸ Allita willaykichi. Chay yachachikuk Juanka tukuy runakunamanta ashwan alli yachakmi. Chashna Juan ashwan alli yachak kaykaptinpish Tata Diospa mandunpi mana nima yachak yuyanakuk runakuna Juanmanta ashwan yachaysapakunami.

²⁹ Juan yachachikushkanta uyarishpankuna aypa runakuna yacharkansapa Tata Dios alli rurak kananta. Romano gobiernapa kullkinta kobrakuk runakunapish Juanta uyarishpankuna bawtisakurkansapa.

³⁰ Fariseo runakunawan Tata Diospa kamachikunanta yachachikuk runakuna mana munashkasapachu Tata Dios nimapi yanapanankunapa. Chayrayku mana Juanman rishkasapachu bawtisakunankunapa.

³¹ Chaypina Jesus yachachikuyllapi katirkan:

—¿Imashnatí yachachiykichiman? ¿Ima ejempluwantí yachachiykichiman? ³² Kankunaka plasapi tiyarishpa pukllak wambrakunashinami kan-kichi. Paykunaka pukllakmasinkunata kaparikunsapa: “Ñukaykuna kenata pukuptinikuna kankuna mana tushushkankichichu. Llakinapa laya kantu ta kantaptinikuna mana nima wakashkankichichu.”

³³ Kankuna chay pukllak wambrakunashina mana nimawan agradakunkichichu. Juan mana panta mikuptin mana vinuta upyaptin rimankichi supayuk kananta. ³⁴ Ñuka sielumanta shamudu runa mikuptini upyaptini kankuna rimankichi mikundero upyandero kanaynita. Chaymanta rimankichi uchasapa runakunapa romano awtoridarkunapa kullki chaskikuk runakunapa purikmasinkuna kanaynita. ³⁵ Chashna yuyawaptikichipish willaykichi: Tukuy pi allita rurashpa kawsashpankuna runamasinkunata kawachinsapa yachaysapa kanankunata.

Suk fariseo runa Jesusta konvidarkan wasinpi mikurinapa.

³⁶ Chaymanta suk fariseo runa Jesusta konvidarkan wasinpi rinanpa mikuk. Chashna konvidaptin Jesuska rirkana. Chaypina mesapi mikuykarkan. ³⁷ Chay fariseopa llaktanpi suk waynandera warmi kawsarkan. Chay warmika yacharkan chay fariseopa wasinpi Jesus chayashkanta. Chaypina rirkana Jesusta tarik. Suk yurak rumimanta rurada botellapi mishkilli asnak wirata apashpa Jesusta laduncharkan.

³⁸ Chay warmika kumurayashpa Jesuspacha chakin kuskapi wakakurkan. Sukaman wakakushpa ñawin illiwan Jesuspacha chakinta maylapurkan. Chukchanllawan chakichipushpa chakinta mucharkan. Chaymanta chay mishkilli asnak wirata Jesuspacha chakin sawapi icharkan.

³⁹ Chayta kawashpana chay konvidak fariseoka shunkun ukullapi rimarkan: “Kay Jesuska deveras Tata Diospa rimananta yachachikuk runa kashpaka kay warmita riksinman uchasapa kananta.”

⁴⁰ Jesus yuyayninta yachashpa willarkan:

—Simon, suk imata willanayayki.

Chaypina chay fariseoka aynirkana:

—Maestru, suk imata willawanayashpaka willaway.

41 Chashna chay fariseo runa willaptinna Jesuska willarkan:

—Ishkay runakuna suk patronmanta kullkita prestadu surkurkansapa. Suk runa surkurkan pichka pachak kullkita. Šukka surkurkan pichka chunkallata. **42** Chaymanta chay patronka kutichinankunapa willaptinna mana nima kullkiyukchu karkansapa kutichikunankunapa. Paykuna mana kutichiyyta atipaptinkuna chay patronka ishkantinkunata perdonarkansapa ama kutichinankunapa. Kunanka willaway. ¿Maykan kullkita debikuk runatí chay patrontaka ashwan allita kuyan?

43 Chashna Jesus willaptinna Simonka willarkan:

—Ñukaka yuyani chay ashwan aypa kullkita surkushkan runa ashwan allita patronta kuyananta.

Chashna willaptinna Jesuska willarkan:

—Allitami ayniwashkanki.

44 Chaypina Jesuska chay warmita chapashpa Simonta willarkan:

—¿Kawashkankichu kay warmi chakinita mayllapin? Wasikipi chayap-tini kanka mana yakuta kuwashkankichu chakinita mayllanaynipa. Kay warmika ñawin illiwan chakinita mayllapashka. Chaymanta chukchan-wan chakichipashka. **45** Kanka mana nima muchawashkankichu. Kay warmika wasikipi chayamushkaynimantapacha chakinipi muchawashka.

46 Chaymanta kanka mishkilla wirata mana nima umaynipi ichashkan-kichu. Kay warmika chay mishkilla asnak wirata chakini sawanpi ichashka.

47 Payka yachan tukuy uchankunata perdonanaynita. Chayrayku suka-man kuyawashpa chakinita mayllapashka. Kanka yuyanakunki pishillata uchayuk kanaykita. Chayrayku mana munankichu perdonanaynipa. Chayrayku mana yakachu kuyawanki.

48 Chashna Simonta willashpa Jesuska chay warmitaka willarkan:

—Uchaykikunamanta perdonayki.

49 Chashna Jesus willaptinna konvidadu runakuna sukwan sukwan tapunakurkansapa:

—¿Imashnatí kay runaka atipan uchakunata perdonayta? Tata Diosllami atipan uchata perdonayta.

50 Chayta uyarishpana Jesuska chay warmitaka willarkan:

—Kanmi tukuy shunkuykimantapacha kreyiwashkanki. Chayrayku tukuy uchaykita perdonani. Kushikushpana rillay wasikiman.

8

Warmikuna Jesusta yanaparkansapa.

1 Chaymanta Jesus aypa llaktakunapi yachachikuypi purirkana. Payka tukuy runakunata willarkansapa Tata Dios sukaman alli kamachikuk kananta. Chay chunka ishkay disipulunkunaka paywan tantalla purik-sapa. **2** Jesus unkuyninmanta alliyachishkan warmikuna payta yanapaypi katirkansapa. Sukkunata alliyachirkansapa supaykunata llukshichishpa. Mariya Magdalenaipish Jesustaka katirkana. Paymanta Jesuska kanchis supaykunata llukshichirkana. **3** Chaymanta suk warmi Juana Jesusta katirkana. Juanapa kusanza shutin karkan Kusa. Chay runa Kusa karkan sinchi awtoridar Herodespa atun wasinpi kamachikuk. Chaymanta Susanawan aypa warmikunapish Jesusta katirkansapa tiyapunankunawan tukuy layapi yanapashpankuna.

*Jesus tarpudu murukunapa ejemplunta yachachikurkan.
(Mt 13.1-9; Mr 4.1-9)*

⁴ Jesus yachachikupi puriptin aypa runakuna llaktankunamanta llukshirkansapa kawanayashpangkuna. Chay aypa runakuna tantanakuptinkuna Jesuska suk ejempluta parlachirkansapa:

⁵ —Suk runa rirkana tarpukuk. Murukunata shikwashpa tarpuptin sukkuna urmarkansapa ñampi. Chay ñanka sukaman sarudu kashpa sinchi allpa karkan. Chay sinchi allpapi murukuna urmaptin pishkilukuna mikurkansapa. ⁶ Suk murukuna urmarkansapa rumisapa allpapi. Chay rumisapa allpapi murukuna urmaptin tipillata wiñarkan. Chaymanta chakirkansapa mana ñupu ñupu allpa kaptin. ⁷ Suk murukuna urmarkansapa kashasapa kiwa ukunpi. Chaypi wiñaykaptinkuna chay kashasapa kiwakuna makarkansapa chakinankaman. ⁸ Suk murukuna urmarkansapa allima allpapi. Chaykunaka sukaman allimata wiñashpa aypata wayuchakurkansapa. Suk murumanta pachakta wayuchakurkan.

Chaykunata yachachishpangkuna Jesuska sinchita rimakushpa willarkansapa:

—Kankuna uyarikuk kashpaykichika kay yachachikunaynita allita rinrilikuychi.

Jesus disipulunkunata willarkansapa imaraykumi ejemplukunawan yachachikuykarkan nishpa.

(Mt 13.10-17; Mr 4.10-12)

⁹ Jesus yachachikuptinna disipulunkuna yachachikunanta mana entiendishpangkuna tapurkansapa:

—¿Imatáti yachachiwanayankisapa chay muru tarpudupa ejempluta willawashpaykisapa?

¹⁰ Chashna tapuptinkuna Jesuska willarkansapa:

—Tata Dios yachachishuykankichi paypa mandunpi yaykunaykichita. Manara yachachishushkaykichita ñami yachachishuykankichina. Chay mana kreyiwakkunata ejemplukunata yachachinisapa kawashpapish mana kawakuk runakunashina kiparinankunapa. Uyarishpapish mana uyarikukshina kiparikunankunapa.

Jesus yachachikurkan runakuna rikchak laya allpashina kanankunata.

(Mt 13.18-23; Mr 4.13-20)

¹¹ Jesuska yachachikuyllapi katirkan:

—Kashna chay ejemplu riman: Tata Diospa rimananka murukanashinami. ¹² Chaymanta aypa runakuna Tata Diospa rimananta uyarishpapish mana allitachu shunkullikunsapa. Chay runakunaka sarudu sinchi allpashinami. Supay chay murukunata mikuk pishkillukunashina llullachishpa pantachichin ama Tata Diosta kreyishpa salvadu kanankunapa.

¹³ Tata Diospa rimananta kushikupuru chaskik runakunaka rumisapa allpapi urmak murukunashinami. Chashna kushikupuru kreyishpangkunapish mana sapiyukshina kashpana suk tiempullata Tata Diosta katinsapa. Paykunaka nanaya llakita mallishpana manana munansapanachu Tata Diosta katiya.

¹⁴ Chaymanta suk runakuna Tata Diospa rimananta uyarishkankunamanta tipimanta tipimanta munanankunallata rurashpa kawsansapa. Kulkiyashpa vanidarkushpalla kawsansapa. Chay laya runakunaka iden kashasapa allpapi wiñak murukunashinami. Mana nima wayuchakunsapachu.

¹⁵ Chaymanta suk runakuna Tata Diospa rimananta tukuy shunku uyarishpa kasushpa kawsansapa. Paykunaka alli allpapi urmadu murukunashinami. Aypata wayuchakuk murukunashina tukuy shunku Tata Diosta kreyishpa mana shaykushpa kawsansapa.

*Jesus alkusapa ejemplunta yachachikurkan.
(Mr 4.21-25)*

¹⁶ Jesuska ejemplukunawan yachachikuyllapi katirkan:

—Suk alkusata apichishpa mesapi churanchisapa tukuy wasipi yakyuk runakuna kawakunankunapa. Mana ni pi alkusata apichishpa pakanchimanchu suk ollawan wichkashpa. Nima kawitu sakinpi pakanchimanchu. ¹⁷ Chay apichidu alkusa mesapi churadu yachachikunaynishihami. Yachachikunayni tukuy runakunata riksichin upallalla rimashkankunata pakakudu rurashkankunata. ¹⁸ Chayrayku yachachikunaynita allita uyariyichi. Allita kreyiwashpa kawsaptikichi Tata Dios ashwanta yanapashunkichi ashwanta yachanaykichipa. Mana allita kreyiwashpa kawsaptikichika Tata Dioska chay tipi yachashkaykichita kichushunkichi.

*Jesuspa maman wawkinkunawan rirkansapa kawak.
(Mt 12.46-50; Mr 3.31-35)*

¹⁹ Jesuspa maman wawkinkunawan rirkansapa payta kawak. Chaypina paykunaka mana atiparkansapachu Jesusta ladunchayta aypa runakunapa chawpinkunapi yachachikuykaptin. ²⁰ Chay runakuna Jesustaka willarkansapa:

—Mamaykiwan wawkikikunami washapi shuyashuykansapa kawashunayashpa.

²¹ Chaypina Jesuska willarkansapa:

—Tukuy Tata Diospa rimananta uyarishpa rurashpa kawsak runakunami ñukapa wawkinikuna mamaynikuna.

*Jesus sinchi wayrata sampayachirkan.
(Mt 8.23-27; Mr 4.35-41)*

²² Chaymanta suk diya atun kanowapi Jesuska disipulunkunawan tantalla yaykurkansapa. Chaypina disipulunkunata willarkansapa:

—Akyuchi kay kochata chimbaypachi.

Chashna Jesus willaptinkunana kallarirkansapa chimbaya. ²³ Chay kochata chimbaykaptinkunana Jesuska puñurkan. Puñuykaptinna sinchi wayra tiyarkan. Sukaman sinchi wayrawan yakuka kanowapi yaykurkan sumichinayanankaman. ²⁴ Chaypina disipulunkunaka manchakushpankuna Jesustaka rikchachishpa willarkansapa:

—¡Maestro, mash kaway! ¡Ñami suminayaykanchisapan!

Chaypina Jesuska atarimushpa chay sinchi wayrataka chay olaskunataka willarkan sampayanana. Chaypina chay wayraka sampayarkan.

²⁵ Wayrata sampayachishkanwasha Jesuska chay disipulunkunataka willarkan:

—¿Ariya manarachu allitara kreyiwankichi?

Chaypina disipulunkunaka sukaman manchakushpa almirashpankuna tapunakurkansapa:

—¿Piti kay runaka? ¡Wayrata yakuta willashpalla sampayachin!

*Jesus alliyachirkan supay unkuchishkan runata.
(Mt 8.28-34; Mr 5.1-20)*

²⁶ Jesus disipulunkunawan chay kochata chimbashpa chayarkansapa Gerasa partipi. Gerasa karkan Galilea parti kocha chimbaman. ²⁷ Chay

kanowamanta Jesus urayaptinna llakta ladunmanta suk supayadu runa laduncharkan. Unay tiemptutana chay runaka mana llachapayuk mana nima wasipichu kawsarkan. Payka wañudukuna pampanankuna machaykunapi kawsarkan. ²⁸⁻²⁹ Aypa kuti supayka chay runatata yanaparkan mana allita rurananpa. Llaktamasinkuna aypa kuti waskawan kadenakunawan chay runapa makinta chakinta wataksapa. Chashna wataptinkuna chay runaka tipiklla. Supayka chunlla machaykunaman paytaka pushak.

Chaypina chay supayadu runa ladunchaptin Jesuska supayta willarkan chay runamanta llukshinanpa. Chashna willaptin chay runaka manllaybata kaparikushpa Jesuspa ñawpakaninpi kunkurikushpa willarkan:

—¡Kanka sielipi kawsak Tata Diospa wambran kayakashpayki ama ñukata amichiwaychu! ¡Roygakyi ama ninaman kachawanaykipa!

³⁰ Chashna chay runa willaptinna Jesuska tapurkan:

—¿Ima shutimi kanki?

Chaypina payka aynirkan:

—Legion shutimi kani.

Chay runaka chashna willarkan aypa supaykuna paypi kawsaptinkuna.

³¹ Chaypina chay supaykuna willarkansapa ama kachanankunapa mana tukuyniyuk nina rawray ukuman.

³² Chay chunlla urkupi aypa kuchikuna tiyarkan. Chayta kawashpana supaykunaka Jesusta roygarkansapa chay kuchikunapi yaykuk rinankunapa. Chashna roygaptinkuna Jesuska almitirkansapa. ³³ Chaypina chay runamanta tukuy supaykuna llukshishpankuna rirkansapa kuchikunapi yaykuk. Paykunapi yaykuptinkunana sukaman kallpashpankuna urkumanta sinkushpa yakupi sipikurkansapa.

³⁴ Chayta kawashpana chay kuchikuna kuydak runakuna sukaman manchakurkansapa. Kallparkansapa tukuy llaktapi chakrakunapi kawsak runakunata kawashkankunata parlachikuk. ³⁵ Chayta uyarishpankuna tukuy runakuna rirkansapa kawak sipikudu kuchikunata. Chayashpana tarirkansapa Jesuspa ladunpi tiyariduta chay aypa supayuk kashka runata. Payka alli llachapakudu alliyaduna karkan. Payta kawashpankuna sukaman manchakurkansapa. ³⁶ Chaypina chay kawak runakuna parlachirkansapa Jesus chay runamanta supaykunata llukshichishkanta. ³⁷ Chaypina tukuy Geresa partipi kawsak runakuna manchakuypuru Jesusta roygarkansapa chayllamanta kutinanpa. Chashna roygaptinkunana Jesuska kanowapi yaykurkan kutinanpa. ³⁸ Rinayaykaptinna chay alliyadu runaka Jesusta roygarkan paywan tantalla rinanpa. Sukaman pushananpa roygaptinna Jesuska willarkan:

³⁹ —Kutiyna wasikimanna. Chaypina tukuyta parlachikuy Tata Dios kuyashushpa alliyachishushkanta.

Chashna Jesus willaptinna chay runaka kushikuypuru tukuy llaktaminkunata parlachirkana Jesus alliyachishishkanta.

Jesus yawar unkuyuk warmita alliyachirkana. Chaymanta Jairo shipash-ninta kawsachimurkan.

(Mt 9.18-26; Mr 5.21-43)

⁴⁰ Geresa llaktamanta Jesuska kutirkana kocha chimbaman. Chay kocha chimbani aypa runakuna Jesusta shuyaykarkansapa. Chaypi chayaptinna chay llaktapi kawsakkuna sukaman kushikuypuru chaskirkansapa.

⁴¹⁻⁴² Jesus kanowamanta llukshiykaptin suk runa Jairo laduncharkan. Jairoka tantanakunankuna wasipi kamachikuk karkan. Paypa chaylla wambran chunka ishkay watayuk shiptas karkan. Chay shiptasnin unkudu kaptin Jairoka Jesuspa ñawpakaninpi kunkurikuk rirkana.

Kunkurikushpa Jesusta roygarkan wasinman rinanpa. Jesus almitishpa riyaptin aypa runakuna niti niti katirkansapa.

⁴³ Chay aypa nitik runakunapa chawpinkunapi suk unkudu warmi tiyarkan. Chay warmika chunika ishkay watatana yawar unkuywan kawsarkan. Tukuy kullkintana tukucharkan doktorkunata katishpa. Mana ni pi alliyachiya atiparkanchu. ⁴⁴ Chay unkudu warmika Jesusta washan-manta ladunchashpa llachapan mañanta llankarkan. Llankashkan ratu yawarninka tipikurkan. ⁴⁵ Chaypina Jesuska katiyak runakunataka tapurkansapa:

—¿Pití llachapaynita llankashkankichi?

Chashna tapuptinkuna paykunaka willarkansapa:

—Manami ni pi llankashkaykisapachu.

Chashna willaptinkuna Pedru Jesusta willarkan:

—Maestru, aypa runakuna laduykipi kashpa sukaman nitishushpa kayta chayta tankanakushpankuna llankashuykansapa.

⁴⁶ Chashna Pedru willaptinna Jesuska willarkansapa:

—Suk kankunami unkudu kashpaykichi llachapaynita llankashkankichi alliyachinaynipa. Chay llankawaktaka ñami alliyachishkanina. Chayrayku tapuykaykichi pití llachapaynita llankashkankichi.

⁴⁷ Chashna sukaman Jesus tapuptinkuna chay unkuymanta alliyadu warmi mana pakakuya atiparkanchu. Rirkana sukaman manchakuywan chukchukushpa Jesuspa ñawpkninpí kunkurikuk. Chaypina willarkan:

—Ñuka unkudu kashpa llachapaykita llankashkani munashpayni alliyachiwanaykita. Deveraśna llachapaykita llankaptini alliyachiwashkanki.

⁴⁸ Chashna chay warmi willaptinna Jesuska willarkan:

—Munayanayni wambrayni, kanka allita ñukata kreyiwashkaykirayku alliyachishkayki. Kunanka wasikiman kushikushpa kutiy.

⁴⁹ Chashna Jesus willaykaptin Jairopa wasinmanta suk runa chayarkan. Payka Jairotaka willarkan:

—Wambraykika ñami wañushkana. Amana wasikiman Jesustaka pushay-nachu.

⁵⁰ Chayta uyarishpa Jesuska Jairotaka willarkan:

—Ama manchakuychu. Tukuy shunku ñukata kreyiway. Ñukami shipash-nikita kawsachimusha.

⁵¹ Chaymanta Jairopa wasinpi chayashpankuna Jesuska mana munarkanchu katiyak runakuna yaykunankunapa. Pedruwan Jakobota Juan-llata yaykuchirkan. Chaymanta shipashpa tatan maman yaykurkansapa Jesuswan tantalla. ⁵² Aypa runakuna chay wañudu shipashpa sukaman wakakushpankuna velaykarkansapa. Jesuska paykunata willarkansapa:

—Ama wakaychichu. Kay shipashka manami wañuduchu. Payka puñuykanmi.

⁵³ Chashna willaptinkunana chay wakakuykak runakunaka Jesusta mana kreyirkansapachu. Asikurkansapa yachashpankuna chay shipash alli wañudu kananta.

⁵⁴ Chaymanta Jesus kuartupi yaykushpa wañuduta makinmanta apishpa sinchita willarkan:

—Kuyanayni wambrayni, jatarimuy!

⁵⁵ Chashna Jesus willaptinna chay shipashka kawsamushpa atarimurkan. Chaypina Jesuska willarkansapa chay shipashta karanankunapa.

⁵⁶ Chayta kawashpankunana shipashpa tatan maman sukaman almirarkansapa. Paykunata Jesuska willarkan sapa ama ni pita parlachinanku-napa shipashninta wañushkanmanta kawsachimushkanta.

9

Jesuska disipulunkunata kacharkansapa unkudukunata alliyachinankunapa.

(Mt 10.5-15; Mr 6.7-13)

¹ Chaymanta suk diya Jesuska chunka ishkay disipulunkunata tantanachishpa atipachirkansapa yachanankunapa runakunamanta supaykunata llukshichiya. Allita atipachirkansapa rikchak laya unkuyukkunata alliyachinankunapa. ² Jesuska disipulunkunata kacharkansapa yachachinkununapa Tata Dios alli kamachikuk kananta. Kacharkansapa rikchak laya unkuyuk runakunata alliyachinankunapa. ³ Paykunata willarkansapa:

—Ama apaychichu bastonnikichita nima pikshaykichita nima mirkapaykichita nima kullkikichita nima suk llachapaykichita mudakunaykicipa.

⁴ Chaymanta maykan llaktapi chayashpaykichi suk runapa wasinpi kipariy-chi chikan llaktaman rinaykichi diyakaman. ⁵ Ichará chayashkaykichi llaktapi kawsak runakuna wasinkunapi mana chaskishunayankichimanchu. Paykuna mana chaskishunayaptikichika chakikichi susyanta tapsishpa chay llaktamanta lluksiyichi. Chayta rurashpaykichi paykunata willaykankichi Tata Dios uchankunaryku kastiganankunata.

⁶ Chashna Jesus kachaptinkunana disipulunkunaka llaktan llaktan yachachikupi purirkansapa. Yachachikurkansapa Tata Dios uchankunamanta perdonanankunata. Chaymanta rikchak laya unkuyuk runakunata alliyachiypa purirkansapa.

Sinchi kamachikuk Herodes yacharkan Jesus aya unkudukunata alliyachiyananta.

(Mt 14.1-12; Mr 6.14-29)

⁷⁻⁸ Chaypina sinchi kamachikuk Herodes uyarirkan Jesus rikchak laya ruraykananta. Runakuna Jesuspa rimarkansapa: “Juan Bawtista wañushkanmanta kawsamushpa Jesuspi tukushpa puriykan.” Sukkuna rimarkansapa: “Ichará ñawpa alli yachachikuk Eliyas kawsamushpa yachachikuykan.” Sukkuna rimarkansapa: “Kay Jesuska ñawpa wañudu yachachikuk runa kawsamushpa puriykan.” Chashna Jesuspa rimaptinkuna Herodes mana yacharkanchu imatami yuyanka nishpa.

⁹ Chaypina rimarkan:

—Ñukami Juantaka wañuchirkani umanta tipichipushpa. Ichará payna kawsamushka. Tukuy runakuna paypaka sukaman parlachikuykansapa. Chashna Herodes yuyaykushpa Jesusta sukaman riksinyarkan.

Jesus pichka waranka runakunata kararkansapa.

(Mt 14.13-21; Mr 6.30-44; Jn 6.1-14)

¹⁰ Chay chunka ishkay disipulunkuna unkudukunata alliyachishkunkunamanta kutishpankuna Jesusta rurashkankunata parlachirkansapa. Chaymanta parlachishkankunawasha Jesuska paykunallata pushashpa rirkhan Betsaida llaktaman. ¹¹ Chayman rishkanta yachashpana aya runakuna katirkansapa. Paykunata Jesuska kushikushpa yachachirkansapa Tata Dios tukuy layapi alli kamachikuk kananta. Chaymanta rikchak laya unkuyuk runakunata alliyachirkansapa.

¹² Chaypina chay chunka ishkay disipulunkuna tardiyaptin kawash-pankuna Jesusta willarkansapa:

—Tukuy kay runakunata kachaysapa rinankunapa llaktakunapi chakrakunapi maskak mikunankunata. Richunsapa maskak maypimi samankasapa nishpa. Kay chunllapika manami nima laya mikuna tiyanchu.

¹³ Jesuska mana rinankunapa munashpa disipulunkunata willarkansapa:

—Kankuna kay runakunataka karaychi.

Chaypina paykunaka willarkansapa:

—Pichka pansitukuna ishkay challwillukunallami ūukaykunapaka tiyan. Kay mikuna mana aypa kaptin ichará riymansapa rantik kay aypa runakunata karanaynikunapa.

14-15 Chashna disipulunkuna willaptinkuna Jesuska willarkansapa:

—Tukuy runakunata pichka chunkamanta pichka chunkamanta tanta-nachishpa tiyachiychi.

Jesus willashkankunata uyarishpankuna disipulunkunaka tukuy chay pichka waranka runakunata tiyachirkansapa.

16 Chaymanta Jesuska chay pichka pansitukunata chay ishkay challwata apishpa sieluta chapashpa Tata Diosta agradesirkan. Chaypina chay pankunata chay challwakunata pakishpa disipulunkunata kurkan chay aypa runakunata karanankunapa. **17** Tukuy paykuna mikurkansapa saksanankunakaman. Mikushkankunawasha chunka ishkay sestukunapi disipulunkuna puchudu mikunata tantachirkansapa.

*Pedru rimarkan Jesus Tata Diosmanta shamudu salvakuk runa kananta.
(Mt 16.13-19; Mr 8.27-29)*

18 Chaymanta suk diya Jesuska disipulunkunallawan suk chunllaman rirkansapa. Chaypina Jesuska disipulunkunamanta suchurishpa Tata Dioswan parlaykarkan. Orashkanwasha disipulunkunata tapurkansapa:

—¿Pi kanaynitati runakuna rimaykansapa?

19 Paykunaka willarkansapa:

—Sukkuna rimansapa kansi kanki runakunata bawtisak Juan. Sukkuna rimansapa kansi kanki ūawpa yachachikuk Eliyas. Chaymanta sukkuna rimansapa ūawpa wañudu yachachikuk runashi kawsamushka nishpa.

20 Chashna disipulunkuna willaptinkuna Jesuska tapurkansapa:

—¿Pi kanaynitati kankunaka yuyaykankichi?

Chaypina disipulun Pedruka willarkan:

—Kanki Tata Diosmanta shamudu salvakuk runami kanki.

21 Chashna Pedru willaptinna Jesuska paykunata willarkansapa:

—Mash uyariwaychi. Ama ni pita willaychichu Tata Diosmanta shamudu runa kanaynita.

22 Chaymanta willarkansapa:

—Tata Diosmanta shamudu salvakuk runa kaptinipish suk diya runakuna padesciwankasapa. Judiyumasinchikunapa ansianunkuna, saserdoteukanapa kamachikukninkuna, Moisespa killkadunta yachachikuk runakuna chikniwashpankuna wañuchiwankasapa. Paykuna wañuchiwaptinkuna kimsa diya ukun kawsamusha.

23 Chaymanta Jesusku tukuy katik runakunata willarkansapa:

—Kankunaka disipuluyinkuna kanayashpaykichika kikichipa munaykichita sakishpa ūukata kasuwashpa kawsaychi. Chiknishuk runakuna wañuchishunayaptikichipish kada diya ūukallata katiwaychi.

24 Kankuna wañuymanta kishpinayashpa sakiwashpaykichika mana kishpinkichichu mana tukuyniyuk ninamanta. Chaymanta ūukata kreyiwashkaykichirayku runakuna wañuchishuptikichipish mana tukuyniyukta Tata Dioswan kawsankichi.

25 Suk runa rikchak laya tiyapuptin mana sielipi yaykushpaka yankapa kay allpapi tukuy layayuk kashka. Tiyapunankuna mana nimapi yanapankachu ninamanta kishpinanpa. **26** Suk runakuna ūukata pinkakuwansapa. Rimanaynitapish mana munansapachu. Chashna pinkakuwaptinkuna ūuka kay allpaman llipyak likidu ukupi shamushpayni

chay pinkakuwak runakunata willashasapa mana ūukapa kanankunata. Chay diyaka Tatayni Diospa llipyayinipi yanapawak angelkunawan tantalla kashkan shamusha.

²⁷ Mash allita uyariwaychi. Suk kankuna manara wañushpaykichira kawankichi Tata Diospa mandunpi ūuka allita kamachikuptini.

Jesus chikan laya tukushpa sukaman llipyarkan.
(Mt 17.1-8; Mr 9.2-8)

²⁸ Chaymanta Jesuska pusak diya yachachikushkanwasha rirkana suk urkuman. Chayman rirkana Tatan Dioswan parlak. Jesuswan tantalla Pedru, Santiago, Juan rirkansapa. ²⁹ Tata Dioswan parlaykaptin Jesuspa uyan chikan laya tukurkan. Llachapanpish yurak likidu tukushpa llipyarkan. ³⁰ Chaypina chay kimsa disipulunkunaka kawarkansapa Jesusta parlaykaptin ishkay runakunawan. Paykuna karkansapa ūawpa yachachikuk Moiseswan Eliyas. ³¹ Moiseswan Eliyas Jesuswan parlaykaptinkuna llipyak likidu ukupi rikurirkansapa. Chaypi parlaykarkansapa Jerusalen llaktapi Jesus wañunanta. ³² Chaypina Pedruka disipulumasinkunawan sukaman puñunayashpankunapish mana puñurkansapachu. Paykuna kawarkansapa Jesusta chay ishkay runakunatapish llipyak likidu ukunpi.

³³ Chaymanta chay ishkay runakuna Jesusmanta anchuykaptinkunana Pedruka Jesusta willarkan:

—Maestru, allipaka kaypi kanwan tantalla kanisapa. Munaptikika kimsa ranchituta rurashasapa sukta kanpa, sukta Moisespa, sukta Eliyasa.

Pedru chayta rimarkan sukaman manchakushpa mana allita yuyashpa imatami rimaykan nishpa. ³⁴ Chashna Pedru willaptin suk puyu paykunata wichkamurkansapa. Disipulukuna puyu ukunpi mallinakushpankuna manchakurkansapa. ³⁵ Chaypina puyu ukunmanta uyarirkansapa Tata Dios rimakuptin:

—Kay Jesuska wambraynimi. ūukami paytaka akllashkani. Chayrayku payta allita uyariyichi.

³⁶ Chay disipulunkunaka chay rimanata uyarishkankunawasha Jesusta kawarkansapa sapallanta. Chaymanta urayamushpa manara ni pita willarkansaparachu chay urkupi kawashkankunata.

Jesus alliyachirkan supayadu wambrata.
(Mt 17.14-21; Mr 9.14-29)

³⁷ Chaymanta kayantin chay urkumanta urayamuptinkuna aypa runakuna rirkansapa Jesusta tinkuk. ³⁸ Paykunapa chawpinkunamanta suk runa manllaybata rimakushpa Jesustaka willarkan:

—Maestru, chaylla wambrayni tiyan. ¡Llakichiwashpa unkuyninmanta alliyachipay! ³⁹ Kay wambraynita supay unkuchiptin sukaman chukchukushpa kaparikun. Shimin sukaman pusukyan. Supay unkuchiptin kikinlla waktanakun. Supay mana sakinayanchu. ⁴⁰ Kanpa disipuluykikunata sukamannami roygashkani wambraynimanta supayta llukshichipunkunapa. Paykunaka manami atipashkasapachu llukshichipuya.

⁴¹ Chashna chay runa willaptin Jesuska ladunpi tiyak runakunata willarkansapa:

—¿Kunankamanchu manara allita kreyiwankichi? ¡Sukaman mana kreyikuk runakunami kankichi! ¿Aykapikamantí kankunawan kanayni tiyan? ¿Aykapikamantí amichiwankichi?

Chashna rimashpa chay wambrapa tatantaka willarkan:

—Chay wambraykitaka pushamuy kayman.

42 Chaypina Jesusta ladunchaykaptin supay chay wambrataka allpapi urmachishpa sukaman chukchuchirkan. Chaypina Jesuska supayta piñayashpa willarkan:

—Lluksiy kay wambramanta!

Chashna chay wambrata alliyachishpa tatanta kurkan.

43 Jesus chay wambrata alliyachishkanrayku tukuy kawak runakunaka sukaman almirarkansapa. Willanakurkansapa Tata Dios sukaman alli rurak kananta. Almirashpa chayta parlaptinkuna Jesuska disipulunkunataka willarkan:

44 —Mash allita uyariwaychi. Ama kunkaychichu. Sielumanta shamudu runa kaykaptini chikniwak runakuna wañuchiwankasapa.

45 Chashna Jesus willaptinkuna disipulunkunaka mana entiendirkansapachu. Paykunapa yuyayninkunata Tata Dios pantachichipurkansapa Jesus yachachishkankunata ama entiendinankunapa. Chaymanta paykunaka mancharkansapa Jesusta tapuya ashwan allita entiendichinankunapa.

Jesus yachachikurkan suk wambrillutayanapashpa Tata Diosta kushichinankunata.

(Mt 18.1-5; Mr 9.33-37)

46 Chaymanta Jesuspa disipulunkunaka ayninakurkansapa maykanmi ashwan alli kanman kamachikunankunapa.

47 Ayninakunankunata yachashpa Jesuska suk taksha wambrilluta apishpa ladunpi churarkan. **48** Chaypina disipulunkunata willarkansapa:

—Kankuna ñukata kreyiwashpa suk taksha wambrilluta kuyashpaykichi ñukatapish kuyawaykankichi. Ñukata kuyawashpaykichi kachamuwak Tataynitapish kuyaykankichi. Chayrayku kankuna runamasikichita kuyashpa yanapashpaykichi tukuymanta ashwanta Tata Diosta kushichinkichi.

Suk runa mana chikniwashpanchikuna yanapawaykanchisapa.

(Mr 9.38-40)

49 Chaymanta disipulon Juan willarkan:

—Maestru, suk runata kawashkanisapa shutikita rimashpa runakunamanta supaykunata llukshichiptin. Ñukaykuna payta michashkanisapa mana ñukanchikunawan tantalla puriptin.

50 Chaypina Jesuska willarkansapa:

—Ama michaychichu. Suk runa ñukata kreyiwashpa supaykunata llukshichishpaka yanapawaykanchisapami. Mana nima chikniwanchisapachu.

Jesus mana munarkanchu samaritano runakunata kastigaya.

51 Chaypina tipilla illaptin Jesus sieluman kutinanpa mana nima manchakushpa kallarirkan Jerusalen llaktaman riyta. **52** Samaria partipi chayashpankuna Jesuska ishkay runakunata kacharkansapa suk llakktilupi wasita maskanankunapa chaypi puñunankunapa. **53** Chay ishkay runakuna chay llaktapi chayaptinkuna mana ni pi Jesusta wasinkunapi samachinayarkansapachu. Samaritanokuna yacharkansapa Jesus riyananta Jerusalen llaktaman. Chayrayku mana munarkansapachu chaypi puñunana.

54 Chaypina Jakobowan Juan Jesustaka willarkansapa:

—Maestru ¿munankichu sielumanta ninata urmachimunaynikunapa chaywan chay llaktapi kawsakkuna kullunnankunapa?

55 Chashna willaptinkuna Jesuska ishkantinkunata piñayarkansapa:

—Ama chay runakunata chiknishpa munaychichu rupachiyta. ⁵⁶ Ņuka sielumanta shamushkani runakunata kastigumanta salvanaynipasapa. Mana shamushkanichu ni pita wañuchinayni.

Chashna Jesus michaptinkuna rirkansapa chikan llaktapi puñuk.

*Jesus yachachikurkan imashnami suk runa payta katinka nishpa.
(Mt 8.19-22)*

⁵⁷ Jerusalemanriyaktinna suk runa Jesustaka willarkan:

—Señor, maytapish riptyiki chaytami katishkayki.

⁵⁸ Chaypina Jesuska willarkan:

—Atukkunapa wasinkuna tiyan machaykunapi. Chaymanta altuta pawak pishkillukunapa wasinkuna tiyan. Ņuka sielumanta shamudu runa kashpaynipish mana nima wasiyukchu kani chaypi samanaynipa.

⁵⁹ Chaymanta Jesuska suk runata willarkan:

—Ñukata katiway.

Chashna willaptinna chay runaka Jesustaka willarkan:

—Señor, tatayni wañuptin pampashpaynira katishkayki.

⁶⁰ Chaypina Jesuska willarkan:

—Tata Diosta mana kreyinayak runakunaka paykunapurana pampanakuchunsapa. Kanka rillary tukuy runakunata yachachik Tata Dios allimata kamachikunanta.

⁶¹ Chaymanta chikan runa Jesusta willarkan:

—Señor, ñukapish sukaman kanta katinayayki. Manarapish kanwan rishpayni rinayani tukuy familyaynikunata willak kanwan rinaynita.

⁶² Chaypina Jesuska aynirkan:

—Suk runa chakranta rurashpa araduwan allpata aspin. Payka araduwan aspiyakashpa washanta chapashpa mana kuskatachu aspin. Kanpish mana kunanlla katiwanayashpaykika washanta chapashpa araduta aysak runashinami kanki. Chashna washaykita chapashpayki mana atipankichu Tata Diospa mandunpi kawsayta.

10

Jesus kanchis chunka runakunata kacharkanyachachikunankunapa.

¹ Chaymanta yachachikushkanwasha Jesuska yuyarkan aypa llaktakunaman riyyta. Manarapish rishpa kanchis chunka runakunata kacharkansapa ñawpaykanankunapa. Ishkaymanta ishkaymanta kacharkansapa rinankunapa yachachikuk. ² Chay runakuna yachachikuk rinankunapa Jesuska willarkansapa:

—Suk runa chakranti tarpudu murukuna allita pukuptin aypa peonku-nawan pallachinsapa. Kankuna chay llaktakunapi yachachikuk riptyikichi aypa runakuna Tata Diosta kreyinayansapa. Paykunaka iden chakrapi pukudu wayukunashinami. Tata Diosta kreyinayak runakuna aypa tiyaptinipish mana tiyanchu yachachikuk runakuna. Chayrayku Tata Diosta rogyaychi kachananpa ashwan aypa runakunata rinankunapa yachachikuk.

³ Kankuna llaktan llaktan puriptikichi runakuna chiknishunkichi. Paykunaka pumakuna ovejata wañuchikshina wañuchishunkichiman. Chayrayku rishpaykichi allita yuyaykuychi ñuka kankunata sukaman yanapanaynita.

⁴ Ama nima pikshata nima kullkita nima ushutaykichita apaychichu. Chaymanta ñanpi suk runata tinkushpaykichi ama unayaychichu parlachishpa.

⁵ Suk wasipi yaykushpaykichi chay wasiyukta rimachishpa willaychi: “Kanta tukuy wasikipi kawsakmasikunatapish Tata Diosmi kushichishunkichi.” ⁶ Chashna Tata Dios kushichinanpa willaptikichi ichara chay

wasiyuk runaka munanman Tata Dios kushichinanpa. Paykuna munaptinkuna Tata Dioska kushichinkasapa. Mana munaptinkunaka mana kushichinkasapachu. ⁷ Allita chaskishuptinkuna chay wasillapi kipariyichi. Ama rillaychichu chikan chikan wasikunapi yaykuk. Chay kiparinaykichi wasipi tukuy karashunankunata mikuychi upyaychi. Paykuna chaywan yachachikushkaykichipa pagarashuykankichi. ⁸ Suk llaktapi chayaptikichi chay runakuna munashushpa karashunkichi. Imatapish kaptin karashuptinkuna mikuychilla. ⁹ Chay chayashkaykichipi unkudu runakunata tarishpaykichi alliyachiichi. Tukuy paykunata willaychi: "Tata Diosmi sukaman munan mandunpi kawsanaykichipa."

¹⁰ Chaymanta chikan llaktapi chayaptikichi ichará chaypi kawsak runakuna mana chaskishunayankichimanchu. Chaymanta llukshishpa willaychi: ¹¹ "Kankuna mana chaskiwaptikichika ūukaykuna chakinikuna susyanta tapsishpa llukshinisapa. Kankunapi kiparin uchaykichi. Mana chaskiwashpaykichipish allita yachaychi: Tata Diosmi sukaman munan mandunpi kawsanaykichipa."

¹² Allita uyariwaychi. Mana chaskishuptikichika Tata Dioska sukaman kastigankasapa. Ñawpa Sodoma llaktapi kawsak runakunamanta Tata Dioska paykunata ashwan sinchita kastigankasapa.

*Jesus chay mana kreyikunayak runakunata llakichirkan.
(Mt 11.20-24)*

¹³ Jesuska yachachikuyllapi katirkana:

—¡Alaw! Chay ishkay llaktakuna Korasinpi Betsaidapi kawsakkunata llakichini. Chay ishkay llaktakunapi aypa almirana ruranata rurashkani. Chaykunata kawashpankunapish uchankunata mana nima wanayanaysapachu. Chayrayku Tata Dioska paykunata sukaman kastigankasapa. Tiro Sidon llaktakunapi ūuka almirana ruranakunata rurashka kaptinika chaypi kawsak runakuna uchankunamanta wanamanmansapa karkan Tata Diosta kreyinankunapa. Llakina llachapata churakunmansapa karkan uchpapi tiyarishepa llakinankunapa.

¹⁴ Chayrayku kastigakunan diya Tiropi Sidonpi kawsakkunamanta Tata Dioska ashwanta kastigankasapa Korasinpi Betsaidapi kawsak runakunata.

¹⁵ Chaymanta Kapernaum llaktapi kawsak runakuna yuyansapa sieluman riya Tata Dioswan kawsak. Chashna yuyashpankunapish Tata Dios manami sielumanka pushankasapachu. Manllayba tuta likidu uchkuman kachankasapa mana ūukata kreyiwashkankunaryku.

¹⁶ Chaymanta Jesuska chay kachaykanan runakunata kashkan willarkansapa:

—Yachachikuk riptikichi kankunata uyarishushpaykichika ūukatami uyariwaykansapa. Kankunata chiknishushpaykichika ūukatami chikniwaykansapa. ūukata chikniwashpankunaka kachamuwak Tatayni Diostapish chikninsapa.

Jesus chay kanchis chunka runakunata yachachishpa kacharkansapa.

*Chay kanchis chunka runakuna yachachikushkankunawasha
kutirkansapa.*

¹⁷ Jesus chay kanchis chunka runakunata kachaptin aypa llaktakunapi yachachikupi purirkansapa. Chaypina kushikupuru kutishpankuna Jesuska willarkansapa:

—Maestru, kanpa shutikipi willaptinikuna supaykunapish kasuwashpankuna runakunamanta llukshishkasapa.

¹⁸ Chashna chay runakuna willaptinkuna Jesuska willarkansapa:

—Ariya shutinipi tukuy layata atipankichi rurayta. Ņuka kawashkani sielumanta supaykunapa ashwan sinchi kamachikukninta llipyakshina urmamuptin. ¹⁹ Chay supaykuna machakuyskina alakrashina wakllichishunayankichi. Ņuka kankunata sukaman yanapashkaykichi tukuy laya supaykunata karkunaykicipa. Karkuptikichipish mana nimanachishunkichichu. ²⁰ Kankuna sukaman kushikushkankichi supaykunata runakunamanta llukshchishpaykichi. Ņuka willaykichi ashwanta kushikuychi shutikichi sielupi killkaduna kaptin.

Jesus kushikurkan.

(Mt 11.25-27; 13.16-17)

²¹ Chashna chay runakunata willaptin Tata Diospa Espiritun Jesusta suka man kushichirkan. Chaypina Tatan Diosta willarkan:

—Tatayni, sielupi allppapi allima kamachikukmi kanki. Kanka tukuy mana kreyinakuk runakunallata allita yachachinki. Chaymanta kikinkunallamanta yachak runakunata mana nimata yachachishkankichu. Chayrayku Tatayni, alabayki. Ariya, Tatayni kushikushpa chashna munashkanki rurayta.

²² Tatan Dioswan parlashkanwasha Jesuska disipulunkunata willarkansapa:

—Tataynika willawarkan ūukalla tukuy layata kamachikunaynipa. Paylами ūukata allita riksiwan. Kankunaka manami allitachu riksiwankichi. Tata Diospa wambran kashpayni ūukallami payta allita riksini. Ņuka munashkayni runakunata riksichtiptini Tataynita riksinsapa.

²³⁻²⁴ Chaymanta Jesuska disipulunkunallata pakallalla willarkansapa:

—Allita willaykichi. Ņawpa tiempupi yachachikuk runakuna aypa kamachikuk runakunapish sukaman shuyawashpa ruranaynita kawanayarkansapa yachachikunaynita uyarinayarkansapa. Tukuy paykuna mana kawawashpara mana uyariwashpara wañurkansapa. Kankuna ruranaynita kawashpaykichi yachachikunaynita uyarishpaykichi sukaman kushikunkichi.

Alli yanapakuk samaritano runapa ejemplunta Jesuska yachachikurkan.

²⁵ Chaymanta suk diya suk runa rirkana Jesusta parlaçik. Chay runaka Moisespa killkashkankunata yachachikuk. Payka yachanayarkan Jesus allitachu manachu yachachikuykan nishpa. Chaypina Jesusta ladunchashpa tapurkan:

—Maestru ɿimatati ruranayni tiyan Tata Dioswan mana tukuuniyukta sielupi kawsak rinaynipa?

²⁶ Chashna chay runa tapuptinna Jesuska willarkan:

—ɿLeyishkankichu chay ūawpa killkadukunata? ɿImata ruranaykipati willashunki?

²⁷ Chaypina chay runaka willarkan:

—Moisespa killkashkan riman: “Kamachikuk Tata Diosnikita tukuy shunku kuyanayki tiyan. Tukuy layata allita rurashpa sukaman munashpa allimata yuyashpa Tata Diosta kuyanayki tiyan. Chaymanta kikiki kuyanakukshina tukuy runamasikunata kuyanayki tiyan.”

²⁸ Chaypina Jesuska willarkan:

—Allitami ayniwashkanki. Tukuy willawaykanaykita rurashpaykika rinkimi mana tukuuniyukta Tata Dioswan sielupi kawsak.

²⁹ Chaypina chay runaka runamasinta mana kuyayashpa kuyakukshina tukushpana Jesustaka tapurkan:

—Maykan runatati kuyasha?

³⁰ Chashna chay runa tapuptinna Jesuska yachachishpa suk ejempluta willarkan:

—Jerusalen llaktamanta Jeriko llaktaman suk runa rirkan. Ñanpi riyakinti suwakuna tinkurkansapa. Paykunaka tukuy laya tiyapunanta llachapankunatapish kichurkansapa. Wañunayanankaman sukaman makashpa sakirkansapa. ³¹ Ñanpi chay makadu runa wañunayakinti suk saserdote chay ñanta riyakinti tarirkan. Payka ladewayashpa mana nima yanapanayashpa sakirkan. ³² Chaymanta saserdotepa yanapaknin runa chay makadu runataka tarirkan. Paypish mana yanapanayashpa sakirkan.

³³ Chaymanta Samariamanta runa chay ñanta riyakinti chay makadu runataka tarishpa llakichirkan. ³⁴ Payna sukaman llakichishpa llikipushkankunata tipi wirawan tipi vinuwan ampirukan. Chaymanta llachapawan llikipushkankunata wankupurkan. Ampishkanwasha burrunpa sawanpi churashpa llaktakaman pusharkan. Suk wasipi churak rirkan chaypi kuydanankunapa. ³⁵ Chaymanta kayantin pakariptin chay Samariamanta runa wasi doyñuna kullkiti pagararkan. Paytaka willarkan: “Kay unkudu runata allita kuydanki. Kay kushkayni kullki pishiptinka kannami paktachinki. Kutimushpayninami kutichishkayki.”

³⁶ Chay ejempluta yachachishpa Jesuska chay yachachikuk runataka tapurkan:

—Chay kimsa runakunamanta ¿maykantí makadu runapa kuyak runa karkan?

³⁷ Chaypina chay runaka Jesustaka willarkan:

—Chay llakichishpa yanapak runa makadu runata kuyarkan.

Chaypina Jesuska willarkan:

—Kanpish iden chay yanapakuk runashina tukuy runamasikunata yanapashpa kawsay.

Jesus Mariyapa Martapa wasinpi yaykushpa yachachikurkan.

³⁸ Jesuska yachachikuyllapi disipulunkunawan tantalla purirkansapa. Suk diya chayarkansapa suk llaktapi. Chaypi suk warmi Marta Jesustaka kushikushpa wasinpi chaskirkan. ³⁹ Martapa tiyarkan suk ñañan Mariya. Mariyaka Jesusupa chakin kuskapi tiyarrirkan yachachikunanta uyarinanpa. ⁴⁰ Chaykamanka Martaka aypa mikunata yanushpa sukaman turbakuykarkan. Chaypina Jesusta willarkan:

—Maestru ¿ariya ñukataca manachu llakichiwanki? Kay ñañaynica sakiwashka sapallayni yanukunaynipa. Willay yanapawak shamananpa.

⁴¹ Chashna willaptinna Jesuska Martataka willarkan:

—Alaw Marta, rikchak layata rurashpayki sukaman turbakunki.

⁴² Trabajanaykimanta ashwan alli kanman Tata Diospa rimananta yachakunaykipa. Mariyaka ñami allitana yachakuykan. Mana munanichu yachakuykananta michanaykipa.

11

Jesus tukuy disipulunkunata yachachirkansapa imashnami Tata Dioswan parlankasapa nishpa.

(Mt 6.9-15; 7.7-11)

¹ Chaymanta suk diya suk chunllapi Jesuska Tata Diosta oraykarkan. Orayta tukuchashkanwasha suk disipulun ladunchashpa willarkan:

—Maestru, Juan Bawtista tukuy disipulunkunata yachachirkansapa oraya. Kanpish payshina yachachiwaysapa.

² Chashna disipulunkuna yachakunayaptinkuna Jesuska willarkansapa:

—Kankunaka Tata Diosta orashpaykichi kashna willaychi:
 “A Tata Dios, kanmi kanki Tataynikuna.
 Munanisapa tukuy runakuna rimanankunapa sukanan alli rurak
 kanaykita.

Munanisapa tukuy runakuna kanta kasushushpa kawsanankunapa.

³ Tukuy diya mikunaynikunata kuwaysapa.

⁴ Runamasinikuna mana allita rurawaptinkuna ūukaykuna perdonanisapa.
 Chashnashina kanpish uchaynikunamanta perdonawaysapa.

Yanapawaysapa ama supay munachiwanankunapa mana allita rurayta.”

⁵ Jesus ashwanta entiendichinayashpangkuna suk ejempluta
 willarkansapa:

—Ichara suk amiguykichi chawpi tutapi wasikichiman rinman.
 Kayashushpaykichi willashunkichiman: “Amigu, suk tipi mikunaykita
 kuway. ⁶ Wasinipi suk amiguyni yarkaymanta chayamushka. Manami
 nima laya mikuna tiyawanchu karanaynipa.”

⁷ Chashna amiguykichi mañashuptikichi wasikichi ukumanta manami
 willamunkichimanchu: “Ama shamuychu rikchachiwak. Wasini punkunka
 ñami alli wickkaduna. Tukuy wambraynikunawan ñami samaykanisapania.
 Kashna ora mananami atipaninachu nimata kuynikita.”

⁸ Allita willaykichi. Amiguykichi sukanan mañashuptikichika atarinay-
 kichi tiyan mañashushkanta kuk. Mana munashpaykichipish atarissha
 kunaykichi tiyan sukanan mañashuptikichi. ⁹ Mash allita uyariwaychi.
 Kankuna sukanimata munashpaykichi Tata Diosta mañaychi. Mañashkaykichita
 Tata Dioska kushunkichi. Maskashkaykichita tarinkichi. Punkuta takap-
 tikichi kicharinka. ¹⁰ Tata Diosta mañak runaka chaskinkami. Tata Diosta
 maskak runaka tarinkami. Tata Dios punkunta takak runapa kicharinkami.

¹¹ Kankunapa wambraykichi challwata mañashuptikichi ¿kunkichimanchu
 machakuyta? ¹² Runtuta mañashuptikichi ¿kunkichimanchu alakrata?

¹³ Kankuna mana alli rurak kashpaykichipish wambraykichita allikunata
 kunkichi. Tata Dioska kankunamanta ashwan alli rurakmi. Chayrayku
 roygaptikichi Espiritunta kushunkichi.

*Runakuna rimarkansapa supaykunapa mandakuknin yanapaptin Jesus
 atipananta supaykunata llukshichiyta.*

(Mt 12.22-30; Mr 3.20-27)

¹⁴ Suk diya sukananata Jesuska supayta llukshichirkana. Supay un-
 kuchiptin chay runaka mudu karkan. Jesus supayta llukshichiptinna chay
 runaka atiparkan rimakuyta. Rimakuptin kawak runakuna sukanan almi-
 rarkansapa. ¹⁵ Chaypina sukananata Jesuspa rimarkansapa:

—Supaykunapa kamachikuknin Belsebu kay runata yanapaptin supayku-
 nata llukshichin.

¹⁶ Suk runakuna Jesusta pantachichinayashpangkuna willarkansapa:

—Kunanlla sukananata ruranata ruray chayta kawashpa yachanayniku-
 napa Tata Dios yanapashunkichu manachu nishpa.

¹⁷ Chaypina Jesuska yuyayninkunata yachashpa willarkansapa:

—Suk llaktapi kawsak runakuna chikninakushpa makanakushpangkuna
 kikinkunapura kulluchinakunsapa. Sukanan makanakushpangkuna
 wasinkunatapish urmachinsapa. ¹⁸ Kankunaka rimaykankichi supayku-
 napa kamachikuknin Belsebu yanapawananta. Chayta rimashpaykichi
 mana kuskatachu rimaykankichi. Supaykunapa kamachikuknin
 yanapawashpaka kikinpa supayninkunallawan makanakuykanmansapa.
 Kikinkunapura makanakushpa kulluchinakunmansapa.

19 Belsebu yanapawaptinka ¿pití disipuluykikunata yanapan supaykunata llukshichinankunapa? Allita yachanchi Tata Dios paykunata yanapananta. Chayrayku ñukata yuyawashpaykichi llullachinakuykankichi. **20** Tata Dios yanapawaptin supaykunata atipani llukshichiya. Chayrayku yachanaykichi tiyan Tata Dios kachamuwashkanta kankuna paypa mandunpi kawsanaykichipa.

21 Chaymanta Jesus suk ejempluta willashpa entiendichirkansapa supaya kallpachik kananta;

—Suk sinchi runa wasinta kuydashpa tukuy laya tiyapunanta allita wakaychan. Alli armadu kashpa rikchak layanta amachan. **22** Allita kuydashpa wakaychaptinpish paymanta ashwan sinchi runa shamushpa armankunata kichushpa kallpachin. Chay wasiyuk runaka yuyarkan armankunawan makanakushpa kuydanakuyta. Chashna yuyaptinpish chay ashwan sinchi runa armankunata kichushpa tiyapunankunata kichun apananpa.

23 Kankuna mana kreyiwashpaykichika chikniwankichi. Mana yanapawashpaykichika sukkunata ñukamanta ashuchiykankichi.

*Jesus supayadu runapa ejemplunta yachachikurkan.
(Mt 12.43-45)*

Jesus yachachikuylapi katirkan:

24 —Chaymanta suk runamanta supay llukshishpa chakidu chunlla all-papi purin samanayashpa. Mana ni maypi samananta tarishpa riman: “Shu, kutishalla chay llukshimushkayni runallaman.” **25** Chay runaman kutishpa tarin iden suk wasi chuya chuya pichadutashina. **26** Chaypina kanchis ashwan mana alli rurak supaymasinkunata rin kayak. Tukuy paykuna rinsapa chay runapi yaykuk. Chashna modomanta chay runaka ñawpa kawsashkanmanta ashwan mana allikunata rurashpana kawsan.

27 Chashna Jesus yachachikuylapi suk warmi chay runakunapa chawpinmanta sinchita rimashpa payta willarkan:

—Mamayki kushikushpa kawsan wawayashushkanrayku wiwashushkanrayku.

28 Chashna chay warmi willaptinna Jesuska willarkan:

—Mamaynimanta ashwan allita kushikunsapa Tata Diospa rimananta uyarishpa kasukuk runakuna.

*Chay runakuna Jesusta roygarkansapa almirana ruranata rurananpa.
(Mt 12.38-42; Mr 8.12)*

29 Jesus yachachikuylapi ashwan aypa runakuna tantanakurkansapa uyari. Tukuy paykunata Jesuska yachachishpankuna willarkansapa:

—Kankunaka mana alli rurak kashpaykichi sukaman roygawankichi almirana ruranakunata ruranaynipa. Roygawaptikichipish mana nimata kankunapa rurashachu. Ñuka mana niman suk almirana ruranata ru-raptinpish Tata Diospa ruranka iden ñawpa alli yachachikuk Jonaspa tiempunipishina. **30** Jonaska kimsa diyata suk atun challwa wiksanpi kawsarkan. Chaymanta kimsa diyapina kocha mañanpi chay challwaka paytaka kipnarkan. Chaypina Jonas Ninive llaktapi yachachikuptin chay mana alli rurak runakuna kreyirkansapa Tata Dios kachamuwashkanta. Kimsa diya ukun challwa wiksanmanta Jonas llukshimushkanshina ñukapish wañuymanta kimsa diya ukun kawsamusha. Chaypina yachankichi Tata Dios ñukata kachamuwashkanta. **31-32** Jonaska Ninive llaktapi kawsak runakunata willarkansapa Tata Dios kastiganankunata. Chayta uyarishpankuna paykuna Tata Diosta kreyishpa mana alli ruranankunamanta wanarkansapa. Tata Dios kastigakunan diya chay runakuna sukmanta

chatashunkichi mana ñukata kreyiwashkaykichirayku. Ñuka Jonasmanta ashwan alli yachachikukmi kani.

Chaymanta ñawpa tiempu suk karu llaktamanta suk kamachikuk warmi shamurkan yachaysapa Salomonta uyarik. Ñuka Salomonmanta ashwan alli yachaysapa kani. Chayrayku Tata Dios kastigakunan diya chay alli kamachikuk wärmika kankunata chatashunkichi mana kreyiwashkaykichirayku.

Jesus yachachikurkan Tata Diosta kreyishpa luspishina kawsanankunapa.
(Mt 5.15; 6.22-23)

³³ Jesuska yachachikuyllapi katirkan:

—Alkusata apichishpanchi altipi churanchi tukuy wasipi yaykuk runakuna allita kawakunankunapa. Mana ni pi alkusata apichinchu uchku ukupi pakananpa. Nima apichinchu suk kajon ukunpi churanañpa.

³⁴ Kankunapa ñawikichi kuerpuykichipa lusnинми. Yuyaynikichika shunkuykichipa lusnинми. Allikunata yuyashpaykichika allita rurashpa kawsankichi. Allita rurashpa kawsashpaykichika luspishina kawsankichi. Mana allikunata yuyashpaykichi mana allita rurashpa tutapishina kawsankichi. ³⁵ Kuydanakuychi ama tutayadupi kawsanaykichipa.

³⁶ Kankunaka allita yuyashpa allita rurashpa kawsashpaykichi lusyukna kankichi. Manana nima tutayadupishinanachu kawsankichi.

Jesus piñayarkan fariseo runakunata.
(Mt 23.1-36; Mr 12.38-40; Lk 20.45-47)

³⁷ Chaymanta Jesus yachachikushkanwasha suk fariseo runa willarkan wasinpi mikuk rinanpa. Jesus almitishpa chay runapa wasinpi yaykushpa rirkhan mesapi mikuk. ³⁸ Payka mikukpacha rirkhan mana makinta maylashpa. Chay fariseo runaka Jesusta yuyarkan mana makinta mayllashpa mikuptin.

³⁹ Chaypina Jesuska payta willarkan:

—Kankuna fariseokuna Tata Diostiphi chuya chuya rikurinaykichipa mayllanakunkichi. Chaykamanka mana allita yuyaykushpa kawsankichi. Sukkunapa tiyapunanta munashpa suwankichi. Iden suk kallana suk vasu washanlla mayladushina kankichi. ⁴⁰ Sawallamanta mayllanakushpaykichi sukmaman llullachinakuykankichi. ¿Manachu yachankichi Tata Dios tukuy tiyakta rurashpa yuyaynikichitapish rurashkanta? ⁴¹ Kankunaka runamasikichita tukuy shunku kuyashpa yanapashpa kawsaychi. Chaypira iden chay kallana ukun chuya chuya maylladushina kankichi.

⁴² Ñukaka kankuna fariseokunata llakichiykichi Tata Dios kastigashunaykichita yuyashpa. Kankunaka tukuy chakraykichipi wiñakkunata chunkamanta suktu Tata Diosta kunkichi. Chayta kushpaykichipish runamasikichita chiknishpaykichi mana allita ruraykankichi. Mana Tata Diosta kuyashpa kawsankichi. Tata Diostiphi munan tiyapushunaykichimanta ashwan alli kakta kunaykichipa. Chay kushkaykichimanta ashwanta munan runamasikichita yanapashpa kawsanaykichipa. Munan paytapish kuyashpa kawsanaykichipa.

⁴³ Ñukaka kankuna fariseokunata sukmaman llakichiykichi Tata Dios kastigashunaykichita yuyashpa. Tantanakunankuna wasipi ashwan alli tiyarinapi tiyarinayankichi. Chaymanta kallipi purishpaykichi munankichi tukuy runakuna manchashushpa rimachishunaykichipa.

⁴⁴ Llakichiykichi Tata Dios kastigashunaykichita yuyashpa. Kankunaka mana alli rurak kashpaykichi wañudu pampapanapa uchkuñinami kankichi.

Runakuna mana yachashpa chay uchkupi wañudukuna pampadu kanankunata sawanta purinsapa. Chashnashina runakuna mana riksishushpaykichi kreyinsapa alli yachachikuk kanaykichita.

45 Chashna Jesus fariseokunata willaptin Moisespa killkadunta yachachikuk runakuna willarkansapa:

—Maestru, fariseo runakunata piñayashpaykika ñukaykunatapish sientichi-waykakisapami.

46 Chashna willaptinkuna Jesuska willarkansapa:

—Moisespa killkadunta yachachikuk runakuna, kankunata llakichiykichi Tata Dios kastigashunaykichita yuyashpa. Kankunaka tukuy runakunata willankichi mana atipanankuna layata ruranankunapa. Iden llashakpuru kargata aparichikukshina kankichi. Rikchak layata ruranankunapa willashpaykichi mana niman suk tipita yanapanayankichichu nima kikichiki runankichichu.

47-48 Kankunata llakichiykichi Tata Dios kastigashunaykichita yuyashpa. Kankunapa ñawpa awiluykichi wañuchirkansapa Tata Diospa rimananta yachachikuk runakunata. Chaymanta kankunaka chay ñawpa yachachikkunata yuyashpa pampadukuna sawanpi suk tumbata rurankichi. Chayta rurashpaykichi entiendichikuykankichi yuyanaykichita chay ñawpa awiluykichiwa rurashkan alli kashkanta.

49-51 Kallarinanmantapacha ñawpa awiluykichi wañuchirkansapa alli yachachikuk runakunata. Primeruka Abelta wawkin wañuchirkan. Chaymanta wañuchikuylapi katirkansapa Sakariyasta wañuchinankuna tiempukan. Sakariyasta wañuchirkansapa Tata Diosta kuyanan wasi punku ladunpi altar sikipi.

Chaymanta kankuna iden ñawpa awiluykichishina Tata Diospa rimananta yachachikkunata chikninkichi. Tata Dioska yachaysapa kashpa kankunapa rimarkan: “Ñuka kankunaman alli yachachikuk runakunata kachasha. Paykunata kachaptini sukkunata wañuchinkichi. Sukkunata chiknishpa padescinchinkichi.” Chayta rimarkan Tata Dioska. Kunan allita willaykichi: Tata Dios kankunata willashunkichi uchayuk kanaykichita tukuy chay runakuna wañuchidu kashkankunarayku.

52 Moisespa killkadunta yachachikuk runakuna, kankunata llakichiykichi. Kankunaka yachachikuk runakuna kashpaykichiipish Tata Diospa rimananta mana allitachu yachachikunkichi nima entiendinayankichichu. Chaymanta runakuna entiendinayaptinkuna michankichi.

53 Chashna Jesus willaptinna fariseo runakunaka Moisespa killkadunta yachachikuk runakunapish sukaman piñakurkansapa. Paykunaka piñakushpankuna amichishpa tapuyllapi katirkansapa. **54** Jesusta rimananllawan sukaman pantachichinayarkansapa awtoridarkunapi chatanankunapa.

12

Jesus disipulunkunata yachachirkansapa ama llullachinakushpa kawsanankunapa.

1 Jesus yachachikuykaptin waranka waranka runakuna tanta-nakurkansapa uyarik. Sukaman aypa kashpankuna nitinakurkansapa. Chaypina paykuna uyariykaptinkuna Jesuska disipulunkunata yachachishpa willarkansapa:

—Fariseo runakuna rimansapa Tata Diosta allita uyariyakanankunata. Chashna rimashpankunapish mana allita rurashpa kawsaykansapa. Kankunaka ama paykunashina kawsaychichu. **2** Tukuy runakuna

imatapish pakallalla ruraptinkuna Tata Dioska yachan. Chayta tukuy runakunata riksichinkasapa.³ Kankuna suk imata pakallalla rimaptikichi Tata Dioska uyarin. Chaytapish tukuy runakunata yachachinkasapa. Wasikichi ukupi suk imata pakallalla rimaptikichi chikan runakuna sinchita rimashpa tukuyta willankasapa.

⁴ Ñukapa kuyanakukmasinikuna kaptikichi sukaman allita yachachishkaykichi. Runakuna wañuchishunayaptikichi ama manchakuychichu. Paykuna wañuchishushpaykicchipish mana ashwanta nimanachishunkichichu.

⁵ Willaykichi pitami manchanaykichi tiyan nishpa. Tata Dioska atipan wañudukunata mana tukuuniyuk ninapi churayta. Chayrayku Tata Diosllata manchanaykichi tiyan ama chaypi kastigashunaykicchipa.

⁶ Chaymanta yachachiykichi Tata Dios sukaman kuyashunaykichita. Pichka pishkillukunata rantinchi ishkay kullkillawan. Pishkillukuna mana aypa chaniyuk kaptinpish Tata Dioska mana ni sukta kunkanchu. ⁷ Paymi aypa pishkillukunamanta kankunata ashwanta kuyashunkichi. Chaymanta yachan kankunapa chukchaykichi mashnami tiyan nishpa. Tata Dios suka-man kuyashuptikichi payllatana manchaychi. Ama runakunata manchay-chichu.

Jesus disipulunkunata willarkansapa Tata Diospa Espiritu yanapanankunata.

(Mt 10.32-33; 12.32; 10.19-20)

⁸ Jesuska yachachikupi katirkan:

—Allita uyariwaychi. Kankuna runamasikichita willaptikichi kreyiwak kanaykichita ñukapish Tata Diospa angelinkunata willasha ñukapa kanay-kichita. ⁹ Runamasikichita willaptikichi mana riksiwanaykichita ñukapish Tata Diospa angelinkunata willasha mana kankunata riksinaynita.

¹⁰ Ñukaka sielumanta runami kani. Chashna kaptinipish suk runa ñukata washanchawashpa mana alli kanaynita rimaptinpish Tata Dioska payta perdonanka. Chaymanta paypa Espiritunta washanchashpa chiknispah sakra mana alli kananta rimaptin Tata Dioska mana kutin perdonankachu.

¹¹ Ichará chiknishuknikichi tantanakunankuna wasiman pushashunkichiman awtoridarpí chatashunaykicchipa. Chayman pushashuptikichi ama manchakuychichu. Ama yuyaychichu imatami awtoridarkunata willasha nishpa. ¹² Awtoridarkunapi kaptikichi Tata Diospa Espiritu yachachishunkichi imatami rimankichi nishpa.

Jesuska yachachikurkan aypa kullkiyuk runapa ejemplunta.

¹³ Chaymanta aypa runakunapa chawpinkunamanta suk runa Jesusta willarkan:

—Maestru, wawkinita willapay tataynipa tiyapunanta patumawanana.

¹⁴ Chashna chay runa willaptinna Jesuska willarkan:

—Amigu, manami shamushkanichu tiyapushuknikichita patumaknickichi.

¹⁵ Chaymanta Jesuska chay runakunata willarkansapa:

—Ama sukaman munaychichu rikchak layayuk kayta. Tata Diosllami kawsayta kushunkichi. Chayrayku mana nimananchu tukuy layayuk mana nimayuk kanaykicchipa.

¹⁶ Jesuska yachachikushpalla suk ejempluta parlachikurkan:

—Tiyarkan suk runa tukuy layayuk. Chay runapa chakrankunapi tukuy laya tarpubukuna aypata wayuchakurkan. ¹⁷ Chaypina chay runaka yuyaynippi rimarkan: “!Imatáí rurasha? Muru wakaychana wasinikunapi

tukuy pallashkaynikuna manana paktannachu.” ¹⁸ Chayta yuyaykushpa kikinlla willanakurkan: “Ñami yuyashkanina imatami rurasha nishpa. Shu urmachisha murukunata wakaychanayni taksha wasinikunata. Chaylapi ashwan atun wasikunata rurachisha. Chaypi chay aypa muru pallashkaynita allita wakaychasha. ¹⁹ Chayta rurashpana sukaman aypa watakunata kushikusha rikchak laya wakaychadu tiyawaptin. Manana trabajashpa sukaman kushikushpa mikusha upyasha.” ²⁰ Chashna chay runa kikinlla willanakuptin Tata Dioska willarkan: “Kanka sukaman mana alli yuyayukmi kanki. Kunan tutami wañunki. Wañuptiki ¿ipatí kiparinka tukuy kay aypa tiyashuk murukunaka?”

²¹ Chay ejempluta yachachikushkanwasha Jesuska willarkansapa:

—Chay runaka kikinllapa tukuya tantanachishpa Tata Diospa ñawpakninpí mana nimayukchu rikurin. Tata Dioska tukuy chay laya runakunata kastigankasapa.

Jesus disipulunkunata yachachirkansapa Tata Dios wambrankunata rikchak layata kunankunata.

(Mt 6.25-34)

²² Jesus chay aypa runakunata yachachishkanwasha disipulunkunallata willarkan:

—Allita uyariwaychi. Ama turbachinakushpa yuyaychichu imatami mikusha imatami llachapakusha nishpa. ²³ Mana llachapaykichillatachu mikunaykichillatachu yuyashpa ashwan alli kanman Tata Diosta kasushpa kawsanaykichipa.

²⁴ Mash yuyaykuchi imashnami pishkillukuna kawsansapa nishpa. Paykunaka mana nima murukunata tarpuñsapachu. Paykunapa mana nima muru wakaychana wasinkuna tiyapunsapachu. Mana nima murukunata tarpuñtinkunapish Tata Dioska aypa mikunankunata kunsapa. Kankunata Tata Dioska pishkillukunamanta ashwan allita kuyashunkichi. Chashna kuyashushpaykichi kawsanaykichipa rikchak layata kushunkichi.

²⁵ Kankunaka wiñadu kashkaykichimanta sukaman turbachinakushpa ¿atipankichimanchu ashwanta wiñaytaka? ²⁶ Mana ni chayta atipashpaykichika ¿imapati llachapaykichillapi sukaman yuyankichi?

²⁷ Mash kawaychi chay allima sisakunata. Chaykunaka mana nima trabajansapachu nima puchkakunsapachu. Mana puchkakushpankunapish sukaman allima mudakudushina rikurinsapa. Ñawpa kamachikuk Salomonpa llachapankuna sukaman allima rikurirkan. Paypa llachapan-manta chay sisakuna ashwan allimata rikurinsapa.

²⁸ Tata Dioska kiwakunata wiñachin sisananpa. Chay sisakuna suk diyallapa allima rikurishkanwasha rupachinchisapa. Chayta kawashpa ¿imapati mana kreyikunkichi Tata Dios chay sisakunamanta ashwan allima mudachishunaykichita? ²⁹ Ama turbachinakushpa mikunaykichita upyanaykichita maskashpalla kawsaychichu. ³⁰ Tata Diosta mana kashushpa kawsak runakuna tukuy chaykunallata yuyashpa kawsansapa. Ama paykunashina kawsaychichu. Kankunapaka tiyanmi kuydakuk yanapakuk Tata Diosnikichi. Paymi allita yachan imakunami illashunkichi nishpa. ³¹ Kankunapa alli kuydakuk Tata Diosnikichi tiyaptin ashwanta munaychi paypa mandunpi kawsayta. Paypa munashkankunata rurashpa kawsaptikichika paymi rikchak layata kushunkichi.

³² Kankunaka alli kuyanayni ovejaynikunami kankichi. Mana aypa kashpaykichipish ama nimata manchaychichu. Tata Dios kuyashushpaykichi munan paywan tantalla mana tukuyniyukta kawsanaykichipa. ³³ Tata

Dios kuyashuptikichi kankunapish runamasikichita kuyashpa yanapashpa kawsaychi.

Mana kullkikichi tiyaptinka tiyapushunaykichita rantikushpa mana nimayuk runakunata yanapaychi. Páykunata yanapashpa kawsashpaykichi Tata Diosta kushichiykankichi. Paymi sielipi tukuy layata kushunkichi. Sielipi kawsaptikichi tiyapushunaykichi mana mawkayankachu. Mana nimapish illashunkichinachu. Sielupika suwa runakuna mana yaykunkasapachu. Chaypika polillakuna mana tiyanchu nimata wakllichinankunapa.³⁴ Imatacha tukuy shunku munashpa wakaychankichi chayllata yuyashpa kawsankichi.

Jesus disipulunkunata yachachirkansapa patronnintashina shuyanankunapa.

³⁵⁻³⁶ Chaypina Jesuska disipulunkunata willarkansapa:

—Uyariyichi kay ejempluta: Ñukaka tataykichishinami kani. Kankunaka wiwachuñikunashinami kankichi. Chayrayku suk funsiamañta kutimuktashina shuyawaychi. Allita prontanakushpa iden tutapi alkusaykichita apichikshina shuyawaychi. Úyari uyari shuyawaychi punkuta takaptini utkakushpa kicharinaykichiha. ³⁷ Allita prontanakushpa shuyawashpaykichi chayamuptini sukaman kushikunkichi.

Allita willaykichi. Ñukami mikunaykichita karashkaykichi mesapi mikunaykichiha. ³⁸ Chayamunaynita yachashpaykichi uyari uyari shuyawanaykichi tiyan. Tutapish kaptin pakarinan orapish kaptin chayamusha. Chashna uyari uyari shuyawashpaykichi chayamuptini sukaman kushikunaykichi tiyan.

³⁹ Chaymanta willaykichi. Suk wasiyuk runa yakashpa imay orami suwa shamunka nishpa allita shuyanman ama nimata suwapunarpa.

⁴⁰ Kankunapish allita prontanakushpa shuyawaychi. Ñuka sielumanta shamudu rúna kashpayni mana nima yuyashkaykichi orami chayamusha.

Jesus disipulunkunata yachachirkansapa alli rurak wiwachunkunashina kanankunapa.

(Mt 24.45-51)

⁴¹ Jesus yachachikuptin Pedru tapurkan:

—Maestru ¿chaytaka ñukaykunallatachu yachachiwaykankisapa? ¿Tukuy runakunatachu yachachiykanki?

⁴² Chashna Pedru tapuptinna Jesuska suk ejempluta willarkansapa:

—Mash allita uyariwaychi. Suk patron chikan llaktaman rinanpa wasinpi suk alli rurak yachaysapa wiwachunta willan tukuy wiwachumasinkunata trabajachinankunapa. Chaymanta willan oranpi karanankunapa.

⁴³ Chay wiwachu patronnin willashkunkunata ruranan tiyan. Patronnin kutimushpa tarinka allita ruraykaptin. Chaypi chay wiwachu sukaman kushikunka.

⁴⁴ Allita willaykichi. Chay wiwachu allita rurashpa shuyaptin patronninka willanka tukuy laya tiyapunanta kuydanarpa. ⁴⁵ Ichara chay wiwachun yuyanman patronnin mana utka kutimunanta. Chaypina kallarinman wiwachumasinkunata makashpa sufrichyta. Payllana sukaman mikushpa upyashpa machashpa kawsanman. ⁴⁶ Chashna mana allita ruraykaptin mana yuyashkan oras patronka chayamunman. Chaypina chay mana alli rurak wiwachunta sukaman kastiganka. Tukuy mana alli rurak runakunawan tantallata kastiganka.

47 Ichara suk wiwachu patronnin willashkanta allita yachaykashpa mana nima prontanakunmanchu mana nima kasunmanchu. Willashkanta mana ruraptin patronninka sukaman makanka.

48 Ichara suk wiwachu mana yachanmanchu imatami patronninka willashka nishpa. Chayrayku mana ruranmanchu. Paytaka patronninka mana sukamanmanchu makanka.

Ñukami patronnikichishina kani. Kankunata sukaman allita yachachishkaykichi. Sukkunamanta kankuna ashwan allita yachankichi. Kankunata sukaman yachachishkaynirayku sukkunata yachachinaykichi tiyan.

Jesuska disipulunkunata willarkansapa runakuna paykunata chikninkunata.

(Mt 10.34-36)

49 Jesus yachachikushpa willarkansapa:

—Kay alppaman shamushka kaptini mana kreyiwak runakuna kankuna kreyiwak runakunata ninawan rupachikshina padescichishunaykichi tiyan. Sukaman munayman chay ninawanshina padescichishunaykicipa yachakunaykicipa ama uchallikushpa kawsayta. **50** Ñuka sukaman padescishpa wañunayni tiyan. Tata Dios willawashkanta sukaman munaykani rurayta.

51 Ichará kankuna yuyaykankichi ñuka shamushkaynirayku runakuna mana makanakunkasapanachu nishpa. Mash allita uyariwaychi. Mana alli rurak runakuna tukuy ñukata kreyiwak runakunata chikninkasapa.

52 Kunanmantapacha suk familyapi ishkay laya kawsak runakuna tiyankasapa. Sukkuna ñukata kreyiwankasapa. Sukkuna mana kreyiwankasapachu.

53 Mana kreyiwak runakuna kreyiwakkunata sukaman chikninkasapa. Suk mana kreyiwak tata kreyiwak wambranta chikninka. Mana kreyiwak runa kreyiwak tatanta chikninka. Suk mana kreyiwak mama kreyiwak warmi wawanta chikninka. Mana kreyiwak warmi kreyiwak mamanta chikninka. Suk mana kreyiwak suedranta kreyiwak nueranta chikninka. Mana kreyiwak nuera kreyiwak suedranta chikninka.

54 Chashna disipulunkunata yachachishpana Jesuska tukuy katik runakunata willarkansapa:

—Inti yaykunanpi yana puyukunata kawashpaykichi rimankichi tamyanayananta. Chay rimashkaykichishina deveras tamyan.

55 Chaymanta uraymanta wayra shamuptin rimankichi rupay nanananta. Uraymanta wayraprin chay rimashkaykichishina deveras rupay sinchita nanan. **56** Kankunaka yachak runakuna kashpaykicipish Tata Diospa munananta mana rurankichichu. Tamyananta rupay nanananta yachaykashpaykichi ñimapati mana yachankichi sielumanta shamushkaynita?

57 Ñimapati mana kikikilla yachanki imami alli rurana nishpa? **58** Ichara chiknishuk runa awtoridarkunapi chatashushpa pushachishunkiman. Amarapish awtoridarpi chayashpaykira chatashuk runawan allita parlay allichanaykipa debikushkaykita amana awtoridarpi yaykunaykipa. Mana allichaptiki awtoridarpi chayaptiki paymi guardiyakunata willanka karselpi wichkashunaykipa. **59** Allita uyariway. Tukuy debikushkaykita mana pagarakunaykikamanka manami karselmanta llukshinkichu.

13

Jesus yachachikurkan Tata Dios kastiganankunata tukuy mana alli rurak runakunata.

¹ Jesus yachachikushkanwasha suk runakuna laduncharkansapa. Paykunaka Jesusta willarkansapa kamachikuk Pilato Galileamanta runakunata wañuchichishkanta. Chay runakuna Tata Diosta kuyashppankuna animalkunata wañuchiykarkansapa. Animalkunata wañuchiykaptinkuna Pilatoka chay runakunata wañuchichirkansapa. Chaypina paykunapa yawarninkuna chay animalkunapa yawarninkunawan chakrunakurkan.

² Chayta willaptinkuna Jesuska willarkansapa:

—Ichará kankunaka yuyaykankichi chay Galileamanta wañuchidu runakuna tukuy runamasinkunamanta ashwan uchasapa kashkankunata. Ichará yuyaykankichi chayrayku paykunata Pilato wañuchichishkankunata.

³ Mash allita uyariwaychi. Chay wañuchidu runakunaka manami ashwan uchasapachu karkansapa. Kankunapish mana uchaykichimanta wanashpaykichika paykunashina wañunaykichi tiyan.

⁴ Chay Siloe torre urmeshpa chunka pusak runakunata nitishpa wañuchirkansapa. Ichará kankunaka yuyankichi chay wañudu runakuna Jerusalenpi kawsakmasinkunamanta ashwan uchasapakuna kashkankunata. ⁵ Mash allita uyariwaychi. Chay wañuk runakunaka manami ashwan uchasapachu karkansapa. Kankunapish mana uchaykichimanta wanashpaykichika paykunashina wañunkichi.

⁶ Chaymanta Jesus suk ejempluta rimashpa yachachikurkan:

—Suk runapa uva chakranpi suk igo kaspi tiyarkan. Chay runa rirkan chay kaspita chapak yachanayashpa wayuyuktachu manachu nishpa. Kawak rishpa mana nima wayuyuktachu tarirkan. ⁷ Chaypina chakranta kuydak runata willarkan: “Ñami kimsa watatana shamuni kay igo kaspita chapak wayunkunata munashpayni. Kunankaman mana nima wayuyuktachu tarimuni. Kunanka waktakuyá ama kay allpapi yankamanta kananpa.”

⁸ Chashna waktakunarpa willaptin chakran kuydak runaka patronnintaka willarkan: “Amara waktakuparachu. Aku suk watatara shuyaypa ichará wayuchakunka. Allpanta aspishtpa ñupuyachisha. Chaymanta animalkunapa ismankunata churasha. ⁹ Ichará chaywan wayuchakunka. Mana ni chaywan wayuchakuptinka willawanki waktakunaynipa.”

Jesus samana diya kumurayadu warmita alliyachirkan.

¹⁰ Samana diya kaykaptin Jesuska yachachikuykarkan tantanakunankuna wasipi. ¹¹ Chaypi tiyarkan suk unkudu warmi. Payka chunka pusak watatana kumurayadu kawsarkan supay unkuchiptin. Mana nima kuskayayta atiparkanchu.

¹² Jesuska payta llakichishpa willarkan:

—Wambrayni, ¡kuskayamuña! ¡Ñami sanuna kanki!

¹³ Chaypina Jesus paypi makinta churashkan oras chay warmika kuskayarkan. Chashna alliyashpana sukaman kushikushpa Tata Diosta alabarkan. ¹⁴ Alliyachishkanta kawashpana chay tantanakunankuna wasipi kamachikuk runa sukaman piñakurkan. Payka piñakurkan Jesus samana diyapi chay warmita alliyachishkanrayku. Chay kamachikuk runaka chay aypa runakunata piñayashtpa willarkansapa:

—¡Sokta diyatami allima trabajanchipaka! Unkudu kashpaykichika shamuychi chay sokta trabajana diya kay runa alliyachishunaykicipa. ¡Ama shamuychihu samana diyapi kay runa alliyachishunaykicipa!

¹⁵ Chashna chay kamachikuk runa piñakuptinna Jesuska willarkan:

—Kankuna llullakushpa rimankichi alli rurak runakuna kanaykichita. ¿Manachu samana diya kaykaptinpish vakaykichita burruykichita paskankichi yakukuk pushanaykichipa? ¹⁶ ¿Manachu Tata Dios burruykichimanta vakaykichimanta kay warmitá ashwanta llakichin? Payka ñawpa awilunchi Abrahampa mirakninmi. ¿Imapati kay samana diya mana alliyachiyman? Chunka pusak watatanami supayka kay warmitaka watashpá kumurayachishpa unkuchishka.

¹⁷ Chashna Jesus rimaptinna chiknik runakunaka sukanam pinkachinakurkansapa. Chaymanta Jesusta kuyak runakunaka sukanam kushikurkansapa kawashpankuna chay almiranakunata ruraptin.

Jesus yachachikurkan taksha murillupa ejempluta.

(Mt 13.31-32; Mr 4.30-32)

¹⁸ Chaymanta Jesuska kashkan yachachirkansapa:

—Suk ejempluta parlachiykichi entiendinaykichipa imashnami Tata Diospa mandunpi kawsankichi nishpa.

¹⁹ Kankuna Tata Diospa mandunpi kawsashpaykichika takshasillu mostasa murillukunashina kankichi. Suk runa chay murilluta chakranpi tarpun. Chaypi chay murillu wiñashpa ramachakun. Ramachakuptin aypa pis̄hkillukuna chaypi wasichakunsapa.

Jesus yachachikurkan levadurapa ejemplunta.

(Mt 13.33)

²⁰ Chaypina Jesuska willarkansapa:

—Kashkan suk ejempluta yachachiykichi entiendinaykichipa imashnami Tata Diospa mandunpi kawsankichi nishpa. ²¹ Suk warmi panta rurashpa aypa machkawan suk tipi levadurata churashpa chakrun. Levadurata churaptin tukuy chapuduta allita pukuchin. Kankuna Tata Diospa mandunpi kawsashpaykichi chay alli levadurashina kankichi.

Jesus yachachikurkan pimi Tata Diospa kawsanapi yaykunka nishpa.

(Mt 7.13-14, 21-23)

²² Chaymanta yachachikushkanwasha Jesuska Jerusalenman rirkan. Chayman riyakashpa llaktan pi yachachikupi rirkan. ²³ Chaypina suk runa tapurkan:

—Maestru ¿manachu Tata Dioska aypa runakunata kastigunmanta salvashpa sielupi yaykuchinkasapa?

²⁴ Chashna tapuptin Jesuska willarkan:

—Tata Diospa kawsanapi yaykunayashpaykichika suk llañu punkutashina yaykunaykichchi tiyan. Modosta ruraychi chaypi yaykunaykichipa. Allita willaykichi. Aypa runakuna chay punkuta yaykunayashpankunapish manami tukuychu atipansapa yaykuya. ²⁵ Ñuka wasi doyñunshina kashpayni punkuta wickaptini kankuna washamanta kayashpa willawan-kichi: “¡Señor, punkuta kichari yaykunaynikunapa!” Chashna willawaptikichi ukumanta willashkaykichi: “Manami riksiykichichu maymantami kankichi.” ²⁶ Chaypina willawankichi: “Kanwan tantalla mikushkanisapa upyashkanisapa. Llaktaynikunapi chayashpayki yachachiwarkakisapa.” ²⁷ Chashna willawaptikichi kashkan willashkaykichi: “¡Manami riksiykichichu! Kankunaka sukanam mana alli rurak runakuna kankichi. ¡Chayrayku ñukamanta ashuychi!”

²⁸ Chashna willaptini kankunaka sukanam llakishpa kiruykichita mukushpa wakanaykichchi tiyan. Chaypina Tata Diospa kawsanapi ñawpa awilunchi Abrahamta Isakta Jakobota kawankichi. Chaymanta tukuy ñawpa yachachikuk runakunata kawankichi. Tukuy paykunata kawashpaykichi

sukaman llakishpa wakakunkichi. ²⁹ Inti llukshimunanmanta inti yakyunannmanta anakmanta uraymanta aypa runakuna Tata Diospa kawsanansi yakyunkasapa. Tukuy paykuna tiyarishpa mesapi mikunkasapa. ³⁰ Suk kankuna yuyankichi primeru Tata Diospa mandunpi yakyuya. Chashna yuyaptikichipish Tata Dioska washata yakyuchishunkichi. Chaymanta chay mana yakyuya yuyanakuk runakunata Tata Dioska primeru yakyuchinka.

Jesus wakakurkan Jerusalenpi kawsak runakuna mana payta munaptinkuna.

(Mt 23.37-39)

³¹ Jesus Jerusalenman riykaptin fariseo runakuna ladunchashpa willarkansapa:

—Chay kamachikuk Herodesmi wañuchichishunayanki. Chayrayku kaylla-manta kutiy.

³² Chayta willaptinkunana Jesuska willarkansapa:

—Herodeska suk manchana laya animalshina manchachiwanayan. Rillaychi willak: Ñuka Tatayni Dios willawashkanta tukuchanaynikaman ruranayni tiyan. Willaychi runakunamanta supaykunata llukshichiykanaynita unkudukunata alliyachiyanaynita. ³³ Kunan kaya kayawashan Tata Diospa munananllata rurashpa katisha. Tukuy chayta rurashpa Jerusalen llaktapi wañunayni tiyan. Jerusalenpi awilunchikuna ñawpa ali yachachikuk runakunata wañuchirkansapa. Chayrayku chay llaktallapi kankunapish ñukata wañuchiwanaykichi tiyan.

³⁴ Llakichiykichi, Jerusalenpi kawsak runakuna. Kankunaka tukuy ali yachachikuk runakunata wañuchinkichi. Chaymanta Tata Dios kachamushkan yachachikuk runakunatapish ruminchashpa wañuchinkichi. Ñuka aypa kuti kankunata amachanayashkaykichi iden suk wallpa wawankunata tantanachishpa rikran sikipi amachakshina. Sukaman kankunata amachanayaptinipish mana nima munankichchu. ³⁵ Mash uvariwaychi. Mana munawashkaykichirayku llaktaykichi chunlla likidu kiparinka.

Chaymanta willaykichi: Suknin diya kankunaka willawanaykichi tiyan: “Kanka sukaman allimami kanki Tata Diosmanta shamudu runa kash-payki.” Chashna willawanaykichi diyakaman mananami kawawankichi-nachu.

14

Jesus samana diya alliyachirkan punkidu runata.

¹ Suk diya Jesuska rirkana kamachikuk fariseo runapa wasinpi mikuk. Chay diya karkan samana diya. Chaypi mikuykaptinna Jesusta chiknik fariseo runakuna chatanayashpangkuna chapaykarkansapa. ² Chaypina Jesuspa ñawpakninman shamerkan suk punkiy unkuyuk runa. ³ Jesus payta kawashpa fariseokunata Moisespa killkadunta yachachikuk runakunata tapurkansapa:

—¿Imatati Moisespa killkadunpi yachachiwanchisapa? ¿Almitiwanichihu manachu samana diya unkudu runata alliyachinanchipa?

⁴ Chashna Jesus tapuptinkunana chay fariseo runakunaka mana nimata aynirkansapachu. Chaypina Jesuska chay unkudu runataka makimanta apishpa alliyachishpa willarkan wasinman kutinanpa. ⁵ Chaymanta fariseokunata willarkansapa:

—May willawayachi. Samana diya ichara wambraykichi vakaykichi suk uchkupi urmanman. Samana diya kaptin ¿maykan kankunatí chay uchkupi urmaduta mana surkunkichiman?

⁶ Chashna Jesus willaptinkunana fariseo runakunaka mana nimata atiparkansapachu ayniita.

Jesus yachachikurkan ama llullachinakushpa yuyanankunapa ashwan alli kanankunata.

⁷ Chay fariseopa wasinpi mikuk yaykushpankuna runakuna munarkansapa ashwan alli bankupi tiyariyta. Chayta kawashpana Jesuska willarkansapa:

⁸ —Mash uyariwaychi. Suk kasarachikuk runa funsiaman konvidashuptikichika ama chay kasarakkunapa ladunpi tiyariyichchu. Chaypi tiyariptikichika ichara kamanta ashwan munadu runa washata shamunman. ⁹ Kankuna chay alli bankupi tiyariptikichika kasarachikuk runaka ladunchashushpaykichi willashunkichiman: “Kay bankumanta atariy kay runa tiyarinanpa.” Chashna willashuptinkuna pinkaynikichita muchushpaykichi rinkichiki washa bankupi tiyari. ¹⁰ Chayrayku kasarachikuk runa konvidashuptikichika chayana bankullapi tiyariyichi. Chayllapi tiyariptikichika ichara chay kasarachikuk runaka yaykuchishunkichiman mesapi mukunaykichi. Chaypirami kankunawan tiyariyu runakunaka kawankasapa ashwan munadu kanaykichi.

¹¹ Kankuna kikikichilla kreyinakushpa kawsaptikichi Tata Dios pinkachishunkichi. Kankuna allillapi mana kreyinakushpa runamasikichita kuyashpa yanapaptikichi Tata Dios sukaman kushikushpa yanapashunkichi.

¹² Chaymanta Jesuska chay wasinpi karak fariseota willarkan:

—Kanka konvidakushpayki mikuk shamenankunapa ama konvidaychu parlakmasikunallata, nima wawkikikunallata, nima ayluykikunallata, nima tukuy layayuk llaktamasikikunallata. Paykunata konvidaptikika kantapish konvidashunkasapa. Kankuna sukwana sukwana kutichinakushpaykichi kikikichilla kushichinakuykankichi. ¹³ Ashwan allita ruranayashpa fiestaykiman yaykuchi mikuk mana nimayuk runakunata, makin tipidukunata, kojokunata, mana kawakukkunata. ¹⁴ Tukuy chay laya runakunata konvidaptiki paykunaka mana kutichishuya atipankasapachu. Chaypira Tata Dios tukuy alli rurak runakunata kawsachimushkan diya premyukita kushunki.

*Jesus yachachikurkan atun fiestapa ejemplunta.
(Mt 22.1-10)*

¹⁵ Jesus yachachikuptin uyarishpana chay mesapi mikuykak runakunama suku runa paytaka willarkan:

—Tata Dios sielipi suku fiestata ruraptin chaypi mikuk runakuna sukaman kushikunkasapa.

¹⁶ Chashna chay runa willaptin Jesuska suku ejempluta rimashpa willarkan:

—Suk runa atun fiestata rurashpa aypa runakunata konvidachirkan wasinpi mikuk rinankunapa. ¹⁷ Mikuna alli kaptinna suku wiwachunta kacharkan tukuy konvidadukunata kayak. ¹⁸ Chashna kayak riptyn paykunaka aynirkansapa mana atipanankunata riptya. Suk runa willarkan: “Chayrak chakrata rantishkani. Chayta kawak rinayni tiyan. Chayrayku willay ama piñakunarpa mana riptyni.” ¹⁹ Suk konvidadu willarkan: “Chunka vakatami rantishkani. Chaytami rinayaykani kawak allichu manachu nishpa. Chayrayku willay ama piñakunarpa mana riptyni.” ²⁰ Chaymanta

suk konvidadu willarkan: "Chayrak kasarashkani. Warminita mana sakiyta atipanichu. Chayrayku mana rinichu chay fiestaman."

²¹ Chashna mana niman suk runa katinayaptinkuna chay kayakuk runaka kutirkanna. Chaypina fiestakuk runata willarkan mana ni pi shamanayankunata mikuk. Chayta uyarishpa fiestakuk runaka sukanman piñakurkan. Piñakushpa wiwachuntaka willarkan: "Kunanka utkakushpa rillay kayamuyasa kallipi plasapi tiyak runakunata. Pushamuysapa mana nimayukkunata, makin tipidukunata, kojokunata, mana kawakuy atipakknata. Tukuy paykunata konvidamuysapa mikuk shamunankunapa."

²² Chashna willaptin wiwachunka tukuy willashkanta rurarkan. Chaymanta fiestayuktana willarkan: "Tata, ñami tukuy willawashkaykitana rurashkani. Aypa runakunata pushamuptinipish pishinllami kay wasiki untanarpa." ²³ Chashna chay wiwachun willaptinna fiestakuk runaka willarkan: "Rillay ñankunamanta chaymanta wasi pampankunapi puriyak runakunata pushamuk. Apurashpa pushamuysapa kay wasini untanarpa.

²⁴ Allita willaykichi. Chay ñawpaka konvidadukunaka manami kay fiescipika mikunkasapanachu."

*Tukuy layamanta ashwan allita Jesusta kuyananchikuna tiyan.
(Mt 10.37-38)*

²⁵ Chaymanta mikushkankunawasha Jerusalen llaktaman Jesuska rirkan. Chayman riyaktin aypa runakuna katirkansapa. Jesuska tikrakushpa chay katik runakunata yachachirkansapa:

²⁶ —Kankuna disipuluynikuna kanayashpaykichika tataykichimanta, mamaykichimanta, warmikichimanta, wambraykichimanta, wawkiwichimanta, panikichimanta ñukata ashwan allita kuyawanaykichi tiyan. Kuyanakunaykichimanta ashwan allita ñukata kuyawaychi. Mana chashna allita kuyawashpaykichika manami disipuluynikunachu kankichi.

²⁷ Sukaman padesishpaykichipish runakuna chiknishuptikichipish ñukallata katiwanaykichi tiyan. Allita katiwashpaykichika disipuluynikunami kankichi.

²⁸ Mash allita uyariwaychi. Suk runa kuydakunan altu wasita runanayashpa allita yuyaykunantyian imakunatami chay wasipaka munan nishpa. ²⁹ Mana allita yuyaykushpa ichara kallarinanllapi sakinman mana tukuchayta atipashpa. Chay mana tukuchadu wasita kawashpa tukuy runakuna chay wasichakuk runata asichishpa rimanmansapa: ³⁰ "Mash kawaychi. Chay runaka llullakushpa kallarishka wasichakuya. Manami atipanchu tukuchayta." Kankunapish chay wasichakunayak runashina allita yuyaykushpa ñukata katiwanaykichi tiyan.

³¹ Chaymanta ichara suk sinchi kamachikuk runa makanakunayanman chikan llaktapi kamachikuk runawan. Chaypaka allita yuyaykunantyian: "Ñukapa chunka waranka soldaduynikunalla tiyan. Chay suk kamachikuk runaka ishkay chunka waranka soldadukunawan shamuykan. ¿Atipashachu manachu makaytaka?" ³² Chaypina mana makayta atipananta yuyashpa chay kamachikuktaka willachinan tiyan amana shamunankunapa makanakuk.

³³ Kankunapish chay makanakunayak runashina allita yuyaykuchi katiwankichichu manachu nishpa. Mana tukuy layaykichita sakishpa katiwashpaykichika manami disipuluynikunachu kankichi.

*Jesus yachachikurkan alli kachishina kananchikunapa.
(Mt 5.13; Mr 9.50)*

³⁴ Chaymanta Jesus willarkansapa:

—Sinchi kachika rikchak layapami alli. Allpayuk kachi mana nimapa allichu. ³⁵ Chay allpayuk kachita allpapi churaptinchipish mana nimapa allinachu nima kiwata wiñachinanpa. Mana nimapa alli kaptin wishchunchi. Allita uyariwaychi. Kankunapish mana allita kreyiwashpa kawsashpay-kichika chay mana alli kachishinami kankichi.

15

Jesus yachachikurkan chinkadu ovejapa ejemplunta. (Mt 18.10-14)

¹ Chaymanta Jesus yachachikushkanwasha aypa runakuna laduncharkansapa ashwanta uyarinayashpa. Suk runakuna karkansapa romano gobiernupa kullki kobraukukkuna. Sukkuna karkansapa mana allita rurashpa kawsak runakuna. ² Chay aypa runakuna Jesusta ladunchaptinkuna fariseokuna Moisespa killkashkanta yachachikuk runakuna kawarkansapa. Paykunaka Jesusta washanchashpankuna rimarkansapa:

—Kay runaka chay uchasapa runakunata munashpa paykunawan mikun. Paykunawan mikushpa mana allitachu ruran.

³ Mana allita ruraykananta rimaptinkuna Jesuska uyarirkan. Chaypina suk ejempluta willarkansapa:

⁴ —Ichara kankunapa tiyan pachak ovejaykichi. Chay pachakmanta ichara suk oveja chinkanman. Kankunaka chay aypa ovejaykichita pastupi sakishpaykichi ¿manachu chay chinkaduta rinkichi maskak tarinay-kichikaman? ⁵ Tarishpaykichi kushikuypuru wantushpa wasikichiman pushankichiman. ⁶ Chaypina familyaykichita aylluaykichita tantanachishpa kushikushpa willankichiman: “Shamuychi ñukawan kushikuychi. Ñami kay ovejayni chinkadutaka tarishkanina.”

⁷ Mash allita uyariwaychi. Kankuna suk chinkadu ovejaykichita tarishpaykichi sukmaman kushikunkichi. Chashnami sielipi kawsakkunapish iskun chunka iskun alli rurak runakuna tiyashkanmanta ashwanta kushikunsapa suk runa uchanmanta wanaptin.

Jesus yachachikurkan chinkadu kullkipa ejemplunta.

⁸ Chaymanta Jesuska chikan ejempluta yachachikurkan:

—Ichara suk warmi chunka kullkinkuna tiyapushkanmanta sukta chinkachinman. ¿Manachu chayta maskan tarinankaman? Alkusanta apichishpa wasinta kuchun mañanta pichashpa maskan. ⁹ Tarishpana kushikuyninwan warmimasinkunata tantanachishpa willanka: “Ñukawan kushikuychi. Ñami chay chinkadu kullkinitaka tarishkanina.”

¹⁰ Mash allita uyariwaychi. Chay warmi kullkinta tarishpa sukmaman kushikurkan. Chashnashina angelkunapish sukmaman kushikunsapa suk runa uchanmanta wanaptin.

Jesus yachachikurkan tatanmanta ashudu waynapa ejemplunta.

¹¹ Jesuska chikan ejempluta yachachikurkan:

—Suk runapa tiyarkan ishkay ullku wambrankuna. ¹² Suk diya win-shu wambran tatantaka willarkan: “Tatayni, patumawayna tukuý ñukata kuwanaykitana.” Chashna mañaptinna chay runa tukuy tiyapunanta ishkantin wambrankunata patumarkansapa.

¹³ Chaypina chay winshu wambranka tatan tukuy kushkanta rantikurkan. Chay kullkiwan rirkana sukmaman llaktapi kawsak. Chay karu llaktapina sukmaman mana allikunata rurashpa tukuy kullkinta tukucharkan. ¹⁴ Chaypina

chay kawsanan llaktapika sinchi yarkay tiyarkan. Chay wayna mana kullkiyuk kashpana yarkarkan. ¹⁵ Chashna sukaman yarkashpa rirkana willak suk runata trabajachinanpa. Chay patronka kacharkan chakrani kuchinkunata karashpa trabajananpa. ¹⁶ Chaypina chay waynaka kuchikunapa mikunanta sukaman mikunayarkan. Munaptinpish mana ni pi ni chay laya mikunanta kararkansapachu. ¹⁷ Sukaman yarkashpana tatanta yuyashpa rimarkan: “Tataynipa trabajadorninkunapa aypa mikunankuna puchun. Chaykamanka kaypika yarkaymanta ñuka wañunayaykani. ¹⁸ Shu kunanlla tatayniman kutisha. Kutishpayni willasha: ‘Munanayni tatayni, kanmanta ashushpaynika uchallikushkanimi. Chaymanta mana Tata Diospa munananta rurashpa kawsashkani. ¹⁹ Chayrayku amana kawayanachu wambraykitashina. Suk trabajadornikitashina trabachifiway.’”

²⁰ Chashna allita yuyaykushpa chay waynaka tatanman kutirkan. Tatanya wasinpi manara chayaptinra karupi kapteinlla tatanka riksirkan. Sukaman llakichishpa kallparkan tinkuk. Chaypina wambranta abrasashpa mucharkan. ²¹ Payka tatantaka willarkan: “Munanayni tatayni, kanta sakishpayni Tata Diosta rabyachirkani kantapish rabyachishkayki. Amana kawayanachu wambraykitashina.”

²² Chashna willaykaptinna tatanka trabajadorninkunata kayashpa willarkansapa: “Utkakushpa apamuychi mushuk llachapata wambraynita mudachinaykichihi. Chaymanta suk anilluta dedunpi churapuchihi. Mushuk ushutantapish churachiychi. ²³ Chaymanta rillarychi pushamuk chay ashwan gordo beshekuta. Chayta wañuchishpa fiestata rurashpa mikuypachi. ²⁴ Kay wambrayni wañudu kashkanmantashina unay tiempumantanami rikurimushka. Chinkadu kashkanmanta ñami rikurimushkana.” Chashna chay runa rimaptin alli fiestata rurarkansapa.

²⁵ Chay fiestata ruraykaptinkuna chay mayor wambranka chakrani karkan. Chakranmanta kutimuykashpa wasinpi chayaykashpa bomboya kenata uyarirkan fiestata ruraykaptinkuna. ²⁶ Fiestakuykaptinkuna uyarishpana tatanpa trabajadorninta kayashpa tapurkan: “¿Imatáti ruraykansapa tataynipa wasinpi?” ²⁷ Chaypina chay runaka willarkan: “Chay chinkadu wawzikika ñami rikurimushkana. Chayrayku tataykika kushikuyninwan alli fiestata ruraykan. Wawzikika sanu chayamushka kaptin ashwan gordo beshekuta wañuchichishka.”

²⁸ Chashna willaptinna chay mayor wambranka sukaman piñakurkan. Mana nima chay fiesta wasipi yaykunayarkanchu. Fiesta wasimanta tatanka llukshishpa rirkana willak paywan fiestakuk yaykunanpa.

²⁹ Chaypina chay wayna piñakushpa tatantaka willarkan: “Kanka allita yachanki aypa watatana mana ni mayman suchushpayni kanta yanapashkaynita. Chashna allita yanapaptinipish mana niman suk kuti niman suk chivuta kuwashkankichu amiguynikunawan fiestata rurashpa mikunaynikunapa. ³⁰ Kunan waynandera warmikunawan uchallikushpa kullkikita tukuchak wambrayki chayamushkana. Chayamuptin paypana chay ashwan gordo beshekuta wañuchishpa alli fiestata ruraykanki.”

³¹ Chashna chay mayor wambrana piñakushpa willaptinna tatanka willarkan: “Munanayni wambrayni, kanka tukuy diyami ñukawan kawsaykanki. Tukuy laya tiyawakmi kanpa kanan tiyan. ³² Chaykuna kanpa kaptin ¿impati piñayawanki? Kay wawzikika wañudu kashkanmantashina rikurimushka. Chinkadu kashkanmanta ñami rikurimushkana. Chayrayku ali kashka fiestata rurananchipa. Akuychi kushikushpa fiestakuypachi.”

16

Jesus yachachikurkan empleadu runapa ejemplunta.

¹ Chaymanta Jesuska disipulunkunata suk ejempluta willarkansapa:

—Suk kullkisapa runa tiyarkan. Chay aypa kullkiyuk runa suk empleadunta willarkan tukuy tiyapunanta kuydananpa tukuy trabajadorninkunatapish trabajachinankunapa. Suk diya chay trabajadorkuna patronninkunapi rirkansapa chay trabajachikuk runata chatakuk. Willarkansapa: “Ñami kullkitaka tukuchaykanna mana allikunata rurashpa.” ² Chashna chatakuptinkunana patronka chay empleadunta kayashpa willarkan: “Yachashkani llullachiwaykanaykita. Kunanmantapacha manana munaninachu ñukapi trabajanaykipa. Chayrayku kawachiway chay killkashkaykita imakunatami rantikushkanki imakunatami rantishkanki nishpa.”

³ Chashna patronnin willaptinna chay runaka sukaman llakishpa yuyaykurkan: “Patronnini kay trabajuynimanta surkuwaptinka ¿imata rurashpanati kawsasha? Mana atipanichu chakrata rurashpa trabajayta. Pinkakuni kullkita mañakushpa kawsaya.” ⁴ Mana trabajuyuk kaptini runakuna wasinkunapi chaskiwanankunapa ñami yuyashkanina imatami rurasha nishpa.”

⁵ Chashna yuyashpa chay empleaduka patronninta debik runakunata sukmanta sukmanta kayarkansapa. Sukta tapurkan: “Kanka ¿mashnatati patronninitaka debinki?” ⁶ Payka willarkan: “Ñuka pachak lata aseytitami debini.” Chaypina chay empleaduka willarkan: “Mash kaway. Ñukami yanapashkayki. Kaypimi killkadu chay debishkaykika. Kunan tiyarishpa mushuktana killkay. Pichka chunka lata aseytitá debinaykillata killkay. Ñukapish chayllata killkasha patronnini kawananpa.”

⁷ Chashna chay debikuk runata killkachishkanwasha chay empleaduka sukta tapurkan: “Kanka ¿mashnatati patronninitaka debinki?” Payka willarkan: “Suk pachak kostal trigutami debini.” Chaypina chay empleaduka willarkan: “Mash kaway. Ñukami yanapashkayki. Kaypimi killkadu debishkaykika. Kunan pusak chunka kostal debinaykillata killkay. Ñukapish idenllata killkasha patronnini kawananpa.”

⁸ Chaymanta chay patron empleadun rurashkanta yachashpa rimarkan: “Chay empleaduynika yachaysapami kashka. Payka debiwak runakunata yanapashka paykunapish payta yanapanankunapa.”

Chay ejempluta rimashkanwasha Jesuska disipulunkunata willarkansapa:

—Mana alli rurak runakuna Tata Diosta riksik runakunamanta sukaman ashwan yachaysapakunami.

⁹ Mash allita uyariwaychi. Tukuy kay allpapi tiyapushunaykichiwan sukkunata yanapaychi paykuna sukaman kuyashunankunapa. Chashna tiyapushunaykichiwan runamasikichita yanapaptikichi sielipi paykuna kushikushpa chaskishunkichi mana tukuyniyukta chaypi kawsanaykichiwa.

¹⁰ Kankuna kuskata rurashpa mana llullakushpa tipi tiyashunaykichiwan runamasikichita yanapashpaykichiwa aypa tiyashunaykichiwanpish mana llullakushpalla yanapankichi. Chaymanta tipi tiyashunaykichiwan runamasikichita llullachishpaykichiwa aypa tiyashunaykichiwanpish llullachishpa mana yanapankichichu. ¹¹ Chashnami kankuna kay allpapi tiyashunaykichiwan mana runamasikichita yanapaptikichiwa Tata Diós

sielupi mana premyuykichita kushunkichichu. ¹² Chaymanta runamasi-
kichipa tiyapunanta mana kuydayta yachaptikichi Tata Dioska manami
ashwantachu kushunkichi.

¹³ Suk trabajador mana atipanchu ishkay patronpi trabajayta. Sukllallata
kasunan tiyan. Suk patronninta kasushpa suktaka mana kasunnachu.
Kankuna chay trabajadorshina kankichi. Kankunapish kullkiyayta mu-
nashpalla kawsashpaykichika manana atipankichinachu Tata Diosta ka-
sushpa kawsayta.

¹⁴ Chashna Jesus yachachikuptin uyarishpankuna chay kullkita suka-
man munak fariseokuna Jesusta asichirkansapa. ¹⁵ Chaypina Jesuska
willarkansapa:

—Kankuna mana alli rurak runakuna kayakashpaykichipish munankichi
tukuy runakuna rimanankunapa alli rurak kanaykichita. Tata Dioska tukuy
mana alli yuyaynikichita allita riksin. Chay laya yuyaynikichita Tata Dios
kawan millanara layata.

¹⁶ Tukuy ñawpa alli yachachikuk runakuna Moisesmanta Juankaman
Tata Dios kachamunan runa shamenanta yachachikurkansapa. Chay
tiempumantapacha ñuka yachachiykichi Tata Diospa mandunpi yaykunay-
kichita. Aypa runakuna sukanan munashpa sinchikushpa padesishp
yaykuykansapa.

¹⁷ Kay allpa chay sielu kulluptinpish Tata Dioska killkadunpi tukuy ri-
maskanta ruranka.

*Jesus yachachikurkan kasaradukuna ama warminta wishchunankunapa.
(Mt 19.1-12; Mr 10.1-12)*

¹⁸ Chaymanta Jesus willarkansapa:

—Kankunaka yuyankichi warmikichita wishchushpaykichika
mana uchallikuykanaykichita. Chayta yuyashpaykichika kikikichilla
llullachinakuykankichi. Warmikichita wishchushpa chikan warmiwan
kasarashpaykichika uchallikuykankichimi. Chaymanta chay wishchudu
warmiwan kasarak runapish uchallikuykan.

Jesus yachachikurkan tukuy layayuk wañudu runapa ejemplunta.

¹⁹ Jesuska chikan ejempluta willarkansapa:

—Suk tukuy layayuk runa tiyarkan. Chay runaka sukanan allima llacha-
panta mudakuk. Tukuy diya allima fiestakunata rurak. ²⁰ Chaymanta
tiyarkan suka mana nimayuk runa. Paypa shutin karkan Lasaro. Lasaroka
kiri likidu karkan. Payka tukuy diya tiyari chay aypa kullkiyuk runapa
wasin punkupi. ²¹ Chay kiri likidu runa sukanan mikunayak tukuy layayuk
runapa mesanmanta urmachidukunata. Chay punkupi tiyari du kaptin
allkukuna kirinkunata llakwapuksapa.

²² Suk diyana chay Lasaroka wañurkan. Tata Diospa angelinkuna payta
pusharkansapa Abrahamwan sielupi kawsanarpa. Chaymanta chay aypa
kullkiyuk runapish wañurkanna. Paytaka pamparkansapa. ²³ Chay runaka
rirkana mana tukuuniyuk nina rawrakman. Chaypi sukanan padesiykashpa
karumanta kawarkan Lasarota Abrahamwan tantallata. ²⁴ Payta kawash-
pana sinchita rimashpa Abrahamtaka willarkan: “Tatayni Abraham, lla-
kichiwashpa Lasarota willapay shamunarpa kalluyni puntata suka tipi
yakuwan ñuyuchipak. Ñukaka kay ninapi sukananmi padesiykani.”

²⁵ Chashna willaptinna Abrahamka willarkan: “Wambrayni, allita yuyay
allpapi kawsashkaykita. Kan sukanan allita kawsashkanki. Kay Lasaroka
allpapi kawsashpa sukanan yarkarkan sukanan padesisirkana. Kunanka
payka kushikuykan. Kanka sukanan padesiykanki. ²⁶ Chaymanta tiyan suka

manllayba rarka ama ni pi pasananpa. Chayrayku kanman Lasaroka mana atipanchu riyta. Nima kanpish atipankichu kayman chayamuya.”

²⁷ Chashna willaptinna chay tukuy layayuk kashka runaka willarkan: “Tatayni Abraham, roygayki Lasarota kachanaykipa tataynipa wasinman. ²⁸ Payta kachaptiki pichka wawkinikunata yachachimansapa ama ūkashina kay mana tukuyñiyuk ninaman shamusankunapa.”

²⁹ Chashna willaptinna Abrahamka willarkan: “Paykunapa tiyan Moisespa killkadunkuna. Chay killkadunkunapi willashkankunata kasuchun-sapa.”

³⁰ Chaypina chay runaka aynirkan: “Ariya tata Abraham, chay wawkinikuna mana Moisespa killkadunta kasunayansapachu. Ichara suk wañudu runa kashkan kawsamushpa yachachikuk riptyn kreyikunmansapa.” ³¹ Chaypina Abrahamka willarkan: “Chay wawkikikuna mana Moisespa nima alli yachachikuk runakunapa yachachikunanta kasunayansapachu. Chashnashina mana nima kreyinkasapachu suk wañudu runa kashkan kawsamushpa riptyn yachachikuk.”

17

Jesus disipulunkunata yachachirkansapa tukuy runamasinkunata perdonankunapa.

(Mt 18:6-7, 21-22; Mr 9:42)

¹ Chaymanta Jesuska disipulunkunata willarkanapa:

—Kay allpapi tiyan uchallichishunayak runakuna. Tukuy paykunata Tata Dioska sukaman kastigankasapa. ² Amarapish uchallichishuptinkunara alli kanman suk atun rumi makita kunkanpi watashpa atun yakupi wishchunankunapa. Sipikushpankuna manana ni pita uchallichinkasapanachu. ³ Allita kuydanakuychi ama uchallikunaykichipa. Tata Diosta kreyikmasiki rabyachishuptin rillay willak amana mana allita rurashunana. Chaypina almitishuptin perdonay. ⁴ Kuti kuti rabyachishuptinpish perdonanayki tiyan. Ichara suk diyapi kanchis kuti rabyachishunkiman. Chaymanta ichara kanchis kuti willashunkiman: “Mana kashkan rurashanachu” nishpa. Chashna willashuptikica perdonanayki tiyan.

⁵ Chashna Jesus yachachikuptinna disipulunkunaka willarkanapa:

—Maestru, yanapawaysapa ashwanta kanta kreyinaynikunapa.

⁶ Chashna disipulunkuna willaptinkuna Jesuska willarkanapa:

—Ñukata tukuy shunku kreyiwashpaykichika chay wiñaykak kaspita willankichiman: “Kaymanta ashushpa rillay wiñamuy chay yaku mañanpi.” Chashna willaptikichi chay kaspika kasushunkichi. Taksha murillushina tipisitullatapish kreyiwashpaykichika tukuy willashkaynita atipankichiman rurayta.

⁷ Kunkunapa wiwachuykichi rinman chakraykichipi trabajak. Chaypi alpata araduwan aspin. Vakaykichtapish kuydan. Chaymanta chakraykichimanta kutimuptin kankuna mana willankichichu: “Shamuy mikuyyna” nishpa. ⁸ Ashwan willankichi: “Mikunaynita shamuy rurak. Ñuka mikuykaptini upyaykaptini sirvimuway. Karawashkaykiwasharami kanka mikunki upyanki.” ⁹ Chaymanta chay wiwachuykichita mana willankichimanchu: “Allita karawashkanki” nishpa. ¹⁰ Chay wiwachuykichishina Tata Dios willashushkanta rurashpaykichi willanaykichi tiyan: “Kan willawashkaykita rurashkanisapa. Chayrayku mana meresinisapachu alabawanaykipasapa.”

Jesus chunka lasaruyak runakunata alliyachirkan.

¹¹ Chaymanta yachachikushkanwasha Jesuska disipulunkunawan Jerusalenam rirkansapa. Chayman rishpankuna Samaria partita Galilea partita puriyarkansapa. ¹² Chayta rishpankuna suk llaktapi chayarkansapa. Chaypi chunka runakunawan tinkunakurkansapa. Tukuy paykuna kiri likidu lasaru unkuyuk karkansapa. Paykunaka mana animukurkansapachu Jesusta ladunchayta. ¹³ Karullamanta sinchita rimashpa willarkansapa:

—Maestru, ñukaykunatapish llakichiwaysapa.

¹⁴ Chaypina Jesuska paykunata kawashpa llakichishpankuna willarkansapa:

—Saserdote kunaman rillarychi paykuna yachanankunapa allinachu kan-kichi manachu nishpa.

Chashna willaptinkuna chay chunka runakunaka rirkansapana. Manara saserdote kunapi chayashpankunara chunkantin alliyarkansapa Jesus alliyachiptinkuna. ¹⁵ Kirinmanta alliyadu kawanakushpa chay chunkamanta suk runalla Jesusman kutirkan. Kushikushpa sinchita rimashpa Tata Diosta sukaman alabarkan. ¹⁶ Kushikupuru rirkana Jesuspa ñawpaknini pi kunkurikushpa agradesik. Chay kutimuk runaka Samaria partimanta karkan. ¹⁷ Chay runalla kutimuptin Jesuska almirashpa disipulunkunata willarkansapa:

—Chunkantina alliyachishkani. ¿Maysapanatiya chay iskun runakunaka?

¹⁸ ¿Kay Samariamanta runallachu kutimushka Tata Diosta alabananpa?

¹⁹ Chaypina chay kutimushka runata Jesuska willarkan:

—Atariyna. Wasikimanna rillary. Ñukata kreyiwashkaykiraykumi alliyachishkayki.

Jesus yachachikurkan imashnami Tata Dios tukuy kreyik runakunata kamachinkasapa nishpa.

(Mt 24.23-28, 36-41)

²⁰ Chaymanta fariseo runakunaka Jesusta tapurkansapa:

—¿Aykapikamanti Tata Dios kallarinka tukuy runakunata kayayta mandun-pina kawsanankunapa?

Chashna tapuptinkuna Jesuska willarkansapa:

—Mana kay allpapi kankunapa kamachikuknikichishinachu Tata Dios kamachikun. Mana atipankichichu kawayta kamachikunanta. ²¹ Mana atipankichichu willaya kappimi chaypimi Tata Dios kamachikuykan nishpa. Mana kawaptikichipish Tata Dios kreyikuk runakunata shunkunkunapi kamachiykansapa.

²² Fariseo runakunata yachachishkanwasha Jesuska disipulunkunallata willarkansapa:

—Kankunaka sukaman padesinaykichi tiempu munankichi kawayta Tata Diomsanta shamudu runa kashpayni kallariptini kamachikuyta. Sukaman munashpaykichi pi mana kawawankichichu kay allpapi kamachikuptini. ²³ Sukkuna llullakushpa rimankasapa: “Kaypinami chaypini am Jesuska” nishpa. Chashna rimaptinkunapish ama rillarychichu kawak. Nima paykunata katiyichichu.

²⁴ Mash allita uyariwaychi. Tamyanayaptin llipyashpa tukuy sieluta lusichin. Chay llipyakshina ñukapish kashkan shamushpayni tukuy sieluta lusichisha.

²⁵ Chaymanta manarapish kashkan shamuptini aypa runakuna sukaman chikniwashpa padesciwankasapa. ²⁶⁻²⁷ Chay ñawpa Noe yachachikuptinpish tukuy runakuna chikniwashpa mana munarkansapachu kreyiyya.

Paykunaka mikuykarkansapa upyaykarkansapa kasaraykarkansapa kasarachikuykarkansapa yachachikul Noe manllyab barkunpi yaykunan diyakaman. Noe chay barkupi yaykuptinna Tata Dios tamyawan allpata untachiptin tukuy runakuna sipikushpa wañurkansapa. Iden Noepa tiempunpishina aypa runakuna kankunatapish mana kreyishushpaykichi padescichishunkichi. Chaypina ñuka Tata Dioßmanta shamudu runa kashpayni kashkan kutimusha.

²⁸ Chay ñawpa Lotpa tiempunpipish Tata Dios Sodoma llaktapi kawsak runakunata kastigarkansapa. Chay runakuna Tata Diosta mana kreyishpankuna mikuykarkansapa upyaykarkansapa tukuy layata rantiykarkansapa rantikuykarkansapa. Chaymanta wasinkunata ruraykarkansapa chakrankunapi tarpuuykarkansapa. ²⁹ Chaypina chay llaktamanta Tata Dios Lotta llukshichishkanwasha sielumanta chay llaktapi sinchi rawraykak ninata urmachimurkan. Chaywan tukuy runakuna rupashpa wañurkansapa. ³⁰ Chashnashina ñukapish Tata Dioßmanta shamudu runa kashpayni kashkan shamushpayni tukuy mana kreyiwak runakunata kastigashasapa.

³¹ Chay tiempuka kankuna wasikichi sawanpi kashpaykichi ama yaykuychichu tiyapushuknikichita surkuk. Chakraykichipi kashpaykichi ama wasikichiman kutiychinachu nimata surkuk.

³² Allita yuyaychi Lotpa warmin wañushkanta. ³³ Kankunapish munanaykichillata rurashpaka wañunaykichi tiyan. Ñukata kreyiwashpa kawsashpaykichika wañushpaykichi pish kashkan kawsamunaykichi tiyan.

³⁴ Mash allita uyariwaychi. Chay padescinaykichi tiempu suk kawitullapi ishkaymanta puñuykaptinkuna ñukaka suklallata sielman pushasha ñukawan kawsanarpa. Sukta sakisha mana kreyiwashkanrayku. ³⁵ Ishkay warmikuna kutakuykaptinkuna ñukaka suklallata sielman pushasha ñukawan kawsanarpa. Sukta sakisha mana kreyiwashkanrayku. ³⁶ Ishkay runakuna chakranpi trabajaykaptinkuna ñukaka suklallata sielman pushasha ñukawan kawsanarpa. Sukta sakisha mana kreyiwashkanrayku.

³⁷ Chashna Jesus yachachikuptin uyarishpana disipulunkunaka tapurkansapa:

—Maestru ¿maypiti runakunata kastiganki?

Chashna tapuptinkuna Jesuska willarkansapa:

—Wañudukuna kananpi siyukakuna tantanakunsapa mikunankunapa. Ñukapish tukuy mana alli rurak runakunata tantanachishasapa kastiganaynikunapa.

18

Jesus yachachikurkan mañakukuk viyudapa ejemplunta.

¹ Jesuska disipulunkunata suk ejempluta yachachirkansapa. Willarkansapa ama shaykushpa Tata Dioßwan parlanankunapa. ² Kay ejempluta willarkansapa:

—Suk llaktapi tiyarkan suk awtoridar jue. Chay jueksa mana Tata Diosta manchakchu karkan. Nima runamasinkunata kasukchu. ³ Chay juespa kawsanan llaktapi tiyarkan suk viyuda warmi. Suk runa chay warmitaka tiyapunanta kichunayak. Chay warmika rirkan chay runata juespi chatak. ⁴⁻⁵ Aypa kuti chay warmi mañakukuptinpish chay jueksa mana yanapanayashpa mana kasurkanchu. Chay warmi kuti kuti amichiptinna chay jueksa yuyayninllapi rimarkan: “Ñuka Tata Diosta mana nima manchanichu. Mana nima runamasinkunata kasushpaynipish shu yanapasha

kay viyuda warmita. Payka sukaman unaytanami amichiwaykan yanapanaynipa. Yanapaptini ichará manana kutin shamunkanachu amichiwak."

⁶ Chayta yachachikushpa Jesuska willarkansapa:

—Chayjueska Tata Diosta mana manchak kashpapish rimarkan chay warmita yanapananpa. ⁷ Kankunaka Tata Diospa aklladunkunami kankichi. Chayrayku tutapi diyapi roygaptikichi payka utkakushpa yanapashunkichi.

⁸ Mash allita uyariwaychi. Allita roygaptikichi Tata Dioska kushikushpa mana unayashpa yanapashunkichi. Ñuka Tata Diosmanta shamudu runa kashpayni kay allpaman kashkan shamushpayni ¿ariya ñukata kreyiwaptikichirachu tarimushkaykichi?

Jesus disipulunkunata yachachirkansapa ama yuyanankunapa runamasinkunamanta ashwan alli kanankunata.

⁹ Chaymanta chay runakuna alli rurak kanankunata yuyanakushpa runamasinkunata mana munaksapachu. Jesuska paykunata suk ejempluta yachachirkansapa:

¹⁰ —Tata Diospa wasinman ishkay runakuna rirkansapa Tata Dioswan parlak. Suk karkan fariseo runa. Suk karkan romano gobernupa kullki kobrauk runa. ¹¹ Chay fariseo runaka Tata Diosta parlachishpa willarkan: "A Tata Dios, ñuka tukuy runamasinkunamanta ashwan alli rurakmi kani. Chayrayku sukaman kushikuni. Manami suwachu kani. Manami nima uchallikuk runachu kani. Nima suk chikan warmiwan uchallikunichu. Mana nima chay romano gobbernupa kullki kobrauk runashinachu kani. ¹² Kada semana ishkay diyata kanta kushichishpa mana nimata mikunichu. Chaymanta kada chunka kullkinikunamanta súkta kuyki."

¹³ Chashna chay fariseo rimaptin chay kullki kobrauk runaka karul-lapi shayarirkan. Payka mana nima animukurkanchu altuta chapakuyta. Sukaman uchasapa kananta yuyashpa kaskunta makinwan waktashpa rimarkan: "A Tata Dios, ñuka uchasapa likidu runa kaptini llakichiwashpa perdonaway."

¹⁴ Chay ejempluta willashkanwasha Jesuska willarkansapa:

—Mash allita uyariwaychi. Chay kullki kobrauk runa uchasapa kananta willashkanrayku Tata Dios perdonarkan. Tata Dios perdonaptin kushikushpa wasinman kutirkan. Chaykamanka chay fariseotaka Tata Dios mana perdonarkanchu. Suk runa kikinlla alli rurak kananta yuyanakuptin Tata Dios payta sukaman pinkachinka. Chaymanta suk runa mana kreyi-nakushpa kawsaptin Tata Dios payta kushichinka.

Jesus munarkan wambrillukuna payman shamunankunapa.

(Mt 19.13-15; Mr 10.13-16)

¹⁵ Jesus yachachikuykaptin aypa runakuna taksha wambrillunkunata pushamurkansapa paykunata Jesus llankanankunapa. Chayta kawash-pankuna Jesuspa disipulunkuna piñakushpa micharkansapa ama ladunchakunankunapa. ¹⁶ Michaptinkuna kawashpa Jesuska chay wambrillukunata kayarkansapa. Chaypiña disipulunkunata willarkansapa:

—Wambrillukunata pushamuptinkuna ama michaychichu shamenankunapa. Wambrakuna mana kreyinakushpa tatanpa mandunpi kawsansapa. Kankunapish kay wambrakunashina kawsashpaykichira Tata Diospa mandunpi yaykunkichi.

¹⁷ Allita willaykichi. Kankunapish chay wambrakunashina Tata Diospa munananta rurashpa kawsanaykichi tiyan. Mana paypa munananta rurashpaykichika mana mandunpika yaykunkichichu.

Tukuy layayuk runa Jesuswan parlarkan.
(Mt 19.16-30; Mr 10.17-31)

18 Chaymanta suk kamachikuk runa Jesusta ladunchashpa tapurkan:

—Alli maestru ñimata rurashpatí mana tukuyuniyukta Tata Dioswan kawsayman?

19 Chashna chay runa tapuptinna Jesuska willarkan:

—¿Imapati alli kanaynita willawanki? Tata Diosllami alli rurak. **20** Kanka allitami yachanki imatami Tata Dios kamachiwanchi nishpa. Chay killkakdukunapi kashna willawanchisapa: “Ama chikan warmiwan uchallikushpa kawsaychu. Ama runamasikita wañuchiychu. Ama nimata suwaychu. Ama ni pita llullakushpa tumbaychu. Chaymanta tataykita mamaykita kuyashpa kawsay.”

21 Chashna Jesus willaptinna chay runaka willarkan:

—Maestru, ñuka wayna kashkaynimantapachami tukuy chayta allita kashshpa kawsaykani.

22 Chashna chay runa willaptin Jesuska willarkan:

—Manami tukuytachu kasuykanki. Rillay rantikumuy tukuy laya tiyapushunaykita. Chaypa chaninta mana nimayuk runakunata kuysapa. Chayta rurashpa sielupi tukuy layayuk kanki. Chaymanta shamuy ñukata katiway.

23 Chashna Jesus willaptinna chay runaka sukaman llakirkan rikchak layayuk kashshpa. **24** Sukaman llakiptin kawashpana Jesuska disipulunkunata willarkan:

—Aypa kullkiyuk runakuna tiyapunankunata sukaman munashpankunaka mana atipankasapachu Tata Diospa mandunpi kawsayta. **25** Suk kamellu animal mana atipanmanchu suk aguja uchkunta pasayta. Chashnami suk kullki likidu runa kullkinta ashwanta munashpa mana atipankachu Tata Diospa mandunpi yaykuya.

26 Chay uyariq runakuna sukaman almirashpankuna willarkansapa:

—Chashna kaptinka ñipikunati Tata Diospa mandunpi yaykunka?

27 Chashna willaptinkuna Jesuska willarkansapa:

—Niman suk runa atipanchu kikinllamanta Tata Diospa mandunpi yaykuya. Tata Diosllami atipan runakunata mandunpi yaykuchiyyta.

28 Chaypina Pedru willarkan:

—Maestru, ñukaykuna tukuy layaynikunata sakishpaynikuna kanta katiyaykisapa.

29 Chashna Pedru willaptinna Jesuska willarkansapa:

—Kankunaka Tata Diospa mandunpi yaykunayashpaykichi wasikichita, warmikichita, wawzikichita, tataykichita, wambraykichita sakishpa ñukata katiwaykankichi. **30** Chayrayku kay allpapi Tata Dios tukuy sakishkaykichimanta ashwanta kushunkichi. Chaymanta wañushpaykichi rinkichi sielmana Tata Dioswan mana tukuyuniyukta kawsak.

Jesus kimsaynin kuti willarkansapa wañunanta.
(Mt 20.17-19; Mr 10.32-34)

31 Chaymanta Jesuska chay chunka ishkay disipulunkunata chikanman pusharkansapa. Chaypina willarkansapa:

—Kunanka akuychina Jerusalen llaktaman. Chaypi chay ñawpa yachachikuk runakuna killkashkankunashina padesciwankasapa.

32 Ñuka sielumanta shamudu runa kaptini chikniwak runakuna apiwankasapa. Chaypina mana judiyu runakunapi kukuwankasapa wañuchiwanankunapa. Paykunaka asichiwankasapa. Piñayawashpa

tukaychawankasapa. ³³ Makawankasapa chaymanta wañuchiwankasapa. Chaymanta wañuchiwashkankunamanta kimsa diyapi kashkan kawsamusha.

³⁴ Chashna Jesus willaptinkuna disipulunkunaka mana nima entiendirkansapachu. Jesus willashkankuna paykunapa mana entiendina laya kaptin mana yacharkansapachu imatami willaykansapa nishpa.

Jesuska mana kawakuk runata alliyachirkan.
(Mt 20.29-34; Mr 10.46-52)

³⁵ Chaymanta Jesuska Jeriko llaktapi chayanayaykarkanna. Chay ñanpi suk mana kawakuk runa tiyarissha kullkita mañakuykarkan. ³⁶ Chaypina chay runaka uyarirkan aypa runakunata ladunta pasaykaptinkuna. Paykunata tapukurkan:

—¿Pití pasaykan?

³⁷ Chashna tapukuptinna chay runakunaka willarkansapa:
—Nasaret llaktamanta Jesusmi shamuykan.

³⁸ Chaypina chay runaka manllaybata rimakushpa Jesustaka willarkan:
—¡Maestru, ñawpa Davidpa miraknin kashpayki ñukata llakichiway!

³⁹ Chayta uyarishpankunana chay ñawpakte riykak runakunaka michash-pankuna willarkansapa:

—¡Upallay! Ama sukaman sinchitaka kayaychu.

Chashna willaptinkuna payka ashwan sinchita kayarkan:
—¡Maestru, ñukatapish llakichiwayna!

⁴⁰ Kayashkanta uyarishpa Jesuska riyashkanmanta shayarirkan. Chaypina willarkansapa ladunman chay runata pushamunankunapa. Pushamuptinkunana Jesuska chay runataka willarkan:

⁴¹ ¿Imatati munanki ruranayni?

Chaypina chay runaka willarkan:
—Maestru, ñawinita alliyachipay.

⁴² Jesuska chay runataka willarkan:

—Kanka allitami kreyiwashkanki ñuka alliyachinaynita. Chayrayku kumanlla alliyachiyki.

⁴³ Chashna Jesus willaptinna raslla chay runaka allita kawakurkan. Chaypina Jesusta katishpa Tata Diosta alabarkan. Chay runa allita kawakuptin kawashpana tukuy chay runakunapish Tata Diosta alabarkansapa.

19

Jesus Sakeopa wasinpi chayarkan.

¹ Chay mana kawakuk runata alliyachishkanwasha Jesus Jeriko llaktapi chayashpa chaypi puriykarkan. ² Chay llaktapi kawsarkan suk runa Sakeo. Payka romano gobiernupa kullki kobrakuk runakunapa kamachikunkinkuna karkan. ³ Chay runaka Jesusta sukaman riksinayarkan. Payka taksha runa kashpa mana atiparkanchu kawayta. Jesus sukaman aypa runakunapa chawpinpi riptín mana ladunchayta atiparkanchu.

⁴ Mana nima kawayta atipashpa Jesuspá rinan ñanta kallpassha ñawparkan shuyak. Chaypina suk ramasapa kaspita llukarkan chaymanta allita Jesusta kawanana. ⁵ Chay Sakeo llukashkan kaspí kuskanta Jesuska rirkana. Ramani pi tiyariduta kawashpana Sakeotaka willarkan:

—Sakeo, utkakushpa urayamuy. Kunanka wasikipimi samanayani.

⁶ Chashna willaptinna Sakeoka utkakushpa urayamurkan. Chaypina kushikushpa Jesusta wasinman pusharkan. ⁷ Jesus Sakeopa wasinpi samak

rinanpa uyarishpankuna chay runakunaka Jesusta sukanman washanchashpa willanakurkansapa:

—¿Imatanashi Jesuska samanka chay uchasapa runapa wasinpika?

⁸ Chaymanta wasinpi chayaptinna Sakeo sukanman kushikuyininwan Jesusta willarkan:

—Mash kaway, maestru. Kunanka tukuy tiyawaktami patumata mana ni mayuk runakunata kunisapa. Chaymanta runakunata tukuy suwashkayni kullkinkunata kutichishasapa chusku kuti mirachishpa.

⁹ Chashna willaptinna Jesuska paytaka willarkan:

—Kunan diya ūnuka runakunapa salvakukninkuna kay wasipi chaya-mushkani. Kay runapish ūnawpa awilunchi Abrahampa mirakninmi. ¹⁰ ūnuka sielumanta shamushkani tukuy uchasapakunata maskak uchankunamanta perdonanaynipasapa.

*Jesus yachachikurkan sinchi kamachikuk runapa ejemplunta.
(Mt 25.14-30)*

¹¹ Sakeopa wasinpi Jesus yachachikuptin aypa runakuna uyarirkansapa. Paykuna yuyarkansapa Jesus Jerusalenman riykananta sinchi kamachikuk kananpa. Chayrayku Jesuska suk ejempluwan yachachirkansapa:

¹² —Suk runapa ayllunkuna kaypi chaypi awtoridarkuna karkansapa. Chay runapish karu llaktaman rirkān kargunta chaskikuk kutimushpa llaktanpi sinchi kamachikuk kananpa.

¹³ Chay runaka manara llaktanmanta llukshishpara chunka trabajadorninkunata kayachirkan. Paykunata aypa kullkinta kurkansapa. Chay kullkinta kushpankuna willarkansapa: “Kay kullki kushkayniwan imakunatapish rantishpaykichi rantikushpaykichi mirachipaychi. Kutimuptini chay kullki miradutana kutichiwankichi.”

¹⁴ Chaymanta chay karu llaktaman chay runa rirkān. Chaypina llaktamasinkuna chiknishpankuna mana munarkansapachu kutimushpa paykunapa kamachikukninkuna kananpa. Chayrayku suk komisyonta kacharkansapa chay ashwan sinchi kamachikuk runata willanankunapa: “Nukaykunaka manami munanisapachu llaktaynikunapi chay runa kamachiwanankunapa.”

¹⁵ Chashna mana munaptinkunapish chay ashwan sinchi kamachikukka churarkan chay runataka kamachikukninkuna kananpa. Kargunta chaskishpa chay runaka llaktanman kashkan kutirkan. Llaktanpi chayashpana kayachirkansapa tukuy kullki chaskikuk runakunata. Yachanayarkan mashnatami kullkinta mirachishkasapa nishpa. ¹⁶ Tukuymanta ūnpakta shamuk trabajadornin ladunchashpana willarkan: “Señor, kay kullkitaka chunka kuti mirachipushkayki.”

¹⁷ Chashna willaptinna kamachikuknina aynirkan: “Sukaman allita trabajashpa kay kullkitaka mirachishkanki. Sukaman alli trabajakmi kanki. Kunanka allima kasuwak runa kaptiki churayki chunka llaktakunapi kamachikuk runa kanaykipa.”

¹⁸ Chaymanta ishkaynin trabajadornin ladunchashpa willarkan: “Señor, kay kullki kuwashkaykitaka pichka kuti mirachipushkayki.” ¹⁹ Chashna willaptin chay kamachikukninka willarkan: “Kantapish churayki pichka llaktakunapi kamachikuk runa kanaykipa.”

²⁰ Chaymanta washata shamuk trabajadornin ladunchashpa willarkan: “Señor, kay kullki kuwashkaykitaka mana nima mirachishkanichu. Allitami suk llachapapi wankushpa wakaychashkani. ²¹ Sukaman kanta manchash-payni mana nima mirachishkanichu. Allitami riksiyki sukanman sinchi

shunkuyuk runa kanaykita. Kanka chikan runapa tarpushkankunata pallanki. Chikan runapa pallashkankunata kanpa wakaychanki. Chayrayku kanta manchashpayni kullkikita pampashkanki.”

²² Chashna chay runa willaptinna chay kamachikuk runaka willarkan: “Kanka killa likidu trabajadormi kashkanki. Chay mana allita willawashkaykiraykumi kastigayki. Yachashkanki sinchi shunku runa kashpayni chikan runapa tarpushkanta pallashkaynita. Yachashkanki chikanpa pallashkanta wakaychashkaynita. ²³ Chayta yachashpayki ñimapati chay kullkinita mana churarkanki banku ofisinapi miranampa? Chaypi churaptikika kullkinita miradutana tarimuyman karkan.”

²⁴ Chaypina chay kamachikuk runaka chikan trabajadorninkunata willarkansapa: “Kay runataka kichuychi tukuy chay mana mirachishkan kullkita. Chayta kuychi chunka kuti mirachik runata.”

²⁵ Chaypina chay trabajadorninkunaka willarkansapa: “Señor, ñami paytaka aypa kullkitana kushkanki.”

²⁶ Chashna willaptikunana chay kamachikuk runaka willarkansapa: “Mash uyariwaychi. Ñuka chay aypa tiyapuk runataka ashwantami kusha. Chaymanta mana aypa tiyapuk runataka pishilla tiyapukninta kichusha.

²⁷ Chaymanta tukuy chickniwak runakunata pushamuychi. Paykuna mana munawashkasapachu kamachikuk kanaynipa. Chayrayku tukuyta laduynipi wañuchiychi.”

Jesus Jerusalen llaktapi disipulunkunawan yaykurkan.

(Mt 21.1-11; Mr 11.1-11; Jn 12.12-19)

²⁸ Chayta yachachikushkanwasha Jerikomanta Jerusalenman Jesuska rirkana. ²⁹ Chayman riyashpa Olivos urku ladunpi chayarkan. Chay Olivos urku karkan Betfage llakta Betania llakta ladunpi. Chaypi chayashpana Jesuska ishkay disipulunkunata willarkansapa:

³⁰ —Kankunaka rillarychi chay kawananchi llaktaman. Chayashpaykichi suk watadu burruta tarinkichi. Chay burrutaka manara ni pi montanrachu. Chayta paskashpaykichi pushamuychi. ³¹ Maykan imapatí paskankichi nishpa tapushuptikichi willaychi: “Señorninikunami kay burrutaka munan montanampa.”

³² Disipulunkuna rishpankuna Jesus willashkankunashina chay watadu burruta tarirkansapa. ³³ Paskaykaptinkunana doyñunkuna michashpankuna tapurkansapa:

—¿Imapatí chay burrutaka paskaykankichi?

³⁴ Chashna tapuptinkunana disipulunkunaka willarkansapa:

—Señorninikuna munan montanarpa.

³⁵ Chashna willashpankuna chay burrutaka Jesusman pusharkansapa. Chaypina burru sawanpi llachapankunata churaptinkunana Jesuska montarkan. ³⁶ Chaymanta chay burrupi Jesus riykaptin chay runakuna Jesusta kuyashpankuna chay riman ñanpi llachapankunata mantarkansapa.

³⁷ Jerusalenman riyashpankuna Olivos urkuta urayaykarkansapana. Chaypina tukuy katik runakuna kushikushpankuna sinchita rimashpa Tata Diosta alabarkansapa Jesus aypa almirana ruranata rurashkanrayku.

³⁸ Willarkansapa:

—Tata Dioska Jesusta kachamushka sinchi kamachikukninchikuna kananpa. Chayrayku akuychi payta kuyaypachi. ¡Akuychi anak sielipi kawsak Tata Diosta sukaman kuyaypachi!

³⁹ Chaypina fariseo runakuna chay aypa runakunapa chawpinkunapi kashpankuna Jesusta willarkansapa:

—Maestru, kay katishuknikikunata upallayachiy.

40 Chashna willaptinkuna Jesuska willarkansapa:

—Willaykichi: Ñuka chay runakunata upallayachiptini kay rumikuna kuyawashpankuna sinchita kaparikunkasapa.

41 Chaymanta Jerusalenpi chayanayakashpana Jesuska llaktata kawashpa wakakurkan. **42** Wakakushpa rimarkan:

—Sukaman munayman chay llaktapi kawsak runakunata yachachiya. Munayman paykunata mana tukuy niyukta kushichiyta. Chashna munaptinipish mana entiendiwanayansapachu. Mana munawaptinkuna Tata Dios mana atipanchu yachachiysapata. **43** Mana riksiwaptinkuna kuanmantapacha sukaman padesinankuna tiyan. Aypa chiknik runakuna shamunkasapa tukuy kay llaktapa vueltashninta suk pirkata ruranankunapa. Chay pirkata ruraptinkuna manana ni pi yaykuya nima llukhiyta atipankasapanachu. Tukuy vueltashnintinta yaykushpa makankasapa. **44** Chaypina tukuy kay llaktapi kawsak runakunata wañuchinkasapa. Chaymanta tukuy wasinkunata waklichishpa urmachinkasapa. Manana nima rumikuna sawapura kiparinkanachu. Tata Dioska paykunataka kastigankasapa salvuk shamushkaynita mana kreyishkankunaryaku.

Jesus Tata Diospa wasinmanta rantiyakak rantikuykak runakunata karkurkansapa.

(Mt 21.12-17; Mr 11.15-19; Jn 2.13-22)

45 Jerusalenpi chayashpana Tata Diospa wasinpi Jesuska yaykurkan. Chaypi kawarkan rantiyakak rantikuykak runakunata. Mana munashpa chaypi rantikunankunapa tukuya karkurkansapa. **46** Karkushpa willarkansapa:

—Tata Dios killkadunpi willawanchisapa: “Wasinika ñukata kuyawashpa oranaykichillapami.” Chashna Tata Dios willawaptinchikunapish kankunaka kay wasita rurankichi suwakunaykichi wasita.

47 Chay runakunata karkushkanwasha tukuy diya Tata Diospa wasinpi Jesuska yachachikurkan. Chaypi yachachikuptin saserdotekunapa kamachikukninkuna, Moisespa killkadunta yachachikukkuna, llaktapa kamachikukninkunapish Jesusta wañuchinayashpa puriksapa.

48 Mana yacharkansapachu imashnami wañuchinkasapa nishpa. Jesus yachachikuptin aypa runakuna riksapa uyarik. Chayrayku chay chiknik runakuna manara atiparkansaparachu wañuchiytaka.

20

Jesus chay kamachikuk runakunata upallayachirkansapa.

(Mt 21.23-27; Mr 11.27-33)

1 Chaymanta suk diya Tata Diospa wasinpi Jesuska aypa runakunata yachachiykarkansapa. Willarkansapa Tata Dios kastigumanta salvanankunata. Chaypina saserdotekunapa kamachikukninkuna, Moisespa killkadunta yachachikukkuna, judiyukunapa ansianunkunapish Jesusta ladun-chashpa willarkansapa:

2 —Ariya ¿pití willashushka chashna yachachikunaykipa? ¿Pití kanki chay rantikuykak runakunata karkunaykipa?

3 Chashna tapuptinkuna Jesuska aynirkansapa:

—Ñukapish kankunata tapuptini ayniwaychi. kachamushka runakunata bawtisanankunapa? ¿runakunachu kachamushka? May ayniwaychi.

4 ¿Pití Juantaka
¿Tata Dioschu?

⁵ Chashna Jesus tapuptinkuna chay runakunaka sukwana sukwana willanakurkansapa:

—Mana atipanchisapachu willayta Tata Dios Juanta kachamushkanta. Chayta ayniptinchikunaka payka willawashunchisapa: “Tata Dios Juanta kachamushka kaykaptin ¿imapatí mana kreyishkankichi?”

⁶ Chaymanta mana atipanchisapachu willayta runakunalla Juanta kachamushkanta. Chashna ayniptinchikunaka chay appa runakuna ruminchawashpanchikuna wañuchiwanchimansapa. Tukuy paykuna kreyinsapa Tata Dios kachamuptin Juan yachachikushkanta.

⁷ Chashna mana ayniyta atipashpankuna Jesusta willarkansapa:

—Mana yachanisapachu pimi Juanta kachamushka nishpa.

⁸ Jesuska willarkansapa:

—Ñukapish mana willaykichichu pimi kachamuwashka tukuy chaykunata ruranaynipa.

*Jesus yachachikurkan mana alli rurak trabajadorkunapa ejemplunta.
(Mt 21.33-44; Mr 12.1-11)*

⁹ Chaymanta Jesuska suk ejempluta chay appa runakunata yachachishpa willarkansapa:

—Suk uva chakrayuk runa tiyarkan. Chay runaka appa uva waskata tarpurkan. Chay uva chakranta rurashkanwasha suk runakunawan paktanakurkansapa pallassha uvakunata paywan patumanakunankunapa. Chashna paktanakushpankuna chay runaka suk karu llaktaman rirkan.

¹⁰ Chaymanta uva pallana tiempu chayamuptin chay chakrayuk runaka chayman kacharkan suk wiwachunta patuma uvata mañak chay uva chakran kuydak runakunata. Chaypina chay runakuna chay wiwachuta sukaman makarkansapa. Mana nimata kushpankuna kacharkansapa.

¹¹ Mana nima suk tipi uvata apartin chay chakrayuk runaka suk wiwachunta kacharkan. Chay chakrata kuydak runakunaka paytapish sukaman makashpankuna piñayashpankuna mana nimata kushpankuna charkansapa.

¹² Chaymanta chay chakrayuk runaka kashkan suk wiwachunta kacharkan partinta mañuk. Chay trabajadorkuna paytapish makarkansapa. Kuchushpankuna chakranmanta karkurkansapa.

¹³ Mana nimayuk paypish kutiptin chay uva chakrayuk runaka sukman yuyaykushpa rimarkan: “¿Imatati rurasha patuma uvata kachamuwanankunapa? Shu chaylla wambraynita kachasha. Ichara payta manchashpankuna uvata kachamuwanmansapa.” ¹⁴ Chaypina chay chakrayuk runaka wambrantana kacharkan uva patumata mañak. Karupi kaptinlla trabajadorkuna riksirkansapa chakra doyñunpa wambran kananta. Chaypina willanakurkansapa: “Kay shamuk runapa tatan wañuptinka kay uva chakraka paypami kiparinka. Akuychi payta wañuchiypachi ñukanchikunapa kiparinanpa kay uva chakra.”

¹⁵ Chaypina chay chakrayuk runapa wambrantaka chakra washaman pushashpankuna wañuchirkansapa.

Chay ejempluta yachachikushkanwasha Jesuska chay runakunata tapurkansapa:

—¿Imatati ruranka chay chakrayuk runaka wambranta wañuchik runakunata? ¹⁶ Paymi trabajadorkunata wañuchinankuna tiyan. Wañuchishpa chikan runakunata willanka chay uva chakranta kuydanankunapa.

Chashna Jesus yachachikuptinkuna chay runakunaka rimarkansapa:

—Mana munanisapachu Tata Dios chay runakunatashina rurawanankunapa.

¹⁷ Chashna chay runakuna rimaptinkuna Jesuska allita chapashpankuna willarkansapa:

—¿Ariya imatati Tata Diospa killkadunka yachachiwanchisapa? Chay killkadu kashna riman:

“Suk runa wasinta rumimanta ruraptin trabajadorninkuna suk rumita wishchurkansapa mana alli nishpa.

Chashna wishchukuptinkunapish chay wasichakuk runaka chay wishchudu rumita wasi kallarinanpi churarkan.”

¹⁸ Pipish kashpa mitkakushpa chay wishchudu rumipi ur mashpa paki paki tukunka. Chaymanta chay wishchudu rumi ur mashpa pitapish kaptin apyachishpa wañuchinka.

¹⁹ Chashna Jesus yachachikuptin saserdotekunaka kamachikukninkuna, Moisespa killkadunta yachachikukkunaka uyarirkansapa. Paykuna entiendirkansapa paykunarayku Jesus chay ejempluta yachachikuykananta. Chayrayku sukaman piñakushpankuna Jesusta apinayarkansapa wañuchinankunapa. Manara apirkansaparachu Jesusta katik runakunata manchashpankuna.

Jesusta tapurkansapa romano kamachikukta pagarankasapachu manachu nishpa.

(Mt 22.15-22; Mr 12.13-17)

²⁰ Sukaman Jesusta wañuchiya munashpankuna chay chiknik runakunaka kacharkansapa suk runakunata Jesusta llullachinankunapa. Rimashkanta pantachichinayashpa munarkansapa sinchi kamachikukpi chataya. Chaypina chay kachadu runakunaka allipi tukushpankuna Jesusman rirkansapa. ²¹ Jesuspi chayashpankuna willarkansapa:

—Maestru, ñukaykunaka allita yachanisapa mana llullakushpa sukaman allimata yachachikunaykita. Kanmi tukuy runakunapa yuyayninkunata allimata riksishpa mana manchakushpa yachachikunki. Tukuy runakunata yachachinkisapa Tata Diospa munananllata rurashpa kawsanankunapa.

²² Kan allillata yachachikuykaptiki ñukaykunaka tapunayaykisapa. Chay sinchi romano kamachikuk runa kullkinchita mañawaptinchikuna ¿allichu manachu pagarakunanchikunapa?

²³ Chashna chay runakuna tapuptinkuna Jesuska yacharkan pantachichinayashkankunata.

Chaypina kullkita mañashpa tapurkansapa:

²⁴ —¿Pipa uyantatí kawankichi kay kullkipi? ¿Pipa shutintatí kawankichi?

Chashna Jesus tapuptinkuna chay runakunaka willarkansapa:

—Sinchi romano kamachikuk Sesarpa uyanta shutinta kawanisapa.

²⁵ Chaypina Jesuska willarkansapa:

—Chay sinchi kamachikuk runapa kaktaka payta kuychi. Chaymanta tukuy laya Tata Diospa kaktaka payllata kuychi.

²⁶ Nima laya rimashkanpi Jesusta atiparkansapachu pantachichiyta. Chayrayku sukaman almirashpankuna upallayarkansapa. Chashna oras mana atiparkansapachu Jesusta apiyta.

Jesus yachachikurkan runakuna wañushpa imashnami sielupi kawsankasapa nishpa.

(Mt 22.23-33; Mr 12.18-27)

²⁷ Chay washa saduseo runakuna rirkansapa Jesusta kawak. Saduseo runakuna yuyaksapa mana ni pi wañushkanmanta kawsamunanta. Payku-naka Jesusta llullachinayashpankuna willarkansapa:

²⁸ —Maestru, ñawpa Moisespa killkadunpi yachachiwanchisapa: “Suk kasaradu ullku mana wambrayuk wañuptin wawkinlla chay viyuda kuñadanwan kasaranan tiyan. Chaypina chay warmi suk ullku wambrata wawayaptin wañudupa wambranshina kanan tiyan.” ²⁹ Kunanka willaykisapa: Suk runapa tiyarkan sokta wawkinkuna. Chay runashi kasarashpa manara niman suk wambrayuk kashpa wañurkan. ³⁰ Chaypina chay ishkaynин wawkin viyuda kuñadanllawan kasararkan. Paypish manara niman suk wambrayukra wañurkan. ³¹ Chaymanta chay kimsaynin wawkin viyuda kuñadanwan kasararkan. Paypish wañurkanlla. Tukuy chay wañudupa wawkinkuna sukmanta sukmanta chay viyuda kuñadankunallawan kasararkansapa. Kanchisnintin mana niman suk wambrayuklla wañurkansapa. ³² Chaypina chay viyuda warmipish wañurkanna. ³³ Maestru, runakuna wañushkankunamanta kawsamuptinkuna chay kanchis kusanmanta ¿maykan kakpatí kanman warminka? Tukuy paykuna chay warmiwan kasaradu karkansapa.

³⁴ Chashna chay saduseo runakuna tapuptinkuna Jesuska willarkansapa:

—Kay allpapi ullku warmi kasarashpa kawsansapa. ³⁵⁻³⁶ Chaymanta kawsamushpa Tata Diosta kreyik runakunalla rinkasapa sielipi kawsak. Chaypi mana ni pi wañunkanachu. Chayrayku ullku warmi mana kasarashpa kawsankasapa. Paykuna angelkunashina mana kutin wañukna kawsankasapa. Wañushkankunamanta kawsamushkanrayku Tata Diospa wambrankuna kankasapa.

³⁷ Ñawpa yachachikuk Moisespish yachachiwanchi wañudu runakuna kawsamunanta. Chay ramasapa taksha kaspi rawraykak ukunmanta Tata Dioska Moisestaka willarkan: “Ñukami Abrahampa Isakpa Jakobopa Tata Diosninmi kani.” ³⁸ Chashna Tata Dios rimaptin yachanchisapa chay kimsa ñawpa awilunchikuna wañushkankunamanta kawsamushpa Tata Dioswan kawsaykanankunata. Tata Dioska kawsak runakunallapa Diosninmi.

³⁹ Chashna Jesus yachachikuptin uyarishpana Moisespa killkadunta yachachikuk runakuna willarkansapa:

—Maestru, allitami yachachiwaykankisapa.

⁴⁰ Chaypina saduseo runakuna manana animukurkansapanachu ashwanta tapuya.

Jesus yachachikurkan sinchi kamachikuk kananta.

(Mt 22.41-46; Mr 12.35-37)

⁴¹ Chaymanta Jesuska chay runakunata willarkansapa:

—Ñukapish kankunata tapuykichi. Kankuna rimankichi Tata Diosmanta shamudu salvakuk runa ñawpa awilunchi Davidpa miraknin kananta.

⁴² Mash uyarivaychi. Davidka Salmo librupi kashna killkarkan: “Tata Dioska kamachiwak runata willarkan:

⁴³ ‘Alli laduynipi tiyariy ñukawan tantalla kamachikunaykipa ñuka chiknishuk runakunata saru saru ruranaynikaman kanta kuyashu-nankunapa.’”

⁴⁴ Chay salmopi Davidka rimarkan Tata Diosmanta shamudu salvakuk runa paypa sinchi kamachikuknин kananta. Davidpa kamachikuknин kaptinka ¿imashnatí paypa miraknin kanman?

Jesus Moisespa killkadunta yachachikuk runakunata piñayarkansapa.

(Mt 23.1-36; Mr 12.38-40; Lk 11.37-54)

⁴⁵ Chashna Jesus yachachikuptin tukuy chay runakuna almirashpangkuna uyariyarkansapa. Chaypina Jesuska disipulunkunata willarkansapa:

46 —Ama munaychichu Moisespa killkadunta yachachikuk runakunata uyariyta. Paykunaka suni llachapankunkuna churakushpankuna plasaku-napi purinsapa. Sukaman munansapa tukuy runakuna manchashpankuna rimachinankunapa. Chaymanta tantanakunankuna wasikunapi ashwan alli bankukunapi tiyarinsapa. Suk fiestaman rishpankuna ashwan alli bankukunapi tiyarishpankuna mikunsapa. **47** Paykunaka alli rurakshina yuyanakushpankunapish viyuda warmikunapa wasinkunata kichunsapa. Chayta ruraykashpa sukaman sunita Tata Dioswan parlansapa runakuna rimanankunapa alli rurak kanankunata. Llullachikuk kaptinkuna Tata Dioska paykunataka ashwan sinchita kastiganankuna tiyan.

21

Mana nimayuk warmi chaylla tiyapushkanta Tata Diosta kurkan.
(*Mt 12.41-44*)

1 Chaymanta suk diya Tata Diospa wasin pampapi Jesuska yachachikykarkan. Chaypi kawarkan tukuy layayuk runakuna ofrendankunata churaykaptinkuna kullki churanankuna kajonpi.

2 Chaymanta kawarkan mana nimayuk viyuda warmi chayaptin. Chay warmika churarkan ishkay tiyapushkan kullkisitunta. **3** Tukuy tiyapushkan kullkinta churaptin kawashpana Jesuska disipulunkunata willarkansapa:

—Ñuka allita willaykichi. Kay viyuda warmika mana nimayuk kayakashpa chay aypa kullkiyuk runakunamanta ashwan alli ofrendata kukushka.

4 Chay aypa kullkiyuk runakuna puchushkan kullkinta Tata Diosta kunsapa. Chay mana nimayuk warmika tukuy tiyapushkanta Tata Diosta kuyashpa kushka. Chayrayku payka Tata Diosta ashwanta kushichin.

Jesus rimarkan Tata Diospa wasin urmananta.
(*Mt 24.1-2; Mr 13.1-2*)

5 Chaypina disipulunkunaka Tata Diospa allima ruradu wasinta kawash-pankuna willanakurkansapa:

—Kay wasika sukaman allima rumikunamanta ruradumi. Tata Diosta ofresishkankunawan allima sumachidumi.

6 Chashna disipulunkuna willanakuptinkuna Jesuska willarkansapa:

—Kay wasika sukaman allima ruradu kaptinpish suknin diya urmanan tian. Urmaptin manana ni suk rumi sawapura kiparinkanachu. Chiknishuk runakuna tukuy kay wasita wakllichishpa urmachinkasapa.

Jesus yachachikurkan Jerusalen llakta kullenanta.
(*Mt 24.3-28; Mr 13.3-23*)

7 Jesus yachachikuptin disipulunkuna tapurkansapa:

—Maestru ¿aykapiti kay Tata Diospa manllayba wasintaka urmachinkas-apa? ¿Imakunata kawashpatí yachashasapa Tata Dios chay rimashkaykita rurananta?

8 Chashna disipulunkuna tapuptinkuna Jesuska willarkansapa:

—Allita kuydanakuychi ama ni pi llullachishunaykichipa. Aypa llul-lachikuk runakuna ñukapi tukushpa shamunkasapa. Rimankasapa: “Ñuka kani Tata Diosmanta shamudu salvakuk runa.” Chashna rimaptinkunapish ama paykunataka kreyiyichichu.

9 Chaymanta llaktan llaktan makanakunkasapa. Chaymanta llaktapura makanakushpa wañuchinakunkasapa. Chaykunata uyarishpaykichi ama manchakuychichu. Manarapish kay alpa kulluptin aypa llaktakunapi makanakunankuna tiyan.

10 Jesuska yachachikuyllapi katirkana:

—Kaypi chaypi atun llaktakunapi chikninakuk runakuna suk atun llaktakunawan makanakunkasapa. ¹¹ Chaymanta kaypi chaypi allpa sinchita kuyunka. Tukuy maypi tiyanka sinchi yarkay. Rikchak laya unkuykuna tiyanka. Chaymanta tukuy runakuna manchanapa layakunata sielipi kawankasapa yachanankunapa allpa kullunanta.

¹² Manarapish nima manchanapa layakunata Kawaptikichira chiknishuk runakuna kankunata apishunkichi. Paykuna tantanakunankuna wasikunaman pushashunkichi chatashunaykichipa. Chaymanta karselkunapi churachishunkichi. Ñukata kreyiwashkaykichirayku sinchi kamachikuk runakunapi chatakushunkichi. ¹³ Paykunapi chatashuk pushashuptikichika kankunaka atipankichi yachachikuya ñuka salvakuk kanaynita. ¹⁴ Sinchi kamachikuk runakunapi chatakushuptikichika ama yuyaychichu imatami willasha nishpa. ¹⁵ Ñukami allita yachachishkaykichi imatami rimankichi nishpa. Yanapaptini allita atipankichi paykunata ayniyya. Chayrayku chay chatakushuknikichi mana nima aynishuyta atipankasapchu.

¹⁶ Chaymanta tataykichi wawkikichi ayluykichi llaktamasikichi chiknishunkichi. Llullachishushpaykichi pushashunkichi kamachikuk runakunaman paykuna wañuchichishunaykichipa. ¹⁷ Ñukata kreyiwashkaykichirayku Tata Diosta mana kreyinayak runakuna chiknishunkasapa. ¹⁸ Paykuna chiknishuptikichipish Tata Dioska sukaman kuydashuykankichi. Payka chukchaykichtapish kuydapushunkichi. ¹⁹ Imatapish rurashuptinkuna mana shaykushpa ñukallata kreyiwashpa kawsaychi sielman rinaykichipa paywan mana tukuyniyukta kawsak.

²⁰ Chaymanta kay Jerusalenpi tukuy vueltashnippi aypa soldadukunata kawashpaykichi yachankichi kay llakta kullunanta. ²¹ Chay aypa soldadukunata kawashpa Judea partipi kashpaykichi nitikuychi urkukuna sokinpi pakakuk. Jerusalenpi kashpaykichi llukshiychi. Chakraykichipi kashpaykichi ama Jerusalenman kutimuychichu.

²² Chay pacha Tata Dioska tukuy kay llaktapi kawsak runakunata kastigankasapa. Ñawpa yachachikuk runakuna Tata Dios kastigananta killkaraksapana. ²³ Tata Dioska tukuy kay llaktakunapi kawsak runakunata sukaman kastigaptinkuna sukaman padesinankuna tiyan. Chay padessinan tiempu chayamuptin okupada warmikuna ñuñuchikuk warmikuna llakichinapa layata padessinkasapa. ²⁴ Soldadukunaka runakunata machetinkunawan wañuchinkasapa. Sukkunata watashpankuna karu llaktakunaman pushankasapa chaypi kawsanankunapa. Mana judiyu runakunaka kay Jerusalen llaktapi kamachikunkasapa Tata Diospa rimashkan tiempu pak-tamunankaman.

*Jesus yachachikurkan kutimunanta.
(Mt 24.29-35, 42-44; Mr 13.24-37)*

²⁵ Jesus yachachikuyllapi katirkana:

—Manarapish kay allpaman kashkan shamuptini tukuy pi intita killata luserukunata manchanapa layakunata kawankasapa. Chaymanta atun yakukuna sukaman untashpa kuyushpa sinchita kaparikunkasapa. Chayta uyarishpa tukuy runakuna sukaman manchakunkasapa. Sukaman manchakushpankuna sukta sukta yuyaykunkasapa.

²⁶ Chaymanta sielipi lusichikkuna kuyunkasapa. Chayta kawashpa runakuna yuyankasapa kay allpa kullunanta. Manchakuywan wañukshina mallinakunkasapa. ²⁷ Chashna oras ñukata kawawankasapa puyu ukunpi shamuptini. Llipiyak likidupi shamusha tukuy runakunata

sumak yachanayniwan kamachiksapa. ²⁸ Ñuka shamusha kankunata sielman pushaknikichi amana kutin padesinaykic平pana. Chayrayku chay manchanapa layakunata kawashpaykichi kushikushpalla mana manchakushpa shuyawaychi.

²⁹ Jesus yachachikuyllapi katirkan:

—Mash kawaychi chay igo kaspita suk kaspikunatapish. ³⁰ Chay kaspikuna aypata pankayaptin kawashpaykichi yachankichi veranu katinanta. ³¹ Chashnashina chay manchanapa layakunata kawashpaykichi yachankichi Tata Dios ñukata utka kachamuwananta kamachikunaynipa.

³² Allita willaykichi. Manarapish kay tiempipi kawsak runakuna wañuptinkunara tukuy kay willashkaynita kawanankuna tiyan. ³³ Tukuy sielu tukuy allpa kullunan tiyan. Kay allpa kulluptinpish ñuka tukuy ri-mashkaynita rurasha.

³⁴⁻³⁵ Tukuy rimashkaynita yuyashpaykichi allita kuydanakuyuchi. Suk animal mana yuyashkan oras trampapi urman. Chashnashina mana yuyashkaykichi diya shamusha tukuy allpapi kawsak runakunata kastiganaynipa. Chayrayku ama nima laya vanidarta rurashpa nima machashpa kawsaychi. Ama tiyapushuknikichillata yuyashpa kawsaychi.

³⁶ Shamunaynita yachashpa tukuy tiempu diyapi tutapi kuydanakushpa Tata Diosta orashpa kawsaychi allita rurashpa kawsanaykic平ipa. Chashna kuydanakuptikichi Tata Dios yanapashunkichi manchana layakunata padesshpaykicipish ñukallata katiwashpalla kawsanaykic平ipa. Chaykunata pasashpaykichi sielman rinkichi ñukapi rikurik. Chaypina Tata Dios kastiguykichimanta salvashunkichi.

³⁷ Chaymanta Jesus chaya yachachikushkanwasha Olivos urkuman rirkan. Tukuy diya Tata Diospa wasinpi yachachikuk. Tukuy tuta rik Olivos urkupi samak. ³⁸ Tukuy diya tutapacha aypa runakuna Tata Diospa wasinman riksapa Jesus yachachikuptin uyarik.

22

Chiknik runakuna Jesusta apinankunapa Judaswan parlarkansapa.

(Mt 26.1-5, 14-16; Mr 14.1-2, 10-11; Jn 11.45-53)

¹ Chay tiempu Paskua fiesta manana ashwannachu illarkan. Tukuy wata Paskua fiesta ukunpi amañaksapa mana levadurayuk pankunata mikuya.

² Chaypina saserdotekunapa kamachikukninkunawan Moisespa killkadunta yachachikukkuna yuyaykurkansapa imashnami Jesusta wañuchinmansapa nishpa. Aypa runakuna Jesusta katirkansapa. Chayrayku paykunaka manchakurkansapa apiyta. ³ Chaypina Jesuspa disipulun Judas Iskariotepi Satanas yaykurkan. ⁴ Judaska rirkan parlak saserdotekunapa kamachikuknun runakunawan Tata Diospa wasin kuydak runakunawan. Paykunata willarkansapa maypimi Jesusta apinmansapa nishpa. ⁵ Chashna Judas willaptinkunana chay runakunaka sukaman kushikurkansapa. Willarkansapa kullkiti pagaranankunapa. ⁶ Chaypina kullkirayku Judaska almitikurkan Jesusta apichichiyya. Chay oramantapacha Judaska sukaman yuyarkan mana runakuna tiyananpi Jesusta apichichiyya.

Jesus disipulunkunawan Paskua fiestapi mikurkansapa.

(Mt 26.17-29; Mr 14.12-25; Jn 13.21-30; 1 Kor 11.23-26)

⁷ Tukuy wata Paskua fiesta ukunpi tukuy judiyu runakuna amañaksapa mana levadurayuk pankunata mikuya. Chaymanta Tata Diosta kuyash-pankuna amañaksapa oveja wawanta wañuchiyya. ⁸ Chay Paskua fiesta kallarinan diya Jesuska Pedruta Juanta kayashpankuna willarkansapa:

—Kankunaka rillaychi Paskua fiestapa mikunanchikunata rurak amusata mikunanchikunapa.

⁹ Chashna Jesus willaptinkunana Pedruwan Juanka tapurkansapa:

—¿Maypití munanki ruranaynikunapa mikunanchikunapa?

¹⁰ Chaypina Jesuska aynirkansapa:

—Chay llaktapi chayashpaykichi tinkunakunkichi yaku puyñuta apaykak runawan. Paytaka katiychi suk wasipi yaykunankaman. ¹¹ Chaypi yaykush-paykichi chay wasiyuk runata willaychi: “Maestruyikuna yachanayan maypishi kay Paskua fiestapi payka disipulunkunawan mikunkasapa.” ¹² Chashna willaptikichi chay wasiyuk runaka kawachishunkichi suk atun kuartuta. Chay kuartuka wasi altuyninpi ñami allichaduna. Chaypi mikunanchikunata ruraychi.

¹³ Chashna Jesus willaptin chay disipulunkunaka rirkansapa. Chay llaktapi chayashpankuna Jesuska willashkankunashina tukuya tarirkansapa. Chaypina paykunaka Paskua fiesta mikunata rurarkansapa.

¹⁴ Chaymanta mikunankuna oras chayamuptin Jesuska tukuy disipulunkunawan tiyarirkansapa mesapi churadutana mikuk. ¹⁵ Tantalla mikuykashpankuna Jesuska willarkansapa:

—Manara wañushpaynira sukaman munashkani kankunawan tantalla kay Paskua fiestapi mikuya. ¹⁶ Mash allita uyariwaychi. Suknin diya Tata Dioska ñukataka willawanka tukuy layapi kamachikunaynipa. Chay diyakan mananami kashkan Paskua fiesta mikunata mikushanachu.

¹⁷ Chaypina Jesuska vasu vinuta apishpa Tata Diosta agradesirkan. Chaymanta disipulunkunata willarkansapa:

—Kankunaka sukpiñi sukpiñi kay vinuta upyaychi. ¹⁸ Upyashpaykichi allita yuyaychi. Kunamantapacha manana vinuta upyashanachu Tata Dios kachamuwanan diyakaman tukuy layapi kamachikunaynipa.

¹⁹ Chaypina Jesuska panta apishpa Tata Diosta agradesirkan. Chay panta pakishpa tukuy disipulunkunata kushpa willarkansapa:

—Kay panka ñukapa kuerpuynimi. Ñukami kankunapa uchaykichi-rayku wañusha. Kankuna kashna tantanakushpa panta mikushpaykichi wañushkaynita yuyaychi.

²⁰ Chay panta mikushkankunawasha Jesuska vasu vinuta tukuy disipulunkunata upyachirkansapa. Chaymanta willarkansapa:

—Ñuka wañuptini yawarnini kankunarayku ichakunka. Chay ichakudu yawarniniwan ñuka kankunawan suk mushuk paktuta rurasha.

²¹ Chaymanta willaykichi. Chay chikniwakkunapi rantikuwakka kay mesallapi ñukawan mikuykan. ²² Ñawpa tiempu Tata Dios killkadunpi rimarkan suk runa apichichiwaptin wañunaynita. Chayrayku sielumanta shamudu runa kashpayni wañunayni tiyan. Chaymanta chay apichichiwak runaka sukaman padesinan tiyan.

²³ Chashna Jesus rimaptin uyarishpankuna disipulunkunaka paykunapura tapunakurkansapa:

—¿Maykan ñukanchikunatí maestrunchikunata apichichinchisapa?

Jesus disipulunkunata yachachirkansapa ama sinchi kamachikuk runakunashina kanankunapa.

²⁴ Jesus wañunanta willaptinkuna disipulunkunaka mana entiendirkansapachu. Paykuna sukwani willanakurkansapa:

—Maestrunchikuna tukuy layapi kamachikuptinna ¿maykan ñukanchikunatí ashwan alli kamachikukka kashunchisapa?

25 Chashna willanakuptinkunana Jesuska willarkansapa:

—Kay allpapi tukuy mandulla untadu runakuna sukaman sinchita kamachikunsapa. Paykuna sinchi kamachikuk Kashpankuna rimansapa alli yanapakuk kanankunata. **26** Kankunaka ama paykunashina mandulla untadu kanayaychichu. Sinchi kamachikuk kanayashpaykichika tukuy runamasikichita iden suk wiwachunshina allita yanapanaykichi tiyan. **27** Kay allpapi tukuy mandulla untadu runakuna tiyarishpa mesapi churaduta mikunsapa. Paykunataka wiwachunkuna manchaywan sirvinsapa. Ņukaka mana chay mesapi tiyarik runakunashinachu kani. Ņukaka sirvikuk wiwachushinami kani.

28 Ņuka wiwachushina kaptini aypa runakuna chikniwashpa padesischiwashkasapa. Kankunapish ūukawan tantalla padesishkankichi.

29 Ņukawan padesishkaykichirayku willashkaykichi suknin diya israelmasikichita kamachinaykicipa. **30** Tatayni Dios kamachikunaynita willawashkantashina ūukapish willashkaykichi kamachikunaykicipa. Ņukawan tantalla mesaynipi mikunkichi upyankichi. Willashkaykichi alli bankupi tiyarinaykicipa israel runakunapa chunka ishkay juesninkuna kanaykicipa.

Jesus Pedruta willarkan mana riksik tukunanta.

(Mt 26.31-35; Mr 14.27-31; Jn 13.36-38)

31 Chaymanta Jesuska Pedruta willarkan:

—Simon, mash allita uyariway. Satanas Tata Diosta mañashka kankunata llullachishushpaykichi trigupa karapanta pawachikshina ashuchishunaykicipa. Chashna mañaptin Tata Dioska almitishka. **32** Ņuka Tatayni Diosta roygashkani yanapashunaykipa ama sakiwanaykipa. Chaymanta kan kashkan katiwashpa kay wawkikunata yanapay paykunapish allita mana shaykushpa katiwanankunapa.

33 Chashna Jesus willaptinna Simonka willarkan:

—Maestru, chiknishukkuna pushashuptinkuna ūukapish kanwan tantalla karselpi yaykusha. Chaymanta maypicha wañuchishunkisapa chaypi ūukapish kanwan tantalla wañusha.

34 Chashna Pedru willaptinna Jesuska willarkan:

—Pedru, mash allita uyariway. Kunan tutami manarapish gallo kantaptin kimsa kuti rimanki mana riksiwanaykita.

Jesus disipulunkunata yachachirkansapa sukaman padesisnankunata.

35 Chayta willashkanwasha Jesuska disipulunkunata willarkansapa:

—Ñawpa kankunata yachachikuk kachashkaykichi. Kachashpayni willashkaykichi ama pikshaykichita nima kullkikichita nima ushutaykichita apanaykicipa. Chayta willashpa kachaptini ñsuk imaykichichu pishishushkankichi?

Chashna Jesus tapuptinkuna paykunaka aynirkansapa:

—Manami nima laya illawashkasapachu.

36 Chaypina Jesuska willarkansapa:

—Kunanmantapacha pikshaykichi tiyaptin apaychi. Kullkikichi tiyaptin chaytapish apaychi. Amachanakunaykicipa machetikichi mana tiyaptin kamisaykichita rantikuychi. Chaypa chaninwan machetikichita rantiychi.

37 Mash allita uyariwaychi. Tata Diospa killkadu rimanan willawanchi: “Sielumanta shamudu runata iden suk mana alli rurak runatashina wañuchinkasapa.” Chashna Tata Diospa ñawpa killkadu rimashkanshina ūuka wañunayni tiyan.

38 Chashna Jesus rimaptin disipulunkunaka willarkansapa:

—Maestru, ñukaykunapa tiyan ishkay machetinikuna.
Chaypina Jesuska willarkansapa:
—Chaylla kachun.

Jesus rirkana Olivos urkupi Tatan Dioswan parlak.
(Mt 26.36-46; Mr 14.32-42)

³⁹ Jesuska disipulunkunawan chay mikushkankuna wasimanta llukshirkansapa. Chaymanta Jesuska amañananshina Olivos urkuman rirkana. Chayman riptyin tukuy disipulunkuna katirkansapa. ⁴⁰ Olivos urkupi chayashpana Jesuska paykunata willarkansapa:

—Kankunaka Tata Diosta roygaychi ama mana allikunata ruranaykichipa.

⁴¹ Chashna willashpankuna Jesuska paykunamanta tipita suchurirkan. Chaypina allpapi kunkurikushpa Tata Dioswan parlashpa willarkan:

⁴² —A Tatayni, munashpaykika salvaway ama sukaman padesinaynipa. Padesishpaynipish munani kanpa munanaykillata rurayta. Manami munanichu ñukapa munanaynita rurayta.

⁴³ Chashna Tata Dioswan parlaykaptinna sielumanta angel rikurimurkan animuchinanpa. ⁴⁴ Jesus sukaman padesiyakashpa ashwan sinchita Tata Diosta roygarkan. Sukaman sinchita roygaptin granu granuta umpirkhan iden yawtashina. ⁴⁵ Chaymanta Tata Diosta roygashkanwasha rirkana disipulunkunata tarik. Paykunaka sukaman llakishpankuna puñuykarkansapa. ⁴⁶ Puñudukunata tarishpankuna Jesuska rikchachishpa tapurkansapa:

—Kankunaka ¿imapati puñunkichi? Rikchaychi. Tata Diosta roygaychi ama supay llullachishushpaykichi uchallichishunaykichipa.

Judas Jesusta apichichirkan.
(Mt 26.47-56; Mr 14.43-50; Jn 18.2-11)

⁴⁷ Jesus disipulunkunata willaykaptinlla aypa runakuna paypi chayarkansapa. Chay runakunapa ñawpkninta Jesuspa disipulun Judaska rirkana. Judaska Jesusta muchakpacha rirkana. ⁴⁸ Muchaptin Jesuska willarkan:

—Judas ¿ñukata sielumanta shamudu runata muchawashpachu rantikuwanki?

⁴⁹ Jesusta apik shamushkankunata kawashpankuna disipulunkunata willarkansapa:

—Maestru, ¿ariya ñukaykuna kay machetinikunawan makanakushasapachu?

⁵⁰ Chaypina suk disipulunka suk runapa alli ladu rinrinta tipipurkan. Chay runa karkan sinchi kamachikuk saserdotepe wiwachun. ⁵¹ Chay runapa rinrinta tipiputinnia Jesuska willarkan:

—Ama makanakuychichu.

Chashna willashpa Jesuska chay wiwachupa tipidu rinrinta llankashpa apichipurkan. ⁵² Chaymanta Jesuska saserdtekunapa kamachikukninkunata, Tata Diospa wasin kuydak runakunata, chay apik shamuk ansianukanatapish willarkansapa:

—¿Imapatí kankunaka machetikunawan kaspikunawan shamushkankichi apiwak? Ñuka mana suwa runachu kani chashna apiwak shamunaykichipa. ⁵³ Tukuy diya Tata Diospa wasinpi kankunawan kashkani. Tukuy diya chaypi kaptinipish mana apiwashkankichichu. Kunan tutapi apiwashpaykichika kamachishuknikichi Satanasta uyariykankichi. Tutapishina kankunaka kawsaykankichi.

*Pedru kimsa kuti rimarkan Jesusta mana riksinanta.
(Mt 26.57-58, 69-75; Mr 14.53-54, 66-72; Jn 18.12-18, 25-27)*

54 Chaypina chay chiknik runakuna Jesusta apishpankuna pusharkansapa saserdoteukunapa ashwan sinchi kamachikukpa wasinman. Chayman pushaptinkuna Pedruka karu karulla katirkan. **55** Chay wasi pampapi chayashpankuna chay runakuna ninakushpankuna mashakuykarkansapa. Pedrupish paykunawan tantalla tiyarishtpa mashakuykarkan. **56** Chaypina suk shipash wiwacha allita kawashpa Pedrutaka riksirkana. Chaypi mashakuykak runakunata willarkan:

—Kay runapish Jesuswan tantallami purishka.

57 Chashna willaptin Pedruka chay shipashta willarkan:

—Manami riksinichu.

58 Chayta willashkanwasha mana unaypinachu suk runa Pedruta kawashpa willarkan:

—Kanpish Jesusupa purikmasinmi kanki.

Chashna chay runa willaptin Pedruka willarkan:

—Manami paypa purikmasinchu kani.

59 Suk ora washan chikan runa chaypi mashakuk runakunapi chatakushpa willarkan:

—Deverasmi kay runapish Jesuswan tantalla purishka. Allitami riksinchisapa Galilea partimanta runa kananta.

60 Chashna chay runa chatakuptinna Pedruka willarkansapa:

—Mana yachanichu maykan runapami willawaykankichi nishpa.

Chayta Pedru rimaykaptin suk gallo kantarkan. **61** Chay gallo kantaptin Jesuska washanta chapashpa Pedrutaka kawarkan. Jesus kawaptinna Pedruka yuyarkan payta willashkanta: “Kunan tuta manarapish gallo kantaptin kimsa kuti rimanki mana riksiwanaykita.”

62 Pedruka chayta yuyashpa chay wasimanta llukshishpa mana upallayak layata wakakurkan.

Chiknik runakuna Jesusta pusharkansapa konsilyo kamachikukninkuman.

(Mt 26.67-68; Mr 14.65)

63 Chaymanta Jesusta kuydak runakuna sukaman asichishpankuna waktarkansapa. **64** Ñawinkunata llachapawan arkapushpankuna waktashpa tapurkansapa:

—May willawaysapa ¿pití waktashushka?

65 Waktashpankuna sukaman piñayashpa willarkansapa mana alli rurak runa kananta.

66 Chaymanta pakariptin chay runakunapa ansianunkuna, saserdoteukunapa kamachikukninkuna, Moisespa killkadunta yachachikuk runakunapish tantanakurkansapa. Tantanakushpankuna Jesusta pusharkansapa judiyukunapa ashwan sinchi kamachikukninkunaman. Chaypi chatanayashpankuna tapurkansapa:

67 —May willawaysapa ¿kanchu sielumanta shamushkanki salvakuk kanaykipa?

Chashna tapuptinkuna Jesuska aynirkansapa:

—Ñuka sielumanta salvakuk runa kanaynita willaptinipish kankuna manami kreyiwankichichu. **68** Kankunata tapuptinika mana nimata ayniwan-kichichu. **69** Kankuna mana kreyiwaptikichipish kuanmantapacha ñuka tiyarishta Tata Diospa alli ladunpi. Sielumanta shamudu runa kashpayni tukuy laya yachak Tatayni Dioswan tiyarishta.

70 Chashna Jesus willaptinkuna tukuy chay runakunaka piñakushpankuna tapurkansapa:

—¿Ariya kanchu kanki Tata Diospa wambran?

Chashna tapuptinkuna Jesuska aynirkansapa:

—Ñukami kani kankuna rimashkaykichishina.

71 Chashna Jesus willaptinkuna chay chatakuk runakunaka mana kreyish-pankuna willanakurkansapa:

—Mash uyariyichi. Ñami payka kikinna chatanakushka. Amana chikan chatakuk runata maskaypachinachu.

23

Jesusta chiknik runakuna pusharkansapa Pilatoman.

(Mt 27.1-2, 11-14; Mr 15.1-5; Jn 18.28-38)

1 Jesusta chiknik runakuna chay sinchi kamachikukpa wasinmanta lluk-shirkansapa. Paykunaka Jesusta pusharkansapa romano awtoridar Pilatoman. **2** Pilatopi chayachishpankuna Jesustaka chatakurkansapa:

—Kay runataka apishkanisapami judiyumasinikunata llullachishpa yachachikuykaptin. Yachachikushka awtoridarkunata ama kasunankunapa. Chaymanta payka tukuy runakunata yachachin romano ashwan sinchi awtoridarninchita kullkitaa ama pagaranankunapa. Chaymanta riman sielumanta salvakuk sinchi kamachikuk kananta.

3 Chashna chatakuptinkunana Pilatoka Jesusta tapurkan:

—¿Deveraschu kanki tukuy judiyu runakunapa sinchi kamachikuknin runa?

Chashna Pilato tapuptin Jesuska aynirkan:

—Ariya ñukami kani.

4 Chaypina Pilatoka saserdotekekunapa kamachikukninkunata tukuy chay tantanakudu runakunata willarkansapa:

—Ñukaka kay runapi mana nima uchata tarinichu.

5 Chashna Pilato willaptinna chay chiknik runakunaka ashwan sinchita willarkansapa:

—Kay runaka tukuy judiyu runakunata llullachishpa yachachinsapa ama awtoridarkunata kasunaynikunapa. Galilea partipi kallarirkan llullachikuyta. Kunanka kay Judea partipipish sukaman llullachikuykan.

Pilatoka Jesusta kacharkan sinchi awtoridar Herodesman.

6 Sukaman Jesusta chatakuptinkuna Pilatoka tapurkansapa:

—¿Ariya payka Galileamanta runachu?

7 Chaypina Galileamanta runa kananta rimaptinkuna Pilatoka Jesusta pushachirkan Herodesman. Herodeska Galilea partipi ashwan sinchi awtoridarninkuna karkan. Payka Jerusalenpi fiestakuykarkan. **8** Unaytana Herodeska Jesusta riksinyayarkan aya runakuna parlachiptinkuna yachachikuykananta. Chayrayku Jesusta chayachiptinkuna Herodeska sukaman kushikurkan. Sukaman kawanayayarkan suk almirana ruranata ruraptin. **9** Chaypina Herodeska Jesusta tukuy layata tapurkan. Tapuptinpish Jesuska mana nimata aynirkanchu.

10 Saserdotekekunapa kamachikukninkuna Moisespa killkadunta yachachikkunawan Herodespi Jesusta sukaman chatakurkansapa.

11 Jesus mana nimata ayniptin Herodeska tukuy soldadunkunawan sukaman asichirkansapa. Ashwanta asichinankunapa kamachikukpa alli llachapanta mudachirkansapa. Chaymanta Herodeska Jesustaka kashkan pushachirkan Pilatoman.

12 Herodeska Pilatowan chikninakushpa kawsaksapa. Paykunaka chay diyamantapachana kuyanakurkansapa.

Chiknik runakuna sinchita rimashpa Pilatota willarkansapa Jesusta wañuchichinarpa.

(Mt 27.15-26; Mr 15.6-15; Jn 18.39-19.16)

13 Jesusta kashkan chayachiptinkuna Pilatoka saserdotekunapa kamachikukninkunata chay llaktapi ansianukunata tantanachirkansapa.

14 Paykunata willarkansapa:

—Kankunaka kay runata pushamushkankichi ñukapi chataku. Willawashkankichi payka tukuy runakunata llullachishpa yachachikuykananama awtoridarkunata kasunankunapa. Ñuka allita yachanaynipa ñawpaknikichipi paytaka sukaman tapushkani. Manami nima mana alli rurashkanta tarinichu kankuna willawashkaykichishina. **15** Chay awtoridar Herodespish ñukaman kashkan kachamushpa rimashka mana nima mana alli ruranata rurashkanta. Mash allita uyariwaychi. Kay runaka mana nimata rurashkachu ñuka wañuchichinaynipaka. **16** Chayrayku soldaduynikunata willasha makanankunapa. Chay washa kacharichisha.

17 Pilatoka amañak tukuy wata Paskua fiesta ukun karselmanta suk runata kacharichiyta. Chayrayku munarkan Jesusta kachariyta.

18 Jesusta kacharinanpa willaptinkuna chay runakunaka tantalla sinchita rimakushpa willarkansapa:

—¡Manami nima layapi munanisapachu Jesusta kacharinaykipa! ¡Wañuchi! Munanisapa Barrabasta kacharichinaykipa.

19 Chay tiempi Barrabaska karselpi karkan awtoridarkunata mana nima kasunayashkanrayku. Chaymanta suk runata wañuchishkanrayku karselpi wichkadu karkan.

20 Chaypina Pilatoka sukaman Jesusta kacharinayashpa kashkan willarkansapa kacharichinanpa.

21 Chashna Pilato willaptinkuna chay chataku runakunaka ashwan sinchita rimakushpa willarkansapa:

—¡Kruspi chakatachiy! ¡Kruspi chakatachiy!

22 Paykuna sukaman amichiptinkuna kimsaynin kuti Pilatoka kashkan chay runakunata willarkansapa:

—¿Ariya ima mana alitit rurashka? Ñukaka paypi mana nima uchanta tarinichu wañuchichinaynipa. Chayraykumi mana wañuchichinayanichu. Makachishpalla kacharichisha.

23 Chashna Pilato rimaptin chay runakunaka ashwan sinchita rimakushpa willarkansapa:

—¡Kruspi chakatachiy! ¡Kruspi chakatachiy!

Chashna sinchita rimakushpa amichiptinkuna Pilatoka willashkankunata almitirkansapa. **24** Chaypina soldadunkunata willarkansapa Barrabasta kacharinankunapa Jesusta wañuchinankunapa. **25** Barrabaska mana kasukuk wañuchikuk runa kaykaptin Pilatoka karselmanta kacharichirkan. Chay chiknik runakunata willarkansapa Jesusta munashkankuna layata ruranankunapa.

Jesusta kruspi chakatarkansapa.

(Mt 27.32-44; Mr 15.21-32; Jn 19.17-27)

26 Pilato chayta willaptinkunana soldadukunaka Jesusta pusharkansapa suk kruspi chakatak. Soldadukunaka Jesusta pushaykashpangkuna suk runa Simonta apirkansapa Jesuspa washanta kruśninta aparinanpa. Chay Simonka Sirene llaktamanta karkan. Payka chakramantakutiykarkan.

²⁷ Jesusta kruspi chakatak pushaykaptinkuna aypa runakuna katirkansapa. Aypa warmikunapish sukaman llakishpa kaparikushpa wakakuypipatirkansapa. ²⁸ Jesuska paykunata chapashpa willarkansapa:

—Jerusalemmanta warmikuna, ama ūukaraykuka wakakuychichu. Suk tiempukaman wawaykichiwan tantalla kankuna sukaman padesinaykichi tiyan. Chay padesinaykitchita yuyashpaykichi sukaman llakishpa wakakuichi. ²⁹ Chay tiempu wawayuk warmikuna rimankasapa: “Mana wawayuk mana ūuñuchikuk warmikuna kushikuychi. Allipaka kankuna mana wawayukchu kankichi.” ³⁰ Chay tiempupi tukuy runakuna wañunayashpankuna urkukunata willankasapa urmamushpa nitinankunapa. Lomakunata willankasapa pakanankunapa. ³¹ Ūuka mana uchayuk runa kayakashpa sukaman padesiptini kankunaka uchayuk Kashpaykichi ashwanta padesinaykichi tiyan.

³² Chaypina soldadukunaka Jesusta kruspi chakatak pushashpanguna ishkay suwa runakunatapish pusharkansapa chakatak. ³³ Suk lomapi chayashpanguna chay soldadukunaka Jesustaka kruspi chakatarkansapa. Chay ishkay suwa runakunatapish chakatarkansapa suktaka Jesuspa alli ladunpi suktaka lluki ladunpi. Chay lomapa shutin karkan Uma Poto.

³⁴ Soldadukuna kruspi chakataptinkunana Jesuska Tata Diosta willarkan:

—Tatayni, kay runakunata perdonaysapa. Paykunaka manami yachansapachu imatami ruraykansapa nishpa.

Chaypina chay soldadukunaka Jesuspa llachapankunata pukllashpa patumanakurkansapa.

³⁵ Jesus kruspi chakatadu kaptin aypa runakuna kawaykarkansapa. Aw toridarkunapish kawashpanguna asichishpanguna willarkansapa:

—Kay runaka aypa runakunata alliyachishkasapa. Deveras Tata Diospa aklladu sielumanta shamudu salvakuk kashpaka kikin salvanakushpa krusmanta urayamuchun.

³⁶ Soldadukunapish asichirkansapa. Paykunaka ladunchashpanguna ayak likidu vinuta upyachirkansapa. ³⁷ Chaypina soldadukunaka Jesusta asichishpanguna willarkansapa:

—Kanka deveras judiyu runakunapa ashwan sinchi kamachikuknin runa Kashpaykika kay krusmanta urayamuy.

³⁸ Jesuspa uman kuskapi suk killkadu rimarkan: “Kay runaka tukuy judiyu runakunapa sinchi kamachikuknin runami.”

³⁹ Chaypina chikan kruspi chakatadu suwa runaka Jesustaka piñayashpa willarkan:

—Kanka deveras sielumanta shamudu salvakuk runa Kashpaykika kay krusmanta urayay. Urayashpa ūukaykunatapish urayachiwaysapa.

⁴⁰ Chashna chay chakatadu suwa runa piñayaptin chikan kruspi chakatadumasinka willarkan:

—Kanpish payshina kruspi chakatadu kayakashpa ¿imapatí chashnaka willanki? ¿Manachu Tata Diostaka manchanki? ⁴¹ Ūukanchika uchanchiraykumi kay kruspika padesiykanchi. Mana allita rurashpa kawsaptinchikastiwaykanchisapa. Payka mana nima uchayuk kaykaptin chakatashtkasapa.

⁴² Chashna chay chakatadumasinta willashpana Jesusta willarkan:

—Jesus, tukuy runakunata kamachikuykashpaykina ūukatapish yuyaway.

⁴³ Chaypina Jesuska willarkan:

—Allita willayki. Kunanlla ūukawan tantalla sielupi kanki.

Jesus wañurkan.
(Mt 27.45-56; Mr 15.33-41; Jn 19.28-30)

⁴⁴ Jesus kruspi chakatadu kaptin rasllana chawpi diyamanta tuta likidu tukumurkan las treskaman. ⁴⁵ Intipish mana nima lusichikurkannachu. Chaypina Tata Diospa wasinpi chay arkanan rakta llachapa chawpinmanta llifikurkan.

⁴⁶ Sukaman tuta likidu tukuptinna Jesuska sinchita rimashpa Tata Diosta willarkan:

—¡Tatayni, chaskiwayna! ¡Ñami wañunina!
Chashna rimashpana Jesuska wañurkan.

⁴⁷ Jesus wañuptinna romano soldadukunapa kapitanninkuna Tata Diosta alabashpa rimarkan:

—Deverasmi kay runaka mana uchayuk kashka.

⁴⁸ Chay aypa runakuna tukuy chay manchana layakunata kawash-pankuna sukaman manchakurkansapa. Paykuna sukaman llakishpa kaskunkunata waktypi wasinkunaman kutirkansapa.

⁴⁹ Chaymanta Jesusta riksikkuna Galileamanta katik warmikunapish karullamanta tukuy layata ruraptinkuna kawaykarkansapa.

Jesusta pamparkansapa.
(Mt 27.57-61; Mr 15.42-47; Jn 19.38-42)

⁵⁰⁻⁵¹ Chaypi tiyarkan Arimatea llakatamanta alli rurak runa Jose. Payka judiyukunapa sinchi kamachikuk runa karkan. Suk diya sinchi kamachikukmasinkuna Jesusta wañuchinankunapa rimaptinkuna Joseka mana munarkanchu. Sukaman shuyaykarkan sinchi kamachikukta Tata Dios kachamunanta. ⁵² Chay Joseka Pilatota rirkan Jesuspa kuerpunta mañak pampak rinanpa. ⁵³ Kuerpunta mañak riptyin Pilatoka almitirkan pushananpa. Chaypina Joseka krusmanta Jesuspa kuerpunta urayachimurkan. Suk allima yurak likidu sabanaswan wankurkan. Allita wankushpana pusharkan suk rumi aspidu machaypi churak. Chaypi manara niman suk wañituduta churarkansaparachu.

⁵⁴ Jesus wañushkan diya tukuy runakuna prontanakyukarkansapa chay samana diya atun fiestata ruranankunapa. Samanankuna diya ñami kallariykarkanna. ⁵⁵ Galileamanta Jesusta katik warmikunaka allita kawarkansapa maypimi Jesusta churarkansapa nishpa. ⁵⁶ Chay machayta allita kawashpankuna chay warmikunaka wasinkunaman kutirkansapa. Chaypina mishkilla asnak wirakunata rurarkansapa. Chaymanta Tata Diospa kamachikunanta kasushpankuna chay samanankuna diya samarkansapa.

24

Jesuspa kuerpunta tupapuk rishpankuna warmikuna mana tarirkansapachu.

(Mt 28.1-10; Mr 16.1-8; Jn 20.1-10)

¹ Chay samanankuna diya kayantin tutapachalla chay warmikuna rirkansapa Jesuspa kuerpunta tupapuk. Chay mishkilla asnak rurashkankuna wirata apashpankuna rirkansapa. ² Pampashkankuna machaypi chayashpankuna paykunaka kawarkansapa ashuchidutana chay machay wichkanan atun rumita. ³ Chay machaypi yaykushpankuna Jesuspa kuerpunta mana tarirkansapachu. ⁴ Chaypina sukaman manchakushpankuna mana yacharkansapachu imatami rurankasapa nishpa. Chaypina rasllana ladunkunapi ishkay shayaridu runakunata

kawarkansapa. Paykunaka yurak llipyak likidu llachapayukkuna karkansapa. ⁵ Paykunata kawashpangkuna chay warmikunaka ashwanta manchakushpangkuna kumurayarkansapa. Chaypina chay ishkay runakunaka paykunataka willarkansapa:

—¿Imapati wañudukuna churana machaypi kawsak runata maskaykankichi? ⁶ Jesuska mananami kaypinachu. ¡Ñami kawsamushkana! Galilea partipi yachachishushkaykichita allita yuyaychi. ⁷ Payka willashushkankichi sielumanta shamudu runa kashpa uchasapa runakunapi kukudu kananta. Chaymanta willashushkankichi kruspi wañuchinankunata chaymanta kimsa diya ukun kawsamunanta.

⁸ Chashna chay ishkay angelkuna willaptinkuna chay warmikunaka yuymurkansapa Jesus willashkankunata. ⁹ Chaypina chay machaymanta kutirkansapa. Rirkansapa willak Jesuspa chunka suk disipulunkunata tukuy kawashkankunata. Tukuy purikmasinkunatapish rirkansapa willak.

¹⁰ Chay warmikuna karkansapa Mariya Magdalena, Juana, Santiagopa maman Mariya. Chaymanta suk warmikunapish paykunawan tantalla karkansapa.

¹¹ Chay warmikuna suaman manchakushpangkuna willak riptyinkuna Jesuspa disipulunkunata mana kreyirkansapachu. Rimarkansapa dementa kashpangkuna shamunsapa llullachikuk.

¹² Pedruka mana kreyishpapish kallparkan chay machayta kawak. Chaypi chayashpa kumurayashpa machay úkuta chunllata kawarkan. Jesusta wankushkankuna sabanasllatana chaypi kawarkan. Chaypina suaman almirashpa wasiman kutirkan.

Jesus kawsamushkanwasha ishkay purikmasinkuna payta kawarkansapa.
(Mr 16.12-13)

¹³ Chay diyalla Emaus llaktaman Jesuspa ishkay purikmasinkuna ryikarkansapa. Suk karkan Kleofas. Chay Emaus llaktaka Jerusalenmanta chunka suk kilometrulla karkan. ¹⁴ Chay ishkay runakuna ryikashpangkuna Jesus wañushkanta parlaykarkansapa. ¹⁵ Chashna parlaykaptinkuna kikin Jesus ladunchashpa paykunawan tantalla purirkana. ¹⁶ Paykunawan tantalla puriptinpish mana atiparkansapachu rixsiya Jesus kananta. ¹⁷ Chay ishkay runakuna llakishpa parlaypi ryikaptinkuna Jesuska tapurkansapa:

—¿Imatati parlaypi ryikankichi?

¹⁸ Chashna Jesus tapuptinkuna Kleofaska willarkan:

—Jerusalen llaktapi suaman manchakuna layata kawashkanisapa. Kanka Jerusalenmanta shamuykashpayki ¡manachu yachanki?

¹⁹ Chashna willaptin Jesuska tapurkansapa:

—¿Ima manchakuna layatati kawashkankichi?

Chashna Jesus tapuptinkuna willarkansapa:

—Chay Nasaret llaktamanta Jesus alli yachachikuk tukuy ruray atipak runa kashka Tata Dios yanapaptin. Payka aypa almirana ruranata ruraptin tukuy runakuna kawashkasapa. ²⁰ Chaypina saserdoteku-napa kamachikukninkuna, chay llaktanchikunapi kamachikukkuna payta kukushkasapa romano awtoridarkunapi. Paykuna suuk kruspi chakatashpwa wañuchishkasapa. ²¹ Ñukaykuna yuyarkanisapa payna romano awtoridarkunamanta salvawanankunata. Ñami kimsa diyana wañuchishkankunaka. Chayrayku suaman llakinisapa.

²² Chaymanta Jesusta katikmasini warmikuna manchakuna layata willawashkasapa. Kunan tutapacha paykunaka Jesus pampashkankuna

machayta rishkasapa kawak. ²³ Chaypina Jesuspa kuerpunta mana tarishkasapachu. Paykuna wasinikunaman kutishpankuna willawashkasapa paykunapi angelkuna rikurishkankunata. Chay angelkuna willashkasapa Jesus kawsananta. ²⁴ Chayta uyarishpa suk purikmasinkunapish rishkasapa Jesusta churashkankuna machayta kawak. Paykunapish chay warmikuna willawashkankunatashina chunllata tarishkasapa. Jesusta mana ni maypi kawashkasapachu.

²⁵ Chashna chay runakuna willaptinkunana Jesuska willarkansapa:

—Kankunaka sukaman mana entiendik runakunami kankichi. Tukuy ñawpa yachachikukkunapa killkadunkunata manami kreyishkankichichu. ²⁶ Tata Diospa killkadunpi riman salvakuk runa manarapish tukuy layapi kamachikushpa sukaman padesinanta. Kankunaka ¿manachu chayta yachashkankichi?

²⁷ Chashna rimashpa Jesuska paykunata yachachirkansapa. Entien-dichirkansapa ñawpa Moïsespa chaymanta ñawpa yachachikukkunapa killkadunkunapi paypa rimashkanta. ²⁸ Chashna yachachiypi chayarkansapa chay runakunapa llaktankunapi. Chaypina Jesuska willarkansapa sakinankunata. ²⁹ Mana sakinankunata munashpankuna chay runakunaka willarkansapa:

—Ñami amusayanna. Ama sakiwaysapachu. Kunan tuta kaypi ñukaykunawan kipariy.

Chashna willaptinkuna Jesuska chay runakunapa wasinkunapi yaukurkan. ³⁰ Paykunaka konvidarkansapa mikuk. Mesapi churaduta mikunankunapa tiyaridu kashpankuna Jesuska suk panta apishpa Tatan Diosta agradesirkan. Chaymanta chay panta pakishpa chay ishkay runakunataka kararksansapa. ³¹ Paykunaka panta chaskishpankuna chayrak riksirkansapa Jesus kananta. Chashna ora Jesuska ladunkunamanta chinkarkan. ³² Manana Jesusta kawashpana chay runakunaka willanakurkansapa:

—Mash allita yuyaypa. Chay ñanpi Jesus Tata Diospa rimananta entien-dichiwaykaptinchu sukaman kushikushpa uyarishkanchi.

³³ Chashna willanakushpankuna kushikuyupuru utkalla Jerusalenman kutirkansapa. Chaypi tarirkansapa tantanakudu Jesuspa chunka suk disipulunkunata. Aypa purikmasinkunatapish chaypi tantanakudukunata tarirkansapa. ³⁴ Manara nimata willaptinkunara Jesuspa disipulunkunaka paykunata willarkansapa:

—Deverasmi maestrunchikunaka kawsamushka. Simonka ñami kawashkana.

³⁵ Chaypina chay ishkay runakunaka ñanpi tarinakushkankunata willarkansapa:

—Ñukaykunapish ñami kawashkanisapana. Chay ñanpi puriykaptinikuna maestrunchikuna ladunchawashkasapa. Mana riksiptinikuna ñukaykunawan purirkan Tata Diospa rimananta allita entiendichiwashpankuna. Chaymanta wasinikunapi panta pakishpa karawaptinkunara riksishkanisapa Jesus kananta.

Jesus kawsamushkanwasha disipulunkunawan parlarkan.

(Mt 28.16-20; Mr 16.14-18; Jn 20.19-23)

³⁶ Chashna chay ishkay runakuna willaykaptinkunallara Jesuska chaw-pinkunapi rikurikan. Rimachishpa willarkansapa:

—Amana llakiychinachu.

³⁷ Chashna rimachiptinkuna disipulunkunaka sukaman manchakurkansapa aya nishpa. ³⁸ Chaypina Jesuska willarkansapa:

—¿Imapatí manchawankichi? ¿Imapatí mana riksiwankichi? ³⁹ ¡Mash makinita chakinata kawaychi! ¡Nukami kani! Llankawaychi allita riksiwanaykichipa. Aya kaptinika manami llankawankichimanchu.

⁴⁰ Chashna Jesus disipulunkunata willashpa kawachirkansapa makinta chakinta. ⁴¹ Paykunaka manchakushppankuna kushikuyuninkunawan manara allitarachu riksirkansapa Jesus kananta. Chaypina Jesuska tapurkansapa:

—¿Tiyanchu mikunaykichika?

⁴² Chashna tapuptinkuna kurkansapa challwa kusaduta. ⁴³ Jesus chayta chaskishpa disipulunkuna kawaptinkuna mikurkan. ⁴⁴ Chay challwata mikushkanwasha willarkansapa:

—Manarapish wañushpaynira aypa kuti yachachishkaykichi Tata Diospa rimananpi rimashkanshina wañunaynita. Ñawpa Moisespa killkadunka chaymanta ñawpa alli yachachikuk runakunapa killkadunkunaka Salmo librupish yachachishunkichi ñuka wañunaynita. Chaymanta yachachishunkichi wañushkaynimanta kashkan kawsamunaynita. Chay killkadukunapi rimashkanshina wañushkaynimanta kawsamushkanina.

⁴⁵ Chashna Jesus willashpankuna disipulunkunataka ashwanta yachachirkansapa Tata Diospa killkadu rimananta. ⁴⁶ Willarkansapa:

—Ñawpa yachachikuk runakunaka yachachikurkansapa ñuka sielumanta shamudu salvakuk runa wañunaynita. Chaymanta yachachikurkansapa wañushpayni kimsa diya ukun kawsamunaynita.

⁴⁷ Kunanmantapacha ñukata kasuwashppaykichi kay Jerusalen llaktamanta tukuy llaktakunaman ñukapa shutinipi rinaykichi tiyan yachachikuk. Rillaychi tukuy runakunata yachachik uchankunata wanashpa ñukata kreyiwashpa kawsanankunapa. Chashna kreyiwaptinkuna Tata Dioska tukuy uchankunamanta perdonankasapa. ⁴⁸ Kunkunaka tukuy rurashkaynita kawashkankichi tukuy yachachikushkaynita uyarishkankichi. Chayrayku rillaychi tukuy runakunata parlachik. ⁴⁹ Tata Dioska ñawpa killkadunpi rimashka Espiritunta kachamunanta. Ñuka Tata Diospa Espiritunta kankunaman kachamusha allita atipanaykichipa yachachikuya. Chayrayku Jerusalenllapi kipariyichi sielumanta ñuka Tata Diospa Espiritunta kachamunaynikaman.

Disipulunkunata yachachishkankunawasha Jesus rirkan Tatan Dioswan sielupi kawsak.

(Mr 16.19-20)

⁵⁰ Chaymanta Jesuska disipulunkunataka Jerusalen llaktamanta pusharkansapa Betania llaktaman. Chaypina Jesuska makinta alsashpa Tata Diosta roygarkan tukuy disipulunkunata yanapanankunapa.

⁵¹ Chashna roygaykaptin Tata Dioska Jesusta pusharkan sieluman.

⁵² Paykunamanta ashuykaptin disipulunkunaka sukaman Jesusta kuyarkansapa. Chaymanta sukaman kushikushppankuna Jerusalen llaktaman kutirkansapa. ⁵³ Chaypina tukuy diya Tata Diospa wasinpi payta sukaman alabarkansapa.

JESUKRISTU YACHACHIKUSHKANTA SAN JUAN KILLKARKAN

Juan kay libruta killkarkan yachachikunana pimi Jesukristu nishpa.

¹ Kallarinanpi manara nima laya tiyaptinra Jesukristu Tata Dioswan tantalla kawsarkan. Payka Tata Dioswan suklalla karkan. Payka rimashpa Tata Diospa yuyayninta yachachikurkan. ² Manara nima laya tiyaptinra Jesukristuka Tata Dioswan tantalla kawsaykarkan. ³ Tata Dios kamachiptin payka tukuy laya tiyakta rurarkan. Jesukristu mana rurashka kaptinka mana nima laya tiyanmanchu. ⁴ Payllami tukuy runakunata kawsachiwashkanchisapa. Iden suk kawachiwakinchi lusshina kay allpaman shamurkan Tata Diospa yuyayninta tukuy runakunata yachachikananchikunapa.

⁵ Jesukristu lusshina kashpa Tata Diospa yuyayninta yachachiwanchisapa. Mana nima laya tuta atipanchu lusta wañuchiyya. Manami ni pi nima layapi atipansapachu paypa yachachikunanta chinkachiyya.

⁶⁻⁷ Tata Dioska suk runa Juanta kachamurkan runakunata yachachinankunapa Jesukristu chay lus kananta. Juanka runakunata yachachirkansapa kreyinankunapa Jesukristu lus kananta. ⁸ Juanka manami luschu karkan. Paytaka Tata Dios kachamurkan yachachikunana Jesukristu lus kananta.

⁹ Jesukristu deveras lus kashpa kay allpaman shamurkan tukuy runakunata yachachinankunapa Tata Dios sukmán allima sukmán kuyakuk kananta. ¹⁰ Jesukristu Tata Diospa yuyayninta yachachikuk kayakashpa kay allpaman shamurkan. Tata Dios paywan tukuy layata rurarkan. Chashna rurashka kashpapish kay allpaman shamuptin runakuna mana riksirkansapachu.

¹¹ Jesukristu tukuy runakunata rurawashkanchikunaryku payllapami kanchisapa. Chashna rurawashkanchikuna kaptinpish aypa runakuna payta mana chaskirkansapachu. ¹² Chaymanta ñukanchikuna Jesukristuka tukuy shunku kreyishpa payta chaskiptinchikuna Tata Dios atipachiwanchisapa wambrankuna kananchikunapa. ¹³ Mana tatanchi mamanchikunamanta nasishkanchikunarykuchu nima paykunapa munashkankunarykuchu Tata Diospa wambrankuna kanchisapa. Kikin Tata Dios munashkanrayku paypa wambrankuna kanchisapa.

¹⁴ Tata Diospa yuyayninta yachachikuk Jesukristuka kay allpaman shamurkan runa kananpa. Payka ñukaykunawan tantalla kawsashpa allillata rurashpa tukuy pita kuyashpa kawsarkan. Ñukaykuna payta kawarkanisapa Tata Diospa chaylla wambran kashpa Tatan Diesshina sukmán allima kaptin.

¹⁵ Juanka aypa runakunata Jesuspa rimashpa willarkansapa: “Ñuka yachachishkaykichi suk runa shamunanta yachachishuknikichi. Manara ñuka tiyaptinira payka tiyarkanlla. Chayrayku payka ñukamanta ashwan alli yachakmí.”

¹⁶ Jesukristu sukmán alli yachak kashpa tukuy runakunata sukmán allita kuti kuti yanapawanchisapa.

¹⁷ Tata Dioska Moisesta willarkan kamachikunankunata killkananpa. Chaymanta Jesukristuta kachamurkan kuyawashpanchikuna paypa ri-mananta yachachiwananchikunapa. ¹⁸ Mana ni pi niman suk kuti Tata Diosta kawarkanchu. Jesukristu Táta Diospa chayllá wambran kashpa pay-wan suklalla kashpa paywan sukaman kuyanakushpa kawsan. Chayrayku paylla Tata Diosta allita riksichiwanchisapa.

Juan Bawtista yachachikurkan Tata Dios kachamushkan runa shamunanta.

(Mt 3.11-12; Mr 1.7-8; Lk 3.15-17)

¹⁹ Jordan yakupi Juan aypa runakunata bawtisaykarkansapa. Chaypina Jerusalen llaktapi judiyu awtoridarkuna yachanayarkansapa pimi chay Juanka nishpa. Chayrayku saserdote kunata yanapakninkunata kacharkansapa tapunankunapa pimi payka nishpa.

²⁰ Paykuna tapuptinkuna Juanka allita willarkansapa:

—Ñukaka manami chay shuyaykanaykichi Tata Diosmanta shamudu runachu kani.

²¹ Chashna willaptinkuna chay saserdote kunaka tapurkansapa:

—¿Pití kanki? Ariya ñawpa yachachikuk Eliyaschu kanki?

Chaypina Juanka aynirkansapa:

—Manami Eliyaschu kani.

Kashkan tapurkansapa:

—Ñawpa yachachikuk Moises rimarkan payshina alli yachachikuk runa shamunanta. ¿Ariya kanpachu rimarkan? ¿Kanchu kanki?

Chashna tapuptinkuna Juanka aynirkansapa:

—Manami paychu kani.

²² Chaypina tapurkansapa:

—¿Pití kanki? Ñukaykuna kutishpaynikuna kachamuwak awtoridarkunata willanaynikuna tiyan pimi kanki nishpa. Willawayasapa pití kanki.

²³ Chashna tapuptinkuna Juanka willarkansapa:

—Ñawpa yachachikuk Isaiyas killkarkan: “Suk runa chunlla chakidu pam-papi sinchita rimashpa yachachikunka: ‘Sinchi kamachiwakninchipa ñanta kicharishpa kuskachaychi chayta purinanpa.’ ” Chay ñawpa yachachikuk Isaiyaska ñukapami rimarkan. Chayrayku ñukaka yachachikuykani Tata Diosmanta shamudu runata uyarinaykichiapa.

²⁴ Chashna Juan willaptinkuna chay fariseokuna kachashkan runakunaka tapurkansapa:

²⁵ —Mana Tata Diosmanta shamudu runa kashpaykika, nima Eliyas kash-paykika, nima chay alli yachachikuk shamuk runa kashpaykika ¿imapati runakunata bawtisaykankisapa?

²⁶ Chashna tapuptinkuna Juanka aynirkansapa:

—Ñukaka yakullapi bawtisaykankisapa. Chay runa kankunawan tantalla kaykaptinpish manara riksinkichiračhu Tata Diosmanta shamudu runa kananta. ²⁷ Washaynita chay ñukamanta ashwan rikchak laya atipak runa shamun. Mana animukunichu ushutan waskanta paskapuya.

²⁸ Chashna Juan willaptinkuna llaktankunaman chay tapuk runakunaka kutirkansapa. Jordan yaku mañanpi inti llukshimunan ladu Betania llaktapi tukuy chayta parlarkansapa. Chaypi Juanka aypa runakunata bawtisaykankansapa.

Juan yachachikurkan Jesus Tata Diosmanta shamudu runa kananta.

²⁹ Tukuy chayta parlashkankuna kayantin Juanka kawarkan Jesus payta ladunchaptin. Payta kawashpa Juanka chay runakunata willarkansapa:

—Mash kawaychi. Chay shamuykak runaka Tata Diosmanta shamudu runami. Payka tukuy runakunapa uchankunarayku oveja wawanshina wañunka Tata Dios perdonanankunapa. ³⁰ Kay runapami willashkaykichi washaynita chay ñukamanta ashwan rikchak laya atipak runa shamunanta. Manara ñuka tiyaptinira payka tiyarkanlla. Chayrayku payka ñukamanta ashwan yachaysapa runami. ³¹ Chashna rimashpaynipish manara yachashkanirachu pimi karkan nishpa. Ñukaka shamushkani kankuna israelmasinikunata yakupi bawtisaknikichi yachanaykichipa pimi Tata Diosmanta shamudu runa nishpa.

³² Chaymanta Juanka willarkansapa:

—Jesusta bawtisaykashpayni kawashkani Tata Diospa Espiritunta iden urpaytashina sielumanta urayamuptin paypi tiyarik. ³³ Ñukaka manara yachashkanirachu pimi Tata Diosmanta shamudu runa nishpa. Chayrayku Tata Dios kachamuwarkan yakupi runakunata bawtisanaynipasapa. Chashna kachamuwashpa Tata Dios willawashka: “Espirituunita suk runapi tiyarik urayamuptin kawashpayki yachanki ñukamanta shamudu runa kananta. Payka Espirituyniwan aypa runakunata bawtisanka.” ³⁴ Chaymanta ñuka tukuy Tata Dios willawashkanta allita kawashkani. Chayrayku yachachiykaykichi Jesus Tata Diospa wambran kananta.

Andres wawkinta maskarkan Jesusta riksinanpa.

³⁵ Chaymanta kayantin tardita Jordan yaku mañanpi Juanka ishkay disipulunkunawan puriykarkansapa. Ñukawan Andres Juanpa disipulunkuna karkanisapa. ³⁶ Jesus riptyin kawashpa Juanka ñukaykunata willawarkansapa:

—Mash kawaychi. Chay riyak runaka Tata Diosmanta shamudu runami. Paymi uchanchikunaryku oveja wawanshina wañunka.

³⁷ Chashna Juan willawaptinkuna ñukaykunaka Jesusta katirkanisapa.

³⁸ Chaypina Jesuska kawawashpankuna tapuwarkansapa:

—¿Imatati munankichi?

Willarkanisapa:

—Maestru, willawaysapa ¿maypiti kawsanki?

³⁹ Chashna tapuptinkunka Jesuska willawarkansapa:

—Mash shamuychi kawak.

Chashna willawaptinkunka rirkanisapa kawsaykananta kawak. Tardina kaptin amusayanankaman chaypi paywan kiparirkanisapa. ⁴⁰ Ñukawan Andres Juanta uyarishkaynikunamantapacha Jesusta katirkanisapa. Andreska Simon Pedrupa wawkinmi karkan. ⁴¹ Chaypina Jesuswan parlashkanwasha Andreska kuskalla rirkana wawkin Simonta maskak. Tarishpana willarkan:

—Ñami tarishkanisapano shuyaykananchi Tata Diosmanta shamudu runata.

⁴² Chashna Andres willashpa Jesusman wawkin Simontaka pusharkan. Ladunchaptinkunka Jesuska Simonta willarkan:

—Kanka Jonaspa wambran Simonmi kanki. Kunanmantapacha Sefas shutinami kanki.

Chay Sefas shuti riman Pedru.

Jesus Felipita Natanaelta kayarkansapa.

43-44 Chayta parlashkankunawasha kayantin diya Galilea partiman Jesuska yuyarkan riyta. Chaypina ñukaykunawan Jesus riykashpa suk runawan tinkunakurkan. Chay runa Felipi Betsaida llaktamanta karkan. Chay llaktallamanta Andreswan Pedrupish karkansapa. Chaypina Jesuska Felipita willarkan:

—Shamuy ñukawan.

Chashna willaptin Felipika Jesusta katirkan. **45** Chaypina Felipika rirkana Natanaelta maskak. Tarishpana willarkan:

—Ñami tarishkanisapana Moisespa killkadunpi rimashkan runata. Tarishkanisapana ñawpa tiempu yachachikuk runakuna rimashkankuna runata. Payka Josepa wambran Nasaret llaktamanta Jesusmi.

46 Chashna Felipi willaptin Natanaelka mana kreyishpa willarkan:

—Nasaret llaktamanta ¿jima alli rurak runati shamenman?

Chaypina Felipika willarkan:

—Mash shamuy riksik. Kikiki riksishpa yachanki Moises rimashkan runa kananta.

47 Chashna willaptin Jesusman rirkansapa. Chayaykaptinkuna Jesuska Natanaelta kawashpa rimarkan:

—Chay runaka alli rurak israel runami. Payka mana nima llullakuya yachanchu.

48 Chaypina Natanaelka Jesusta tapurkan:

—¿Imashnatí allita riksiwashkanki?

Jesuska aynirkan:

—Manarapish Felipi parlachishuptikira igo kaspi sakinpi kaptiki riksikayki.

49 Chashna Jesus willaptinna Natanaelka willarkan:

—Maestru, deverasmi Tata Diospa wambran kanki. Israel runakunapa sinchi kamachiwakninizkunami kanki.

50 Chaypina Jesuska willarkan:

—Igo kaspi sakinpi kanta riksishkaynita willaptini kreyiwashkanki. Mash uyariway. Ashwan alli almirana layakunata kawanayki tiyan.

51 Chaymanta Jesuska tukuyta willawarkansapa:

—Mash allita uyariwaychi. Kankuna sieluta kawankichi kicharinakuptin.

Ñuka sielumanta shamudu runa kaptini Tata Diospa angelninkunata kawan-kichi ñukamanita llukaptinkuna ñukaman urayamuptinkuna.

2

Jesus suksufensiaman rirkana

1 Chaymanta kimsa diya washan Galilea partipi Kana llaktapi suk funsia tiyarkan. Chay funsiapi Jesuspa maman karkan. **2** Ñukaykuna Jesuspa disipulunkuna paywan tantalla invitadu kashpaynikuna rirkansapa. **3** Chay funsiapi aypa runakuna kaptin vinu pishirkan. Chayrayku mamanka Jesustaka willarkan:

—Vinuka ñami tukushkana.

4 Chaypina Jesuska willarkan:

—Mamayni ¿imapati ñukata willawanki? Tatayni Dioska manarami willawashkarachu riksichinakunaynipa.

5 Chashna Jesus willaptinpish mamanka mikuna sirvikuk runakunata willarkansapa:

—Tukuy Jesus willashunaykichita ruraychi.

6 Chaypi tiyarkan sokta atun rumimanta ruradu puyñukuna yakuta churanankunapa. Chay yakuwan judiyu runakuna amañaksapa mayllakuya

chuya chuya Tata Diospi rikurinankunapa. Chay atun puyñukunapi chunka ashwan taksha puyñu yaku yayuk. ⁷ Chaypina Jesuska mikuna sirvikuk runakunata willarkansapa:

—Kay atun puyñukunata yakuwan untachiichi.

Chashna willaptinkuna shimi shimita untachirkansapa. ⁸ Chaypina Jesuska willarkansapa:

—Kunanka chay puyñukunamanta suk tipita wishishpa funsiapi kamachikukta mallichiychi.

Paykunaka Jesus willashkanshina aparkansapa. ⁹ Chayta kuptinkuna chay kamachikukka mallirkan mishkik likidu vinuta. Chay karkan yaku-manta ruradu vinu. Payka manara yacharkanrachu maymantami chay vinuta surkushkasapa nishpa. Funiapi mikuna sirvikuk runakunalla yacharkansapa. Chaypina funsiapi kamachikuk runaka noviota kayarkan.

¹⁰ Ladunchaptinna noviota willarkan:

—Kay vinuka sukaman mishkik likidumi. Chay tukudu vinumanta ashwan mishkikmi. Tukuy funsiata rurak runakuna kallarinsapa upyachikuya ashwan mishkik likidu vinuta. Chaymanta invitadukuna sak-saptinkunana mana mishkik vinuta upyachikunsapa. Kanka mana chash-nachu upyachikushkanki. Kay mishkik likidu vinutaka washanpina surku-mushkanki.

¹¹ Galilea partipi Kana llaktapi Jesuska chay milagruta rurarkan. Chayta rurashpa kawachikurkan alli yachak kananta. Chay milagruta ruraptin ñukaykunaka kreyirkanisapa Tata Diospa wambran kananta.

¹² Chay funsia washan Kapernaum llaktaman Jesuska mamanwan wawkinkunawan disipulunkunawan tantalla rirkana. Chaypi mana aypa diyatachu unayarkanisapa.

Tata Diospa wasin pampamanta Jesus rantikuykak runakunata karkunkansapa.

(Mt 21.12-13; Mr 11.15-18; Lk 19.45-46)

¹³ Tukuy wata ñukaykuna judiyukuna Paskua fiestata ruranisapa yuyashpa Tata Dios ñawpa awiluynikunata Egipomanta surkumushkankunata. Jesuska ñukaykunawan Jerusalenman rirkana chay fiestata pasanarpa. ¹⁴ Chaypi chayashpa Tata Diospa wasinman rirkana. Chay wasi pampapi tarirkana aypa runakunata torokunata ovejakunata urpaykunata rantikuykaptinkuna. Sukkuna tiyarishpankuna kullkita kambiaykarkansapa.

¹⁵ Tata Diospa wasinta merkadutashina kawashpa Jesuska piñakushpa suk waskata apishpa asoteta rurarkan. Chaywan tukuy chay rantikuykak runakunata karkunkansapa. Toronkunata ovejankunata karkupurkansapa. Kullki kambiaykak runakunapa kullkinkunata allpapi wishchupurkansapa. Mesankunatapish tikrachipurkansapa. ¹⁶ Urpaykuna rantikuk runakunata willarkansapa:

—Tukuya surkuychi. Ama Tataynipa wasinta merkadutashina ruray-chichu.

¹⁷ Ñukaykuna Jesus karkushkankunata kawashpa ñawpa tiempu Tata Diospa killkadu rimananta yuyarkanisapa. Chay killkadu riman: “A, Tata Dios, wasikita sukaman munashpayni sukaman llakishpa rabyashpa tur-bakuni mana kuydaptinkuna.”

¹⁸ Chashna Jesus karkuptinkuna chay kamachikuk judiyukuna willarkansapa:

—¿Pití willashushka chay rantikuk runakunata karkunaykipa? Suk milagruta ruraptikira kreyishkaykisapa Tata Diosmanta shamudu runa kanaykita.

19 Chaypina Jesuska willarkansapa:

—Almiranata ruranaynipa munashpaykichika kay Tata Diospa wasinta waktakuychi. Waktakuptikichi ūukami kimsa diya ukun kashkan rurasha.

20 Chashna Jesus rimaptinna paykunaka willarkansapa:

—Kay wasita chusku chunka sokta watata trabajashpa rurarkansapa. ¿Imashnatí kanka kimsa diya ukun atarichinkiman?

21 Jesuska Tata Diospa wasinta kashkan atarichinanpa rimashpa wañushkanmanta kimsa diya ukun kashkan kawsamunanta rimarkan.

22 Chaymanta Jesus wañushkanmanta kawsamushkanwasha ūukaykunaka yuyarkanisapa rimashkanta. Chayrak allita yacharkanisapa Jesus yachachikushkan alli kashkanta. Chaymanta yacharkanisapa ūawpa killkadu Tata Diospa rimanan alli kananta.

Jesus tukuy runakunapa yuyayninkunata allita riksirkana.

23 Jesus Jerusalenpi kashpa chay fiesta ukun aypa almirana milagruku-nata rurarkan. Tukuy chayta ruraptin aypa runakuna kreyirkansapa Jesus Tata Diosmanta shamudu runa kananta. **24** Chashna payta kreyiptinku-napish paykunapa yuyayninkunata allita riksishpa yacharkan mana al-lita kreyinankunata. **25** Mana ni pi willaptin payka tukuy runakunapa yuyayninkunata yacharkan. Chayrayku yacharkan chay runakuna mana allita kreyinankunata.

3

Jesus suk runa Nikodemota yachachirkan.

1 Jerusalen llaktapi tiyarkan suk runa Nikodemo. Payka judiyu awtoridar fariseo runa karkan. **2** Suk tuta Nikodemoka Jesusta rirkana tarik. Chaypina willarkan:

—Maestru, yachanisapa Tata Dios kanta kachamushushkanta ūukaykunata yachachiwanaykipasapa. Mana Tata Dios kachamushushka kaptinka mana atipankimanchu nima milagrukunata ruraya.

3 Chashna Nikodemo willaptinna Jesuska willarkan:

—Mash allita uyariway. Suk runa mana kashkan nasishpaka manami atipanchu Tata Diospa mandunpi kawsaya.

4 Chaypina Nikodemoka sukaman almirashpa Jesustaka willarkan:

—¿Imashnatí atun runa atipanman kashkan nasiyta? Manami ni pi atipan-manchu mamaarpa wiksanpi yaykuya kashkan nasinanpa.

5 Chashna willaptinna Jesuska willarkan:

—Allita willayki: Suk runa yakumanta Tata Diospa Espiritunmanta mana nasishpaka manami Tata Diospa mandunpi kawsankachu. **6** Tukuy runakuna tatanmanta mamanmanta nasishpa paykuna layallami kawsansapa. Tata Diospa Espiritunmanta nasishpankunara atipansapa mushuk layata kawsaya Tata Diospa munananta rurashpa.

7 Ama almiraychu kashkan nasiyaykichipa willaptini. **8** Wayra maymantapish kaptin shamun. Ruyduwan shamuptin uyarishpanchi mana yachanchichu maymantami shamun nishpa. Mana yachanchichu maypimi rinka sinchikuk nishpa. Chashnallami Tata Diospa Espiritunmanta nasish-payki mana payta kawashpaykipish yachanki yanapashunaykita.

9 Chashna Jesus willaptinna Nikodemoka kashkan tapurkan:

—¿Imashnatí Tata Diospa Espiritunmanta nasiyman?

10 Chaypina Jesuska willarkan:

—Israel runakunapa alli yachachikunkinkuna kaykashpayki ¿manachu yachanki? **11** Mash allita uyariway. ūukaykuna yachanaynikunata

kawashkaynikunata yachachiykichi. Chashna yachachiptinikunapish mana kreyiwankichichu. ¹² Kay allpallapi wayrata yakuta nasinata mana kreyiwashpaykichika ¿imashnatí kreyiwankichiman sielupi kawsanaykichita yachachiptini? ¹³ Mana ni pi sielman rishpa kashkan shamurkanchu yachachikuk ima layami sieluка nishpa. Ñukallami sielumanta shamushkani yachachiknikichi.

¹⁴ Ñawpa tiempu chunlla chakidu pampapi Moises fierrumanta ruradu machakuyta suk kaspi su timbishpa atarichirkan. Nuka sielumanta shamudu runa kaptini chay machakuytashina ñukatapish suk kaspi chakatawashpa atarichiwankasapa. ¹⁵ Chashna atarichiwaptinkuna tukuy ñukata kreyiwak runakuna sielman rinkasapa Tata Dioswan mana tukuy niyukta kawsak.

Chashna Jesuska Nikodemowan parlarkan.

Tata Dios tukuy runakunata sukanan kuyawanchisapa.

¹⁶ Tata Dioska tukuy runakunata sukanan kuyawashpanchikuna kay allpaman chaylla wambranta kachamurkan uchanchikunaryku wañunana. Chashna wañushpa tukuy payta kreyik runakunata wañunanchikunamanta salvawanchisapa Tata Dioswan mana tukuy niyukta kawsananchikunapa. ¹⁷ Uchasapa kaptinchikuna Tata Dios kastigawananchikuna tiyan. Payka chaylla wambranta kay allpaman kachamurkan chay kastigunchikunamanta salvawananchikunapa. Mana paytaka kachamurkanchu kastigawananchikunapa.

¹⁸ Tata Diospa chaylla wambranta kreyishpa kawsaptinchikuna mana kastigawashchisapanachu. Mana payta kreyishpa kawsak runakunata Tata Dios kastigankasapa. ¹⁹ Tata Dios tukuy paykunata kastigankuna tiyan mana allikunata rurashpalla kawsaptinkuna. Jesukristu kay allpaman shamurkan Tata Diospa yuyayninta yachachiwananchikunapa. Chashna yachachikuk shamushpa lusshina karkan. Mana Jesukristu kreyik runakuna uchankunata mana sakinayashpankuna mana munarkansapachu luspishina kawsayta. Munarkansapa tutapi shina kawsayllata.

²⁰ Mana alli rurak runakuna mana munansapachu uchankunata riksiyta. Mana uchankunata sakinayashpankuna mana munansapachu luspishina kawsayta ama Jesukristu uchankunata kawachinankunapa. ²¹ Ñukanchikuna Tata Diospa rimananta kasushpa kawsashpanchikuna luspishina kawsanachisapa tukuy runakuna yachanankunapa Tata Diospa munananta runananchikunata.

Juan Bawtista yachachikuyllapi katirkana.

²² Chaymanta yachachikushkanwasha Jesuska Judea partiman ñukaykunawan tantalla rirkana. Chaypi suk tiempullata kiparishpaynikuna aypa runakunata bawtisarkanisapa. ²³ Chay yaku anakninpí Enon llaktapi Juan Bawtistapish aypa runakunata bawtisarkan. Chay llaktapi aypa yaku tiyarkan. Enon llaktaka Salim llakta ladunpi karkan. Juan chay llaktapi kaptin aypa runakuna rirkansapa bawtisakuk. ²⁴ Manara karselpi churadu kashpa Juanka runakunata bawtisaykarkansapa.

²⁵ Chaypina Juanpa disipulunkuna suk judiyumasinkunawan ayninakurkansapa imashnami Tata Diospi chuya chuya rikurinkasapa nishpa. ²⁶ Ayninakushkankunawashana disipulunkunaka rirkansapa Juanta willak:

—Maestru, Jordan yaku chimbapi suk runata bawtisashkanki. Chay runapa yachachiwashkankisapa Tata Diosmanta shamudu runa kananta.

Kunanka chay runaka aypa runakunata bawtisaykansapa. Tukuy runakuna paytana katiykansapa.

²⁷ Chashna disipulkunka willaptinkuna Juanka willarkansapa:

—Tata Dios mana chay runata yanapaptinka manami nimata atipan-manchu ruraya. ²⁸ Allitana willashkaykichi mana ūuka Tata Diosmanta shamudu salvashuknikichi runa kanaynita. Tata Dios kachamuwaptin ūuka paymanta ūawpamushkani runakunata yachachik pay shamunanta.

²⁹ Mash uyariwaychi kay ejempluta parlachikuptini. Suk funsiapi kasarakuk runa novianta kawashpa suaman kushikun. Chaypiña kasarakuk runa kushikushpa rimakuptin kuyanakukmasinpish suaman kushikun. ūukaka iden chay noviopa kuyanakukmasinshinami kani. Chayrayku aypa runakuna Jesusta katiptinkuna suaman kushikuni. ³⁰ Aypa runakuna ūukata sakiwashpa ashwan ashwanta payta katinankuna tiyan.

³¹ Chay runaka sielumanta shamudu kashpa tukuy runakunamanta ashwan allimami. ūukaka kay allpamanta kashpayni runakunashinalla yachachikuni. Payka sielumanta kashpa tukuy pimanta ashwan alli yachakmi. ³² Sielumanta shamushkanrayku chaypi kawashkanta uyarishkanta yachachikun. Tukuy chayta yachachikuptinpish aypa runakuna mana kreyinsapachu. ³³ Chaykamanka paypa yachachikunanta kreyik runakuna allita rimansapa. Tata Dios mana llullakunanta. ³⁴ Tata Dioska kachamushkan runata mana michashpa Espiritunta kun. Chayrayku payka Tata Diospa yachachishkanta riman.

³⁵ Tata Dioska chaylla wambranta suaman kuyan. Chayrayku paypa makinpi churarkan tukuy runakunata tukuy laya tiyakta allita kamachinana. ³⁶ Chayrayku ūukanchikuna Tata Diospa wambranta kreyishpa kawsashpanchikuna mana tukuy niyukta kawsashunchisapa. Mana payta kreyinayak runakuna mana sielupi kawsankasapachu. Tata Dioska paykunata suaman kastigankasapa.

Chashna Juanka yachachikurkan.

4

Jesus samaritana warmiwan parlarkan.

¹ Aypa runakuna rimarkansapa Jesus Juanmanta ashwan aypa runakunata bawtisaykananta. Rimarkansapa ashwan aypa runakuna Jesusta katinankunata. Chay rimananta fariseokuna uyarirkansapa. ² Chashna chay runakuna rimaptinkunapish Jesuska mana ni pita bawtisarkanchu. ūukaykuna Jesuspa disipulkunka kashpaynikuna payta kreyik runakunata bawtisarkanisapa.

³ Chaypina Jesus yacharkan fariseokuna chay rimanata uyarishkankunata. Chayrayku Judea partimanta Galilea partiman ūukaykunawan rirkan.

⁴ Galileaman riykashpaynikuna Samaria partita pasashpa rinaynikuna karkan. ⁵ Samaria partipi puriykashpaynikuna Sikar llakta ladunpi chayarkanisapa. Chaypi tiyarkan suk pukyu. ūawpa tiempu awiluynikuna Jakobo chay pukyuta aspishtpa tukuy chay terrenuta wambran Joseta kurkan. ⁶ Jesus shaykudu kashpa chay Jakobopa pukyun ladunpi tiyarkan. Chawpi diya karkan. ⁷⁻⁸ ūukaykuna Jesusta sakishpa rirkanisapa mikunaynikunata rantik. Chaypi Jesus samaykaptin suk samaritana warmi rirkan yakuta wishik. Chaypina Jesuska payta willarkan:

—Yakuykita upyachiway.

⁹ Chay tiempu ūukaykuna judiyu runakuna samaritano runakunawan chikninakushpa mana parlashpa kawsarkanisapa. Chayrayku Jesus yakuta mañaptin chay warmika sukanan almirashpa willarkan:

—¿Imapatí judiyu runa kashpayki yakutaka mañawanki samaritana warmi kaptini?

¹⁰ Chaypina Jesuska chay warmita willarkan:

—Kanka manami yachankichu Tata Dios ashwan alli yakuta kushunayananta. Manami nima ūukata riksiwankichu. Riksiwashpaykika ashwan alli yakuta mañawankiman. Mañawaptikika ūukaka kawsachikuk yakuta upyachiykiman.

¹¹ Chashna Jesus willaptinna chay warmita willarkan:

—Señor, manami kanpa tiyanchu imawan yakuta wishinaykipa. Kay yakuka sukanan ukupimi. ¿Maymantá kawsachikuk yakuta upyachiwankiman? ¹² Ñawpa tiempu awilunchi Jakobo kay pukyuta aspishe ūukaykunapa sakirkan. Kayllamanta paypish upyak. Kayllamanta tukuy wambrankunata tukuy animalninkunata upyachiksapa. ¿Ariya chay ñawpa awilunchi Jakobomanta ashwan alli yachakchu kanki?

¹³ Chashna tapuptinna Jesuska chay warmita willarkan:

—Tukuy pi kay pukyumanta yakuta upyashpankuna kashkan yakunayankasapa. ¹⁴ Ñuka kawsachikuk yakuta kankunata upyachiptinika mananami kashkan yakunayankichinachu. Chay yakuta upyachiptinika kankunapimi pachyamuk yakushina kallpashpa mana tukuy niyukta kawsachishunkichi.

¹⁵ Chashna Jesus willaptinna chay warmita mana entiendishpa willarkan:

—Señor, chay alli yakuta upyachiway ama kutin yakunayanaynipa. Chayta upyachiwaptikika mana kutin shamuymannachu kay pukyumanta yakuta wishik.

¹⁶ Chaypina Jesuska willarkan:

—Rillay kusaykita pushamuk.

¹⁷ Chashna willaptinna chay warmita willarkan:

—Manami kasaraduchu kani.

Jesuska willarkan:

—Allita willawanki mana kasaradu kanaykita. ¹⁸ Pichka kusaykikuna tiyashka. Kunan sotkaynin kusaykiwanpish mana kasaraduchu kanki. Chayraykumi mana llullakushpa willawanki mana kasaradu kanaykita.

¹⁹ Chaypina chay warmita willarkan:

—Señor, chashna willawaptiki ūuka riksiyki Tata Diospa rimananta yachachikuk runa kanaykita. ²⁰ Chayrayku tapunayayki. Samaritano awiluynikuna kay urkullapi Tata Diosta kuyaksapa. Kankuna judiyu runakuna rimankichi Jerusalen llaktallapi tukuy runakuna Tata Diosta kuyananchikunapa. ¿Imatá rimanki? ¿Maypití Tata Diosta kuyananchikuna tiyan?

²¹ Chaypina Jesuska willarkan:

—Mash uyariway. Kunanmantapacha manana ni kay urkuman shamunkichinachu nima Jerusalenman rinkichinachu Tata Diosta kuyak. Payta kuyanayashpaykichika maypipish kaptin tukuy shunku kuyanaykichi tiyan. ²² Kankuna Tata Diosta mana allitachu riksinkichi kuyanaykichipa. ūukaykuna judiyu runakuna payta allita riksishpa kuyanisapa. Salvashuknikichi runaka judiyu ayllunmantami. ²³ Ñami oraka chayamushkana Tata Diospa Espiritu yanapashunaykichipa tukuy shunku Tata Diosta kuyanaykichipa. Tata Dioska munan chashna tukuy

shunku deverasta kuyanaykichipa. ²⁴ Tata Dios mana runakunashina aychayuk kaptin mana paytaka kawanchichu. Payka tukuy laya atipakmi. Chayrayku paypa Espiritu yanapawaptinchikunara yachanchisapa payta allita deverasta kuyayta.

²⁵ Chaypina chay warmika willarkan:

—Yachani Tata Diosmanta salvakuk runa shamenanta. Paypa suk runakuna rimansapa Kristu. Paymi shamushpa tukuy chaykunata allita yachachiwashunchisapa.

²⁶ Chashna willaptinna Jesuska willarkan:

—Ñukami kani chay shuyanaykichi runa.

²⁷ Jesus chay warmiwan parlaykaptinna ñukaykunaka tarirkanisapa. Sukanman almirarkanisapa samaritana warmiwan parlaykaptin. Mana ni maykan animukurkanisapachu tapuya imatami munan imatami paywan parlaykan nishpa. ²⁸ Chaypina chay warmika puyñunta sakishpa llaktaman kallparkan. Chaypi chayashpa tukuy llaktamasinkunata willarkansapa:

²⁹ —Akuychi kawak suk runata pukyu ladunpi. Paymi tukuy laya rurashkaynita willawashka. ¿Manachu payka shuyaykananchi Tata Diosmanta shamuk runa?

³⁰ Chashna chay warmi willaptinkunana tukuy llaktamasinkuna shamurkansapa Jesusta kawak. ³¹ Manarapish Jesuspi chayaptinkunara ñukaykunaka willarkanisapa:

—Maestru, kay mikunata mikuy.

³² Chaypina Jesuska willawarkansapa:

—Ñukapa ashwan alli mikunayni tiyan. Kankunaka manami yachankichichu imami chay mikunayni nishpa.

³³ Chayta willawaptinkunana ñukaykunaka sukwani sukwani willanakurkanisapa:

—Ichará suk runa karashka.

³⁴ Chaypina Jesuska willawarkansapa:

—Sielumanta Tatayni Dios kachamuwashka kaptin tukuy willawashkanta ruranayni tiyan. Paypa munananta rurashpayni suk alli mikunawan saksadushina kawsani.

³⁵ Chaymanta willawarkansapa:

—Suk chakrakunapi wiñaykak murukunata kawashpa rimankichi chusku killara illananta pallanapa. Kunan willaykichi: Chay shamuykak samaritano runakunata kawaychi. Paykunaka munansapa Tata Diospa rimananta uvariya. Chashna uyarinayashpankuna iden pukudu wayukunashinami pallananchikunapano. ³⁶ Chashna pallakushpanchikuna trabajunchikunapa chaninta chaskinchisapa. Tata Diospa rimananta yachachikuptinchikuna chay shamuykak runakunaka kreyinkasapa ñuka Tata Diosmanta shamudu runa kanaynita. Chayta kreyishpankuna mana tukuy niyukta kawsankasapa. Ñawpa yachachikuk runakuna murukunata tarpukshina kay samaritano runakunata Tata Diospa rimananta yachachirkansapa. Ñukanchikuna pallakuk runakunashina kanchisapa. Chay tarpukukshina runakunawan ñukanchikuna muruta pallakshina runakunapish tantalla kushikushunchisapa.

³⁷ Kay rimana allita riman: “Suk runakuna tarpunsapa. Suk runakuna pallansapa.” ³⁸ Ñukaka kankunata kachaykichi murukunata pallakshina chay runakunata yachachinaykichipa. Suk runakuna tarpukukshina sukanman trabajashpa kay samaritano runakunata yachachishkasapa. Paykuna

trabajashkankunapi yachachiptikichi kreyinkasapa ñuka Tata Diosmanta shamudu runa kanaynita.

³⁹ Chashna Jesus ñukaykunawan parlaykaptin chay warmika riduna karkan. Chayashpa llaktamasinkunata willarkansapa: "Chay pukyu ladunpi suk runa tukuy rurashkaynita willawashka." Chashna chay warmi willaptinkuna aypa llaktamasinkuna kreyirkansapa Jesus Tata Diosmanta shamudu runa kananta. ⁴⁰ Chaymanta shamurkansapa payta kawak. Jesuspí chayashpangkuna roygarkansapa paykunawan kiparinanpa. Chayrayku ishkay diyata paykunawan tantalla kiparirkan. ⁴¹ Kikin Jesus yachachiptinkuna ashwan aypa runakuna kreyirkansapa Tata Diosmanta shamudu runa kananta. ⁴² Paykunaka chay warmita willarkansapa:

—Kanna ñukaykunata parlachiwaptikisapa kreyishkanisapa Jesus Tata Diosmanta shamudu runa kananta. Kunan kikinna yachachiwaptinkuna ashwan allitana yachanisapa deveras tukuy runakunapa salvawakninchikuna kananta.

Jesus suk awtoridarpa wambranta kalentoramanta alliyachirkan.

⁴³ Jesus Samariapi ishkay diyata yachachikushkanwasha rirkanisapa Galilea partiman. ⁴⁴ Jesuska yacharkan chay partipi kawsak runakuna mana payta kreyinankunata. Chayrayku rimarkan: "Suk alli yachachikuk runa kikinpa llaktanpi yachachikuptin llaktamasinkuna mana kreyin-sapachu alli yachachikuk kananta."

⁴⁵ Manarapish Galilea partita rishpaynikuna Jerusalenpi kaykaptinikuna nara Jesuska aypa almirana milagrunkunata rurarkan. Galileamanta Jerusalenpi Paskua fiestakuk runakuna tukuy milagruta ruraptin kawarkansapa. Chayrayku llaktankunapi chayaptin Jesusta kushikushpa chaskirkansapa.

⁴⁶ Chaymanta Galilea partita pasashpa Jesus Kana llaktapi chayarkan. Chay llaktapi suk tiempu yakumanta vinuta rurarkan. Chay partillapi Kapernaum llaktapi chay ashwan sinchi kamachikukpa yanapaknin kawsarkan. Chay runapa wambran kalentorawan fatal unkudu karkan. ⁴⁷ Payka Galileapi Jesus chayashkanta yachashpa rirkana sukanan roygak rinanpa wambranta alliyachipuk amarapish wañuptin. ⁴⁸ Sukaman pushanayaptinna Jesuska willarkan:

—Milagruta ruraptini kawashpaykichira kreyiwankichi. Mana milagruta ruraptinika manami kreyiwankichichu.

⁴⁹ Chaypina chay runaka Jesusta sukanan apurashpa willarkan:

—Señor, amarapish wambrayni wañuptin utkakushpa rillary alliyachipak.

⁵⁰ Chaypina Jesuska chay runata willarkan:

—Wasikiman kutiy. Wambraykika ñami alliyashkana.

Chashna willaptinna chay runaka tukuy shunku kreyirkan Jesus wambranta alliyachishkanta. Chashna kreyishpa wasinman kutirkan.

⁵¹ Wasinman kutiykaptin wiwachunkuna riyarkansapa tinkuk. Tinkushpana kushikushpa willarkansapa:

—Wambraykika ñami alliyashkana.

⁵² Chay kamachikuk runaka tapurkansapa:

—¿Ima oratati kallarishka alliyayta?

Paykunaka aynirkansapa:

—Kayna chawpi diyata kalentoranka chiriyapushka.

⁵³ Chashna willaptinkuna chay runaka yuyarkan Jesus alliyachinanpa willashkan ora wambran alliyashkanta. Chay tiempumantapacha chay

runaka tukuy familyanwan tantalla kreyirkansapa Jesus Tata Diosmanta shamudu runa kananta.

⁵⁴ Jesus chay wambrata alliyachishpa ishkaynin kutina Galilea partipi almirana milagruta rurarkan.

5

Jesus suk mana kuyuy atipak runata alliyachirkan.

¹ Chaymanta Jesus chay milagruta rurashkanwasha Jerusalenman rirkir fiestata pasak. Tukuy wata ūukaykuna judiyu runakuna Tata Diosta kuyashpa chay fiestata rurak kanisapa. ² Jerusalen llaktaman ovejakuna yakyunana punku ladunpi suk sumak tantanakudu kocha tiyan. Chay kochapha shutin Betsata. Chayllapi pichka tambukuna tiyarkan. ³ Chaypi aypa unkudu runakuna samaksapa. Sukkuna mana kawakuya atipak karkansapa. Sukkuna mana puriya atipak karkansapa. Sukkuna mana nima kuyuy atipak karkansapa.

⁴ Mana ni pi yachashkan ora Tata Diospa angelin chay yakuta kuyuchik. Chay angel yakuta kuyuchiptin maykan runa ūawpaka chay yakupi yaykuk unkuyninmanta alliyak. Chayrayku aypa unkudu runakuna alliyanayashpa shuyaksapa angel chay yakuta kuyuchinanpa. ⁵ Chay unkudukunawan tantalla suk runa kimsa chunka pusak watata unkudu karkan. ⁶ Jesus chaypi chayashpana payta warkaran. Aypa watakunata unkudu kawsashkanta yachashpa tapurkan:

—¿Munankichu alliyayta?

⁷ Chashna Jesus tapuptinna chay runaka willarkan:

—Señor, yaku kuyuptin mana ni pi churawak runa tiyanchu. ūuka suka-man yaykunayaptini sukmi mishawashpa yaykun.

⁸ Chaypina Jesuska willarkan:

—¡Atarimuyna! ¡Kamillaykita apishpana rillary!

⁹ Chashna Jesus willaptin chay unkudu runaka alliyarkan. Chaypina kamillanta apishpa kushikushpana kallarirkana puriya. Chay diya karkan samana diya. ¹⁰ Chayrayku judiyu awtoridarkuna chay alliyadu runataka willarkansapa:

—Kunanka samana diyami. ūukanchikunapa killkadunchikunapi willawanchisapa samana diya ama nimata apananchikunapa. Chayrayku chay kamillaykita ama apaychu.

¹¹ Chashna michaptinkunana chay runaka aynirkansapa:

—Chay alliyachiwak runami willawashka: “Kamillaykita apishpa rillary.”

¹² Chaypina chay awtoridarkunaka tapurkansapa:

—¿Píti chay “kamillaykita apishpa rillary” willashuk runaka?

¹³ Chashna tapuptinkuna chay runaka mana riksirkanchu pimi alliyachishka nishpa. Jesus alliyachishkanwasha chay aypa runakunapa chaw-pinkunapi yaykushpa pakakurkan.

¹⁴ Chaymanta Tata Diospa wasinpi Jesuska chay alliyachishkan runataka tarirkana. Chaypi willarkan:

—Mash uyariway. ūami alliyaduna kanki. Amana kutin uchallikuynachu ama ashwanta sufrishpa kawsanaykipa.

¹⁵ Chashna willaptinna chay runaka awtoridarkunata rirkana willak Jesus alliyachishkanta.

¹⁶ Samana diya chay unkuduta alliyachishkanrayku chay awtoridarkunaka Jesusta chiknirkansapa. ¹⁷ Chikninankunata yachashpa Jesuska willarkansapa:

—Tatayni Dioska tukuy diya tukuy runakunata yanapansapa. Ñukapish iden Tataynishina tukuy diya tukuy pita yanapaykani.

¹⁸ Chashna willaptinkuna chay awtoridarkunkuna Jesusta sukaman munarkansapa wañuchiyya samana diya rikchak layata ruraptin. Paykunaka ashwanta chiknirkansapa runalla kashpa Tata Dioswan igualanaku-nayashpa rimaptin Tata Dios kikinpa tatan kananta.

Jesus willarkansapa Tatan Diospa munananllata ruraykananta.

¹⁹ Chashna chay awtoridarkuna wañuchinayaptinkuna Jesuska willarkansapa:

—Mash allita uyariwaychi. Tata Diospa chaylla wambran kashpayni kikinimanta mana atipanichu nimata rurayta. Tatayni Dios rurananta kawashpara chayllata rurani. Tatayni ruraykananllata ñukapish rurani.

²⁰ Tataynika sukaman ñukata kuyawan. Rikchak laya rurananta yachachiwan payshina ñukapish ruranaynipa. Kunanmantapacha yanapawanka ashwan almirana milagrukunata ruranaynipa. Chayta kawashpaykichi sukaman almirankichi. ²¹ Tatayni Dioska wañudu runakunata atipan kawsachimuya paywan kuyanakushpa kawsanankunapa. Payshina ñukapish tukuy munashkayni runakunata kawsachimuni.

²² Chaymanta Tatayni Dioska mana ni pita chatakunchu. Payka willawashka ñuka willanaynipa pitami kasfiganka pitami perdonanka nishpa. ²³ Chashna Tata Dios willawaptin tukuy runakuna ñukata iden Tataynitashina kuyawanankuna tiyan. Mana kuyawashpankunkaka kachamuwak Tataynitapish mana kuyansapachu.

²⁴ Allita willaykichi. Kankuna yachachikunaynita kreyinaykichi tiyan. Kachamuwak Tata Diostapish kreyinaykichi tiyan. Chashna yachachikuskaynita kreyiptikichika mana tukuyniyukta kawsankichi. Mana ninamanchu rinkichi. Wañudu kanaykichimanta kawsamunkichi.

²⁵ Allita willaykichi. Suk tiempu chayamunka chay tiempuka ñami chayamushkana ñuka Tata Diospa wambran yachachikuptini aypa uchasapakuna uyariwanankunapa. Chay uchasapakunaka iden wañudukunashinami. Yachachikuptini tukuy uyariwakkuna mana tukuyniyukta Tata Dioswan tantalla kawsankasapa.

²⁶ Tata Dioska kikinllamantami mana tukuyniyukta kawsan. Chaymanta pay munaptin ñukapish chaylla wambran kashpayni kikinillamanta mana tukuyniyukta kawsani. ²⁷ Tatayni kay allpaman kachamuwashka runa kanaynipa. Chayrayku ñukata willawashka tukuy runakunata willanaynipa pikunami allita rurashka pikunanami mana allitachu rurashka nishpa.

²⁸ Chashna ñuka yachachikuptini ama almiraychichu. Suk tiempu chayamunka ñuka kayaptini tukuy wañudu runakuna uyariwanankunapa.

²⁹ Chaypina pampadu kashkankunamanta llukshimunkasapa willanaynipa maymanmi rinkasapa nishpa. Tukuy allita rurashpa kawsak runakunata yaykuchishasapa siélupi Tata Dioswan mana tukuyniyukta kawsanankunapa. Tukuy mana allita rurashpa kawsak runakunata mana tukuyniyuk ninaman kachashasapa.

Jesus willarkansapa Tata Dio payta kachamushkanta.

³⁰ Jesuska yachachikuylapi katirkan:

—Kikinillamanta mana nimata atipanichu rurayta. Tatayni Dios munashkantashina willani pimi allita rurashka pimi mana allitachu rurashka nishpa. Ñuka mana kikinipa munanaynitachu rurani. Chayrayku kuskanpi willani pimi allita rurashka pimi mana allitachu rurashka nishpa.

³¹ Ñuka rimani Tata Diospa wambran kanaynita. Ñuka sapallayni chayta rimaptinika kankuna rimankichiman llullakunaynita. ³² Mana ñukallachu chashna rimani. Tata Diospish rimashka ñuka wambran kanaynita. Chashna Tata Dios rimashpa mana llullakunchu. ³³ Kankunaka runakunata kachashkankichi Juanman ñukapa tapukuk. Payka allita willashushkankichi ariya ñuka Tata Diosmanta shamudu runa kanaynita. Chayta willashush-paykichi kuskanpi willashushkankichi.

³⁴ Chashna Juan ñukapa allita willashuptikichipish mana payllachu chayta willashushkankichi. Tatayni Diospish willashushkankichi paypa wambran kanaynita. Chayta willaykichi úchaykichimanta Tata Dios perdonashu-naykicipa. ³⁵ Juanka Tata Diospa rimananta yachachishushpaykichi suk alkusashina lusichishurkankichi. Chashna yachachishuptikichi suk tiem-pullapa payta uyarishpa kushikushpa kawsarkankichi.

³⁶ Juanka willashurkankichi Tata Diosmanta shamudu runa kanaynita. Ñuka almirana milagrukunata rurashpayni Juanmanta ashwan allita yachachiykichi Tata Diosmanta shamushkaynita. Chay milagrukunata ruraptini atipankichi yachayta Tata Dios kachamuwashkanta.

³⁷ Kachamuwak Tatayni Diospish willashurkankichi ñuka wambran kanaynita. Chashna willashuptikichipish kankunaka mana payta uyarinayashkankichichu nima kasunayashkankichichu. ³⁸ Tata Dios kachamuwashkanta mana kreyishpaykichi paypa rimanantapish mana shunkullikunkichichu.

³⁹ Tata Diospa killkadunta kuti kuti leyishpa yachakunkichi. Sukaman yuyankichi chashna sukaman leyishpa Tata Dioswan mana tukuyniyukta kawsanaykichita. Chay leyishkaykichi Tata Diospa killkadunka riman ñuka Tata Diosmanta shamudu runa kanaynita. ⁴⁰ Chayta leyishpaykicipish mana ñukata kreyiwanayankichichu Tata Dioswan mana tukuyniyukta kawsanaykicipa.

⁴¹ Kankuna munawaptikichi mana munawaptikichipish mana nimananchu. ⁴² Ñuka kankunata allita riksishpayni yachani Tata Diosta mana kuyanaykichita. ⁴³ Tata Dios kachamuwaptin shamushk kaptinipish mana nima kasuwanayankichichu. Chaykamanka suk runa kikinpa yuyayninmanta yachachikuk shamuptinka paytaka kunanlla uyarinkichiman.

⁴⁴ Mana Tata Diosta kuyashpaykichi kankunapura sukwana sukwana sukaman alabanakunkichi. Mana sapallan Tata Dios alabashunaykichitachu munankichi. Chayrayku mana atipankichichu ñukata kreyiwayta. ⁴⁵ Ama yuyaychichu ñuka Tatayni Diospi kankunata chatanaynita. Suk chatashuknikichu runami tiyan. Payka Moisesmi. Paypa killkaduna leyishpaykichi yuyankichi allita Tata Dioswan kawsanaykichita. ⁴⁶ Chashna yuyashpaykicipish manami paypa killkadunta kreyinkichichu. Moiseska killkarkan ñuka shamunaynita. Chayrayku paypa killkashkanta kreyish-paykichika ñukatapish kreyiwankichiman. ⁴⁷ Mana Moisespa killkashkanta kreyishpaykichiká mana ñuka willashkaynitapish kreyinkichichu.

Chashna Jesuska chay chiknik runakunata willarkansapa.

6

Jesuska pichka waranka runakunata kararkan.

(Mt 14.13-21; Mr 6.30-44; Lk 9.10-17)

¹⁻² Jerusalen llaktapi kayakashpara Jesuska aypa milagrukunata rurarkan. Aypa unkudukunata alliyachirkan. Chaymanta Galilea kocha chimbaman ñukaykunawan tantalla rirkhan. Chay Galilea kochapa suknin shutinka karkan

Tiberias. Chay kocha chimbaman ūukaykuna riptinikuna aypa runakuna katiwarkansapa aypa milagrukunata Jesus ruraptin kawashkankunaryku. ³⁻⁴ Chay tiempu mana ashwannachu illarkan ūukaykuna judiyu runakuna Paskua fiestata pasanaynikunapa. Chay kochata chimbashpaynikuna suk urkuman Jesuska pushawarkansapa. Chaypi tiyairikanisapa. ⁵ Chaymanta Jesuska kawarkan aypa runakuna payman shamuptinkuna. Paykunata kawashpa Felipita willarkan:

—Chay aypa runakunata karananchikunapa *¿maypití mikunata rantishunchisapa?*

⁶ Jesuska chayta tapurkan yachanayashpa imatami Felipi willanka nishpa. Manara tapushpara payka yacharkan imatami ruranka nishpa.

⁷ Chaypina Felipika Jesusta willarkan:

—Ishkay pachak kullki tiyawaptinchipish nima chaywan panta rantishpa chay aypa runakunata paktachinchimansapachu tipisituta mikunankunapa.

⁸ Chashna Felipi willaptinna Jesuspa disipulun Pedrupa wawkin Andreska Jesusta willarkan:

⁹ —Kay wambrapa tiyapun sebadamanta ruradu pichka pan ishkay challwa. Chayllawan mana nima layapi kay aypa runakunata paktachinchimansapachu.

¹⁰ Chaypi aypa ukshakuna tiyarkan chay pichka waranka runakuna tiyarnankunapa. Chaypina Jesuska ūukaykunata willawarkansapa:

—Tukuy runakunata willaychi tiyarinankunapa.

¹¹ Tiyariptinkunana Jesuska chay pichka pankunata apishpa Tata Diosta agradesirkan. Chaymanta ūukaykunata kuwarkansapa tukuy chay tiyariyu runakunata karanaynikunapa. Idenllata rurarkan challwakunawanpis tukuy chay runakuna saksanankunakaman. ¹² Allita mikushkankunawasha Jesuska ūukaykunata willawarkansapa:

—Tukuy puchushkankunata tantachiichi ama niman suk tipi usunanpa.

¹³ Chashna Jesus willawaptinkuna chay pichka panmanta puchushkanta tantachirkanisapa chunka ishkay sestuta.

¹⁴ Chashna Jesus chay milagruta ruraptin kawashpangkuna chay runakuna sukaman almirashpangkuna willanakurkansapa:

—Payka deveras shuyaykananchikuna alli yachachikuk runami.

¹⁵ Chaypina Jesusta mana munakta pushanayarkansapa sinchi kamachikukninkuna kananpa. Pushanayanankunata yakashpa Jesuska paykunata sakishpa rirkana chay urku sawanman chaypi sapallan kananpa.

Jesus purirkanyaku sawanpi.

(Mt 14.22-27; Mr 6.45-52)

¹⁶ Chaymanta amusayaptinna chay urkupi Jesusta sakishpa ūukaykunaka kochaman urayamurkanisapa. ¹⁷ Chay kocha mañanpi chayashpaynikuna manarapish Jesus chayamuptin atun kanowapi yaykurkanisapa Kaper-naum llaktaman rinaynikunapa. Chayman riyaptinikunana tutayarkan.

¹⁸ Chay atun kochata chimbaykaptinikunana sukaman sinchita wayrarkan. Chay wayrawan yakuka sukaman atunta olasyarkan. ¹⁹ Yaka sokta kilometru chawpi kochapi kashpaynikuna kawarkanisapa Jesusta ladunchawaptinkuna. Yaku sawanpi puriyaptin kawashpaynikuna sukaman manchakurkanisapa. ²⁰ Chaypina Jesuska willawarkansapa:

—*¡Ama manchakuychichu! ūukami kani.*

²¹ Chaypina kushikushpa kanowapi Jesusta yaykuchirkanisapa. Chaypira Kapernaumpi utka chayarkanisapa.

²² Chay aypa runakuna chay urkupi kiparirkansapa puñunankunapa. Kayantin diya yacharkansapa chay suklalla tiyak kanowapi ñukaykuna Jesusa disipulunkuna chimbashkaynikunata. Yacharkansapa Jesus mana ñukaykunawan rishkanta.

²³ Chay runakuna Jesusta maskashpa mana tarirkansapachu. Chaypina Tiberias llaktamanta suk runakuna kanowankunapi chayarkansapa maypicha Jesus pankunata karashkankunapi. ²⁴ Mana ni Jesusta nima disipulunkunata chaypi tarishpankuna chay kanowakunapi tukuy chay runakunaka chimbarkansapa Kapernaum llaktapi Jesusta maskak.

Jesus yachachikurkan suk mikunashina kananta.

²⁵ Chashna chay maskak runakuna chimbashpankuna Jesusta tarirkansapa. Tarishpankuna tapurkansapa:

—Maestru ñaykapití kaypika chayamushkanki?

²⁶ Chaypina Jesuska willarkansapa:

—Mash uyariwaychi. Ñuka panta karaptini kankuna mikushkankichi sak-sanaykichikaman. Kashkan mikunayashpaykichilla ñukata maskawaykankichi. Mana nima entiendishkankichichu imapami chay almirana milagruta rurashkani nishpa. ²⁷ Ama tukuk mikunallata maskashpa sukaman turbakuchichu. Ñukapa yachachikunaynika iden allima mikunashinami. Chayllata ashwanta munaychi Tata Dioswan mana tukuuniyuksa kawsanaykicipa. Tatayni Dioska kachamuwashka milagrunkunata ruranaynipa tukuy runakuna yachanankunapa paypa wambran kanaynita.

²⁸ Chaypina chay runakunaka Jesusta tapurkansapa:

—Ñukaykuna Tata Dios munashkan layata rurashpa kawsanaynikunapa ñimatati rurashasapa?

²⁹ Chashna tapuptinkuna Jesuska willarkansapa:

—Tatayni Dios ñukata kachamuwashka kankunata yachachinaynipasapa. Chayraykumi munan ñukata kreyiwashpa kawsanaykicipa.

³⁰ Chaypina chay runakunaka Jesustaka willarkansapa:

—¿Kan ima milagrutati yachanki ruraya? Kawachiwaysapa almirana laya milagruta. Chayta kawashpaynikunara yachashasapa Tata Dios kachamushshukanta. ³¹ Chay ñawpa chunlla chakidu pampapi tukuy diya awilunchikuna aypa pankunata mikurkansapa. Tata Diospa killkadunpi willawanchisapa payka sielumanta panta kachamurkan mikunankunapa.

³² Chashna willaptinkuna Jesuska willarkansapa:

—Mash uyariwaychi. Manami Moiseschu sielumanta pantaka karashushkankichi. Tatayni Diosmi sielumanta alli mikunata kachamushshunkichi. ³³ Tata Dios ñukata kachamuwaptin sielumanta urayamushkani runakunata kawsachinaynipasapa.

³⁴ Chashna Jesus willaptinkuna paykunaka mañarkansapa:

—Señor, tukuy tiempu chay laya mikunata kuwaysapa.

³⁵ Chashna chay runakuna mikunata mañaptinkunana Jesuska willarkansapa:

—Ñukaka kawsachikuk mikunaykichishinami kani. Kankuna tukuy shunku kreyiwaptikichika iden alli mikunaykichishinami kani. Ñukaman shamushpaykichi manana kutin yarkankichinachu. Ñukata kreyiwashpaykichi manana kutin yakunayankichinachu.

³⁶ Kashkan willaykichi. Kankunaka kawashpaykichipish mana kreyiwanayankichichu. ³⁷ Tukuy Tata Dios kuwashkan runakuna munawashpankuna ūkaman shamunkasapa. Paykunataka chaskishasapa. Mana niman suk shamukkunata karkushasapachu.

³⁸ Sielumanta shamushkani kachamuwak Tatayni Diospa munananlata ruranaynipa. Manami shamushkanichu kikinipa munanaynita rrak. ³⁹ Sielumanta kachamuwak Tatayni munan tukuy ūkata kuwashkan runakunata allita kuydanaynipasapa ama niman suk ūkamanta ashunankunapa. Payka munan kay allpa tukunan diya tukuy paykunata kawsachimunaynipasapa. ⁴⁰ Tatayni Dios munan tukuy runakuna ūuka wambranta tukuy shunku kuyawashpa kreyiwanankunapa. Chaypina kay allpa kullunan diya tukuy kreyiwak runakunata kawsachimushasapa Tata Diосwan mana tukuy niyukta kawsanankunapa.

⁴¹ Chashna Jesus yachachikuptinna chay judiyu runakuna sukaman piñakurkansapa. Mana munarkansapachu Jesus willanankunapa sielumanta mikunankunashina kananta. ⁴² Paykunapura parlanakurkansapa:

—¿Manachu kay runaka Josepa wambran? ūkanchikunaka tatanta mama allita riksinchisapa. ¿Imapatí riman sielumanta shamushkanta?

⁴³ Chashna parlanakuptinkuna Jesuska willarkansapa:

—Ama piñakushpa yuyawaychichu. ⁴⁴ Mana ni pi atipanmanchu kreyiwayta kachamuwak Tatayni mana yanapaptin. Chaymanta kay allpa tukunan diya tukuy kreyiwak runakunata kawsachimushasapa. ⁴⁵ Nawpa alli yachachikuk runakuna killkarkansapa: “Tata Dios tukuy runakunata yachachinkasapa.” Chayrayku tukuy Tata Diosta kreyik runakuna tukuy paypa yachachikushkanta yachakuk runakuna ūkata pish kreyiwankasapa. ⁴⁶ Mana niman suk runa Tatayni Diosta kawashkachu. ūkallami paymanta shamushka kashpayni paytaka allita kawashkani.

⁴⁷ Mash allita uyariwaychi. Kankuna ūkata allita kreyiwashpaykichi Tatayni Diосwanmi mana tukuy niyukta kawsankichi. ⁴⁸ ūkaka kawsachishuknikichi mikunaykichishinami kani. ⁴⁹ Chay chunlla chakidu pampapi ūawpa awiluykichika Tata Dios kachamushkan pankunata mikushpankunapish wañurkansapa. ⁵⁰ ūuka yachachiykichi chikan laya sielumanta urayamushkan mikunaykichita. Chay mikunata mikuk runakuna mana tukuy niyukta kawsankasapa. ⁵¹ ūkaka sielumanta urayamushka kawsachikuk mikunashinami kani. Wañusha runakunata kawsachimunaynipasapa. Chashna wañushpayni kuerpuynita kuykichi alli mikunaykichishina kanaynipa. ūkata kreyiwashpaykichi mikuwakshina kankichi. Chashna kreyiwashpa kawsashpaykichika mana tukuy niyukta kawsankichi.

⁵² Chashna Jesus yachachikuptin chay awtoridar runakuna mana entiendishpa sukwana sukwana ayminakurkansapa:

—¿Imashnatí kuerpunta kuwanchisapa mikunanchikunapa?

⁵³ Chaypina Jesuska willarkansapa:

—Mash allita uyariwaychi. ūka Tata Diосmanta shamudu runa kaptini kankuna kreyiwashpa kawsanaykichi tiyan. Kreyiwashpa kawsashpaykichi kuerpuynita mikukshina yawarninita upyakshina kankichi. Mana kuerpuynita mikushpaykichika mana yawarninita upyashpaykichika manami Tata Diосwanchu kawsankichi. ⁵⁴ Kuerpuynita mikushpaykichika yawarninita upyashpaykichika mana tukuy niyukta kawsankichi. Kay allpa kullunan diya ūkami kawsachimushkaykichi. ⁵⁵ Kuerpuynita deveras kawsachikuk mikunashinami. Yawarninika deveras kawsachikuk

upyanashinami. ⁵⁶ Kankuna kuerpuynita mikushpaykichi yawarninita upyashpaykichi shunkuykichipi chaskiwankichi. Chashna chaskiwashpaykichi ūukawan paktanakushpa kawsankichi. ūukapish kankunawan paktanakushpa kawsani.

⁵⁷ Kachamuwak Tatayni Dios kawsachikuk kashpa ūukata kawsachiwan. Tata Dios kawsachiaptin ūukapish kreyiwak mikuwak runakunata kawsachini. ⁵⁸ Yachachiykichi ūuka sielumanta urayamushkaynita mikunaykichishina kanaynipa. Nawpa awiluykichi Tata Dios karashkan pankunata mikushpankunapish wañurkansapa. ūuka sielumanta shamudu mikunaykichi kaptini tukuy kreyiwak runakuna mana tukuyniyukta kawsankasapa.

⁵⁹ Jesuska tukuy chayta yachachikurkan Kapernaum llaktapi tantanakunankuna wasipi.

Tukuy runakuna Tata Dioswan kawsanayashpa Jesusta kreyinankunta tiyan.

⁶⁰ Chashna Jesus yachachikuptinna chay katik runakunaka willanakurkansapa:

—Kay runapa yachachikunanka mana munanapa layami. ¿Pití atipaman kasuya?

⁶¹ Jesus willanakushkankunata yachashpa tapurkansapa:

—Ariya ¿kay yachachikunaynika rabyachishunkichichu? ⁶² ¿Imatáti rimankichiman kawawashpaykichi sielman kutiptini? ⁶³ Tata Diospa Espiritun kawsachishunkichi Tata Dioswan kawsanaykichi. Kikikichilla mana atipankichichu Tata Dioswan kawsayta. Chayrayku rimanaynita kreyishpaykichi Tata Dioswan kawsankichi. ⁶⁴⁻⁶⁵ Allita yachachikuptinipish kankunamanta sukmi mana kreyiwanchu. Chayrayku willashkaykichina mana Tata Dios yanapashuptikichika mana niman suk kankuna atipankichimanchu ūukata kreyiwashpa kawsayta.

Jesus chayta willarkansapa kallarinanmantapacha allita yachashpa pikunamí payta mana kreyinkasapa nishpa. Chaymanta yacharkan pimi rantikunka chiknik runakuna wañuchinankunapa. ⁶⁶ Chay diyamantapacha aypa katik runakuna manana katirkansapanachu. ⁶⁷ Chayrayku Jesuska ūukaykuna chunka ishkay disipulunkunata tapuwarkansapa:

—¿Kankunapish sakiwanayankichichu?

⁶⁸ Chashna tapuwaptinkuna Simon Pedruka willarkan:

—Maestru ¿pitáti katiymansapa? Kanllami yachachiwankisapa imashnami Tata Dioswan mana tukuyniyukta kawsashasapa nishpa.

⁶⁹ ūukaykunaka rimanaykita kreyishpaynikuna yachanisapa Tata Dios akllashuptiki allpaman shamushkaykita.

⁷⁰ Chaypina Jesuska ayniwarkansapa:

—ŵukaka kankunata akllashkaykichimi chunka ishkay disipuluynikuna kanaykichi. Kankunata akllashka kaptinipish kankunamanta sukmi supayta kasushpa kawsan.

⁷¹ Chashna rimashpa Jesuska rimaykarkan Simon Iskariotepa wambran Judaspa. Judas Jesuspa disipulun kayakashpapish payta rantikurkan chiknik runakuna wañuchinankunapa.

¹ Chaymanta Galilea partipi ñukaykunawan Jesuska llaktan llaktanpi yachachikupi purirkan. Mana munarkanchu Judea partipi puriya yachashpa kamachikuk judiyukuna wañuchinayanankunata.

² Tukuy wata ñukaykuna judiyukuna suk fiestata ruranisapa ñawpa aw-iluynikuna ranchunkunapi kawsashkankunata yuyashpa. ³ Chay fiesta mana sukaman illaptin Jesuspa wawkinkuna willarkansapa:

—Ama kaypika kipariychu. Rillay Judea partiman fiestakuk chay katishuk runakuna almirana ruranaykita kawanankunata. ⁴ Suk runa tukuy runakunapi riksichinakunayashpa mana pakallachu almirana layakunata ruran. Kan almirana layakunata ruranayashpaykika rillay chay atun llak-tapi rurak tukuy runakuna kawanankunata.

⁵ Jesuspa wawkinkuna mana payta kreyishpankuna chayta willarkansapa. ⁶ Chashna willaptinkuna Jesuska willarkansapa:

—Tatayni Dioska manara willawashkarachu rinaynipa. Kankunapa ima orapish kaptin allimi rinaykichipa. ⁷ Ñukaka mana alli rurak runakunata willani mana allita rurashpa kawsaykanankunata. Chayrayku chikniwansapa. Munayninkunapi kawsak runakuna mana kankunata chiknishunkichichu. ⁸ Chayrayku ima orapish kaptin kankunaka chay fiestaman rillarychi. Tatayni Dios manara willawaptin manara risharachu.

⁹ Chashna Jesus wawkinkunata willashpa Galilea partipi kiparirkan.

Jesús fiesta ukun yachachikurkan.

¹⁰ Chashna Jesus willaptinna chay fiestaman wawkinkunaka rirkansapa. Paykuna rishkankunawasha Jesuspish rirkan. Jerusalenpi chayashpaynikuna pakallalla karkanisapa ama ni pi yachananpa Jesús chaypi kananta. ¹¹ Chay fiesta ukun judiyu awtoridarkuna Jesusta maskashpa tapunakurkansapa:

—¿Maypirá chay runaka?

¹² Tukuy runakuna Jesus yachachikunanta sukaman parlachinakurkansapa. Sukkuna rimarkansapa alli yachachikuk runa kananta. Sukkuna rimarkansapa mana alli rurak kashpa llullachikuykananta.

¹³ Paykunaka awtoridarninkunata manchashpankuna upallalla parlachinakurkansapa.

¹⁴ Chay fiesta chuskuynin diya Jesuska rirkan Tatan Diospa wasinpi yachachikuk. ¹⁵ Chaypi yachachikuykaptin judiyu awtoridarninikunaka almirashpankuna tapunakurkansapa:

—¿Imashnatí kay runaka Tata Diospa rimananta yachan mana ñukanchikuna yachachiptinchikuna?

¹⁶ Chayta uyarishpana Jesuska willarkansapa:

—Ñukaka manami kikinipa yuyaynimantachu yachachikuykani. Kachamuwak Tatayni Dios yachachiwashkanta yachachikuykani.

¹⁷ Kankunaka Tata Diospa munananta ruranayashpaykichika yachankichiman paypa yuyaynintachu kikinipa yuyaynimantachu yachachikuni nishpa. ¹⁸ Suk runa kikinpa yuyayninta yachachikushpa munan runakuna payllata kuyashpa alabanankunata. Ñukaka munani tukuy runakuna kachamuwak Tatayni Diosta kuyashpa kawsanankunata. Chayrayku mana llullatachu yachachikuni. Mana nima llullakunichu.

¹⁹ Ñawpa alli yachachikuk Moiseska killkadunpi yachachishushkankichi imashnami allita rurashpa kawsankichi nishpa. Kankuna chayta mana nima kasunkichichu. Moisespa yachachikunanta kasushpaykichika ¿imapati ñukata wañuchiwanayankichi?

20 Chashna Jesus sinchita willaptinkuna chay runakuna willarkansapa:

—Kanka supayadumi kanki. ¿Pití wañuchishunayanki?

21 Chashna willaptinkuna Jesuska willarkansapa:

—Ñuka suk unkudu runata samana diya alliyachishkani. Chayrayku kankuna rabyashkankichi rimashpa mana allita rurashkaynita.

22 Mash uyariwaychi. Kankunaka Moisespa killkadunta kasushpa ullku wambraykichi pusak diyayuk kaptin samana diya kaykaptinpish pishkitunta señalapunkichi. Awilunchi Abrahampa tiempumantapacha chashna tukuy judiyu runakuna ruranchisapa. **23** ¿Manachu kankuna Moisespa killkadunta kasushpa samana diya kaykaptinpish ullku wambrata señalachinkichi? Chayrayku ¿imapatí piñakunkichi samana diya unkudu runata alliyachiptini? **24** Ama rimaychichu suk runa mana alli rurak kananta manara allita yachashpara mana allita rurashkanta. Allita yachashpara chatakuchi.

Jesus rimarkan Tata Diosmanta shamudu runa kananta.

25 Chaymanta Jerusalenpi kawsak runakuna tapunakurkansapa:

—¿Manachu awtoridarninchikuna kay runataka maskaykansapa wañuchinankunapa? **26** Kunanka tukuy pi kawaptin kay runaka yachachikuykan. Mana ni pi paytaka michanchu yachachikuptin. Ichára awtoridarninchikuna ña kreyinsapana pay shuyaykananchikuna Tata Diosmanta shamudu runa kananta. **27** Paykuna kreyiptinkunapish ñukanchikuna allita yachanchisapa maymantami shamushka kay runaka. Shuyaykananchikuna salvakuk shamuptin mana yachashunchisapachu maymantami shamun nishpa.

28 Chayta uyarishspa Jesus Tata Diospa wasimpi yachachikuykashpa sinchita willarkansapa:

—Kankunaka rimaykankichi ñukata allita riksiwanaykichita. Rimaykankichi yachanaykichita maymantami shamushkani nishpa. Chashna rimashpaykicipish mana riksiwankichichu. Nima kachamuwaktapish riksinichichu. Payka mana ni pita llullachinchu. Ñukaka manami kikinimantachu shamushkani. **29** Tatayni Diosmanta shamushkani. Tata Dios kachamuwashka kaptin paytaka allita riksini.

30 Chayta willaptinkuna chay awtoridar runakuna Jesusta apinayarkansapa wañuchinankunapa. Manara apirkansaparachu mana wañunan ora kaptinra. **31** Jesus willashkankunata uyarishpa aypa runakuna kreyirkansapa Tata Diosmanta shamudu runa kananta. Rimarkansapa:

—¿Manachu kay runaka chay shuyaykananchikuna Tata Diosmanta shamudu runa? Mana ni suk runa paymanta ashwan almirana milagrukunata ruranmanchu.

Awtoridarkunawan fariseo runakuna Jesusta apinayarkansapa wañuchinankunapa.

32 Runakuna chayta rimaptinkuna fariseokunawan saserdotekunapa awtoridarninkuna uyarirkansapa. Chaypina Tata Diospa wasinta kuydak runakunata kacharkansapa Jesusta apinankunapa. **33** Chay kuydakuk runakuna apinayaptinkuna Jesuska willarkansapa:

—Mananami ashwannachu illan kankunamanta ashunaynipa. Kachamuwak Tatayniman kutisha. **34** Chashna riptyini kankunaka maskawashpa mananami tariwankichinachu. Chay rinayniman manami atipankichichu chayaya.

35 Chashna Jesus rimaptinna judiyu awtoridarkuna sukwani sukwani tapunakurkansapa:

—¿Maymantí rinka kay runaka ūukanchikuna maskashpa mana tari-nanchikunapa? Ichará kay llaktamanta rinayan chikan karu llaktaman chaypi judiyumasinchikunawan kawsak. Ichará chay chikan kasta runaku-nata yachachik rinayan. ³⁶ Chayrayku payka rimashka: “Maskawashpa mana tariwankichichu. ūuka rinaynimana mana atipankichichu chayayta.” Chayta rimashpa ¿imatati rimaykan?

Jesus yachachikurkan Tata Diospa Espiritun iden ūukūk yakushina pachyamunanta.

³⁷ Tukuy wata chay fiesta tukunan diya tukuy runakuna sukaman ash-wanta kushikuksapa. Chay tukunan diya Jesuska aypa runakunapa chaw-pinkunapi shayarishpa sinchita rimakushpa willarkansapa:

—¡Mash uyarriwaychi! Kankuna yakunayashpaykichi ūukaman shamuy-chi upyanaykichipa. ³⁸ Tata Diospa rimananpi willawananchishina tukuy ūukata kreyiwak runakuna sukaman kushikunkasapa. Shunkunkunapi kawsachikuk yaku pachyamukshina kanka.

³⁹ Chayta rimashpa Jesuska yachachikuykarkan payta kreyik runakuna Tata Diospa Espiritunta chaskinankunata. Jesus manara wañushkanmanta kawsamuptinrā Tata Diospa Espiritun manara shamurkanrachu payta kreyik runakunapi kawsak.

Jesusrayku chay runakuna ayninakurkansapa.

⁴⁰ Jesus yachachikushkanta uyarishpankuna suk runakuna rimarkansapa:

—Kay runaka Moises alli yachachikuk shamenanta rimashkan runami.

⁴¹ Sukkuna rimarkansapa:

—Kay runaka shuyaykananchi Tata Diosmanta shamudu runami.

Sukkuna chikan layata rimarkansapa:

—Kay runaka manami shuyaykananchikuna runachu. Tata Diosmanta shamudu runaka manami Galilea partimantachu shamunka. ⁴² Tata Diospa killkadunpi riman Tata Diosmanta shamudu runa ñawpa kamachikuk Davidpa miraknin kananta. Chaymanta riman Davidpa Belen llaktanpi nasinanpa.

⁴³ Chashna Jesuspa rikchak layata yuyashpankuna chay runakunaka piñanakurkansapa. ⁴⁴ Sukkuna Jesusta apinayarkansapa. Apinayashpapish mana ni pi animukurkansapachu apiyta.

Judiyu awtoridarkuna mana Jesusta kreyinayarkansapachu.

⁴⁵ Chay kuydakuk runakuna fariseo runakunaman saserdotekunapa kamachikukninkunaman kutirkansapa. Mana Jesusta pushashpa kuitiptinkuna awtoridarkunaka tapurkansapa:

—¿Imapatí chay runataka mana pushamushkankichi?

⁴⁶ Chashna tapuptinkuna kuydak runakunaka willarkansapa:

—Payka sukaman allima rimanayukmi. Mana ni pi payshina allita yachachikunchu.

⁴⁷ Chaypina fariseo runakunaka willarkansapa:

—Ariya ñiachu chay runaka kankunatapish llullachishushkankichina?

⁴⁸ ūukaykunaka manami ni maykan paytaka kreyinisapachu. Niman suk awtoridar niman suk fariseo runa chay runataka kreyinisapachu.

⁴⁹ Aypa runakuna Tata Diospa killkadunta mana yachashpankuna paytaka kreyiykansapa. Chayrayku paykunata Tata Dios kastigankasapa.

⁵⁰ Chay fariseo runakunawan tantalla Nikodemo karkan. Chay Nikodemoka suk kuti tutapi Jesusta rirkana parlachik. Payka fariseo runa kayakashpa fariseomasinkunata willarkansapa:

⁵¹ —Tata Diospa killkadun willawanchisapa ama ni pita kastigananchiku-napa manara allita yachashpara imatami rurashka nishpa. Uchayuk kananta allita yachashpanchikunara chaypira kastigashunchisapa.

⁵² Chashna Nikodemo willaptinkuna fariseomasinkunata willarkansapa: —¿Kanpish Galileamantachu kanki? Mash Tata Diospa killkadunta yachakuy yachanaykipa mana niman suk alli yachachikuk runa Galilea-manta shamushkanta.

⁵³ Chay fariseokuna ayninakushkankunawasha wasinkunaman kutirkansapa.

8

Jesusman suk uchasapa warmita pusharkansapa.

¹ Fariseo runakuna wasinkunaman kutiptinkuna Jesuska Olivos urkuman rirkana. ² Kayantin diya pakariyaktin Tata Diospa wasinman ñukaykunawan kutirkana. Chaypi kaptin aypa runakuna laduncharkansapa. Jesuska tiyarishpa kallarikan paykunata yachachiysapata. ³ Chaypi yachachikuykaptin Moisespa killkadunta yachachikuk runakunawan fariseo runakuna suk warmita pusharkansapa. Payta chay runakunapa chawpinkunapi churarkansapa. Chay warmitaka tarirkansapa chikan ullkuwan uchallikuykaptin. ⁴ Chaypina Jesustaka willarkansapa:

—Maestru, kay warmita tarishkanisapa chikan ullkuwan uchallikuykaptin. ⁵ Moisespa killkadunpi yachachiwanchi kay laya warmikunata ruminchashpa wañuchinanchipa. ¿Ima ninkiti kanka? Ariya ¿wañuchishunchisapachu?

⁶ Chayta tapushpa chay runakunaka munarkansapa pantachishpa Jesusta chatakuuya. Chashna tapuptinkuna Jesuska mana nimata aynishpa kumurayashpa allpapi dedunwan killkakurkan. ⁷ Chashna killkakuykaptin chay runakunaka kuti kuti tapuykarkansapa. Chaypina Jesuska kuskayashpa paykunata willarkansapa:

—Maykan mana uchayuk kashpaykichika kallariychi kay warmita rumin-chayta.

⁸ Chashna rimashpa Jesuska kashkan kumurayashpa allpapi killkakurkan. ⁹ Chaypina tukuy paykuna uchankunata yuyamushpankuna sukmanta sukmanta llukshirkansapa. Ashwan vieju runakuna kallarirkansapa llukshiyta. Chaymanta viejukunata katishpa tukuyna llukshirkansapa. Tukuy chay runakuna llukshiptinkunana Jesuska chay warmiwan kiparirkan. ¹⁰ Chaypina Jesuska kuskayamushpa tapurkan:

—¿Maytanati chay chatashuk runakunaka rishkasapa? ¿Manachu niman suk animukushka ruminchashuya?

¹¹ Chashna tapuptin chay warmika aynirkan:

—Mana ni maykan, Señor.

Chaypina Jesuska willarkan:

—Ñukapish mana kastigaykichu. Kunan wasikiman rillay. Amana kashkan uchallikuynachu.

Jesus yachachikurkan tukuy runakunapa lusnin kananta.

¹² Jesus kashkan chay runakunata yachachishpa willarkansapa:

—Ñukaka tukuy runakunapa lusninshinami kani. Ñukata katiwashpaykichi manana tutapishinanachu purinkichi. Katiwaptikichi yachachiykichi alita rurashpa Tata Dioswan luspishina kawsanaykichipa.

¹³ Chashna Jesus willaptinkuna fariseo runakunaka willarkansapa:

—Kikillla rimaykanki lus kanaykita. Kanlla chayta rimaptiki mana kreyiykisapachu.

¹⁴ Chaypina Jesuska willarkansapa:

—Kankunaka mana yachankichichu maymantami shamushkani nima maymanmi rini nishpa. Ñukaka allita yachani maymantami shamushkani maymanmi rini nishpa. Chayrayku kikinipa rimanaynika allimi. ¹⁵ Kankuna kikikichipa yuyaynikichillamanta chatawayllapi purinkichi. Ñukaka manami kankunashinachu ni pita chataykani.

¹⁶ Ñukaka chatakushpaynika kuskanpi chatakuni. Mana sapallaynillachu chatakuni. Kachamuwak Tatayni Dioswan pakta chatakuni. ¹⁷ Kankunapa killkaduykichipi yachachishunkichi: Suk runa suk mana alli rurak runata kankunapi chataptin sukllalla chatakuk runata ama kreyiykichu. Ishkay runakuna idenllata chatakuptinkuna chaypira kreyiychi. ¹⁸ Nuka rimani alli yachachikuk kanaynita. Chaymanta kachamuwak Tataynipish idenllata riman. Chashna Tatayniwan nuka idenllata yachachikuptinikuna kankuna kreyiwanaykichi tiyan.

¹⁹ Chashna Jesus willaptinkuna chay runakunaka tapurkansapa:

—¿Maypití tataykika?

Chaypina Jesuska aynirkansapa:

—Kankunaka ñukata manami riksiwankichichu. Nima Tataynitapish riksinkichichu. Ñukata riksiwashpaykichika Tataynitapish riksinkichiman.

²⁰ Jesus chaykunata yachachikurkan Tata Diospa wasinpi ofrendakuna churanankuna kajonkunapa ladunpi. Chashna yachachikuptinpish manara ni pi animukurkanrachu apiya manara oran kaptin.

Jesus rimarkan mana payta kreyik runakuna sieluman mana chayanankunata.

²¹ Chashna manara apiya animukuptinkunara Jesuska kashkan yachachikushpa willarkansapa:

—Ñukaka kankunamanta anchusha. Chashna anchuptini maskawan-kichi. Kankunaka mana kreyiwashpaykichika uchaykichipi wañunkichi. Chayrayku mana atipankichichu chay rinayniman chayayta.

²² Chashna Jesus rimaptin chay runakunaka willanakurkansapa:

—Ichará kikin wañuchinakunayan. Chayrayku willawanchisapa mana atipananchikunata chay rinanman chayayta.

²³ Chashna willanakuptinkuna Jesuska willarkansapa:

—Kankuna kay allpallapi wañuk runakuna kankichi. Ñuka sielumanta shamushkani. Kankuna uchalla runakuna kankichi. Ñukaka manami kankunashina ucha rurak runachu kani. ²⁴ Chayrayku willashkaykichina uchaykichirayku wañunaykichita. Ñuka Tata Diosmanta shamudu runa kanaynita mana kreyiptikichi uchaykichipi wañunaykichi tiyan.

²⁵ Chashna Jesus yachachikuptin chay chiknik runakuna tapurkansapa:

—¿Pítí kanki?

Chaypina Jesuska aynirkansapa:

—¿Imapatí kashkan tapuwankichi? Kallarinanmantapacha willashkaykichina. ²⁶ Tiyanra aypa layata willanaynipa aypa mana alli rurashkaykitchita chatanaynipa. Kankuna mana kreyiwaptikichipish kachamuwak

Tatayni yachachiwashkanta kankunata yachachiykaykichi. Payka suka-man allima kashpa mana nima llullakunchu.

²⁷ Chashna Jesus allita yachachiptinkunapish chay chiknik runakunaka mana entiendirkansapachu Tatan Diosmanta shamushkanta. ²⁸ Chayrayku Jesuska willarkansapa:

—Kankuna suk kruspi chakatawashpaykichira yachankichi sielumanta shamudu runa kanaynita. Ñuka mana kikinipa yuyayninitachu rurashpa kawsani. Tata Dios yachachiwashkanllatami yachachiykaykichi. ²⁹ Kachamuwak Tatayni fiukawan tantalla kawsan. Payka manami sakiwanchu paypa munananllata ruraptini.

³⁰ Chashna Jesus yachachikuptinna aypa runakuna kreyirkansapa Tata Diosmanta shamudu runa kananta.

Jesus chay mana kreyik runakunata willarkansapa mana Tata Diosta kasushpa kawsaykanankunata.

³¹ Chaypina Jesuska chay kreyik runakunata yachachirkansapa:

—Kankuna yachachikushkaynita allita kreyishpa kawsashpaykichika de-verasmi disipuluynikuna kankichi. ³² Chaypira yachankichi kuskanpi yachachikushkaynita. Chaymanta yachachikushkaynita kreyishpaykichi mananami ñawpashina uchallikushpaykichinachu kawsankichi. Mananami patronpa mandunpishinanachu kawsankichi.

³³ Chaypina chay mana kreyinayak runakunaka willarkansapa:

—¿Imapatí willawankisapa fiukaykuna iden patronpa mandunpishina kanaynikunata? Ñukaykunaka ñawpa awiluynikuna Abrahampa mirakninmi kanisapa. Chayrayku mana ni pipa mandunpichu kanisapa.

³⁴ Chaypina Jesuska willarkansapa:

—Allita uyariwaychi. Kankuna uchasapa runakuna kashpaykichi mana atipankichichu allita rurashpa kawsaya. Chayrayku patronpa mandunpi runakunashina kankichi. ³⁵ Patronpa mandunpi kawsak runakuna mana tukuy tiempuchu chaypi kawsansapa. Patronpa wambrankunallami wasinpi kawsansapa. Kankuna munanaykichillata rurashpa manami Tata Diospa wambrankunachu kankichi. ³⁶ Ñuka Tata Diospa wambran kashpayni atipani yanapaynikichita amana uchallikushpa kawsanaykichipa. Chashna yanapaptinira atipankichi allita rurashpa kawsaya. Chaypirami manana patronnikichipishinanachu kawsankichi. ³⁷ Abrahampa miraknin kashpaykichipish mana willashkaynita chaskinkichichu. Chayrayku wañuchiwanayaykankichi.

³⁸ Ñukami Tatayni yachachiwashkanta yachachikuni. Kankunapish tataykichi willashushkankunata ruraykankichi.

³⁹ Chashna Jesus willaptinkuna chay runakunaka willarkansapa:

—Ñukaykunapa tataynikunaka Abrahammi.

Chaypina Jesuska willarkansapa:

—Abrahamka allillata rurashpa kawsarkan. Kankuna deveras paypa miraknin kashpaykichika payshina allillata rurashpa kawsankichiman.

⁴⁰ Mana kankunashinachu Abrahamka rurarkan. Ñuka Tata Dios yachachiwashkanta yachachiykaptinipish kankunaka wañuchiwanayankichi.

⁴¹ Kankuna chikan tatayuk kankichi. Chay tataykichiha mana alli rurananta kankunapish rurashpa kawsaykankichi.

Chashna Jesus willaptinkuna chay runakunaka piñakushpa willarkansapa:

—Manami chikan tatayukchu kanisapa. Ñukaykunapa tataynikunaka Tata Diosllami.

42 Chashna willaptinkuna Jesuska willarkansapa:

—Kankuna deveras Tata Diospa wambrankuna kashpaykichika ñukata kuyawankichiman. Tata Dios kachamuwashka kaptin kay allpaman shamushkani. Manami kikinipa yuyaynинillamantachu shamushkani.

43 Ņuka yachachikuptini kankunaka mana kreyiwanayankichichu. Chayrayku mana atipankichichu rimanaynita entiendiyta.

44 Supayta uyarishpa munananllata rurashpa kawsankichi. Chayraykumi supayka tataykichi. Paypa mandunpi kawsaykankichi. Supayka kallarinanmantapacha wañuchikukmi. Sukaman llulla likidu kashpa sukaman llullachikupi purin. Manami niman suk kuti kuskatachu riman. Kikinlla-manta llullakushpa riman. Payka llullallata yachachikun. **45** Ņuka kuskata yachachikuptinipish kankunaka manami kreyiwanayankichichu. **46** Ņukami allillata rurashpa kawsaykani. ¿Maykan kankunati willawankichi uchayuk kanaynita? Ņuka mana llullakushpa kuskata yachachikuptini ¿imapati mana kreyiwanayankichi? **47** Kankuna Tata Diospa wambrankuna kashpaykichika paypa rimananta uyarinkichiman. Mana Tata Diospa wambrankuna kashpaykichi rimananta mana kasunayankichichu.

Jesus chiknik runakunawan sukanan ayninakurkan.

48 Chashna Jesus willaptinkuna chay runakunaka sukanan piñakushpa willarkansapa:

—Kuskata rimashkanisapa samaritano runa kanaykita. Supayadumi kanki.

49 Chaypina Jesuska willarkansapa:

—Manami supayaduchi kani. Tatayni Diosta kushichishpalla kuyani. Payta allita kuyaptinipish kankuna mana kreyiwashepa mana nimatashina kawawankichi. **50** Mana allita yuyawaptikichipish ñukapa mana ni-mananchu. Tatayni Dios sukanan munan kankuna kuyawanaykichi. Mana kuyawashkaykichirayku payka kastigashunkichi. **51** Mash allita uyariwaychi. Tukuy ñukapa yachachikunaynita kasushpa kawsak runakuna manami wañunkasapachu.

52 Chashna Jesus rimaptinna chay chiknik runakunaka willarkansapa:

—Kunanka ñami allitana yachanisapa supayadu kanaykita. Ñawpa kawsak awilunchikuna Abrahamka tukuy ñawpa alli yachachikuk runaku-napish wañurkansapa. ¿Imapatí rimanki tukuy yachachikunaykita ka-sushpa kawsak runakuna mana wañunankunata? **53** Ariya ¿ñawpa tiempu kawsak awilunchikuna Abrahammanta ashwan alli yachakchu kanki? Payka wañurkan. Chaymanta tukuy ñawpa alli yachachikuk runakunapish wañurkansapa. ¿Ima laya runa kanaykitati yuyanki?

54 Chashna willaptinkuna Jesuska willarkansapa:

—Kankunaka mana entiendiwaykankichichu. Manami kikinillachu alabanakuni. Kikinilla alabanakushpaynika mana allitachu rimayman karkan. Tataynimi ñukata alabawan. Kankuna rimankichi ñukapa Tatayni kankunapipish Diosnikichi kananta. **55** Chashna rimashpaykichipish manami paytaka riksinkichichu. Ñukami esika allita riksini. Tata Diosta mana riksinyaynita rimashpaynica ñukapish kankunashina llullakuk runa kayman. Tata Diosta allita riksishpayni rimananta allita kasuni. **56** Kankunapa ñawpa awiluykichi Abrahamka kushikurkan yachashpa ñuka sielumanta shamunaynita. Chaymanta shamusaynita kawashpana sukanan kushikurkan.

57 Chashna Jesus willaptinkuna chay chiknik runakunaka willarkansapa:

—Llullakuykankimi. Ñami aypa watakunana awilunchi Abraham wañushkan. Kanka manara nima pichka chunka watayuk kashpaykira ¿impati rimanki Abrahamta riksishkaykita?

⁵⁸ Chashna willaptinkuna Jesuska willarkansapa:

—Mash allita uyariwaychi. Manarapish Abraham tiyaptinra ñukami ashwan ñawpamantapacha kawsaykani.

⁵⁹ Chashna Jesus willaptinkuna chay runakunaka sukaman piñakushpangkuna rumikunata apirkansapa ruminchanankunapa. Ruminchanayaptinkuna Jesuska chay aypa runakuna ukunpi pakakushpa Tata Diospa wasinmanta llukshirkan.

9

Jesus suk mana kawakuk runata alliyachirkan.

¹ Tata Diospa wasinmanta llukshishpa Jerusalen llaktapi Jesuska ñukaykunawan puriykarkan. Chaypina suk mana kawakuk runata kawarkanisapa. Chay runaka nasishkanmantapacha mana kawakurkanchu. ² Payta kawashpaynikuna Jesusta tapurkanisapa:

—Maestru ¿impati chay runaka mana kawakuk nasishka? ¿Kikinpa uchan-raykuchu? ¿Tatanpa mamanpa uchankunaraykuchu mana kawakuk na-sishka?

³ Jesuska willawarkansapa:

—Kay runaka manami kikinpa uchanraykuchu nima tatanpa nima mamanpa uchanraykuchu mana kawakuk nasirkan. Payka chay laya nasirkan Tata Dios kankunata kawachishunaykichipa atipananta alliyachiya. ⁴ Wañunanchikuna diyakaman kachamuwak Tatayni willawashkanchikunata rurananchikuna tiyan. Wañushpanchikuna manami atipanchisapachu trabajayta. ⁵ Manarapish wañushpaynira runakunata yachachiykani. Chashna yachachikushpayni ñukaka tukuy runakunapa lusninshinami kani.

⁶ Chayta rimashkanwasha Jesuska allpapina tukakurkan. Chay tukayn-inwan suk tipi turuta rurarkan. Chaypina turuwan chay mana kawakuk runapa ishkantin ñawinkunata tuparkan. ⁷ Tupashpana willarkan:

—Rillay Siloe tantanachidu yakupi ñawikita mayllamuy.

Siloe shutin riman Kallpachimudu Yaku. Chashna Jesus willaptin payka rirkhan ñawinkita mayllakna. Mayllashkanwasha atiparkan kawakuyta. Chaypina allita kawakushpa wasinman kutirkan. ⁸ Chaypina chay alliyadu runapa ladunpi kawsakkuna chay kullkita mañakuptin kawak runakuna payta kawashpa tapunakurkansapa:

—¿Manachu kayka tiyarishpa kullkita mañakuk runa?

⁹ Sukkuna rimarkansapa:

—Ariya paymi mana kawakuk runa karkan.

Sukkuna rimarkansapa:

—Payshina rikurishpapish manami paychu.

Chashna chay runakuna sukaman ayninakuptinkuna chay alliyadu runaka willarkansapa:

—Ñukami kani kullki mañakuk runaka.

¹⁰ Chashna rimaptinna chay riksik runakunaka tapurkansapa:

—¿Imashnatí atipanki kawakuyta?

¹¹ Chashna tapuptinkuna willarkansapa:

—Chay runa Jesusmi suk tipi turuta rurashpa ñawinikunata tupashpa willawashka: “Rillay Siloe yakupi ñawikita mayllamuy.” Chashna

willawaptinna rirkani mayllak. Mayllashkaynimantapacha atipani allita kawakuyta.

¹² Chaypina chay runakuna paytaka tapurkansapa:

—¿Maypití kunanka chay alliyachishushka runaka?

Chashna tapuptinkunana willarkansapa:

—Manami yachanichu.

Samana diya Jesus chay runata alliyachishkanrayku fariseo runakuna sukmānapiñakurkansapa.

¹³⁻¹⁴ Jesus chay mana kawakukpa ñawinta turuwan tupashpa alliyachishkan diyaka samana diya karkan. Chayrayku ladunpi kawsak runakuna chay runataka fariseo awtoridarkunaman pusharkansapa chatanankunapa. ¹⁵ Chaypina fariseokunaka payta tapurkansapa:

—¿Imashnatí kanka mana kawakuk kashkaykimanta atipanki kawakuytana?

Chashna tapuptinkuna willarkansapa:

—Suk runa turuwan ñawinita tupaptin rishkani yakuwan mayllak. Maylashkayni ratumanta atipani kawakuyta.

¹⁶ Chashna willaptinkuna suk fariseokunaka rimarkansapa:

—Samana diya alliyachishushpa chay runaka manami Tata Diosmanta shamudu runachu.

Sukkuna rimarkansapa:

—Uchaspasa runa kashpaka manami atipanmanchu kay almirana layata rurayta.

Chashna ayninakushpankuna chay fariseokunaka mana atiparkansapachu suk yuyayllapi kipariyta. ¹⁷ Chaypina kashkan chay alliyadu runataka tapurkansapa:

—Chay alliyachishuk runapaka ¿imatati kanka rimanki?

Chaypina chay runaka willarkansapa:

—Ñuka yuyani alli yachachikuk runa kananta.

¹⁸ Chaypina chay awtoridarkunaka mana kreyinayarkansapachu chay runa mana kawakuk kashkanta nima alliyadu kashkanta. Chayrayku payta llukshichishpankuna tatanta mamanta kayachirkansapa. ¹⁹ Tatan maman shamuptinkuna paykunata tapurkansapa:

—Kankuna willawaysapa. ¿Deveraschu chay runaka wambraykichi? ¿Deveraschu mana kawakuk nasishka? Mana kawakuk nasishpaka ¿imashnatí kunanka allitana atipan kawakuyta?

²⁰ Chaypina tatan mamanka willarkansapa:

—Ariya chay runaka wambraynikunami. Ariya mana kawakukmi nasirkan. ²¹ Manami yachanisapachu imashnami alliyashka nishpa. Nima yachanisapachu pimi alliyachishka nishpa. Kikinta tapuychi. Payka ñami atun runana. Paymi allita willashunkichi imashnami atipashka kawakuyta.

²² Tatan mamanka manchakuywan chashna aynirkansapa. Manarapish Jesus chay runata alliyachiptin fariseo awtoridarkuna paktanakushpa tukuy runakunata willarkansapa: “Maykan runa rimartin Jesus Tata Diosmanta shamudu runa kananta paytaka tantanakunanchikuna wasimanta karkushunchisapa ama kutin yaykunarpa.”

²³ Fariseokunata manchashpankuna chay alliyadu runapa tatan mamanka willarkansapa: “Payka ñami atun runana. Kikinta tapuychi.”

²⁴ Chaypina awtoridarkunaka chay alliyadu runata kashkan yaykuchishpankuna willarkansapa:

—Tata Dioska tukuy rimanaykita uyariykan. Chayrayku kuskata rimay. Ñukaykuna yachanisapa chay alliyachishushka runaka sukaman uchasapa kananta.

²⁵ Chashna willaptinkuna payka willarkansapa:

—Ñukaka manami yachanichu chay runa uchasapachu manachu nishpa. Allita yachani mana kawakuk kashkaynimanta allitana kawakunaynita.

²⁶ Chaypina kashkan tapurkansapa:

—¿Imata rurashpatí chay runaka alliyachishushka?

²⁷ Chaypina payka aynirkansapa:

—Ñami tukuytana willashkaykichi. Willaptinipish manami kreyiwanichichu. ¿Imapatí kuti kuti tapuwankichi? Ichará kankunapish Jesustaka katinayakichi.

²⁸ Chaypina chay awtoridarkunaka sukaman piñayashpa willarkansapa:

—Kanmi chay runataka katinki. Ñukaykunaka ñawpa alli yachachikuk Moisesllata katinisapa. ²⁹ Allita yachanisapa Tata Dioska Moiseswan parlashkanta. Mana nima yachanisapachu pimi chay Jesusta kachamushka nishpa.

³⁰ Chaypina chay runaka willarkansapa:

—Ñukaka sukaman almirani kankuna mana yachaptikichi pimi Jesusta kachamushka nishpa. Chay runa alliyachiwashkanrayku yachankichiman Tata Dios kachamushkanta. ³¹ Tukuy runakuna allita yachanchisapa Tata Dios payta kuyak payta kasuk runakunallata uyarinankunata. Manami uchasapa runakunata uyarinsapachu. ³² Ñawpamantapacha kunnakan mana uyarishkanchisapachu ni pi mana kawakuk nasishkata alliyachishkanta. ³³ Kay runa mana Tata Diosmanta shamushka kashpaka manami kay almirana milagruta atipanmanchu ruraya.

³⁴ Chashna chay runa willaptinkuna fariseo awtoridarkunaka sukaman piñakushpa willarkansapa:

—Kanka nasishkaykimantapacha sukaman uchasapami kanki. Chashna uchasapa kayakashpaykika ¿imashnatí ñukaykunata yachachiwanayankisapa?

Chayta willashpankuna chay runata chay tantanakunankuna wasimanta karkurkansapa.

Jesus yachachikurkan mana kreyikuk runakuna iden mana kawakuk runakunashina kanankunata.

³⁵ Chaymanta Jesuska yacharkan chay alliyachishkan runata karkushkankunata. Chayta yachashpa payta tarishpa tapurkan:

—¿Kanka kreyinkichu Tata Diospa wambran sielumanta shamushkanta?

³⁶ Chashna Jesus tapuptin chay runaka willarkan:

—Maestru, willaway ¿pití chay sielumanta shamudu runaka payta kreyinaynipa?

³⁷ Chashna chay runa willaptin Jesuska willarkan:

—Ñukami kani. Mana riksiwashpaykipish parlachiwaykanki.

³⁸ Chaypina chay runa Jesusta kuyashpa ñawpkninpi kunkurikushpa willarkan:

—Señor, kreyikuni Tata Diosmanta shamushkaykita.

³⁹ Chaymanta Jesuska willarkan:

—Ñukaka sielumanta kay allpaman shamushkani tukuy kreyiwak runakunata salvanaynipa mana kreyiwak runakunata kastiganaynipa. Uchasapa runakuna iden mana kawakuk runakunashina. Paykuna munaptinkuna yachachishasapa allita Tata Diosta riksinankunapa. Chaymanta suk

runakuna kikinlla llullachinakushpa rimansapa Tata Diosta allita riksinankunata. Paykunaka yuyanakunsapa alli kawakuk runakunashina kanankunata. Ñukaka sielumanta shamushkani paykunata yachachinaynipta mana kawakukshina kanankunata.

40 Chayta uyarishpa suk fariseokuna willarkansapa:

—¿Ñukaykunatachu willawaykankisapa iden mana kawakuk runakunashina kanaynikunata?

41 Chaypina Jesuska aynirkansapa:

—Kankuna llullakushpa rimankichi alli kawakuk runakunashina Tata Diosta allita riksinaykichita. Chayrayku Tata Dios kastigashunkichi. Kankuna mana kawakuk runakunashina mana Tata Diosta riksiyta yachaptikichika payka mana kastigashunkichimanchu.

10

Jesus yachachikurkan ovejakuna kuydak runapa ejemplunta.

1-2 Chaymanta Jesuska chay runakunata yachachishpa willarkansapa:

—Allita uyariwaychi. Tiyan ovejakunapa alli kuydak runa. Amusayaptin payka ovejankunata wertapi yaykuchin tutapi allita kuydanankunapa. Chay wertapa suklalla punkunta chay alli kuydak runaka yaykun. Wakin runakuna suwakunayashpa maytapisch kaptin chay wertata yaykunasa.

3 Chaymanta tukuy tuta suk runa chay werta punkunpi kiparin kuydanarpa. Pakariptin punkuta kicharin ovejakuna kuydak runa yaykunarpa. Chaypina chay diyapi kuydak runa tukuy kikinpa ovejankunata sukta sukta shutinkunamanta kayashpa llukshichinsapa. Ovejakunaka kuydakpa ikunta allita riksishpa katinsapa. **4** Chashna ovejankunata llukshichishpa ñawpakaninkunata rin. Chay ovejakuna kikin kuydakninpia ikunta riksishpa katinsapa. **5** Chikan runapa ikunta mana riksishpa mana katisapachu. Chay chikan runa kayaptinpish mana riksishpa manchakushpa nitikunsapalla.

6 Chashna Jesus yachachiptinkuna chay chiknik runakunaka mana entiendirkansapachu imapami chashna yachachirkansapa nishpa.

Jesus yachachikurkan iden ovejakunapa alli kuydak runashina kananta.

7 Chashna chay runakuna mana entiendiptinkuna Jesuska kashkan yachachirkansapa:

—Mash allita uyariwaychi. Ñukaka ovejakunapa yaykunan punkunshinami kani. **8** Ñukamanta ñawpakte aypa llullakuk runakuna shamurkansapa. Paykunaka sukaman pantachichishushpaykichi ovejakunata suwakuk runakunashinami. Ovejaynikuna ñukata allita riksiwashpa mana paykunata kasushkasapachu. **9** Ñukaka ovejaynikunapa punkunshinami kani. Ñukata katiwaptikichi amachaykichi ama ni pi wakllichishunaykichipa. Tata Diospa kawsanani pi yaykuchiyykichi. Yachachikunaynikunata kreyishpaykichika ovejakuna alli pastuta tarikshinami kankichi.

10 Tukuy mana alli yachachikuk runakuna ovejakuna suwak runakunashinami. Suwa runa shamen ovejakunata suwaklla wañuchiklla kuluchiklla. Ñukaka shamushkani allita yanapaknikichi sukaman allita kushikushpa Tata Dioswan kawsanaykichipa.

11 Ñukaka ovejakunata alli kuydak runashinami kani. Alli kuydak runa kashpayni wañusha ovejaynikunata yanapanaynikunapa.

¹² Wakin runakuna kullkita chaskinayashpalla ovejakunata kuydansapa. Chay ovejakuna mana kikinkunapa kaptin mana allitachu kuydansapa. Puma shamuptin ovejakunata sakishpa kallpansapa mana doyñunkuna kashpankuna. Chaypina puma tukuy ovejakunata chayta chayta kallpachinsapa. ¹³ Chay kullkita munashpalla kuydakuk runakuna mana nima llakichishpa ovejakunata sakinsapa.

¹⁴⁻¹⁵ Ñukaka mana paykunashinachu kani. Ñukaka ovejakunata alli kuydakshinami kani. Tatayni Dios sukaman allita riksiwan. Ñukapish sukaman allita payta riksini. Chashnashina ñuka ovejaynikunata riksini. Ovejaynikunapish ñukata riksiwansapa. Kankuna riksiwashpaykichi ovejaynikunashinami kankichi. Ovejaynikunashina kaptikichi wañusha kankunata salvanaynikunapa.

¹⁶ Chaymanta chikan kasta runakuna tiyan. Paykunapish ovejaynikunashinami. Paykunapish riksiwashpaa kasuwashpaa kawsankasapa. Chaypina kankuna paykunawan ovejaynikunashina kankichi. Ñukallami tukuy kankunata kuydashkaykichi.

¹⁷ Kankunata kuydashpaa wañusha. Wañushkaynimanta kashkan kawsamusha. Chayrayku Tatayni sukaman kuyawan. ¹⁸ Tatayni Dioska kachamuwashka wañushpaa kashkan kawsamunaynipa. Chayrayku ñuka kikini munashpaa wañusha. Kikini munashpaa kashkan kawsamusha. Mana munaptinika ni pi wañuchiwanmanchu.

¹⁹ Chashna Jesus willaptinkuna chay chiknik runakunaka suk layata suk layata ayninakurkansapa. ²⁰ Sukkuna rimarkansapa:

—Kay runaka supayadu kashpa dementu likidumi. Chayrayku ama paytaka kreyiypachichu.

²¹ Sukkuna Jesusta kreyishpa willanakurkansapa:

—Payka mana supayaduchu. Supayadu runa mana chashnachu willawanchimansapa. Supayadu runa mana alliyachinmanchu mana kawakuk runata.

Chiknik runakuna Jesusta wañuchinayarkansapa.

²² Jerusalen llaktapi tamya tiempu tukuy wata suk fiestata ruranisapa. Ñawpa tiempu awiluynikuna Tata Diospa wasin wakllidu kashkamanta allicharkansapa. Chay allichashkankunata yuyashpa chay fiestata ruranisapa. ²³ Chaypina Tata Diospa wasin atun ramadonpi Jesuska puriykarkan. Chay ramadonpa shutin karkan Salomon Yaykunan. ²⁴ Chay ramadonpi puriykaptin chiknik runakuna payta laduncharkansapa. Piñayashpa tapurkansapa:

—¿Imapatí mana allita willawankisapa? Shuyaykanaynikuna Tata Diosmanta shamudu runa kashpaykika kunanlla willawaysapa.

²⁵ Chashna willaptinkuna Jesuska aynirkansapa:

—Ñami kuskatana willashkaykichi. Kankunaka manami kreyiwanayanachichu. Tatayni allita willawaptin aypa almirana milagruta rurashkani. Chaykunata kawashpaykichi yachankichiman ñuka shuyaykanaykichi Tata Diosmanta shamudu runa kanaynita.

²⁶ Kankunaka mana ñukapa ovejaynikunachu kankichi. Chayrayku mana kreyiwanayanachichu. ²⁷ Ovejaynikunami ikuynita uyarishpa katiwansapa. Ñukapish paykunata allita riksinisapa. ²⁸ Ñuka ovejaynikunata kuydaptinikuna makinimanta mana ni pi niman sukta kichuwankachu. Ñuka paykunata kawsachiptini Tata Dioswan mana tukuyniyukta kawsankasapa. Mana kutin wañunkasapachu. ²⁹ Tatayni Dioska tukuy

kreyiwak runakunata ñukapa makinipi kuwashka kuydanaynipasapa. Paypish paykunata kuydansapa. Tatayni Dioslla tukuy pimanta ashwan rikchak layata atipan rurayta. Chayrayku mana ni pi paýpa makinmanta chay kreyiwak runakunata atipanchu kichuya. ³⁰ Ñuka Tatayni Dioswan suklalla kanisapa.

³¹ Chashna Jesus rimaptinna chay chiknik runakunaka kashkan rumikunata apirkansapa Jesusta ruminchanankunapa. ³² Ruminchanayaptinkuna Jesuska willarkansapa:

—Tatayni Dios yanapawaptin ñuka rikchak laya alli ruranakunata rurashkani. ¿Ima alli rurashkayniraykutí wañuchawanayankichi?

³³ Chashna Jesus tapuptinkuna chay chiknik runakunaka willarkansapa:

—Manami alli rurashkaykiraykuchu wañuchinayakisapa. Runalla kayakashpayki rimaykanki Tata Dioswan suklalla kanaykita. Chashna rimashpayki sukaman uchallikuykanki. Chayrayku wañuchinayakisapa.

³⁴ Chashna willaptinkuna Jesuska willarkansapa:

—Kankunapa killkaduykichi Tata Dios riman: “Ñuka willashkaykichi dioskunashina kanaykitchita.” ³⁵ Chashna Tata Dios rimaptin mana ni pi atipanchisapachu rimayta mana alli kananta. Tata Dios suk kamachikük runakunata willarkansapa paykuna dioskunashina kanankunata.

³⁶ Ñuka Tata Diospa wambran kaptini payka akllawashpa kachamuwashka kay allpaman shamenaynipa. Chayta rimaptini ñimapati willawaykankichi Tata Diosta piñachinaynita? ³⁷ Tatayni ruranan milagrukunata mana ruraptinika alli kanman mana kreyiwanaykichi. ³⁸ Chay almirana milagrukunata ruraptini kreyiwanaykichi tiyan. Mana ñukata kreyiwashpaykichiipish kreyiychi Tata Dios yanapawaptin chay milagrukunata rurashkaynita. Chashnamanta yachankichi Tatayni Dios ñukawan kawsananta. Ñukapish paywan kawsani.

³⁹ Chashna Jesus rimaptin chay chiknik runakunaka kashkan munarkansapa apiyta. Apinayaptinkunapish Jesus paykunamanta kishpishpa ashurkan.

⁴⁰ Ashushpana Jordan yakuta chimbashpa Jesuska ñukaykunawan kuitkan maypicha Juan bawtisashkan llaktaman. Chay llaktapi kiparirkan.

⁴¹ Chayman riptynikuna aypa runakuna rirkansapa Jesusta kawak. Paykunaka rimarkansapa:

—Juanka manami niman suk almirana milagruta rurashkachu. Mana ruraptinpish tukuy Jesuspa willawashkanchikunata kawaykanchisapa.

⁴² Chashna rimashpa aypa chay llaktapi kawsak runakuna kreyirkansapa Jesus Tata Diosmanta shamudu runa kananta.

11

Jesuspa parlakmasin Lasaro wañurkan.

¹ Jesuspa tiyarkan suk parlakmasin Lasaro. Payka fatalta unkurkan. Lasaroka kawsarkan Betania llaktapi ishkay paninkunawan tantalla. Suk panin karkan Marta. Suk karkan Mariya. ² Chay tiempu Mariyaka manara mishkilla asnak wirata Jesuspa chakinpi ichapurkanrachu nima chukchanwan chakichirkanrachu.

³ Chaypina Lasaro fatal unkudu kaptinna chay ishkay paninkunaka Jesusta kayachishpa willachirkansapa:

—Señor, kuyanakukmasikika fataltami unkun.

⁴ Chashna Lasaropa paninkuna willachiptinkuna Jesuska yacharkan Lasarota wañushkanmanta kawsachimunanta. Chayrayku ñukaykuna disipulunkunata willawarkansapa:

—Lasaro wañushpapish mana wañudu chukiparinka. Payka unkushka tukuy runakuna yachanankunapa Tata Dios rikchak laya atipak kananta. Unkushka tukuy runakuna yachanankunapa ñuka Tata Diospa wambran kashpa rikchak laya atipak kanaynita.

⁵ Jesuska sukaman Lasarota paninkunata kuyashpapkunapish manara rinayarkanrachu paykunata kawak. ⁶ Lasaro unkudu kananta yachashpapish ishkay diyatara chay llaktapi kiparirkan. ⁷ Chaypina ñukaykunata willawarkansapa:

—Akuychi kashkan Judea partiman.

⁸ Chashna Jesus willawaptinkuna willarkanisapa:

—Maestru, kanimpalla Judea partipi kaptiki chiknishuk runakuna ruminchashunayarkansapa wañuchishunayashpa. ¿Imapati chayman kashkan rinayanki?

⁹ Chashna ñukaykuna willaptinikuna Jesuska willawarkansapa:

—¿Manachu intika chunka ishkay orata lusichikun? Chashna lusichikuptin atipanchi mana mitkakushpa puriya. ¹⁰ Tutapi mitkakuypu purinchisapa mana lus tiyaptin.

¹¹ Tukuy chayta rimashkanwasha Jesuska willawarkansapa:

—Chay alli parlakmasinchikuna Lasaroka ñami puñuykanna. Risha rikchachik.

¹²⁻¹³ Chashna willawashpankuna Jesuska rimaykarkan Lasaro wañushkanta. Ñukaykuna yuyarkanisapa puñuykananllata rimashkanta. Chayrayku willarkanisapa:

—Maestru, puñushpaka alliyankami.

¹⁴ Chaypina Jesuska kuskata willawarkansapa:

—Lasaroka ñami wañushkana. ¹⁵ Kushikuni kawsaykaptinra mana riñayashkaynita. Suk alli almirana milagruta rurasha ashwan allita kreyiwanaykichipa. Kunanka akuychina kawak.

¹⁶ Chashna Jesus willawaptinkuna disipulumasinkuna Tomas Gemelo willawarkansapa:

—Akuychi ñukanchikunapish Jesuswan tantalla wañuk.

Jesus Martata yachachirkan.

¹⁷ Chaymanta rishpaynikuna Betania llakta mañanpi chayarkanisapa. Chaypina Jesuska uyarirkan chusku diyana Lasaro pampadu kananta.

¹⁸ Betania llaktamanta Jerusalen llaktaka kimsa kilometrullapi karkan.

¹⁹ Jerusalenpi kawsak runakuna Lasaro wañushkanta yachashpankuna aypa rirkansapa Mariyata Martata kushichik ama sukaman llakinankunapa.

²⁰ Marta Jesus chayaykananta yachashpa llukshirkan tinkuk. Mariyaka wasillapi kiparirkan. ²¹ Chaypi Jesusta tinkushpa willarkan:

—Maestru, turinika ñami wañushkana. Kaypi kaptikika manami wañunmanchu karkan. ²² Chashna wañudu kaptinpish yachani kunan Tata Dios rikchak laya willanaykita rurananta.

²³ Chaypina Jesuska willarkan:

—Turikika kawsamunan tiyan.

²⁴ Martaka willarkan:

—Ariya allita yachani kay allpa tukunan diya tukuy wañudu runakuna kawsamunankunata. Chay diya turinipish kawsamunka.

25 Chashna willaptin Jesuska willarkan:

—Ñukami kawsachikuk runa kani. Ñukata kreyiwashpa kawsak runakuna wañushpapist kashkan kawsamunankuna tiyan mana kutin wañunankunapa. **26** Tukuy ñukata kreyiwashpa kawsak runakuna wañushpapist kawsamunkasapa. ¿Kay willashkayni kreyinkichu?

27 Chashna willaptin Martaka willarkan:

—Ariya maestru, ñukaka tukuy shunku kreyini kanna shuyaykanaynikuna Tata Diosmanta shamudu runa kanaykita. Tata Diospa wambran kashpayki kay allpaman shamushkanki.

Lasarota pampashkankuna machay ladunpi Jesus wakakurkan.

28 Chayta willashkanwasha Martaka Jesusta sakishpa ñañan Mariyata rirkana kayak. Wasinpi chayashpa upallala willarkan:

—Maestrunchika chayrak chayamushka. Munan rinaykipa kawak.

29 Chashna willaptin Mariyaka utkakushpa rirkana Jesusta tarik. **30** Jesuska manara Betania llaktapika yaykurkanrachu. Maypicha Martawan parlashkanpi kiparirkan Mariyata shuyashpa.

31 Chaypina Mariya turbakushpa wasinmanta llukshiptin chay kushichik runakuna kawarkansapa. Paÿkunaka katirkansapa yuyashpa Mariya riyananta turinta pampashkankunapi wakakuk. **32** Mariya Jesuspi chayashpana ñawpakinipi kunkurikushpa willarkan:

—Maestru, kaypi kaptikika turinika manami wañunmanchu karkan.

33 Chashna willashpana Mariyaka sukaman wakakurkan. Chay katik runakunapish wakakurkansapa. Tukuy paykunata kawashpa Jesuspish sukaman turbakushpa llakirkan. **34** Chaypina tapurkansapa:

—¿Maypiti Lasarota pampashkankichi?

Paykunaka willarkansapa:

—Mash akuychi kawak.

35 Chaypina Jesuspish wakakurkan. **36** Chashna wakakuptin kawashpa chay runakuna almirashpa willanakurkansapa:

—Mash kawaychi. Sukaman Lasarota kuyashka.

37 Sukkuna rimarkansapa:

—Kay runaka mana kawakuk runata alliyachirkan. Lasaro manarapish wañuptinra ¿imapati mana alliyachishka?

Lasaro wañushkanmanta kawsamurkan.

38 Chaypina Jesus kashkan sukaman llakishpa Lasarota pampashkanku-napi chayarkan. Suk machay ukupi pampadu karkan. Chay machaypa punkun atun rumiwan wichkadu karkan. **39** Jesus chaypi chayashpa katik runakunata willarkansapa:

—Chay rumita ashuchiychi.

Chashna Jesus willaptinkuna wañudupa panin Martaka payta willarkan:

—Maestru, ñami chusku diyana turini wañushkan. Ñami sukamanna asnan.

40 Chashna willaptinna Jesuska willarkan:

—¿Manachu willashkaykina tukuy shunku kreyiwashpaykika Tata Dios rikchak laya atipak kananta kawanaykita?

41 Chaypina chay rumita ashuchiptyinkuna Jesuska altuta chapashpa Tatanta willarkan:

—Tatayni, kanta roygaptini uyariwashkanki. Chayrayku sukaman agradesiyki. **42** Ñukaka allita yachani parlachiptini tukuy tiempu uyari-wanaykita. Chayrayku kunanka roygayki yanapawanaykipa kay runakuna kreyiwanankunapa kachamuwashkaykita.

43 Chaypina Tatanwan parlashkanwasha Jesuska sinchita kayarkan:
—¡Lasaro, chay machay ukumanta llukshimuy!

44 Chashna Jesus willaptinna Lasaroka kawsamushpa chay machay ukumanta llukshimurkan. Kunkanmanta chakinkaman llachapawan alli wankudu karkan. Uyanpish llachapawan arkadu karkan. Chashna llukshimuptin Jesuska chay runakunata willarkansapa:

—Chay wankushkankuna llachapata surkupuychi wasinman rinanpa.

Chashna Jesus willaptinkuna wankushkan llachapata surkupurkansapa.

Awtoridarkuna parlanakurkansapa Jesusta wañuchinankunapa.

(Mt 26.1-5; Mr 14.1-2; Lk 22.1-2)

45 Chaypina aypa Mariyawan rik runakuna Jesus Lasarota kawsachimushkanta kawashpana kreyirkansapa Jesus Tata Diosmanta shamudu runa kananta. **46** Chaypina suk kawak runakuna rirkansapa fariseo awtoridarkunata willak Jesus Lasarota wañushkanmanta kawsachimushkanta.

47 Chaypina fariseokunawan saserdote kunapa ashwan sinchi awtoridarminkuna tantanakushpa willanakurkansapa:

—¿Imatati rurashunchisapa? Chay runaka aypa almirana milagrukunata ruraykan.

48 Sukkunaka rimarkansapa:

—Ichará ashwan almirana milagrukunata ruraptin tukuy runakuna paytana kreyishpa katinkasapa. Chashna tukuy runakuna payta katiptinkuna romano kamachiwakninchikuna piñakushpa shamenmansapa Tata Diospa wasinta urmachik. Chaymanta ñukanchikunawan makanakushpa kulluchiwanchimansapa.

49 Chay tantanakudu awtoridarkunapi tiyarkan saserdote kunapa ashwan sinchi kamachikuk runa. Chay wata chay ashwan sinchi kamachikuk saserdote karkan Kayfas. Payna tukuy chay tantanakudu awtoridarkunata willarkansapa:

—Kankunaka manami nimata yachankichichu. **50** ¿Manachu yachankichi? Ashwan alli kanman suk runalla wañunarpa ama tukuy israel runakuna wañunanchikunapa.

51 Chay wata Kayfas tukuy saserdote kunapa sinchi kamachikunkinkuna kaptin Tata Dioska payta yachachiykarkan. Chayrayku mana kikinpa yuyayninmantachu chayta rimarkan. Tata Dios yachachiptin rimarkan Jesus wañunanta ama judiyu runakuna wañunankunapa. **52** Tata Dios payta yachachirkan manami judiyu runakunallapachu Jesus wañunanta. Jesuska wañurkan tukuy llaktakunamanta Tata Diospa wambrankunatapish tantañchinankunapa.

53 Chay judiyu awtoridarkuna parlashkankuna diyamantapacha allita yuyaykurkansapa Jesusta wañuchinankunapa.

54 Jesuska chayta yachashpa manana yachachikuypinachu purirkan. Judea partimanta ñukaykunawan tantalla llukshirkan. Chaypina Efrayin llaktapi chayarkanisapa. Chay llakta ladunpi tiyarkan manllayba chunlla chakidu allpa. Chay llaktapi Jesuska ñukaykunawan kiparirkan.

55 Chay tiempu tipillana illarkan judiyu runakuna Paskua fiestata rurashpa Tata Diosta kuyanaynikunapa. Manarapish chay fiesta kallariptin Jerusalen llaktapi aypa runakuna chayamuykarkansapa. Paykunaka Tata Diосpi chuya chuya mana uchayuk rikurinankunapa armakurkansapa. **56** Chashna Jerusalen llaktapi paykuna chayashpangkuna Jesusta maskarkansapa. Tata Diospa wasinman rishpa sukwani tapunakurkansapa:

—¿Imatati yuyankichi? ¿Kay Paskua fiestaman shamunkachu?

⁵⁷ Fariseo runakunawan saserdote kunapa awtoridarninkuna Jesusta apinayarkansapa wañuchinankunapa. Chayrayku Paskua fiesta pasak runakunata willarkansapa:

—Yachashpaykichi maypimi Jesus kananta willawaychi.

12

*Mariya Jesuspa chakinpi mishkilla asnak wirata icharkan.
(Mt 26.6-13; Mr 14.3-9)*

¹ Chaymanta sokta diya Paskua fiesta illaptin Betania llaktaman Jesuska ūukaykunawan kashkan rirkana. Chay llaktapi Jesus kawsachimushkan Lasaro kawsarkan. ² Chaypina Lasaro paninkunawan kushikushpa suk almorsuta rurarkan aypa invitadukuna Jesuswan tantalla mikunankunapa. Chaypina Lasaropish mesapi Jesuswan tantalla mikuykarkan. Panin Marta sirvikuykarkan. ³ Chaypina mikuykaptinikunana Mariyaka aypa chaniyuk mishkilla asnak wirata apamurkan. Chayta Jesuspa chakinpi icharkan. Chaymanta chukchanwan chakichipurkan. Chashna chay mishkilla asnak wirata ichapting tukuy chay wasi uku mishkilla asnarkan. ⁴ Chayta kawashpa chay Jesusta rantuk disipulun Judas Iskariote piñakushpa mikukmasinkunata willarkansapa:

⁵ —¿Imapatí chay mishkilla wirata usuchiyan? Chayta aypa kullkipi rantikunman karkan mana nimayuk runakunata yanapananpa.

⁶ Judaska chayta rimarkan chay kullkita kikinllapa munashpa. Mana yanapanayarkanchu mana nimayuk runakunata. Payka disipulumasinkunapa kullkinkuna wakaychak kashpa suwapuksa.

⁷ Chaypina Jesuska Judasta willarkan:

—Ama Mariyata michaychu. Payka pampawanankunata yuyashpa chay mishkilla asnak wirata wakaychashka. ⁸ Mana ni maypi mana nimayuk runakuna illanchu yanapanaykichipa. Ņuka mana unaytanachu kankunawan kawsasha.

Awtoridarkuna Lasarota chiknishpa wañuchinayarkansapa.

⁹ Jesus Betaniapi kananta yachashpankuna aypa runakuna rirkansapa payta kawak. Chay kawsachimushkan Lasarotapish rirkansapa kawak.

¹⁰⁻¹¹ Wañushkanmana kawsamu Lasarota kawashpankuna aypa runakuna kreyirkansapa Jesus Tata Diosmanta shamudu runa kananta. Manana saserdote kunapa awtoridarninkunata katinayarkansapanachu. Chayrayku paykunaka Lasarotapish yuyarkansapa wañuchiya.

Jerusalenpi Jesus yaykurkan.

(Mt 21.1-11; Mr 11.1-11; Lk 19.28-40)

¹² Chaymanta aypa runakuna rirkansapa Jerusalen llaktaman Paskua fiestata pasanankunapa. Chayamushkankuna kayantin paykunaka yacharkansapa Jesuspish shamuykananta. ¹³ Sukaman kushikushpa polponta pankakunata tipishpankuna rirkansapa Jesusta tinkuk. Kushikuyinkunawan sinchita willarkansapa:

—¡Akuychi alabaypachi Tata Diosmanta shamudu runataka! Payka shamuykanna israel runakunata kamachiwananchikunapa.

¹⁴⁻¹⁵ Chay runakuna manara sukaman kushikushpa tinkuptinkunara Jesuska suk burruta tarishpa montarkan. Chashna montashpa Jerusalenpi yaykurkan.

Ñawpa killkadunpi Tata Dios rimarkan:

“Ama manchakuychichu, Sionpi kawsak runakuna. Mash kawaychi.”

Suk burru sawanpi kankunapa sinchi kamachishuknikichi runa ñami shamuykanna."

Ñawpa tiempu Tata Dios rimashkanshina Jesuska Jerusalenpi yaykurkan. **16** Chay tiempu ñukaykunaka manara entiendirkanisaparachu imapami chashna Jesuska Jerusalenpi yaykurkan nishpa. Jesus wañushkanmanta kawsamuptinra yuyarkanisapa Tata Diospa ñawpa killkadun rimananshina Jesus rurashkanta.

17 Aypa runakuna kawarkansapa Jesus Lasarota wañushkanmanta kawsachimushkanta. Paykunaka tukuy pita chayta parlachirkansapa.

18 Chay milagruta rurashkanta yachashpa aypa runakuna rirkansapa Jesusta tinkuk. **19** Tinkuk riptinkunana fariseo awtoridarkuna sukaman piñakushpa willanakurkansapa:

—Amana kawapayaypachinachu. ¡Mash kawaychi! Chay runakuna mananami ñukanchikunata kasuwanchisapanachu. Tukuyna chay Jesusta katinsapa.

Gresia partimanta runakuna Jesusta riksinyayarkansapa.

20 Chay fiesta ukun Jerusalenman judiyu runakunawan tantalla Gresia partimanta runakunapish shamurkansapa Tata Diosta kuyanankunapa.

21 Chay runakunaka Jesuspa disipulun Felipita laduncharkansapa. Felipika Galilea partipi Betsaida llaktamanta karkan. Chay Gresiamanta runakunaka Felipitaka willarkansapa:

—Señor, pushawaysapa Jesusman. Ñukaykunapish paywan parlanayanisapa.

22 Chashna chay runakuna willaptinkuna Felipika rirkan Andresta willak. Chaypina paykuna rirkansapa Jesusta willak.

23 Chashna willaptinkuna Jesuska tukuy chay runakunata willarkansapa:

—Ñami wañunayni diyaka chayamunna. Wañuptini Tata Dios kawsachimuwanka tukuy runakuna yachanankunapa ñuka paypa wambran kanaynita.

24 Mash allita uyariwaychi. Suk trigu murunta tarpuptinchallapapi pam-padu kiparin. Chaypina wiñaptin aychan allpa ukupi usun. Chay muru mana allpapi pampadu kashpaka suk murulla kiparin. Manami wiñanchu. Mana wiñashpa mana wayuchakunchu.

25 Kankunapish kikichipa munanaykichillata rurashpa chay mana tarpu murushinami kankichi. Chashna kawsashpaykichika wañunaykichi tiyan. Chaymanta mana munanaykichita rurashpa tarpu murukanashinami kankichi. Chashna kawsashpaykichika mana tukuy niyukta kawsankichi. **26** Kankuna ñukapa munanaynita ruranayashpaykichika katiwaychi. Chashna katiwashpa kawsashpaykichi maypipish kaptini kankunapish chaypimi kankichi. Munanaynita rurashpa kawsaptikichi Tatayni Dioska rimanka alli rurak kanaykichita.

Jesus parlachikurkan wañunanta.

27 Chashna rimashpa Jesuska yachachikuyllapi katirkan:

—Kunanka sukaman llakishpa turbakuni. ¿Imatati Tataynita willasha? ¿Willashachu: “Tatayni, kishpichichiway ama sukaman sufrinaynipa?” Manami chashnachu willasha. Kay allpaman shamushkani wañunaynipa. **28** A, Tatayni, wañuptini tukuy runakunata yachachiysapa tukuy laya yachak kanaykita.

Chashna Jesus Tatanta willaptin ñukaykuna uyariptinkuna sielumanta kikin Tata Dios wambran Jesusta willamurkan:

—Runakunata ñami yachachishkanisapana allima kanaynita. Kashkan yachachishasapa allima kanaynita.

29 Chashna sielumanta Tata Dios wambran Jesusta willamuptin aypa runakuna uyarishpa rimarkansapa troynashkanta.

Sukkuna rimarkansapa:

—Tata Diospa angelinimpi paytaka parlachimushka.

30 Chashna rimaptinkuna Jesuska willarkansapa:

—Sielumanta Tata Dioska ñukata parlachimuwashka kankuna yachanay-kichipa paypa wambran kanaynita. Mana ñukaraykuchu parlachimuwashka.

31 Ñami diyaka chayamuskana Tata Dios tukuy chiknik runakunata willanankunapa kastiganankunata. Chaymanta Tata Dioska kay all-papi supaykunapa kamachikukninta karkunka amana kamachikunarpa.

32 Ñukata kruspi alsawaptinkuna tukuy kay allpapi kawsak runakunata yachachishasapa ñukata kreyiwashpa kawsanankunapa.

33 Chashna rimashpa Jesuska yachachirkansapa suk kruspi chakat-apinkuna wañunanta. **34** Chaypina chay runakunaka willarkansapa:

—Tata Diospa rimananta leyishpa yachanisapa Tata Diosmanta shamudu runa mana kutin wañunanta mana tukuyniyukta kawsananta. Chayrayku ñimapati willawakisapa sielumanta shamudu runa kashpayki kruspi chakatadu wañunaykita? Chakatadu wañushpaykika manami Tata Diosmanta shamudu runachu kanki.

35 Chaypina Jesuska willarkansapa:

—Ñuka lus likidu kashpayni rikchak layata yachachiykaykichi. Kay diyakunallatana yachachiykaykichi. Chayrayku amarapish sakiptinira ñukata allita katiwaychi ama tutapishina purinaykichipa. Tutapishina purishpaykichi mana yachankichichu maytami rinkichi nishpa. Uchaykichillapi kawsaykankichi. **36** Ñukaka lus likidumi kani. Kankunawan kaykaptinira ñukata kreyiwaychi ñukashina allita rurashpa kawsanaykichipa.

Chayta rimashkanwasha Jesuska chay runakunamanta llukshishpa pakurkan.

Runakuna Jesusta mana kreyinayarkansapachu.

37 Jesus aypa almirana milagrunkunata ruraptin kawashpapist chay runakunaka mana kreyinayarkansapachu Tata Diosmanta shamudu runa kananta.

38 Ñawpa yachachikuk Isaiyas killkarkan chay runakuna Tata Diospa rimananta mana kreyinankunata. Isaiyaska rimarkan:

“A, Tata Dios, rimanaykita sukanan yachachikuptinikunapish kay runakuna mana kreyinayansapachu.”

Sukanan almirana milagrunkunata ruraptiki kawashpankunapish mana kreyinayansapachu.”

39 Chay chiknik runakuna kikinkuna llullachinakushpankuna mana atiparkansapachu Jesusta kreyiyyta. Kayta Isaiyaska killkarkan:

40 “Tata Diosmi mana kreyik runakunapa yuyayninkunata sinchiy-achipurkansapa ama entiendinankunapa.

Paykunata rurashka mana kawakuktashina ama payta riksinankunapa.

Mana kreyinayaptinkuna Tata Dios mana munanchu payman kutimunankunapa.

Nima munanchu paykunata alliyachiysapata.”

41 Aypa watakuna illaptinra Jesus shamanarpa Isaiyaska tukuy chayta rimarkan. Payka yacharkan kay allpaman Jesus shamuspa wañushkanmanta kawsamunanta. Chayta yachashpa Isaiyaska killkarkan.

⁴² Aypa runakuna Jesusta mana kreyiptinkunapish sukkuna kreyirkansapa. Suk awtoridarkunapish kreyirkansapa. Paykunaka Jesusta kreyishkunkunata mana ni pita parlachirkansapachu fariseokunata manchashpanguna. Mana munarkansapachu tantanakunankuna wasimanta karkunankunapa. ⁴³ Chashna fariseokunata manchashpanguna Tata Dios alabanankunamanta ashwanta munarkansapa runamasinkunalla alabanankunata.

Jesus mana shamushkachu runakunata kastiganankunapa.

⁴⁴ Chaymanta sinchita rimakushpa Jesuska willarkansapa:

—Kankuna ūukata kreyiwashpa kawsaptikichika kachamuwashkan Tataynitapish kreyishpa kawsaykankichi. ⁴⁵ Ņukata kawawashpaykichi kachamuwashkan Tataynitapish kawaykankichi. ⁴⁶ Ņuka lus likidu Kashpayni kay allpaman shamushkani ūukata kreyiwashpa kawsashpaykichi ama tutapishina uchaykichillapi kawsanaykichipa. ⁴⁷ Rimashkaynita uyarishpaykichi mana kasukuptikichi mana ūukachu kastigashkaykichi. Kay allpaman shamushkani runakunata perdonashpa salvanaynipasapa. Mana shamushkanichu kastigaknikichi.

⁴⁸ Ņukata mana munawaptikichika nima yachachikunaynita kasuptikichika kay allpa kullunan diya Tata Dios rimashkaynita yuyachishushpaykichi kastigashunkichi. ⁴⁹ Kachamuwak Tatayni Dioska willawashka imatami yachachikusha nishpa. Mana kikinipa yuyaynimantachu yachachikuykani. ⁵⁰ Allita yachani kankuna Tata Dios willashushkaykicha kasushpaykichika rinaykichita paywan tantalla mana tukuyniyukta kawsak. Chayrákyu Tatayni willawashkanta allita yachachiykaykichi.

13

Jesus disipulunkunapa chakinkunata mayllapurkansapa.

¹ Chaymanta Paskua fiesta suk diyallana illaptin Jesuska yacharkan wafunun diyana chayamuskanta. Yacharkan kay allpamanta sielman kutinanta Tatanwan tantallana kawsak. Jesuska tukuy allpapi katikninkunata sukaman kuyarkansapa. Wañunan diyakaman kuyarkansapa.

² Chay diya amusayaptin Jesuska ūukaykunawan mikuykarkan. Satanás námi Jesuspa disipulun Judas Iskarioteta yuyachirkanna Jesusta rantukanpa. ³ Jesuska allita yacharkan kay allpaman Tatan Dios kachamuskanta tukuy layapi kamachikunapa. Yacharkan Tata Diomanta shamushkanta kashkan payman kutinanta. ⁴ Chaypina Jesus ūukaykunawan tantalla mikuykashpa atarirkan. Kapanta surkukushpa sinturanpi suk atun towallata watarkan. ⁵ Chaymanta atun kallanapi yakuta churashpa kallarirkan ūukaykunapa chakinikunata mayllayta. Sinturanpi watadu towallawan chakinikunata chakichiparkansapa. ⁶ Chaypina Simon Pedru mana munashpa chakinta mayllapanarpa willarkan:

—Maestru, ūukapa chakinitachu mayllanayanki?

⁷ Chashna willaptinna Jesuska aynirkán:

—Kunanka manara yachankirachu imapami chakikita mayllaykani nishpa. Suk ratukaman allita yachanki.

⁸ Chaypina Pedruka willarkan:

—Manámi nima layapi munanichu chakinita mayllanaykipa.

Chashna Pedru willaptinna Jesuska aynirkán:

—Mana chakikita mayllanaynipa munashpaykika mana ūukapa disipuluy nichu kanki.

⁹ Chaypina Simon Pedru willarkan:

—Chashna kaptinka ama chakinillata mayllaychu. Makinitapish umaynitapish mayllapay.

¹⁰ Chaypina Jesuska aynirkana:

—Chayrak armakudu runa chuya chuya kaptin chakinllatana mayllanan tiyan. Yaka tukuy kankuna chuya chuya armakudushina kankichi. Kankunamanta suklalla manara armakudushinarachu.

¹¹ Chashna Jesus willawashpangkuna allita yacharkan maykan disipulunmi rantikunka nishpa.

¹² Chaymanta ūukaykunapa chakinikunata mayllashkanwasha Jesuska kapanta kashkan churakurkan. Chaymanta tiyarishpa willawarkansapa:

—¿Yachankichichu imapami chakikichita mayllashkani? ¹³ Kankunaka “Maestru” niwankichi. Kankunata kamachiptini “Señor” niwankichi. ūukaka deverasmi Maestruykichi Señornikichi kani. ¹⁴ ūuka Maestruykichi Señornikichi kashpayni chakikichita mayllashkani. ūukashina kankunapish sukpa sukpa chakikichita mayllaychi. ¹⁵ ūukaka kankunata yanapashkaynishinga kankunapish sukwan sukwan yanapanakuychi mayladushina kanaykichipa.

¹⁶ Allita willaykichi. Suk wiwachu wiwaknin runata kasunan tiyan. Suk kachadu runa kamachikukninta kasunan tiyan. ¹⁷ Kay yachachikuskaynita entiendishpaykichi chayta allita rurashpa kawsashpaykichika sukmaman kushikuypuru kawsankichi.

¹⁸ Mana tukuy kankunapachu rimaykani. ūukaka kankunata akllashpayni allita yachani kankunamanta tiyananta suk rantikuwak runa. Tata Diospa killkadu rimananpi willawanchi: “ūukawan tantalla mikuk runa chikniwak runa tukushka.” Tata Dios rimashkanshina chay chikniwak runa rantikuwanka. ¹⁹ Chayta ūami willashkaykichina chay runa rantikuwaptin yachanaykichipa ūuka Tata Diosmanta shamu runa kanaynita.

²⁰ Allita willaykichi. ūuka kankunata kachaykichi rimanaynita yachachikunaykichipa. Chashna kachaptini tukuy kankunata chaskishuknikichi runakuna ūukatapish chaskiwaykansapa. ūukata chaskiwak runakuna kachamuwashkan Tatayni Diostapish chaskiykansapa.

Jesus willarkansapa Judas rantikunanta.

(Mt 26.20-25; Mr 14.17-21; Lk 22.21-23)

²¹ Chayta rimashkanwasha Jesuska tukuy shunku sukmaman llakishpa ūukaykunata willawarkansapa:

—Kunan allita willaykichi. Kankunamanta suk disipuluynika chikniwak runakunapi rantikuwanka.

²² Chashna Jesus willawaptinkuna ūukaykuna manchakushpa sukwani sukwani chapanakurkanisapa. Mana yacharkanisapachu maykan ūukaykunapami rimaykan nishpa.

²³ Chaypina ūuka Juan Jesus kuyashkan disipulun kashpayni ladunpi mikuykarkani. ²⁴ Simon Pedruka señaspi willawarkan Jesusta tapunaynipa pipami rimashka nishpa.

²⁵ Chaypina Jesuska ashwanta serkashpa tapurkani:

—Maestru ¿ūukaykunamanta maykantí rantikushunka?

²⁶ Chashna tapuptini Jesuska willawarkan:

—Ūuka panta ūuyuchishpa paytaka chaskichisha.

Chashna rimashpa chay mikukuna kallanapi Jesuska suk panta ūuyuchishpa Simonpa wambran Judas Iskarioteta kurkan. ²⁷ Judas chay

panta chaskishkan ratu Satanas paypi yaykurkan. Chaypina Jesuska willarkan:

—Chay yuyashkaykita utkakushpana ruray.

²⁸ Chashna willaptin mana ni maykan ūukaykuna yacharkanisapachu imampi chashnaka Judasta willaykan nishpa.

²⁹ Judaska tukuy ūukaykunapa kullkinikunata wakaychak karkan. Chayrayku yuyarkanisapa ichará Jesus willashka fiestapa mikunaynikunata rantinanpa. Sukkuna yuyarkanisapa ichará Jesus willashka mana nimayuk runakunata suk imata kunankunapa.

³⁰ Judas chay panta mikushkanwasha llukshirkan. Tutana karkan.

Jesus suk mushuk kamachikunanta yachachikurkan.

³¹ Judas llukshishkanwasha Jesuska ūukaykunata willawarkansapa:

—Wañunayni ora ūami chayamushkana. ūuka Tata Diospa wambran kaykashpayni wañusha. Wañuptini tukuy runakuna yachankasapa Tata Dios sukaman allima kanan. ³² Wañuptini Tata Dioska utkakunata suk allima almirana milagruta ruranka. Chay milagruta ruraptin tukuy runakuna yachankasapa ūuka iden payshina sukaman allima kanaynita.

³³ Munanayni wambraynkuna, ūukaka mananami unaytanachu kankunawan kawsasha. Kankunata sakiptini sukaman maskawankichi. Chay chikniwik runakunata willashkaynitashina kankunatapish willaykichi: Manami chay rinaynimana atipankichichu riyta.

³⁴ Kunanka willaykichi kay mushuk kamachinaynita: Sukwan sukwan kuyanakushpa kawsanaykichi tiyan. ūuka kankunata kuyanaynishina kankunapish sukwan sukwan kuyanakushpa kawsaychi. ³⁵ Tukuy runakuna kuyanakushpa kawsanaykichita kawashpa yachankasapa ūukapa disipulouyinkuna kanaykichita.

Jesus willarkan Pedru rimananta mana payta riksinanta.

(Mt 26.31-35; Mr 14.27-31; Lk 22.31-34)

³⁶ Chashna Jesus rimaptin Simon Pedruka tapurkan:

—Maestru ¿maymanti rinki?

Jesuska aynirkan:

—Kunan mana atipankichu katiwayta. Suknin diya katiwanki.

³⁷ Chaypina Pedruka Jesusta willarkan:

—¿Imapati kunanlla mana katiyiman? Kan wañuptiki ūukapish munani wañuya.

³⁸ Chashna willaptinna Jesuska willarkan:

—¿Deveraschu ūukawan tantalla wañunkiman? Mash allita uyariway. Manarapish gallo kantaptin kimsa kuti rimanki mana riksiwanaykita.

14

Jesus yachachikurkan imashnami Tata Diospa kawsananman chayashuchisapa nishpa.

¹ Chaymanta Jesus rinanta rimaptin tukuy ūukaykuna sukaman llakirkanisapa. Llakiptinikuna payka willawarkansapa:

—Ama llakiyichichu. Tata Diosta kreyishpaykichi ūukatapish kreyiwaychi.

² Tatayni Diospa kawsanan sielipi aypa allima kawsanakuna tiyan. Allita willashkaykichi chayman rinaynita wasikichita rurak. Mana Tata Diospa aypa kawsanankuna tiyaptin mana willaykichimanchu karkan rinaynita wasikichita rurak. ³ Wasikichita rurashpana kashkan shamusha pushaknichichi chaypi ūukawan tantalla kawsanaykichipa. ⁴ Kunanka ūami allitana

yachankichi maymanmi rini nishpa. Ñami yachankichina imashnami chay kawsanaynipi chayankichi nishpa.

⁵ Chashna willawaptinkuna Tomas tapurkan:

—Maestru, ñukaykunaka mana yachanisapachu maymanmi rinki nishpa.
¿Imashnati kawsanaykiman chayaymansapa?

⁶ Chashna Tomas tapuptin Jesuska aynirkan:

—Ñukalla suk ñanshina Tata Diosman pushaykichi. Mana llullakushpa allita yachachiykichi. Ñukami kawsachiykichi mana tukuyuniyukta Tata Dioswan kawsanaykichipa. Ñukata mana kreyiwashpa kawsaptikichika mana Tata Diospa kawsanapika chayankichichu. ⁷ Kankuna ñukata allita riksiwashpaykichika Tatayni Diostapish riksinkichi. Kunanmantapacha payta ñami riksinkichina kawashkaykichirayku.

⁸ Chaypina Felipika Jesusta willarkan:

—Maestru, Tataykita kawachiwaysapa. Payta kawashpaynikuna kushikushasapa.

⁹ Chaypina Jesuska willarkan:

—Felipi ¿manarachu entiendiwankira? Unaytana kankunawan tantalla kawsaykani. ¿Manarachu allitara riksiwashkankichi? Ñukata kawawashpaykichi Tatayni Diostapish kawaykankichina. ¿Imapatí willawanki Tataynita kawachinaynipa? ¹⁰ ¿Manachu kreyinki ñuka Tatayniwan tantalla kawsanaynita? ¿Manachu kreyinki paypish ñukawan kawsananta? Chashna Tatayni Dios ñukawan tantalla kawsaptin manami kikinipa yuyaynimantachu yachachiykaykichi. Tatayni Dios ñukawan tantalla kawsashpa yanapawan munananta ruranaynipa. ¹¹ Allita kreyiwaychi. Ñukami Tatayni Dioswan kawsani. Paypish ñukawan tantalla kawsan. Yachachishkaynita mana kreyinayashpaykichika kreyiwaychi almirana milagrunkunata ruraptini.

¹² Allita willaykichi. Kankuna kreyiwashpa kawsashpaykichi iden ñuka rurashkaynikunatashina atipankichi rurayta. Ñuka Tatayniman rishkaynirayku ñukamanta ashwan almirana laya ruranakunata atipankichi rurayta. ¹³ Ñukapa munanaynita rurashpa kawsashpaykichi imatapish kaptin mañawaptikichi ñukami rurasha. Tuku layapi kankunata yanapaptini tukuy runakuna Tatayni Diosta sukaman kuyashpa alabankasapa. ¹⁴ Kankuna ñukata kasuwashpa kawsashpaykichi imatapish kaptin mañawaptikichi yanapashkaykichi.

Jesus disipulunkunata willarkan Tata Diospa Espiritunta kachamunanta.

¹⁵ Jesuska ñukaykunata yachachiwaysapallapi katirkana:

—Kankuna tukuy shunku kuyawashpaykichika tukuy willashkaynikunata allita rurashpa kawsaychi. ¹⁶ Chashna allita rurashpa kawsaptikichi Tataynita roygasha Espiritunta kachamunarpa ñukashina yanapashunaykichipa. Paymi tukuy tiempu kankunawan tantalla kawsanka. ¹⁷ Tata Diospa Espiritunka mana llullakunchu. Chayrayku mana kreyiwak runakuna llulla kashpankuna mana atipansapachu Tata Diospa Espiritunta chaskiya. Mana payta kawansapachu nima riksinsapachu. Kankunaka ñami riksinkichina kankunapi kawsaptin. Payka tukuy tiempu kankunawan kawsanka.

¹⁸ Mash allita uyariwaychi. Tatayni kawsananman rishpayni manami wakchakunatashinachu sakishkaykichi. Kashkan kutimusha kankunawan tantalla kawsanaynipa. ¹⁹ Mana unaynachu illan wañunaynipa. Wañuptini mana kreyiwak runakuna manana kawawankasapanachu. Kankunaka

kawawankichi kankunawan tantalla kawsaptini. Wañushkaynimanta kawsamushkaynirayku kankunapish kawsamunkichi. ²⁰ Ñuka wañushkaynimanta kawsamuptini kankunaka allitana yachankichi Tatayni Dios ñukawan tantalla kawsananta. Ñukapish kankunawan tantalla kawsani. Kankunapish ñukawan tantalla kawsankichi.

²¹ Kankuna kamachishkaynita chaskishpa allita kasushpa kawsashpaykichi runakunata kawachinkichi ñukata kuyawanaykichita. Chashna kuyawaptikichi Tataynipish kankunata kuyashunkichi. Ñukapish kuyashkaykichi. Kankunata kuyashpayni yanapashkaykichi ashwan allita riksiwanaykichipa.

²² Chaypina disipulun Judas mana Iskariotechu Jesusta tapurkan:

—Maestru ¿imapati ñukaykunallata yanapawankisapa ashwan allita riksinaynikunapa? ¿Imapati mana tukuy runakunapi riksichinakunki?

²³ Chashna Judas tapuptin Jesuska willarkan:

—Ñukata kuyawashpa yachachishkaynita allita kasuptikichi Tataynika kuyashunkichi. Ñukapish Tatayniwan pakta shamusha kankunawan tantalla kawsanaynikunapa. ²⁴ Tatayni Dioska kachamuwashka yachachikunaynipa. Manami kikinipa yuyaynimantachu yachachiykaykichi. Chayrayku mana kuyawak runakuna mana kasuwansapachu. Mana kasuwaptinkuna paykunata mana yanapanisapachu riksiwanankunapa.

²⁵ Kankunawan kashpaynira tukuy layata ñami yachachishkaykichina.

²⁶ Manana kankunawan kaptini Tatayni Dioska Espiritunta kachamunka ñukashina yanapashunaykichipa. Paynami tukuy yachachikushkaynita allita entiendichishunkichi. Tukuy willashkaynita yuyachishunkichi. ²⁷ Mana kreyiwak runakuna mana atipansapachu yanapashuynikichita ama turbakushpa kawsanaykichipa. Ñukami yanapashkaykichi kushikuyupuru mana turbakushpa kawsanaykichipa. Chayrayku ama llakichichu nima manchakuchichu.

²⁸ Ñami allitana willashkaykichi Tatayniman rinaynita. Willashkaykichina rishkayniwasha kashkan shamunaynita kankunawan tantalla kawsanaynipa. Tataynika kamachiwaknini. Chayrayku deverasta kuyawashpaykichika Tatayniman rinaynita yachashpa kushikunkichiman.

²⁹ Manara rishpaynira willashkaykichi kashkan kutimunaynita chashna riptini kreyinaykichipa kutimunaynita.

³⁰ Mananami unaytanachu parlachiykichi. Kay allpapi kamachikuk supaymi shamunka. Payka ladunchawashpapish mana nimapi kamachiwanchu. ³¹ Ñuka Tataynita kasushpa wañunayni tiyan. Chashna wañuptini tukuy runakuna yachankasapa Tataynita allita kuyashpa tukuy layapi kaususkaynita.

Tukuy chayta rimashkanwasha Jesuska ñukaykunata willawarkansapa:

—¡Atariychina! Kaymanta akuychina.

15

Jesus disipulunkunata yachachirkansapa imashnami sukwan sukwan kuyanakushpa kawsankasapa nishpa.

¹ Manara chay wasimanta llukshiptinikunara Jesuska yachachiwaysapal-lapi katirkan:

—Ñukami kani uva tronkonshina. Tataynika chay uva kuydakshinami. ² Tukuy ñukata kreyiwak runakuna iden chay uva tronkonpa ramankunashina kankichi. Suk ramayni mana wayuchakuptin Tataynika

tipin. Suk rama allita wayuchakuptin raman puntankunallata tipin mushukta pankayashpa ashwanta wayuchakunankunapa.³ Chay uva ramankunapa puntan tipidukunashina kankuna rimanaynita kreyishkay-kichirayku uchaykichimanta pichadu kankichi.⁴ Tukuy shunku kreyi-washpa ñukawan tantalla kawsaychi. Ñukapish tukuy tiempu kankunawan tantalla kawsasha. Suk uva raman kikinmanta mana atipanchu wayuchakuya mana tronkonpi apikudu kashpa. Tipidu kashpa chakin. Chashnami kankunapish mana ñukawan tantalla kawsashpaykichika manami atipankichichu allita rurashpa kawsayta.

⁵ Ñukami uva tronkonshina kani. Kankunaka uva ramankunashinami kankichi. Ramakuna tronkonpi apikudu kashpa allita wayuchakunsapa. Kankuna ñukawan allita tantanakushpa kawsashpaykichi atipankichi allita rurashpa kawsayta. Ñukapish kankunawan tantanakushpa kawsasha. Mana ñukawan tantanakushpa kawsashpaykichika mana atipankichichu allita rurashpa kawsayta.⁶ Suk uva tronkonta kuydak runa mana wayuchakuk ramakunata tipishpa tantachishpa rupachin. Chashnallami kankuna ñukamanta ashuptikichi Tata Dios chay ramata rupachikshina kastigashun-
kichi.

⁷ Chayrayku ñukawan tantanakushpalla kawsaychi. Tukuy yachachishkaynitapish allita kasushpa kawsaychi. Yachachishkaynita kasuptikichi ñukami tukuy mañawanaykichta kushkaykichi.⁸ Kankuna allita rurashpa kawsashpaykichika deverasmi disipuluynikuna kankichi. Allita rurashpa kawsaptikichika runakuna Tataynita kuyashpa alabankasapa.

⁹ Imashnacha Tatayni ñukata kuyawan chashnami ñukapish kuyaykichi. Kankunata sukanan kuyashkaynirayku tukuy tiempu allita kasuwashpa kawsaychi.¹⁰ Tukuy Tatayni kamachiwashkanta allita kasushpa kawsaptini payka sukanan kuyawan. Ñukapa kamachikunaynita allita kasuptikichi kankunatapish sukanan kuyaykichi.

¹¹ Tukuy kayta willashkaykichi ñukashina kushikunaykichipa. Kankuna kasuwashpa kawsashpaykichika kushikuypurullami kawsankichi.

¹² Kashna kamachiykichi: Ñuka kankunata kuyanaynishina kankunapish sukan sukan kuyanakushpa kawsaychi.

¹³ Suk kuyakuk runa kuyanakukmasinta sukanan kuyashpa wañuymanta salvanman kikin wañushpa. Ñukaka tukuy kuyanakukmasinikunapa wañusha.

¹⁴ Kankuna tukuy kamachikushkaynita kasushpa kawsashpaykichika ñukapa kuyanakukmasinikunami kankichi.

¹⁵ Suk sirvikuk runa patronpa yuyayninta mana yachanchu. Chayrayku kuananmantapacha manana willaykichinachu sirviwaknini kanaykichta. Tukuy Tatayni willawashkanta yachachishkaykichi. Chayrayku kuananmantapacha willaykichi kuyanakukmasinikuna kanaykichta.

¹⁶ Kankunaka mana akllawashkankichichu. Ñukami kankunataka akllashkaykichi kuyanakukmasinikuna kanaykichipa. Akllashkaykichi tukuy runakunata rimanaynita yachachinaykichipa paykunapish mana tukuyniyukta kawsanankunapa. Chashna allita kuyawashpa kasuwashpa kawsaptikichika imatapish káptin shutinipi Tataynita mañaptikichi paymi kushunkichi.¹⁷ Allita willaykichi: Sukwan sukan allita kuyanakushpa kawsaychi.

Jesus yachachikurkan mana kreyik runakuna tukuy kreyik runakunata chikninankunata.

¹⁸ Chaymanta Jesuska ñukaykunata willawarkansapa:

—Ñukata chikniwak runakuna kankunatapish chiknishunkichi. Chiknishuptikichi yachankichi ñukata ñawpaka chikniwashkankunata.

¹⁹ Ñukaka akllashkaykichi amana chay mana alli rurak runakunashina kawsanaykicipa. Chayrayku allita ruraptikichi chiknishunkichi. Kankuna paykunashina mana allita ruraptikichika kuyashunkichiman paykunapuralla kuyanakukshina.

²⁰ Chay willashkaynita yuyaychi. Suk wiwachu wiwaknin runata allita kasunan tiyan. Kankuna wiwachuynikunashina kasuwaptikichi sufriwichak runakuna kankunatapish sufriwichunkichi. Yachachikunaynita mana kasushkasapachu. Chayrayku kankunatapish mana kasushunkichichu. ²¹ Chay chikniwak runakuna kachamuwak Tataynita mana riksishpankuna ñukarayku kankunatapish chiknishunkichi.

²² Chay chikniwak runakunata mana yachachik shamushka kaptinika mana uchayukchu kanmansapa karkan. Allita paykunata yachachip-tinipish mana kreyiwanayarkansapachu. Chayrayku Tata Dioska kasti-gankasapa. ²³ Ñukata chikniwashpankuna Tataynitapish chikniyksapa. ²⁴ Paykunaka kawarkansapa almirana laya milagrukunata ruraptini. Tukuy chayta kawashpankunapish chikniwansapalla. Tatayni Diostapish chikninsapa. Mana almirana milagrukunata ruraptini kawashpankunaka mana uchayukchu kanmansapa karkan. ²⁵ Tata Diospa ñawpa killkadunpi riman: “Mana uchayuk kaykaptinipish ñukata chikniwashkasapa.” Chay killkadupi rimashkanshina deverasta chikniwaykansapa.

²⁶ Tatayniman rishpayni mana llullakuk Tata Diospa Espiritunta kachamusha kankunata yanapashunaykicipa. Tata Diomanta Espiritun shamushpa runakunata yachachinkasapa ñuka Tata Diomanta shamudu runa kanaynita. ²⁷ Ñuka yachachikuya kallarishkaynimantapacha kankuna katiwaykankichi. Chayrayku kankunapish tukuy runakunata allita yachachinkichi ñukata kreyiwanankunapa.

16

¹ Ñami willashkaykichina suk runakuna chiknishunaykichita ama man-chakushpa sakiwanaykicipa.

² Chay runakuna chiknishushpaykichi tantanakunankuna wasimanta karkushunkichi. Suk kankunata wañuchishunkichi. Paykunaka wañuchishushpaykichi yuyankasapa Tata Diosta kushichiykanankunata.

³ Wañuchishunkichi nima Tataynita nima ñukata riksishpankuna.

⁴ Tukuy kayta willaykaykichi chiknishuptikichi tukuy kay willashkaynita yuyanaykicipa. Tukuy kayta manara willashkaykichirachu kankunawan kashpaynira.

Jesús yachachikurkan Tata Diospa Espiritun yanapakunanta.

⁵ Jesuska yachachikupi katirkan:

—Kunanka ñami rinina kachamuwashka Tatayniman. Chashna rinaynita willaptinipish kankuna mana animukunkichichu tapuwayta maymanmi rini nishpa. ⁶ Kankuna mana munashpa rinaynita sukaman llakiykan-kichi. ⁷ Llakiptichipish kuskata willaykichi. Kankunapaka ashwan allimi Tatayniman rinaynipa. Mana riptinika chay yanapashuknikichi Tata Diospa Espiritunka manami shamunkachu kankunawan kawsanampa. Rinayni tiyan payta kachamunaynipa. ⁸ Payna shamushpa kay allpapi kawsak runakunata allita riksichinkasapa uchayuk kanankunata. Chay-manta willankasapa imashnami Tata Diospa munashkan layata rurashpa kawsankasapa nishpa. Chaymanta yachachinkasapa Tata Díos tukuy mana

allita rurashpa kawsak runakunata kastiganankunata. ⁹ Chay mana alli rurak runakunata willankasapa mana ūukata kreyiwashkankunaryku Tata Dios kastiganankunata.

¹⁰ Tatayniman riptini mananami kawawankichinachu. Tata Diospa Espiritu runakunata yachachinkasapa ūuka mana uchayuk kashkaynirayku Tatayniman rishkaynita. ¹¹ Chaymanta tukuy runakunata yachachinkasapa Tata Dios kay allpapi kamachikuk Satanasta kastigashpa tukuy mana kreyiwak runakunatapish kastiganankunata.

¹² Rikchak layata munani yachachiynikichita. Yachachiynikichita munaptinipish manara atipankichirachu entiendiyyta. ¹³ Chayrayku manara tukuytarachu yachachishkaykichi. Mana llullakuk Tata Diospa Espiritun shamushpana tukuy layata kuskanpi yachachishunkichi. Manami kikinpa yuyaynimantachu yachachishunkichi. Tata Dios willashkanllata willashunkichi. Chaymanta yachachishunkichi imakunami kay allpapi tiyanka nishpa. ¹⁴ Chaymanta tukuy yachachikunaynita kankunata entiendichishunkichi. Chashna entiendichishuptikichi yachankichi suaman alli rurak alli yachak kanaynita. ¹⁵ Tatayni Diospa yachanana ūukapish yachani. Chayrayku willashkaykichi Tata Diospa Espiritun ūukapa yachachikunaynita entiendichishunaykichita.

Jesus disipulunkunata yachachirkansapa ama llakishpa kawsanankunapa.

¹⁶ Jesuska yachachiwaysapallapi katirkan:

—Kunan tipillana illan Tatayniman rinaynipa. Payman riptini manana kawawankichinachu. Chaymanta suk tiempukaman kashkan kawanankichi.

¹⁷ Chashna Jesuska ūukaykunata willawaptinkuna suwan suwan tapunakurkanisapa:

—¿Imapatí chashna willawanchisapa? Payka willawanchisapa tipillana illan Tatanman riptin manana kawananchikunata chaymanta suk tiempukaman kashkan kawananchikunata. ¹⁸ ¿Imapatí willawanchisapa suk tiempukaman kawananchikunata? Kay rimashkanta mana entiendinchisapchu.

¹⁹ Chaypina Jesuska yacharkan ūukaykuna tapunayanaynikunata. Chayta yachashpa willawarkansapa:

—Ñami willashkaykichina tipillana illan mana kawanayanaykicha chaymanta suk tiempukaman kashkan kawanayanaykicha. ¿Chaytachu kankuna tapunakuykankichi?

²⁰ Mash allita uyariwaychi. Ñuka wañuptini kankuna suwan llakishpa wakankichi. Mana kreyiwak runakuna suwan kushikunkasapa. Chaymanta kankuna suwan llakishkaykichimanta kashkan suwan kushikunkichi.

²¹ Mash allita uyariwaychi. Suk warmi wawayananpa nanay apiptin suwan manchakun suwan llakin. Chaymanta wambran nasishkanwasha chay nanayta kunkan. Suwan kushikun wambran nasiptin. ²² Kunanka kankunapish chay warmishina suwan llakiyankichi. Ñuka wañushkaynimanta kawsamushpayni kashkan shamusha kawaknikichi. Kankuna kawawashpa suwan kushikunkichi. Chashna kushikuptikichi manana ni pi turbachishunkichinachu kashkan llakinaykichipa.

²³ Kawsamushkayniwasha tukuy layata entiendishpaykichi manana nimata tapuwankichinachu. Allita willaykichi. Chay diyamantapacha

kankuna imatapish shutinipi mañaptikichi Tataynika kushunkichi.
²⁴ Kunankaman manara yachashkankichirachu Tata Diosta shutinipi mañaya. Kunanmantapacha ñukata kreyiwashpa Tataynita mañaptikichi payka yanapashunkichi kushikuypuru kawsanaykichipa.

Jesus disipulunkunata willarkansapa kushikuypuru kawsanankunapa.

²⁵ Jesuska yachachiwaysapallapi katirkan:

—Kunankaman ejemplukunata rimashpa yachachishkaykichi. Chaymanta kawsamušhkayniwasha manana ejemplukunata rimashpanachu yachachishkaykichi. Allitana willashkaykichi Tatayni tukuy laya yachak kananta. ²⁶ Kawsamushkayniwasha kankuna ñukata kreyiwashpa imatapish kaptin shutinipi Tatayni Diosta mañaptikichi paymi kushunkichi. Mañami willaykichichu Tataynita kankunapa mañanaynita kikin Tatayni kuyashuptikichi. ²⁷ Paymi kuyashunkichi ñukata kuyawashkaykichirayku. Kuyashunkichi paymanta shamushkaynita kreyishkaykichirayku. ²⁸ Tataynipa kawsanan sielumanta llukshimushkani shamenunaynipa kay allpapi kawsak. Kunan kay allpamanta llukshishpa kashkan Tatayniman kutini.

²⁹ Chashna Jesus ñukaykunata willawaptinkuna willarkanisapa:

—Kunanka ashwan allitanami yachachiwaykankisapa manana ejemplukunata rimashpanachu. ³⁰ Manara taputinikunara kanmi yuyayninikunata allita yachanki. Chayrayku yachanisapa deveras Tata Diosmanta shamudu kanaykita.

³¹ Chashna willaptinikuna Jesuska ayniwerkansapa:

—¿Ñachu kunanka kreyinkichina Tata Diosmanta shamushkaynita?

³² Chashna rimashpaykichipish kuanlla wañunayni diya chayamuptin chayta chayta kalpassha sapallaynita sakiwankichi. Chashna sakiwaptikichipish Tataynika manami sakiwankachu. ³³ Tukuy kayta willaykaykichi ñukawan tantalla kawsashpaykichi kushikushpalla kawsanaykichipa. Kay allpapi kawsashpaykichira sufrinaykichi tiyan. Chashna sufrishpaykichipish ama manchakuychichu. Tukuy chikniwakkuna ñukapa manduynipimi.

17

Jesus Tatanta roygarkan tukuy disipulunkunata yanapanankunapa.

¹ Chashna yachachiwashkankunawasha Jesuska sieluta chapashpa Tatanta willarkan:

—A, Tatayni, wañunayni diyaka chayamushkana. Wañuptini kashkan kawsachimuway tukuy runakuna yachanankunapa kuyadu wambrayki kanaynita. Ñuka wañushpa kashkan kawsamuptini tukuy runakuna yachankasapa sukaman alli yachak kanaykita.

² Tatayni, kanmi kachamuwashkanki sinchi kamachikuk kanaynipa tukuy runakuna manduynipi kanankunapa. Chashna kamachikuk kashpayni tukuy kuwashkayki runakunata mana tukuyniyukta kawsachishasapa. ³ Chashna paykunata kawsachiptinikuna kanta riksishunkisapa mana llullakuk sapallan Tata Dios kanaykita. Ñukatapish riksiwankasapa kachamuwashkayki wambrayki kanaynita.

⁴ Kay allpapi kashpayni tukuy willawashkaykita ñami allitana rurashkani. Runakunata yachachishkankisapa sukaman allima kanaykita. ⁵ Manara kay alpa tiyaptinra ñukaka kanwan tantalla kawsarkani. Kunanka, Tatayni,

kanman kutiptini kashkan laduyki pi churaway kanwan tantalla sinchi kamachikuk kanaynija.

⁶ Kay allpapi kawsak runakunamanta kay runakunata akllashkanki disipuluynikuna kanankunapa. Paykunata yachachishkanisapa tukuy laya yachak kanaykita. Kanpa kaptinkuna ñukata kuwashkankisapa. Rimanaykita yachachiptini paykuna allita kasushkasapa. ⁷ Kunanka ñami yachansapana kan yachachiwaptiki paykunata yachachishkaynita. ⁸ Disipuluynikunata rimanaykita ñami yachachishkanisapana. Kunanka rimanaykita chaskishkasapa. Ñami allitana yachansapa deveras kanmanta kay allpaman shamushkaynita. Allitana kreyinsapa kachamuwashkaykita.

⁹ Tatayni, sukaman roygayki paykunata yanapanaykipasapa. Mana roygaykichu mana kreyiwak runakunata yanapanaykipasapa. Roygayki kay kreyiwak runakunata yanapanaykipa kanpa kaptinkuna. ¹⁰ Tukuy ñukata kreyiwakkunaka kanpa wambraykunami. Kanta kreyishuk runakuna ñukatapish kreyiwansapa. Tukuy runakuna disipuluynikunata yanapashkaynita kawashpangkuna yachankasapa alli yachak kanaynita.

¹¹ Manana kay allpapika unaytanachu kawsasha. Kanwan kashkan kawsak riptini paykunaka kay allpapi kiparinkasapa. Tatayni, kanmi sukaman allima kashpayki sukaman alli yachak kashpayki kuwashkayki disipuluynikunata kuydaysapa ama uchallikunankunapa. Tatayni, ñukanchi tantalla suk yuyaylla kawsanchi. Kunanka disipuluynikunata yanapaysapa paykunapish ñukanchishina tantalla suk yuyaylla kawsanankunapa. ¹² Kanna sukaman yanapawaptiki kay allpapi paykunawan tantalla kashpaynira kuydashkanisapa ama sakiwanankunapa. Chay kuwashkayki disipuluynikunamanta suklalla sukaman mana allita ruraya munashpa sakiwashka. Sakiwashkanrayku kanmi kastiganayki tiyan. Ñawpa killkadu rimanaykpi riman sakiwananta. Chashna rimanayki rimaptin deverasmi payka sakiwashkana.

¹³ Kunanka kawsanayki sielman rishana. Kay allpapi kashpaynira kay disipuluynikunata rikchak layata yachachishkanisapa sukaman allimata kushikunaynishina paykunapish kushikunankunapa.

¹⁴ Rimanaykita allita yachachikuptini paykunaka ñukashina allita rurashpa kawsansapa. Manana chay mana alli rurak runakunashina kawsaptinkuna paykuna chikninsapa. ¹⁵ Paykuna chikniptinkunapish mana roygaykichu kay allpaman pushanaykipasapa. Roygayki kuydanaykipasapa ama supay uchallichinankunapa.

¹⁶ Kay allpapi kawsashpaynipish mana kay allpapi kawsak runakunashinachu kawsani. Allita rurashpa kawsaptini kay disipuluynikunapish ñukata kreyiwashpa manana ñawpashinachu uchallikushpa kawsansapa.

¹⁷ Tatayni, kanpa rimanaykika allimata kuskatami riman. Chayrayku rimanaykita disipuluynikunata yachachiysapa allita munanaykita rurashpa kawsanankunapa. ¹⁸ Kanmi kay allpaman kachamuwashkanki uchasapa runakunata rimanaykita yachachinaykipasapa. Kunanka ñukapish disipuluynikunata kachaykanisapa kay allpapi kawsak runakunata rimanaykita yachachinankunapa. ¹⁹ Kay allpaman shamushkani kanpa munanaykita rurashpa kawsanaynipa. Rimanaykita disipuluynikunata yachachishkani paykunapish kanpa munanaykita rurashpa kawsanankunapa.

²⁰ Chaymanta kay disipuluynikuna rimanaykita yachachikuptinkuna aypa runakuna ñukata kreyiwashpa kawsankasapa. Mana roygaykichu kay disipuluynikunallata kuydanaykipasapa. Tukuy kreyiwak runakunatapish kuydaysapa. ²¹ Roygayki tukuy chay kreyiwak runakunata yanapanaykipasapa sukwani sukwani tantalla kuyanakushpa kawsanankunapa.

Yanapaysapa ūukanchiwan tantalla kuyanakushpa kawsanankunapa. A Tatayni, ūuka kanwan suk yuyaylla Kashpa allita tantalla kuyanakushpa kawsanchi. Tukuy kreyiwak runakunata yanapaysapa paykunapish ūukanchishina suk yuyaylla kawsanankunapa. Chay layata kawsaptinkuna tukuy runakuna yachankasapa ūukata kachamuwashkaykita.

²² Kanka kuyawashpa yanapawashkanki munanaykillata rurashpa kawsanaynipa. ūukapish disipuluynikunata kuyashpa yanapashkanisapa munanaykita rurashpa kawsanankunapa. Paykunata yanapanisapa kan ūukawan idenllata yuyaykushpa kawsananchishina paykunapish sukwan sukwan idenllata yuyaykushpa kawsanankunapa.

²³ Kanmi ūukawan tantalla kawsanki. ūukapish disipuluynikunawan tantalla kawsani allita sukwan sukwan kuyanakushpa tantalla kawsanankunapa. Chashna kuyanakushpa kawsaptinkuna tukuy runakuna yachankasapa kay alppaman kachamuwashkaykita. Chaymanta yachankasapa iden ūukata kuyawanaykishina paykunatapish kuyanaykita.

²⁴ Tatayni, manara kay alppata rurashpaykira sukaman kuyawashkanki. ūukataka willawashkanki tukuy layapi sinchi kamachikuk kanaynipa. Munani tukuy kreyiwak runakuna kawsanayki sielman rinankunapa ūukawan tantalla kawsak. Munani kawanankunapa sinchi kamachikuk kanaynita.

²⁵ A Tatayni, sukaman alli rurakmi kanki. Mana kreyiwashpa kawsak runakuna mana riksishunkisapachu. Mana riksishuptinkunapish ūuka allita riksiyki. Chaymanta disipuluynikunapish yachansapana kachamuwashkaykita. ²⁶ ūukami yachachishkanisapa sukaman alli yachak alli kuyakuk kanaykita. Chayta yachachikuylapi katisha ūukata kuyawanaykishina paykunapish sukwan sukwan kuyanakunankunapa. Allita kuyanakuptinkuna ūukami paykunawan tantalla kawsasha.

Chayllatami Jesuska Tatanta roygarkan.

18

Chiknik runakuna Jesusta apirkansapa wañuchinankunapa.

(Mt 26.47-56; Mr 14.43-50; Lk 22.47-53)

¹ Tukuy chaykunata rimashkanwasha Jesuska chay wasimanta ūukaykunawan llukshirkan. Rirkansapa Sedron yaku chimbaman. Chay chimbapi tiyarkan suk aypa olivoyuk werta. Chay wertapi Jesuska ūukaykunawan tantalla yaykurkan.

² Jesuska chay wertapi amafak ūukaykunawan tantanakuyta. Chayrayku chay rantikuk disipulun Judaska riksirkan maypimi Jesuska tantanakun nishpa. ³ Chay wertapi kaptinikuna Judaska chayarkan aypa soldadukunata Tata Diospa wasinta kuydakkunata pushashpa. Fariseokunawan awtoridar saserdoteckuna paykunata kacharkansapa. Judas pushaptinkuna machetinkunata uchinankunata alkusankunata apashpa rirkansapa. ⁴ Jesuska allita yakashpa imapami shamunsapa nishpa rirkana paykunata tinkuk. Chaypina tapurkansapa:

—¿Pitati maskaykankichi?

⁵ Chay runakunaka aynirkansapa:

—Nasaret llaktamanta Jesustami maskaykanisapa.

Chashna willaptinkuna Jesuska willarkansapa:

—Ūukami kani.

Jesusta rantikuk Judaspish chay runakunawan tantalla karkan. ⁶ Jesus willaptinkuna: “Ūukami kani” nishpa paykunaka ankallimanta allpapi urmarkansapa. ⁷ Chaypina Jesuska kashkan tapurkansapa:

—¿Pitati maskaykankichi?

Paykunaka kashkan willarkansapa:

—Nasaret llaktamanta Jesustami maskaykanisapa.

8 Chaypina Jesuska kashkan willarkansapa:

—Ñami willashkaykichina ñuka Jesus kanaynita. Ñukata maskawashpay-kichika ama michaychichu kay disipuluynikunata rinankunamanta.

9 Chashna Jesus rimashpa ñukaykunata kuydawaykarkansapa. Paymi ñawpalla Tatanta willarkan: “Tatayni, kuwashkayki runakunata kuydashkanisapa ama sakiwanankunapa.” Chashna Jesus Tatanta roygashka kashpa kuydawarkansapa.

10 Chaypina Jesusta apinayaptinkuna disipulun Simon Pedru machetinta apishpa suk runa Malkopa alli ladu rinrinta tipipurkan. Chay runa Malko sinchi kamachikuk saserdotepa wiwachun karkan. **11** Chashna rinrinta tipipuptin Jesuska Pedruta willarkan:

—Chay machetikita kashkan macheti churanaykipi churay. Tatayni wañunaynipa munaptin wañusha. ¿Yuyankichu manchakushpayni Tataynita mana kasunaynita?

Soldadukuna awtoridar saserdote Anasman Jesusta pusharkansapa.

(Mt 26.57-58; Mr 14.53-54; Lk 22.54)

12 Chaypina soldadukuna kamachikunkinkunawan Tata Diospa wasinta kuydak runakuna Jesusta apishpa watarkansapa. **13** Jesusta watashpana pusharkansapa awtoridar saserdote Anaspa wasinman. Anaska Kayfaspa suedrun karkan. Chay tiempu Kayfaska tukuy saserdotekunapa ashwan sinchi awtoridarninkuna karkan. Chayrayku Kayfaspa suedrun Anasman Jesusta pusharkansapa. **14** Ñawpana Kayfaska tukuy ñukaykuna judiyu runakunapa awtoridarninkunata willarkansapa: “Ashwan alli kanman suk runalla wañunarpa ama tukuy ñukanchikuna israel runakuna wañunanchikunapa.”

Simon Pedru rimarkan Jesusta mana riksinanta.

(Mt 26.69-70; Mr 14.66-68; Lk 22.55-57)

15 Chashna chay awtoridar Anaspa wasinman Jesusta pushaptinkunana Simon Pedruwan ñuka Juan washanta katirkanisapa. Chay saserdotekunapa awtoridarninka ñukata riksiwarkan. Chayrayku chay manllayba wasi pampapi ñukapish Jesusta katishpa yaykurkani. **16** Ñuka yaykuptini washal-lapi Pedruka kiparirkhan. Chaypina rirkani punku kuydak warmita willak Pedrutapish yaykuchinanpa. **17** Pedruta yaykuchishpana chay warmika tapurkan:

—¿Kanpish Jesuspa disipulunchu kanki?

Chashna tapuptinna Pedruka willarkan:

—Manami disipulunchu kani.

18 Chaypina sukaman chirishpankuna Anaspa wiwachunkunawan Tata Diospa wasinta kuydakkuna ninakushpankuna mashakuykarkansapa. Pedrupish paykunawan tantalla mashakuykarkan.

Saserdotekunapa awtoridarninkuna Anas Jesusta tapurkan imatami rurashka nishpa.

(Mt 26.59-66; Mr 14.55-64; Lk 22.66-71)

19 Chaypina wasin ukupi saserdotekunapa awtoridarninkuna Anaska Jesustaka kallarirkan tapuya:

—¿Pikunati disipuluykikunaka? ¿Imatati paykunata yachachinkisapa?

20 Chashna tapuptin Jesuska willarkan:

—Ñuka tukuy runakuna uyariwaptin yachachikushkani. Tantanaku-nankuna wasikunapi Tata Diospa wasinpiptip allita yachachikushkani. Mana nimata pakallallachu yachachikushkani. ²¹ ¿Imapati ñukataka tapuwanki? Yachachikuptini aypa runakuna uyariwarkansapa. Paykunata tapuy imatami yachachishkanisapa nishpa. Paykunami allita yachansapa.

²² Chashna Jesus chay saserdotekunapa awtoridarninkunata ayniptin Tata Diospa wasin kuydak runa uyanpi lapyashpa willarkan:

—Ariya ¿chashnachu ayninki sinchi awtoridar saserdotetaka?

²³ Chaypina Jesuska willarkan:

—Ariya mana allita willaptinika willaway ima mana allitati willashkani. Kuskata willaykaptinika ¿imapati lapyawashkanki?

²⁴ Chaypina Anaska makin wataduta Jesustaka pushachirkan yernon Kayfasman. Paymi saserdotekunapa ashwan sinchi awtoridarninkuna karkan.

Pedru kashkan rimarkan Jesusta mana riksinanta.

(Mt 26.71-75; Mr 14.69-72; Lk 22.58-62)

²⁵ Chashna Jesusta tapunkunakaman Pedruka washapi mashakuykarkan. Chaypina paywan mashakuykak runakuna tapurkansapa:

—¿Manachu kanpish chay runapa disipulun kanki?

Chashna tapuptinkunana Pedruka willarkansapa:

—Manami disipulunchu kani.

²⁶ Chaymanta chaypi karkan awtoridar saserdotepa suk wiwachun. Payka chay rinrin tipidu Malkopa familyan karkan. Payna Pedrutaka tapurkan:

—¿Manachu kantaka kawashkayki Jesuswan tantalla chay wertapi?

²⁷ Chashna tapuptin Pedruka paytapis willarkan mana Jesusta riksinanta. Chayta rimaykaptinlla suk gallo kantarkan.

Pilatoman Jesusta pusharkansapa.

(Mt 27.1-2, 11-14; Mr 15.1-5; Lk 23.1-5)

²⁸ Chaymanta Kayfaspa wasinmanta Jesusta pusharkansapa romano awtoridar Pilatopa kamachikunan wasiman. Manara allita pakariptinra chay wasipi Jesusta chatakuk runakunaka chayarkansapa. Mana niman suk yakyunaykarsapachu. Paykunaka yuyarkansapa romanokunapa wasinpi yakyushpa Tata Diospa ñawpakinpi chuya chuya kanankunamanta chapunakunankunata. Chashna chapunakushpa Paskua fiestat rurashpa manana atipanmansapanachu mikuya. ²⁹ Chayrayku Pilatoka llukshimurkan paykunata tapuk:

—¿Ima mana allitati kay runaka rurashka?

³⁰ Chaypina chay chatakuk runakunaka Pilatota willarkansapa:

—Kay runaka alli rurak runa kaptinka manami pushamuymansapachu karkan kanpi chatakuk.

³¹ Chashna ayniptinkunana Pilatoka willarkansapa:

—Kankunapa ñawpa killkaduykichipi riman imashnami kastigankichi nishpa. Chayta kasushpa kikikichilla kay runataka kastigaychi.

Chaypina chay runakunaka Pilatota willarkansapa:

—Kan mana willawaptikisapa ñukaykuna judiyu runakuna kashpaynikuna mana ni pita atipanisapachu wañuchiyyta.

³² Ñawpata Jesus yachachiwashpankuna ñukaykunata willawarkansapa suk kruspi wañunanta. Jesus rimashkanshina chay chiknik runakuna munarkansapa Pilato suk kruspi chakatashpia Jesusta wañuchinanpa.

³³ Chaypina Pilato kamachikunan wasipi kashkan yaykushpa Jesustaka ladununen kayashpa tapurkan:

—¿Kanchu kanki judiyukunapa ashwan sinchi kamachikukninkuna?

³⁴ Chaypina Jesuska willarkan:

—¿Imapati judiyukunapa kamachikukninkuna kanaynita tapuwanki? ¿Chaytaka kikikipa yuyaynikimantachu tapuwanki? Ichará maykan willashushka chashna tapuwanaykipa.

³⁵ Chashna willaptinna Pilatoka Jesusta willarkan:

—Ñuka manami judiyuchu kani chaykunata yachanaynipa. Kanpa judiyumasikikunapa awtoridarninkunami pushamushushkasapa ñukapi chatashuk. ¿Ima mana allitati rurashkanki?

³⁶ Chaypina Jesuska Pilatota willarkan:

—Ñuka manami kay allpapi kamachikuk runachu kani. Kay allpapi kamachikuk kaptinika tukuy kasuwak runakuna amachawanmansapa karkan. Paykunaka judiyu awtoridarkunawan makanakunmansapa karkan ama apiwanankunapa. Ñukaka mana allpapi kamachikuk runachu kani.

³⁷ Chaypina Pilatoka tapurkan:

—¿Deveraschu tukuy layapi alli kamachikuk kanki?

Jesuska aynirkan:

—Ariya rimashkaykishina sinchi kamachikuk runami kani. Shamushkani kay allpapi nasik mana llullakushpa kuskata yachachikunaynipa. Tukuy alli yachachikunata kasuk runakuna ñukapa yachachikunaynita kasunsapa.

³⁸ Chashna Jesus willaptinna Pilatoka tapurkan:

—¿Imati alli yachachikunaka?

Pilato willarkansapa Jesusta wañuchinankunapa.

(Mt 27.15-31; Mr 15.6-20; Lk 23.13-25)

Chaymanta Pilatoka chayta tapushpalla Jesusta sakirkan. Chaypina wasimanta kashkan llukshishpa Jesusta chatak runakunata willarkansapa:

—Manami kay runapika tarinichu nima laya mana alli rurashkanta kastiganaynipa. ³⁹ Kunan uyariyichi. Kada Paskua fiesta ukun kankuna mañawankichi suk karselpi wichkadu runata kacharinaynipa. Kay wata ñimunkichichu kay sinchi kamachishuknikichita kacharinaynipa?

⁴⁰ Chashna Pilato tapuptinkunana chay runakunaka kashkan sinchita rimashpa willarkansapa:

—¡Ama Jesustaka kachariychu! ¡Barrabasta kachari!

Chay wata Barrabas karselpi karkan wañuchikuk suwa runa kashpa.

19

¹ Chashna chay chiknik runakuna willaptinkuna Pilatoka soldadunkunata willarkansapa Jesusta makanankunapa. ² Paykunaka Jesusta makashkankunawasha kasha likidu waskamanta suk koronata rurashpangkuna umanpi churapurkansapa asichinankunapa. Kamachikukpa sani llachapata mudachirkansapa. ³ Chaymanta ladunchashpangkuna uyanpi sukaman sakmashpa asichishpa willarkansapa:

—¿JUDIYU RUNAKUNAPA KAMACHIKUKNIN KAPTIKI SUKAMAN MUNAYKISAPA!

⁴ Chaymanta Pilato kashkan washaman llukshishpa chay runakunataka willarkansapa:

—Mash allita uyariwayichi. Kunanka kay runataka pushamuni yachanaykipa mana nima uchallikushkanta tarishkaynita.

⁵ Chaypina Jesuska kashamanta ruradu koronayuk kamachikuk runapa sani llachapa churakudu llukshimurkan. Chashna llukshiptin Pilatoka chay runakunataka willarkansapa:

—¡Kawaychina kay runataka!

⁶ Chaypina saserdote kunapa awtoridarninkunawan Tata Diospa wasin kuydakkuna sinchita rimashpa willarkansapa:

—¡Suk kruspi chakatachiy! ¡Suk kruspi chakatachiy!

Chaypina Pilatoka willarkansapa:

—Kañkunaka pushaychi suk kruspi chakatashpa wañuchinaykichipa. Ñukaka mana nima uchanta payppika tarinichu.

⁷ Chaypina chay runakunaka Pilatota aynirkansapa:

—Tata Dios killkadunpi willawansapa kay laya runata wañuchinaynikunapa. Payka llullakushpa rimashka Tata Diospa chaylla wambran kananta. Chayrayku wañunan tiyan.

⁸ Pilatoka chay runakuna rimashkankunata uyarishpa ashwanta manchakurkan. ⁹ Chaymanta kamachikunana wasiman Jesusta kashkan yaykuchishpa tapurkan:

—¿Maymantati shamushkanki?

Chashna Pilato tapuptinna Jesuska mana nimata aynirkanchu. ¹⁰ Upallalla kaptin Pilatoka willarkan:

—¿Manachu nimata ayniwanki? Ñuka munashpayni suk kruspi wañuchichiykiman. Munashpayni kachariykiman. ¿Manachu chaytaka yachanki?

¹¹ Chashna willaptinna Jesuska Pilatota willarkan:

—Tata Dios mana munaptinka mana nimata atipankimanchu rurawayta. Kayfas sinchi kamachikuk saserdote kayakashpa kanman pushachimuwashka wañuchichiwanaykipa. Chayrayku payka kanmanta ashwan uchayuk.

¹² Chay ratumantapacha Pilatoka sukaman munarkan Jesusta kachariyta. Chaypina Jesusta chiknik runakuna ashwanta kaparikushpa Pilatota willarkansapa:

—Kay runaka rimashka sinchi kamachikuk kananta. Chayta rimashpa rimaykan manana ashwan sinchi kamachikuk Sesarta kasunanta. Kay runata kacharishpaykika kanpish mananami chay kamachikuk Sesarta kasunkinachu.

¹³ Chayta uyarishpa Pilatoka Jesusta kashkan pushachirkan chay runaku-napa ñawpkninkunaman. Chaypina kamachikunana sillanpi tiyarirkan chay runakunata kamachinanpa. Chay silla Gabata pampapi karkan. Chay Gabata shuti hebreo rimanapi riman Ruminanta Ruradu.

¹⁴ Paskua fiesta suk diyallana illarkan. Chay diya yakallapa chawpi diyata Pilatoka chay runakunataka willarkansapa:

—Mash kawaychi kamachishuknikichita.

¹⁵ Chashna Pilato willaptinkunana tukuy paykunaka sinchita rimarkansapa:

—¡Wañuchun wañuchun! ¡Suk kruspi chakatachiy!

Chaypina Pilatoka tapurkansapa:

—¿Sinchi kamachishuknikichi runatachu wañuchichisha?

Chaypina saserdote kunapa kamachikukninkunaka Pilatota willarkansapa:

—Alli kamachikuk Sesarllami ñukaykunata kamachiwansapa.

¹⁶ Chashna willaptinkuna Pilatoka willarkansapa Jesusta suk kruspi wañuchinankunapa. Chaypina soldadukuna pusharkansapa.

Suk kruspi Jesusta chakatashpa wañuchirkansapa.

(Mt 27.32-44; Mr 15.21-32; Lk 23.26-43)

¹⁷ Chaymanta soldadukuna Jesusta krusninta aparichishpa suk lomaman pusharkansapa. Chay lomaka iden uma poto rikurirkan. Chayrayku shutinka karkan Uma Poto. Judiyukunapa rimanaynikunapi chay lomapa shutin karkan Golgota. ¹⁸ Chay lomapi Jesustaka chakatarkansapa. Chaymanta Jesuspa ishkantin ladunpi ishkay runakunatapish chakatarkansapa.

¹⁹ Chaypina suk tablapi Pilatoka killkakurkan: “Kay Nasaret llaktamanta Jesusmi judiyu runakunapa sinchi kamachikukninkuna.” Chay killkaduta Jesuspa uman kuskapi timbichichirkan.

²⁰ Chay lomaka Jerusalen llaktamanta mana karupichu karkan. Chayrayku aypa judiyu runakuna Jesusta kawak rishpankuna chay killkadu leyirkansapa. Chayka kimsa laya rimanapi killkadu karkan. Suk killkadu karkan judiyukunapa rimanaynikunapi. Suk karkan griego runakunapa rimanapi. Kimsayn karkan romanokunapa rimanapi.
²¹ Chay killkadu leyishpankuna saserdote kunapa awtoridarninkuna piñakushpa Pilatotaka rirkansapa willak:

—¿Imapatí chay tablapi killkakushkanki “kay runami judiyukunapa kamachikukninkuna?” Kunanka chikan tablapi killkakushpa churay: “Kay runa rimashka: ‘Ñukami kani judiyukunapa sinchi kamachikukninkuna.’ ”

²² Chaypina Pilatoka willarkansapa:

—Ñuka killkashkaynika chashnami kiparinan tiyan.

²³ Soldadukuna Jesusta chakatashkankunawasha sawa llachapankuna chuskuntinkuna patumanakurkansapa. Chaymanta suni uku llachapatakipish apirkansapa. Chay suni uku llachapaka tukuy suniynintin awadu mana siraduchu karkan. ²⁴ Chayta kawashpa soldadukunaka willanakurkansapa:

—Ama llikiyapachichu kay allima awadu llachapata. Akuychi pukllashpa kawaypachi pipami kiparinka nishpa.

Chashna rimashpankuna patumanakurkansapa.

Tata Diospa ñawpa killkadunpi riman: “Llachapaynita patumanakushkasapami. Pukllashpankuna kawashkasa pimi llachapaynita apanka nishpa.” Chay diya Tata Diospa ñawpa killkadu rimashkanshina chay soldadukuna Jesuspa llachapankunata patumanakurkansapa.

²⁵ Chaypina Jesuspa mamanka ñañanwan kruspa ladunllapi karkansapa. Chaymanta chaypi Kleofaspa warmin Mariyawan, Mariya Magdalena karkansapa. ²⁶ Jesuska mamanta kawashpa ñukatapish kawawarkan. Chaypina mamantaka willarkan:

—Mama, Juanka wawaykishinami kiparin.

²⁷ Chaymanta Jesuska ñukatapish willawarkan:

—Kunanmantapacha payna mamaykishina kiparin.

Chashna Jesus ñukata willawaptin chay tiempumantapacha Jesuspa mamantaka willarkan.

Jesus wañurkan.

(Mt 27.45-56; Mr 15.33-41; Lk 23.44-49)

²⁸ Jesus kruspi kashpa yacharkan Tata Diospa killkadu rimashkanshina rurashkanta. Tata Diospa killkadunpi rimarkan yakuta mañakunanta. Chashna killkadu kaptin Jesuska rimarkan:

—Yakuta munani.

²⁹ Chaypi suk puyñupi tiyarkan ayak likidu vinu. Jesus yakuta munananta uyarishpa suk soldadu utku layata watarkan suk suni kaspipi. Chaypi

sumichishpa Jesuspa shiminpi churapurkan. ³⁰ Jesus chay ayak likidu vinuta shukushkanwasha rimarkan:

—Tatayni, kan willawashkaykita ñami tukuytana rurashkani.

Chashna rimashpana Jesuska umanta kumurayachishpa wañurkan.

Suk soldadu lansawan Jesusta kostillanpi tuksirkan.

³¹ Chay Paskua fiesta suk diyallana illarkan. Fiesta kallarinan diya ashwan sinchi samana diya karkan. Chayrayku judiyu awtoridarkuna mana munarkansapachu kruspi chakatadu runakuna chayllapi pakarinankunapa. Chayrayku Pilatota rirkansapa willak kruspi chakatadukunapa chankunkunata pakichipunkunkunapa utkana wañunankunapa. Willarkansapa krusmanta urayachimunankunapa.

³² Chaypina soldadukuna rirkansapa Jesuswan tantalla ishkay chakatadu runakunapa chankunkunata pakipuk. ³³ Chaymanta Jesuspa ladunman rishpankuna kawarkansapa wañudutana. Chayrayku chankunkunata mana pakipurkansapachu. ³⁴ Chaypina allita yachanayashpa wañudunachu manarachu nishpa suk soldadu lansawan Jesusta tuksirkan kostillanpi. Chashna tuksiptin yawarwan yaku ichakumurkan.

³⁵ Jesus wañuptin ñuka Juan kikini kawarkani. Chayrayku mana llulakushpa tukuy chayta willaykaykichi kankunapish yachanaykichipa Jesus wañushkanta.

³⁶ Tata Dios killkadunpi riman: “Manami niman suk tullunta pakipunkasapachu.” Chay soldadukuna Jesuspa tullunta mana pakipuptinkuna Tata Diospa killkadunpi rimashkantashina rurarkansapa.

³⁷ Chaymanta Tata Diospa killkadunpi riman: “Runakuna chay tukshenkunkuna runata kawankasapa.”

Jesusta pamparkansapa.

(Mt 27.57-61; Mr 15.42-47; Lk 23.50-56)

³⁸ Chaypi karkan Arimatea llaktamanta runa Jose. Joseka Jesusta kreyik runa karkan. Payka mana munarkanchu ni pi yachananpa Jesusta kreyik kananta judiyu awtoridarkunata manhashpa. Joseka rirkana Pilatota mañak Jesuspa kuerpunta apananpa pampak. Chaymanta Pilato almitiptionna kuerpunta aparkan pampak.

³⁹ Chaymanta fariseo runa Nikodemopish rirkana Joseta yanapak. Chay Nikodemoka suk kuti tutapi rirkana Jesuswan parlak. Payka kimsa chunka kilu ishkay laya mishkilla asnak kaspi wikinta aparkan. ⁴⁰ Chaypina Jesuswan Nikodemoka suk manllayba suni llachapakunata chay mishkilla asnak kaspi wikinwan ñuyuchishpa Jesuspa kuerpunta wankurkansapa. Chashna ñukaykuna judiyu runakuna tukuy wañuduta amañanisapa pampayta.

⁴¹ Chaymanta Jesusta wañuchishkankuna lomapa ladunllapi suk werta tiyarkan. Chay wertapi tiyarkan machay ukupi ruradu uchku. Chaypika manara niman suk wañuduta churarkansaparachu. ⁴² Chay oras tipillana illarkan judiyukuna kallarinaynikunapa samayta. Chayrayku chay machaypi ruradu uchkipi Josewan Nikodemoka utkakushpa Jesuspa kuerpunta churarkansapa.

20

Jesus wañushkanmanta kawsamurkan.

(Mt 28.1-10; Mr 16.1-8; Lk 24.1-12)

¹ Samana diya kayantin manara allita pakariptinra Mariya Magdalena rirkana Jesusta churashkankuna machayta kwak. Chaypi chayashpana kawarkan wichkashkankuna rumita punkunmanta ashuchiduta. ² Chayta

kawashpana kallparkan Pedruta ñukata willawaksapa. Ñuka Juan Jesuspa sukaman munawashkan disipulun kani. Ñukaykunapi chayashpa Mariya Magdalena willawarkansapa:

—¡Ñami Jesuspa kuerpuntaka surkushkasapana! Manami yachanis-apachu maypimi churashkasapa nishpa.

³ Chashna willawaptinkunana Pedruwan ñuka kallpashpa rirkanisapa Jesuspa kuerpun churashkankunata kawak. ⁴ Ishkantinikuna kallpashpa ñuka Pedrumanta ashwan utka kallpashpa ñawpakte chayarkani. ⁵ Chaypina kumurayashpa chay machay ukunta chaparkani. Mana yaykuya animukushpayni punkullamanta Jesuspa wankushkankuna llachapankunala kawarkani.

⁶ Chaymanta washaynita Pedruka chayashpa yaykukpacha rirkan. Yaykushpa paypish chay wankushkankuna llachapankunallata kawarkan.

⁷ Chaymanta kawarkan Jesuspa uman wankushkankuna llachapata chikanpi churaduta. Chay uman wankuna llachapaka mana kuerpun wankuna llachapawan tantallachu karkan. ⁸ Pedru yaykuptinna ñukapish yaykurkani. Chaypina allita chay llachapakunataka kawarkani. Chayta kawashpayni kreyirkani Jesus kawsamushkanta. ⁹ Manara Jesus kawsamuptin ñukaykuna mana allitarachu entiendirkanisapa Tata Diospa killkadunpi rimashkanta. Chaypi rimarkan Jesus wañushkanmanta kawsamunanta.

¹⁰ Chayta kawashpaynikuna wasinikunaman kutirkanisapa.

*Mariya Magdalena Jesusta kawarkan.
(Mr 16.9-11)*

¹¹ Ñukaykuna wasinikunaman kutiptinikuna Mariya Magdalena machay washallapi sapallan kiparirkan. Chaypina sukaman wakakuypi kumurayashpa punkunllamanta chay uchku ukunta chaparkan. ¹² Uchku ukunpi allita chapashpa kawarkan ishkay yurak likidu llachapayuk angelkunata. Maypicha Jesuspa kuerpun kashka chaypi paykuna tiyariyu karkansapa. Sukka uman kashkapi karkan. Sukka chakin kashkapi tiyariyu karkan.

¹³ Paykunaka tapurkansapa:

—Mariya ¿imapati sukaman wakakuykanki?

Mariyaka aynirkan:

—Maestruynipa kuerpuntami apashkasapa. Manami yachanichu maypimi churashkasapa nishpa.

¹⁴ Chashna rimashpana Mariyaka washanta chapashpa Jesusta kawarkan. Payta kawashpapisti mana riksirkanchu Jesus kananta.

¹⁵ Chaypina Jesuska tapurkan:

—¿Imapatí sukaman wakakuykanki? ¿Pitati maskaykanki?

Chaypina Mariyaka werta kuydak runa kananta yuyashpa willarkan:

—Kan Jesuspa kuerpunta apashka kashpaykika willaway maypimi churashkanki nishpa. Willawaptiki ñuka risha pushamuk.

¹⁶ Chaypina Jesuska willarkan:

—¡Mariy!

Shutinta rimaptin Mariyaka Jesustaka riksirkan. Chaypina hebreo ri-manapi willarkan:

—¡Raboni!

Chay Raboni rimanan riman “Maestru”. ¹⁷ Mariya ladunchaptinna Jesuska willarkan:

—Ama apiwaychu. Manara Tatayniman rishkanirachu. Rillay disipuluyinkunata willamuysapa Tatayniman rinaynita. Ñukapa Tataynika kankunapapish Tataykichimi. Ñukapa Diosnini kankunapapish Diosnikichimi.

¹⁸ Chashna willaptinna Mariya Magdalenaka rirkana ūukaykunata willawaksapa Jesusta kawashkanta. Chaymanta parlachiwarkansapa tukuy Jesus willashkanta.

Jesus wañushkanmanta kawsamushpa disipulunkunapi rikurirkan.

(Mt 28.16-20; Mr 16.14-18; Lk 24.36-49)

¹⁹ Chaymanta samana diya kayantin tutayaptinna suk wasipi ūukaykunaka tantanakurkanisapa. Chay wasipi allita wichkanakurkanisapa judiyu awtoridarninikunata manchashpaynikuna. Chay wichkadu wasipi tantanakudu kaptinikuna Jesuska yaykushpa ūukaykunapa chawpinikunapi shayarishpa rimachiwarkansapa:

—Amana turbachinakushpa llakiychinachu.

²⁰ Chashna rimachiwashpangkuna klavu uchkushkan makinkunata lansa uchkushkan kostillanta kawachiwarkansapa. Jesusta kawashpaynikuna sukmanta kushikurkanisapa.

²¹ Chaypina payka kashkan willawarkansapa:

—Amana turbachinakushpa llakiychinachu. Imashnacha Tatayni kay allpaman kachamuwashka ūukapish kankunata kachaykichi rimanaynita yachachikuk.

²² Chayta willawashkankunawasha Jesuska ūukaykunata pukuwarkansapa. Chaymanta willawarkansapa:

—Tata Diospa Espiritunta chaskiychi. ²³ Paymi yachachishunkichi pimi ūukata kreyiwan pimi mana kreyiwanchu nishpa. Chashna yachachishuptikichi Tata Dios perdonashkan runakunata atipankichi willaya: “Tata Dios ūami uchaykichita perdonashkana.” Chashna kankuna willaptikichi Tata Dios chay runakunata perdonankasapa. Chaymanta Tata Diospa Espiritunka yachachishunkichi mana ūukata kreyiwanayak runakunata willaya: “Tata Dioska kankunata manami perdonashunkichichu.” Chashna willaptikichi Tata Dios paykunata mana perdonankasapachu.

Chashna rimashpana Jesuska sakiwarkansapa.

Tomas disipulumasinkunawan tantalla kaptin Jesus kashkan rikurirkan.

²⁴ Jesus ūukaykunapi rikurishkan ora chay disipulun Tomas Gemelo mana ūukaykunawanchu karkan. ²⁵ Ūukaykunapi chayamuptinna payta willarkanisapa:

—Señorninchitaka ūami kawashkanisapa.

Chaypina Tomaska ayniworkansapa:

—Mana kreyiykichichu. Makinpi klavu uchkushkanpi deduynta churashpaynira tuksidu kostillanpi makinita satishpaynira kreyisha kawsamushkanta.

²⁶ Chaymanta pusak diya washan chay wasillapi ūukaykuna kashkan tantanakurkanisapa. Chay diya Tomaska ūukaykunawan karkan. Alli wichkadu wasi ukupi kaptinikuna Jesuska yaykurkan. Yaykushpana chawpinikunapi shayarishpa rimachiwarkansapa:

—Ama turbachinakushpa llakiychichu.

²⁷ Chaypina Tomastaka willarkan:

—Tomas, shamuy. Kay makini klavu uchkushkanpi deduykita churay. Makinikunata kaway. Chaymanta tuksidu kostillaynipi makikita satiy. Ama sinchi shunku mana kreyikuk runa kaychu. Kreyiway wañushkaynimanta kawsamushkaynita.

28 Chaypina Tomaska willarkan:
—¡Kanmi kanki Señornini Diosnini!

29 Chaypina Jesuska willarkan:

—Kawawashpaykira kreyinki kawsamushkaynita. Suk runakuna mana kawawashpapish kreyinkasapa wañushkaynimanta kawsamushkaynita. Paykunaka ashwanta kushikunkasapa.

Juan kay libruta killkarkan Jesusta kreyishpa kawsanaykichipa.

30 Jesuska aypa kuti rikchak laya almirana milagrukunata ruraptin ñukaykunaka kawarkanisapa. Chay aypa almirana milagrukunata kawashpayni mana tukuytachu killkashkani. **31** Kaykunallata killkashkani kankuna yachanaykichipa Jesus Tata Diosmanta shamudu wambran kananta. Killkashkani kankuna Jesusta kreyishpa kawsanaykichipa. Payta kreyishpaykichi paywan tantalla mana tukuuniyukta kawsankichi.

21

Jesus kanchis disipulunkunapi rikurirkana.

1 Chaymanta suk diya Tiberias kocha mañanman kanchis ñukaykuna rirkanisapa. Chaypi kaptinikuna kashkan ñukaykunapi Jesuska rikurirkana. Kunanka parlachiykichi imashnami rikurishka nishpa.

2 Chay Tiberias kocha mañanpi karkanisapa Simon Pedru, Tomas Gemelo, Natanael. Payka Galilea partimanta Kana llaktamanta karkan. Chaymanta ñukapish wawkiniwan karkani. Ñukaykunapa tataynikuna Sebedeo karkan. Chaymanta ishkay disipulumasinkunapish chaypi karkansapa. **3** Chaypina Simon Pedruka willawarkansapa:

—Risha challwakuk.

Ñukaykuna willarkanisapa:

—Ñukaykunapish kanwan tantalla rishasapa.

Chaypina atun kanowapi yaykushpaynikunana rirkanisapa challwakuk. Tuta entero apinayashpaynikunapish mana niman suuk challwata apirkanisapachu. **4** Chaypina pakariyakaptin kocha mañan playapi Jesusta kawarkanisapa. Mana nima riksirkanisapachu Jesus kananta.

5 Chaypina payka willawarkansapa:

—Amiguyunikuna ¿manachu niman suuk challwata apishkankichi?

Ñukaykuna aynirkanisapa:

—Mana niman suukta.

6 Chaypina Jesuska willawarkansapa:

—Chay suni rednikichita kanowa allí ladunpi sirichimuychi. Chaypirami apinkichi.

Chashna Jesus willawaptinkuna redninikunata sirichirkanisapa. Chaypina redninikuna challwawan sukaman untarkan. Mana nima aysayta atipkanisapanachu. **7** Chaypina ñukaka Jesusta allita riksishpa Pedruta willarkani:

—Chay runaka maestrunchikunami.

Chashna ñuka willaptini Pedru llachapakushpa yakuman wishchunakushpa waytashpa rirkana Jesusta tinkuk.

8 Chaymanta kanowaynikuna mañamanta yaka pachak metro kaptin ñukaykuna redninikunapí challwata aysashpa mañapika chayachirkanisapa.

9 Chaypina yakullapi redninikunata sakishpaynikuna kanowamanta llukshirkanisapa. Playapika tarirkanisapa ninata rawraykaptin. Chay ninapika tiyarkan suuk challwa. Chaymanta panpish tiyarkan. **10** Chaypina Jesuska willawarkansapa:

—Chay apishkaykichimanta suk challwakunata apamuychi.

¹¹ Chayta uyarishpa Pedruka chay kanowaman kallparkan redninta challwantinta playaman aysananpa. Chay redpi tiyarkan pachak pichka chunka kimsa atun challwakuna. Äy whole Challwawan kaykashpapish chay redka mana llikurkanchu. ¹² Chaypina Jesuska willawarkansapa:

—Shamuychina mikuypachina.

Ñukaykuna allita yachashpa Jesus kananta mana animukurkanisapachu tapuya paychu manachu nishpa. ¹³ Chaypina Jesus panta apishpa ladunchawashpankuna karawarkansapa. Chaymanta challwakunatapish chaskichiwarkansapa.

¹⁴ Jesus wañushkanmanta kawsamushkanwashcha ñukaykunapi rikuriwashkankuna kimsaynin kutina karkan.

Jesus Pedruwan parlarkan.

¹⁵ Chaymanta mikushkaynikunawashana Jesuska Simon Pedruta tapurkan:

—Juanpa wambran Simon, tukuy disipuluynikunamanta ¿kanchu ashwan allita kuyawanki?

Chaypina Pedruka aynirkan:

—Maestru, allita yachanki sukaman kuyanaynita.

Chaypina Jesuska willarkan:

—Wawa ovejaynikunatashina chayrak kreyiwak runakunata kuydaysapa.

¹⁶ Chaymanta Jesuska kashkan tapurkan:

—Simon ¿ariya kuyawankichu?

Chashna tapuptin Pedruka aynirkan:

—Maestru, allita yachanki sukaman kuyanaynita.

Chaypina Jesuska willarkan:

—Ovejaynikunatashina kreyiwak runakunata kuydaysapa.

¹⁷ Chaymanta kimsaynin kuti tapuptinna Pedruka sukaman llakishpana willarkan:

—Maestru, kan tukuya yachanki. Allita yachanki kuyanaynita.

Chaypina Jesuska willarkan:

—Ovejaynikunatashina kreyiwak runakunata kuydaysapa. ¹⁸ Mash allita uyariway. Kanka wayna kashpayki kikikilla mudakushpa munashkaykiman maytapish kaptin rishkanki. Chaymanta viejuyaptiki makikita chutachiptiki suk runakuna mudachishunka. Chaypina mana rinayashkayki partita pushashunkisapa.

¹⁹ Chashna willashpa Jesuska Pedruta yachachiykarkan sukaman sufrishpa Tata Diosta kushichishpa wañunanta.

Chaymanta Jesuska Pedruta willarkan:

—Kreyiwashpa katiway.

Pedru yachanayarkan imashnami Juan wañunka nishpa.

²⁰ Manara Jesus wañuptinra ñuka paypa munadu disipulun kashpayni ladunpi mikuykarkani. Chashna ladunpi kashpayni tapurkani: “Maestru ¿maykan disipuluykiti rantikushunka?”

Chay diya playapi kashpaynikuna Jesus willaptin sufrishpa wañunanta Pedruka washanta chapashpa ñukata kawawarkan.

²¹ Ñukata kawawashpa Jesusta tapurkan:

—Maestru, kay disipuluyki ¿imashnatí wañunka?

22 Jesuska Pedrutaka willarkan:

—Kutimunaynikaman kawsananta munaptinika kanpa mana nimachu. Kanka kreyiwashpalla katiway.

23 Chashna willaptin tukuy disipulumasinkuna willanakurkansapa: “Manashi Juanka wañunkachu.” Jesuska mana rimarkanchu mana wañunaynita. Payka rimarkan: “Kutimunayni diyakaman kawsananta munaptinika kanpa mana nimachu.”

24 Ñuka Juan Jesuspa disipulun kashpayni kikini kawashkaynikunata killashkani kankuna yachanaykichipa. Nukaykuna yachanisapa tukuy kayta allita kuskanpi killkashkaynita.

25 Jesus aypa alli ruranakunata rurarkan. Kay librupika mana tukuytachu killkashkani. Tukuya sukmanta sukmanta willashpa sukmanta aypa librukunapi killkayman karkan. Chaykunaka ni maypi paktanmanchu.

Chaylla kashka.

HECHOS LUKAS KILLKARKAN JESUKRISTUPA AKLLASHKAN RUNAKUNA RURASHKANKUNATA

Lukas kuyanakukmasin Teofilota yachachiypi katirkana.

¹ Munanayni Teofilo, chay primer libruynipi willashkaykina Jesus nasishkanmantapacha sieluman rinan diyakaman rurashkanta yachachikushkanta. Kunan kashkan killkayki.

² Manarapish sieluman rishpa Jesuska disipulunkunata akllarkan tukuy mayta rishpa yachachikunankunapa. Tata Diospa Espiritun yanapaptin paykunata yachachirkansapa imakunatami rurashpa kawsankasapa.

³ Wañushkanwasha Jesuska tukuy kuerpuntin paykunapi rikurirkan allita yachankunapa kawsamushkanta. Chusku chunka diyata Jesuska paykunata yachachirkansapa imashnami Tata Diospa mandunpi kawsankasapa nishpa. ⁴ Paykunawan tantalla kashpa willarkansapa:

—Amara Jerusalen llaktamanta llukshiychirachu. Ñuka willashkaynishina Tatayni Dios Espiritunta kachamunka. Chayrayku kayllapira kipariychi Espiritun shamunankaman. ⁵ Juan Bawtistaka yakullawan runakunata bawtisarkansapa. Kunanka mana ashwannachu illan Tata Dios kankunata Espiritunwan bawtisashunaykichipa.

Jesus chay runakunapa ñawpakninkunamanta sieluman kutirkana.

⁶ Chaymanta Jesuswan tantanakudu runakunaka tapurkansapa:

—Señor ¿kunamantachu tukuy judiyu runakunata allita kamachikwankisapa?

⁷ Chashna tapuptinkuna Jesuska aynirkansapa:

—Tata Diossalami yachan imay diyami imay orami kachamuwanka kamachinaynipasapa. Kankunaka ¿imapatí chayta yachanayankichi? ⁸ Tata Diospa Espiritun kankunaman shamuptinra atipankichi parlachikuyta ñuka salvakuk kanaynita. Chaypina Jerusalenpi, tukuy Judea partipi, tukuy Samaria partipi, tukuy kay allpapi tiyak llaktakunapi rinkichi yachachikuk.

⁹ Chayta yachachikushkanwasha tukuy chay tantanakudu runakuna kawaykaptinkuna Jesuska altuta rirkana. Chashna riyakashpa puyu ukunpi yaykushpa chinkarkan. Chaypina chay runakunaka manana atiparkansapanachu kawayta. ¹⁰ Chashna Jesus sieluman riptyin kawaykaptinkuna ladunkunapi ishkay yurak likidu llachapayuk angelkuna rikurirkansapa. ¹¹ Paykuna willarkansapa:

—Galileamanta runakuna ¿imapatí llakishpa sieluta chapaykankichi? Kankunamanta sieluman Jesus rishka. Payllami kashkan kay allpaman shamunka. Imashnacha sieluman rishkanta kawashkaykichishina chashnallami kashkan shamunka.

Matiyasta akllarksapa Judaspa paktaynin kananpa.

¹² Chaypina Jesus akllashkan runakuna Olivos urkumanta Jerusalenman kutirkansapa. Chay Olivos urku samana diya purinallapi karkan.

¹³ Jerusalen llaktapi chayashpankuna alkilakushkankuna wasi altuynim-man rirkansapa. Paykunaka karkansapa Pedru, Juan, Santiago, Andres, Felipe, Tomas, Bartolome, Mateo, Alfeopa wambran Santiago, romano gobierntu mana uyarinayak Simon, Santiagopa wawkin Judas. ¹⁴ Chay wasi

altuyninpi paykunaka Jesuspa wawinkunawan mamanwan suk warmiku-nawan amañaksapa tantanakuya oranankunapa.¹⁵ Chashna tantanakush-punkuna suk diya pachak ishkay chunka Jesusta kreyik runakuna chaypi kaptinkuna Pedruka shayarishpa willarkansapa:

¹⁶⁻¹⁷ —Wawkinikuna, paninikuna, Tata Diospa Espiritun yanapaptin ñawpa kamachikuk Davidka killkarkan imatami Judas ruranka nishpa. Judas Jesuspa disipulunmasinikuna kashpa ñukaykunawan tantalla yachachikupi purirkana. Chaymanta David rimashkanshina soldadukunata pusharkan Jesusta apinankunapa.¹⁸ Chaymanta Judaska sukanan llakishpa Jesusta rantikushkan chaninta kutichikurkan. Chaymanta uraysinka urmeshpa wañuchinakurkan. Chashna urmeshpa wiksan pachyarkan chunchullin llukshinankaman. Chaymanta kutichikushkan kullkiti chaskik runakunaka suk terrenuta paypa shutinpi rantirkansapa.¹⁹ Jerusalenpi kawsak runakuna yacharkansapa Judas chaypi wañushkanta. Chayrayku chay terrenuta shutiyachirkansapa Aseldama. Judiyukunapa rimanankunapi chay shuti riman “Yawar Pampa.”

²⁰ Salmo librupi riman:

“Chay mana alli rurakpa wasinka chunlla likidu kiparinka.

Manana ni pi chaypi kawsankananachu.”

Chaymanta riman:

“Chikan runa chay wañudu runapa trabajunta ruranan tiyan.”

²¹⁻²² Chayrayku akuychi akllaypachi Judaspa paktyainin runata. Kaypi tiyan aypa purikmasinchikuna. Paykunaka Señorninchi Jesuswan purirkansapa Juan payta bawtisakushkan tiempumanta sielman rinankaman. Chayrayku paykunamanta sucta akllaypachi ñukaykunawan tantalla Jesukristu kawsamuskanta yachachikunarpa.

²³ Chashna Pedru willaptinkuna chay tantanakudu runakunaka ishkay runakunata kayarkansapa paykunamanta sucta akllanankunapa. Suk karkan Jose Barsabas. Paypa suknin shutin karkan Justo. Chaymanta chay ishkaynin kayadu runa karkan Matiyas.²⁴⁻²⁵ Chaypina chay runakunaka Tata Diosta roygashpa willarkansapa: “A, Tata Dios, kanka tukuy runakunapa shunkunkunata riksinki. Chayrayku yachachikwaysapa kay ishkay runakunamanta maykantami akllashkanki Judaspa paktyainin yachachikumasinikuna kananpa. Judaska uchanrayku manana ñukaykunawannachu. Kunanka churashkaykiman riskhana.”

²⁶ Chaymanta orashkankunawasha sorteuya rurarkansapa yachanankunapa maykantami Tata Dios akllashka nishpa. Chay sorteuyupi Matiyas aklladu kiparirkan. Chay diyamanta Matiyaska chay chunka suk yachachikuk runakunawan tantalla yachachikushpa puriksapa.

2

Tata Diospa Espiritun shamurkan chay runakunapi kawsak.

¹ Chaymanta Pentekostes fiesta ukun Jesusta kreyik runakunaka tantanakurkansapa amañanankuna wasillapi.² Chay wasipi kashpankuna rasllana sielumanta sinchi wayratashiña uyarirkansapa soynashpa shamuptin. Chay tantanakunankuna wasi ukupi soynarkan.³ Chaypina chay tantanakudu runakunaka umankuna kuskapi taksha ninakunata shina kawarkansapa.⁴ Chaypina Tata Diospa Espiritun shamurkan paykunapi kawsak. Chay oras paykunata yanaparkansapa mana yachashkankuna rimanakunata rimayta.

⁵ Chay fiesta diyakunapi aypa llaktakunamanta judiyu runakuna Jerusalenpi chayarkansapa Tata Diosta kuyanankunapa.⁶ Chay

aypa runakuna chay sinchi wayratashina uyarishpangkuna chay wasita rirkansapa kawak. Chaypina Jesusta kreyik runakunata uyarirkansapa tukuy paykunapa rimanankunata rimakuptinkuna. Chayta uyarishpangkuna sukaman almirashpangkuna mana yacharkansapachu imashnami paykunapa rimanankunata yachansapa rimayta nishpa.

⁷ Chashna sukaman almirashpangkuna willanakurkansapa:

—Kay rimananchikunata rimak runakunaka ¿manachu Galileamanta runakuna? ⁸ Paykunaka manami yachansapachu ñukanchikunapa rimananchikunata. ¿Imashnatí kunan atipansapa rimananchikunata rimayta?

⁹ Ñukanchikuna chikan chikan llaktakunamanta shamushpanchikuna rikchakmanta laya rimanayukkuna kanchisapa. Partia llaktamanta, Medya llaktamanta, Elam llaktamanta, Mesopotamia llaktamanta, Judea partimanta, Kapadosia llaktamanta, Ponto llaktamanta, Asia partimanta shamushkanchisapa. ¹⁰ Chaymanta Frigia llaktamanta, Panfilia llaktamanta, Egipto llaktamanta, Libia partimanta, Sirene llaktamanta ashwan karu llaktakunamanta shamushkanchisapa. Roma llaktamantapish shamushkanchisapa. ¹¹ Sukkuna judiyu kasta kanchisapa. Sukkuna mana judiyu kasta kashpa judiyuyashkanchisapa. Chaymanta Kreta llaktamanta, Arabia llaktamanta kanchisapa. Chashna chikan chikan llaktakunamantapish kashpanchikuna uyarinchisapa chay Galileamanta runakuna rimananchikunapi Tata Diosta alabaykaptinkuna.

¹² Chashna chay runakuna willanakushpangkuna sukaman almirashpangkuna tapunakurkansapa:

—¿Imanansapati kay runakuna chashna rimakushpangkuna?

¹³ Chaypina sukkuna asichishpangkuna willarkansapa:

—Chay runakunaka machadusapami.

Pedru shayarishpa rimakurkan.

¹⁴ Chaymanta Pedruka chay chunka suk yachachikukmasinkunawan tantalla shayarirkansapa. Chaypina Pedruka chay aypa runakunata sinchita willarkansapa:

—Judiyumasinikuna, Jerusalenpi kawsakkuna, allita tukuy willanaynita uyariyichi yachanaykichipa imata ruraykanaynita. ¹⁵ Kankuna machadu kanaynikunata rimaptikichipish manami machaduchu kanisapa. Tutapachara kaptin manara ni pi machanmanrachu. ¹⁶ Nawpa yachachikuk Joel rimashkanta kawaykankichi. Payka killkarkan:

¹⁷ “Tata Dioska riman:

Chay tukunan diyakunapi tukuy kreyiwak runakunaman Espirituynita kachasha.

Chaypina ullku wambraykichi warmi wambraykichi ñuka willanaynita yachachikunkasapa.

Waynakuna rikchadu kashpa muskuyninkunapishina almirana layakunata kawankasapa.

Tatakuna muskuyninkunapi almirana layakunata kawankasapa.

¹⁸ Chay diyakunapi kreyiwak ullkunaman warmikunaman Espirituynita kachasha.

Chaypina paykunaka willashkaynita yachachikunkasapa.

¹⁹ Chaymanta sielupi manchana layakunata rurasha kawanaykichipa.

Allpapi yawarta ninata kusnita kawankichi.

²⁰ Manara manchanapa laya llipyashpa shamuptinira inti tuta likidu tukunka.

Killapish puka likidu yawarshina tukunka.

21 Manara shamuptinira tukuy runakuna perdonanaynipa mañawaptinkuna perdonashasapa.”

22 Chaymanta Pedruka chay tantanakudu runakunataka yachachiyllapi katirkan:

—Judiyumasinikuna, willaptini uyariwaychi. Allita yachankichi Tata Dios yanapaptin Nasáret llaktamanta Jesus aypa manchana layakunata milagrukunata rurashkanta. Chaykunawan Tata Dios allita kawachishurkankichi paymanta shamudu runa kananta. **23** Jesus tukuy chay milagrukunata ruraptinpish kankunaka payta pusharkankichi mana alli rurak runakuna kruspi chakatashpwa wañuchinankunapa. Ñawpamantapacha Tata Dios yuyarkan payta chashna wañuchichinaykichipa. **24** Kankuna wañuchichiptikichipish Tata Dioska paytaka kashkan kawsachimurkan. Tata Dioska mana nima munarkanchu wañudu kiparinanpa. Chayrayku kawsachimurkan.

25 Chaymanta chay ñawpa kamachikuk David kashna killkarkan: “A, Tata Dios, yachani tukuy tiempu ñukawan kanaykita.

Kan laduynipi kaptiki mana nimata manchashachu.

26 Chashna ñukawan kaptiki sukaman kushikushpa kawsaykani. Kushikuypuru kantani.

Yachani wañushpaynipish kawsamunaynita.

27 Wañuptini mana munankichu pampadu kiparinaynipa.

Nima munankichu kuerpuyni usunarpa kanpa wambrayki kaptini.

28 Kawachiwashkanki kashkan kawsachimuwanaykita.

Kanwan tantalla kawsashpayni sukaman kushikusha.”

29 Chashna willashpa Pedruka chay tantanakudu runakunataka willaysapallapi katirkan:

—Wawkinikuna, paninikuna, kunanka allita uyariwaychi mana arkachishpa willaptini. Chay ñawpa awilunchi Davidka chay salmota killkashpa mana kikinmantachu rimarkan. Payka wañushkanami. Chashna wañuptin pamparkansapa. Chay pampashkankunaka kunankamanlla tiyan. **30** Davidka alli yachachikuk kashpa yacharkan Tata Dios jurashpa sukaman allita willashkanta: “Kanpa miraknikimanta sukta churasha kamachikuk runa kananpa.”

31 Chashna Tata Dios willaptin Davidka iden kawaykakshinami yachachikurkan Tata Diosmanta shamudu runa wañushkanwasha kawsamunanta. Yachachikurkan mana pampadu kiparinanta nima kuerpun usunanta. **32** David rimashkanskina Tata Dioska Jesustaka kawsachimurkan. Kawsamushkanwasha ñukaykuna payta kawashkanisapa. Kunan chayta yachachiykaykichi. **33** Kawsamushkanwasha Jesuska Tatan Diospa alli ladunman rirkana chaypi paywan tantalla tukuy layapi kamachikunarpa. Chaypina Tatan Dioska payta kunanpa willashkan Espiritunta kurkan. Chashna kuptin Jesukristuka ñukaykunatapish Espiritunta kuwashkasapa. Chayrayku kunan chikan rimanakunata atipaykanisapa rimaya. Chayta kankunaka kawashkankichi uyarishkankichi.

34-35 Chay ñawpa awilunchi Davidka chay salmota killkashpa mana kikinpachu rimarkan. Payka mana kawsamurkanchu tukuy kuerpuntin sielman rinarpa. Chayrayku suk salmopi Tata Diosmanta shamudu runapa rimashpa killkarkan: “Tata Dioska Señorninita willarkan: ‘Alli laduynipi shamuy tiyari chay chiknishuk runakunata saru saru runaynikaman.’”

³⁶ Kunanka tukuy kankuna judiyu runakuna sukaman allita yachaychi: Kruspi chakatashpwa wañuchichishkaykichi Jesustaka Tata Dios churashkana ashwan sinchi kamachikuk kananpa. Payka Tata Diosmanta shamudu salvakuk runami.

³⁷ Chashna Pedru yachachikuptinkuna chay tantanakudu runakunaka llakishpankuna sukaman turbakurkansapa. Chaypina Pedruta yachachikukmasinkunata tapurkansapa:

—Wawkinikuna *¿imamatí rurashasapa?*

³⁸ Pedruka aynirkansapa:

—Tukuy mana alli rurashkaykichimanta wanaychi Tata Dios perdonashunaykichipa. Chaymanta Jesukristupa shutinpi bawti-sakuychi. Tata Dios perdonashushpaykichi Espiritunta kushunkichi yanapashunaykichipa. ³⁹ Kamachiwakninchı Tata Dioska kayanan runakunata willarkansapa Espiritunta kunankunapa. Chaymanta kankunata, kankunapa wambraykichita, karu llaktapi kawsak runakunata willashushkankichi Espiritunta kushunaykichita.

⁴⁰ Chayta rimashpa Pedru yachachikuyllapi katirkan. Sukaman rimakushpa animuchikushpa willarkansapa:

—Chay mana kuskata yachachishuknikichi runakunamanta karuyaychi.

⁴¹ Chashna Pedru yachachikuptin kimsa waranka runakuna yachachikunanta kreyirkansapa. Chashna kreyishpankuna bawtisakurkansapa tukuy Jesukristuta kreyik runakunawan tantanakunankunapa.

⁴² Tukuy chay runakunaka chay yachachikuk runakunapa yachachikushkanta allita kreyishpa kawsarkansapa. Sukwan sukwaniyanapanakushpa kawsaksapa. Aypa kuti Tata Dioswan parlaksapa. Jesukristu wañushkanta yuyashpankuna tantalla mikuksapa.

Jesukristuta kreyik runakuna yanapananakushpa kawsarkansapa.

⁴³ Chaymanta Jesuspa rimananta yachachikkuna aypa almirana milagrukunata rurarkansapa. Chayta kawashpankuna tukuy runakuna sukaman almirarkansapa. ⁴⁴ Chaymanta tukuy kreyikukkuna sukmankuyanakushpa kawsarkansapa. Rikchak laya tiyapunankunawan yanapananakushpa kawsaksapa. ⁴⁵ Chaymanta ima tiyapushkankunata rantikuksapa chay chaninkunawan mana nimayukkunata yanapanankunapa. ⁴⁶ Kada diya Tata Diospa wasinpi tantanakuksapa. Chaymanta kikinkunapa wasinkunapi sukaman kuyanakushpankuna kushikuyninkunawan Jesuspa wañushkanta yuyashpa tantalla mikuksapa. ⁴⁷ Paykunaka Tata Diosta sukmankuyanakushpa kawsaptinkuna tukuy runakuna rimaksapa alli kawsak runakuna kanankunata. Chaymanta aypa runakuna Jesukristuta kreyishpankuna payta kreyik runakunawan tantanakushpa tukuy diya sukmankuyanakushpa.

3

Tata Dios yanapaptin Pedru mana puriy atipak runata sanuyachirkan.

¹ Suk diya chawpi diya washan Tata Dioswan parlanankuna oras kaptin Pedruka Juanwan Tata Diospa wasinman rirkansapa. ² Chaypi suk mana puriy atipak runa karkan. Chay runaka wakllidu chakiyuk nasirkhan. Tukuy diya familyankuna paytaka pushaksapa chay wasi punkunpi tiyachik tukuy yaykuk runakunata kullkita mañanampa. Chay punkupa shutin karkan Allima Punku.

³ Chay runaka Pedruwan Juanta kawashpa chay punkuta yakyukaptinkuna kullkita mañarkansapa. ⁴ Chashna mañaptinkuna payunkuna kawarkansapa. Chaypina Pedruka willarkan:
—Kawawaysapa.

⁵ Chashna willaptin chay runaka kushikushpa chaparkan kullkita kunkasapa nishpa. ⁶ Chashna chapaptin Pedruka willarkan:

—Manami nima kullki nima kuri tiyawanchu. Tata Dios yanapawaptin yanapayki. Nasaret llaktamanta Jesukristupa shutinpi willayki: ¡Atarimushpa puriy!

⁷ Chashna willashpa Pedruka alli ladu makinmanta apishpa atarichirkan. Chashna atarichiptin chay runapa chakinkuna rasllana sinchiyarkan.

⁸ Chaypina payka shayarimushpa kallarirkana kuskata puriya. Chashna sanuyashpana Pedruwan Juanwan tantalla Tata Diospa wasinpi yaykurkansapa. Kushikuyinwan brinkaypi brinkaypi purishpa Tata Diosta kuyashpa alabarkan. ⁹ Chashna brinkaypi purishpa Tata Diosta alabaptin tukuy runakuna kawarkansapa. ¹⁰ Kawashpankuna manchakushpankuna almirarkansapa. Allita riksirkansapa chay Allima Punkupi kullki mañakuk runa kananta.

Pedru chay almirak runakunata yachachirkansapa.

¹¹ Chaypina chay sanuyadu runaka Pedrumanta Juanmanta mana kacharikunayarkannachu. Tata Diospa wasinpi suk alarpi karkansapa. Chay alarpa shutin karkan Salomonpa Alarnin. Chaypi kaptinkuna tukuy Tata Diosta wasinpi tiyak runakuna sukaman almirashpankuna kallparkansapa chay sanuyadu runata kawak. ¹² Chaypina Pedruka payunkuna willarkanansapa:

—Judyumasinikuna ¿imapati almirashpa yuyankichi kikinikunallamanta kay runata sanuyachishkaynikunata? Manami kikinikunallamantachu kay runataka sanuyachishkanisapa. Mana ni Tata Diosta kuyashkaynikunaryakuchu sanuyachishkanisapa. ¹³ Chay ñawpa Abrahampa Isakpa Jakobopa awilunchikunapa Tata Diosninkuna wambran Jesusta sukaman kuyashpa willarkan tukuy layapi kamachikuk kananpa. Chashna kamachikuk kashpa ñukaykunata yanapawashkasapa kay runata sanuyachiyyta.

Kankuna chay Jesustaka romano awtoridarkunaman pusharkankichi. Chaypina chay awtoridar Pilato kacharinayaptimpish mana munarkankichichu kacharinanpa. ¹⁴ Willarkankichi suk suwa runata kacharinanpa. Willarkankichi chay mana uchayuk alli rurak Jesustaka wañuchichinanpa. ¹⁵ Chashnamanta kankunaka chay mana tukuyniyuk kawsaya kuwaknichi Jesustaka wañuchirkankichi.

Chashna wañuchiptykipish Tata Dioska paytami wañushkanmanta kawsachimushka. Ñukaykunaka kawsamushkanwashaa Jesustaka kawashkanisapa. Chay kawashkaynikunata willaykaykichi. ¹⁶ Jesusta kreyishkaynikunaryaku kay riksinyakichi mana puriy atipak runataka sanuyachishkanisapa. Tukuy kankuna kawashkankichi Jesusta kreyishpaynikuna sanuyachishkaynikunata.

¹⁷ Wawkinikuna, yachani kankuna kamachikuknikichiwan Jesusta wañuchichishpaykichi mana yacharkankichichu imatami rurankichi nishpa.

¹⁸ Ñawpa tiempu Tata Dioska alli yachachikuk runakunata willarkan sielumanta shamudu salvakuk runata wañuchinaykitcha. Chayrayku kankuna Jesusta wañuchichishpaykichi Tata Dios ñawpa rimashkantashina rurarkankichi. ¹⁹ Chayrayku uchaykitcha wanashpa kunanmantapacha Jesukristuta kreyiyichi Tata Dios uchaykichimanta perdonashunaykichihi.

Chaypira payka yanapashunkichi kushikuypuru kawsanaykichipa. ²⁰ Tata Dioska ñawpamantapacha rimarkan Jesus salvashuknikichi kananta. Paytaka kashkan kay allpaman kachamunka.

²¹ Jesukristuka sielupi kiparinan tiyan chay ñawpa alli yachachikuk runakuna rimashkankunashina Tata Dios rikchak layata kuskanpi allchanankaman. ²² Moisespish ñawpa awilunchikunata chay layallata willarkansapa: “Tata Diosninchika miraknikichimanta suki alli yachachikuk runata akllanka. Paymi ñukashina alli yachachikuk kanka. Paytaka allita kasunaykichi tiyan. ²³ Mana payta kasuptikichi Tata Dios karkushunkichi.”

²⁴ Chaymanta ñawpa yachachikuk Samuelmantapacha tukuy alli yachachikkuna chay layallata yachachikurkansapa. Willarkansapa imatami kay tiempipi Jesukristu ruranka nishpa. ²⁵ Tata Dios ñawpa yachachikuk runakunata willarkansapa kankunata yanapashunaykichita. Chaymanta chay ñawpa awilunchikunawan paktuta rurashpa willarkan kankunatapish yanapashunaykichipa. Awilunchi Abrahamtapish willarkan: “Karpa miraknikikunata yanapashpayni tukuy allpapi kawsak runakunatapish yanapashasapa.”

²⁶ Tata Dios chaylla wambran Jesusta wañushkanmanta kawsachimushpa kankunaman primeru kachamurkan yanapashunaykichipa. Chashna yanapashushpaykichi munan uchaykichimanta wanashpa payllata kashshpa kawsanaykichipa.

4

Chay llaktapi kamachikuk runakuna Juanwan Pedruta willarkansapa amana yachachikunankunapano.

¹ Chashna Juanwan Pedru chay runakunata yachachiykaptinkunalla saserdotekunawan saduseokunawan Tata Diospa wasin kuydakkunapa kamachikukninkuna chayarkansapa. ² Pedruwan Juan yachachikuykarkansapa Tata Dios Jesusta kawsachimushkanrayku tukuy wañudu runakunatapish kawsachimunankunata. Chayrayku chay runakuna piñakurkansapa. ³ Chaypina Juanwan Pedruta apirkansapa. Amusayaykaptinna karselpi churarkansapa pakarinankaman.

⁴ Manara karselpi churaptinkunara Pedrupa yachachikushkankunata uyarishpankuna sukaman aypa runakuna kreyikurkansapa. Ullukunallata yupaptinkuna yaka pichka waranka karkansapa.

⁵ Chaymanta kayantin Jerusalenpi chay runakunapa kamachikukninkunawan ansianunkunawan Moisespa killkashkanta yachachikukkuna tantanakurkansapa. ⁶ Chay saserdotekunapa kamachikuknin runa Anaspish chaypi karkan. Chaymanta Kayfas, Juan, Alejandro, tukuy saserdotekunapa kamachikukninpaa ayllunkuna paykunawan tantanakurkansapa. ⁷ Chaypina karselmanta Pedruwan Juanta pushachimurkansapa. Chawpinkunapi churashhpankuna tapurkansapa:

—¿Pití willashushkankichi chay unkuduta sanuyachinaykichipa? ¿Pipa shutinpití rurashkankichi chay almirana layataka?

⁸ Chaypina Tata Diospa Espiritu yanapaptin Pedruka aynirkan:

⁹ —Llaktapa kamachikuk runakuna, ansianukuna, kankuna tapuwankichi imashnami kay runata sanuyachishkanisapa nishpa.

¹⁰ Chashna tapuwaptikichi willaykichi tukuy kankuna judiyumasinikuna allita yachanaykichipa. Ñukaykuna Nasaret llaktamanta Jesuspa shutinpi kay ñawpakanikichipi runata sanuyachishkanisapa. Kankunami chay Jesustaka wañuchichirkankichi. Wañudu kashkanmanta Tata Dioska

paytaka kawsachimushka. ¹¹ Jesuska suk alli rumishinami. Kankunaka wasichakuk runakunashina kashpaykichi chay alli rumita millashpa mana munarkankichichu wasikichipi churayta. Chay alli rumita mana munaptikichipish Tata Dioska churashka tukuy rumikunapa sikiñpi. ¹² Tata Dioska Jesusllata kay allpaman kachamurkan salvawananchikunapa. Manami chikan runatachu kuwashkanchisapa salvawananchikunapa.

¹³ Chashna Pedruwan Juan mana manchakushpa nima pinkakushpa ayniptinkuna chay kamachikuk runakunaka sukaman almirarkansapa. Yacharkansapa mana paykunashina yachaysapa runakuna kanankunata. Riksirkansapa Jesuspa disipulunkuna kanankunata. ¹⁴ Chaymanta chay sanuyadu runa chayllapi paykunawan captin mana atiparkansapachu Juanta Pedruta nimata willayta. ¹⁵ Chaypina washaman paykunata llukshishhpunkuna kikinkunapura tapunakurkansapa:

¹⁶ —¿Imatá rurashunchisapa kay runakunata? Tukuy kay Jerusalenpi kawsak runakuna yachansapano kay almirana milagruta rurashkankunata. Chayrayku mana atipanchisapachu rimayta mana sanuyachishkasapachu nishpa. ¹⁷ Akyuchi manchachishpa willaypachi kunanmantapacha amana ni pita Jesuspa shutinpi yachachikunankunapana. Chashna michaptinchikuna manana chay milagruta rurashkankunata sukta supta willankasapanachu.

¹⁸ Chashna chay kamachikuk runakuna willanakushhpunkuna Pedruwan Juanta kashkan yaykuchirkansapa. Chaypina willarkansapa amana ni pita parlachinankunapa nima Jesuspa shutinpi yachachikunankunapa.

¹⁹ Chashna willaptinkuna Juanwan Pedruka aynirkansapa:

—Allita yuyaychi. ¿Allihu kanman Tata Diosta mana kasushpaynikuna kankunallata kasunaynikunapa? ²⁰ Ñukaykunaka Tata Diosllata kasushasapa. Chayrayku kawashkaynikunata uyarishkaynikunata yachachikunaynikuna tiyan.

²¹ Chashna Pedru willaptinkuna chay runakunaka ashwanta jorachishpunkuna kacharirkansapa. Tukuy chay llaktapi kawsak runakuna Tata Diosta alabarkansapa chay unkudu runata sanuyachiptinkuna. Chayrayku chay awtoridarkuna mana yacharkansapachu imashnami kastigankasapa nishpa. ²² Chay sanuyachishkankuna runaka chusku chunka ashwan watayuk karkan.

Jesusta kreyik runakuna Tata Diosta mañarkansapa yanapanankunapa ama manchakunankunapa.

²³ Chashna chay kamachikuk runakuna Pedruwan Juanta kachariptinkuna rirkansapa Jesusta kreyikmasinkunawan tantanakunankunapa. Chaypina tukuy chay saserdotekunapa kamachikukninkunawan chay ansianunkuna willashkankunata willarkansapa. ²⁴ Chayta willashkankunawasha tukuy chay tantanakudu runakuna Tata Diosta kuyashppunkuna willarkansapa:

—A, Tata Dios, kanmi tukuy sieluta allpata yakuta tukuy chaykunapi tiyakta rurashkanki. ²⁵ Kanpa Espirituyki yanapaptin sirvishukniki Davidka rimarkan:

“¿Imapatí Tata Diosta mana kasunayak runakuna piñakunsapa?

¿Imapatí mana valekkunata yuyansapa?

²⁶ Llaktakunapi kamachikuk runakuna tantanakunsapa Tata Diosta mana kasunayashppunkuna.

Chaymanta rimansapa Tata Diosmanta shamudu salvakuk runata mana kasunayanankunata.”

²⁷ A Tata Dios, chayta rurashpa chay ishkay kamachikkuna Herodeswan Pilato chay ñawpa David rimashkantashina rurarkansapa. Kay llaktapi paykunaka judiyukunawan mana judiyukunawan tantanakurkansapa chay alli rurak akllashkayki salvakuk Jesusta wañuchinankunapa. ²⁸ Chashna Jesusta wañuchishpankuna kan munashkaykishina tukuy chay ñawpa rimashkaykita rurarkansapa.

²⁹ A Tata Dios, kunanka chay chiknishuk runakuna manchachianayanankunata yuyay. Yanapawaysapa mana manchakushpa rimanaykita yachachikunaynikunapa. ³⁰ Allita yanapawaysapa chay alli rurak wambrayki Jesuspa shutinpi unkudukunata sanuyachinaynikunapa almirana milagrukunata ruranaynikunapa.

³¹ Chashna Tata Diosta willashkankunawasha chay tantanakushkankuna wasi sukaman kuyurkan. Chaypina Tata Diospa Espiritunka sukaman yanaparkansapa mana ni pita manchashpa Tata Diospa rimananta yachachikunankunapa.

Jesusta kreyik runakuna tiyapunankunawan yanapanakuksapa.

³² Chaymanta tukuy chay aypa kreyikuk runakunaka suk yuyaylla kashpa sukaman yanapanakushpa kawsaksapa. Rimarkansapa tukuy tiyapunankuna paktallapa kananpa. Mana ni pi rimaksapachu kayka ñukallapami nishpa. ³³ Jesuspa aklladu yachachikuk runakunaka sukaman allita yachachikuykarkansapa Señor Jesukristu wañushkanmanta kawsamushkanta. Chashna allita yachachikuptinkuna Tata Dioska paykunata sukaman yanaparkansapa. ³⁴ Chayrayku niman sukpa nima laya illapuksapachu. Terrenuyuk wasiyuk runakuna rantikuksapa. ³⁵ Chaypina chay rantikushkankuna chaninkunata chay alli yachachikuk runakunata kurkansapa mana nimayukkunata patumanankunapa.

³⁶ Chaypi suk runa Jose Levipa ayllunmanta Chipre ishlamanta karkan. Paypish Jesukristuta kreyirkan. Payka sukaman animuchikuk kushichikuk runa karkan. Chayrayku chay yachachikuk runakunaka paytaka shutiyachirkansapa Bernabepi. Chay shutin riman “kushichikuk runa.” ³⁷ Chay Bernabepa suk terrenun tiyarkan. Payka chay terrenunta rantikurkan. Chay rantikushkan chaninta chay alli yachachikuk runakunata kurkan paykuna patumakunankunapa.

5

Ananiyas warmin Safirawan chay alli yachachikuk runakunata llullachinayarkansapa.

¹ Chaymanta suk runa Ananiyas warmin Safirawan suk terrenunta rantikurkansapa. ² Chayta rantikushshpankuna chay ullku warminwan yuyaykushpa patuma kullkita apirkansapa paykunallapa kiparinanpa. Chaymanta patumallata chay alli yachachikuk runakunata kurkansapa. Llullakushpa Ananiyas willarkan terrenun chaninta paktaduta kuykananta. ³ Chashna llullakuptinna Pedruka Ananiyasta willarkan:

—Ananiyas, terrenuykita rantikushpa patuma kullkita apishkanki. Chaypina shamushkanki willawak tukuy paktadu chaninta apamushkaykita. ¿Imapatí Satanasta uyarishpa Tata Diospa Espiritunta llullachinayaykanki? ⁴ Chay terrenuykika kanpami karkan. Chaymanta rantikushkayki chaninka kanllapami karkan. ¿Imapatí llullachiwaykanki tukuy chaninta apamushkanki nishpa? Chashna rurashpaykika mana ñukaykunallatachu llullachiwashkankisapa. Tata Diostami llullachinayashkanki.

⁵ Chashna Pedru willaptin Ananiyaska allpapi urmashpa wañurkan. Chashna wañuptin tukuy runakuna yachashpa sukaman manchakurkansapa. ⁶ Chaypina suk waynakuna Ananiyaspa kuerpunta su llachapawan wankushpa pusharkansapa pampak.

⁷ Chaymanta kimsa ora washan chay wañudu Ananiyaspa warmin yachurkan mana yachashpa kusan wañushkanta. ⁸ Chaypina Pedruka tapurkan:

—May willaway. ¿Ariya terrenuykitchitaka willawashkaykichi chaninchichu rantikushkankichi?

Chay warmika aynirkan:

—Ariya chay chaninpi.

⁹ Chaypina Pedruka willarkan:

—¿Imapatí kusaykiwan mana allita yuyaykushpa Tata Diospa Espiritunta llullachinayashkankichi? Chay waynakuna kusaykita pampaymanta kumuykansapa. Paykunallami kantapish pushashunkisapa pampashuk.

¹⁰ Chay oralla Safirapish Pedrupa ñawpkninpi urmashpa wañurkan. Chay waynakuna chayamushpankuna paytapis tarimurkansapa wañudutana. Chaypina Safirapa kuerpunta pusharkansapa kusanpa ladunpi pampak.

¹¹ Chaypina chay wañushkankunata yachashpankuna tukuy runakuna Jesukristuta kreyik runakunapish sukaman manchakurkansapa.

Chay alli yachachikuk runakuna aypa almirana layakunata rurarkansapa.

¹² Chaymanta Jesuspa aklladu yachachikkuna runakunapa ñawpkninkunapi aypa almirana milagrukunata rurarkansapa. Tata Diospa wasinpi Salomon Alarpi amañaksapa tantanakuya. ¹³ Aypa runakuna paykunata kuyashpankuna willarkansapa alli rurak runakuna kanankunata. Chaymanta wakin runakuna manchakurkansapa paykunawan tantanakuya. ¹⁴ Chaymanta aypa ullkukuna warmikuna Jesukristuta kreyirkansapa.

¹⁵ Chaypina chay runakuna unkudukunata kamillankunapi pusharkansapa kallikunapi churak Pedru pasashpa sombran apiptin alliyachinankunapa. ¹⁶ Chaymanta tukuy Jerusalenpa ladun llaktakunamanta aypa runakuna shamurkansapa unkudukunata pushamushpankuna. Supay unkuchishkan runakunatapis pusharkansapa chay alli yachachikkuna alliyachinankunapa. Chashna pushaptinkuna paykunaka tukuyta alliyachirkansapa.

Awtoridarkuna chay alli yachachikuk runakunata micharkansapa amayachachikunankunapa.

¹⁷ Chaypina saserdotekunapa kamachikuknin saduseokunawan sukaman piñakurkansapa chay alli yachachikuk runakuna aypa unkudukunata sanuyachiptinkuna. ¹⁸ Chayrayku chay alli yachachikuk runakunata apichishpankuna pusharkansapa llaktapa karselnipri churak. ¹⁹ Chay tuta Tata Diospa angelin karselpa punkunta kicharishpa llukshichirkansapa.

²⁰ Willarkansapa:

—Rillarychi Tata Diospa wasinman. Chaypi tukuy runakunata yachachimuychi Jesukristuta kreyishpa mana tukuyniyukta kawsanankunata.

²¹ Chay angel willashkanshina paykunaka tutapacha rirkansapa Tata Diospa wasinpi yachachikuk.

Chaypi yachachikuykaptinkuna saserdotekunapa kamachikuknin saserdotemasinkunawan judiyu ansianunkunata kayachirkansapa

parlanankunapa. Tantanakushpangkuna guardiyakunata kacharkansapa karselpi wichkadu yachachikuk runakunata pushamuk. ²² Chay guardiyakuna karselpi chayashpangkuna mana niman suk runata tarirkansapachu. Chashna chunllata tarishpangkuna kutirkansapa ansianunkunata willak:

²³ —Chay karselta tarishkanisapa alli wichkaduta. Soldadukuna punkunta allita kuydaykashkasapa. Chaypina punkuta kicharishpaynikuna karsel ukupi mana ni pita tarishkanisapachu.

²⁴ Chashna guardiyakuna willaptinkuna saserdoteckunapa sinchi kamachikukninwan, Tata Diospa wasinta kuydakkunapa kamachikukninwan sinchi saserdoteckuna sukwani tapunakurkansapa:

—¿Imashnatí chay runakunaka llukshishkasapa? ¿Kunanka imachami tiyan?

²⁵ Chashna tapunakuykaptinkuna suk runa paykunapi chayashpa willarkansapa:

—Karselpi wichkachishkaykichi runakunaka Tata Diospa wasinpi tukuy runakunata yachachiykansapa.

²⁶ Chaypina Tata Diospa wasinta kuydak guardiyakunapa kamachikuknín chay guardiyakunawan rirkansapa maskak. Chaypi tarishpangkuna mana nimanachirkansapachu manchakushpa chay runakuna ruminchankunata. Chaypina allillapi ansianunkunaman pusharkansapa. ²⁷ Chaypi chayaptinkuna chay sinchi kamachikuk saserdoteckuna willarkansapa:

²⁸ —Ñukaykunaka sinchita willashkaykichi ama Jesuspa yachachikushkanta nima rurashkanta ni pita yachachinaykicipa. ¿Imapatí yachachikuylapi katinkichi? Kay Jerusalenpi kawsak runakunata sukmanna yachachiykankichi. Chaymanta ñukaykunata chatawaykankichi Jesusta wañuchishkaynikunata.

²⁹ Chashna willaptinkuna Pedruka chay yachachikukmasinkunawan aynirkansapa:

—Ñukaykunaka Tata Dios willawashkankunallata ruranisapa. Chayrayku kankunata mana kasushkaykichichu. ³⁰ Kankunaka Jesusta suk kruspi chakatashpwa wañuchichirkankichi. Chaymanta awilunchikunapa Tata Dios-nimmi chay wañuchichishkaykichi Jesusta kawsachimushka. ³¹ Chashna Tata Dios Jesusta kawsachimushpa willarkan alli ladunpi tiyarinanpa. Willarkan paylla israel runakunata kamachiwananchikunapa salvawananchikunapa. Chashna Jesus salvakuk kaptin uchanchikunata wanaptinchikuna payka perdonawanchisapa. ³² Ñukaykuna allita willaykaykichi Jesukristu salvawakninchikuna kananta. Tata Diospa Espiritunpish chashnallami willashunkichi. Tata Diosta kasuptinchikuna Espiritunta kachamun yapananchikunapa.

³³ Chashna Pedru willaptinkuna chay kamachikuk runakunaka piñakushpangkuna sukmaman munarkansapa wañuchiya. ³⁴ Paykunawan karkan suk fariseo runa Gamayel. Chay Gamayelka Moisespa killkashkankunata yachachikuk runa karkan. Chay llaktapi kawsak runakuna payta riksishpa rimarkansapa alli yachachikuk runa kananta. Chay Gamayelka shayarishpa willarkansapa suk ratupa Pedruta Juanta llukshichinankunapa. ³⁵ Chaypina chay kamachikukmasinkunata willarkansapa:

—Judiyumasinkuna, amarapish kay runakunata wañuchishpaykichira allita yuyakyuchi. ³⁶ ¿Manachu yuyankichi chay runa Teyudasta? Payka

rimarkan sinchi kamachikuk kananta. Chusku pachak runakuna paytaka katirkansapa. Chaypina chay romano awtoridarkuna Teyudasta wañuchiptinkuna katiknin runakuna chayta chayta nitikurkansapa. Chaypina tukuy ruranayashkankuna tukurkan.

³⁷ Chaymanta yuyaychi chay Galileamanta runa Judasta. Gobiernu tukuy runakunata yupanankuna diyakunapi payka aypa runakunata willarkansapa payllata katinankunapa. Aypa runakuna payta katiptinkuna awtoridarkuna wañuchichirkansapa. Chaypina katikninkuna chayta chayta nitikurkansapa. ³⁸ Chayrayku willaykichi ama nimata chay yachachikuk runakunata ruraychichu. Paykuna kikinkunamanta yachachikushpankunaka suk tiempukamanmi chunllayankasapa. ³⁹ Chaymanta Tata Diosmanta kaptin kankunaka manami atipankichichu chunllayachiya. Kuydanakuychi ama Tata Diosta rabyachinaykichi.

Chashna Gamayel willaptinkuna chay kamachikuk runakunaka kasurkansapa. ⁴⁰ Chaypina chay yachachikuk runakunata kayachishpankuna asutichirkansapa. Sinchita willarkansapa amana kutin Jesuspa shutinpi nimata yachachikunankunapana. Chashna willashpankuna kacharirkansapa.

⁴¹ Chaypina chay yachachikuk runakuna chay kamachikuk runakunamanta kushikuypuru llukshirkansapa. Sukaman kushikurkansapa Jesukristuta kasushkanrayku sufrishpankuna.

⁴² Chaymanta tukuy diya Tata Diospa wasinpi wasinkunapipish yachachikuksapa Jesus Tata Diosmanta shamudu salvakuk runa kananta.

6

Jesusta kreyik runakuna kanchis runakunata akllarkansapa yanapanankunapa.

¹ Chay tiempu Jesusta kreyik runakuna ashwanta aipayarkansapa. Suk kreyikukkuna griego rimak karkansapa. Sukkuna hebreo rimak karkansapa. Chay griego rimak runakuna sientishpa rimarkansapa paykunamanta ashwan aypa kullkita chay hebreo rimak viyudakunata kushkankunata. ² Chashna rimaptinkuna chay chunka ishkay yachachikuk runakunaka tukuy kreyikuk runakunata tantanachirkansapa. Paykunata willarkansapa:

—Ñukaykunaka Tata Diospa rimananta yachachikunisapa. Manami allichu kanman yachachikunaynikunata sakishpa kullkita patumakunaynikunapa.

³ Chayrayku, wawkinikuna, paninikuna, kankunamanta kanchis runakunata akllaychi mana nimayuk runakunata kullkita patumakunankunapa. Tata Diospa Espiritunta alli kasuk mana llullakuk alli yachak runakunata akllaychi. ⁴ Chashna chay kanchis runakunata akllaptikichi ñukaykuna katishasapa orashpalla Tata Diospa rimananta yachachikuylapi.

⁵ Chashna chay yachachikuk runakuna willaptinkuna Jesusta kreyik runakunaka almitirkansapa. Chaypina akllarkansapa Estébanta. Payka Jesukristuta alli kreyik rúna karkan. Tata Diospa Espiritunta allita kasshpa kawsak. Chaymanta akllarkansapa Felipita, Prokorota, Nikanorta, Timonta, Parmenasta, Nikolasta. Chay Nikolaska Antiokiya llaktamanta karkan. Payka mana judiyu kayakashpa judiyukunapa yachachikunanta aypa watatana katirkan.

⁶ Chay kanchis runakunata akllashpankuna chay chunka ishkay yachachikuk runakunaman pusharkansapa. Paykunaka makinkunata chay aklladu runakunapa umankunapi churashpa Tata Diosta roygarkansapa sukaman yanapanankunapa.

⁷ Chaymanta Tata Diospa rimananta sukanan yachachikuptinkuna Jerusalenpi Jesukristuta kreyik runakuna sukanan aypayarkansapa. Aypa saserdotekunapish Jesusta kreyirkansapa.

Chiknik runakuna Estebanta pusharkansapa kamachikukninkunapi chatakuk.

⁸ Chaymanta Tata Diospa Espiritu sukanan yanapaptin chay runakunapa ñawpakinunkunapi Estebanka atiparkan aypa almirana milagrukunata rurayta. ⁹ Chashna almirana milagrukunata ruraptin su runakuna kallarirkansapa Estebanwan ayninakuyta. Chay runakuna suk tantanakunkuna wasipi tantanakuksapa. Chay wasipa shutin karkan Kachardukunapa Wasin. Suq ayninakuk runakuna Sirene llaktamanta, Alejandriya llaktamanta, Silisia partimanta, Asia partimanta karkansapa.

¹⁰ Chay runakuna Estebanwan sukanan ayninakushpankunapish mana atiparkansapachu upallayachiyyta. Tata Diospa Espiritu sukanan yanapaptin Estebanka atiparkan sukanan allita yachachiysapata. ¹¹ Chashna mana upallayachiyyta atipashpankuna suk runakunata kullkita pagararkansapa chatanankunapa Esteban Tata Diosta Moisesta washanchaykananta.

¹² Chay llullakuk runakuna chayta rimashpa ansianukunata, Moisespa killkadunta yachachikukkunata, chay llaktapi kawsak runakunata sukanan turbachirkansapa. Paykunaka Estebanta apishpankuna pusharkansapa kamachikukninkunapi chatakuk. ¹³ Chaypina chay llullakuk runakunaka chatashpankuna willarkansapa:

—Kay runaka sukanan washanchashpa riman kay Tata Diospa wasin Moisespa killkadun mana alli kanankunata. ¹⁴ Chaymanta uyarishkanisapa rimaptin chay Nasaretmanta Jesus Tata Diospa wasinta urmachinanta. Chaymanta uyarishkanisapa rimaptin Jesus Moises yachachiwashkanchikunata chikan layatana yachachawananchikunata.

¹⁵ Chashna chatakuykaptinkuna chay kamachikuk runakunawan tukuy chay tantanakudu runakunaka Estebanta chaparkansapa. Uyanta kawarkansapa iden suk angelpa uyanshina llipyaptin.

7

Esteban chay kamachikuk runakunata sukanan yachachirkansapa.

¹ Chaypina chay sinchi kamachikuk saserdoteka Estebanta tapurkan:

—Chay runakunaka ñuskatachu chatashushkasapa?

² Chashna tapuptin Estebanka willarkansapa:

—Wawkinikuna, tataynikuna, mash uyariwaychi. Chay runakunaka llullakuykansapa. Mana tukuyniyukta kawsak Tata Diosninchikuna ñawpa awilunchi Abrahampi rikurirkun Mesopotamia llaktanpi kaptin manara Haran llaktaman riptinra. ³ Chashna rikurishpa willarkan: “Aylluykikunata sakishpa kay llaktaykimanta llukshiy. Kawachinayni llaktaman rillay.”

⁴ Chashna Tata Dios willaptinna Abrahampi Kaldea llaktanmanta llukshirkan Haran llaktapi kawsak. Chay Haranpi tatanka wañurkan. Chaymanta tatan wañuptin Tata Dioska kay kawsaykananchikuna llaktaman pushamurkan. ⁵ Kay llaktapi kawsaykaptinpish mana paypachu karkan. Chay tiempu manara nima wambrayukra kaykaptinpish Tata Dioska willarkan wañushkanwasha kay llakta mirakninkunapa kananta.

⁶ Chaymanta Tata Dioska Abrahampi willarkan: “Miraknikuna suk chikan llaktaman rinkasapa mana llaktayuk runakunashina kawsanankunapa. Chusku pachak watata chay chikan llaktapi kawsak runakuna paykunata sukanan trabajachishpankuna sufrichinkasapa.”

⁷ Chaymanta Tata Dioska Abrahamtaka willarkan: “Ñukami chay miraknikunata sufrichik runakunata kastigashasapa. Chashna kastigaptinikuna chay miraknikunaka chay llaktamanta llukshinkasapa. Chaypina kay llaktaman shamushpankuna ñukata sirviwashpankuna kawsankasapa.”

⁸ Chashna Tata Dios Abrahamwan paktuta rurashpa willarkan tukuy ullku wambrakunata pusak diyayuk kaptinkuna señalachinankunapa. Chayrayku wambran Isak nasiptin pusak diyayuk kaptin Abrahamka señalaran. Chaymanta Isakpish wambran Jakobota señalaran. Chaymanta Jakobopish wambrankunata señalaransapa. Jakobopa wambrankunamanta chunka ishkay ayllunkuna mirashkanchisapa.

⁹ Jakobopa wambrankuna ñukanchikunapa ñawpa awilunchikunami. Paykunaka wawkin Josefa chiknispah rantikurkansapa Egipio llaktaman pushanankunapa. Chashna rantikuptinkunapish Tata Dioska Josetaka sukanan yanaparkan. ¹⁰ Tata Diosmi tukuy suffrashkunkunamanta surkurkan. Tata Dios sukanan yanapaptin Josefa alli yachak karkan. Chashna yachaysapa kashpa Egipioti kamachikuk Faraonta kushichirkan. Chayrayku Faraonka Josefa kuyashpa churarkan kikinpa wasinpi Egipio llaktapipish kamachikunana.

¹¹ Chashna Jose kallariptin kamachikuya Egipioti tukuy Kanaan llaktapi sinchi yarkay tiyarkan. Chaypina chay awilunchikuna Kanaan llaktapi kawsaykashpankuna mana nima mikunankunata tarirkansapanachu.

¹² Chashna sinchi yarkay tiyaptin Jakoboka yacharkan Egipioti trigu tiyananta. Chayrayku wambrankunata kacharkansapa triguta rantinankunapa. Chay awilunchikuna chayrak rishpankuna manara wawkin Josetaka riksirkansaparachu.

¹³ Chaymanta ishkaynin kuti riptyinkuna Josefa chayrak willarkansapa wawkinkuna kananta. Chaypira chay kamachikuk Faraonka yacharkan maykan kastami Josefa nishpa.

¹⁴ Chaymanta Josefa wawkinkunata willarkan tatan Jakobota tukuy familyankunata pushamunankunapa Egipioti kawsanankunapa. Jakobopa familyankunaka kanchis chunka pichka runakuna karkansapa. ¹⁵ Chashna Jose willakuptin Jakoboka tukuy familyankunawan rirkansapa Egipioti kawsak. Chaymanta chay llaktallapi wañurkan. Chayllapi chay chunka ishkay wambrankunapish wañurkansapa. ¹⁶ Jakobo wañuptin Josefa tukuy wawkinkunawan kuerpunta pusharkansapa Jakobopa llaktan Sikempi pampak. Ñawpa tiempu chay Sikem llaktapi Abrahamka aypa kullkiwan Hamorpa wambrankunamanta suk terrenuta rantirkan. Chay terrenupi Jakobopa kuerpunta pamparkansapa.

¹⁷ Chaymanta Jakobopa ñetunkuna Egipioti kawsashpankuna sukanan aypata mirarkansapa. Aypa watakunata chay llaktapi kawsashkankunawa pishillana illarkan Tata Dios Abrahamta willashkantashina rurananpa. ¹⁸ Chaypina Egipioti chikan kamachikuk runa yaykurkan. Payka Josetaka mana riksirkanchu unay tiempu wañudu kaptinna. ¹⁹ Chay kamachikuk awilunchikunata sukanan llullachishpa sufrichirkansapa. Mana munarkanchu miranankunapa. Chayrayku willarkansapa tukuy chayrak nasidu ullku wambrakunata wishchunankunapa wañunankunapa.

²⁰ Chay tiempupi Moiseska nasirkhan. Tata Dioska chay wambratata sukanan kuyarkan. Chaypina kimsa killata tatan maman wasinpi pakashpa wiwarkansapa. ²¹ Chaypina manana pakayta atipashpankuna suk sestupi churashpa yakupi kacharirkansapa. Chay yaku mañanpi chay kamachikuk Faraonpa shipashnин tarishpa kikinpa wawantashina wiwarkan. ²² Chay

shipash wiwaptin Moiseska tukuy chay egipio runakunapa yachanankuna allita yachakurkan. Wiñashpa alli rimakuk alli yachaysapa runa karkan.

²³ Chaymanta Moiseska chusku chunka watayuk kashpa rirkana israelmasinkunata kawak. ²⁴ Paykunapi chayashpa kawarkan su egipio runa su israel runata sukaman makaykaptin. Chayta kawashpa Moiseska israelmasinta amachak rishpa chay egipio runata wañuchirkan. ²⁵ Payta wañuchishpa yuyarkan: “Israelmasinkuna yachankasapa Tata Dios ñukata kachamuwashkanta chiknik runakunamanta llukshichinaynipasapa.” Chashna Moises yuyaptinpish chay israelmasinkunaka mana yacharkansapachu Tata Dios kachashkanta.

²⁶ Chaymanta kayantin Moiseska tarirkansapa ishkay israel wawkipura makanakuykaptinkuna. Rakinachiysapata munashpa willarkansapa: “Kankuna wawkipura kayakashpa ¿imapati makanakuykankichi?”

²⁷ Chashna Moises michaptinkuna chay israelmasinta makaykak runa Moisesta tankakushpa willarkan: “Ariya ¿pití willashushka shamunaykipa juesninkuna kamachiwakninizuna kanaykipa?” ²⁸ ¿Kayna chay egipio runata wañuchishkaykitashinachu wañuchiwanayki?”

²⁹ Chayta uyarishpa Moiseska manchakurkan. Chayrayku nitikushpa Madian partiman rirkana. Chay partipi mana llaktayuk runashina kawsarkan. Chaypi kawsaptin ishkay wambrankuna nasirkansapa.

³⁰ Chaymanta chusku chunka wata washan su chunlla pampapi Sinai urku ladunpi Moiseska karkan. Chaypi su taksha kaspi kawarkan rawraykaptin. Chay rawraykak ukumanta Tata Diospa angelin rikurirkan. ³¹ Chaypina Moiseska sukaman almirashpa manchakuykashpa laduncharkan ashwan allita kawanana. Chashna ladunchaykaptin uyarirkan Tata Dios willaptin: ³² “Ñukami kani chay ñawpa awiluykikuna Abrahampa Isakpa Jakobopa Tata Diosnin.”

Chashna Tata Dios willaptin Moiseska manchakuywan chukchukushpa chay taksha kaspi rawraykakta manana kawanayarkannachu. ³³ Chaypina Tata Dioska willarkan: “Ushutaykikunata surkuy kay urku ñukapa kaptin. ³⁴ Ñukaka israel wambraynikunatami allita kawani. Paykuna Egiptopi sukaman llakishpa kawsaykansapa. Uyarishkani sukaman llakishpa wakaptinkuna. Chayrayku Egiptoman kachayki chay wambraynikunata llukshichinaykipasapa.”

³⁵ Ñawpata chay israelmasinkunaka Moisesta mana munashpankuna willarkansapa: “¿Pití willashushka juesninkuna kamachiwakninizuna kanaykipa?” Tata Diospa angelin chay taksha kaspi rawraykak ukumanta willashpa Moisesllata kacharkan Egipio llaktaman rinanpa. Willarkan israelmasinkunata chay llaktamanta llukshichinankunapa.

³⁶ Moiseslla chay ñawpa awilunchikunata Egiptomanta llukshichirkansapa. Chusku chunka watata chay llaktapi, chay Puka Kochata chimbaypi, chay chunlla chakidu pampapi Moiseska aypa almirana milagrukunata rurarkan.

³⁷ Moisesllami chay israelmasinkunata willarkansapa: “Tata Diosmi miraknikichimanta su runata akllanka ñukashina alli yachachikuk kananpa.”

³⁸ Chay israel runakuna chay chunlla pampapi kawsaptinkuna chay Sinai urkupi su angel Moisesllata yachachirkana imashnami runakuna Tata Diosta kasushpa kawsankasapa nishpa. Chaymanta Moiseslla chay ñawpa awilunchikunata tukuy chaykunata yachachirkansapa. Chaymanta paylla tukuy chaykunata killkarkan ñukanchikunapish yachananchikunapa.

³⁹ Chashna Moises Tata Diospa rimananta yachachikuptinpish chay ñawpa awilunchikunaka manami munarkansapachu kasuya. Egipotoman munarkansapa kutiyllata. ⁴⁰ Chashna Egipotoman kutinayashpangkuna Aronta willarkansapa: "Manami yachanisapachu maymanmi riskha chay Egipotomanta llukshichimuwakninchikuna Moiseska. Chayrayku diosninkunata rurapaysapa pushawanankunapa."

⁴¹ Chashna chay runakuna willaptinkuna Aronka kurimanta beshekuta rurarkan. Chayta ruraptin chay runakunaka kaymi diosninchikuna nishpa kuyarkansapa. Chaýmanta wiwa animalniñkunata wañuchishpangkuna chay kurimanta ruradu beshekuta kuyashpangkuna fiestata rurarkansapa.

⁴² Chayta kawashpana Tata Dioska paykunamanta suchurkan. Sakirkansapa luserukunata diosninkunatashina kuyanankunapa. Chashnallami ñawpa alli yachachikuk runakunapa librungi riman: "Israel wambraynikuna, chay chunlla allpapi chunka chusku watata purirkankichi.

Chaypi wiwa animalnikikunata wañuchishpaykichi manami ñukatachu kuyawashkankichi.

⁴³ Ñukata kuyawanaykichimanta chikankunata kuyarkankichi.

Molok diosta taksha wasinpi churashpa purichirkankichi.

Chay luseru Refanta kuyarkankichi.

Kikikichi rurashkaykichi dioskunata kuyarkankichi.

Chayrayku Babilonia llaktamanta ashwan karu llaktakunaman pushashkaykichi chaypi kawsanaykichiipa."

⁴⁴ Chay chunlla chakidu allpapi chay ñawpa awilunchikunapa tiyarkan animalkunapa karapankunamanta ruradu wasin Tata Diosta kuyanankunapa. Tata Dioska Moisestaka willarkan kawachishkantashina chay wasita ruranankunapa. ⁴⁵ Chay ñawpa awilunchikuna chay wasitaka aypa wataknata purichksapa.

Chaymanta Moises wañuptin Josue kamachikuk kiparirkan. Josue kamachikuptin Tata Dios awilunchikunata yanaparkansapa Tata Diosta mana kreyik runakunata makashpa kalpachinankunapa. Chay allpapi kawsashpangkuna chay kamachikuk Davídpá tiempunkaman chay karamanta ruradu Tata Diospa wasinta kuydarkansapa. ⁴⁶ Chay ñawpa kamachikuk Davidka Tata Diosta sukaman kushichirkan. Suk alli wasita sukaman ruranayarkan ñawpa Jakobomanta mirakninkuna chaypi Tata Diosta kuyanankunapa. ⁴⁷ Chashna David ruranayaptinpish wambran Salomon Tata Diospa wasinta rurarkan. ⁴⁸ Chashna Salomon wasita ruraptinpish sielipi kawsak Tata Dioska mana runakuna rurashkan wasipichu kawsan.

⁴⁹⁻⁵⁰ Suk ñawpa alli yachachikuk runa killkarkan:

"Tata Dioska riman:

'Ñukaka altu sielipi tiyarishpa tukuy runakunapa sinchi kamachikuknimi kani.'

Ñukallami tukuy allpapi tiyakta rurashkani.

Chayrayku ¿imashnatí runakuna rurashkan wasipika kawsayman?

Kankuna mana atipankichichu rurayta samanayni wasita.'

⁵¹ Chashna rimashpa Esteban yachachikuylapi katirkan:

—Kankunaka chay ñawpa awiluykichishina Tata Diosta mana kreyinayankichichu nima kasunayankichichu. Tata Diospa Espirituntapish mana kasunayankichichu. ⁵² Chay ñawpa awiluykichika tukuy alli yachachikukkunata sufrichirkansapa. Chay alli yachachikuk runakuna yachachikurkansapa chay alli rurak Jesus shamunanta. Chaypina Jesus shamuptin rantikushpa kankunaka wañuchirkankichi. ⁵³ Kankunaka

angelkunamanta Tata Diospa rimananta chaskishpaykichipish mana kasunkichichu.

Chay chiknik runakuna Estebanta ruminchashpa wañuchirkansapa.

⁵⁴ Chashna Esteban chay kamachikuk runakunata willaptinkuna kirunkunata mukushpankuna sukaman rabyakurkansapa. ⁵⁵ Chashna orana Esteban sieluta chapashpa Tata Diospa Espiritu yanapaptin Tata Diosta llipyakpuruta kawarkan. Jesustapish kawarkan Tata Diospa alli ladunpi shayariduta. ⁵⁶ Chaypina chay runakunata willarkansapa:

—Mash kawaychi. Ñukaka kawaykani sieluta kicharinakuduta. Chaypi Tata Diospa wambranta Tatanya alli ladunpi kawaykani.

⁵⁷ Chashna Esteban willaptinkuna chay runakunata rinrinkunata wichkashpankuna sinchita kaparikurkansapa. Rabyakushpankuna Esteban apirkansapa. ⁵⁸ Payta aysashpankuna chay llaktamanta llukshichishpankuna rumincharkansapa. Paykuna sawa llachapankunata surkukushpankuna suk runa Saulota kurkansapa kuydapunankunapa. ⁵⁹ Chay chiknik runakuna ruminchaykaptinkuna Estebanka orashpa willarkan:

—A Señor Jesus, ñukaka wañuykaninami. Chaskiwayna.

⁶⁰ Chayta rimashkanwasha kunkurikushpa sinchita rimashpa Tata Diosta willarkan:

—¡A, Tata Dios, kay wañuchiwiak runakunata perdonaysapa!
Chashna willashpa Estebanka wañurkan.

8

Saulo Jesukristuta kreyik runakunata sufrichirkansapa.

¹⁻² Chashna chay chiknik runakuna Estebanta wañuchiykaptinkuna Saulopish rimarkan allimi wañuchinankunaka. Esteban wañuptinna Jesukristuta kreyik runakuna sukaman wakakushpa pamparkansapa.

Chay diyamanta Jerusalenpi kawsak runakuna Jesukristuta kreyik runakunata chiknishpa kallarirkansapa sufrichiyta. Chayrayku paykuna manchakuywan Judea partiman Samaria partiman nitikurkansapa. Paykuna nitikushpankunapish chay alli yachachikuk runakuna mana nitikurkansapachu. ³ Chaykamanka Sauloka Jesukristuta kreyik runakunata chiknishpa sukaman sufrichirkansapa. Wasin wasinpi yakyushpa ullkukunata warmikunata apirkansapa pushanankunapa karselpi wichkachik.

Felipi Tata Diospa rimananta yachachikurkan Samaria llaktapi.

⁴ Chashna Jesukristuta kreyik runakuna Jerusalenmanta nitikushpankuna maypicha chayashpankuna yachachikuksapa Jesukristu salvakuk kananta.

⁵ Felipi nitikushpa Samaria partipi ashwan atun llaktapi chayarkan. Chaypi chayashpa Jesukristu yachakushkanta kallarirkan yachachikuya.

⁶ Chay llaktapi kawsak runakuna sukaman kushikushpankuna aypa milagrukunata ruraptin kawashpankuna Felipita allita uyarirkansapa.

⁷ Felipika aypa supayadu runakunatapish alliyachirkansapa. Chay supaykuna unkuchishkan runakunamanta kaparikushpa llukshirkansapa. Chaymanta aypa mana kuyuy atipak aypa mana puriy atipak runakunata alliyachirkansapa. ⁸ Chashna aypa unkudukunata sanuyachiptinkuna chay llaktapi kawsakkuna sukaman kushikurkansapa.

⁹ Chay llaktapi kawsarkan suk runa Simon. Ñawpa chay Simonka ñakakushpa kawsak. Ñakakushpa aypa runakunata llullachishpa kreyichirkan sumak yachayuk kananta. ¹⁰ Tukuy chay llaktapi kawsakkuna taksha atun paytaka sukaman allita uyarishpa willaksapa: “Tata Dios yanapaptin kay runaka sukaman yachaysapami.” ¹¹ Aypa watakunata chay Simonka ñakakushpa chay runakunata llullachirkansapa. Chayrayku willashkankuna nata sukaman manchashpangkuna kasuksapa.

¹² Chay llaktapi Felipika yachachikurka Tata Dios kamachikuk kananta Jesukristu salvakuk kananta. Chaypina aypa ullkukuna warmikuna yachachikunanta kreyishpangkuna bawtisakurkansapa.

¹³ Chay Simonpish Jesukristuta kreyishpa bawtisakurkan. Chashna bawtisakushpa Felipiwan tantalla purirkan. Sukaman almirarkan Felipi almirana milagrukunata ruraptin.

¹⁴ Chaypina Jerusalenpi chay yachachikuk runakunaka yacharkansapa Samariapi aypa runakuna Tata Diospa rimananta kreyinankunata. Chayta yachashpangkuna Pedruwan Juanta kacharkansapa ashwan allita yachachikunankunapa. ¹⁵ Pedruwan Juanca Samariapi chayashpangkuna Tata Diosta roygarkansapa chay mushuk kreyikukkunapish Espiritunta chaskinankunapa. ¹⁶ Chay runakuna Jesuspa shutinllapira bawtisakurkansapa. Tata Diospa Espiritunka manara paykunaman shamurkanrachu.

¹⁷ Chaypina Pedruwan Juan chay runakunapa umankunapi makinkunata churaptinkuna Tata Diospa Espiritunta chaskirkansapa.

¹⁸ Chayta kawashpa chay Simonka Pedruta Juanta kullkita pagaranayarkan. ¹⁹ Willarkansapa:

—Ñukatapish yachachiwaychi atipanaynipa runakunapi makinikunata churaptini Tata Diospa Espiritunta chaskinankunapa.

²⁰ Chashna willaptinna Pedruka willarkan:

—Kanka yuyanki ñukata kullkita pagarawaptiki Tata Dios yanapashunaykita. Chashna yuyaykuptiki Tata Dios sukaman kastigashunka. ²¹ Tata Diospa ñawpakiñipi mana alli yuyayuk runa kanki. Chashna yuyaykuptiki payka mana yanapashunkichu. ²² Chay mana alli yuyanaykimanta wanashpa Tata Diosta roygay perdonashunaykipa. ²³ Ñukaka kawayki uchaykillapira kaptiki. Kunankaman ñakakushkaykita mana wanankichu.

²⁴ Chashna Pedru willaptin Simonka aynirkan:

—Kankunaka Tata Diosta roygapaychi ama rimashkaykitchitashina kastigawanana.

²⁵ Chay llaktapi Juanwan Pedruka Tata Diospa rimananta allita yachachikurkansapa. Chaymanta Samaria partipi aypa llaktillukunapi Jesus yachachishkankunata yachachikuyllapi rirkansapa Jerusalenpi chayanankunakaman.

Felipi Etiopiya llaktamanta kamachikuk runata yachachirkan.

²⁶ Chaymanta Pedruwan Juan kutishkankunawasha Tata Diospa angelnin Felipita willarkan:

—Rillary Jerusalenmanta Gasa rina ñanta. Chay ñanka chunlla chakidu partita rin.

²⁷ Chashna chay angel willaptinna Felipika rirkana. Chay ñanpi suk Etiopiyamanta runawan tinkunakurkan. Chay runaka Etiopiya llaktapi kamachikuk warmipa kullkinta kuydak karkan. Payka Tata Diosta kuyak rishkanwasha Jerusalenmanta llaktanman kutiykarkan. ²⁸ Kaballu

aysaptin karrunpi tiyaridu riykarkan. Chashna karrunpi riykashpa ñawpa yachachikuk Isaiyaspa killkaduna leyiykarkan.

²⁹ Chaypina Tata Diospa Espiritunka Felipitaka willarkan:

—Mash chay karruta ladunchay.

³⁰ Chaypina Felipi ladunchashpa uyarirkan chay ñawpa Isaiyaspa killkaduna leyiykaptin. Chaypina chay runataka tapurkan:

—¿Ariya entiendinkichu kay killkadu leyiykanaykit?

³¹ Chashna tapuptinna chay runaka aynirkana:

—Maná ni pi yachachiwaptinka ¿imashnatí atipasha entienditya?

Chaypina Felipita roygarkan karrunpi yaykushpa ladunpi tiyarinanpa.

³² Chay runa Tata Diospa rimanan leyishkanka kashna rimana:

“Tata Diosmanta shamudu runata suk ovejatashina pusharkansapa wañuchik.

Suk oveja mana nima kaparinchu millwanta tipipuptinkuna.

Chashnashina Tata Diosmanta shamudu runata sufrichiptinkuna mana nima kaparirkanchu.

³³ Paytaka asichishpankuna pinkachirkansapa.

Mana nima uchayuk kaptinpish kastigarkansapa.

Wañuchishkankunaryku payta kreyikkuna mana yupapya layata aypayankasapa.”

³⁴ Chayta leyishkanwasha chay Etiopyamanta runaka Felipita tapurkan:

—May willaway. Chay ñawpa yachachikuk runaka ¿kikinpachu killkarkan chikan runapachu?

³⁵ Chaypina Felipika chay runa leyishkan Isaiyaspa killkadunmanta yachachirkankunayku Jesus salvakuk kananta. ³⁶ Chaypina riykashpankuna suk yakuta kawashpa chay runaka Felipita willarkan:

—Mash kaway chay yakuta. ¿Manachu kay yakupika ñukata bawtisawankiman?

³⁷ Chaypina Felipika aynirkana:

—Tukuy shunku Jesukristuta kreyiptikika bawtisashkayki.

Chashna willaptin chay runaka aynirkana:

—Ñukaka kreyini Jesus Tata Diospa wambran kananta.

³⁸ Chashna willaptin Felipika almitirkan bawtisayta. Chaypina chay runaka karrunta shayachiptin ishkantinkuna chay yakuman rirkansapa. Chaypi Felipika chay runata bawtisarkan.

³⁹ Chaymanta bawtisashkanwasha yakumanta llukshiptinkuna Tata Diospa Espiritunka Felipitaka suk partiman pusharkan. Chay runa manana Felipita kawashpapish kushikupuru llaktanman kutirkan.

⁴⁰ Tata Diospa Espiritun Asoto llaktapi Felipita churarkan. Chay Asotomanta rishpa llaktan llaktanpi Jesus yachachikushkanta rirkanku yachachikupi Sesareapi chayanankaman.

9

Jesukristu Saulota kayarkan payta katinanpa.

(Hch 22.6-16; 26.12-18)

¹ Chaykamanka Saulo sinchita piñakushpa sukmanta jorachirkansapa Jesukristuta kreyik runakunata wañuchinankunapa. Paykunata wañuchinayashpa saserdotekunapa kamachikukninman rirkanku. ² Payta mañarkan kartata kunanpa Damasko llaktaman rishpa tantanakunankuna wasikunamanta Jesukristuta katik ullukunata warmikunata apinanpa. Yuyarkan Jerusalenman pushashpa karselpi wichkachinankunapa.

³ Chay kamachikuk kartata kuptinna Sauloka Damaskoman riykarkan. Chay llaktapi chayanayaykaptin raslla sielumanta paypi sukaman llipyamurkan. ⁴ Chayta kawashpa Sauloka allpakaman urmarkan. Chaypina uyarirkan willaptin:

—Saulo, Saulo ¿imapati chikniwashpa sufrichiwaykanki?

⁵ Chashna willaptin Sauloka tapurkan:

—¿Pití kanki, Señor?

Chaypina chay willak runaka aynirkan:

—Ñukaka Jesusmi kani. Kanka ñukata chikniwashpayki sufrichiwaykanki.

⁶ Atarimushpa Damaskoman rillary. Chaypi suk runa yachachishunki imatami ruranki nishpa.

⁷ Saulopa purikmasinkuna paywan parlaykak runata uyarishpapish mana ni pita kawarkansapachu. Chayrayku sukaman manchakurkansapa.

⁸ Saulo allpamanta atarimushpa manana atiparkannachu kawakuya. Chayrayku chay purikmasinkunaka makinmanta apishpa Damaskoman pusharkansapa. ⁹ Chaypi chayashpa Sauloka kimsa diyata karkan mana kawakushpa mana nimata mikushpa nimata upyashpa.

¹⁰ Chay Damaskopi Ananiyas kawsarkan. Payka Jesukristuta kreyik runa karkan. Jesuška payta rikchadunpi muskuyninpishina rikurishpa kayarkan:

—¡Ananiyas!

Chashna kayaptin aynirkan:

—Señor ¿imatati willawanki?

¹¹ Chashna ayniptin Jesuska willarkan:

—Rillary Kuska shutiyuk kallita. Chaypi suk runa Judas kawsan. Paypa wasinpi tapukuy Tarso llaktamanta Saulota. Chaypimi payka Tata Diosta oraykan. ¹² Muskuyninpishina kanta kawashushka ladunchashpa makikita paypi churaptiki kashkan allita kawakanunarpa.

¹³ Chashna Jesus willaptin Ananiyaska willarkan:

—Señor, aypa runakunami willawashkasapa Jerusalenpi chay runa tukuy kanta kreyishuk runakunata sufrichiykanankunata. ¹⁴ Kunanka kayman shamushka saserdotekekunapa kamachikukninkunapa kartata apamushpa. Payka tukuy kanta kreyishuk runakunata pushanayan karselpi wichkachiwanankunapa.

¹⁵ Chaypina Jesuska willarkan:

—Rillary tukuy willashkaynita rurak. Ñukami chay runataka akllashkani mana judiyu runakunata yachachikunarpa ñuka salvakuk kanaynita. Paymi chay runakunapa kamachikukninkunatapish judiyu runakunatapish yachachinkasapa. ¹⁶ Chaymanta paytaka willasha ñukata kreyiwashpa sukaman sufrinanta.

¹⁷ Chashna Jesus willaptin Ananiyaska uyarishpa Saulota rirkankawak. Chay wasipi chayashpa Saulopa umanpi makinta churashpa willarkan:

—Wawkini Saulo, chay shamushkayki ñanpi rikurishuk Jesusmi kachamuwashka shamunaynipa kawakniki atipanaykipa kashkan allita kawakuya. Tata Diospa Espiritunka kanpi yaykunka yanapashunaykipa.

¹⁸ Chashna oras Saulopa ñawinmanta challwa karapan laya urmaptin kawakurkan. Chaypina atariptin Ananiyas bawtisarkan.

¹⁹ Bawtisakushkanwasha mikushpana sinchiyarkan. Chaypina Jesusta kreyik runakunawan suk diyakunata Damaskopi kiparirkan.

Damaskopi Saulo kallarirkan yachachikuyta.

20 Chaymanta Damaskopi tantanakunankuna wasikunapi Sauloka kallarirkan yachachikuya Jesukristu Tata Diospa wambran kananta.

21 Chashna yachachikuptin tukuy runakuna sukaman almirashpankuna willanakurkansapa:

—¿Manachu kay runaka Jesusta kreyik runakunata Jerusalenpi sukaman sufrichishka? ¿Manachu payka kaymanpish shamushka Jesusta kreyikkunata apinayashpa pushanankunapa saserdotekunapi chataku?

22 Chashna rimaptinkunapish Sauloka mana manchakushpa ashwan allita yachachikurkan. Damaskopi kawsak judiyu runakunata allita entiendichirkansapa Jesus Tata Diomsanta shamudu salvakuk runa kananta. Chashna allita yachachikuptin paykuna sukaman turbakurkansapa.

Damaskomanta Saulo nitikurkan.

23 Chashna aypa diyakunata Saulo yachachikuptinna judiyukuna yuyaykurkansapa wañuchinankunapa. **24** Chaypina Sauloka yacharkan tukuy diya tukuy tuta chay llaktamanta pirkapa lluksinan punkunkunapi shuyaykanankunata wañuchinankunapa. **25** Chayrayku suk tuta Jesusta kreyikmasinkuna suk atun sestupi churashpa chay llaktapa pirkamanta urayachirkansapa. Chashnamanta Sauloka chay chiknik runakunamanta kishpirkan.

Jerusalenpi Saulo yachachikurkan.

26 Chaymanta Sauloka Damaskomanta nitikushpa rirkana Jerusalenpi yachachikuk. Chaypina Jesusta kreyikmasinkunawan tantanakunayarkan. Paykuna Saulota mancharkansapa mana kreyishpankuna Jesusta kreyik kananta. **27** Chashna manchaptinkuna Bernabe paytaka pusharkan chay alli yachachikuk runakunapi riksichik. Willarkansapa:

—Kay runapish Jesukristuta kreyikmasinchikunami. Señorninchi Jesukristumi ñanpi paypi rikurishpa parlachirkan. Chaypina Damaskopi payka mana manchakushpa yachachikushka Jesus salvakuk kananta.

28 Chashna Bernabe willaptinkuna almitirkansapa paykunawan tantalla yachachikupi purinankunapa. Chaypina Sauloka Jerusalenpi sukaman allita mana manchakushpa yachachikurkan Jesus salvakuk kananta.

29 Chashna yachachikupi purishpa griego rimanayuk judiyukunawan parlay ayinakuyupi yachachiksapa. Paykunaka mana kreyishpankuna wañuchinayarkansapa. **30** Chaya yachashpa Jesusta kreyikmasinkuna Sesareaman pusharkansapa. Chaymanta Sesareamanta Tarso llaktanman kacharkansapa.

31 Chay tiempu Judea partipi, Galilea partipi, Samaria partipi manana ni pi Jesukristuta kreyikkunata sufrichirkansapanachu. Chayrayku sukaman kushikushpalla Jesukristupa yachachikunankunata ashwan allita yachakurkansapa. Tata Diosta kuyashpa kawsarkansapa. Chaymanta Tata Diospa Espiritun yanapaptinkuna ashwan aypa runakuna Jesukristuta kreyirkansapa.

Pedru Eneasta sanuyachirkan.

32 Chaymanta Pedruka llaktan llaktan rirkana Jesukristuta kreyikmasinkunata kawak. Chashna rishpa Lida llaktapi chayarkan. **33** Chaypi tarirkana suk runa Eneasta. Payka pusak watatana mana kuyuya atipashpa kamanpi siridu kawsarkan. **34** Pedruka payta willarkan:

—Eneas, Jesukristumi alliyachishunki. Atarimushpa kamaykita allichay.

Chashna Pedru willashkan oralla Eneaska atarimurkan. **35** Tukuy Lida llaktapi Saron llaktapi kawsak runakuna kawarkansapa Eneas atarimushkanta. Chayrayku Jesukristuta kreyirkansapa.

Pedru Dorkasta kawsachimurkan.

³⁶ Chay tiempu Jope llaktapi suk warmi Tabita kawsarkan. Chay Tabitapa shutin griego rimaypi Dorkas. Paypish Jesukristuta kreyik karkan. Chay warmika allita rurashpa mana nimayuk runakunata yanapashpa kawsak.

³⁷ Chay warmika unkushpa wañurkan. Chaypina kuerpunta armachishpankuna wasi altuyin kuartupi churarkansapa. ³⁸ Chay Jope llaktaka Lida llaktamanta mana karupichu karkan. Pedru chay Lida llaktapi kawsaykarkan. Chaypina Jesukristuta kreyik runakuna yachashpankuna Pedru chaypi kananta ishkay runakunata kacharkansapa willak:

—Utkashi Jope llaktaman rinki.

³⁹ Chashna willaptinkuna Pedruka paykunawan rirkan. Chaymanta Jopepi chayashpankuna maypicha Dorkaspa kuerpun churadu kuartuman pusharkansapa. Chaypina aypa viyudakuna wakashpankuna Pedruka ladunchashpa Dorkas sirashkan llachapakunata kamisakunata kawachirkansapa.

⁴⁰ Chaypina Pedruka tukuy chay wakakuykakkunata llukshichishpa kunkurikurkan Tata Diosta mañananpa. Chaymanta wañuduta chapashpa willarkan:

—¡Tabita, atarimuy!

Chashna willaptin Dorkaska ñawinkunata kicharishpa Pedrutaka kawarkan. Payta kawashpa tiyarirkan. ⁴¹ Chashna tiyariptin Pedruka makinmanta apishpa atarichirkan. Chaymanta Jesukristuta kreyikkunata tukuy viyudakunata kayashpankuna Dorkasta kawsadutana kawachirkansapa.

⁴² Tukuy chay Jope llaktapi kawsakkuna yacharkansapa Dorkas kawsamushkanta. Chayrayku aypa runakuna Jesukristuta kreyirkansapa.

⁴³ Chaymanta aypa diyakunata chay llaktapi karapakunata allichak runa Simonpa wasinpi Pedruka kiparirkan.

10

Pedru rirkan Korneliota yachachik.

¹ Sesarea llaktapi kawsarkan suk runa Kornelio. Payka Italia llaktamanta aypa soldadukunapa kapitannin karkan. ² Chay Kornelioka tukuy familyanwan Tata Diosta allita kuyashpa kawsaksapa. Payka tukuy diya Tata Diosta kuyashpa orarkan. Aypa kullkiwan judiyu runakunata yanapaksapa.

³ Suk diya chawpi diya washan muskuyninpishina Tata Diospa angelinta kawarkan payman shamuptin. Chay angelka willarkan:

—¡Kornelio!

⁴ Chashna willaptin Kornelio angelta chapashpa sukaman manchakushpa tapurkan:

—Señor ¿imatati willawanayanki?

Chashna tapuptin angelka aynirkhan:

—Tata Diosmi orashkaykikunata uyarishka. Chaymanta mana nimayukkunata yanapaptiki sukaman kushikun. ⁵ Chayrayku willashunki Jope llaktaman suk runata kachay suk runa Simonta pushamunanpa. Paypa suk shutinka Pedru. ⁶ Payka tokayun Simonpa wasinpimi. Chay tokayunka trabajan karapakunata allichashpa. Wasinka manllayba kochapa mañanpimi. Pedru shamushpana willashunki imatami ruranki nishpa.

⁷ Chay angel rishkanwasha Kornelioka suk sirviknin soldaduta ishkay wiwachunkunata kayarkansapa. Chay soldaduka Tata Diosta kasushpa kawsak. ⁸ Paykunata chay kawashkanta parlachishpa Jopeman kacharkan.

⁹ Kayantin Jope llaktaman chay runakunaka rirkansapa. Chayanayaykaptinkuna chawpi diyata wasi sawanman Tata Dioswan parlak Pedruka rirkana. ¹⁰ Chawpi diyana kaptin sukaman yarkashpa mikuñayarkan. Chaypina mikunanta yanunakunakaman muskuynipishina kawarkan sieluta kicharikuptin. ¹¹ Kawarkan sielumanta allpaman suk atun katanatashina chuskuntin puntankunamanta watadu urayamuptin. ¹² Chay katana ukunpi rikchak laya animalkuna tiyarkan. Sukkuna chusku chakiyukkuna karkansapa. Sukkuna aysanakushpa purikkuna karkansapa. Sukkuna pawak animalkuna karkansapa. ¹³ Pedru chaykunata kawaykashpa suk vosta uyarirkan willaptin:

—¡Pedru, atarimuy! Chay animalkunata wañuchishpa mikuy.

¹⁴ Chaypina Pedruka willarkan:

—A, Señor, manami chaykunataka mikushachu. Manami niman suk kuti chay laya millaypa animalkunata mikushkanichu.

¹⁵ Chashna Pedru willaptin kashkan sielumanta willamurkan:

—Tata Dios rimaptin chay animalkuna allimi mikunaykipa ama rimaychu mana alli mikuna kananta.

¹⁶ Kimsa kuti Pedruka chayta kawarkan uyarirkan. Chaymanta chay kawashkan katanaka kashkan sielman kutirkan. ¹⁷ Chaymanta Pedruka sukaman yuyaykushpa yachanayarkan imatami Tata Dios entiendichinayan nishpa. Chashna yuyaykuykaptinllara Kornelio kachashkan runakunaka chay Simonpa wasin punkipi chayamurkansapa. Paykunaka tapukuykarkansapa maypimi Simonpa wasinka nishpa. ¹⁸ Chay wasi punkunpi sincita rimakushpa tapukurkansapa:

—¿Kay wasipichu Simon Pedruka?

¹⁹ Chaypina Pedru chay kawashkanta yuyaykuykaptinllara Tata Diospa Espiritunka willarkan:

—Mash uyariway. Kimsa runakunami sukaman maskashuykansapa.

²⁰ Atarishpa urayay. Mana manchakushpayki paykunawan tantalla llaktankunaman rillary. Ñukami paykunataka kachamushkani kanta pushashu-nankunapa.

²¹ Chayta uyarishpa Pedruka wasi sawanmanta urayashpa Kornelio kachashkan runakunataka willarkansapa:

—Ñukami kani maskaykanaykichi runaka. ¿Imapatí munawankichi?

²² Chaypina paykunaka willarkansapa:

—Shamushkanisapa kapitan Kornelio kachamuwaptinkuna. Payka Tata Diosta allita kuyashpa allita rurashpa kawsan. Chayrayku tukuy judiyukuna paytaka munansapa. Tata Diospa angelin paytaka willashka kayachishunarpa wasinman rishpa yachachikunaykipa.

²³ Chashna willaptinkuna Pedruka chay wasipi yaykuchirkansapa. Chay tuta paywan kiparirkansapa. Chaymanta kayantin Pedru Jopepi kawsak Jesukristuta kreyikmasinkunawan chay runakunawan rirkansapa. ²⁴ Jopemanta llukshishpankuna kayantinra Sesarea llaktapi chayarkansapa. Chaypi Kornelioka ayllunkunata amigunkunata tantanachishpa Pedruta shuyaykarkan.

²⁵ Chay wasipi Pedru chayanayaykaptinna Kornelioka llukshirkan chaskik. Paypa ñawpaknippi kunkurikurkan kuyanarpa. ²⁶ Chaypina Pedruka willarkan:

—¡Shayariy! ¡Ama chashna kuyawaychu! Ñukapish kanshina runallami kani.

²⁷ Chaypina Pedruka paywan parlaypi wasinpi yaykushpa aypa tanta-nakudu runakunata tarirkan. ²⁸ Paykunataka willarkansapa:

—Kankunaka yachankichi ñukaykuna judiyu runakuna kankuna mana judiyu runakunawan tantanakushpaynikuna uchallikunaynikunata. Chashna kaptinpish Tata Diosmi yachachiwashka ama ni maykan runakunata washanchashpa rimanaynipa mana alli kanankunata. ²⁹ Chayrayku kayachiwaptikichi utkakushpa shamushkani. Kunanka yachanayani imapami kayachiwashkankichi nishpa.

³⁰ Chashna tapuptin Kornelioka aynirkan:

—Ñami chusku diyana kashna ora ñukaka kay wasinipi mana nimata mikushpayni Tata Diosta oraykarkani. Chashna oraykashpayni chawpi diya washan suk llipyak llachapayuk angelta kawashkani. ³¹ Payka willawashka: “Kornelio, Tata Dioska tukuy roygashkaykitami uyarishka. Chaymanta chay mana nimayukkunata yanapaptiki kawashushka. ³² Chayrayku Jope llakaman suk runata kachay Simonta pushamunanca. Paypa suk shutinka Pedrumi. Chay manllayba kocha mañanpi tokayun Simonpa wasinipi kawsan. Chay tokayunka trabajan karapakunata allichashpa.”

³³ Chay angel chayta willawaptinna utkakushpa runakunata kacharkani maskashunankunapa. Allita rurashkanki shamushpayki. Kunanka tantanakudu kanisapa Tata Diospa ñawpakinipi. Tukuy Tata Dios willashushkanta munanisapa uyariyta.

Pedru chay tantanakudu runakunata yachachirkansapa.

³⁴ Chashna willaptin Pedruka paykunataka willarkansapa:

—Kunanka sukaman allitana yachani Tata Dios deverasta mana ñukaykuna judiyukunallatachu kuyawanankunata. Tukuy runakunata idenllata kuyawanchisapa. ³⁵ Judiyukunata mana judiyukunatapish chaskiwanchisapa payta kuyaptinchikuna allita rurashpa kawsaptinchikuna.

³⁶ Tata Dios ñukaykuna judiyu runakunata willawarkansapa Jesukristuta kreyik runakunata perdonanankunata paywan tantalla kushikushpa kawsanankunapa. Jesukristuka tukuy runakunapa kamachikunini.

³⁷ Kankunaka yachankichi Juan aya runakunata yachachishkanta bawtisashkankunata. Chaymanta Jesus Galilea partimanta tukuy judiyukunapa llaktankunapi yachachikurkan. ³⁸ Kankunaka yachankichi Tata Dios Espiritunta Nasaretmanta Jesusta kushkanta. Chashna Espiritunta kuptin Jesuska tukuy laya yachak tukuy laya atipak karkan. Tata Dios paywan kaptin rikchak laya allikunata rurashpa purirkan. Supay unkuchishkan runakunatapish alliyachirkansapa.

³⁹ Kankunaka willaykaykichi Jerusalenpi Judea partipi Jesus rurashkanta kawashkaynikunata. Chay ali ruranakunata ruraptinpish payta chiknik runakuna suk kruspi chakataschpa wañuchirkansapa. ⁴⁰ Chashna wañuchiptinkunapish Tata Dioska kimsa diyamanta kawsachimurkan. Chaymanta ñukaykunapi payta rikurichirkan kawanaynikunapa. ⁴¹ Manami tukuy runakunachu paytaka kawarkansapa. Kawsamushkanwasha ñukaykunalla paywan tantalla mikurkanisapa upyarkanisapa. Tata Dioska ñawpamantapacha akllawarkansapa kawsamushkanta tukuy pita yachachinaynikunapa.

⁴² Chashna Jesus kawsamushkanta kawaptinikuna Tata Dioska kachamuwashkasapa tukuy runakunata yachachinaynikunapa: “Tata Dioska Jesusta churashka tukuy wañudu runakunapa tukuy kawsak runakunapa jueasninkuna kananpa.” ⁴³ Tukuy ñawpa yachachikuk runakunapish yachachikurkansapa Jesus shamunanta. Rimarkansapa

tukuy runakuna Jesusta kreyiptinkuna Tata Dios uchankunamanta perdonanankunata.

Tata Dios Espiritunta mana judiyu runakunata kurkansapa.

⁴⁴ Chashna Pedru yachachikuykaptinra tukuy chay uyarik runakunaman Tata Diospa Espiritunka shamurkan. ⁴⁵⁻⁴⁶ Chaypina chay runakunaka mana yachashkankuna laya rimanakunata rimashpankuna Tata Diosta al-abarkansapa. Chayta uyarishpankuna Pedruwan shamuk judiyu runakuna sukaman almirarkansapa Tata Dios mana judiyukunatapish Espiritunta kushkanrayku.

⁴⁷ Chaypina Pedruka chay purikmasinkunata willarkansapa:

—Ñukanchikuna kay runakunata mana atipanchisapachu michayta bawtisakunakunapa. Paykunapish ñukanchikunashina Tata Diospa Espiritunta chaskishkasapa.

⁴⁸ Chaypina willarkansapa Jesukristupa shutinpi bawtisakunakunapa. Bawtisakushkunkunawasha paykunaka Pedruta sukaman roygarkansapa suk diyakunata paykunawan kiparinanpa.

11

Jerusalenpi Pedru Jesukristuta kreyik runakunata parlachirkansapa.

¹ Chaymanta Judeapi Pedrupa yachachikukmasinkuna tukuy Jesusta kreyik runakunawan yacharkansapa mana judiyukunapish Tata Diospa rimananta kreyishkankunata. ² Chayrayku Jerusalenman Pedru kutiptin judiyumasinkunaka payta piñayarkansapa. ³ Chaypina tapurkansapa:

—¿Imapatí rishkanki chay mana judiyu runakunapa wasinpi yaykuk? ¿Imapatí paykunawan mikushkanki?

⁴ Chashna tapuptinkuna Pedruka kallarinanmantapacha tukuy rurashkanta willarkansapa:

⁵ —Ñukaka Jope llaktapi kashkani. Chaypina suk diya Tata Dioswan parlaykaptini muskuyninipishina suk atun katanatashina kawashkani. Chuskuntin puntankunamanta watadu karkan. Sielumanta ñukakaman urayamurkan. ⁶ Ukonpi allita kawashpayni chusku chakiyuk animalkunata, puma laya animalkunata, aysanakushpa purik animalkunata, pawak animalkunata kawashkani. ⁷ Chaypina uyarishkani suk runatashina willawaptin: “Pedru, ¡ataray! ¡Kay animalkunata wañuchishpa mikuy!”

⁸ Chaypina aynirkani: “Manami mikushachu, Señor. Ñukaka niman suk kuti kay millanapa laya animalkunata mikushkanichu.”

⁹ Chaypina sielumanta kashkan willawarkan: “Tata Dios rimaptin tukuy animalkuna alli mikunaykipa ama rimaychu millanapa laya kanánta.”

¹⁰ Kimsa kuti chay layallata kawashkani. Chaypina chay katanaka tukuy animalnintin sielman alsanakurkan. ¹¹ Chay oralla kimsa runakuna chayarkansapa chay kawashskayni wasipi. Paykunaka Sesarea llaktamanta shamushkasapa maskawak.

¹² Chaypina Tata Diospa Espiritun willawashka paykunawan rinaynipa ama nimata manchashpa. Kay sokta wawkinchikunawan tantalla rishkanisapa. Tukuy tantalla suk runapa wasinpi yaykurkanisapa. ¹³ Chay runaka parlachiwashkasapa imashnami wasinpi Tata Diospa angelinta kawashka nishpa. Chay angelshi ñawpakinipi shayarishpa willarkan: “Suk runata kachay chay Jope llaktaman rinanpa Simonta pushamuk. Chay Simonpa suk shutinka Pedru. ¹⁴ Paymi willashunka imashnami Jesukristu kanta tukuy aylluykiwan tantallata salvashunkichi nishpa.”

¹⁵ Chashna Kornelio willawaptin kallarirkani paykunata yachachiya. Chashna oras Tata Diospa Espiritunka paykunamanpish shamurkan iden ūukanchikunaman ūawpa shamushkanshina. ¹⁶ Chayta kawashpayni yuyashkani Señorninchi Jesus rimashkanta: "Allita willaykichi chay Juanca aypa runakunata yakullawan bawtisarkansapa. Chaymanta Tata Dios Espiritunwan bawtisashunkichi."

¹⁷ ūukanchikuna Señorninchi Jesukristuta kreyiptinchikuna Tata Dioska Espirituntaka kuwashkanchisapa. Chay mana judiyukunatapish Espirituntaka kushkasapa. Chashna Tata Dios Espiritunta paykunatapish kuptin ūukaka mana nimachu kani michanaynipa.

¹⁸ Chashna Pedru willaptin chay Jerusalenpi kawsak wawkinkuna upalla-yarkansapa. Chaypina Tata Diosta alabashpankuna willarkansapa:

—Tata Dios mana judiyukunatapish yanapashkasapa uchankunamanta wanashpa payta kreyinankunapa mana tukuuniyukta kawsanankunapa.

Antiokiya llaktapi aypa runakuna Jesukristuta kreyirkansapa.

¹⁹ Chay tiempu Estebanta wañuchishkankunawasha judiyu runakuna Jesukristuta kreyikkunata sukaman sufrichirkansapa. Chayrayku Jesukristuta kreyik runakunaka nitikushpankuna Fenisia llaktaman Chipre ishlaman Antiokiya llaktaman rirkansapa kawsak. Chay llaktakunapi kawsashpankuna judiyumasinkunallata yachachirkansapa Jesukristu salvakuk kananta. Chikankunata mana yachachirkansapachu. ²⁰ Paykuna judiyumasinkunallata yachachikuptinkuna sukkuna Chipre llaktamanta Sirene llaktamanta Antiokiyaman rirkansapa. Chaypi mana judiyu runakunatapish yachachirkansapa Señor Jesukristuta kreyiptinkuna Tata Dios perdonanankunata. ²¹ Señorninchi Jesukristu yachachikuya yanapaptin aypa runakuna mana alli rurashkankunata sakishpa payta kreyirkansapa.

²² Chaypina Jerusalenpi Jesukristuta kreyikkuna chayta yachashpankuna Bernabeta Antiokiyaman kacharkansapa. ²³ Bernabeka chaypi chayashpa kawarkan Tata Dios sukaman paykunata yanapaykanankunata. Chayta kawashpa sukaman kushikurkan. Chaypina willarkansapa tukuy shunku mana shaykushpa Señorninchita katinankunapa.

²⁴ Bernabeka sukaman alli rurak runa karkan. Tata Diospa Espiritun yanapaptin Jesukristuta sukaman allita kreyishpa kawsarkan. Sukaman allita yachachikuptin ashwan aypa runakuna Jesukristuta kreyirkansapa.

²⁵ Chaymanta Tarso llaktaman Bernabeka rirkana Saulota maskak. ²⁶ Payta tarishpa Antiokiyaman pusharkan. Ishkantunka suk watata chaypi Jesukristuta kreyik runakunawan kawsarkansapa. Aypa runakunata allita yachachirkansapa. Chay Antiokiya llaktapi kawsakkuna Jesukristuta kreyikkunata kallarirkansapa shutiyachiya Jesukristuta Katikkuna.

²⁷ Chay tiempu Jerusalenmanta Antiokiyaman Tata Diospa rimananta yachachikuk runakuna rirkansapa. ²⁸ Suk yachachikuk karkan Agabo. Tata Diospa Espiritun yachachiptin payka shayarishpa rimarkan tukuy llaktaku-napi sinchi yarkay tiyananta. Chaymanta rimashkanshina chay ashwan sinchi kamachikuk Klaudiopa tiempunpi sinchi yarkay tiyarkan. ²⁹ Chay yarkay tiyananta yachashpankuna Antiokiyapi Jesukristuta kreyikkuna yu-yarkansapa Judeapi kawsak kreyikukmasinkunata kullkita kachanankunapa. Atipashkankunawan yanaparkansapa. ³⁰ Chay tantachishkankuna kullkita Bernabewan Saulota kurkansapa Judea partipi ansianukunaman apanankunapa.

12

Chiknik runakuna Santiagota wañuchishpankuna Pedruta karselpi churarkansapa.

¹ Chay tiempu chay kamachikuk Herodes Jesukristuta kreyikkunata kallarirkan sufrichiyapata. ² Chay Herodeska Juanpa wawkin Santiagota ishkay filuyuk machetiwan wañuchichirkan. ³ Santiago wañushkanta yachashpankuna judiyu runakuna sukaman kushikurkansapa. Chayta kawashpa Herodeska soldadukunata kacharkansapa Pedrutapish apinankunapa. Paskua fiesta ukun Pedrutaka apichichirkan. Chay fiestapi judiyu runakuna mana levadurayuk panta mikuksapa. ⁴ Chaypina karselpi Herodeska wichkachichishpa chunka sokta soldadukunata willarkansapa chuskumanta chuskumanta diyapi tutapi kuydanakunapa. Herodeska yuyarkan chay fiesta washan tukuy runakunapa ñiawpakninkunapi Pedruta wañuchichiyta. ⁵ Chashna Pedru wichkaduta kuydaykaptinkuna Jesukristuta kreyikkunaka Tata Diosta sukaman roygarkansapa ama wañuchinankunapa.

Karselmana Tata Dios Pedruta llukshichirkan.

⁶ Suk tutallana illarkan Herodes Pedruta chay runakunapa ñiawpakninkunapi wañuchik pushanropa. Chay tuta Pedruka karselpi puñuykarkan ishkay soldadukunapa chawpinpi. Chay soldadukunapi ishkay kadenawan makinmanta watadu karkan. Chaymanta ishkay soldadukunaka karselpa punkunta kuydaykarkansapa.

⁷ Chashna Pedru puñuykaptin Tata Diospa angelnina chay karsel ukupi rikurirkan. Chaypina diyashina tukurkan. Chay angelka Pedrutaka kostil-lanpi takashpa rikchachishpa willarkan:

—¡Utkana atarimuy!

Chashna orana kadenakuna Pedrupa makinkunamanta paskakurkan.

⁸ Chaypina angelka willarkan:

—Llachapakuyna. Ushutaykitapish churakuy.

Pedru llachapakuptinna angelka willarkan:

—Kapaykita churakushpa katiway.

⁹ Chaypina Pedruka angelpa washanta katishpa mana yacharkanchu deverastachu manachu chay karselmana llukshiykan nishpa. Yuyarkan muskuynipishina kawakuykananta. ¹⁰ Chaypina Pedruka chay angelta katishpa soldadukunapa chawpinta pasarkan. Chaymanta ishkaynin punkuta kuydak soldadukunatapish pasarkansapa. Chaymanta chay karselpa fierrumanta ruradu punkunpi chayarkansapa. Chay punkuka kikinllamanta kicharinakurkan. Chashna kicharinakuptin llukshirkansapa. Chaypina suk kallita purishkankunawasha angelka Pedrutaka sapallanta sakirkan. ¹¹ Chaypira Pedruka allita entiendishpa mana puñushpa muskukuykananta rimarkan:

—Kunanka allita yachani Tata Dios angelninta kachamushka kishpichichiwananpa. Payka shamushka Herodesmanta tukuy chay chikniwak judiyu runakunamanta kishpichichiwak.

¹² Chayta entiendishpa Juan Markospa maman Mariyapa wasinman rirkan. Chay wasipi aya runakuna tantfanakushkasapa Tata Diosta sukaman royanankunapa ama Pedruta wañuchinankunapa. ¹³ Pedru chay wasipi chayashpa punkumanta kayakurkan. Suk shipash Roda rirkan kawak pimi punkumanta kayakuykan nishpa. ¹⁴ Chaypina rimananllamanta Pedruta riksishpa sukaman kushikuyinwan mana nima punkuta kicharishpa ukuman kallparkan. Rirkan avisuk Pedru punkupi kananta. ¹⁵ Chay wasi ukupi kak runakuna mana kreyishpankuna willarkansapa:

—¡Dementami kanki!

Chaypina payka willarkansapa deveras chaypi Pedru kananta. Chay runakunaka mana nima kreyishpa willarkansapa:

—Manami paychu. Paypa almanmi.

16 Chaykamanka Pedruka punkumanta sukaman kayakuykarkan. Sukaman kayakuptin paykunaka punkuta kicharishpa Pedruta kawashpa sukaman almirarkansapa. **17** Pedru makinwan señasta rurashpa upallayachirkansapa. Chaypina parlachirkansapa imashnami Tata Dios karsel-manta surkushka nishpa. Chaymanta willarkansapa:

—Tukuy willashkaynita Santiagota Jesukristuta kreyikmasinchikunat-apish parlachiychi.

Chashna willashpankuna chikan wasiman rirkan.

18 Chaymanta pakariptin chay Pedruta kuydak soldadukuna manchakuywan turbachinakurkansapa. Mana yacharkansapachu imashnami Pedru llukshishka nishpa.

19 Chaypina Herodeska willarkansapa maskanankunapa. Manana tariyta atipaptinkuna Herodeska wañuchichirkansapa chay kuydakuk soldadukunata Pedruta mana allita kuydashkankunaryku. Chayta rurashkanwasha Judea partimanta llukshishpa rirkan Sesarea llaktapi kawsak.

Herodes wañurkan.

20 Chay tiempu chay kamachikuk Herodes Tiro llaktapi Sidon llaktapi kawsak runakunawan piñakurkan. Chay ishkay llaktakunapi kawsak runakuna Herodespa llaktanpi mikunankunata rantiksapa. Paykunawan piñakushpa Herodeska manana munarkannachu ni pi paykunata mikunankunata rantichinankunapa. Chayrayku paykunaka munarkansapa Herodesta perdonta mañaya. Chay ishkay llaktakunapi kawsakkuna Herodespa yanapaknin Blastota roygarkansapa Herodeswan perdonachinankunapa. Chashna roygaptinkuna Blastoka almitirkansapa Herodeswan perdonachiyisapata. **21** Chaypina Herodeska almitirkan churashkan diyapi chay runakuna rinankunapa paywan parlak. Chay churashkan diyaka Herodeska sukaman allimata mudakushpa chay allima tiyarinanpi tiyarijan. Chaypina chay runakunata sukaman allimata rimakushpa uyarichirkansapa. **22** Chay runakunaka Herodesta kushichinayashpankuna sukaman sinchita rimashpa willarkansapa:

—Kay parlachiwakninchikuna runaka manami runamasinchikunachu. Payka suk diosmi.

23 Chashna chay runakuna willaptinkuna Herodeska sukaman kushikurkan. Mana nima Tata Diosta yuyashpa munarkan chay runakuna iden diostashina payta kuyanankunapa. Chayrayku chay oraslla Tata Diospa angelin Herodestaka unkuchirkan. Kurukuna mikuptin payka wañurkan.

24 Chay tiempu Jesukristuta kreyik runakuna Tata Diospa rimananta tukuy maypi yachachikurkansapa. Chayrayku ashwan aypa runakuna Jesusta kreyirkansapa.

25 Chaymanta Bernabeka Saulowan Jerusalenpi ansianukunata chay apanankuna kullkita kushkankunawasha Juan Markosta pushashpa Antiokiyaman kutirkansapa.

¹ Antiokiyapi Jesukristuta kreyikkunapi tiyarkan Tata Diospa rimananta yachachikukkuna. Paykunaka karkansapa Bernabewan Simon. Chay Simonpa suk shutin karkan Yana. Chaymanta suk yachachikuk karkan Sirene llaktamanta Lusio. Suk karkan Manaen. Payka Galileapa kamachikuknín Herodeswan tantalla wiwadu karkan. Chaymanta suk yachachikukka karkan Saulo.

² Suk diyana paykunaka mana nimata mikushpa Señorninchí Jesukristuta kuyaykarkansapa. Chaypina Tata Diospa Espiritu willarkansapa:

—Ñukaka Bernabeta Saulota akllashkani chikan llaktakunaman rinankuna napa yachachikuk. Chayrayku paykunata kachaychi munanaynita ruranankunapa.

³ Chaypina paykunaka mana mikushpa sukaman orashpangkuna Saulopa Bernabepa umankunapi makinkunata churarkansapa Tata Dios yana panankunapa. Chaymanta kacharkansapa.

Bernabewan Saulo Chipre ishlapi yachachikurkansapa.

⁴ Chaymanta Tata Diospa Espiritu kachaptin Bernabewan Sauloka rirkansapa Seleusia llaktaman. Chay llaktamanta suk barkupi uraykansapa Chipre ishlaman. ⁵ Juan Markosta pusharkansapa puriyninkunapi yanapanankunapa. Chaymanta Chiprepi chayashpangkuna chay kocha mañanpi Salamina llaktapi yaykurkansapa. Chaypina judiyukunapa tantanakunankuna wasipi kallarirkansapa Tata Diospa rimananta yachachikuya.

⁶ Chaymanta llaktan llaktan yachachikuypi tukuy chay ishlata purishpangkuna chayarkansapa Pafos llaktapi. Chaypi suk judiyu ñakakuk runa Bar Jesta tarirkansapa. Griego rimaypi chay shutika Elimas. Payka sukaman llullakushpa rimak Tata Dios willashkanta yachachikuykanan. ⁷ Chay llulla likidu runaka chay ishlapi kamachikuk runa Sergio Paulopa yanapaknin karkan. Sergio Pauloka sukaman yachaysapa runa karkan. Chayrayku Tata Diospa rimananta uyarinayashpa Bernabeta Saulota kayachirkansapa. Saulopa chikan shutin Pablo karkan.

⁸ Chashna chay kamachikuk runa Bernabeta Saulota kayachiptinkuna chay ñakakuk Elimaska micharkansapa ama yachachikunankunapa. Payka manami munarkanchu chay kamachikuk runaka Jesukristuta kreyinampa.

⁹ Chaypina Tata Diospa Espiritu yanapaptin Pabluka chay ñakakuk runataka allita chapashpa willarkan:

¹⁰ —Sukaman llulla likidu uchallikuk runami kanki. Supaypa munananllata rurashpa kawsanki. Mana munankichu ni pi allita rurashpa kawsananta. ¿Imapatí Tata Diosta katikkunata pantachichinki? ¹¹ Kunanka Tata Dios kastigashunki. Kunanmantapacha suk tiempukaman mana kawakuy atipak kiparinki. Nima intita atipankichu kawayta.

Chashna Pablo willaptin chay ratu Elimaska mana kawakuy atipak kiparirkan. Chaypina maskarkan suk runata makimanta apishpa purichinampa.

¹² Chay kamachikuk runaka chayta kawashpa Jesukristuta kreyirkan. Sukaman almirarkan Pablo Jesukristu yachachikushkanta yachachikuptin.

Bernabewan Pablo Pisidia partiman rirkansapa.

¹³ Chaymanta Pafos llaktamanta llukshishpa Pabluka chay purikmasinkunawan barkupi rirkansapa Perge llaktaman. Chay Perge Panfilia partipi karkan. Chaypina Juan Markoska mana paykunawan rinayashpa Jerusalenman kutirkan.

¹⁴ Bernabewan Pabluka Pergemanta llukshishpa Pisidia partipi tiyak Antiokiya llaktaman rirkansapa. Chaypina samana diya judiyukunapa tantanakunankuna wasipi yaykushpa tiyarirkansapa.

¹⁵ Chay wasipi kamachikuk runakuna Moisespa killkadunta ñawpa yachachikukkunapa killkadunta leyirkansapa. Chayta leyishkankunawasha Bernabewan Pabluta willarkansapa:

—Wawkinikuna, kay runakunata yachachinayashpaykichika imatapish kaptin willaychi.

¹⁶ Chashna willaptinkuna Pabluka atarishpa makinwan señata rurashpa upallayanankunapa willarkansapa:

—Judiyumasinikuna, chaymanta tukuy mana judiyu Tata Diosta kuyakkuna, allita uyariwaychi yachachiptinkuna. ¹⁷ Tata Diosninchika ñawpa awilunchikunata akllarkansapa. Egipio llaktapi mana llaktayukshina kawsaykaptinkunallara Tata Dios yanaparkansapa aypata miranankunapa. Chaymanta Tata Dios sukaman sinchita yanaparkansapa Egipтомanta llukshinankunapa.

¹⁸ Egipтомanta llukshishpankuna chusku chunka watata chunlla chakidu pampapi purishpa kawsarkansapa. Mana allita rurashpa kawsaptinkunapish Tata Dioska kuydarkansapalla. ¹⁹ Chaymanta Kanaanpi chayaptinkuna Tata Dioska yanaparkansapa kanchis llaktakunata kulluchinankunapa. Chaymanta chay terrenunkunata chay ñawpa awilunchikunata kurkansapa. ²⁰ Chaymanta chusku pachak pichka chunka watakunata Samuela tiempunkaman Tata Diospa churashkan jueuskunapa mandunpi kawsarkansapa.

²¹ Chaymanta ñawpa awilunchikuna Tata Diosta roygarkansapa suk runata churanganpa sinchi kamachikukninkuna kananpa. Tata Dioska almitishpa Saulta churarkan chusku chunka watata sinchi kamachikukninkuna kananpa. Saulpa tatan karkan Sis Benjaminpa aylunmanta.

²² Chaymanta Tata Dioska Saulta wishchurkan amana kamachikuk kananpa. Davidtana churarkan kamachikuk kananpa. Tata Dioska Davidpa rimarkan: “Isayipa wambran David kuyanakukmasini. Paymi tukuy munaynita ruranka.”

²³ Chaymanta Jesuska chay kikin Davidpa mirakninmanta karkan. Unay tiempumantapacha Tata Dioska rimarkan suk salvakuk runata kachamunanta. Pay rimashkanshina Jesusta kachamurkan judiyu runakunata salawananchikunapa.

²⁴ Manarapish Jesus yachachikuyta kallariptin Juan judiyumasinkunata yachachirkansapa uchankunamanta wanashpa bawtisakunankunapa.

²⁵ Wañunan diyakaman Juanka tukuy runakunata willarkansapa: “Ñukaka manami chay shuyanaykichi runachu kani. Payka ñukamanta washatami shamunka. Ñukamanta ashwan tukuy laya yachak kaptin ñukaka manami animukunichu ushutan waskanta paskaya.”

²⁶ Pablo yachachikuyllapi katirkan:

—Wawkinikuna, Abrahammanta mirakmasinikuna, chikan llaktamanta Tata Diosta kuyak runakuna, allita uyariwaychi. Tukuy kankunata yachachiykichi Tata Diospa wambran Jesukristu salvakuk kananta. ²⁷ Jerusalenpi kawsak runakunawan tukuy paykunapa kamachikukninkuna Jesusta kawashpankunapish mana yacharkansapachu pimi nishpa. Tukuy samana diyakuna tantanakunankuna wasikunapi ñawpa yachachikukkunapa killkadunkunata leyishpankunapish mana entiendirkansapachu. Chayrayku chay killkadunpi rimananshina Jesusta

wañuchichirkansapa. ²⁸ Jesuspa mana nima uchanta tarishpapish Pilatota willarkansapa wañuchichinanza.

²⁹ Chaymanta Tata Diospa killkadunpi rimashkantashina rurashkankunawasha suk runakuna Jesuspa kuerpunta krusmanta urayachimushpa pamparkansapa. ³⁰ Chaymanta Tata Dios Jesustaka kawsachimurkan. ³¹ Chaypina aypa diyakunata Jesuska purikmasinkunapi rikurirkan. Jesus manara wañuptin paykunaka Galileamanta Jerusalenman katirkansapa. Kunanka paykunamu Jesus kawsakta kawashkankunata yachachikuykansapa.

³² Ñukaykunapish kay allima rimanata willaykaykisapa. Tata Dios ñawpa awilunchikunata willashkankunata ñami rurashkana. ³³ Tata Dios Jesusta kawsachimushpa chay awilunchikunata willashkanta ñami rurashkana. Kunanka ñukanchikuna chay ñawpa awilunchikunapa mirakninkuna kashpanchikuna chay Tata Dios rurashkantaka kawashkanchisapano. Chay ishkaynin salmopi Tata Dios Jesusta willarka: "Kanka wambraynimi kanki. Kantami akllashkayki kamachikuk kanaykipa."

³⁴ Ñawpa tiempu Tata Dioska rimarkan Jesusta kawsachimunanta ama kuerpun usunarpa. Killkadunpi rimarkan: "Ñuka mana llullachishpa Davidta alli willashkaynita rurasha."

³⁵ Chaymanta chikan salmopipish Davidka killkarkan: "A, Tata Dios, mana munankichu akllashkayki sirvishukpa kuerpun usunarpa."

³⁶ Wawkinikuna, yachankichi Davidka mana kikinpachu chayta rimarkan. Tata Dios willaptin Davidka tukuy chay tiempun kawsak runakunata yanaparkansapa. Chaymanta wañuptin maypicha tatanta awilunkunata pampashkankunapi pamparkansapa. Chashna pampaptinkuna paypa kuerpunka usurkan. ³⁷ Chaymanta Tata Dios Jesusta kawsachimuptin kuerpun mana usushkachu.

³⁸ Wawkinikuna, kunan yachanaykichi tiyan Jesus wañushkanmanta kawsamushkanrayku Tata Dios uchaykichimanta perdonashunkichi. Chayllatami ñukaykunaka yachachiykaykichi. ³⁹ Moisespa kamachikushkankunata kasushpaykicipish mana atipankichichu uchaykichimanta salvanakuyta. Jesussllata kreyiptikichi Tata Dioska perdonashunkichi.

⁴⁰ Chayrayku yachachishkaynunata allita kasuychi ama Tata Dios kastigashunaykicipha chay ñawpa yachachikuk killkadunpi rimashkankunashina. Kashna Tata Dios rimashkanta killkarkansapa:

⁴¹ "Allita uyariwaychi, kankuna mana munawashpa asichiwak runakuna. Manchakushpa nitikuchi.

Kawsaykanaykichi tiempu sukaman almirana layata kastigashkaykichi. Suk runa chay kastiganaynita willashuptikicipish mana kreyinkichichu."

⁴² Chashna Pablo yachachikushkanwasha chay judiyukunapa tantanakunankuna wasimanta chay purikmasinkunawan llukshirkansapa. Chashna llukshiptinkuna chay mana judiyu runakunaka roygarkansapa suk semanakaman samana diyapi paykunallata yachachinankunapa. ⁴³ Chay roygak mana judiyukuna Moisespa kamachikunankunata kasushpa iden judiyushina kawsaksapa. Chaypina chay tantanakunankuna wasimanta llukshishpanguna paykunaka aypa judiyukunawan Pabluta Bernabeta katirkansapa. Chaypina Pablo Bernabewan paykunataka yachachirkansapa Tata Diosta kuyashpa mana shaykushpa katinankunapa.

⁴⁴ Suk semana washan samana diya yaka tukuy chay llaktapi kawsakkuna tantanakurkansapa Tata Diospa rimananta uyarinankunapa. ⁴⁵ Chay aypa mana judiyu runakuna tantanakuptinkuna chay judiyukunaka sukaman

piñakurkansapa. Pabluta washanchashpa rimarkansapa yachachikunan mana alli kananta. ⁴⁶ Chaypina Pabluka Bernabewan mana nima manchakushpankuna aynirkansapa:

—Tata Dios kachamuwashkasapa mana chikan runakunata yachachishpaynikunara judiyu runakunallata paypa rimananta yachachinaynipasapa. Chaymanta kankuna yachachinaynikunata mana munashpaykichi kikichilla mana munankichichu Tata Dioswan mana tukuyuniyukta kawsaya. Chayrayku kunanka rinisapa mana judiyu runakunata yachachik. ⁴⁷ Tata Dioska chaytapish willawashkasapa: “Ñukaka kanta lustashina churashkayki tukuy karu llaktakunapi yachachikunaykipa. Chashna yachachikuptiki tukuy kay allpapi kawsakkuna yachankasapa ñuka salvakuk kanaynita.”

⁴⁸ Chayta uyarishpankuna chay mana judiyu runakunaka sukanman kushikushpankuna rimarkansapa:

—Pablwan Bernabe yachachiyakananchikunaka sukanman allimami.

Chaypina Jesukristuta chaskinayak runakuna payta kreyirkansapa mana tukuyuniyukta paywan kawsanankunapa.

⁴⁹ Chashna modomanta tukuy chay partipi Pablwan Bernabeka yachachikurkansapa Jesukristu salvakuk kananta. ⁵⁰ Chayrayku suk judiyukuna paykunata sukanman piñayarkansapa. Tata Diosta kuyak warmikunata chay llaktapa kamachikukninkunata willarkansapa Pabluta Bernabeta sufrichishpa chay llaktamanta karkunankunapa.

⁵¹ Chashna karkuptinkuna paykunaka chakinkunamanta susykunata urmachishpankuna chay llaktamanta llukshirkansapa. Chayta rurashpa chay runakunata yachachiykarkansapa uchasapakuna kanankunata. Chay llaktamanta llukshispankuna rirkansapa Ikonio llaktaman.

⁵² Chaykamanka chay kreyikuk runakunaka kushikuypuru karkansapa Tata Diospa Espiritun yanapaptinkuna.

14

Pablwan Bernabe Ikonio llaktapi unayta kiparirkansapa.

¹ Chaymanta Pablwan Bernabeka Ikonio llaktapi chayashpankuna judiyukunapa tantanakunankuna wasipi yaykurkansapa. Chaypi Tata Diospa rimananta allimata yachachikuptinkuna aya judiyukuna aya mana judiyukunapish kreyikurkansapa. ² Chaymanta suk judiyukuna mana kreyikushpankuna chay mana judiyukunata llullachishpa willarkansapa Pablwan Bernabe mana allita yachachikunankunata.

³ Chayrayku Bernabewan Pabluka unay tiempata chay llaktapi kiparirkansapa ama ashwanta llullachinankunapa. Jesukristupi sinchikushpankuna yachachikurkansapa Tata Dios kuyanankunata. Chashna mana manchakushpa yachachikuptinkuna Tata Dioska yanaparkansapa almirana milagrukunata ruranankunapa.

⁴ Ikonio pi kawsak runakunamanta sukkuna rimarkansapa Bernabewan Pablupa yachachikuna alli kananta. Sukkuna chay jüdiyukunata katirkansapa. ⁵ Chaypina chay mana kreyikuk judiyukunapish chay mana judiyukunawan awtoridarkunaman rirkansapa paktanakunankunapa. Rimarkansapa Bernabewan Pabluta makashpa ruminchanankunapa. ⁶ Chayta yakashpa Bernabewan Pabluka nitikurkansapa Likonia partipi Listra llaktaman Derbe llaktaman. ⁷ Tukuy chay llaktakunapi allita yachachikurkansapa Jesukristu salvakuk kananta.

Listra llaktapi Pabluta ruminchashpa wañuchinayarkansapa.

⁸ Listra llaktapi Bernabewan Pabluk chayashpangkuna suk runata tarirkansapa. Payka nasishkanmantapacha wakllidu chakiyuk kashpa mana puriya atipakchu. ⁹ Chay runa tiyaridu uyarirkan Pabluk yachachikuptin. Chaypina Pabluka chay runata chapashpa yacharkan Jesukristuta tukuy shunku kreyinanta. Chayrayku yacharkan Tata Dios alliyachinanta. ¹⁰ Chashna yachashpa Pabluka chay runataka sinchita willarkan:

—¡Atarishpa kuskata shayari!

Chashna Pabluk willaptin chay runaka tiyari dunmanta brinkashpa shayarirkan. Chaypina kallarirkan kuskata puriya. ¹¹ Chay runata alliyachishkanta kawashpangkuna chay runakuna kikin Likonia rimanankunapi sinchita willarkansapa:

—¡Selumanta dioskuna urayamushkasapa runashina tukushpangkuna!

¹² Chaypina Bernabetaka diosninkuna Seyuspa shutinpi shutiyachirkansapa. Chaymanta Pablutaka diosninkuna Hermespa shutinpi shutiyachirkansapa ashwan alli yachachikuk kashkanrayku.

¹³ Chay llaktapa yaykunanpi chay diosninkuna Seyus kuyanankuna wasi tiyarkan. Chaypina Seyuspa saserdoten torokunata pusharkan. Sartadu sisakunata apamurkan. Chay runakunawan chay torokunata munarkansapa wañuchiyyta Pabluk Bernabeta diostashina kuyanankunapa. ¹⁴ Chashna kuyanayaptinkuna Bernabewan Pabluk sukaman turbakushpangkuna llachapunkuna llikirkansapa ama diostashina kuyanankunapa. Chaypina chay runakunapa chawpinkunapi yaykushpa sinchita willarkansapa:

¹⁵ —Kankuna ¿imapati diostashina kuyawanayankichi? Ñukaykunapish kankunashina runakunallami kanisapa. Shamushkanisapa yachachikniki chay mana kawsak diosnikichita sakishpa kawsak Tata Diosta kreyinaykicipa. Payllami tukuy allpata sieluta manllayba kochata tukuy laya chaykunapi tiyakta rurashka. ¹⁶ Unay tiempata Tata Dioska almitirkansapa tukuy runakuna kikinkunapa munananllata rurashpa kawsanankunapa. ¹⁷ Chashna almitishpapish paylla tamyachishpa tukuy laya tarpudukunata pukuchin kushikushpa mikunaykicipa. Tata Dios rikchak laya allikunata kushushpaykichi entiendichishunkichi pay alli yachak kananta.

¹⁸ Chashna Pabluk willaptinkunapish chay runakunaka munarkansapalla torokunata wañuchishpa paykunata kuyaysapata.

¹⁹ Chashna ora Antiokiyamanta Ikoniomanta Pabluta chiknik judiyukuna chayarkansapa. Paykunaka chay runakunapa yuyayninkunata wakllichirkansapa kuyanayashkunkunamanta chikninankunapa. Chashna chiknishpa Pabluta rumincharkansapa. Chaypina wañudu nishpana chay llakta washanman aysarkansapa.

²⁰ Chaymanta Jesukristuta kreyikmasinkuna Pablupa ladunpi tantanakurkansapa. Chaypina payka atarishpa kashkan chay llaktapi yaykurkan. Kayantinna Bernabewan tantalla Derbe llaktaman rirkansapa:

²¹ Chaymanta Derbepi allita yachachikuptinkuna aypa runakuna Jesukristuta kreyirkansapa. Chay llaktapi yachachikushkanwasha kashkan Listraman Ikoniaman Antiokiyaman kütirkansapa kreyikukmasinkunata chapak. ²² Tukuy paykunata kashkan allita animuchirkansapa. Yachachirkansapa mana shaykushpa Jesukristullata kreyinankunapa. Willarkansapa:

—Rikchak layata sufrishpanchikuna Tata Diospa mandunpi yaykunchisapa.

²³ Chaymanta tukuy chay llaktakunapi Bernabewan Pabluka chay kreyikkunamanta akllarkansapa alli rurak runakunata yachachikuk ansianunkunata kanankunapa. Suk diyakuna mana nimata mikushpa Tata Diosta orashpa chay kreyikuk ansianukunata Jesukristupa makinpi churarkansapa.

Pabluwan Bernabe Siria partipi Antiokiya llaktaman kutirkansapa.

²⁴ Chaymanta Pisidia partita pasashpa Panfilia partipi chayarkansapa. ²⁵ Perge llaktapi Tata Diospa rimananta allita yachachikurkansapa. Chaymanta Atalia llaktaman rirkansapa. ²⁶ Chay llaktakunapi yachachikushkankunawasha suk barkupi Antiokiyaman kutirkansapa. Chay llaktamanta ñawpa tiempu Jesukristuta kreyik runakuna paykunata kacharkansapa Tata Dios yanapaptinkuna allita yachachikunankunapa.

²⁷ Chay llaktapi chayashpankuna Bernabewan Pabluka Jesukristuta kreyikkunata tantanachirkansapa. Chaypina parlachirkansapa Tata Dios tukuy layapi yanapashkankunata. Parlachirkansapa Tata Dios yanapaptinkuna mana judiyukunatapish yachachishkankunata. Willarkansapa paykunapish Jesukristuta kreyishkankunata.

²⁸ Chaymanta unay tiempu Pabluwan Bernabeka chaypi Jesukristuta kreyikmasinkunawan kiparirkansapa.

15

Jerusalen llaktapi aypa yachachikukkuna tantanakurkansapa.

¹ Chay tiempu Judea partimanta suk runakuna Antiokiya llaktaman rishpankuna Jesukristuta kreyikmasinkunata yachachirkansapa:

—Kankuna mana señaladu runakuna kashpaykichi Moisespa yachachikunanta kasushpa señalachinakunaykichi tiyan. Chaypira Tata Dios uchaykichimanta perdonashunkichi.

² Chayta yachachikuptinkuna Pabluwan Bernabeka paykunawan sinchita ayninakurkansapa mana munashpa chay layata yachachikunankunapa. Chashna ayninakuptinkuna Jesukristuta kreyikkunaka Pabluta Bernabeta suk wawkinkunata kacharkansapa Jerusalenman. Paykunaka rirkansapa Jesukristu akllashkan yachachikuk runakunata ansianukunata kawak. Rirkansapa tapuk allichu manachu mana judiyu runakuna señalachinakunankunapa.

³ Chashna chay Jesukristuta kreyik runakuna kachaptinkuna Pabluwan Bernabeka Jerusalenman rirkansapa Fenisia partita Samaria partita pasashpankuna. Chay partikunapi kreyikmasinkunata parlachirkansapa aypa mana judiyu runakuna ñawpa amañanakunata sakishpankuna Jesukristuta kreyinankunata. Chashna parlachiptinkuna chay runakuna sukmahan kushikurkansapa.

⁴ Chaymanta Jerusalenpi chayaptinkuna Jesukristuta kreyikmasinkuna, chay yachachikukkuna, chay ansianukuna kushikushpa chaskirkansapa. Chashna chaskiptinkuna Pabluwan Bernabeka parlachirkansapa Tata Dios sukmahan yanapashkankunata. ⁵ Chaypina Jesukristuta kreyik fariseokuna shayarishpa willarkansapa:

—Tukuy mana judiyu Jesukristuta kreyikmasinchikuna señalachinakunankunata tiyan. Chaymanta Moisespa kamachikunankunata kasunankunata tiyan.

⁶ Chaypina Jesukristu akllashkan yachachikuk runakuna tukuy ansianukunawan tantanakurkansapa chay fariseokuna rimashkanta parlanankunata allichu manachu nishpa.

⁷ Sukaman parlanakushkankunawasha Pedruka shayarishpa willarkansapa:

—Wawkinikuna, kankunaka allita yachankichi ñawpa kankunamanta Tata Dios ñukata akllawashkanta mana judiyu runakunata yachachinaynipasapa. Jesukristu salvakuk kananta yachachikuptini paykunapish kreyikurkansapa. ⁸ Chashna yachachiptini Tata Dios Espiritu ñukanchikunatashina paykunatapish kushkasapa. Chayta rurashpa tukuy yuyayninchikunata yachak Tata Dios kawachiwashkanchisapa chay mana judiyu runakunatapish chaskinankunata. ⁹ Tata Dios ñukanchikunatashinalla paykunatapish munansapa. Paykuna Jesukristuta kreyishkankunarayku Tata Dioska perdonashkasapa. ¹⁰ Chashna Tata Dios paykunata perdonaptinkuna ¿impati willaykankichi Moisespa kamachikunankunata kasunankunapa? Chashna willashpaykichi Tata Diostami piñachiykankichi. Nima ñukanchikuna nima awilunchikuna atipashkanchisapachu chay kamachikunankunata kasuya. ¹¹ Mana kasuya atipaptinchikunapish allita yachanchisapa Señor Jesus kuyawashpanchikuna uchanchikunamanta perdonawananchikunata. Mana judiyu runakunatapish chashnalla perdonansapa.

¹² Chashna Pedru willaptinkuna tukuy chay tantanakudu runakunaka upallalla kiparirkansapa. Chaypina Pabluwan Bernabeka parlachirkansapa Tata Dios yanapaptinkuna mana judiyukunawan kashpankuna aypa almirana milagrukuñata rurashkankunata.

¹³ Chashna Pabluwan Bernabe willaptinkuna Santiago willarkansapa:

—Wawkinikuna, allita uyariwaychi. ¹⁴ Wawkinchi Simonka willawashkanchisapano imashnami Tata Dios kallarirkan mana judiyu runakunata yachachiyta. Tata Dioska paykunamantapish sukkunata akllaykan wambrankuna kanankunapa.

¹⁵ Ñawpa tiempu alli yachachikuk runakuna tukuy chaykunata killkariksapa. Tata Dioska chay killkadunpi rimarkan:

¹⁶ “Davidpa mirakninkuna manana kamachikunsapanachu.

Paypa mandunka iden urmadu wasishinami.

Unay tiempu washan ñuka Tata Dios chay urmadu wasita kashkan atarichisha.

Atarichishpa Davidpa mirakninmanta suk runata churasha kamachikuñapa.

¹⁷ Chashna alli sinchi kamachikuk runata churaptini karu llaktankunapi mana judiyu runakunapish maskawashpa ñukata kreyiwankasapa wambraynikuna kanankunapa.

¹⁸ Ñukaka tukuy ñawpamantapacha rimashkaynita rurasha.”

¹⁹ Chashna Tata Dios rimananpi yachachiwaptinchikuna ñukaka willaykichi: Ama chay mana judiyu runakunata willaypachichu Moisespa kamachikunankunata kasunankunapa. Paykunata willaypachi chay ñawpa amañanankunata sakishpankuna Tata Diosllata kasushpa kawsanankunapa. ²⁰ Chayrayku akuychi mana judiyu runakunata killkaypachi. Willaypachi ruradu dioskunata kuyashpa churashkankuna mikunata ama mikunankunapa. Yachachiypachi ama chikan warmiwan uchallikushpa kawsanankunapa. Yachachiypachi sipikudu animalkunata ama mikunankunapa. Yachachiypachi animalkunapa yawarninta ama mikunankunapa. ²¹ Ñawpamantapacha paykunapa llaktankunapi judiyu runakunapa tantanakunankuna wasinkuna tiyan. Chay wasikunapi tukuy samana diya alli

yachachikuk runakuna Moisespa killkadunkunata leyishpa yachachikunsapa. Chayrayku chay mana judiyu runakunata ama ashwantachu yachachiypachi.

Jerusalenpi yachachikuk runakuna chay mana judiyu runakunata suk kartata killkarkansapa.

²² Chashna Santiago willaptinkuna Jerusalenpi yachachikuk runakunaka ansianukunawan suk kartata killkarkansapa. Chaymanta paykunamanta ishkay wawkinkunata akllarkansapa Pablúwan Bernabewari tantalla Antiokiyaman chay kartata apanankunapa. Akllarkansapa Judasta. Paypa suk shutin karkan Barsabas. Chaymanta akllarkansapa Silasta. Chay runakuna alli yachachikuk karkansapa. ²³ Chay apanankuna karta kashna riman:

“Munanayni wawkinikuna, paninikuna, ñukaykuna Jesukristu akllashkan yachachikkunkuna ansianukuna tukuy wawkinchikunawan kay kartata killkaykichi. Kankuna Antiokiya llaktapi Siria partipi Silisia partipi mana judiyu runakunata rimachiykichi. ²⁴ Yachashkanisapa suk runakuna kay llaktamanta kankunaman rishkankunata yachachishuknikichi. Nukaykunaka manami paykunata kachashkanisapachu. Paykunaka turbachishushpaykichi yachachishunkichi señalachinakunaykichipa. Yachachishunkichi Moisespa kamachinankunata kasunaykichipa.

²⁵ Chayrayku allita parlashpaynikuna akllashkanisapa ishkay wawkinchikunata kankunaman kachanaynikunapa. Paykunaka rinkasapa kuyananchi wawkinchikuna Bernabewaran Pablúwan tantalla. ²⁶ Paykunaka mana wañuya manhashpa Señor Jesukristupa rimananta yachachikunapa. ²⁷ Chay akllashkayníkuna Judasta Silasta kachaykanisapa kankunata tukuya entiendichishunaykichipa.

²⁸ Tata Diospa Espiritu yachachiwaptinkuna yuyashkanisapa kaykunala yachachiyníkichi: ²⁹ Ruradu dioskunata kuyashpa churashkankunkuna mikunata ama mikuchichu. Chaymanta ama sipidu animalkunata nima yawarninta mikuchichu. Chaymanta ama chikan warmiwan uchallikuychichu. Kay yachachinaynikunata kasushpaykichi allita rurankichi. Tata Diosmi yanapashunkichi.”

³⁰ Chaypina chay chusku runakunaka chay kartata apashpa Antiokiyan rirkansapa. Chay llaktapi chayashpangunkuna Jesukristuta kreyikmasinkunata tantanachishpangunkuna kartata kurkansapa.

³¹ Paykunaka chay kartata leyishpangunkuna sukaman kushikurkansapa chay karta animuchiptinkuna. ³² Chaymanta Judaswan Silas Tata Diospa rimananta yachachikuk kashpangunkuna chay Jesukristuta kreyikkunata ashwanta animuchishpangunkuna sukaman kushichirkansapa.

³³ Chaymanta suk tiempu washan Judas Silaswan llaktanman rinankunapa chay kreyikukmasinkuna willarkansapa: Tata Dios yanapashuchuníkichi nishpa. Willarkansapa chay kachamushkankunkuna wawkinkunaman kutinankunapa.

³⁴ Chashna willaptinkunapish Silaska yuyaykurkan chayllapi kipariyta. ³⁵ Pablúwan Bernabepish Antiokiyallapi kiparirkansapa. Chaypi kiparishpangunkuna Tata Diospa rimananta aypa yachachikukmasinkunawan suka-man yachachikurkansapa.

Chay yachachikushkan llaktakunallaman Pabluka kashkan kutirkan yachachikuk.

³⁶ Suk tiempu washan Pabluka chay purikmasin Bernabeta willarkan: —Aku kashkan chay yachachishkanchi llaktakunapi wawkinchikunata kwak yachananchipa imashnami kawsaykansapa nishpa.

³⁷ Chashna willaptin Bernabeka Juan Markosta sukaman pushanayarkan. ³⁸ Pabluka mana nima layapi munarkanchu payta pushayta. Payka yuyarkan Panfilia llaktapi sakishkankunata mana paykunawan yachachikuya munashpa. ³⁹ Chayrayku Pabluka Bernabewan sukaman ayninakushpangkuna ladeyananakurkansapa. Bernabeka Juan Markoswan suk barkupi Chipre ishlaman rirkansapa.

⁴⁰ Chashna Bernabe sakiptinna Pabluka Silasta akllarkan paywan purinanpa. Chaypina Antiokiyapi wawkinkuna Tata Diosta roygarkansapa kuyashpa yanapanankunapa. Chaymanta Pabluka Silaswan rirkansapa yachachikuk. ⁴¹ Siria partipi Silisia partipi llaktan llaktanpi purishpangkuna tukuy kreyikukmasinkunata animuchirkansapa.

16

Pablu Timoteota pusharkan yanapanankunapa.

¹ Chaymanta Pablwan Silas Derbe llaktaman rirkansapa. Chaymanta Listra llaktapi chayashpangkuna Jesukristuta kreyik Timoteota tarirkansapa. Paypa mamanka judiyu warmi Jesukristuta kreyik karkan. Tatan griego runa karkan. ² Listrapi Ikonioipi wawkinkuna rimarkansapa Timoteo alli rurak runa kananta. ³ Chayrayku Pabluka munarkan paykunawan tantalla purinanpa. Timoteopa tatan griego runa kashpa mana señalachirkanchu. Chayrayku manarapish pushashpara Pabluka señalachirkan. Chayta rrarkan ama chay partikunapi kawsak judiyumasinkuna piñakunankunapa mana señaladu runawan puriptin. Tukuy pi yacharkansapa Timoteopa tatan griego runa kananta.

⁴ Chaymanta Timoteota pushashpangkuna chay Jerusalenpi yachachikuk runakuna willashkankunata llaktan llaktan yachachikurkansapa.

⁵ Chashna yachachikuptinkuna Jesukristuta kreyikkuna ashwan allita kreyishpa kawsarkansapa. Chaymanta tukuy diya ashwan aypa runakuna Jesukristuta kreyirkansapa.

Pablu muskuyninpishina kawarkan Masedonia runata kayaptin.

⁶ Chaymanta Pablu Silaswan Timoteowan Asia partiman rinayarkansapa. Tata Diospa Espiritun mana munarkanchu chayman rinankunapa. Chayrayku Frigia partipi Galasia partipi yachachikupi purirkansapa.

⁷ Chaypina Misiapi chayashpangkuna yuyarkansapa Bitimia partiman riya. Chashna yuyaptinkuna Tata Diospa Espiritun mana munarkanchu chayman rinankunapa. ⁸ Chayrayku Misia partipi purishpangkuna Troas llaktapi chayarkansapa. Chay llakta manllayba kocha mañanpi karkan. ⁹ Chay llaktapi kashpangkuna suk tuta Pabluka muskuyninpishina Masedonia partimanta runata kawarkan. Chay runaka shayarishpa roygarkan: "Kay Masedonia partiman shamuy yanapawaksapa." ¹⁰ Pablu chay runata kawashpa purikmasinkunawan prontanakurkansapa Masedoniaman rinankunapa. Nuka Lukaspish paykunawan tantalla rirkani. Yacharkanisapa Tata Dios kayawaykanankunata chaypi paypa rimananta yachachikunaynikunapa.

Pablu Filipos llaktapi Bernabewan Lukaswan Tata Diosta kuyak warmiku-nata yachachirkansapa.

¹¹ Nuka Lukas Pablwan Silaswan tantalla suk atun barkupi rishpaynikuna Samotrasia ishlapi chayarkanisapa. Kayantin Neapolis llaktapi chayarkanisapa. ¹² Chaymanta rishpa Filipos llaktapi chayarkanisapa. Chay Filiposka tukuy chay Masedonia partipi tiyak llaktakunamanta

ashwan atun llaktami. Chay Filipospi Roma llaktamanta aypa runakuna shamurkansapa kawsak. Chay llaktapi suk diyakunata kiparirkanisapa.

¹³ Suk samana diya llakta washaman yaku mañanman rirkanisapa. Yu-yarkanisapa chaypi judiyukuna oranankunapa tantanakunankuna wasi tiyananta. Chaypi tiyarirkanisapa chay tantanakudu warmikunata Jesus salvakuk kananta yachachinaynikunapa. ¹⁴ Chay tantanakudu warmikunamanta suk karkan Lidia. Payka Tiatira llaktamanta karkan. Aypa chaniyuk sani llachapakunata rantikuk. Chaypina Tata Diosta kuyak warmi kashpa sukaman uyarirkan Pablu yachachikuptin. Tata Dios yanaparkan Pablu yachachikuykananta allita uyarinanpa. ¹⁵ Chaymanta Lidia tukuy shunku Jesukristuta kreyishpa tukuy familyanwan tantalla bawtisakurkansapa. Bawtisakushkanwasha fiukaykunata roygawarkansapa:

—Kankuna yuyaptikichi Jesukristuta alli kreyikuk kanaynita rinaykichi diyakaman shamuychi wasinipi kawsak.

Chashna sukaman roygawaptinkuna almitirkanisapa paypa wasinipi kipariyta.

Suk shipashmanta supayta llukshichishkanrayku Pabluta Silasta karselpiwichkachirkansapa.

¹⁶ Chashna Filipes llaktapi kashpaynikuna suk diya rirkanisapa maypicha tantanakuksapa Tata Diosta oranankunapa. Chayman riykashpaynikuna supayadu shipashwan tinkunakurkanisapa. Supay yanapaptin chay shipashka tukuy layata riksik. Chashna riksishpa patronninkunallata suka-man kullkiyachik.

¹⁷ Ñukaykuna Pabluwan riykaptinikuna chay shipashka kallarirkan katiwaysapata. Kallipi purik runakunata sincitta willarkansapa:

—Kay runakunaka altu sielipi kawsak Tata Diospa munananta rurakkunam. Kankunata yachachishuykankichi Tata Dios kastiguykichimanta salvashunaykichita.

¹⁸ Aypa diyakunata chashnalla rimashpa chay shipashka katiwarkansapa. Chashna amichiwaptinkuna Pabluka washanta chapashpa chay supayta willarkan:

—Jesukristupa shutinpi willayki ¡kay shipashmanta llukshiy!

Chashna willashkan ratu chay supayka llukshirkan.

¹⁹ Chaypina chay shipash manana nima riksikuk kaptinna patronninkuna sukaman piñakurkansapa. Manana yacharkansapanachu imashnami kulkita apinkasapa nishpa. Chayrayku Pabluta Silasta apishpankuna chay llaktapa plasanman pusharkansapa awtoridarninkunapi chatakuk. ²⁰ Chay awtoridarkunata willarkansapa:

—Kay judiyu runakuna llaktamasinchikunata pantachichishpa turbachiykansapa. ²¹ Yachachikuykansapa mana allikunata ruranankunapa. Ñukanchikuna romano runakuna kashpanchikuna chay laya yachachikunankunata mana atipanchisapachu katiyta.

²² Chashna chatakuptinkuna tukuy chay romano runakuna piñakurkansapa. Chaypina awtoridarkuna kamachirkansapa kamisankunata surkuchishpankuna kasiwan makanankunapa. ²³ Chashna sukaman makachishkankunawasha karselpi wichkachirkansapa. Chaypina karselta kuydak runata willarkansapa sukaman allita kuydanankunapa ama llukshinankunapa.

²⁴ Chashna willaptinkuna chay runaka pusharkansapa karselpa ashwan ukuman churak. Chay ukupi chakinkunata sepopi allita watashpa sakirkansapa.

²⁵ Chaypina chawpi tutapi Pabluwan Silaska Tata Diosta orashpa kantaykarkansapa. Chashna kantaptinkuna tukuy karselpi wichkadumasinkuna uyarirkansapa. ²⁶ Chashna oras rasllana alpa sinchita kuyurkan. Chaywan tukuy karselpa pirkankuna chukchukushpa chiktakurkansapa. Tukuy karselpa punkunkuna kicharinakurkansapa. Chay wichkadu runakunata watašhkankuna kadenankuna paskanakurkansapa.

²⁷ Chaypina chay karsel kuydak runaka puñuymanta rikchashpa kawarkan tukuy punkukunata kicharidutana. Yuyarkan chay wichkadu runakuna nitikushkankunata. Chayrayku ishkay filuyuk machetinta apishpa kikinna wañuchinakunayarkan ama awtoridarkuna payta wañuchinankunapa.

²⁸ Chayta kawashpa Pabluka sinchita willarkan:

—¡Ama wañuchinakuchu! ¡Tukuy mi kaypi kanisapa!

²⁹ Chashna Pablu willaptin chay karselta kuydak runaka suk alkusata mañakurkan. Chaypina kallpashpa chay karselpa ukunman Pablupa Silaspa ladunkaman rirkan. Manchakuywan chukchukushpa paykunapa ñawpaknippi kunkurikurkan. ³⁰ Chaymanta chay karsel ukumanta paykunata surkushpankuna tapurkansapa:

—Señorkuna ¿imataí rurasha Tata Dios salvawanana?

³¹ Chashna tapuptinkuna Pabluka willarkan:

—Señor Jesukristuta kreyiy. Payta kreyiptiki Tata Dioska kanta tukuy familyaykita salvashunkichi.

³² Chaymanta Pabluka Silaswan chay runataka tukuy paypa wasinpi kawsakkunatapish yachachirkansapa Jesukristu yachachishkankunata.

³³ Chay tutalla karselta kuydak runa Pablupa Silaspa makashpa kiryachishkankunata mayllapurkansapa. Chaymanta Pabluka Silaska payta tukuy familyankunata bawtisarkansapa.

³⁴ Bawtisakushkankunawasha chay runaka pusharkansapa wasinpi mikuk. Chaypina payka tukuy familyanwan sukaman kushikurkansapa Tata Diosta kreyishkankunaryku.

³⁵ Kayantin tutapacha chay llakta awtoridarkunaka chay karselta kuydak runata soldadukunata kacharkansapa willak Pabluwan Silasta kacharikankunapa.

³⁶ Chaypina chay runaka Pablutaka willarkan:

—Awtoridarkuna willachimuwashkasapa kankunata kacharinaynipasa. Chayrayku mana manchakushpana rillarychi.

³⁷ Chashna willaptin Pabluka chay awtoridarkuna kachashkan soldadukunata willarkansapa:

—Kankunashina ñukaykunapish romano runakuna kanisapa. Chashna romano runakuna kaptinikunapish chay awtoridarkuna tukuy pi kawawaptinkuna makachiwashkasapa. Mana nimata tapuwashpankuna chay llullakushpa chatawak runakunallata uyarishpa kay karselpiwichkachiwashkasapa. Kunanka pakallalla kacharichiwanayansapa. Manami chashnachu rishasapa. Kikinkuna shamuchunsapa surkuwaksapa.

³⁸ Chashna Pablu willaptin soldadukunaka rirkansapa awtoridarkunata willak. Paykunaka manchakurkansapa uyarishpa romano runakuna kanankunata. ³⁹ Chaypina kikinkuna rirkansapa Pabluta Silasta perdonta mañak. Chaypina karselmanta surkushpankuna sukaman roygarkansapa chay llaktamanta llukshinankunapa.

⁴⁰ Chaypina Pabluka Silaswan karselmanta llukshishpankuna Lidiapa wasinman rirkansapa. Chaypi tukuy wawkinkunata

paninkunata kushichishpa animuchishkankunawasha chay llaktamanta llukshirkansapa.

17

Pabluta chiknik runakuna Tesalonika llaktapi runakunata turbachirkansapa.

¹ Chay Filipos llaktamanta llukshishpangkuna Pablwan Silaska Amfipolis llaktata Apolonia llaktata pasashpangkuna Tesalonikapi chayarkansapa. Chay Tesalonika llaktapi judiyu runakunapa tantanakunankuna wasi tiyarkan.

² Tesalonikapi chayashpa amañananshina Pabluka chay tantanakunankuna wasiman rirkan. Kimsa samana diyakuna chay tantanakudu runakunawan sukaman parlashpangkuna Tata Diospa rimananta yachachirkansapa. ³ Paykunata entiendichirkansapa Tata Diosmanta shamudu salvakuk runa sufrishpa wañunanta chaymanta wañushkanmanta kashkan kawsamunanta. Chashna yachachikushpa willarkansapa:

—Chay yachachikunayni Jesuska Tata Diosmanta shamudu salvakuk runami.

⁴ Chashna Pablu yachachikuptin suk judiyu runakuna Jesusta kreyishpangkuna Pablwan Silaswan tantanakurkansapa. Chaymanta aypa griego Tata Diosta kuyak runakuna aypa alli yuyayuk yachaysapa warmikunapish Jesusta kreyirkansapa. ⁵ Chashna aypa runakuna Jesusta kreyishkankunaryku mana kreyikuk judiyukuna sukaman piñakurkansapa. Chaypina mana alli rurak killa likidu runakunata tantanachirkansapa chay llaktapi runakunata pantachichishpa turbachinankunapa.

Chaymanta Pablwan Silasta apinayashpangkuna Jasonpa wasinpi yaukurkansapa. Paykunata surkunayarkansapa chay chiknik runakuna munashkankuna layata ruranankunapa. ⁶ Chaypina mana Pabluta nima Silasta tarishpangkuna Jasonta suk kreyikukmasinkunata apirkansapa. Paykunata aysashpa chay llaktapa awtoridarninkunaman pusharkansapa. Sinchita willarkansapa:

—Chay runakunaka tukuy llaktakunapi runakunata turbachishpangkuna pantachichishkasapa. Kay llaktanchipipish ñami chayamushkasapano pantachichiwananchikunapa. ⁷ Kay Jasonmi chay runakunata wasinpi chaskishkasapa. Tukuy paykuna chay ashwan sinchi romano kamachiwakninchikunapa kamachikunankunata manana kasunayansapanachu. Rimansropa chikan sinchi kamachikuk Jesus tiyananta.

⁸ Chayta uyarishpangkuna chay llaktapi kawsak runakunaka awtoridarninkunawan sukaman turbakurkansapa.

⁹ Chaymanta Jason pushadumasinkunawan kullkita pagaraptinkuna awtoridarkuna kacharirkansapa.

Pablu Silaswan Timoteowan rirkansapa Berea llaktaman.

¹⁰ Chashna turbakushkankunawasha chay tuta Jesukristuta kreyikkuna Pabluta Silasta Berea llaktaman kacharkansapa. Paykunaka chay llaktapi chayashpangkuna judiyukunapa tantanakunankuna wasiman rirkansapa yachachikuk. ¹¹ Chay Berea llaktapi judiyu runakuna Tesalonikapi runakunamanta ashwan alli yuyayuk runakuna karkansapa. Pablu yachachikuptin kushikushpa uyarirkansapa. Diyan diyan Tata Diospa rimananta leyiksapa yachanankunapa Pablu yachachikunan allichu manachu nishpa. ¹² Chashna allita Tata Diospa rimananta yachakushpangkuna aypa runakuna Jesukristuta kreyirkansapa. Aypa griego rimak ullukunkuna alli yuyayuk yachaysapa warmikuna kreyirkansapa.

¹³ Chaymanta Tesalonika llaktapi judiyu runakuna yacharkansapa Pablu Berea llaktapi yachachikuykananta. Chayta yachashpangkuna rirkansapa chaypi kawsak runakunata turbachik. ¹⁴ Chaypina Jesukristuta kreyikmasinkunka Pabluta willarkansapa utkakushpaa chay manllayba kocha mañanman rinanpa. Pablu riptinna Timoteowan Silaska Berea llaktallapi kiparirkansapa.

¹⁵ Chaypina Atenas llaktaman suk kreyikukmasinkunka Pabluwan talla rirkansapa. Chaypi Pabluta sakishpangkuna llaktankunaman kuitirkansapa. Paykunawan Pabluka Timoteota Silasta willachirkansapa utkakushpangkuna rinankunapa payta tarik.

Atenas llaktapi kashpa Pablu Tata Diosta mana riksik runakunata yachachirkansapa.

¹⁶ Chaypina Pabluka Silaswan Timoteota shuyakshina kawarkan tukuy chay llaktapi kawsak runakuna rikchak laya ruradu dioskunata kuyaptinkunka. Chayrayku sukaman llakishpaa turbakurkan. ¹⁷ Chashna sukaman llakishpaa tantanakunankunka wasipi judiyukunawan Tata Diosta kuyak mana judiyu runakunawan parlarkansapa. Chaymanta tukuy diya chay llaktapa plasanpi tantanakuk runakunatapish parlachirkansapa. ¹⁸ Chashna parlaptinkunka epikuriokunapa estoykokunapa yachachinankunka katik runakuna kallarirkansapa Pabluwan ayninakuyta. Sukkunaka Pabluta asichishpaa sukwani willanakurkansapa:

—¿Imatáti rimaykan kay llulla likidu runaka?

Sukkunaka rimarkansapa:

—Ichará kay runaka chikan llaktakunapi tiyak dioskunapa yachachianayaykanchisapa.

Tukuy chayta willanakurkansapa Pablu yachachikuptin Jesus salvakuk kananta wañushkanmantaa kawsamushkanta. ¹⁹ Paykuna ashwanta yachanayashpangkunka Pabluta pusharkansapa maypicha amañaksapa tantanakuyta. Chay tantanakunankunka shutin karkan Areopago. Chaypina Pabluta willarkansapa:

—Ñukaykunapish chay mushuk laya yachachikunaykita yachanayanisapa.

²⁰ Kanka mana niman suk kuti uyarishkaynikunata yachachiwaykankisapa. Yachanayanisapa imatami yachachikuykanki nishpaa.

²¹ Atenas llaktamanta runakuna chikan llaktakunamanta chaypi kawsakkunawan amañaksapa rikchak laya mushuk yachanakunata uyariyta parlachikuyta.

²² Chashna yachakunayaptinkunka Pabluka Areopagopi tantanakudu runakunapa chawpinkunapi shayarishpaa willarkansapa:

—Atenaspi kawsak runakuna, kawaykichi aypa dioskunata kuyanaykichi. ²³ Llaktaykichipi purishpayni maypicha diosnikichita kuyankichi chaypi suk altarta kawashkani. Chay altarpipi suk killkadu riman: “Kappika mana riksidu diostami kuyanchi.” Kunanka chay mana riksishpaa kuyanaykichi Diospami yachachiykichi. ²⁴ Chay mana riksinaykichi Tata Dioska tukuy allpata tukuy allpapi tiyakkunata rurarkan. Tukuy sielu tukuy allpa paypa makinpi. Payka manami runakuna rurashkan wasikunapichu kawsan. ²⁵ Ñukanchikunata kawsayta samayta tukuy layakunata kuwanaykichi. Paypa mana nima illapuptin runakunata mana nimata mañanchu kawsanampa.

²⁶ Payka suk runallamanta tukuy llaktakunapi kawsak runakunata mirachiwashkanchisapa tukuy allpapi kawsananchikunapa. Payka akllashka imay tiempupimi maykan llaktapimi tukuy runakuna kawsashun-chisapa nishpa. ²⁷ Tata Dioska rurawashkanchisapa payta maskashpa tarinanchikunapa mana karupi kaptin. ²⁸ Tata Dios rurawashkanchikunaryku kawsanchi purinchi imatapish kaptin ruranchi. Chashnalla kankunamanta suk kantu rurak runakuna killkashkasapa: “Tata Diosmi rurawashkanchisapa paypa wambrankuna kananchikunapa.”

²⁹ Tata Dios rurawaptinchikuna ama yuyaypachichu kurimanta kullkimanta rumimanta ruradu dios kananta. Runakunalla yuyanankunatashina chay dioskunata ruransapa.

³⁰ Ñawpa tiempu runakuna Tata Diosta mana riksirkansapachu. Mana riksiptinkunapish Tata Dioska mana nimatashina kawarkan. Kunanka tukuy maypi kawsak runakunata yachachiwaykanchisapanama alli rurananchikunamanta wanashpa payllata kreyishpa kawsananchikunapa.

³¹ Tata Dios churashkan diya chay akllashkan runaka tukuy runakunata willawashunchisapa allitachu rurashkanchisapa manachu nishpa. Tata Dios chay akllashkan runata wañushkamanta kawsachimushka yachachi-wananchikunapa akllashkan salvakuk runa kananta.

³² Chashna Pabluk wañudukuna kawsamunanta rimaptin suk runakuna asichirkansapa. Sukkuna willarkansapa:

—Suknin diyakaman kashkan uyarishasapa yachachikuptiki.

³³ Chashna willaptinkuna Pabluka sakirkansapa. ³⁴ Sukkuna Jesusta kreyishpankuna Pabluta katirkansapa. Paykunamanta suk karkan Dionisio. Chay Dionisioka chay Areopagopi suk awtoridar karkan. Chaymanta suk warmi Damaris chaymanta sukkunapish Jesusta kreyishpa Pabluta katirkansapa.

18

Pablukorinto llaktapi yachachikurkan.

¹ Chaymanta Atenas llaktamanta llukshishpa Pablukorinto llaktaman rirkan. ² Chaypi suk judiyu runa Akilaswan tinkunakurkan. Akilas Ponto partimanta karkan. Warmin Prisilawan Italia llaktamanta llukshishpa Korintopina kawsaykarkansapana. Sinchi kamachikuk Klaudio kamachikurkan tukuy judiyu runakuna Roma llaktanmanta llukshinankunapa. Chashna karkuptinkuna Akilas warmin Prisilawan rirkansapa Korintopi kawsak. Chaypina Pabluk paykunawan tinkunakushpankuna wasinpi rirkan pasyak. ³ Paykunashina Pabluka millwata awashpa raku llachapamanta wasikunata ruray yachak karkan. Chayrayku paykunawan kiparirkhan tantalla trabajanankunapa. ⁴ Chaypina Pabluka tukuy samana diya rirkan judiyukunapa tantanakunankuna wasipi yachachikuk. Munarkan tukuy judiyu runakunata tukuy mana judiyu runakunatapish entiendichiysapata Jesukristu salvakuk kananta.

⁵ Chaymanta Silas Timoteowan Masedoniamanta chayaptinkuna Pabluka manana karpakunata rurarkannachu. Tukuy diyana Tata Diospa rimananta yachachikuk. Judiyu runakunata allita yachachiksapa Jesus Tata Diosmanta shamudu salvakuk runa kananta. ⁶ Chashna yachachikuptin chay judiyu runakuna mana kreyishpankuna kallarirkansapa Pabluta washanchayta. Chaypina Pabluka llachapanta tapsirkhan yuyachinankunapa mana alli rurak runakuna kanankunata. Willarkansapa:

—Kankunapi kiparin uchaykichi. Kikikichi munankichi Tata Dios kasti-gashunaykichipa. Ñukaka mana uchayukchu kani. Kunanmantapacha rini mana judiyu runakunata yachachik.

⁷ Chashna rimashpa chay tantanakunankuna wasimanta llukshishpa rirkana ladunllapi tiyak wasiman. Chay wasika karkan Tisio Justo runapa wasin. Payka Tata Diosta kuyak runa karkan.

⁸ Chaymanta chay tantanakunankuna wasipi kamachikuk Krispo tukuy familyanwan Jesukristuta kreyirkansapa. Chaymanta Pabluk allita yachachikuptin Korintopi kawsak runakuna kreyikushpangkuna aypa bawtisakurkansapa.

⁹ Suk tuta muskuyninpishina Señor Jesukristu Pabluta willarkan:

—Ama ni pita manchaychu. Mana shaykushpa willashkaynita yachachikupi katiy. ¹⁰ Ñukami kuydayki ama ni pi nimanachishunaykipa. Kay llaktapika aypa akllashkayni runakuna tiyan ñukata kreyiwanankunapa.

¹¹ Chashna Jesukristu willaptin Pabluka Korintopi kiparirkan suk wata sokta killata Tata Diospa rimananta yachachikushpa.

¹² Chaymanta Akaya partipi suk mushuk kamachikuk runa Galion yaykurkan. Chay tiempu chay llaktapi kawsak judiyu runakuna tantanakurkansapa Pabluta pushanankunapa Galionpi chatakuk. ¹³ Chay kamachikuk Galionpi chatakupha willarkansapa:

—Kay runaka yachachikupi purin Tata Diosta kuyashpa amana Moisespa kamachikunankunata kasushpa kawsanaynikunapano.

¹⁴ Chashna chatakuptinkuna Pabluk ayninayaykaptin Galion chay chatakuk judiyukunata willarkansapa:

—Judiyu runakuna, kay runa sukaman mana allita rurashka kaptinka ñuka uyariykichiman. ¹⁵ Kankunkuna kay runata chataykankichi kamachikunaykichimanta chikan layata chikan shutita yachachikuptin. Chay layata chataptikichi mana munanichu uyariynikichita. Kikikichi judiyupura munaykichillata ruraychi.

¹⁶ Chashna willashpangkuna Galionka chay kamachikunan wasimanta karkurkansapa. ¹⁷ Chaypina Galionpa ñawpakinipi chay piñakuk runakunaka chay tantanakunankuna wasipi kamachikuk Sostenesta apishpankuna sukaman makarkansapa. Chashna makashkankunata kawashpapish Galionka mana nimatashina kawarkan.

Pabluk kimsaynin kuti chay yachachikushkan llaktakunaman rirkana

¹⁸ Chaymanta Korinto llaktapi aypa diyakunata Pabluka kiparirkan. Chaymanta chaypi kawsak wawkinkunata paninkunata sakishpa Siria partiman rirkana. Prisilawan Akilaswan tantalla suk atun barkupi rirkansapa. Manara chay barkupi yaykushpara Senkrea llaktapi Pabluka chukchanta tipichirkan. Chayta rurarkan Tata Diosta willashkanta rurananpa.

¹⁹ Chaymanta Efeso llaktapi chayashpangkuna Pabluk Prisilata Akilasta chaypi sakirkan. Judiyukunapa tantanakunankuna wasiman rirkana tantanakudu runakunata yachchinanpa. ²⁰ Chay runakunaka Pabluta roygarkansapa amara rinanpara. Chashna roygaptinkunapish mana munarkanchu kipariyta. ²¹ Paykunata sakishpankuna willarkansapa:

—Jerusalenman rinayni tiyan chaypi fiestata pasak. Tata Dios munaptinka kashkan kutimusha kankunawan kanaynipa.

Chashna willashpangkuna Pabluka chay atun barkupi Efesomanta Sesareaman rirkana.

²² Chaymanta Sesareamanta rirkana Jerusalenman Jesusta kreyikmasinkuna nata chapak. Chaymanta Jerusalenmanta Antiokiyaman rirkana.

²³ Suk tiempu washan llukshirkan kashkan Galasia partipi Frigia partipi purik. Llaktan llaktan purishpa Jesusta kreyikkunata animuchirkansapa.

Apolos Efeso llaktapi tukuy Akaya partipi allita yachachikurkan.

²⁴ Chay tiempu Efeso llaktapi Alejandriya llaktamanta judiyu runa Apolos chayarkan. Payka Tata Diospa rimananta allita yachashpa allita rimakushpa yachachikurkan. ²⁵ Payka allita yacharkan imashnami Jesukristuta katishpa kawsashunchisapa nishpa. Sukaman kushikushpa allita yachachikuykarkan Jesus Tata Diosmanta shamudu salvakuk runa kananta. Chashna yachachikushpapish Juan Bawtista yachachikushkanllata yacharkan. ²⁶ Chay tantanakunankuna wasipi Apolos mana manchakushpa yachachikuptin Prisila Akilaswan uyarirkansapa. Chay washa wasinman pusharkansapa ashwan allita Jesus yachachikushkanta yachachinankunapa.

²⁷ Chaymanta Apolos Akaya partiman rinayaptin Jesukristuta kreyikmasinkuna sukmaman yanaparkansapa rinanpa. Chaymanta kartata killkarkansapa Akaya partipi kawsak kreyikukmasinkuna allita chaskinankunapa. Chaypina Apolos Akaya partipi chayashpa Jesukristuta kreyikmasinkunata kushikushpa sukmaman yanaparkansapa. ²⁸ Chay Akaya partipi kawsak judiyu runakunata tukuy pípa ñawpaknippi sinchita willarkansapa pantakudu kanankunata. Tata Diospa rimananta allita yachachikushpa entiendichikurkan Jesus Tata Diosmanta shamudu salvakuk runa kananta.

19

Ishkay wata kimsa killata Efeso llaktapi Pabluyachachikurkan.

¹ Chaypina Apolos Korinto llaktapi kipariptin Pabluka Frigia partita rishpa urkukunata pasashpa Efeso llaktapi chayarkan. Chay llaktapi Jesukristuta kreyik runakunata tarirkan. ² Paykunata tapurkansapa:

—Kankuna Jesukristuta kreyishpaykichi ¿Tata Diospa Espirituntachu chaskishkankichi?

Chaypina paykunaka aynirkansapa:

—Manami yachashkanisapachu Tata Diospa Espiritun shamenanta.

³ Chaypina Pabluka tapurkansapa:

—¿Imta yachashpatiya bawtisakushkankichi?

Chaypina paykunaka willarkansapa:

—Juanpa yachachikushkanta kreyishpaynikuna bawtisakurkanisapa.

⁴ Chaypina Pabluka willarkansapa:

—Ariya, Tata Diosta kasuk runakunata tukuy mana alli rurashkankunamanta wanaptinkuna Juanka bawtisarkansapa. Paykunata yachachirkansapa paypa washanta suk ashwan alli yachachikuk runa shamenanta. Willarkansapa paypa washan shamuk runa Jesusta kreyinankunapa.

⁵ Chashna Pabluyachachikuptin chay runakunaka Jesukristuta kreyishpankuna kashkan bawtisakurkansapa. ⁶ Chaymanta Pablumankunapi makinta churaptinkuna Tata Diospa Espiritun paykunaman shamurkan. Chaypina chay runakuna mana yachaypa laya rimanakunata rimarkansapa. Chaymanta imatacha Tata Dios yachachishkasapa chayta willarkansapa. ⁷ Tata Diospa Espiritunta chaskik runakunaka chunka ishkay karkansapa.

⁸ Chaymanta kimsa killata chay judiyu runakunapa tantanakunankuna wasipi Pabluka yachachikurkan. Mana ni pita manchashpa entiendichirkansapa imashnami Tata Diospa mandunpi yaykunkasapa nishpa. ⁹ Chashna yachachikuptin suk runakuna sinchi shunkuyuk kashpankuna mana munarkansapachu kreyiyta. Paykunaka tukuy runakunata willarkansapa Pabluka yachachikunan mana alli kananta. Chashna rimaptinkuna Pabluka Jesukristuta kreyik runakunata pusharkansapa Tirano yachachikunan wasipi tantanakuk. Chaypi Pabluka tukuy diya paykunata yachachirkansapa.

¹⁰ Chay Efeso llaktapi ishkay watata yachachikushpa kawsarkan. Chayrayku Asia partipi kawsak judiyu runakuna mana judiyu runakunapish Señor Jesuspa yachachikunanta uyarirkansapa. ¹¹ Chaymanta Tata Dios Pabluta yanapaptin almiranu milagrukunata rurarkan. ¹² Sukkuna Pablukashkan llachapata pañuelunta aparkansapa unkudukunapi churak. Paykunapi churaptinkuna sanuyarkansapa. Supaykunapish unkudu runakunamanta llukshirkansapa.

¹³ Chaymanta kanchis judiyu runakuna llaktan llaktan purishpankuna runakunamanta supaykunata llukshichiksapa. Suk diya supaykunata karkunayashpankuna munarkansapa Jesuspa shutinta rimashpa llukshichiyyta. Chay supaykunata willarkansapa:

—Chay Pabluka yachachikunan Jesuspa shutinpi willaykichi llukshinaykipa.

¹⁴ Chay supaykunata llukshichinayak runakuna suk kamachikuk sasertote Eskebapa kanchis wambrankuna karkansapa. ¹⁵ Chashna chay runakuna supaykunata willaptinkuna chay supayka willarkansapa:

—Jesustaka riksini. Chaymanta yachani pimi Pabluka nishpa. ¿Kankunaka pití kankichi?

¹⁶ Chaypina chay supayadu runaka chay kanchis runakunataka sukmaman sinchita makarkansapa. Sukman makaptinkuna chay wasimanta chay kanchis runakunaka llatanlla llikil llikil kuerpuvuk kallparkansapa.

¹⁷ Efeso llaktapi kawsak judiyu runakuna mana judiyu runakunapish chayta yachashpankuna manchakurkansapa. Chashna modomanta tukuy runakuna Jesukristuta sukmaman alabarkansapa.

¹⁸ Chaypina Jesusta kreyikkuna tukuy kreyikukmasinkunapa ñawpakninkunapi ñawpa mana alli urashkankunata willarkansapa.

¹⁹ Chaymanta aypa ñakakuk runakuna Jesusta kreyishpankuna chay ñakakuy yachachik librunkunata apamurkansapa tukuy pipa ñawpakninkunapi rupachinankunapa. Tukuy chay rupachishkan librunkunapa chaninta tantiyarkansapa pichka chunka waranka kullki kananta.

²⁰ Chay modomanta Tata Dios allita yanapaptinkuna aypa runakuna Jesukristupa yachachikushkanta sukmaman allimata yachachikurkansapa.

²¹ Chaymanta Pabluka yuyarkan Masedonia partiman Akaya partiman kashkan riyta. Chaymanta Jerusalen llaktamanpishe rinayarkan. Yuyarkan Jerusalenmanta Roma llaktaman riyta. ²² Chayrayku suk tiempullata Asia partipi kiparirkan. Chaypi kiparishpa Masedonia partiman chay ishkay yanapakninkuna Timoteota Erastota kacharkan.

Ruradu diosa Artemisarayku Efeso llaktapi aypa runakuna turbakurkansapa.

²³ Chaymanta chay tiempupi Efeso llaktapi aypa runakuna Pabluka yachachikushkanrayku piñakurkansapa. ²⁴ Suk runa Demetrio trabajakmasinkunata kallarirkan turbachiyyta. Chay Demetrioka ruradu diosa Artemisapa wasintashina kullkimanta rurak runa karkan. Aypa

runakuna chay wasisillukunata rurashpa rantikushpa aypa kullkita apiksapa.²⁵ Aypa runakuna chay laya trabajuyuk karkansapa. Chaypina Demetrio tukuy chay runakunata tantanachishpa willarkansapa:

—Trabajakmasinikuna, kankunaka yachankichi kay dioskunata wasinkunata rurashpanchikuna aypa kullkita apinanchikunata kawsananchikunapa.²⁶ Chaymanta kawashkankichi uyarishkankichi chay runa Pablu yachachikunanta. Payka riman runakuna rurashkan dioskuna mana dioskuna kananta. Chashna yachachikushpa kay Efeso llaktanchikunapi yaka tukuy Asia partipi aypa runakunata ñami kreyichishkasapana.²⁷ Chay yachachikunan ñukanchikunapa mana alichu. Chay runakuna diosninchita manana kuyanayashpangunkuna manana kay rurashkanchikunata rantinkasapanachu. Chaymanta kuyananchikuna diosa Artemisapa wasintapish washanchankasapa. Kay Asia partipi kawsakkuna tukuy allpapi kawsakkuna kuyananchikuna Artemisata kuyashkankunkunamanta manana kuyanayankasapanachu.

²⁸ Chashna Demetrio willaptinkuna chay runakunaka piñakushpangunkuna sinchita rimarkansapa:

—¡Artemisaka ñukanchikuna Efeso runakunapa diosanchikunami!

²⁹ Chashna sinchita rimaptinkuna tukuy chay llaktapi kawsak runakuna sukaman turbakurkansapa. Chaypina Gayota Aristarkota apirkansapa. Paykunaka Masedonia partimanta Pablupo purikmasinkuna karkansapa. Chay ishkay runakunata aysashpa suk manllayba tantanakunankuna wasiman pusharkansapa.³⁰ Chay wasipi Pablupish yaykunayarkan chay aypa runakunata willak ama chay ishkay purikmasinkunata nimanachinankunapa. Chashna yaykunayaptin Jesusta kreyikmasinkuna micharkansapa ama yaykunarpa.³¹ Chay Asia partipi suk awtoridarkuna Pablupo amigunkuna karkansapa. Paykunapish willachirkansapa ama yaykunarpa.³² Chay tantanakudu runakunamanta sukkuna sinchita suk layata rimarkansapa. Sukkunaka chikan layata rimarkansapa. Ashwan aypa runakuna sukaman turbakushpa mana yacharkansapachu imaraykumi tantanakudusapa nishpa.

³³ Chaypina suk judiyu runakuna Alejandrota chay aypa runakunapa ñawpkinkunaman tankakurkansapa. Munarkansapa payna willanankunapa judiyu runakuna mana uchayuk kanankunata. Alejandro rimakunayashpa makinwan señasta rurashpa upallayachinayarkansapa.³⁴ Chay runakuna Alejandrota kawashpangunkuna yacharkansapa judiyu runa kananta. Chayrayku mana kasunayashpangunkuna ishkay orata kaparikushpa rimarkansapa:

—¡Artemisaka ñukaykuna Efeso runakunapa diosaynikunami!

³⁵ Chay ishkay orata kaparikushkankunawasha chay llakta awtoridarpa killkakuknin runa atiparkan upallayachiysapata. Chaypina willarkansapa:

—Efeso llaktapi kawsakmasinikuna, tukuy allpapi kawsak runakuna yachañsapa kuyananchikuna diosa Artemisapa wasinta kuydananchikunata. Chaymanta sielumanta urmamushkan figurantapish allita kuydaykanchisapa.³⁶ Tukuy runakuna chayta yachaptinkuna amana kapariychinachu. Mana allita yuyashpaykichi amara nimata ruraychirachu.³⁷ Kay pushamushkaykichi runakunaka chay diosninchikunapa wasinmanta mana nimata suwashkasapachu. Nima payta washanchashkasapachu.³⁸ Demetrio trabajakmasinkunawan chay runakunata chatanayashpa richunsapa awtoridarninchikunapi chataksapa. Chaypi atipansapa chatanakuya.³⁹ Chaymanta kankuna

chikan layata chatakunayashpaykichika chay killkadu kamachinanchikunashina awtoridarkuna tantanakushpa willashunkichi pimi mana allita urashka nishpa. ⁴⁰ Kunanka turbakushpa tantanakushkanchikunaryaku ichará awtoridarninchikuna chatakuwashunchisapa. Chashna chatawaptinchikuna mana nimata atipashunchisapachu ayniyta.

⁴¹ Chashna chay killkakuk runa willashpankuna tukuy chay runakunata llukshichirkansapa.

20

Pablu Masedonia partiman Gresia partiman rirkan.

¹ Chay runakuna turbachinakushkankunawasha Pabluka Jesusta kreyikmasinkunata kayarkansapa allita yachachinankunapa. Chaymanta paykunata sakishpankuna Masedonia partiman rirkan. ² Masedoniaman rishpa llaktan llaktanpi Jesukristuta kreyikmasinkunata animuchiypi rirkan. Chaymanta Gresia partipi chayarkan. ³ Chaypi kimsa killata kiparirkan. Chaymanta suk barkupi yaykunayarkan Siria partiman rinanpa. Chashna oras yacharkan chay barkupi chiknik judiyu runakuna wañuchinayayanankunata. Chayta yachashpa Masedonia partita purishpa kutirkan.

⁴ Chashna riptin paywan tantalla kanchis kreyikukmasinkuna rirkansapa. Suk karkan Berea llaktamanta Pirropa wambran Sopater. Chaymanta Tesalonika llaktamanta Aristarkowan Segundu rirkansapa. Chaymanta Derbe llaktamanta Gayo rirkan. Chaymanta Asia partimanta Timoteowan Tikikowan Trofimo rirkansapa. ⁵ Ñuka Lukaspish Pabluwan tantalla rirkani. Chay kanchis purikmasinikuna ñawpashtpankuna rirkansapa Troas llaktapi shuyawaksapa. ⁶ Ñukaka Pabluwan Filipos llaktapi kiparirkanisapa chay mana levadurayuk panta mikushpa fiestata pasanaynikunapa. Chay fiesta washan suk barkupi rishpa pichka diyapi Troas llaktapi chayarkanisapa. Chaypi chay purikmasinikunata tarishpaynikuna paykunawan kanchis diyata kiparirkanisapa.

Troas llaktapi Pablu pakarinayanankaman yachachikurkan.

⁷ Troaspi kashpaynikuna domingo diya kreyikukmasinikunawan tantanakurkanisapa Jesus wañushkanta yuyashpa panta mikunaynikunapa. Pabluka sukaman sunita chawpi tutakaman yachachirkan pakariptin sak-inankunapa. ⁸ Suk atun wasipi kimsaynin pisupi tantanakudu karkanisapa. Chaypi aypa apichidu alkusakuna tiyarkan. ⁹ Chay wasipa ventanapi suk wayna Eutiko tiyaridu karkan. Chashna Pablu sukaman sunita yachachikuptin chay waynaka puñunayarkan. Chaypina allita puñushpana chay kimsaynin pisumanta urmamurkan. Chashna urmamuptin chay runakunaka wañudutana atarichirkansapa. ¹⁰ Pabluka turbakushpa urayarkan abrasakpacha. Chaypina chay wawkinkunata willarkansapa:

—¡Ama manchakuychichu! Kay waynaka manami wañuduchu.

¹¹⁻¹² Chashna kawsaduta kawashpankuna chay runakuna sukaman kushikurkansapa. Chaypina Pabluka chay kimsaynin pisuman kashkan rirkan. Chaypina Jesus wañushkanta yuyashpa panta pakichinakushpa mikurkanisapa. Chayta mikushkaynikunawasha pakarinankaman Pabluka yachachikurkan. Chaymanta punchawyaptin llukshirkansapa. Chay waynatipish kawsamudutana wasinmanna pusharkansapa.

Pabluka purikmasinkunawan Troas llaktamanta Miletoman rirkansapa.

¹³ Troas llaktamanta llukshishpaynikuna Pablukan parlanakurkanisapa Ason llaktapi tinkunakunaynikunapa. Ñukaykuna barkupi rishpa ñawparkanisapa. Pabluka ñanta purishpalla rirkana. ¹⁴ Chaymanta Ason llaktapi tinkunakushpaynikuna Pabluka ñukaykunawan tantalla barkupi Mítilene llaktaman rirkanisapa. ¹⁵ Chay llaktamanta llukshishpaynikuna kayantin Kiyo llaktata pasarkanisapa. Kiyo llaktata pasashpa kayantin yaku mañanpi Samos llaktapi chayarkanisapa. Chaymanta kashkan suk diyata rishpa Mileto llaktapi chayarkanisapa. ¹⁶ Pabluka munarkan Jerusalenpi Pentekostes fiestata pasayta. Chayrayku mana munarkanchu Efeso llaktaman rihta ama chay Asia partipi unayanana. Chayrayku Efeso llaktata pasashpalla Mileto llaktaman kuskalla rirkanisapa.

Pabluk Ejesopi kawsak ansianukunata kayachishpa yachachirkansapa.

¹⁷ Mileto llaktapi kashpa Pabluka Efesopi kawsak Jesusta kreyik ansianukunata kayachirkansapa. ¹⁸ Paykuna chayaptinkuna Pabluka willarkansapa:

—Kankunaka allita yachankichi imashnami kay Asia partipi shamushkayni diyamantapacha kawsashkani nishpa. ¹⁹ Kankunawan kashpayni Señorninchí Jesukristuta allita sirvishpa kawsashkani. Chay chikniwak judiyumasinikuna sufrichiwaptinkunapish mana kikini kreyinakushpa llakishpa wakashpayni kawsashkani. ²⁰ Tantanakunankuna wasikunapi wasikichipish tukuy layata allinikichipa yachachishkaykichi. ²¹ Judiyu mana judiyu runakuna kaptikichipish allita yachachishkaykichi. Willashkaykichi mana alli ruranaykichimanta wanashpa Tata Diosta kasushpa Señor Jesusta kreyishpa kawsanaykichipa.

²² Kunanka Tata Diospa Espiritu munaptin Jerusalenman riykani mana yachashpa imatami chaypi rurawankasapa nishpa. ²³ Tukuy llaktakunapi puriptini Tata Diospa Espiritu willawashka Jerusalenpi chikniwak runakuna sufrichiwanankunata karselpi churawanankunata. ²⁴ Ñukupa mana nimananchu wañuptinipish kawsaptinipish. Señorninchí Jesukristu akllawashka paypa allima rimananta yachachikunaynipa. Chayrayku kushikushpa wañunayni diyakaman tukuy runakunata yachachishasapa Tata Dios tukuyta kuyanankunata.

²⁵ Allita kankunata yachachishkaykichi Tata Diospa mandunpi kawsanaykichipa. Kunanka yachani kunanmantapacha manana ni suk kankuna kawanaykitchitana. ²⁶⁻²⁷ Mana nimata pakashpa Tata Diospa munananta allita yachachishkaykichi. Chayrayku kankuna mana Jesukristuta kreyishpa wañuptikichika ñukaka manami uchayukchu kani. ²⁸ Tata Diospa Espiritu kankunata churashushkankichi Jesusta kreyikmasikichita kuydanaykichipa. Jesuska paykunapa uchankunaryku yawarninta ichashpa wañurkan Tata Dios perdonanankunapa. Chayrayku paykunata allita kuydanaykichi tiyan.

²⁹ Ñuka yachani kankunata sakiptini sakra mana alli yachachikuk runakuna rikurimunankunata. Paykunaka ovejata mikuk pumashina Jesusta kreyikkunata llullachishpa wakllichinkasapa. ³⁰ Kankunamanta sukkuna llullakushpa mana allikunata yachachikunkasapa Jesusta kreyikkuna paykunallata katinankunapa. ³¹ Chayrayku allita kuydanakuychi. Allita yuyaychi kimsa watata diyapi tutapi wakakushpayni mana shaykushpa tukuy kankunata allita yachachishkaynikunata.

³² Kunanka, wawkinikuna, Tata Diospa makinpi sakiykichi kuydashunaykichipa. Payka rimananpi willawanchisapa sukmán kuyawananchikunata. Chay rimanata ama kunkaychichu. Chay rimanata kreyishpaykichi

atipankichi mana shaykushpa ashwan ashwanta Jesukristuta kreyiyyita. Chaymanta Tata Dios kankununa tukuy kreyikukmasikichiwana tantallata yanapashunkichi paywan kushikushpa kawsanaykichi.

³³ Ñukaka mana ni pita kullkinta nima llachapanta mañashkanichu. ³⁴ Kankununa allita yachankichi sukaman trabajashkaynita mikunaynita llachapaynita rantinaynipa. Chaymanta trabajashkani purikmasinikunat-apish yanapanaynipa. ³⁵ Kuti kuti yachachishkaykichi ñukashina trabajashpa kawsanaykichiha mana nimayuk runakunata yanapanaykichiha. Yuyaychi Señorninchi Jesus rimashkanta: “Runamasikichimanta su imata chaskishpaykichi kushikunkichi. Kankuna sukkunata kushpaykichi ashwanta kushikunkichi.”

³⁶ Tukuy chayta yachachikushkanwasha Pabluka Efesomanta shamudu ansianukunawan kunkurikushpankuna Tata Diosta roygarkansapa yanapanankunapa. ³⁷ Chaypina wakakushpankuna Pabluta muchashpa abrasarkansapa. ³⁸ Sukaman llakirkansapa Pablu willaptinkuna mana kutin payta kawanankunata. Chaymanta chay barkukaman pusharkansapa.

21

Pablu Lukaswan Jerusalen llaktaman rirkana.

¹ Ñuka Lukas Pabluwan Efesomanta shamudu wawkinikunata sakishpaynikuna barkupi kuskalla rirkanisapa Kos ishlaman. Chaymanta kayantin Rodas ishlaman rirkanisapa. Chay ishlamanta Patara llaktapi chayarkanisapa. ² Chay Patara llaktapi Fenisia partiman rik barkuta tarish-paynikuna yaykurkanisapa.

³ Chay barkupi riykashpaynikuna Chipre ishlata lluki laduman kawarkanisapa. Chay ishlata pasarkanisapa Siria partiman rinaynikunapa. Tiro llaktapi chayaptinkuna chay barkuta purichik runakuna kargata surkurkansapa. Chay kargata surkunankunakaman ñukaykunaka llaktaman rirkanisapa. ⁴ Chay llaktapi tarirkanisapa Jesusta kreyikmasinikunata. Paykunawan tantalla kanchis diyata kiparirkanisapa. Chaypina Tata Diospa Espiritu yachachiptinkuna paykunaka Pabluta willarkansapa ama Jerusalenman rinanipa.

⁵ Chaymanta chay kanchis diya washan chay llaktamanta llukshirkanisapa. Jesusta kreyikmasinikunaka tukuy warminkunawan wambrankunawan ñukaykunawan yaku mañanman rirkanisapa. Chay yaku mañanpi kunkurikushpaynikuna Tata Diosta roygarkanisapa yanapawanankunapa.

⁶ Chashna orashkaynikunawasha despidinakurkarisapa. Ñukaykuna chay barkupi yaykuptinikuna paykuna wasinkunaman kutirkansapa.

⁷ Chay barkupi Tiro llaktamanta Tolemyada llaktaman rirkanisapa. Chay llaktapi yaykushpaynikuna Jesusta kreyikmasinikunawan rimachinakurkanisapa. Paykunawan suk diyata kiparirkanisapa. ⁸ Kayantin Tolemyada llaktamanta llukshishpaynikuna Sesarea llaktaman rirkanisapa. Chay llaktapi chayashpaynikuna rirkanisapa Felipipa wasinman. Payka Tata Diospa rimananta yachachikuk runa karkan. Payka chay kanchis aklladu diyakonokunamanta suk karkan. Paypa wasinpi kiparirkanisapa. ⁹ Paypa chusku sensilla shipashninkuna tiyarkan. Tata Diospa Espiritu yanapaptinkuna chay chusku shipashninkuna atiparkansapa Tata Dios ruranayananta runakunata willaysapata.

¹⁰ Felipipa wasinpi aypa diyata kaptinikuna Judea partimanta chayarkan suk runa Agabo. Paypish Tata Dios ruranayananta willakuk runa

karkan. ¹¹ Ñukaykunapi Agabo chayashpa Pablupa chumbinta apishpa kikinpa chakinkunata makinkunata watashpwa willarkan:

—Tata Diospa Espiritu kashna riman: Jerusalenpi judiyukunapa kamachikunkinkuna kay chumbipa doyñunta watankasapa. Chaymanta chikan llaktamanta runakunapi kukunkasapa.

¹² Chashna willaptinna ñukaykunaka chay Sesareapi kawsak wawkinukanawan Pabluta roygarkanisapa ama Jerusalenman rinanpa.

¹³ Chaypina Pabluka ayniwarkansapa:

—Kankunaka ¿imapatí wakakushpa llakita kuwankichi? Ñukaka mana watawanankunallapachu risha. Jesusta kreyishkaynirayku wañuchiwanayaptinkunapish Jerusalenman risha chaypi wañuk.

¹⁴ Chashna willawaptinkuna mana atiparkanisapachu michayta. Chaypina willanakurkanisapa:

—Tata Diospa munananta rurachun.

¹⁵ Chayta willashkaynikunawasha Jerusalenman rinaynikunapa prontanakurkanisapa. ¹⁶ Jesusta kreyikmasinikuna Sesarea llaktamanta Jerusalenkaman katiwarkansapa. Paykunaka Naasonpa wasinman pushawarkansapa. Naasonka Chipre llaktamanta kárkan. Aypa watatana payka Jesusta kreyirkán. Chayrayku wasinpi kushikushpa chaskiwarkansapa.

Pablu rirkán Santiagota chapak.

¹⁷ Chaymanta Jerusalenpi chayaptinkuna chaypi kawsak Jesusta kreyikmasinikuna sukaman kushikushpánkuna chaskiwarkansapa.

¹⁸ Chaymanta kayantin ñukaykunawan tantalla Pabluka rirkán Santiagota chapak. Paywan tantalla tukuy ansianukuna karkansapa. ¹⁹ Chaypina Pabluka paykunata rimachishpánkuna parlachirkansapa Tata Dios yanapaptin mana judiyukunata yachachishkankunata.

²⁰ Chashna Pablu parlachiptinkuna paykunaka Tata Diosta alabarkansapa. Chaymanta Pablutáka willarkansapa:

—Allitami, wawkini, rurashkanki. Kunanka kawaykanki aypa waranka judiyumasinchikuna Jesusta kreyikanankunata. Tukuy paykunaka suka-man munansapa Moisespa kamachikunkunata kasunanchikunallata.

²¹ Chaymanta paykunaka uyarishkasapa kanshi chay chikan llaktaku-napi kawsak judiyumasinchikunata chikan layata yachachishkankisapa. Rimansapa kanshi yachachinkisapa amana Moisespa kamachikunkunata kasunankunapana. Uyarishkasapa kanshi yachachikunki amana wambrankunata señalachinankunapa nima amañananchikunata ruranankunapana.

²² Judiyumasinchikuna chay llullatana kreyinsapa. Kunanka ¿imamatí rurashunchisapa? Paykunaka yachansapana shamushkaykita.

²³ Chayrayku ama nimanachishunankunapa kayta ruray: Kay llaktapi chusku runakuna tiyan. Paykunaka shamushkasapa Tata Diosta prometishkankunata ruranankunapa. ²⁴ Kanpish paykunashina ruray.

Chay chusku runakunata saserdoteman pushaysapa animalkunata wañuchishpa Tata Diosta kuyanaykichipa. Tukuy gastunkunata pagarakuy. Chaymanta paykunawan tantalla chukchaykita tipichi. Tukuy chayta ruraptikika judiyumasinchikuna yachankasapa chay rimashushkankunka llulla kananta. Yachankasapa kanpish Moisespa kamachikunkunata kasushpa kawsanaykita.

²⁵ Chaymanta Jesusta kreyik mana judiyu runakunata tukuy yuyaykushkanchikunata ñami killkashkanisapan. Willashkankunata amä mikunankunapa ruradu dioskunata kuyashpa churashkankunka mikunata.

Chaymanta willashkanisapa ama mikunankunapa yawarta nima sipidu animalkunata. Chaymanta willashkanisapa ama chikan warmiwan uchallikunankunapa.

Tata Diospa wasinpi chiknik runakuna Pabluta apirkansapa wañuchinankunapa.

²⁶ Chashna Santiago willaptin Pabluka almitishpa Tata Diospa wasinman chay chusku runakunata pusharkansapa. Chaymanta kayantin paykunawan tantalla Moisespa killkadunpi kamachikushkankunatashina allita mayllanakurkansapa Tata Diospa ñawpakniñpi chuya chuya rikurinkunapa. Chaymanta Pabluka Tata Diospa wasinpi yaykurkan saserdoteta willak kanchis diyakaman prometishkankunata tukuchanankunapa rurayta. Willarkan chay diyapa animalkunata pushanankunata wañuchik Tata Diosta kuyanankunapa.

²⁷ Chaymanta chay kanchisnin diya Asia partimanta shamudu judiyukuna Tata Diospa wasinpi Pabluta kawarkansapa. Paykunaka tukuy judiyumasinkunata turbachishpangkuna Pabluta apirkansapa. ²⁸ Sinchita willarkansapa:

—¡Judiymasinkuna, yanapawaychi! Kay runaka llaktan llaktanpi purishpa ñukanchikunata washanchawashpanchikuna yachachikun Moisespa killkadunpi kamachikunankunata ama kasunanchikunapa. Yachachikun kay Tata Diospa wasin mana alli kananta. Kunanka kay Tata Diospa wasinta susyachishpa mana judiyu runakunata yaykuchishkasa.

²⁹ Chay chatakuk runakunaka suk diyashi Pabluta kawarkansapa Trofimowan Jerusalenpi puriptin. Payka Efesomanta mana judiyu runa karkan. Paywan kawashkankunaryku yuyarkansapa Tata Diospa wasinpi yaykuchishkanta. Chayrayku sukanman sinchita rimakushpa chatakurkansapa.

³⁰ Chayta sinchita rimakuptinkuna uyarishpa Jerusalenpi runakuna sukanman turbakushpangkuna kallparkansapa kawak. Chaypina chay chatakukkuna Pabluta apishpangkuna washaman aysarkansapa. Tata Diospa wasinta kuydak runakuna utkakushpa punkukunata wkichkankansapa. ³¹ Chay chiknik runakuna Pabluta wañuchinayaptinkuna romano soldadukunapa kamachikukninkuna uyarirkan tukuy judiyu runakuna turbakuykanankunata. ³² Chayta uyarishpa tukuy soldadukunata tukuy kapitankunata pushashpangkuna chay turbakuykak runakunaman kallparkansapa. Paykunata kawashpangkuna Pabluta makaykak runakunaka manana makarkansapanachu.

³³ Chaypina chay soldadukunapa kamachikuknin runaka ladunchashpa Pabluta apichichirkan. Soldadunkunata willarkansapa ishkay kadenawan watanankunapa. Chashna watachishkanwasha chay runakunata tapurkansapa:

—Ariya ¿pití kay runaka? ¿Imatati rurashka?

³⁴ Chashna tapuptinkuna sinchita rimakushpa sukkuna suk layata sukkuna chikan layata willarkansapa. Chashna suktu suktu willaptinkuna chay soldadukunapa kamachikukninka mana atiparkanchu entiendiyta imatami willansapa nishpa. Chayrayku soldadukunata willarkansapa kuartelman Pabluta pushanankunapa. ³⁵⁻³⁶ Yaykuna llukanapi chayaykaptinkuna chay chiknik runakuna Pabluta kichukunayashpangkuna sinchita rimakushpa willarkansapa:

—¡Wañuchun! ¡Wañuchun!

Chashna kaparikuptinkuna chay soldadukunaka Pabluta wanturkansapa chay kuartelpa llukananpi churak.

37 Chaypina kuartelman yaykuchinayaykaptinkuna Pabluka soldadukuna napa kamachikunkinta griegopi rimashpa tapurkan:

—¿Atipaymanchu kanwan parlayta?

Chashna tapuptin chay runaka willarkan:

38 —Ariya ¿yachankichu griegopi rimakuya? ¿Manachu kanki Egipotomanta runa? ¿Manachu suk tiempu romano gobiernta mana kasunayashpa tanta-nachishkanki chusku waranka wañuchikuk runakunata chunlla pampaman rinaykichipa?

39 Chaypina Pabluka willarkan:

—Manami paychu kani. Ñukaka judiyu runa Silisia partipi Tarso llaktamanta kani. Chay llaktaynika alli riksidumi. Kunanka roygayki almiti-wanaykipa kay runakunata parlachinaynipa.

40 Parlachinankunapa almitiptinna kuartelpa llukananpi Pabluka sharyishpa tukuy chay runakunata makinwan señasta rurashpa upallay-achirkansapa. Chashna upallayaptinkuna kikin hebreo rimanankunapi willarkansapa:

22

1 —Wawkinikuna, tataynikuna, uyarivaychi amachanakushpa willaptini.

2 Chay runakuna uyarishpankuna kikinkunapa rimanankunapi Pablu rimakuptin ashwanta chunllayarkansapa. Chashna chunllayaptinkuna Pabluka willarkan:

3 —Ñukaka judiyumasikichimi kani. Silisia partipi Tarso llaktapi nasirkani. Kay Jerusalenpi wiñarkani. Alli yachachikuk Gamayel ñawpa awilunchikunapa yachachikuskankunata yachachiwarkan. Kunanka kankuna sukaman Tata Diosta kuyanaykichishina ñukapish tukuy shunku Tata Diosta kuyani. **4** Ñawpa tiempu Jesuspa mushuk laya yachachikunanta kreyik runakunata wañuchichinayashpayni sukaman sufriquirkanisapa. Ullukukunata warmikunatapish apichishpa pusharkanisapa karselpi churak. **5** Saserdote kunapa kamachikunkin tukuy ansianukunawan yachansapa chashna sufriquiskaynikunata. Paykunaka kartakunata kuwarkansapa Damasko judiyumasinchikunaman apanaynipa. Chay kartakunapi willarkansapa almitiwanankunapi Jesusta kreyik runakunata kay Jerusalenman pushamunaynipa kastiganankunapa.

Pablu willarkansapa imashnami kallarirkan Jesusta kreyiyta nishpa.

(Hch 9.1-19; 26.12-18)

6 Pabluka parlachikuyllapi katirkan:

—Chashna kartakunata chaskishpayni Damasko llaktaman rirkani. Chay llaktapi chayanayaykaptini chawpi diyata sielumanta ñukapi suk sinchi lus llipyarkan. **7** Chay sinchi lusta kawashpa allpakaman urmarkani. Chaypina uyarirkani willawaptin: “Saulo, Saulo ¿imapati chikniwashpa sufriquiwaykanki?”

8 Chashna willawaptin tapurkani: “¿Pití kanki, Señor?” Payka willawarkan: “Ñukaka Nasaret llaktamanta Jesusmi kani. Ñukatami chikniwashpa sufrichiwaykanki.”

9 Chashna willawaptin ñukawan purik runakuna mana entiendirkansapachu parlachiwashkan rimanata. Paykunaka chay sinchi lusta kawashpankuna sukaman manchakurkansapa.

10 Chashna Jesus willawaptin tapurkani: “Señor ¿imatati munanki runaynipa?” Payka willawarkan: “Atarishpa Damaskoman rillay. Chaypi suk runa yachachishunki imatami ruranki nishpa.”

¹¹ Chaypina chay sinchi lus biskuyachiwashkanrayku manana nima kawakuya atiparkaninachu. Chayrayku chay purikmasinikuna makini-manta apiwashpa Damaskoman pushawarkansapa.

¹² Chay llaktapi suk runa Ananiyas kawsarkan. Paymi Tata Diosta kuyak runa karkan. Moisespa kamachikunankunata allita kasushpa kawsak. Chayrayku tukuy chay llaktapi kawsak runakuna rimarkansapa alli rurak runa kananta.

¹³ Ananiyaska shamurkan ñukata kawawak. Chayashpa willawarkan: "Wawkini Saúlo, kunanlla atipanki kawakuya." Chayta willawashkan orana allita kawakushpa payta kawarkani. ¹⁴ Chaypina payka willawarkan: "Awilunchikunapa Tata Diosnini kanta akllashushka paypa munananta yachanaykipa. Akllashushka chay alli rurak Jesusta kawanaykipa. Chaymanta akllashushka Jesus rimaptin uyarinaykipa. ¹⁵ Chashna Jesus yachachishuptiki tukuy kawashkaykita uyarishkaykita tukuy partipi kawsak runakunata parlachinayki tiyan. ¹⁶ Kunanka utkakushpa atariy. Rillay bawtisakumuy. Chashna bawtisakushpayki Señorninchi Jesusta roygay tukuy uchaykimanta mayllashunarpa."

¹⁷ Chayta Ananiyas willawashkanwasha Damaskomanta Jerusalenman kutimushpayni rirkani Tata Diospa wasinpi orak. Chaypi muskuyninipishina Señor Jesukristuta kawarkani. ¹⁸ Chaypina payka willawarkan: "Utkakushpa Jerusalenmanta llukshiy. Ñukata riksiwanaykita parlachikup-tiki kaypi kawsak runakuna mana kreyishunkisapachu."

¹⁹ Chashna willawaptin ñukaka willarkani: "Señor, paykunaka yachansapa ñuka tantanakunankuna wasikunapi yaykushpayni kanta kreyishuk runakunata apichichishpa makachishpa karselman pushachishkaynikununa. ²⁰ Chaymanta rimanaykita yachachikuk Estebanta wañuchiykaptinkuna ñukapish yuyarkani allimi wañuchinankunapa. Chay wañuchishkankuna oras chay wañuchikuk runakunapa sawa llachapankunata kuydarkani. Kay llaktapi kawsak runakuna tukuy chayta yachashpangkuna kreyinkasapa chikan layatana kawsaykanaynita."

²¹ Chashna willaptini Señor Jesukristu willawarkan: "Utkakushpa rillay. Ñukaka kachayki karu llaktakunapi mana judiyu runakunata yachachikuk rinaykipa."

Chay runakuna Pabluta yaka makarkansapa.

²² Chay runakunaka Pablupa rimashkanta upallalla uyarirkansapa. Chaypina mana judiyu runakunaman rinanpa willaptin kallarirkansapa sinchita rimakyuta:

—Mana munanisapachu kay runa kawsanarpa. ¡Wañuchiichi!

²³ Chay runakuna kaparikuylapi katishpankuna sukaman piñakushpa llachapankunata wishchukurkansapa. Allpata apishpa altuta wishchukurkansapa. ²⁴ Chashna chay runakuna ashwanta piñakuptinkuna chay kuartelpi kamachikukka soldadunkunata willarkansapa Pabluta yaykuchinankunapa. Chaymanta willarkansapa Pabluta makanankunapa rimanarpa imaraykumi chataykansapa nishpa.

²⁵ Chashna makanankunapa wataptinkuna Pabluka chaypi shayaridu kapitanta tapurkan:

—¿Pítí willashushka ñukata makawanaykichipa romano runa kaykap-tini? Mana allihu makawanaykichipa manara allita yachaykashpaykichira uchayukchu kani manachu nishpa.

²⁶ Chashna Pablú willaptin chay kapitanka kamachikninta rirkán willak:

—¿Imapati kay runata makachichinayaykanki? Payka romano runami.

27 Chashna chay kapitan willaptin chay kamachikukka Pablutaka ladun-chashpa tapurkan:

—Ariya ¿romano runachu kanki?

Pabluka aynirkan:

—Ariya, romano runami kani.

28 Chaypina chay kamachikukka willarkan:

—Ñukaka aypa kullkita pagarakushkani romano runa kanaynipa.

Pabluka aynirkan:

—Ñukaka nasishkaynimantapacha romano runa kani.

29 Chashna willaptin tukuy chay makanayaykak soldadukunaka ladun-manta anchurkansapa. Chay kamachikukninpish romano runa kananta yachashpa watachishkanrayku manchakurkan.

Judiyukunapa kamachikukninkuna Pabluta chatarkansapa.

30 Chay romano kamachikukka allita yachanayarkan imapami judiyu runakuna Pabluta sukaman chatashkasapa nishpa. Chayta yachanayashpa kayantin Pabluta kadenankunawan watadu kashkanmanta kacharichirkan. Chaymanta tukuy judiyukunapa kamachikukninkunata tukuy saserdoteckunapa kamachikukninkunawan tantanachirkansapa. Chaypina Pabluta pushashpa paykunapa ñawpakininkunapi churarkan.

23

1 Chaypina Pabluka chay judiyu kamachikukkunata chapashpa willarkansapa:

—Wawkinikuna, Tata Diospa ñawpakinipi ñukaka yuyanakuni kunaman allita rurashpalla kawsaykanaynita.

2 Chashna Pablu willaptin saserdoteckunapa ashwan sinchi kamachikuknин Ananiyas sukaman piñakurkan. Pablupa ladunpi runakunata willarkan shiminpi lapyanankunapa.

3 Chayta uyarishpa Pabluka willarkan:

—Tata Diосmi kanta kastigashunki llullakuk runa kaptiki. Kanka al-lipi tukushpa chaypi tiyaridu kanki Moisespa kamachikunankunatashina willawanaykipa uchaynipichu kani manachu nishpa. Kunanka chaykunata mana kasushpayki willaykankisapa shiminipi lapyawanankunapa.

4 Chashna Pablu willaptin ladunpi runakuna willarkansapa:

—¿Imapatí Tata Dios churashkan saserdoteckunapa kamachikukninta rabayachinki?

5 Chashna willaptinkuna Pabluka aynirkan:

—Wawkinikuna, perdonawaychi. Mana yachashkanichu saserdoteckunapa kamachikuknин kananta. Tata Diосpa killkadunpi willawanchi: “Ama llaktaykichipa kamachikuknichita maldisiychichu.”

6 Pabluka chay awtoridarkunata chapashpa riksirkansapa sukkuna saduseo kanankunata sukkuna fariseo kanankunata. Chaypina sinchita willarkansapa:

—Wawkinikuna, ñukaka fariseo runami kani. Tatayni awiluynikunapish fariseo runakunami karkansapa. Ñukaka tukuy shunku kreyini Tata Dios wañudukunata kawsachimunanta. Chayrayku kunanka kay awtoridarkunapi chatawaykankichi.

7 Chashna Pablu willaptin fariseo runakunaka saduseo runakunawan kallarirkansapa ayninakuyta. Chaypina ishkay manadapina churanakurkansapa.

⁸ Saduseo runakuna rimansapa wañudukuna mana kawsamunankunata. Rimansapa mana nima angelkuna nima almanchipish tiyananta. Fariseo runakuna rimansapa almayuk kashpanchikuna wañushpanchikuna kashkan kawsamunanchikunata. Rimansapa angelkunapish tiyananta.

⁹ Chashna sukaman ayninakuptinkuna Moisespa killkadunkunata yachachikuk fariseokuna shayarishpangkuna willarkansapa:

—¡Kay runaka manami nima mana allita rurashkachu! Ichará muskuyn-inpi suk wañuduta suk angelta uyarirkan willaptin.

¹⁰ Chaywan ashwanta rabyachinakuptinkuna chay romano kamachikukka sukaman manchakurkan. Yuyarkan Pabluta tipi tipita ruranankunata. Chayrayku chay soldadunkunata willarkansapa Pabluta kichukushpangkuna kuartel ukupi churanankunata.

¹¹ Chay tuta muskuyninpi Jesukristu Pabluta rikurirkan willanarpa: “Ama manchakuychu, Pablú. Kan Jerusalempi allimata rimashkanki ñuka salvakuk kanaynita. Roma llaktapipish chayllata rimanayki tiyan.”

Chiknik runakuna sukaman munarkansapa Pabluta wañuchiyta.

¹² Chaymanta kayantin Pabluta chiknik runakuna parlanakurkansapa wañuchinankunata. Chashna parlanakushpangkuna jurashpa willanakurkansapa Pabluta wañuchinankunakaman mana nimata mikunankunata nimata upyanankunata. ¹³ Chay wañuchinayak runakuna chusku chunka ashwan karkansapa.

¹⁴ Chaypina paykunaka saserdotekunata kamachikukninkunaman judiyukunata ansianunkunaman rishpangkuna willarkansapa:

—Ñukaykunaka jurashkanisapa Pabluta wañuchinaynikunakaman mana nimata mikuya. ¹⁵ Kunanka shamushkanisapa roygaknikichi yanapawanaykichi. Kankuna tukuy kamachikukmasikichiwan chay romano kamachikukta roygaychi kaya Pabluta kankunaman pushamunankunata. Willaychi shamuptin ashwanta yachananchikunata imakunatami yachachikun nishpa. Ñukaykuna shuyashasapa manara kankunapi chayamuptin wañuchinaynikunata.

¹⁶ Chashna chay wañuchinayak runakuna willaptinkuna Pablupa paninpa wayna wawan uyarirkan. Chaypina chay kuartelman rirkana Pabluta willak.

¹⁷ Chaypina tukuyta willaptinna Pabluka suk kapitanta kayashpa willarkan:
—Kay waynituta pushay kamachishukníkichi. Paymi suk uyarishkanta willanka.

¹⁸ Chashna willaptin chay kapitanka Pablupa sobrinunta pushashpa kamachikukninta willarkan:

—Chay wichadu runa Pabluka kayawashpa willawashka kay waynituta kanman pushamunaynipa. Payka suk uyarishkanta munan willashuynikita.

¹⁹ Chashna willaptin chay kamachikuk runaka Pablupa sobrinunta mak-inmanta apishpa suk laduman pusharkan. Chaypina tapurkan:

—¿Imatati munanki willawayta?

²⁰ Chashna tapuptinna willarkan:

—Pabluta chiknik runakuna parlanakushkasapa shamenankunata willashuk kaya judiyukunata sinchi kamachikukninkunaman Pabluta pushachinaykipa. Willashunkisapa ashwan allita yachanayanankunata imatami Pablo yachachikun nishpa. ²¹ Chashna paykuna willashuptinkuna ama kreyikichi. Chusku chunka ashwan runakuna ñanpi pakakushpa shuyankasapa wañuchinankunata. Paykuna jurashkasapa mana nimata

mikuyta nimata upyayta Pabluta wañuchinankunakaman. Kunanka almitikunaykillatana shuyakansapa.

22 Chayta willaptinna chay kamachikukka kacharkan wasinman kutinpana. Willarkan ama ni pita chay willashkanta parlachikunpana.

Romano gobernador Felixman Pabluta pushachirkan.

23 Chaymanta chay romano kamachikukka ishkay kapitankunata kayashpa willarkansapa:

—Prontanachiychi ishkay pachak purishpa rik soldadukunata, kanchis chunka kaballukunapi rikkunata, ishkay pachak lansakunata apik soldadukunatapish. Prontanachiychi allita tutayaptin Sesarea llaktaman rinankunapa.

24 Chaymanta willarkan kaballuta aparejananpa Pablu montashpa rinpana. Willarkansapa Pabluta allita kuydashpa chay romano gobernador Felixman pushanankunapa.

25 Chaymanta suk kartata paykunawan kacharkan. Chay kartapi kashna rimarkan:

26 “Munanayni awtoridar Felix, ūuka Klaudio Lisias sukaman rimachiyki. **27** Kaypi kawsak judiyu runakuna kay pushachiyanayni runata apishpa wañuchinayarkansapa. Chashna wañuchinayaptinkuna yachashkani romano runa kananta. Chayrayku soldaduynikunawan rishkani kichukuk ama wañuchinankunapa. **28** Chaypina imaraykumi sukaman chatansapa nishpa yachanayashpayni judiyukunapa kamachikukninkunaman pusharkani. **29** Chaypina yacharkani paykunapa kamachikunkunakunata mana kasushkanrayku chatanankunata. Chashna sukaman chataptinkunapish ūukaka yuyarkani kay runaka mana nima uchayuk kananta wañuchinaynikunapa nima karselpi churanaynikunapa.

30 Chaymanta yacharkani chay chiknik runakuna parlanakushkankunata wañuchinankunapa. Chayrayku kanman kachaykani. Chay wañuchinayak runakunata willashkanisapa kanman rinankunapa chatakuk. Chayllata killkashkayki.”

31 Chay tuta chay soldadukuna chay kartata apashpa Pabluta pusharkansapa Antipatris llaktapi puñuk. **32** Kayantin chay purishpa rik soldadukuna kuartelman kutirkansapa. Chaymanta kaballupi rik soldadukunalla Pablutan rirkansapa.

33 Sesarea llaktapi chayashpankuna chay kartata gobernadorta kurkansapa. Pablutapish paypi kukurkansapa. **34** Chaypina chay awtoridarka chay kartata leyishpa tapurkansapa maymantami Pabluka nishpa. Willaptinkuna Silisia partimanta kananta Pabluta willarkan:

35 —Chay chatashuk runakuna shamuptinkunara kantapish tapushkayki yachanaynipa uchayukchu kanki manachu nishpa.

Chayta willashpa soldadunkunata willarkansapa allita kuydashpa kamachikuk Herodespa manllayba wasinpi wichkanankunapa.

24

Pablu gobernadorta willarkan mana uchayuk kananta.

1 Pablu chayashkanmanta pichkaynin diya saserdotekunapa kamachikuknин Ananiyaska Sesarea llaktapi chayarkan. Suk ansianukunawan tantalla suk abogado runa Tertulowan tantalla rirkansapa. Tukuy paykunaka gobernadorpi chayarkansapa Pabluta chatanankunapa. **2** Chaypina soldadukuna Pabluta gobernadorpi

chayachiptinkuna chay abogado Tertulo kallarirkan Pabluta chatayta. Chay gobernador Felixtaka willarkan:

—Sukaman agradesiykisapa kay llaktaynikunapi kushikushpa allillata kawsaykashpaynikuna. Kanka yachaysapa runa kashpayki llaktaynikunapi alli yanapakuk awtoridarnin kanki.³ Chashna yanapawaptikisapa, munanayni gobernador Felix, tukuy tiempu tukuy llaktaynikunapi suka-man agradesiykisapa.

⁴ Kunanka ama sukaman unayachinaynipa roygayki suk ratitura uyariwanaykipasapa. ⁵ Ñukaykuna allita yachanisapa kay runa iden pestishina tukuy mayta purishpa judiyukunata turbachiyananta. Payka chay nasareno runakunapa yachachikninkunami. ⁶ Chaymanta ñukaykunapa kamachikunaynikuna willawansapa ama Tata Diospa wasinpi mana judiyu runakuna yakyunkunapa. Chashna kaptinpish kay runaka suk mana judiyu runata yakyuchinayarkan. Chayta ruraptin paytaka apishkanisapa kastiganaynikunapa. ⁷ Chaypina chay kamachikuk Lisias aypa soldadunkunawan chayashpa makinikunamanta kichuwashkasapa. ⁸ Chashna kichuwashpankuna willawarkansapa shamunaynikunapa kanpi chatakuk. Kikiki payta tapushpa yachanki mana llullakushpa chafashkaynikunata.

⁹ Chashna Tertulo willaptin chay tukuy chatakuk runakuna willarkansapa chashna kananta.

¹⁰ Chaypina chay gobernadorka Pabluta makinwan señasta rurashpa willarkan rimakunanza. Chashna willaptin Pabluka willarkan:

—Señor awtoridar, yachani aypa watakunata alli awtoridarninikuna kanaykita. Chayrayku kushikushpa mana manchakushpa willayki mana uchaynipi kanaynita. ¹¹ Kikiki tapukushpa yachankiman chayrak chunka ishkay diyallara Jerusalenpi chayashkaynita Tata Diosta kuyak. ¹² Ñuka mana Tata Diospa wasinpi nima tantanakunankuna wasikunapi ni piwan ayninakushkanichu. Mana ni maypi runakunata tantanachishkanichu turbachinaynikunapa. ¹³ Kay chatawak runakuna mana ni maypi kawawashkasapachu nima uyariwashkasapachu ni piwan ayninakuptini.

¹⁴ Chaymanta willayki Moisespa kamachinankunata ñawpa yachachikkunapa killkadunkunata kreyini. Chaymanta awiluynikunapa Tata Diosninllata kuyashpa kawsaykani. Chashna Tata Diosta kuyashpayni Jesukristupa yachachikunantapish kreyini. Chay chatawak runakunaka rimansapa Jesukristupa yachachikunan llulla kananta. ¹⁵ Chaymanta paykunashina ñukapish kreyini Tata Dios tukuy alli rurak mana alli rurak runakunata wañushkankunamanta kawsachimuwananchikunata. ¹⁶ Chayrayku Tata Diospa ñawpknipri runamasinikuna ñawpkninkunapish sukaman munani shunkuynipi mana nima mana allikuna tiyananpa.

¹⁷ Aypa watakunata karu llaktakunapi purishkayniwasha Jerusalenman kutishkani animalkunata wañuchishpa Tata Diosta kuyak. Rishkani mana nimayukkunata ofrendata kushpa yanapaksapa. ¹⁸ Tata Diospa chuya chuyata ríkurinaynipa Moisespa kamachikunankunata kasushpa allita mayllanakushkani. Mana aypa runakunawanchu karkani. Mana ni pita turbachiykashkanichu. Tata Diospa wasinpi kaptini Asia partimanta judiyu-masinikuna tariwarkansapa.

¹⁹ Alli kanman chay runakuna shamenankunapa chatawak ima mana allitami rurashkani nishpa. ²⁰ Paykuna mana shamuptinkunaka kay runakuna willashuchunsapa chay kamachikukninkunaka ima uchatami ñukapi tarishkasapa nishpa. ²¹ Chay kamachikukninkunapi kashpayni sinchita rímarkani: “Kankuna chatawaykankichi ñuka kreýiptini Tata Dios tukuy

wañudu runakunata kawsachimunanta.” Ichará chayta rimashkaynirayku chatawaykansapa.

²² Chashna Pablo willaptin chay awtoridar Felixka mana munarkanchu ashwanta uyariyta. Jesukristupa yachachikunankunata allitana yacharkan. Chayrayku chay chatakuk runakunata willarkansapa:

—Chay kamachikuk Lisiás shamushpa allita willawanka imatami Pabluka rurashka nishpa. Chaypira atipasha willaya uchayukchu manachu nishpa.

²³ Chashna chay runakunata willashpa suk kapitanta willarkan Pabluta mana watashpa kashkan karselpi churananpa. Chaymanta willarkan Pablupa amigúnkuna shamuptinkuna yaykuchinanpa yanapanankunapa.

²⁴ Chaymanta chay gobernador Felix chay llaktamanta llukshishpa aypa diyakuna washan warmin Drusilata pushamushpa kutimurkan. Payka judiya warmi karkan. Chaypina Pabluta kayachirkán shamananpa paykunawan parlak. Pablo shamushpa allita yachachirkansapa Jesukristuta kreyishpa kawsanankunapa. ²⁵ Chaypina yachachirkansapa allita rurashpa mana munanankunallata rurashpa kawsanankunapa. Yachachirkansapa Tata Dios tukuy mana alli rurak runakunata kastiganankunata. Chayta uyarishpa Felixka sukaman manchakushpa willarkan:

—Mananami uyarinayaykinachu. Suknin diya atipashpayni kashkan kayachishkayki yachachiwanaykipa.

²⁶ Chayta willashpa Felixka munarkan Pablo kullkita pagarapting kacharichinanpa. Chayrayku kuti kuti kayachik paywan parlananpa.

²⁷ Ishkay watata chay karselpi Pabluka kiparirkan. Chaypina Felixka manana gobernadornachu karkan. Porsio Festo chayarkan gobernador kananpa. Chashna Felix llukshishpa Pablutaka karselpi sakirkan judiyu runakunata kushichinayashpa.

25

Gobernador Festopi Pabluta chatarkansapa.

¹ Roma llaktanmanta Sesareapi Festo chayamushpa yaykurkan mushuk awtoridar kananpa. Chaypina kimsayn diya washan Jerusalenman rirkan.

² Jerusalenpi chayaptin saserdotekunapa kamachikunkinkuna, judiyu runakunapa ansianunkuna rirkansapa Festopi Pabluta chatak. ³ Paykunaka payta sukaman roygarkansapa Jerusalenman Pabluta pushachinanpa. Yu-yarkansapa pushachiptin ñanpi shuyashpa wañuchinankunapa. ⁴ Chashna roygaptinkuna Festoka willarkansapa:

—Pabl Sesareapi preso kashpa chayllapi kiparinan tiyan. Ñukaka yuyaykani mana unayashpa chayman kutiyta. ⁵ Chayrayku kankunapa kamachikunkikichi ñukawan tantalla rinkasapa. Chay runa suk mana alli ruranata rurashka kaptinka chaypi chatankichi.

⁶ Chaymanta Festo Jerusalenpi pusak diya ashwanta kiparirkan. Chaymanta Sesareaman kutirkan. Kayantin rirkan kamachikunan tiyari-nanpi tiyarik. Chaypi tiyarispa Pabluta pushachimurkan. ⁷ Chaypina Pablo yaykuptin chay Jerusalenmanta shamudu judiyu runakuna payta ladunchashpa sukaman chatarkansapa mana alli rurak runa kananta. Chashna chatakushpankunapish mana atiparkansapachu niman suk mana alli rurashkanta tariyta.

⁸ Chaypina Pabluka Festota willarkan:

—Ñukaka mana nima mana alli ruranata rurashkanichu. Mana ni pita yachachishkanichu Moisespa kamachikunankunata ama kasunankunapa. Mana ni pita yachachishkanichu Tata Diospa wasinpi mana allikunata

ruranankunapa. Mana nimapi chay ashwan sinchi romano kamachikukta rabyachishkanichu.

⁹ Chashna willaptin Festoka judiyu runakunata munashpa kushichiysapata Pablutaka tapurkan:

—¿Munankichu Jerusalenman riya chaypi ashwan allita tapunaynipa uchaykipichu kanki manachu nishpa?

¹⁰ Chashna tapuptin Pabluka willarkan:

—Chay ashwan sinchi romano kamachikuk kanta churashushkanki awtoridar kanaykipa. Chayrayku kanlla willawanayki tiyan uchayukchu kani manachu nishpa. Allita yachanki judiyumasinikunata mana ni-manachishkaynikunata. ¹¹ Wañunapa laya uchata rurashka kaptinika wañuchiwachunsapa. Mana uchaynipi kaykaptinika mana allichu judiyumasinikunapi kukuwanaykipa. Chayrayku roygayki chay ashwan sinchi kamachikuk Sesarman kachawanaykipa. Paymi tapuwashpa willawanka uchayukchu kani manachu nishpa.

¹² Chashna Pablu willaptin Festoka yanapakninkunawan parlashkan-washa willarkan:

—Rogyawashkanki Roma llaktapa ashwan sinchi kamachikuk Sesarman kachanaynipa. Chayrayku payman kachayki.

Festo ashwan sinchi kamachikuk runa Agripawan parlarkan.

¹³ Chaymanta aypa diyakuna washan Sesareapi sinchi kamachikuk Agripa chayarkan. Payka panin Bernisewan rirkansapa Festota pasyak.

¹⁴ Chaypina suk diya Festoka Agripata parlachirkan chay llaktapi Pablu preso kananta. Willarkan:

—Kaypi tiyan gobernador Felix sakishkan preso runa. ¹⁵ Jerusalenman riptini saserdote kunapa kamachikunkunawan judiyukunapa ansianunkuna ñukapi chay runata chatarkansapa. Roygawarkansapa uchayuk kaptin wañuchichinaynipa. ¹⁶ Chashna roygawaptinkuna willarkanisapa: “Ñukaykuna romano awtoridarkuna mana amañanisapachu ni pita wañuchichiyta mana allita yakashpa uchayukchu manachu nishpa. Chayrayku ñukaykunapi tukuy chatadu runakuna chatak runakunawan uya uya ayninakunankuna tiyan. Chaypira chay chatadu runa atipan amachanakuya rimashpa mana uchayuk kananta.”

¹⁷ Chashna chay runakunata willaptinkuna kayman shamurkansapa. Kayantin ñukaka rishkani kamachikunayni tiyarinaynipi tiyari. Chaypi tiyarishpayni chay chatadu runataka pushachimurkani. ¹⁸ Ñukaka yuyashkani sakra mana allikunata rurashkanta. Chaykamanka chay chatakuk runakuna mana yuyashkayni layatachu chatarkansapa. ¹⁹ Paykunaka willawashkasapa Tata Diosta kuyashpa amañashkankunata mana rurashkanta. Chaymanta chatashkasapa Pablu yachachikunanta chay wañudu Jesus kawsamushkanta.

²⁰ Chashna chataptinkuna ñukaka mana yachashkanichu imatami rurasha nishpa. Chayrayku Pabluta tapushkani: “¿Munankichu Jerusalenman riya chaypi willanaynipa uchayukchu kanki manachu nishpa?”

²¹ Chashna tapuptini payka roygawashka Romapi ashwan sinchi kamachikunkinchikunaman kachanaynipa. Chashna roygawaptin ñukaka karselpiwichkachishkani Romaman kachanayni diyakaman.

²² Chaypina kamachikukmasin Agripaka Festota willarkan:

—Ñukapish uyarinayani chay runa rimakuptin.

Chashna willaptin Festoka aynirkan:

—Kayami uyarkin.

²³ Kayantin chay kamachikuk Agripaka panin Bernisewan tantalla chayarkansapa. Chay kamachikukan wasipi soldadukunapa kamachikukninkuna tukuy chay llaktapa awtoridarninkunapish musikawan marchaypi yaykurkansapa. Chaypi yaykuptinkunana Festoka Pablutaka pushachimurkan. ²⁴ Chaypina Festoka willarkan:

—Kamachikukmasini Agripa, tukuy kaypi ñukaykunawan tantalla runakuna, kaypinami kay chatadu runaka. Jerusalen llaktapi kay Sesarea llaktapipish tukuy judiyu runakuna ñukapi sukaman payta chatakunsapa. Kuti kuti sinchita káparikushpa roygawashkasapá wañuchichinaynipa.

²⁵ Ñukaka mana paypi tarinichu wañuchichinaynipa laya uchanta.

Chaymanta kikin roygawashka ashwan sinchi kamachikukninchí Sesaman kachanaynipa. Payman rinayan willananpa uchayukchu manachu nishpa. Chashna roygawaptin yuyani kachayta. ²⁶ Sesaman kachasha suk kartawan. Kunanka mana yachanichu imatami killkasha nishpa. Chayrayku kankuna, kamachikukmasinikuna, kan kamachiwaknini Agripa, yanapawaychi. Ichará kankuna tapushpa atipankichiman suk imata tariyta ñuka killkanaynipa. ²⁷ Mana atipaymanchu suk preso runata kachayta mana willashpa imaraykumi chatakudu nishpa.

26

Pablu chay kamachikuk Agripata willarkan ima layatami kawsashka nishpa.

(Hch 9.1-19; 22.6-16)

¹ Chashna Festo willaptin Agripaka Pablutaka willarkan:

—Kunan willawaysapa imapami sukaman chatashunkisapa nishpa.

Chashna willaptin Pabluka makinta alsashpa willarkan:

² —Kamachiwaknini Agripa, kan munaptiki rimakunaynipa sukaman kushikuni. Judiyumasinikuna rikchak layata chatawashkasapa. Kunan willayki llullakushpa chatawashkankunata. ³ Kanka judiyukuna amañanaynikunata allita yachanki. Chaymanta yachanki imakunapami ayninakunisapa nishpa. Chayrayku roygayki allillapi uyariwanaykipa.

⁴ Tukuy judiyumasinikuna yachansapa wayna kashkaynimantapacha llaktaynipi Jerusalenpipish allita kawsashkaynita. ⁵ Chaymanta allita yachansapa fariseo runa kanaynita. Paykuna munashpa atipanmansapa chayta willashuyta. Tukuy pi yachan fariseokuna tukuy judiyu runakunamanta Moisespa kamachikunankunata ashwan allita kasunaynikunata.

⁶ Ñawpa tiempu Tata Dios awiluynikunata willarkan tukuy wañudukunata kawsachimunankunata. Ñukapish chayta kreyini. Chayta kreyishkaynirayku judiyumasinikuna chatawaykansapa. ⁷ Chay chunka ishkay ñawpa awiluynikunamanta mirashkan judiyu runakuna shuyaykanisapa Tata Dios chay willawashkankunata rurananpa. Chashna shuyashpaykuna diyapi tutapi Tata Diosta kuyashpa kawsanisapa. Ñuka Tata Dios willawashkanta kreyiptini, kamachiwaknini Agripa, kunanka kay judiyumasinikuna chatawaykansapa. ⁸ ¿Imapatí yuyankichi Tata Dios mana atipananta wañudu runakunata kawsachimunanta?

⁹ Ñawpa ñukapish yuyarkani alli kananta Nasaretmanta Jesusta kreyik runakunata sufrichinaynikunapa. ¹⁰ Chashna yuyashpayni Jerusalenpi Jesukristuta kreyik runakunata sufrichirkani. Chaymanta saserdotekunapa kamachikukninkuna almitiaptinkuna Jesukristuta kreyik runakunata aypata karselpi wkichkachirkani. Chaymanta kreyikuk runakunata wañuchinayaptinkuna ñukapish rimarkani allimi wañuchinankunaka.

11 Aypa kuti tantanakunankuna wasikunapi chay kreyikuk runakunata makachirkanisapa rimanankunapa Jesus mana allí rurak kananta. Chaymanta sukaman piñakushpayni rirkani chikan llaktakunapipish chay runakunata sufrichiksapa.

12 Chaymanta saserdote kunapa kamachikukninkuna kachawaptinkuna Damaskoman riykarkani chay Jesukristu kreyik runakunata sufrichinaynipasapa. **13** Chaypina, kamachiwaknini, chay ñanpi riykashpayni chawpi diyata sielumanta sinchi llipyak lusta kawarkani. Chay luska intimanta ashwan sinchita llipyashpa ñukapi ñukawan riykakmasinikunapipish llipyarkan. **14** Chayta kawashpaynikuna tukuy ñukaykuna allpakaman urmarkanisapa. Chaypina uyarirkani hebreo rimanaynikunapi willawaptin: “Saulo, Saulo ¿imapatí ñukata sukaman sufrichiwaykanki? Chashna sufrichiwashpayki suk toro puntayuk kaspita aytaykakshina kikikilla wakllichinakuykanki.”

15 Chayta uyarishpa tapurkani: “¿Pití kanki, Señor?” Chaypina ayniwardan: “Ñukami kani sufrichiwanayki Jesus. **16** ¡Kunandilla atarimuy! Ñukaka kanpi rikurishkani sirviwanaykipa. Tukuy runakunata kaypi kawashkaykita willanayki tiyan. Chaymanta tukuy kawachinaynita tukuy pita parlachinayki tiyan. **17** Kunanmantapacha tukuy judiyumasikunamanta mana judiyukunamantapish kuydashkayki ama wañuchishunankunapa. **18** Mana judiyu runakunaman kachashkayki luspishina purinankunapa amana tutapishina kawsanankunapan. Paykunaman kachashkayki yachachikunaykipa Tata Diosllata kasushpa kawsanankunapa amana chay sinchi supayta kasushpana kawsanankunapan. Chaymanta yachachikunayki tiyan ñukata kreyiwanankunapa. Chashna ñukata kreyiwaptinkuna Tata Dios uchankunamanta perdonankasapa mana tukuy niyukta paywan tantalla kawsanankunapa.”

19 Chashna sielumanta Jesukristu willawaptin, kamachiwaknini Agripa, ñukaka chay willawashkanta kasushkani. **20** Primeruka Damasko llaktapi kawsak runakunata yachachirkanisapa Jesus salvakuk runa kananta. Chaymanta Jerusalenpipish, tukuy Judea partipipish judiyu runakunata, mana judiyu runakunata yachachirkanisapa. Willarkanisapa uchankunamanta wanashpa Tata Diosta kasushpa kawsanankunapa. Yachachirkanisapa allita rurashpa kawsanankunapa tukuy runakuna yachanankunapa Tata Diosta kreyinankunata.

21 Chashna yachachikuptini chay chikniwak judiyumasinikuna Tata Diospa wasinpi apiwashpa wañuchiwanayarkansapa. **22** Chashna wañuchiwanayaptinkunapish Tata Dios yanapawaptin kunankaman mana shaykushpa katinilla. Tukuy runakunata, kamachikukkunata, mana kamachikukkunatapish yachachiypi katini. Moiseska ñawpa yachachikuk runakunapish killkarkansapa imatami Tata Dios ruranka nishpa. **23** Killkarkansapa Tata Diosmanta shamudu runa sukaman sufriñsha wañunanta chaymanta wañushkanmanta kawsamunanta. Manara ni pi wañushkanmanta kawsamuptinra paymi kawsamurkan amana kutin wañunarpa. Paymi kawsamurkan judiyu runakunata mana judiyu runakunatapish willanankunapa mana alli rurashkankunamanta perdonanankunata. Tukuy chayllata ñukaka yachachikuni.

Pabluka munarkan chay kamachikuk Agripa Jesukristuta kreyinanza.

24 Pablucha chayta willaptin chay kamachikuk Festoka sinchita willarkan:

—¡Dementumi kanki, Pablú! Sukaman yachakushpayki demen-tuyashkanki.

25 Chashna Festo willaptin Pabluka willarkan:

—Alli kamachiwaknini Festo, manami dementuchu kani. Allita yuyaykushpayni kuskata willayki. **26** Kaypimi judiyukunapa kamachikuknikuna Agripa. Paymi allita yachan tukuy willashkanayni chashna kashkanta. Mana kuchupi pakakushpachu Jesusta wañuchirkansapa. Chayrayku paypa ñawpaknini mana nima manchakushpa rimani. **27** Kamachiwaknini Agripa ¿chay ñawpa yachachikukkuna yachachikushkanta kreyinkichu? Ñuka allita yachani kreyikunaykita.

28 Chashna Pablú tapuptin Agripaka aynirkan:

—Kan tipillata yachachiwashpayki ¿yuyankichu Jesukristuta kreyinaynita?

29 Chashna Agripa willaptin Pabluka aynirkan:

—Tipitapish aypatapish yachachishpayni munayman ñukashina kreyiku-naykipa. Munayman tukuy kay uyariwaykak runakunapish Jesukristuta kreyinankunapa. Chashna ñukashina kreyikuptikichi mana munaymanchu ñukashina kadenadu kanaykicipa.

30 Chashna Pablú willaptin Agripaka shayarirkan. Shayariptin Bernise-wan gobernador Festoka tukuy chaypi runakunaka shayarirkansapa.

31 Chaypina suk laduman rirkansapa Pablú rimashkanta kikinkunapura parlak. Parlashpa willanakurkansapa:

—Kay runaka mana nimata rurashkachu wañuchichinanchikunapa nima karselpi churananchikunapa.

32 Chaypina Agripaka Festota willarkan:

—Atipanchiman kay runataka kachariyta mana kikin roygashushka kaptinka chay ashwan sinchi kamachikuk Sesarman kachanaykipa.

27

Roma llaktaman Festo Pabluta kacharkan.

1 Chashna Agripa Festota willashpa yuyarkansapa barkupi Italia partiman Pabluta kachaytá. Chaypina paytaka suk presomasinkuñawan tantallata kapitan Juliopa makinpi churarkansapa. Chay Julioka chay ashwan sinchi kamachikuk Augustopa tropapa capitannin karkan. Ñuka Lukaspish payku-nawan tantalla rirkani Pabluta yanapanaynipa. **2** Ñukaykunawan tantalla rirkani Aristarko. Payka Masedonia partimanta Tesalonika llaktamanta karkan. Chaypina Adramitio llaktapi suk barkupi yaykurkanisapa Roma-man rinaynikunapa. Chay barkupa doyñun Asia partipi aypa llaktakunapi ratakuypi ratakuypi rinayarkan.

3 Chay barkupi rishpaynikuna kapitan Julioka alli modopi Pabluta pusharkan. Kayantin Sidon llaktapa barku ratakunanpi chayarkanisapa. Chaypi Pablutaka almitirkan amigunkunata rinanpa pasyak paykuna yana-panankunapa.

4 Sidonmanta llukshiykaptinikuna sinchi wayra tinkuwartakansapa. Chayrayku Chipre ishla mañan mañanllata rirkanisapa. **5** Chipremanta chimbashpa Silisia partipa Panfilia partipa mañan mañanllata rirkanisapa. Chashna rishpa Lisia partipi Mira llaktapi chayarkanisapa.

6 Chay Mira llaktapi kapitan Julio Alejandriyamanta Italiaman rik barkuta tarirkan. Chay barkupi yaykuchiwarkansapa Romaman rinaynikunapa.

7 Aypa diyakunata wayra tinkuwartinkuna barkuka allimanta rirkani. Chayrayku sukaman tankaypi tankaypi Kinido llakta ladunpi chayarkanisapa. Chaypina chay wayra idenllata tinkuwartinkuna Salmon llakta

ladunta pasashpa Kreta ishlata vueltashpa rirkanisapa. ⁸ Chay ishla mañanta sukaman tankaypi tankaypi rishpaynikuna Buenos Puertos llak-tapi chayarkanisapa. Chay llaktaka Lasea llakta ladunllapi karkan.

⁹ Chashna wayra tinkuwaptinkuna chay barku mana sinchita puriptin sukaman unayarkanisapa. Manana allinachu karkan chay manllayba yakuta rinaynikunapa. Manana unaynachu illarkan tamya tiempu kananpa. Chayrayku Pabluka chay barku purichik runakunata willäkansapa:

¹⁰ —Señorkuna, tamya tiempu kaptin mananami allinachu rinanchiku-napa. Chashnalla rishpanchikuna kay barkuka tukuy kargakunawan sum-inman. Ñukanchikunapish sipikunchimansapa.

¹¹ Chaypina soldadukunapa kapitanninka Pabluta mana kreyishpa barkupa doyñunta kapitannintapish kasurkan rinankunallapa. ¹² Buenos Puertospa barkukunà ratakunan mana allichu karkan tamya tiempu barkuka chaypi kiparinanpa. Chayrayku yaka tukuy chay runakuna munarkansapa Fenise llaktaman riya. Chay llaktaka Kreta ishlapa ali ladunpi karkan. Yuyarkansapa ali kananta chaypi tamya tiempu kiparinaynikunapa.

Chay barkupi riptyinkuna sinchi wayrawan tinkunakurkansapa.

¹³ Chashna rinaynikunapa yuyaptinkuna kallarirkan chay llaktapa ali ladunmanta alimata wayrayta. Chayta kawashpankuna barkuta purichikkuna yuyarkansapa atipanankunata riya. Chayrayku chay llaktamanta llukshishpaynikuna barkuta pusharkansapa Kreta ishlamañan mañanllata. ¹⁴ Chashna riptyinkuna suk ratullapi sinchi wayra barkuynikunata ishlamanta chay manllayba kocha chawpiman tankarkan. ¹⁵ Chay sinchi wayra pushawaptinkuna manana atiparkanisapachu barkuta sinchichiyya. Chayrayku wayrallana pushawarkansapa.

¹⁶ Chashna chay wayra pushawaptinkuna rirkanisapa Kawda ishla mañanta. Chay taksha ishla mañanta riykaptinikuna manana sinchitanachu wayrarkan. Chaypina sukaman trabajashpa chay taksha aysadu kanowata barkupa sawanpi alsashpa churarkanisapa. ¹⁷ Chaymanta barku purichik runakuna waskankunawan barkupa armasonninta allita watarkansapa ama wayra wakllichinanpa. Chay yaku ukupi suk playa mowntonanakudu tiyarkan. Chaypa shutin Sirite karkan. Chaypi barku arkakunanta man-chashpankuna barkupa wayra pushanan taksha llachapankunata altu kaspinmanta templarkansapa. Chayta rurashpankuna tukuy chay tuta sakirkansapa chay wayra maytapiш kaptin barkuta pushanarpa.

¹⁸ Kayantinpish sinchita wayraylapi katirkan. Chayrayku barku purichik runakuna kallarirkansapa tukuy kargankunata yakupi wishchukuya.

¹⁹ Kimsaynin diya idenlla kaptin paykunalla tukuy ima llashakkunata wishchukurkansapa ama barku suminanpa.

²⁰ Aypa diyakunata mana nima intita nima luserukunata kawarkanis-apachu. Chay sinchi wayra katiptinlla manana yuyarkanisapanachu kawsayta.

²¹ Chaymanta aypa diyakunata mana mikushpaynikuna Pabluka tukuy ñukaykunapa chawpinikunapi shayarishpa willawarkansapa:

—Kay barkupi purikmasinikuna, ali kanman karkan willashkaynita kasushpa Kreta ishlapi kiparinanchikunapa. Chaypi kiparishpanchikuna mana sufrinchimansapachu karkan. Nima kargakunata wishchunchimansapachu karkan. ²² Kunanka allita uyariwaychi. Ama manchakuy-chichu. Kay barku sumiptinpish manami ni suknikichi wañunkichichu.

²³ Ñukaka Tata Diospa wambran kashpayni payta kuyashpa kawsani. Tutapi paypa angelin ūukapi rikurishka. ²⁴ Willawashka: “Ama manchakuychu, Pablú. Roma llaktapa ashwan sinchi kamachikupi chayayanayki tiyan. Kanraykumi Tata Diroska kay barkupi rikmasikikuñatapish wañuymantasalvankasapa.”

²⁵ Chashna chay angel willawashka kaptin amana llakiychinachu. Ñukaka tutuy shunku Tata Diosta kreyishpa allita yachani pay salvawananchikunata chay angel willawashkantashina. ²⁶ Tata Dios salvawaptinchikuna kay wayra suk ishlaman churawashunchisapa.

²⁷ Pablú chayta willawaptinkuna ishkay semanana Kreta ishlamanta llukshishkaynikuna karkan. Chaypina chay wayra suk laduman suk laduman pushawaptinkuna chay manllayba Adrea kochapi chayarkanisapa. Chaypi kaptinikuna chawpi tutapi barkuta purichik runakunaka yacharkansapa allpaman chayaykanaynikunata. ²⁸ Chayrayku yaku ukuta yachanankunapa mashna metropimi allpaka nishpa metriyarkansapa. Chashna metriyashpangkuna yacharkansapa kimsa chunka sokta metropi alpa kananta. Suk ratu washan kashkan metriyashpangkuna yacharkansapa ishkay chunka kanchis metrollapina allpa kananta.

²⁹ Chaypina manchakurkansapa yaku ukupi manllayba rumikunapi takakunankunata. Shayachinayashpangkuna chusku atun llashak fierrukunata watashpa chay barku washanpi kacharirkansapa. Chaypina Tata Diosta roygarkansapa utkana pakarinanpa.

³⁰ Chaypina chay barkuta purichik runakunaka paykunalla allpaman rishpa nitikunayarkansapa. Chashna nitikuya munashpangkuna chay barku sawanpi tiyak kanowata yakuman urayachirkansapa. Chay barku puntan partimanta llashak fierrukunata kacharik tukushpa yakuman urayamunayarkansapa.

³¹ Chayta kawashpa Pabluka kapitanta tukuy soldadunkunata willarkansapa:

—Kay barkuta purichik runakuna nitikunayaykansapami. Mana paykuna barkupi kipariptinkunaka kankunaka mana atipankichichu sipikuymantas kishpiyta.

³² Chashna Pablú willaptin chay soldadukunaka kanowapa waskankunata tipirkansapa yakupi urmananpa.

³³ Chaymanta kayantin pakarinayaykaptin Pabluka tukuy chay runakunata willarkansapa allita mikunankunapa. Willarkansapa:

—Ñami ishkay semanatana sukaman sufrishpaykichi mana allitachu mikushkankichi. ³⁴ Chayrayku roygaykichi allita mikunaykichipa. Mikunaykichi tiyan sinchikunaykichipa. Tukuy kankuna kishpinkichi. Niman suk chukchaykichi chinkankachu.

³⁵ Chashna willashpa tukuy chay runakuna kawaptinkuna Pabluka panta apishpa Tata Diosta agradesirkan. Chashna agradesishpa chay panta pakishpa kallarirkan mikuyta. ³⁶ Pablú mikuptin kawashpangkuna tukuy chay runakunapish mana llakishpana mikurkansapa. ³⁷ Chay barkupi ishkay pachak kanchis chunka sokta runakuna karkanisapa.

³⁸ Chashna saksanankunakaman mikushpangkuna tukuy chay barkupi tiyak triguta wishchukurkansapa chay barku sawayamunanpa.

Chay barku playa mowntonanakudupi takakuk rishpa pakurkan.

³⁹ Chaymanta pakariptin chay barkuta purichik runakuna karumanta allpata kawashpa mana riksirkansapachu maykan llaktami nishpa. Chaypi kawarkansapa suk muyuna playayukta. Ýuyarkansapa chayman

chay barkuta chayachiyta. ⁴⁰ Playaman chayanayashpa chay watadu llashak fierrukunapa waskankunata tipirkansapa yakupi sakinankunapa. Timonpa waskankunata paskarkansapa barkuta tankanankunapa. Chaymanta barkupa uman partipi atun llachapanta templarkansapa wayra pushanarpa. Chaywanna barkuka kallarirkan playaman riyta. ⁴¹ Chashna riykashpa yaku ukupi mowntonanakudu playapi chay barku rirkana baranakuk. Chaypina puntan allita baranakuptin olaskuna sukaman takakushpa popanta pakichirkan.

⁴² Chaypina soldadukunaka tukuy preso runakunata wañuchinayarkansapa ama waytashpa nitikunankunapa. ⁴³ Chashna wañuchinayaptinkuna chay kapitanka Pabluta salvanayashpa soldadunkunata micharkansapa ama ni pita wañuchinankunapa. Willarkansapa tukuy waytay yachakkuna yakuman wishchunakunankunapa waytashpa allpaman chayanankunapa. ⁴⁴ Chaymanta tukuy mana waytay yachakkunata willarkansapa barkupa pakikudu kaspinkunapi apikushpa allpaman chayanankunapa. Chashna chay kapitan willawaptinkuna tukuy ñukaykuna sipikuymanta salvanakushpaynikuna allpaman chayarkanisapa.

28

Malta ishlapi kimsa killata chay runakuna kiparirkansapa.

¹ Chashna tukuy ñukaykuna allpapi chayashpaynikuna yacharkanisapa chay ishlapi shutin Malta kananta. ² Chay ishlapi kawsak runakuna tukuy ñukaykunata kushikushpa yanapawarkansapa. Sukaman tamyaykaptin sukaman chiru kaptin chay runakuna ninakurkansapa. Aypata yantachashpankuna nina rawraptin kayawarkansapa mashakuk. ³ Chaypina Pablu suk tipi chakidu yantata ninapi churaykaptin suk machakuy ninamanta kishpishpa makinpi apikurkan. ⁴ Chay machakuy Pablupa makinpi warkunakuptin kawashpa chay ishlapi kawsak runakuna willanakurkansapa:

—Ichará kay runaka suk runata wañuchishka. Chayrayku yakumanta kishpiptinpish diosninchu munaptin wañunan tiyan.

⁵ Chaypina Pabluka makinta tapsishpa chay machakuya ninapi wishchukurkan. Chay machakuy mukuptinpish Pabluta mana nimanachirkanchu. ⁶ Chay runakunaka shuyarkansapa Pablupa makin punkiptin rasla wañunanta. Chaymanta sukaman shuyashpankuna kwarkansapa mana nimanachinanta. Chaypina chikan layatana yuyaykushpa kallarirkansapa rimayta Pablu suk dios kananta.

⁷ Chay ishlapi kamachikuk runapa mana sunipichu terrenunkuna tiyarkan. Chay kamachikukpa shutin karkan Publio. Payka allita chaskiwashpankuna kimsa diyata sukaman yanapawarkansapa.

⁸ Chaypina yacharkanisapa Publiopa tatan kalentorashpa kicha unkuywan kananta. Chayta yachashpa Pabluka kawak rishpa Tata Diosta roygarkan sanuyachinarpa. Chaymanta ishkantin makinkunawan llankaptin chay runaka sanuyarkan. ⁹ Publiopa tatanta sanuyachishkanta yachashpa aypa unkudukuna Pabluman rirkansapa paykunatapish sanuyachinankunapa. Tukuya sanuyachirkansapa. ¹⁰ Chaypina chay runakuna aypa tiyapushkankunata kuwarkansapa. Chaymanta chay ishlamanta llukshiptinkuna tiyapunankunata kuwarkansapa puriyninikunapi mana nima illawanankunapa.

Pablu purikmasinkunawan Roma llaktapi chayarkansapa.

¹¹ Malta ishlapi kimsa killata kiparishkaynikunawasha suk barkupi yaykurkanisapa. Chay barkuka Alejandriya llaktamanta karkan. Chay

ishlallapi chay barkupish tukuy chay tamya tiempu karkan. Puntanpi tiyarkan ishkay ruradu diosninkuna. Sukpa shutin karkan Kastor sukpa Poluk.

12 Chashna rishpaynikuna Sirakusa llakta barku ratakunanpi chayashpa kimsa diyata kiparirkanisapa.

13 Chaymanta chay barkupi yaku mañan mañanllata rirkanisapa Regio llaktapi chayayanaynikunakaman. Kayantin uraymanta wayra tiyarkan. Chay alli wayra pushawaptinkuna suk diya washan Puteoli llaktapi chayarkanisapa.

14 Chay llaktapi Jesukristuta kreyikmasinikunata tarirkanisapa. Paykunaka invitawarkansapa suk semanata chaypi kiparinaynikunapá. Chaymanta allpata purishpa kallarirkanisapa Romaman rihta. **15** Chaypina Romapi Jesukristuta kreyikmasinikuna yacharkansapa ryikanaynikunata. Chaypina tinkuwaksapa shamushpankuna sukkuna shuyawarkansapa Foro de Apio plasapi. Sukuna rirkansapa Tres Tabernaskaman tinkuwaksapa. Paykunada kawashpa Pabluka Tata Diosta agradesishpa kushikurkan.

16 Chaymanta Romapi chayaptinkuna chay kapitanka presonkunata suk kapitanpa makinpi churarkansapa. Payka Pabluta almitirkan suk wasipi kawsananpa chaypi suk soldadulla kuydananpa.

Ishkay watata Roma llaktapi Pabluya chachikurkan.

17 Chaymanta kimsa diya washan Roma llaktapi kashpaynikuna Pabluka judiyukunapa kamachikuk runakunata kayachirkan. Paykuna chayaptinkuna Pabluka willarkansapa:

—Wawkinikuna, ñukaka mana nimata rurashkanichu Jerusalenpi judiyumasinchikuna chikniwanankunapa. Tukuy chay ñawpa awilunchikuna amañashkunkunata allita rurashkani. Chashna allita ruraptinipish judiyumasinchikuna chikniwashpa romano kamachikkunapa makinkunapi kukuwashkasapa. **18** Chay romano awtoridarkuna sukaman allita tapuwarkansapa yachanaya shpa mana alli rurashkaynita. Paykunaka mana nima wañuchichiwanankuna laya uchaynita tarirkansapachu. Chayrayku munarkansapa kachariwayta. **19** Chashna kachariwanayaptinkunapish chay chikniwak runakuna mana nima layapi munarkansapachu kachariwanankunapa.

Chayrayku ñukaka romano kamachikkunata roygarkanisapa kachamuwanankunapa chay ashwan sinchi kamachikupi rikurinaynipa. Munarkani kikin willawanarpa uchayukchu manachu kani nishpa. Chashna judiyumasinchikuna chatawaptinkunapish ñuka paykunataka mana nimata chatanayanichu. **20** Chayrayku kankunata kayachishkaykichi tukuy chayta willanaynipa. Ñukanchi judiyu runakuna sukaman shuyashkanchisapa Tata Diosmanta salvakuk runa shumunanta. Pay shamushkanta yachachikuskaynirayku kadenawan watadu kani.

21 Chashna Pabluya willaptinkuna chay tantanakudu runakunaka willarkansapa:

—Judeapi kawsak judiyumasinchikuna mana nima kartata killkamuwashkasapachu kanta chatashushpankuna. Suk runakuna Judeamanta chayamushpankuna mana willawashkasapachu mana alli rurashkaykikunata. **22** Kunan parlachiwaysapa yachanaynikunapa imatami yuyaykanki nishpa. Tukuy partimanta runakuna willawansapa yachachikunayki mana alli kananta.

23 Chashna chay runakuna willashpankuna suk diyata churarkansapa shamunankunapa kashkan Pablukan parlak. Chaymanta chay churashkan diya Pabluya kawsanan wasinman aypa runakuna shamurkansapa. Chay diya tutamantapacha tardikaman Pabluka yachachirkansapa imashnami

Tata Diospa mandunpi yakyunchisapa nishpa. Moisespa kamachikunankunata ñawpa yachachikkunapa killkadunkunata yachachikushpa entiendichirkansapa Jesus Tata Diosmanta shamudu salvakuk runa kananta.

²⁴ Chashna Pablus yachachiptinkuna sukkuna kreyirkansapa sukkuna mana. ²⁵ Chashna sukkuna mana kreyikunayashpangkuna llukshiykarkansapano. Chaypina Pabluka willarkansapa:

—Tata Diospa Espiritu chay ñawpa yachachikuk Isaiyasta willarkan chay ñawpa awilunchikunata willanankunapa: ²⁶ “Rillary chay mana kasuwak runakunata willak:

‘Kankuna alli yachachikunaynita uyarishpapish mana entiendinkichichu. Chay alli rurashkaynita kawashpaykichiipish mana entiendinkichichu imaraykumi rurashkani nishpa.

²⁷ Kay runakunapa shunkunkuna sinchi likidumi.

Rinrinkunata wichkansapa ama uyariwanankunapa.

Ñawinkunatapish wichkansapa alli rurashkaynita ama kawanankunapa.

Chayrayku mana atipansapachu rimashkaynita entiendiyta.

Mana atipansapachu ñukaman shamuya sanuyachinaynikunapa.’”

²⁸ Chashna chay ñawpa yachachikuk Isaiyas rimaptin kunanka ñuka willaykichi: Kunan diyamanta mana judiyu runakunata yachachishasapa Tata Dios paykunatapish uchankunamanta perdonashpa salvanankunata. Chashna yachachikuptini paykuna kreyikunkasapa.

²⁹ Chashna Pablus willaptinkuna chay judiyu runakuna kikinkunapura sukaman ayninakupi kutirkansapa.

³⁰ Chaymanta Pabluka chay alkiladu wasipi ishkay watata kiparirka. Chay wasipi pasyak rik runakunata chaskiksapa. ³¹ Mana ni pi micharkanchu yachachikuptin. Allita yachachirkansapa Jesusta kreyishpa Tata Diospa mandunpi kawsanankunapa.

Chayllata ñuka Lukas killkashkani.

ROMANOS PABLУ ROMA LLAKTAPI KREYIKUKMASINKUNATA KILLKARKAN

Pablу kay kartata Roma llaktapi kawsak wawkinkunata paninkunata killkarkan.

¹ Ñuka Pablу Jesukristuta sirvik kashpayni kay kartata killkaykaykichi. Tata Dios akllawashpa kachawarkan tukuy mayta rishpa salvawananchikuna rimananta yachachikunaynipa.

² Ñawpa tiempu Tata Dios alli yachachikuk runakunata willarkansapa chay salvawananchikuna rimananta killkanankunapa. ³ Chay rimananka willawanchisapa Señorninchi Jesukristu Tata Diospa wambran shamananta. Chay killkadu rimananshina payka shamurkan ñawpa kamachikuk Davidpa mirakninmanta nasik runa kananpa. ⁴ Chaymanta Jesukristu wañushkanmanta kawsamuptin Tata Diospa alli rurak Espiritun tukuy runakunata riksichirkansapa tukuy layata atipak Tata Diospa wambran kananta.

⁵ Jesukristu ñukata yanapawashpa kachamuwashka tukuy maypi yachachikushpa payta kushichinaynipa. Chashna yachachikuptini aypa runakuna payta kreyishpa kasunankunapa. ⁶⁻⁷ Tata Dios kankuna Roma llaktapi kawsakkunatapish sukaman kuyashushpaykichi akllashushkan-kichi Jesukristuta kreyishpa wambrankuna kanaykichipa. Chayrayku munani Tatanchi Dios Señorninchi Jesukristu yanapashunaykichipa kushichishunaykichipa.

Pablу Roma llaktaman munarkan ryita.

⁸ Manara nimata willashpayni kayta willaykichi: Tukuy llaktakunapi rimansapa kankuna allita Jesukristuta kreyinaykichi. Chayrayku Jesukristu yanapawaptin Tata Diosta sukaman agradesini.

⁹ Ñuka tukuy shunku Tata Diosta sirvishpa kawsani yachachikushpa paypa wambran Jesukristu salvawananchikunata. Tata Dioska allita yachan tukuy oras mana shaykushpa royanaynita Tata Dios yanapashunaykichipa.

¹⁰ Roygani Tata Dios munashpa yanapawanarpa rinaynipa kawaknikichi.

¹¹ Sukaman munani kawaynikichita yachachinaynipa Jesukristuta ashwan allita kreyishpa kawsanaykichipa. ¹² Kankunapi chayashpayni munani an-imuchinakunanchikunapa Jesukristusta ashwan allita kreyinanchikunapa.

¹³ Wawkinkuna, paninikuna, munani yachanaykichipa aypa kuti munashkani ryta kawaknikichi. Chashna munashpaynipish kunankaman manara atipashkanirachu ryta. Aypa llaktakunapi yachachikuptini aypa mana judiyu runakuna Jesukristuta kreyishkasapa. Kunanka llaktaykichiman rinayani chaypipish aypa runakuna Jesukristuta kreyinankunapa. ¹⁴ Tata Dios kachamuwashka tukuy runakunata yachachinaynipa. Chayrayku griego runakunata mana griego runakunatapish, tukuy laya alli yachak runakunata, mana nima yachak runakunatapish yachachinayni tiyan. ¹⁵ Chayrayku sukaman munani kankuna Romapi kawsakkunatapish yachachiynikichita Jesukristu salvak kananta.

Tata Dios tukuy Jesukristuta kreyik runakunata uchankunamanta salvankasapa.

¹⁶ Mana nima pinkakunichu yachachikuya Jesukristu uchanchikunamanta salvawananchikunata. Chashna yachachikuptini aypa runakuna

Jesukristuta kreyishpa kawsansapa. Paykuna judiyu runakuna mana judiyu runakunapish Jesukristuta kreyiptinkuna Tata Dios uchankunamanta perdonansapa. ¹⁷ Tata Diospa killkadunpi riman: “Tata Diosta kreyishpa kawsak runakuna paywan tantalla kawsankasapa.” Chay rimanapi Tata Dios yachachiwanchisapa payta kreyishpalla kawsaptinchikuna uchanchikunamanta perdonawananchikunata.

Tata Dios tukuy mana allita rurashpa kawsak runakunata kastigankasapa.

¹⁸ Mana alli rurak runakuna mana munansapachu Tata Diospa rimananta kreyiyya. Chaymanta sukkunata pantachichinsapa ama kreyinankunapa. Chayrayku sielupi kawsak Tata Diosninch paykunata suka-man kastigankasapa. ¹⁹ Kikin Tata Dios paykunata tukuy rurashkanta allita kawachiptinkuna atipanmansapa payta riksiyya. ²⁰ Tata Dios kay allpata rurashkanmantapacha tukuy runakuna atipanchisapa yachayta pay mana tukuyniyuk atipak Dios kananta. Mana payta kawashpanchikunapish tukuy rurashkanta kawashpanchikuna atipanchisapa yachayta Tata Dios tiyananta. Chayrayku chay mana alli rurak runakuna mana atipansapachu rimayta Tata Dios mana tiyananta.

²¹ Chay runakuna Tata Dios tiyananta yachaykashpangunapish mana munashkasapachu kuyashpa kushichiyya. Nima munashkasapachu agrade-siyya. Ashwan ashwanta mana allikunata yuyaykushpa kawsansapa. Chayrayku yuyayninkuna tuta likidushina kiparin. ²² Alli yachak kanankunata rimashpankunapish mana nima yachak tukushkasapa. ²³ Mana tukuyniyukta kawsak alli yachak Tata Diosta mana munarkansapachu kuyayta. Chayrayku wañuya yachak runakunashina, pishkillukunashina, chusku chakiyuk animalkunashina, allpapi aysanakushpa purik animalkunashina ruradukunata kuyarkansapa.

²⁴ Chayrayku Tata Dios chay runakunata kawapayashpa manana michansapanachu kikinkuna mana alli munanankunallata rurashpa kawsanankunapa. Sukwan sukwani pinkakuna layata uchallikushpa kawsansapa. ²⁵ Tata Diospa alli rimananta mana kasuya munashpankuna llulla rimanata munashkasapa kasuya. Tata Dios rurashkanllata kuyashpa kawsashkasapa. Tukuy laya rurak Tata Diosta mana kuyashkasapachu. Paykuna chashna kawsaptinkunapish ñukanchikuna Tata Diossalata kuyananchikuna tiyan.

²⁶ Paykuna mana Tata Diosta kuyanayaptinkuna payka kawapayashpa manana michashkasapanachu kikinkuna pinkakuna layata ruranankunapa. Warminkunapish mana allikunata rurayta munashpankuna payku-napuralla uchallikushpa kawsansapa.

²⁷ Chashnashina chay mana alli rurak runakunapish warminkunawan mana allita kawsaya munashpankuna ullkupuralla warmiwanshina kuyanakushpa uchallikushpa kawsansapa. Ullkumasinkunawan pinkakuna layata ruransapa. Chay runakuna uchankunaryku sukaman unkuywan llakishpa kawsansapa.

²⁸ Mana Tata Diosta riksiyya munaptinkuna Tata Dioska kawapayashpa manana michashkasapanachu mana alli yuyanankunata rurashpa kawsanankunapa.

²⁹ Paykuna tukuy laya mana allikunata rurashpa kawsansapa. Sukaman uchallikushpa tiyapuykaptin ashwanta munashpa runamasinkunata chiknishpa kawsansapa. Sukaman runakunapa imankunata munashpa makanakushpa wañuchikushpa llullachikushpa piñanakushpa washanchanakushpa kawsansapa. ³⁰ Sukpa sukpa mana allita rimashpa

Tata Diosta chiknishpa awtoridarkunata rabyachishpa sukanan kreyinakushpa kikinkunalla alli kanankunata yuyashpa kawsansapa. Sukanan mana alli ruranata yuyashpa ruransapa. Tatankunata mana kasunayashpa kawsansapa.

³¹ Tata Diospa rimananta mana entiendinayansapachu. Kikinkuna rimashkunkunata mana ruransapachu. Mana ni pita kuyansapachu. Mana ni pita perdonanayansapachu. Mana ni pita llakichinsapachu. ³² Chay laya runakuna allita yachansapa Tata Dios tukuy mana alli rurak runakunata kastigaptin wañunankunata. Chayta yachaykashpapkunapish mana allita rurashpalla kawsansapa. Kushikunsapa runamasinkuna mana allita ruraptinkuna.

2

Suknin diya TataDios willawashunchisapa pimi allita rurashka pimi mana allitachu rurashka nishpa.

¹ Chayrayku kankuna pipish kashpaykichi ama runamasikichita piñakushpa chataychichu mana alli rurak kanankunata kankunapish chay layalla kashpaykichi. Chashna runamasikichita chatashpaykichi kikikichilla chatanakuykankichi.

² Allita yachanchisapa Tata Dios alli rurak kashpa tukuy mana alli rurak runakunata kuskanpi kastiganankunata. ³ Kankuna mana allita ruraykashpaykichi runamasikichita piñakushpa chatashpaykichi ama yuyaychichu Tata Diospa kastigunmanta kishpiyta. ⁴ Tata Dios mana shaykushpa mana piñakushpa sukanan kuyashuptikichipish payta sukanan washanchaykankichi. Mana entiendinkichichu Tata Dios sukanan kuyashupaykichi yanapashunaykichita uchaykichita wanashpa payllata kreyishpa kawsanaykichipa.

⁵ Suknin diya Tata Dios tukuy runakunata kuskata willankasapa pimi allita rurashka pimi mana allitachu rurashka nishpa. Chay diya sinchi shunku kaptikichi mana uchaykichimanta wanayaptikichi Tata Dioska sukanan kastigashunaykichi tiyan. ⁶ Chaypina Tata Dios suktapish suktapish alli rurashkanchikunarayku mana alli rurashkanchikunarayku parawashunchisapa.

⁷ Tata Dios tukuy mana sampayashpa alli rurak runakunata, tukuy payta kushichik kuyak runakunata sielman pushankasapa mana tukuyinyukta paywan kawsanankunapa. ⁸ Chaymanta Tata Dios tukuy kikinkuna munashkunkunata rurak runakunata, tukuy mana alli rurak runakunata, tukuy paypa rimananta mana kasunayak runakunata sukanan piñakushpa kastigankasapa. ⁹ Tukuy mana alli rurak runakuna judiyu mana judiyu kashpapkunapish sukanan llakishpa sufrihpa kawsankasapa.

¹⁰ Chaymanta alli rurak runakunata judiyu mana judiyu kaptinkunapish Tata Dios kushichishpapkuna willankasapa alli rurak kanankunata. ¹¹ Pipish kaptinchikuna Tata Dios tukuy runakunata idenllata kuyawanchisapa.

¹² Mana Moisespa kamachikunankunata yachashpa uchallikuk runakunata mana Moisespa kamachikunanta yachaktashina Tata Dios kastigankasapa. Chaymanta Moisespa kamachikunankunata allita yachashpa uchallikuk runakunata Tata Dios Moisespa kamachikunankunapi rimashkanshina kastigankasapa. ¹³ Tata Dios runakunata mana perdonankasapachu Moisespa kamachikunankunata uyariptinkunalla. Tukuy shunku kasushpa kawsak runakunallata perdonankasapa.

¹⁴ Chaymanta mana judiyu runakunamanta sukkuna Moisespa kamachikunankunata mana yachashpapish allita rurashpa kawsansapa. Paykunaka kikinkunallamanta yachansapa allikunata rurayta. ¹⁵ Chashna allita rurashpa kawsashpapkuna tukuy pita kawachinsapa yuyayninkunapi Tata Diospa kamachikunankunata yachanankunata. Yuyayninkunapi yachansapa allita mana allita rurashkankunata.

¹⁶ Ņuka Tata Diospa rimananta yachachikushkaynishina suknin diya payka Jesukristuta willanka tukuy runakunata pakadu rurashkankunata rikurichinanpa. Chaypina mana allita rurashka kaptinkuna kastigankasapa.

Judiyu runakuna Moisespa kamachikunankunata mana kasunayarkansapachu.

¹⁷ Kankuna judiyumasinikuna, rimankichi Moisespa kamachikunankunata kasushpaa kawsanaykichita. Alabanakunkichi Tata Diosta kuyanaykichita. ¹⁸ Tata Diospa munananta allita yachankichi. Moisespa kamachikunankunata yachakushpaykichi yachankichi akllayta imakunami alli ruranaykichipa nishpa. ¹⁹ Yuyankichi atipanaykichita mana yachak runakunata yachachiya allita ruranankunapa. Yuyankichi tutapishina purik runakunata atipanaykichita yanapayta. ²⁰ Kankuna yachankichi Moisespa kamachikunankuna tukuy alli yachanata yachachiwananchikunata. Chayrayku yuyankichi mana alli yachak runakunata wambrakunatashina atipanaykichita yachachiya.

²¹ Sukaman allita yachachikushpaykichi ξ imapati kankuna chay yachachikunaykichita mana kasunkichi? Yachachikunkichi ama suwakunankunapa. Chayta yachachikuykashpa ξ imapati kankuna suwakunkichi? ²² Yachachikunkichi ama chikan warmiwan uchallikunankunapa. Chashna yachachikushpaykichi ξ imapati chikan warmiwan uchallikunkichi? Ruradu dioskunata chiknishpaykichika ξ imapati wasinkunamanta suwakunkichi? ²³ Kankuna Moisespa kamachikunankunata yachashpapkichi alabanakunkichi. Chashna alabanakushpaykichi mana chaykunata kasunkichichu. Chashna mana kasushpaykichi Tata Diosta mana nimatashina kawankichi. ²⁴ Chayrayku Tata Diospa killkadunpi riman: "Kankuna mana allita rurashpa kawsaptikichi mana kreyikuk runakuna rimansapa Tata Dios mana alli kananta."

²⁵ Kankuna Moisespa kamachikunankunata kasushpaa kawsaptikichi alli kashka señaladu kanaykichipa. Mana Moisespa kamachikunanta kasushpaa kawsashpapkichika yankamanta señaladu kankichi. ²⁶ Chaymanta mana señaladu runakuna Moisespa kamachikunankunata kasushpaa kawsaptinkuna Tata Dios paykunatapish willankasapa wambrankuna kanankunata.

²⁷ Kankuna señaladu judiyu runakuna kaykashpapkichipish mana Moisespa kamachikunankunata kasushpaykichika mana alli rurak runakuna kankichi. Chaymanta mana judiyu runakuna Tata Diosta kasushpaa kawsashpapkunaka tukuy runakunata kawachinsapa kankunamanta ashwan alli rurak kanankunata.

²⁸ Mana señaladu kashkanchikunaraykuchu nima judiyu runakuna nasishkanchikunaraykuchu Tata Diospa wambrankuna kanchisapa.

²⁹ Tata Diospa wambrankuna kanchisapa tukuy shunku Tata Diosta kreyishpa kawsashpanchikuna. Mana Moisespa kamachikunankunata kasushkanchikunaraykuchu Tata Diospa wambrankuna kanchisapa.

Judiyu runakuna mana kreyiwaptinkunapish Tata Dios willawanchisapa alli rurak kananchikunata.

3

Tata Dios allillata rurashpa kawsan.

¹ Chaymanta ¿ima allitati surkunchisapa judiyu runakuna kashpanchikuna? ¿Ima allitati surkunchisapa señaladu kashpanchikuna?

² Aypa allikunata surkunchisapa judiyu runakuna kashpanchikuna. Suk allita surkunchisapa Tata Dios judiyu runakunallata rimananta kuwashkanchikunaryaku.

³ Chaymanta judiyu runakunamanta sukkuna Tata Diosta mana kasushpa kawsaptinkunapish payka mana shaykushpa tukuy rimashkankunata ruranan tiyan. ⁴ Tukuy runakuna llullakuptinkunapish Tata Dioska mana nima llullakushpa allillata rurashpa kawsan. Paypa killkadunpi riman: "A Tata Dios, kanka allillata rimanki. Suk runakuna mana alli kanaykita rimaptinkunapish allillata rurashpa kawsanki."

⁵ Chaymanta ichara suk runakuna rimanmansapa: "Sukaman uchallikushpanchikuna kawachinchisapa Tata Dios sukaman alli rurak kananta." Chashna kaptinka Tata Dios kastigawaptinchikuna ¿rimanchimansapachu mana allita ruraykananta? ⁶ Mana nima layapi rimanchimansapachu Tata Dios mana alli rurak kananta. Tata Dios mana allita rurashpaka uchallikuk runakunata mana atipanmanchu kastigayta.

⁷ Ichara suk runa rimanman: "Ñuka llullakuptinipish Tata Dios kuyawashpa perdonawanka. Perdonawaptin tukuy runakuna rimankasapa Tata Dios alli kananta. Chayrayku llullakuptini Tata Dios mana atipanchu kastigawayta". ⁸ Chashna rimashpa kikinlla llullachinakuykan. Llullakushpa rimansapa: "Tukuy laya mana allikunata ruraypachi runakuna Tata Diosta alabanankunapa".

Suk runakuna llullachikushpa rimansapa ñuka chashna yachachiku-naynita. Tata Dios chay llullakuk runakunata sukaman kastigankasapa.

Tukuy runakuna uchasapakuna kanchisapa.

⁹ ¿Ñukanchikuna judiyu runakuna kashpanchikuna chay mana judiyu runakunamanta ashwan alli rurakchu kanchisapa? Manami ashwan allichu kanchisapa. Ñukaka ñami yachachishkaykichina tukuy judiyu runakuna tukuy mana judiyu runakunapish uchasapakuna kananchikunata.

¹⁰ Tata Diospa killkadunpi willawanchisapa:
"Mana tiyanchu niman suk alli rurak runa.
Mana niman suk tiyanchu.

¹¹ Mana tiyanchu niman suk alli yachak runa.
Mana niman suk runa Tata Diosta maskanchu.

¹² Tukuy runakuna uchallikushpa Tata Diosmanta ashushkasapa.
Mana alli rurak tukushkasapa.
Mana tiyanchu niman suk alli rurak runa.
Mana niman suk tiyanchu.

¹³ Chay mana alli rurak runakunapa rimanankuna iden sepultura kicharidu millanapa laya asnakshinami.

Sukaman llullachikushpa kawsansapa.
Rimananka machakuya venenonshinami.

¹⁴ Sukaman piñayashpa chiknishpa maldisishpa rimansapa.

¹⁵ Utkakushpa kallpansapa runamasinta wañuchik.

16 Maytapish rishpa tukuy layakunata wakllichishpa aypa runakunata suka-man llakita kunsapa.

17 Mana yachansapachu allita rurashpa kushikushpa kawsayta.

18 Mana yachansapachu Tata Diosta manchayta."

19 Tata Diospa rimanan chayta rimartin yachanchisapa payka judiyu runakunata kastiganankunata kamachikunankunata mana allita kasushkankunarayku. Chayrayku mana ni pi Tata Diosta ayniyya atipankasapachu. Tata Dios tukuy kay allpapi kawsak mana alli rurak runakunata kastigankasapa. **20** Payka mana ni pita willankasapachu perdonadu kananta Moisespa kamachikunankunata kasushkanrayku. Tata Dioska kamachikunankunata kuwashkanchisapa yachachiwananchikunapa uchasapakuna kananchikunata.

Jesukristullata kreyishpa kawsaptinchikuna Tata Dios perdonawanchisapa.

21-22 Kunanka Tata Dios yachachiwanchisapa pipish kashpanchikuna Jesukristullata kreyiptinchikuna perdonawananchikunata. Mana Moisespa kamachikunankunata uyarishkanchikunaraykuchu perdonawanchisapa. Moiseswan ñawpa alli yachachikukkuna chayllata yachachikurkansapa.

23 Tukuy runakuna uchayuk kanchisapa. Chayrayku mana atipanchisapachu Tata Diospa munananta rurashpa kushichiyta.

24 Chaymanta Jesukristu uchanchikunarayku wañurkan Tata Dios sukaman kuyawashpanchikuna mana nimata pagaraptinchikuna perdonawananchikunapa. **25** Tata Dios munaptin Jesukristu yawarninta ichashpa wañurkan uchanchikunamanta perdonawananchikunapa. Jesukristu ñukanchikunarayku wañushkanta kreyiptinchikuna Tata Dios perdonawanchisapa.

Tata Dios ñawpa tiempu kreyik runakunatapish kuyashpankuna mana piñakushpa perdonarkansapa Jesukristu shamenanta yuyashpa. Chashna paykunata perdonashpa Tata Dios kawachiwanchisapa alli rurak kananta. **26** Kunanpish Tata Dios kawachiwanchisapa alli rurak kashpa perdonawananchikunata. Jesukristu wañushkanrayku Tata Dios ñami atipanna tukuy Jesukristuta kreyik runakunata perdonawayninchikunata.

27 Tata Diospa kamachikunankunata mana kikinchikunallachu atipanchisapa kasuya. Jesukristullata kreyiptinchikuna Tata Dios perdonawanchisapa. Chashna Tata Dios perdonawaptinchikuna mana atipanchisapachu alabanakuya. **28** Chayrayku yachanchisapa Jesukristullata kreyishpa kawsaptinchikuna Tata Dios perdonawananchikunata. Mana Moisespa kamachikunankunata kasushkanchikunaraykuchu perdonawanchisapa.

29 ¿Tata Dios judiyu runakunallatachu perdonawashunchisapa? Manami. Judiyu runakuna mana judiyu runakunapish Jesukristuta kreyiptinchikuna Tata Dioska perdonawanchisapa. **30** Tata Dioska suklallami. Chayrayku tukuy Jesukristuta kreyik runakunata perdonawanchisapa judiyu mana judiyu runakuna kaptinchikunapish.

31 Chaymanta Jesukristullata kreyishpanchikuna ichara yuyanchimansapa Tata Diospa kamachikunankuna mana nima kananta. Mana allichu chayta yuyananchikunapa. Jesukristuta kreyishpanchikuna yachanchisapa Tata Diospa kamachikunankuna alli kananta.

¹ Ichara tapunakunchimansapa: ¿Imatata rurarkan ñawpa awilunchikuna Abraham Tata Dios perdonanarpa? ² Abraham allita rurashkanraykulla Tata Dios perdonashka kaptinka sukmaman kikinlla alabanakunman karkan. Chashna kaptinka Tata Dios mana willanmanchu karkan perdonanarpa.

³ Tata Dirosa rimanan willawchisapa: “Abrahamka Tata Diosta kreyirkana alli rurak alli perdonakuk kananta. Chayrayku Tata Dios willarkan uchankunamanta perdonadu kananta.”

⁴ Mash uyariwaychi. Suk runa patronpi trabajashpa trabajunpa chanta chaskin. Chay trabajunpa chaninka mana regaluchu. Patronnin trabajashkanrayku pagaranan tiyan. ⁵ Chaymanta ñukanchikuna mana atipashpachikuna allita rurashpa kawsyta tukuy shunku kreyinanchikuna tiyan Tata Dios uchanchikunamanta perdonawananchikunata. Chashna kreyiptinchikuna Tata Dios kikin munashpa perdonawanchisapa.

⁶ Ñawpa kamachikuk Davidpish rimarkan suk runa mana allita rurashpapish sukmaman kushikun Tata Dios perdonadu kananta rimaptin. ⁷ Davidka rimarkan:

“Tata Dios uchanchikunata perdonawaptinchikuna sukmaman kushikun-chisapa.

⁸ Tata Dios manana uchanchikunata yuyaptin sukmaman kushikunchisapa.”

⁹ ¿Tata Dios pikunatatí uchankunamanta perdonanka? ¿Señaladu judiyu runakunallatachu perdonanka? ¿Manachu Tata Dios mana judiyukunatapish perdonanka? Ñami willashkaykichina: Tata Dios Abrahamta willarkan kreyishkanrayku perdonadu kananta. ¹⁰ ¿Aykapití Abrahamta chayta willarkan? Manarapish señalachinakuptinra Tata Dioska Abraham-taka willarkan perdonadu kananta. Mana señalachinakushkanwashachu chayta willarkan.

¹¹ Abrahamta perdonashkanwasha Tata Dios willarkan señalachinakunarpa. Chayrayku Abrahamka yacharkan Tata Diosta kreyiptin perdonashkanta. Chashna modomanta aypa mana señaladu runakuna Tata Diosta kreyiptinkuna paykunatapish perdonankasapa. Chay mana señaladu runakunapish Abrahampa mirakninkunashinami. ¹² Abraham manara señalachinakushpara Tata Diosta kreyishkanrayku paypa wambran karkan. Ñukanchikuna señaladu judiyu runakunapish Tata Diosta kreyishkanchikunaryku Abrahampa mirakninkunashina kanchisapa.

Abraham kreyirkan Tata Dios tukuy willashkanta rurananta.

¹³ Abrahamka kreyirkan Tata Dios tukuy laya atipak kananta. Chayrayku Tata Dios Abrahamta willarkan paypa mirakninkuna tukuy allpapi kawsak runakunata kamachinankunapa. Mana Moisespa kamachikunankunata kasushkanraykuchu Tata Dios Abrahamta willarkan mirakninkuna tukuy runakunata kamachinankunapa. Abraham kreyikushkanrayku Tata Dios perdonashpa willarkan alli rurak kananta.

¹⁴ Tata Dios ñukanchikunatapish mana Moisespa kamachikunanta kasushkanchikunaryku yanapawananchisapa. Moisespa kamachiku-nankunata kasushkanchikunarykulla Tata Dios yanapawaptinchikunaka yankamanta payta kreyinchimansapa karkan. Llullakushpa Tata Dios willawanchimansapa karkan kreyiptinchikuna yanapawananchikunata.

¹⁵ Moisespa kamachikunankunata mana kasuyta atipaptinchikuna Tata Dioska kastigawananchikuna tiyan. Tata Dios kamachikunankunata mana Moisesta kushka kaptinka mana yachanchimansapachu uchasapa

kananchikunata. ¹⁶ Chayrayku Tata Dioska kikin munashpa suk regaluta kuwananchikunashina perdonawanchisapa. Tata Dios perdonawananchikunata kreyiptinchikuna payka iden Abrahamtashina perdonawanchisapa. Mana Moisespa kamachikunankunata kasushkanchikunaryukuchu Tata Dioska perdonawanchisapa. Tata Dios Abrahamtashina perdonawaptinchikuna Abrahampa mirakninkunashina kanchisapa.

¹⁷ Abrahamka allita kreyirkan Tata Dios wañudukunata kawsachimunanta. Kreyirkan Tata Dios rimashpalla mana tiyashkanmanta tukuy layata rurashkanta. Chayrayku Tata Dios Abrahamta willarkan: "Aypa llaktaku-napi kawsak runakunapa tatankunashina kanayki tiyan."

¹⁸ Tata Dios Abrahamta willarkan warmin wawayananta. Willarkan chay nasik wambranmanta aypata mirananpa. Chashna Tata Dios willaptin Abraham viejuna kayakashpapish mana shaykushpa kreyirkan Tata Dios willashkanta rurananta. Chaymanta Tata Dios willashkanshina Abrahampa mirakninkuna aypa tiyarkan.

¹⁹ Abraham yaka pachak watayuk kayakashpapish allillata kreyirkan Tata Dios willashkanta rurananta. Payka warminwan pakta vieju kash-pankuna mallinakurkansapa manana atipanankunata wambrayuk kayta. Chashna mallinakushpankunapish Abraham kreyirkanlla warmin Sara suk wambrata wawayananta. ²⁰ Abraham allita kreyirkan Tata Dios willashkanta rurananta. Chashna ashwan ashwanta kreyishpa payllata alabarkan. ²¹ Tata Diosta kushichishpalla allita kreyirkan atipananta willashkanta rurayta. ²² Chayrayku Tata Dioska perdonashpa willarkan alli rurak kananta.

²³ Tata Dios killkadunpi mana Abrahamllapachu rimarkan alli rurak kananta. ²⁴ Señorninchi Jesukristuta kawsachimuk Tata Diosta kreyiptinchikuna ūukanchikunatapish willawanchisapa perdonadu kananchikunata.

²⁵ Señorninchi Jesukristu wañurkan uchanchikunaryku. Wañushkanmanta kawsamurkan Tata Dios uchanchikunamanta perdonawananchikunapa.

5

Tata Dios perdonawaptinchikuna kushikunchisapa.

¹ Kunanka Señorninchi Jesukristu wañushkanrayku Tata Dios perdonawashkanchikunata kreyishpanchikuna paywan tantalla kushikushpa kawsanchisapa. ² Chashna Jesukristurayku Tata Dios perdonawananchikunata allita kreyiptinchikuna payka sukaman yanapawanchisapa. Sukaman yanapawananchikunata yachashpa kushikunchisapa. Chaymanta sukaman kushikunchisapa yachashpa paywan tantalla allimata kawsananchikunata.

³ Chayta yachashpanchikuna sukaman padesishpachikunapish kushikushunchisapalla. Padesishpanchikuna ashwan ashwanta yachanchisapa mana shaykushpa Jesukristuta kreyishpa kawsayta. ⁴ Chashna Jesukristuta ashwan allita kreyishpa kawsashpanchikuna ashwan alli rurak runakuna tukunchisapa. Ashwan ashwanta yachanchisapa Tata Dioswan mana tukuyiyukta kawsananchikunata. ⁵ Tata Dios Espiritunta kuwaptinchikuna yachanchisapa kuyawananchikunata. Tukuy chayta yachashpanchikuna padesishpachikunapish mana pinkakunchisapachu.

⁶ Ñawpa tiempu mana atiparkanchisapachu mana alli rurananchikunamanta kishpiyta. Chayrayku Tata Dios munashkan tiempu Jesukristu uchanchikunaryku wañurkan.

⁷ Mana aypa runakuna animukunmansapachu wañuya runamasinpa lugarninpi chay runamasin alli rurak kaykaptinpish. Ichara suk runa

animukunman wañuya suk kuyanan runa ama wañunarpa. ⁸ Chaymanta ñukanchikuna sukaman mana alli rurak kaykaptinchikunapish Jesukristu ñukanchikunaryku wañurkan. Chashna ñukanchikunaryku wañuptin yachan-chisapa Tata Dios sukaman kuyawananchikunata.

⁹ Jesukristu yawarninta ichashpa wañushkanrayku Tata Dios uchanchiku-namanta perdonawashpanchikuna kastigawananchikunamantapish sal-vawashunchisapa. ¹⁰ Tata Diosta chiknik runakuna kaykaptinchiku-napish wambrán Jesukristuka wañurkan Tata Dioswan kuyanakushpa kawsananchikunapa. Paywan kuyanakushpa kawsaptinchikuna Jesukristu ñukanchikunawan tantalla kawsashpa uchanchikunamanta salvawanchis-apa. ¹¹ Manami salvawanchisapallachu. Jesukristu wañushkanrayku Tata Dioswan kuyanakushpa kawsanchisapa. Chayrayku sukaman kushikushpa kawsanchisapa.

Ñawpa awilunchi Adanshina mana alli rurak kanchisapa.

¹² Ñawpa awilunchikuna Adan kallarirkan uchallikuyta. Uchallikushkan-rayku källarirkan viejuyaya wañunankaman. Chashnamanta tukuy mi-rakninkunapish uchallikushkanchikunaryku wañunchisapa.

¹³ Manara Moisespa kamachikunankuna tiyaptinpish tukuy runakuna uchallikurkansapa. Manara Moisespa kamachikunankuna killkadu tiyaptinra mana yacharkansapachu uchankunaryku ima kastigutami chaskinkasapa nishpa. ¹⁴ Chay runakuna kastigunta mana yachashpankunapish Adanpa tiempumantapacha Moisespa tiempunkaman uchankunaryku wañuksapa. Mana Adanshina uchallikushpankunapish mana allita rurashkankunaryku wañuksapa. Adan yuyachiwanchisapa Jesukristu shamenanta uchanchikunamanta salvawananchikunapa.

¹⁵ Adan uchallikushkanrayku mana atipanchisapachu wañuymanta kishpiya. Tata Dioslla sukaman kuyawashpanchikuna atipan wañunanchikunamanta salvawayninchikunata. Jesukristu wañushkanrayku Tata Dios kikin munashpa uchanchikunamanta perdonawanchisapa paywan tantalla kawsananchikunapa.

¹⁶ Ñawpa awilunchi Adan uchallikushkanmantapacha tukuy runakuna uchallikushpa kawsanchisapa. Chayrayku Tata Dios kastigawananchikuna tiyan. Chaymanta Jesukristu wañushkanrayku Tata Dios atipan tukuy laya mana alli rurananchikunamanta perdonawayninchikunata. ¹⁷ Awilunchi Adan uchallikushkanrayku tukuy runakuna wañunanchikuna tiyan. Je-sukristu wañushkanrayku Tata Dios kikin munashpa sukaman kuyawash-panchikuna perdonawanchisapa. Tata Dios perdonawaptinchikuna atipan-chisapano allita rurashpa kushikushpa kawsayta.

¹⁸ Ñawpa awilunchi Adan uchallikushkanrayku Tata Dioska tukuy runaku-nata kastigawananchikuna tiyan. Chaymanta Jesukristu wañushkanrayku Tata Dioska tukuy runakunata atipan perdonayta. ¹⁹ Ñawpa awilunchi Adan Tata Diosta mana kasushkanrayku aypa runakuna uchallikushpa kawsansapa. Chaymanta Jesukristu Tata Diosta allita kasushkanrayku Tata Dioska aypa runakunata perdonawanchisapa.

²⁰ Tata Dios kamachikunankuna Moisesta kurkan tukuy runakuna yachananchikunapa uchasapa kananchikunata. Uchasapa kaptinchiku-napish Tata Dios perdonawashpanchikuna ashwanta kawachiwanchis-apa kuyawananchikunata. ²¹ Sukaman uchallikushpa kawsashkanchiku-naryku wañunanchikuna tiyan. Tata Dios sukaman kuyawashpanchikuna

Jesukristurayku uchanchikunamanta perdonawanchisapa paywan sielipi mana tukuyniyukta kawsananchikunapa.

6

Jesukristullata kreyishpanchikuna allita rurashpa kawsashunchisapa.

¹ Kunanka ¿imatí rimashunchisapa? ¿Ashwanta uchallikushpallachu kawsashunchisapa Tata Dios ashwanta kuyawashpanchikuna perdonawananchikunapa? ² Amana uchallikuyupachinachu. Suk runa wañudu kashpa manana uchallikunnachu. Ñukanchikunapish wañudu runashina amana uchallikuyupachinachu. ³ ¿Manachu yachankichi ñukanchikuna bawtisakushpa Jesukristuwан tantanakushkanchikunata? Chayrayku suk wañudu runashina manana uchallikushpanachu kawsananchikuna tiyan. ⁴ Bawtisakushpanchikuna Jesukristuwан tantalla wañudu pampadushina kashkanchisapa. Pampadushina kaptinchikuna Tata Dios tukuy laya atipak kashpa Jesukristuta kawsachimushkanshina ñukanchikunatapish yanapawanchisapa mushuk kawsaya kawsananchikunapa.

⁵ Jesukristuwан tantalla wañudushina kanchisapa amana uchallikushpa kawsananchikunapan. Paywan tantalla kawsachimudushina kanchisapa mushuk kawsaya kawsananchikunapan. ⁶ Yachanchisapa Jesukristuwан tantalla wañudushina kashpanchikuna manana uchallikushpanachu kawsashunchisapa. Kunanka ñami atipanchisapana allita rurashpa kawsaya. ⁷ Wañudushina kashpanchikuna manana uchallikushpanachu kawsanchisapa.

⁸ Jesukristuwан tantalla wañudushina kashpanchikuna yachanchisapa paywan tantalla kawsananchikunata. ⁹ Yachanchisapa Jesukristu wañushkanmanta kawsamushka kashpa mana kutin wañunanta. Manana kutin wañunkanachu. ¹⁰ Jesukristu uchanchikunarayku wañushpa suk kutilla wañurkan. Chaymanta wañushkanmanta kawsamushpa Tata Dioswan tantalla paktanakushpa kawsan.

¹¹ Chashnashina kankunapish yuyaychi wañudushina kanaykichita amana uchallikushpa kawsanaykichipana. Yuyaychi Jesukristuwан kawsamudushina kanaykichita Tata Diosllata sirvishpa kawsanaykichipa.

¹² Chayta yuyashpa amana munaychinachu uchallikushpa kawsaya. Amana munanaykichillata rurashpanachu kawsaychi. ¹³ Ama nima layapi uchallikuychinachu. Munaychi allikunallata rurayta. Wañuymantaa kawsamudushina kashpaykichi Tata Diospa munananllata rurashpa kawsaychi.

¹⁴ Moisespa kamachikunankunata mana atipashpanchikuna kasuya yachanchisapa uchasapakuna kananchikunata. Kunanka Tata Dios kuyawashpanchikuna perdonawashkanchisapa. Chayrayku manana uchallikushpanachu kawsanchisapa.

Tata Diosllata kasushpa kawsananchikuna tiyan.

¹⁵ Mana Moisespa kamachikunankunata kasushkanchikunaraykuchu Tata Dios perdonawanchisapa. Payka kuyawashpanchikuna perdonawanchisapa. Tata Dios perdonawananchikunata yachashpa ¿uchallikushpallachu kawsashunchisapa? Ama nima layapi uchallikuyupachinachu.

¹⁶ Kankuna yachankichi patronpi trabajashpaykichi chay patronta allita

kasunaykichita. Kikikichipa munanaykichillata rurashpa kawsashpaykichika uchallikushpalla kawsaykankichi. Uchallikushpa kawsashpaykichi wañuynikichillata maskaykankichi. Chaymanta Tata Diosta kasushpa kawsashpaykichika paywan tantalla kushikushpa kawsankichi.

¹⁷ Kankuna manana uchallikushpanachu kawsaykankichi. Kunanka tukuy shunkuna Tata Diospa rimananta allita kasuykankichina. Chayrayku Tata Diosta agradesini. ¹⁸ Tata Dios perdonashuptikichi manana uchallikushpanachu kawsaykankichi. Kunanka Tata Diosllata kasushpa allita rurashpa kawsaykankichi.

¹⁹ Tukuy kaykunata parlachiykichi allita entiendinaykichipa. Mana chashna yachachiptini mana atipankichimanchu entiendiyta. Ñawpaka sukanan uchallikushpalla kawsak kankichi. Kunanka Tata Diosllata kasushpa allita rurashpa kawsanaykichi tiyan.

²⁰ Ñawpaka uchallikushpalla kawsashpaykichi mana munashkankichichu allita rurashpa kawsayta. ²¹ Uchallikushpa kawsashpaykichi ¿ima allikunatá surkushkankichi? Wañuynikichillata maskaykashkankichi.

Kunanka chay ñawpa uchallikushkaykichita yuyashpa pinkakunkichi. ²² Kunanka manana ñawpashinanachu uchallikushpa Tata Diosllata kasushpana kawsaykankichina. Manana yankamantanachu kawsaykankichi. Kunanka Tata Diosllata sirvishpa kawsashpaykichi sielman rinichi paywan mana tukuyniyulta kawsak. ²³ Uchallikushkanchikunaryku wañunanchikuna tiyan. Chashna kaptinpish Tata Dios sukanan kuyawashpanchikuna Señorninchi Jesukristu wañushkanrayku sielman pushawashunchisapa mana tukuyniyukta paywan kawsananchikunapa.

7

*Jesukristuta kreyishpa kawsashpanchikuna wañymanta
kawsamudushina kanchisapa.*

¹ Wawkinikuna, paninikuna, Moisespa kamachikunankunata riksinchisapa. Allita yachanchisapa wañunanchikuna diyakamanlla chay kamachikunankuna kasunanchikunata. ² Suk ejempluta parlachiykichi. Moisespa kamachikunankuna willawanchisapa kusayuk warmi kusanwan kawsanarpa kusan wañunan diyakaman. Kusan wañuptin chay warmika manana kusayuknachu kiparin. ³ Chay warmipa kusan kawsaykaptinra chikan ullkuwan tantanakushpaka uchallikun. Kusan wañuptin manana kusayukna kashpa kashkan kasaraya munashpa atipanman kasaraya. Kashkan kusayuk kashpa mana uchallikunchu.

⁴ Munanayni wawkinikuna, paninikuna, chay warmipa kusan wañushkanshina Jesukristu wañurkan. Wañushkanrayku ñukanchikunapish paywan tantalla wañudushina kashkanchisapa. Manana Moisespa kamachikunankunatachu kasunanchikuna tiyan. Kunanka Jesukristu kawsamushkanrayku ñukanchikunapish payllatana sirvik kanchisapa Tata Diosta kushichinanchikunapa.

⁵ Ñawpa uchallikushpa kawsaptinchikuna Moisespa kamachikunankuna munachiwashkanchisapa ashwan mana allita rurashpa kawsananchikunapa. Chaypina ashwan ashwanta uchallikushpa kawsashpanchikuna wañuyñinchikunata maskarkanchisapa.

⁶ Kunanka Jesukristuwán wañudushina kashpanchikuna manana uchallikushpanachu kawsanchisapa. Jesukristullata kreyishpa kawsashpanchikuna manana chay ñawpa killkadu kamachikunankunata kasushpanachu kawsanchisapa. Kunanka Tata Diospa Espiritu

yanapawaptinchikuna atipanchisapa Tata Diosllata sirvishpa mushuk layata kawsayta.

Kikinchikunalla mana atipanchisapachu allita rurayta.

⁷ Chashna alli mushuk layatana kawsashpanchikuna ichara rimanchimansapa Moisespa kamachikunankuna uchallichiwanchikunata. Ama chaytaka yuyapachichu. Chay kamachikunankuna mana tiyaptinka mana yachanchimansapachu imakunami uchaka nishpa. Moisespa kamachikunan willawanchisapa ama sukkunapa ima tiyapunankunata munananchikunapa. Mana chayta willawaptinchikunaka mana yachanchimansapachu sukkunapa tiyapunankunata munashpanchikuna uchallikuykananchikunata. ⁸ Moisespa killkadunpi willawaptinchikuna suk ima mana allita ama rurananchikunapa chaypira chay mana allikunata munananchisapa rurayta. Kamachikunankuna mana tiyaptinka mana yachanchimansapachu uchallikuykananchikunata.

⁹ Ñawpa manara chay kamachikunankunata yachashpanchikunara uchallikushpanchikunapish mana nimatashinachu kawarkanchisapa. Chaymanta kamachikunankunata yachashpanchikuna yachashkanchisapanu uchallikushkanchikunaryku wañunanchikunata. ¹⁰ Tata Dios kamachikunankunata kuwarkanchisapa paywan kawsananchikunapa. Chashna Tata Dios munaptinpish mana atiparkanchisapachu kasushpa kawsayta. Chayrayku wañunanchikuna tiyan.

¹¹ Ichara yuyanchimansapa tukuy kamachikunankunata allita kasuya atipananchikunata. Chashna yuyashpanchikuna kikinchikunalla llulachinakunchisapa. Chay kamachikunankunata mana kasuya atipashpanchikuna wañunanchikuna tiyan.

¹² Tata Dios kamachikunankunata kuwashkanchisapa yachachiananchikunapa allita rurashpa kawsananchikunapa. Chayrayku yachanchisapa sukmaman allima kananta. ¹³ Chashna allima kashpa ¿wañuymanchu kachawanchisapa? Manami chashnachu. Tata Diospa kamachikunankuna allima kashpa mana alli rurananchikunata kawachiwanchisapa sukmaman mana alli ucha kananta. Chashna kawachiwaptinchikuna yachanchisapa sukmaman sakra mana alli rurak runakuna kananchikunata. Chaypina uchallikushkanchikunaryku wañunanchikuna tiyan.

¹⁴ Yachanchisapa Tata Dios sukmaman allima kashpa allima kamachikunankunata kuwashkanchikunata. Chay kamachikunankuna allima kaptinpish uchallikushpalla kawsanchisapa. ¹⁵ Mana entiendinchisapachu imapami uchallikushpalla kawsanchisapa nishpa. Allita rurayta yachashpanchikunapish mana allitachu ruranchisapa. Mana munananchi ruranakunallata ruranchisapa. ¹⁶ Chashna mana munananchikunata rurashpanchikuna yachanchisapa Tata Diospa kamachikunankuna sukmaman allima kananta. ¹⁷ Chay mana munananchikunata rurashpanchikuna yachanchisapa uchasapa kananchikunata.

¹⁸ Yachanchisapa kikinchikunalla mana alli rurak kananchikunata. Yuyayninchikunapi allita rurayta munashpanchikunapish mana atipanchisapachu allita rurayta. ¹⁹ Allita rurayta munashpanchikunapish mana allillata ruranchisapa. Alli ruranata mana ruranchisapachu. ²⁰ Chashna modomata mana alli munananchikunata rurashpanchikuna yachanchisapa uchasapa kananchikunata.

²¹ Allita rurayta munashpanchikunapish yachanchisapa mana atipananchikunata allita rurayta. ²² Tukuy shunku munanchisapa Tata

Diospa kamachikunankunata rurayta. ²³ Chayta munashpanchikunapish uchasapa kashpanchikuna ishkay yuyayuk kanchisapa. Chayrayku mana atipanchisapachu allita rurashpa kawsayta. ²⁴ Chashna mana atipashpanchikuna allita rurayta sukaman llakinchisapa. ^cPití yanapawanchimansapa mana uchallikushpa kawsananchikunap? ²⁵ Tata Diosllami atipan! Señorninchi Jesukristu wañushkanrayku payka atipan yanapawayninchikunata allita rurashpa kawsananchikunap. Chayrayku payta agradesiyapachi. Kashkan willaykichi: Munanchisapa Tata Diospa kamachikunankunata kasuya. Chayta munashpanchikunapish uchasapa kashpanchikuna mana atipanchisapachu allita rurashpa kawsayta.

8

Tata Diospa Espiritunta kasushpa kawsashpanchikuna mushuk layatana kawsanchisapa.

¹ Kunanka Jesukristuwan tantalla kawsaptinchikuna Tata Dioska uchanchikunamanta perdonawanchisapa. Tata Diospa Espiritunta kasushpa mana kikinchikunapa munananchikunallata rurashpa kawsaptinchikuna Tata Dioska mana kastigawashunchisapachu. ² Jesukristuwan tantalla kawsaptinchikuna Tata Diospa Espiritunka atipachiwanchisapa amana uchallikushpa kawsananchikunapa. Yanapawanchisapa amana wañuyinchikunatana maskananchikunapa.

³ Mana alli rurak kashpanchikuna mana atipanchisapachu Moisespa kamachikunankunata kasushpa kawsayta. Tata Dios kastigawananchikunamanta mana kikinchikunalla atipanchisapachu kishpiyi. Chayrayku Tata Dios kikin wambran Jesukristuta kachamurkan iden ūukanchikunashina kay allpapi nasinanpa. Chashna Jesukristu runa kashpa uchanchikunaryku kruspi wañurkan ama Tata Dios kastigawananchikunapa. ⁴ Jesukristu wañurkan atipananchikunapa Tata Diospa alli kamachikunankunata kasushpa kawsayta. Tata Diospa Espiritunka yanapawanchisapa paypa munananta mana kikinchikunapa munananchikunata rurashpa kawsananchikunapa.

⁵ Suk runakuna mana allikunata rurashpa kawsashpanguna kikinkunapa munanankunallata rurashpa kawsansapa. ūukanchikuna Tata Diospa Espiritunta kasushpa kawsashpanchikuna Tata Diospa munananta rurashpa kawsanchisapa. ⁶ Chay kikinkunapa munanankunallata rurak runakuna wañuyninkunata maskaykansapa. ūukanchikuna Tata Diospa Espiritunta kasushpa kawsashpanchikuna Tata Diowan tantalla allita kushikushpa kawsanchisapa.

⁷ Chay kikinkunapa munanankunata rurak runakuna Tata Diosta chikninsapa. Mana munansapachu nima atipansapachu Tata Diospa kamachikunankunata kasushpa kawsayta. ⁸ Chayrayku kikinkunapa munanankunallata rurak runakuna mana atipansapachu Tata Diosta kushichiyyta.

⁹ ūukanchikuna manana kikinchikunapa munananchikunallata rurashpanachu kawsanchisapa. Tata Diospa Espiritun ūukanchikunapi kawsaptin payta kasushpa kawsanchisapa. Sukkuna mana Jesukristuta kasushpa kawsansapachu mana Espiritun paykunapi kawsaptin. ¹⁰ Uchanchikunaryku wañuy yachak runakuna kaptinchikunapish Tata Dios uchanchikunamanta perdonawashkanchikunaryku Jesukristu ūukanchikunapi kawsan. Chashna ūukanchikunapi kawsashpa yanapawanchisapa mushuk layata allita rurashpa kawsananchikunapa.

¹¹ Tata Diospa Espiritun Jesukristuta wañushkanmanta kawsachimurkan. Payllami wañushkanchikunamanta ñukanchikunatapish kawsachimuwashun-chisapa.

¹² Chayrayku wawkinikuna, paninikuna, tukuy chayta yachash-panchikuna manana kikinchikunapa munananchikunata rurashpanachu kawsananchikuna tiyan. ¹³ Kikinchikunapa munananchikunata rurashpa kawsashpanchikunaka wañuyninchikunata maskaykanchisapa. Chaymanta Tata Diospa Espiritun yanapawaptinchikuna manana munananchikunata rurashpana kawsanchisapa. Tata Dioswan tantalla kawsashunchisapa.

¹⁴ Tata Diospa Espiritun yanapawaptinchikuna Tata Diospa wambrankuna kanchisapa. ¹⁵ Manana Tata Diosta manchanchisapanachu mana alli patrontashina. Tata Diospa Espiritunta chaskishkanchisapa Tata Diospa wambrankuna kananchikunapa. Chayrayku atipanchisapa Tata Diosta willayta "Tataynimi kanki" nishpa. ¹⁶ Tata Diospa Espiritun ñukanchikunapi kawsashpa willawanchisapa Tata Diospa wambrankuna kananchikunata. ¹⁷ Tata Diospa wambrankuna kashpanchikuna paypa wambran Jesukristuwani tantalla kawsashunchisapa. Jesukristuwani tantalla kawsashpanchikuna kaypi sufrishpanchikunapish paywan tantalla sielupi sukaman kushikushunchisapa.

Shuyaykanchisapa sielman riya Tata Dioswan kushikushpa kawsak.

¹⁸ Kay allpapi sufrishpanchikunapish yachanchisapa sielupi Tata Dioswan tantalla kushikunanchikunata. Chayta yachashpa sufrinanchikunata kawanchisapa mana nimatashina. ¹⁹ Tukuy Tata Dios rurashkankuna sukaman shuyaykansapa Tata Diospa wambrankuna sielupi kushikushpa kawsananchikunata. ²⁰⁻²¹ Awilunchi Adan uchallikushkanrayku Tata Dios kikin munarkan tukuy rurashkankuna sukaman mawkayashpa usunankunapa. Chaymanta rimarkan suknin diya ñukanchikuna paywan sielupi kawsaptinchikuna tukuy rurashkankunatapish mushukta rurananta. Chaypina manana usunkasapanachu.

²² Yachanchisapa kunankaman tukuy Tata Dios rurashkankunaka iden wawayanayaykak warmishina sukaman sufrishpa llakishpa nanayta maliyikanankunata.

²³ Kunanka tukuy Tata Dios rurashkankunawan tantalla llakishpa padesinchisapa. Tata Dioska Espiritunta kuwashkanchisapa sukaman sufrishpanchikunapish kushikushpalla kawsananchikunapa. Allita yachanchisapa suknin diya sielupi kawsashpa sukaman ashwan allita kushikushpa kawsananchikunata. Shuyaykanchisapa Tata Dios wañushkanchikunamanta kawsachimuwananchikunata paywan tantalla sielupi kawsananchikunapa. ²⁴ Yachanchisapa suknin diya sielupi Tata Dioswan tantalla kawsananchikunata. Kunanka manara chaypi kawsanchisaparachu. Tata Dios wañushkanchikunamanta kawsachimuaptinchikuna manana kawsachimuwananchikunata shuyashunchisapanachu. ²⁵ Manara sielupi kawsashpanchikunara chayman riya mana shaykushpalla shuyaykanchisapa.

²⁶ Chaymanta imatapish sufriptinchikuna Tata Diospa Espiritunka yanapawanchisapa. Chashna yanapawashpanchikuna mana yachaptinchikuna imashnami roygashunchisapa nishpa payna llakichiwashpanchikuna ñukanchikunapa royan. Mana entiendina laya rimanata rimashpa Tata Diosta royan yanapawananchikunapa. ²⁷ Tata Diospa munananllata royan. Chayrayku Tata Dios yuyayninchikunata allita riksishpa yachan imatami Espiritun ñukanchikunapa roygaykan nishpa.

Tata Dios yanapawaptinchikuna paymanta mana ni pi ashuchiwashunchisapachu.

28 Tata Dios akllawashkanchisapa paypa munananta rurananchikunapa. Yachanchisapa payta kuyaptinchikuna paypa munananta ruraptinchikuna tukuy layata allininchikunapa rurananta.

29 Ñawpamantapacha Tata Dios riksiwashpanchikuna akllawashkanchisapa wambran Jesukristu allita rurashpa kawsashkanshina kawsananchikunapa. Chashna Jesukristu kawsashkanshina kawsashpanchikuna paypa wawkinkunashina paninkunashina kashpanchikuna tukuy pimanta payta ashwanta kuyanchisapa. **30** Ñawpamantapacha Tata Dios akllawashpanchikuna kayawarkanchisapa paypa wambrankuna kananchikunapa. Chashna kayawashpanchikuna perdonawarkanchisapa. Perdonawashpanchikuna sukaman yanapawanchisapa Jesukristu kawsashkanshina allita rurashpa sukaman kushikushpa kawsananchikunapa.

31 Tukuy chayta yachaykashpa ¿ima ashwantatí rimashunchisapa? Tata Dios sukaman kuyawashpanchikuna yanapawaptinchikuna mana ni pi atipankasapachu paymanta ashuchiwayninchikunata. **32** Tata Dios kuyawashpanchikuna wambran Jesukristuta kachamurkan ñukanchikunaryku wañunarpa. Wambran Jesukristuta kachamushka kashpa paywan tantallata tukuy layapi yanapawashunchisapa.

33 Tata Dios akllawashpanchikuna kikin perdonawaptinchikuna mana ni pi atipankasapachu paypi chatawayninchikunata mana alli rurak kananchikunata. **34** ¿Pití mana tukuyniuk ninaman kachawanchimansapa? Mana ni pi. Jesukristu ñukanchikunaryku wañurkan. Wañushkanmanta kawsamurkan. Kunanka Tata Diospa alli ladunpi tiyaridumi, ñukanchikunapa roygaykan yanapawananchikunapa.

35 ¿Pití michawanchimansapa Jesukristu kuyawananchikunamanta? Mana ni pi. Ichara runakuna chikniwashpanchikuna padesciwanchimansapa. Ichara yarkanchimansapa. Llachapanchikuna illanman. Mana alli rurak runakuna raslla wañuchiwanayanchimansapa. Tukuy chayta padesiptinchikunapish Jesukristuka kuyawanchisapallami. **36** Tata Diospa killkadunpi riman:

“A, Tata Dios, kanta kasushpa kawsaptinikuna imay orapish kaptin runakuna wañuchiwanayakansapa.

Iden ovejakunashina kanisapa pushawanankunapa wañuchiwaksapa.”

37 Chashna wañuchiwanayaptinchikunapish Jesukristu sukaman kuyawashpanchikuna yanapawaptinchikuna ashwan allita atipanchisapa payllata kasushpa kawsaya. **38** Allita yachanchisapa wañuptinchikuna manara wañuptinchikunapish Tata Dios sukaman kuyawananchikunallata. Mana nima laya angelkuna nima laya supaykuna nima kamachikuk supaykuna nima kamachikuk runakuna michawanchisapachu Tata Dios kuyawananchikunamanta. Mana ni kunan nima shamuk tiempu Tata Dioska kunkankachu kuyawayninchikunata. **39** Mana nima kay allpapi kamachikukkuna, nima sielipi kamachikukkuna nima Tata Dios rurashkankuna michawashunchisapachu Tata Dios kuyawananchikunamanta. Tata Dios Señorninchi Jesukristuta kachamurkan ñukanchikunapa wañunarpa yachananchikunapa sukaman kuyawananchikunata.

9

Pablu sukaman llakirkan judiyumasinkuna mana Jesukristuta kreyinayaptinkuna.

¹ Judiyumasinkuna, ūuka Jesukristuta kreyik kashpayni kuskata mana llullakushpa suk imata willaykichi. Shunkuynipi Tata Diospa Espiritun willawan mana llullakushpa rimanaynita. ² Sukaman llakiptini shunkuyni nanan kankuna Jesukristuta mana kreyinayaptikichi. ³ Munayman Tata Dios ūkata Jesukristumanta ashuchiwashpa kastigawanana paama kankunata kastigashunaykichipa.

⁴ Judiyumasinkuna, ūukanchikuna awilunchikuna Isaelpa mirakninkunami kanchisapa. Tata Dioska akllawarkanchisapa wambrankuna kananchikunapa. Tata Dios llipyak puyupi awilunchikunata yachachiksapa. Paykunawan paktuta rurarkan. Moisepsa kamachikunankunata kurkansapa. Yachachirkansapa payta kuyashpa kawsanankunapa. Willarkansapa salvakukninkunata kachamunanta.

⁵ ūukanchikuna Abrahampa Isakpa Jakobopa mirakninkuna kanchisapa. Paykunapa mirakninkunamanta Tata Diospa kachamushka wambran Jesukristu nasirkan. Payka Dios kashpa tukuy layapi kamachikun. Chayrayku mana tukuyniyukta akuychi alabaypachi.

Tata Dios tukuy rimashkanta ruranka.

⁶ Judiyumasinchikuna awilunchikuna Isaelpa mirakninkuna kashpankunapish mana tukuychu Tata Diospa wambrankuna. Chayrayku Tata Dios mana yanapansapachu. Tata Dioska rimashkanta tukuy kreyik runakunapa ruran. ⁷ Mana tukuy awilunchikuna Abrahampa mirakninkunachu Tata Diospa wambrankuna. ūawpa tiempu Tata Dioska Abrahamtaka willarkan: "Wambrayki Isakpa mirakninkunallata yanapashasapa."

⁸ Chayta rimashpa Tata Dios yachachiwanchisapa judiyumasinchikuna Abrahampa mirakninkuna kashpankunapish mana tukuychu Tata Diospa wambrankuna. Tata Dios tukuy rimashkanta rurananta kreyik runakunallata akllarkansapa wambrankuna kanankunapa. ⁹ Tata Dios Abrahamtaka willarkan: "Suk tiempukaman shamuptini warmiki Sara wawayanka." Abrahamka kreyirkan Tata Dios chay willashkanta rurananta.

¹⁰ Chaymanta ūawpa awilunchikuna Isakpa warmin Rebeka mellisu wambrakunata wawayarkan. ¹¹⁻¹³ Chay mellisukuna manara nasishpanku-nara manara nima allita nima mana allita ruraptinkunara Tata Dios Rebekata willarkan: "Primeru nasik wawaykimi washa nasik wawaykita sirvinka." Chashnalla Tata Dios killkadunpi riman: "Jakobota kuyashpa yanaparkani. Wawkin Esawta mana yanaparkanichu." Chashna Tata Dios rimashpa yachachiwanchisapa runakuna manarapish allita mana allita ruraptinkuna kikin munashpa paykunata akllansapa paypa munananta ruranankunapa.

¹⁴ Tata Dios munashkan runakunallata yanapaptin ūrimanchimansapachu Tata Dios mana alli rurak kananta? Ama chashnaka rimaypachichu.

¹⁵ ūawpa tiempu Tata Dioska Moisesta willarkan: "Pitapish kaptin munashpayni yanapasha. Pitapish kaptin munashpayni llakichisha."

¹⁶ Chayta rimaptin yachanchisapa mana munashkanchikunaryakuchu nima rurashkanchikunaryakuchu Tata Dioska llakichiwashpanchikuna yanapawananchikunata.

¹⁷ Chaymanta ūawpa killkadunpi Tata Dios Egipto llaktapa kamachikuk Faraonta willarkan: "ūukami churashkayki kamachikuk kanaykipa

yachanaykipa ñuka tukuy laya atipak kanaynita. Munani tukuy allpapi kawsakkuna riksiwanankunapa.” ¹⁸ Chashna Tata Dios rimaptin yachanchisapa kikin munashpa suk runakunata llakichishpa yanapanankunata. Kikin munashpa sinchi shunkuyuk runakunata sakensapa ashwan sinchi shunkuyuk tukunankunapa.

¹⁹ Ichara rimankichiman: “Mana ni pi atipanmanchu Tata Diosta michayta kikinpa munananta rurananpa. Chashna kaptin ¿imapatí Tata Dios runakunata kastigankasapa?” ²⁰ Chashna rimashpaykichika mana allitachu rimaykankichi. Ama Tata Diosta washanchashpa yuyaychichu mana alli rurak kananta. Metomanta ruradu olla rurak runata mana willanmanchu: “¿Imapatí mana allita rurawashkanki?” ²¹ Chay ollata rurak runaka munashkan layallata ruran. Metomanta suk ollakunata ruran fiestakunallapa. Chay metollamanta ollakunata ruran tukuy diya traba-jachinankunapa.

²² Tata Diospish munashkan layata ruran. Uchasapa runakunata kastiganan tiyan kawachikunarpa tukuy laya atipak kananta. Chashna kaptinpish mana piñakushpara manara chay kulluchinanpa runakunata kastigashkasaparachu. Chaymanta ashwan mana allita rurashpa kawsaptinkuna kastiganankuna tiyan. ²³ Chaymanta Tata Dios ñukanchikunata kuyawashpanchikuna perdonawashkanchisapa sielman rinanchikunapa paywan tantalla kawsak. Ñawpamantapacha willawashkanchisapa paywan tantalla kushikunanchikunapa. ²⁴ Judiyu runakuna mana judiyu runakuna kaptinchikunapish Tata Dios akllawashkanchisapa paypa wambrankuna kananchikunapa.

²⁵ Chay ñawpa yachachikuk Oseaspá killkadunpi Tata Dioska rimarkan: “Mana ñukapa kashkakunata willashasapa wambraynikuna kanankunapa. Mana kuyadu runakunata willashasapa kuyaduynikuna kanankunapa.”

²⁶ Chay killkadunllapi riman:

“Kankuna mana Tata Diospachu kashkankichi.

Kunanka kawsak Tata Diospa wambrankunana kankichi.”

²⁷ Chay ñawpa yachachikuk Isaiyasipish yachachikushpa judiyumasinkunapa rimarkan: “Awilunchikuna Israelpa mirakninkuna playashina mana yupaypa laya kashpapist paykunamanfa sukkunalla Tata Diospa kastigmanta kishpinkasapa. ²⁸ Utkana Tata Dioska rimashkanta rurashpa tukuy uchallikuk runakunata sukaman kastigankasapa.” ²⁹ Chay yachachikuk Isaiyaslla rimarkan:

“Tukuy layata atipak Tata Dios mana llakichiwashpanchikunaka Sodomawan Gomorra llaktatashina ñukanchikunatapish kulluchiwanchimansapa.”

Judiyu runakuna mana Tata Diosta kreyinayarkansapachu.

³⁰ Tata Dios tukuy chayta rimaptin ¿imatí rimanchimansapa? Mana judiyu runakuna mana nima yuyashkasapachu Tata Dios paykunata perdonanankunata. Mana yuyashpankunapish Tata Diosta kreyiptinkuna payka perdonashkasapa. ³¹ Chaymanta judiyu runakuna Moisespa kamachikunankunata sukaman kasuya munashpankunapish mana atiparkansapachu. Chayrayku Tata Dioska mana perdonarkansapachu.

³² ¿Imapatí Tata Dios paykunata mana perdonarkansapa? Judiyu runakunaka yuyarkansapa kikinkunapa alli ruranankunarykulla Tata Dios perdonanankunata. Mana munarkansapachu payta kreyishpa kawsayta Tata Dios perdonanankunapa. Paykunaká sinchi rumpi mitkakuksinami karkansapa. ³³ Tata Diospa killkadunpi riman:

“Sion llaktaynipi suk sinchi rumitashina churasha.
Chaypi aypa runakuna mitkakunkasapa.
Chaymanta chay sinchi rumipi kimikukkunata mana llullachishpa yana-pashasapa.”

10

Pablu sukaman munan judiyumasinkuna Jesukristuta kreyishpa kawsanankunapa.

¹ Wawkinikuna, paninikuna, tukuy shunku munashpa Tata Diosta sukaman roygani judiyumasinkunata salvanankunapa. ² Allita yachani paykuna sukaman munanankunata Tata Diosta sirviyta. Payta sirviyta munashpapkunapish mana munansapachu kreyiyta Jesukristu salvakukninkuna kananta. ³ Mana yachanayansapachu Tata Dioslla uchankunamanta salvanankunata. Munansapa kikinkuna rurashkankunaryakkulla Tata Dios salvanankunata. Mana munansapachu Jesukristuta kreyiptinkuna Tata Dios salvanankunapa. ⁴ Jesukristulla tukuy Tata Diospa kamachikunankunata kasushpa kawsarkan. Chayrayku paylla tukuy payta kreyik runakunata atipan salvayta.

⁵ Runakuna kikinkunalla Tata Diospa kastigunmanta kishpiyta munashpa tukuy kamachikunankunata allita rurashpa kawsanankuna tiyan. Moiseska killkarkan: “Suk runa allita tukuy kamachikunankunata kasshpa kawsaptinra Tata Dioska kastigananmanta salvanka.” ⁶ Chaymanta tukuy kamachikunankunata mana kasuya atipaptinchikuna Tata Dios rimarkan Jesukristullata kreyiptinchikuna salvawananchikunata. Moisepa killkadunpi riman: “¿Pítí atipanman sieluman riyya salvawakninchikunata pushamuk?” Mana ni pi atipanchimansapachu. Chayrayku Tata Dios kikin munashpa Jesukristuta kachamurkan salvawananchikunapa. ⁷ Moisepa killkadunpi riman: “¿Pítí tuta likidu uchkuman atipanman urayayta wañuduta surkumuk kashkan kawsamunarpa?” Mana ni pi. Tata Dioslla Jesukristuta wañushkanmanta kawsachimurkan.

⁸ ¿Imatá yachachiwanchisapa chay Moisepa rimanan? Paypa killkadunpi riman: “Tata Dioska rimanan allita entiendichishushkankichi tukuy shunku kreyishpa allita rimashpa kawsanaykichipa.” Chay rimananllata ñukaykuna yachachiykaykichi Jesukristullata kreyinaykichipa.

⁹ Rimanchikuna tiyan Jesukristu tukuy layapi kamachiwakninchikuna kananta. Tukuy shunku kreyinanchikuna tiyan Tata Dios wañushkanmanta kawsachimushkanta. Chayta kreyiptinchikuna Tata Dios salvawanchisapa. ¹⁰ Tukuy shunku chayta kreyiptinchikuna Tata Dioska uchanchikunamanta perdonawanchisapa. Jesukristu kamachiwakninchikuna kananta rimaptinchikuna Tata Dioska salvawanchisapa.

¹¹ Tata Diospa killkadun riman: “Tata Dios mana llullakuk kaptin tukuy payta kreyik runakuna mana llullachiduchu kankasapa.” ¹² Jesukristuka tukuy judiyu runakunapa tukuy mana judiyu runakunapish kamachikukninkunami. Suk imata mañaptinchikuna sukaman allita yanapawanchisapa. ¹³ Pipish kaptin Señorninchi Jesukristuta salvanankunapa roygaptinkuna payka salvankasapa.

¹⁴ Chaymanta ¿imashnatí Jesukristuta mana kreyik runakuna roygankasapa yanapanankunapa? ¿Imashnatí payta kreyinkasapa manara yachashpara Jesukristu salvakuk kananta? ¿Imashnatí yachankasapa salvakuk kananta mana ni pi yachachiptinkuna? ¹⁵ Mana ni pi yachachikukkunata kachaptinkuna ¿imashnatí rinkasapa yachachikuk? Tata Diospa killkadunpi

riman: "Aypa runakuna Tata Dios uchanchikunamanta salvawananchikunata yachachikuypi purinsapa. Tata Dios paykunata sukaman kushichin-sapa."

¹⁶ Chay yachachikuk runakuna Tata Diospa rimananta yachachikuptinkunapish aypa runakuna mana kreyinayarkansapachu. Chay ñawpa yachachikuk Isaiyas killkadunpi riman: "A Tata Dios, rimanaykita yachachikuptinipish aypa runakuna mana kreyinayansapachu."

¹⁷ Chashna Isaiyas rimaptinpish ñukanchikuna Jesukristu salvawananchikunata yachachikuptinchikuna aypa runakuna chayta uyarishpa tukuy shunku kreyinsapa. ¹⁸ Kunanka tapuykichi: ¿Manachu tukuy maypi judiyu runakuna Tata Diospa rimananta uyarishkasapa? Ariya tukuy maypimi uyarishkasapa. Tata Diospa killkadun riman:

"Tukuy maypimi alli yachachikkunkuna chayashkasapa.
Tukuy allpapi kuchun mañanpi yachachikuypi purishkasapa."

¹⁹ Kashkan tapuykichi. ¿Manachu judiyumasinkuna yachashkasapa Tata Dios tukuy allpapi kawsak runakunata munananta vaysapsata? Ariya paykunaka yachashkasapa. Moisespa killkadunpi Tata Dioska riman:
"Ñuka Israel runakunata piñachishasapa mana judiyu runakunata salvash-payni.

Mana entiendik runakunata kuyaptini kawashpankuna piñakunkasapa."

²⁰ Chaymanta Isaiyas mana manchakushpa Tata Dios rimashkanta killkar-kan:

"Mana maskawak runakuna ñukata tariwashkasapa.

Mana munawak runakunata yachachishkanisapa riksiwanankunapa."

²¹ Chaymanta Isaiyasa killkadunpi Tata Dioska riman: "Makinita kicharishpa Israel runakunata kayaptinipish paykunaka mana nima mu-nawansapachu nima kasuwanayansapachu."

11

Judiyu runakunamanta sukkunalla Tata Diosta kasushpa kawsansapa.

¹ Kunan tapuykichi: ¿Tata Dios tukuy judiyu runakunatachu sakiwashkan-chisapa? Manami tukuytachu sakiwashkanchisapa. Ñukapish judiyu runami kani. Ñawpa awilunchi Abrahampa miraknimm kani. Benjaminpa ayllunmi kani. ² Abrahampa tiempumantapacha Tata Dios judiyukunata akllawashkanchisapa paypa wámbrankuna kananchikunapa. Manami tukuytachu sakiwashkanchisapa. ¿Manachu yuyankichi chay alli yachachikuk Eliyas Tata Diosta willashkanta? Payka judiyumasinkuna chatashpa Tata Diosta willarkan: ³ "A Tata Dios, judiyumasinkuna alli yachachikuk runakunata wañuchiwashkasapa. Kanpa altarnikikunata urmachishkasapa. Ñukallata mana wañuchiwashkasapachu. Ñukatapish wañuchiwanayaykansa."

⁴ Eliyas chayta willaptin Tata Dioska aynirkana: "Manami kanllachu kish-pishkanki. Ñuka kanchis waranka kasuwak judiyumasikunata yanapaptini mana kunkurikushkasapachu ruradu dios Baalta kuyanankunapa."

⁵ Chashnashina kunanpish Tata Dios judiyumasinchikunamanta sukkunallata kuyawashpanchikuna yanapawaykanchisapa payta kreyishpa kawsananchikunapa. ⁶ Tata Dios kikin munashpa kuyawashpanchikuna yanapawaykanchisapa. Mana ñukanchikuna allita rurananchikunarykuchu Tata Dios yanapawanchisapa. Ñukanchikunapa rurananchikunarykulla Tata Dios yanapawashpanchikunaka mana kikinlla kuyawashpanchikunachu yanapawanchimansapa.

⁷ Tukuy chaykunata yakashpa ¿imatá entiendinchisapa? Aypa judiyumasinchikuna Tata Dios yanapanankunata munaptinkunapish payka mana yanapashkasapachu. Chaymanta ñukanchikuna Jesukristuta kreyiptinchikuna Tata Diroska akllawashpanchikuna yanapawashkanchisapa. Judiyumasinchikuna Jesukristuta mana kreyishpankuna sinchi shunku tukushkasapa.

⁸ Tata Dirosa killkadunpi israel runakunapa rimarkan: “Mana Tata Diosta kreyiptinkuna payka sakirkansapa mana entiendik kanankunapa. Kunankaman mana nimata entiendinsapachu. Ñawinkuna tiyaptinpish mana kawakukschina tukunsapa. Rinrinkuna tiyaptinpish mana uyarikukschina tukunsapa.”

⁹ Chaymanta ñawpa awilunchi Davidpa killkadunpi riman: “A Tata Dios, chay chikniwak runakuna kushikushpa allita mikuptinkuna kanka suk trampapi nitichikshina kastigankisapa.

¹⁰ Kanta mana kreyishuptinkuna yuyayninkunata pantachichipunkisapa rimanaykita ama entiendinankunapa.

Mana entiendishpankuna llashak karga aparidushina sukaman llakishpa kawsankasapa.”

Tata Dios mana judiyu runakunata yanapankasapa.

¹¹ Kashkan tapuykichi: ¿Tata Dios chay mana kasunayak judiyu runakunata sakishkasapachu ama kutin payta kasunankunapa? Manami. Tata Dirosa munan kashkan kasunankunapa. Judiyu runakuna mana Tata Diosta kasunayaptinkuna payka munarkan mana judiyu runakunata salvaysapata. Munarkan judiyu runakunapish chayta kawashpankuna kashkan animukushpa payta kuyashpa kasushpa kawsanankunapa. ¹² Judiyu runakuna mana Tata Diosta kasuptinkuna payka tukuy allpapi kawsak mana judiyu runakunata sukaman tukuy layapi yanapashkasapa. Chaymanta judiyu runakuna kashkan Tata Diosta kasuptinkunaka payka tukuy runakunata sukaman ashwanta yanapankasapa.

¹³ Kunanka kankuna mana judiyu runakunata parlachinayaykichi. Tata Diroska kachamuwashka kankunata yachachinaynipasapa. Chayrayku sukaman kushikushpa yachachiykichi. ¹⁴ Chashna kankunata yachachishpayni munani judiyumasinkunatapish animuchiyyta kankunashina Jesukristuta kreyinankunapa. ¹⁵ Tata Dirosa judiyumasinkunata sakiptin mana judiyukuna atiparkansapa paywan tantalla kushikushpa kawsaya. Chaymanta judiyumasinkuna kashkan Tata Diosta kasuptinkuna payka ashwan aypa runakunata kushichinkasapa. Paykunaka wañuymanta kawsamudushina kankasapa.

¹⁶ Kunan suk ejempluta parlachiyykichi: Ñawpa tiempu ñukaykunapa awiluynikuna Tata Diosta kasushpankuna paypa wambrankuna karkansapa. Ñukanchikunapish Jesukristuta kreyishpanchikuna Tata Dirosa wambrankuna kanchisapa. Chay ñawpa Tata Diosta kasuk awiluynikunaka kaspipa sapinshina karkansapa. Ñukanchikuna Jesukristuta kreyishpanchikuna chay kaspipa ramankunashinami kanchisapa. Paykunapish ñukanchikunapish Tata Diospami kanchisapa.

¹⁷ Suk judiyumasinkuna Tata Dirosmanta ashurkansapa. Paykunaka alli olivo kaspipa tipidu ramankunashinami. Kankunaka mana judiyu runakuna sachapi wiñadu olivo kaspipa ramankunashinami kankichi. Tata Diroska kankunataka chay alli tarpudu olivo kaspipi apichishushkankichi. Chay alli olivo kaspipi apichidushina kaptikichi chay kaspipa sapin kawsachishunkichi. Awiluynikuna Tata Diosta kasushkankunaryaku kankunapish allita yachankichi Tata Diosta kasushpa kawsaya.

18 Tata Diosta kasuk judiyu runakuna chay olivo kaspipa ramankunashinami. Kankuna chay alli olivo kaspipi apichidu ramankunashina kashpaykichi ama yuyaychichu judiyumasanamanta ashwan alli kanaykichita. Allita yuyaychi chay kaspipa sapinrayku kawsanaykichita. Alitta yuyaychi Tata Dios awiluynikunata yanapashkankunaryku kankunatapish yanapashuykanaykichita.

19 Ichará yuyaykankichi alli kashkaykichirayku Tata Dios mana alli ramankunata tipishkanta kankunata olivo kaspipi apichishunaykichipa.

20 Ama chashnaka yuyaychichu. Tata Dioska chay ramankunata tipirkana payta kreyishkankunaryku. Chay kaspipi Tata Dioska kankunata apichishushkankichi payta allita kreyishkaykichirayku. Ama yuyaychichu kankunalla alli rurak kanaykichita. Kushikushpa Tata Diosta kasushpa kastigashunaykichita manchashpa kawsaychi. **21** Judiyu runakuna chay kikin olivo kaspipa ramankunashina karkansapa. Tata Dioska paykunata mana perdonarkansapachu mana payta kreyiptinkuna. Kankunatapish mana perdonashunkichichu mana payta kreyiptikichi.

22 Mash allita yuyaychi. Tata Dios sukaman kuyawashpanchikunapish mana allita ruraptinchikuna kastigawanchisapa. Mana kreyinayak judiyumasinikuna mana allita ruraptinkuna Tata Dios kastigarkansapa. Kankuna payta kreyiptikichi kuyashushpaykichi yanapashushkankichi. Chayrayku Tata Diosta allita kreyishpalla kawsanaykichi tiyan. Mana allita rurashpa kawsaptikichika kankunatapish kastigashunkichi. **23** Chaymanta mana kasunayak judiyumasinikuna kashkan Tata Diosta kreyiptinkunaka payka kashkan yanapankasapa. Paykuna olivo kaspipa tipidu ramanshina kaptinkuna Tata Dioska paykunata atipan kashkan apichiyya. **24** Kankuna mana judiyu runakuna kashpaykichi sachapi wiñadu olivo kaspipa ramanshina kashkankichi. Tata Diosta kreyiptikichi payka chaskishushpaykichi yanapashushkankichi. Alli olivo kaspipi apichishushkankichi. Chaymanta judiyumasinikuna kashkan Tata Diosman kutimuptinkuna payka kushikushpa chaskinkasapa. Paykuna kikin olivo kaspipa ramankunashina kashpankuna Tata Dioska alli olivo kaspipi kashkan apichinkasapa.

Tata Dios judiyu runakunata kuyashpa munan yanapaysapata.

25 Wawkinikuna, paninikuna, munani Tata Diospa ñawpa pakadu yuyayinta yachanaykichipa. Chayta yachashpaykichi ama yuyanakuychichu judiyumasinikunamanta ashwan alli yachak kanaykichita. Ariya suk judiyumasinikuna shunkunkunata sinchiyachishkasapa aypa mana judiyu runakuna Jesukristuta kreyinankunakaman. **26** Chaypina Tata Dioska tukuy payta kreyik judiyu runakunatapish uchankunamanta salvankasapa. Tata Dios killkadunpi riman:

“Sion llaktamanta suk salvakuk runa shamunka judiyu runakunata yanapak amana uchallikunankunapa.

27 Paykunawan suk paktuta rurasha tukuy mana alli rurashkankunamanta perdonanaynipa.”

28 Judiyumasinikuna Jesukristu salvawananchikunata mana kreyinayashpankuna Tata Diosta chikninsapa kankuna atipanaykichipa kreyikushpa kawsayta. Judiyumasinikuna Tata Diosta chikniptinkunapish ñawpa awiluynikunata akllashkankunaryku payka kuyansapalla. **29** Tata Dios ñawpa awiluynikunata willarkansapa mirakninkunata kuyashpa yanapananankunapa. Chayta willashkankunaryku yanapankasapa. Tukuy rimashkanta ruranan tiyan.

30 Ñawpa tiempu kankunaka Tata Diosta mana kasushkankichichu. Kunanka judiyumasinikuna mana Tata Diosta kasunayaptinkuna

payka kankunata llakichishunkichi. ³¹ Chaymanta judiyumasinikuna Tata Diosta mana kasunayaptinkunapish suknin diya kasuptinkuna paykunatapish kankunatashina kuyashpa yanapankasapa. ³² Judiyu mana judiyu runakuna Tata Diosta kasushkanchikuñarayku payka yachachiwanchisapa tukuy runakuna karselpishina kananchikunata. Chayta yachachiwashpanchikuna munan tukuyta llakichiwashpanchikuna yanapawayninchikunata.

³³ Tata Dioska sukaman allimami. Sukaman tukuy laya alli yachakmi. Sukaman tukuy layata entiendikmi. Mana ni pi atipanchisapachu paypa yuyayninkunata yachayta. Mana atipanchisapachu ruranankunata entiendiyta. ³⁴ Mana ni pi Tata Diospa yuyayninkunata entiendinchisapachu. Mana ni pi Tata Diosta nimata yachachinchimansapachu. ³⁵ Mana ni pi Tata Diosta suk imata kushkanchisapachu mañananchikunapa kutichiway nishpa. ³⁶ Tata Dioska tukuy laya tiyakta rurarkan. Chashna rurashka kashpa paylla tukuy layapi kamachikun. Tukuy laya tiyakmi payllapa. Chayrayku ñakuychi payllata alabaypachi! Chashna kachun.

12

Pablu yachachikun imashnamí Tata Diosta allita kasushpa kawsashun-chisapa nishpa.

¹ Wawkinikuna, paninikuna, Tata Dios sukaman kuyawaptinchikuna tukuy shunku payta kuyashpa payllapa munananta rurashpa kawsananchikuna tiyan. Chayrayku roygaykichi sufrishpaykichiipish Tata Diosta kasushpa kawsanaykichiipa. Chashna kasushpa kawsashpaykichi payta kushichinkichi. ² Ama Tata Diosta mana kasunayak runakunapa amañanankunata rurashpa kawsaychichu. Mana alli ruranaykichiita sakishpa allita rurayllata yuyaychi allita rurashpa kawsanaykichiipa. Chaypirami atipankichi entiendiyta Tata Diospa munananta. Payka munan ashwan ashwanta payta kasushpa payta kushichishpa allita rurashpa kawsanaykichiipa.

³ Tata Dios yachachikuk kachamuwaptin tukuy kankunata willaykichi: Allita yuyaykuychi kreyiptikichi ima laya ruranakunatami Tata Díos atipachishushkankichi rurayta nishpa. Ama yuyaychichu kikikichilla tukuy laya yachak kanaykichiita.

⁴ Ñukanchikunapa kuerpunchikunapi tiyawanchisapa rikchak layanchikuna. Tukuy chaykunaka chikan chikan layata yanapawan-chisapa. ⁵ Chashnashina Jesukristuta kreyishpanchikuna aypa kashpanchikunapish suk kuerpushinalla kanchisapa sukwani sukwani yanapanakushpa kawsananchikunapa.

⁶ Tata Dios kikin munashpa tukuy ñukanchikunata atipachiwanchisapa chikan chikan layakunata rurayta. Suk ñukanchikunata atipachiwanchisapa pay ruranayananta yachachikunanchikunapa. Chashna atipachiwaptinchikuna payta kreyishpa ruranayananta yachachikunanchikuna tiyan.

⁷ Suk ñukanchikunata atipachiwanchisapa supta supta yanapananchikunapa. Chashna atipachiwaptinchikuna allita yanapakunanchikuna tiyan. Suk ñukanchikunata atipachiwanchisapa paypa rimananta yachachinanchikunapa. Chashna atipachiwaptinchikuna allita yachachikunanchikuna tiyan. ⁸ Suk ñukanchikunata atipachiwanchisapa supta supta animuchikuya Jesukristuta ashwan allita kreyishpa kawsanankunapa. Chashna atipachiwaptinchikuna allita animuchikunanchikuna tiyan. Suk imanchikunawan maykanta yanapashpa kushikushpalla kunanchikuna tiyan. Kamachikuk kashpanchikuna

kushikushpalla allita kamachikunanchikuna tiyan. Maykan mana nimayukta yanapashpanchikuna kushikushpalla yanapananchikuna tiyan.

Tata Diospa wambrankuna kashpanchikuna allita rurashpa kawsananchikuna tiyan.

⁹ Kankuna Tata Diospa wambrankuna kashpaykichi sukwan sukwan kuyanakuychi. Allita rurashpa kawsaychi. Amana munaychinachu mana allita rurashpa kawsayta. ¹⁰ Jesukristuta kreyik runakuna kashpaykichi sukwan sukwan kuyanakuychi. Sukwan sukwan yanapanakushpa kasanakushpa kawsaychi.

¹¹ Mana killakushpa kushikushpalla tukuy shunku Señorninchi Jesukristuta sirvishpaa kawsaychi.

¹² Kushikushpa shuyaychi sielman rinaykichita. Padesishpaykichipish Jesukristuta kreyishpalla kawsaychi. Ama kunkaychichu Tata Dioswan parlayta.

¹³ Jesukristuta kreyikmasikichipa suk iman mana tiyaptin yanapanaykichi tiyan. Chikan llaktamanta Jesukristuta kreyikmasinchikuna shamuptin kushikushpalla wasikichipi chaskinaykichi tiyan.

¹⁴ Runakuna sufrichishuptikichi Tata Diosta roygaychi yanapanankuna. Ama chiknishpa maldisichichu.

¹⁵ Suk runakuna kushikuptinkuna paykunawan tantalla kushikuychi. Sukkuna llakishpa wakaptinkuna paykunawan tantalla wakaychi.

¹⁶ Sukwan sukwan allillapi kawsaychi. Ama kreyinakuychichu alli rurak kanaykichita. Tukuy alli modoyuk alli yuyayuk runakunawan kuyanakushpa kawsaychi. Ama kikikichilla yuyaychichu alli yachak kanaykichita.

¹⁷ Maykan runa padesischishuptikichika ama kutipaychichu. Allilata rurayta munaychi tukuy runakuna yachanankunapa Tata Diospa wambrankuna kanaykichita.

¹⁸ Runakuna chiknishuptikichipish munaychi kushikushpalla mana aynishpa paykunawan allita kawsayta.

¹⁹ Munanayni wawkinikuna, paninikuna, maykan runa padesischishuptikichi ama munaychichu chiknishpa kutipayta. Kawapayaychilla Tata Dioslla kastiganankunapa. Tata Dios killkadunpi riman: “Ñukalla yachani tukuy mana alli rurak runakunata kastigayta. Ñukalla kastigashasapa.”

²⁰ Chaymanta Tata Dios killkadunpi willawanchisapa: “Chiknishuknikichi runakuna yarkaptinkuna karaychi. Yakunayaptinkuna yakuta upyachichu. Chashna kuyashpa karaptikichi upyachiptikichi kikinkunalla pinkachinakunasapa.” ²¹ Sukkuna mana allita rurashuptikichi kutipashpaykichika kankunapish mana allita ruraykankichi. Chayrayku kuyashpalla yanapaychi.

13

Pablu yachachiwanchisapa tukuy awtoridarkunata kasunanchikunapa.

¹ Tukuy llaktanchikunapi tiyak awtoridarkunata kasunanchikuna tiyan. Mana tiyanchu niman suk awtoridar Tata Dios mana churaptin. Tata Dios munaptin awtoridarkuna tiyan. ² Awtoridarkunata mana kasushpanchikunaka Tata Diospa munananta mana ruraykanchisapachu. Chashna awtoridarkunata mana kasuptionchikuna kastigawananchikuna tiyan.

³ Awtoridarkuna tukuy mana alli rurak runakunata kastigashpa manchachinsapa. Allita ruraptinchikuna mana kastigawanchisapachu. Awtoridarkuna mana kastigawananchikunata munashpanchikunaka allita

rurashpalla kawsananchikuna tiyan. Chaypina awtoridarkunaka rimankasapa alli rurak kananchikunata.

⁴ Awtoridarkuna kuydawashpanchikuna Tata Diosta sirvinsapa. Mana allita rurashpanchikunaka kastigawananchikunata manchananchikuna tiyan. Tata Diosta sirvishpa awtoridarkuna mana alli rurak runakunata kastigansapa.

⁵ Tata Dios awtoridarkunata churashka kaptin kasunanchikuna tiyan ama kastigawananchikunapa. Paykunata kasunanchikuna tiyan Tata Dios munaptin. ⁶ Tata Dios awtoridarkunata churashka kaptin kullkita kobrawaptinchikunaka pagarakunanchikuna tiyan. Awtoridarkunaka Tata Diosta sirviptinkuna kasunanchikuna tiyan.

⁷ Tukuy debikunaykichi pagarakunaykichi tiyan. Awtoridarkuna suk imapa kobrashuptikichi pagarakunaykichi tiyan. Kullkita kobrashuptikichi pagarakunaykichi tiyan. Maykan kuyanaykichi kaptin kuyaychi. Maykan kasunaykichi kaptin kasuychi. ⁸ Ama ni pita debiychichu. Sukwan sukwan kuyanakunaykichi tiyan. Runamasinchikunata kuyashpanchikuna tukuy Tata Diospa kamachikunankunata kasuykanchisapa.

⁹ Tata Dioska killkadunpi riman: “Ama chikan warmiwan uchallikuychichu. Ama ni pita wañuchiychichu. Ama suwakuychichu. Ama ni pipa tiyapukninta munaychichu.” Chaymanta suk killkadunpi Tata Dioska riman: “Kankuna kikikichi kuyanakunaykichishina runamasikichita kuyanaykichi tiyan.” Chay kamachikunanta kasushpanchikuna tukuy kamachikunankunata kasuykanchisapa. ¹⁰ Runamasinchikunata kuyashpanchikuna mana llakitachu kunchisapa. Sukwan sukwan kuyanakushpanchikuna tukuy Tata Diospa kamachikunankunata allita kasuykanchisapa.

¹¹ Yachanchisapa sufrinanchikuna tiempupi kawsaykananchikunata. Jesukristuta kreyishkanchikunamantapacha manana ashwannachu illan Tata Dios kawsananman pushawananchikunapa. Chayrayku akuychi puñudushina kananchikunamanta rikchaypachi. Akuychi Jesukristuta ashwan allita kreyishpa mana sampayashpa kawsaypachi. ¹² Tata Diospa kawsananman rinanchikunapa paktamuykanna. Ñami chay rinanchikuna diya pakariykanna. Chayrayku amana tutapishina mana allikunata rurashpa kawsaypachinachu. Akuychi Tata Diospa munananllata rurashpa kawsaypachi. Suk soldadu amachanakunarpa churakunanshina kuydanakuypachi.

¹³ Akuychi luspishina allita rurashpa kawsaypachi. Ama machashpa ama fiestakunapi sukman mikushpa wakllichinakuypachichu. Ama chikan warmiwan uchallikushpa ama sukwan sukwan piñanakushpa kawsaypachichu. Nima sukpa tiyapunanta munashpa kawsaypachichu. ¹⁴ Ama munaychichu kikikichipa munanaykichikunallata rurashpa kawsayta. Jesukristu kawsashkanshina kawsaychi paypa munananta rurashpa.

14

Ama sukwan sukwan yuyanakushpa kawsaypachichu.

¹ Sukkuna Jesukristuta manara allita kreyiptinkuna paykunata kushikushpalla chaskinaykichi tiyan kankunawan tantanakunankunapa. Ama paykunawan ayninakuychichu.

² Ichará sukkuna yuyansapa rikchak laya aycha alli kananta mikunankunapa. Chaymanta ichará sukkuna manara allita Jesukristuta kreyishpara chakramanta tiyakllata mikunsapa. Mana munansapachu nima laya aychata mikuya. ³ Tukuy laya aycha mikuk kashpanchikuna ama washanchaypachichu mana tukuy laya aycha mikuk runakunata. Chaymanta mana

aychata mikuk kashpanchikuna ama yuyaypachichu tukuy laya aycha mikuk runakunata. Tata Dios tukuy ūukanchikunata munawanchisapalla.

⁴ Ama Jesukristuta kreyikmasikichikunata washanchaychichu. Paykunaka payllata kreyishpa kawsansapa. Tata Diosta wambrankunata kawanana tiany allitachu manachu ruraykansapa nishpa. Payka atipan yanapayta allita ruranankunapa. Chayrayku mana nimachu kankichi paykunata washanchanaykichipa.

⁵ Sukkuna yuyanchisapa suk diyakunalla ashwan alli kananta Tata Diosta kuyananchikunapa. Sukkuna yuyanchisapa tukuy diya alli kananta Tata Diosta kuyananchikunapa. Tukuy ūukanchikuna mana sukwani sukwani yuyanakushpa munashkanchikuna diya Tata Diosta kuyashunchisapa. ⁶ Ūukanchikuna suk diyakunalla ashwan allita Tata Diosta kuyashpanchikuna payta kushichinchisapa. Chaymanta suk ūukanchikuna tukuy layata mikushpanchikuna Tata Diosta kushichinanchikunapa mikunchisapa. Chashna mikushpa payta agradesinchisapa. Suk ūukanchikuna aychata mana mikushpa Tata Diosta kushichinanchikunapa mana mikunchisapchu. Chashna mana mikushpa payta agradesinchisapa.

⁷ Kawsashpanchikunapish wañushpanchikunapish mana ūukanchikunallapa munananchikunatachu ruranchisapa. ⁸ Kawsashpanchikunara Señorninchi Jesukristupa munananta rurashpa kawsanchisapa. Wañushpanchikunapish sielman rishpanchikuna payllapa munananta rurashunchisapa. Kawsashpanchikuna wañushpanchikunapish Jesukristullapa kanchisapa. ⁹ Jesukristu wañurkan chaymanta kawsamurkan kawsaptinchikunapish wañuptinchikunapish kamachiwakninchikuna kananpa.

¹⁰ Suknin diya Tata Diospa ñawpakinipi tukuy runakuna rikurinanchikuna tiany willawananchikunapa allitachu manachu rurashkanchisapa nishpa. Chayrayku ¿imapati Jesukristuta kreyikmasinchikunata mana alli rurak kananta yuyankichi? ¿Imapatí paykunata mana nimatashina kawankichi? ¹¹ Tata Diosta killkadunpi riman: “Nukalla kawsak Tata Dios kashpayni rimani: Tukuy runakuna ñawpakinipi kunkurikushpa kuyawankasapa. Nukallata alabawankasapa.”

¹² Chashna Tata Dios rimartin allita yachanchisapa suknin diya tukuy rurashkanchikunata Tata Diosta willananchikunata.

Ama Jesukristuta kreyikmasinchikunata uchallichiyapachichu.

¹³ Chayta yachaykashpanchikuna ama supta supta washanchashpa yuyaypachichu. Allita yuyaykuypachi allita rurashpa kawsayta ama Jesukristuta kreyikmasinchikunata uchallichinanchikunapa.

¹⁴ Nuka Jesukristuta kreyik kashpayni allita yachani tukuy laya mikuna allimi mikunanchikunapa. Chaymanta suk kreyikummasinchikuna yuyansapa suk mikuna mana alli kananta mikunankunapa. Paykunapa chay mikunaka mana allichu.

¹⁵ Tukuy laya mikunata mikuptinchikuna ichara Jesukristuta kreyikmasinchikuna yuyanmansapa mana allita ruraykananchikunata. Chayta yuyaptinkuna amana chay laya mikunata mikupachinachu ama paykunata sientichinanchikunapa. Paykunata sientichishpanchikuna manana kuyaykanchisapanachu. Akuychi yuyaypachi paykunarayku Jesukristu wañushkanta. Chayrayku ama munaypachinachu mikunanchikunaryku Jesukristumanta ashunankunapa.

¹⁶ Jesukristuta kreyikmasinchikuna mikunanchikunaryku washanchawaptinchikunaka alli mikuna kaptinpish amana chayta mikupachinachu. ¹⁷ Tata Diospa mandunpi kawsashpanchikuna mana

mikunanchikunallatachu mana upyananchikunallatachu yuyashpa kawsananchikuna tiyan. Tata Diospa Espiritun yanapawaptinchikuna allita rurashpalla kushikushpalla sukwan sukwan kuyanakushpalla kawsanchisapa. ¹⁸ Chashna Jesukristullata sirvishpa kawsashpanchikuna Tata Diosta kushichinchisapa. Chaypina runamasinchikunapish rimankasapa allita ruraykananchikunata. ¹⁹ Chayrayku akuychi munaypachi sukwan sukwan kuyanakushpa kawsayta animuchinakunanchikunapa Jesukristuta ashwanta kreyishpa kawsayta.

²⁰ Allita yachanchisapa tukuy mikuna alli kananta mikunanchikunapa. Alli kaptinpish ima mikunata mikushpanchikuna ichara Jesukristuta kreyikmasinchikunata uchallichinchimansapa. Chashna kaptinka ama chay mikunata mikupachichu. ²¹ Aychata mikushpa vinuta upyashpa suk imakunata rurashpa ichara Jesukristuta kreyikmasinchikunata uchallichinchimansapa. Ama ni pita uchallichinanchikunapa alli kanman ama chayta rurananchikunapa.

²² Yuyanakunanchikuna tiyan Tata Diospa ñawpakiñipi allitachu manachu ruraykanchisapa nishpa. Rurashkanchikuna alli kananta yachashpanchikuna kushikunchisapa.

²³ Ichara manara yachanchimansaparachu suk imata mikushpanchikuna uchallikunchichu manachu nishpa. Chashna mana allita yachashpanchikuna ama mikupachichu. Mana yachashpanchikuna alli mana alli kananta mikushpanchikunaka uchallikuykanchisapa.

15

Llaktamasinchikunata yanapananchikuna tiyan.

¹ Jesukristuta allita kreyishpa kawsashpanchikuna manara allita kreyikkunata kuyashpa yanapananchikuna tiyan. Ama kikinchikunallapa munananchikunata ruraypachichu. ² Tukuy ñukanchikuna runamasinchikunata kushichishpa allininkunapa yanapananchikuna tiyan ashwan allita Jesukristuta kreyishpa kawsanankunapa.

³ Jesukristupish mana kikinllapa munanantachu rurarkan. Tata Diosllata kushichiptin aypa runakuna payta washancharkansapa. Tata Diospa killkandupi Jesukristupa riman: “A Tata Dios, kanta washanchashushpangkuna ñukatapish sufrichiwarkansapa.”

⁴ Tata Dios ñawpa alli yachachikukkunata willarkan rimananta killkanunkunapa ñukanchikunata yachachiwananchikunapa. Tata Diospa rimananka kushichiwanchisapa animuchiwanchisapa yachananchikunapa sielman rinanchikunata paywan kawsak.

⁵ Tata Dios animuchiwashpanchikuna sukaman yanapawanchisapa kushikushpalla kawsananchikunapa. Chayrayku munani Tata Dios yanapashunaykichipa sukwan sukwan kuyanakushpa Jesukristu kuyakushkanshina kawsanaykichipa. ⁶ Chashna sukwan sukwan kuyanakushpa kawsashpaykichi tantalla Jesukristupa Tatan Diosta alabashpa kushichinkichi.

Tata Dios Pabluta willarkan mana judiyu runakunata yachachinankunapa.

⁷ Jesukristu ñukanchikunata chaskiwashkanchikunashina tukuy payta kreyikmasinchikunata kuyashpa chaskinanchikuna tiyan. Paykunata chaskiptinchikuna runakuna yachankasapa Tata Dios kuyakuk kananta.

⁸ Mash uyariwaychi. Jesukristu shamurkan judiyukunata yanapanankuna. Paykunata yanapashpa Tata Dios ñawpa awilunchikunata willashkanshina rurarkan. Chayta kawashpanchikuna yachanchisapa Tata Dios mana llullakushpa tukuy rimashkanta rurananta.

⁹ Tata Dios mana judiyu runakunatapish kuyashkankunaryku Jesukristu shamurkan Tata Diosta alabanankunapa. Ñawpa killkadunpi David Tata Diosta willarkan:

“Ñuka mana judiyu runakunata willasha sukaman allima kanaykita. Kantashpayni shutikita alabasha.”

¹⁰ Chaymanta Tata Diospa rimananpi Moises rimarkan:

“Kankuna mana judiyu runakuna,
Tata Diospa wambrankunawan tantalla kushikuychi.”

¹¹ Chaymanta Tata Diospa killkadun riman:

“Tukuy llaktakunapi kawsak runakuna,
Tata Diosta alabaychi.”

¹² Chaymanta chay ñawpa yachachikuk Isaiyaspish killkarkan:

“Isayipa miraknimanta nasinka sinchi kamachikuk runa tukuy llaktaku-napi kawsak runakunata kamachinankunapa.

Chay runakuna paypi konfiyakushpa shuyankasapa salvanankunapa.”

¹³ Chayrayku animuchiwakninch Tata Diosta roygani kushichishunay-kichipa Jesukristuta kreyiptikichi. Roygani Tata Diospa Espiritun yanapashunaykichipa tukuy willashushkaykichita allita kreyinaykichipa.

¹⁴ Wawkinikuna, paninikuna, allita yachani kankuna kuyanakushpa kawsanaykichita. Tata Diospa rimananta allita yachankichi. Allita yachankichi sukwani sukwani animuchinakuya Jesukristuta ashwan allita kreyinaykichipa. ¹⁵ Chayta allita yachaptikichipish kay kartata animukuni killkayta ama yachachishkaynita kunkanaykichipa. Tata Dios kuyawashpa willawashka killkanaynipasapa. ¹⁶ Ñukaka Jesukristu salvawananchikunata yachachikuykani mana judiyu runakunapish payta kreyinankunapa. Paykuna Jesukristuta kreyiptinkuna Tata Diospa Espiritun yanapansapa allita rurashpa kawsanankunapa. Chashna allita rurashpa kawsaptinkuna ñuka saserdoteshina kashpa paykunata suk allima ofrendatashina Tata Diosta kunisapa.

¹⁷ Jesukristuta kreyishpa kawsashpayni Tata Diosta sirvishpa sukaman kushikuni. ¹⁸ Mana animukunichu kikinimanta rurashkaynita parlachikuya. Jesukristu yanapawaptin mana judiyu runakunata yachachishkaynillata parlachikuni. Allita yachachikuptini allita rurashpa kawsaptini aypa mana judiyu runakuna Tata Diosta kasushpa kawsashkasapa. ¹⁹ Tata Diospa Espiritun yanapawaptin aypa almirana milagrukunata rurashkani. Chashnalla Jerusalen llaktamanta Iliria partikaman tukuy maypi Jesukristu salvawananchikunata yachachikupi purishkani. ²⁰ Manara ni pi Jesukristu salvakut kananta yachachikushkankuna llaktakunapi munani yachachikuya ama chikan yachachikushkanpi yachachikunaynipa. ²¹ Tata Diospa killkadun rimananshina:

“Mana ni suk kuti Tata Diospa rimananta uyarishka runakuna uyarinkasapa.

Tata Dios salvanankunata yachankasapa.”

Pablu yuyarkan Roma llaktaman riya.

²² Aypa llaktakunapi yachachikushkaynirayku sukaman rinayashpaynipish manara atipashkanirachu riya kawaknikichi. ²³ Kunanka ñami

tukuchashkanina kay llaktakunapi yachachikuyta. Aypa watakunata yuyashkani riya kawaknikichi. ²⁴ Chayrayku España partiman rishpayni munani kankunawan kushikushpa suk tiempita kipariyta. Chaymanta munani yanapawanaykichipa España partiman rinaynipa.

²⁵ Manara kankunaman rishpaynira Jerusalen llaktaman risha Jesukristuta kreyikmasinchikunapa suk ofrendata apashpa.

²⁶ Kay Masedonia partipi Akaya partipi wawkinchikuna munansapa Jerusalen llaktapi mana nimayuk Jesukristuta kreyikmasinkunata yanapaya. Chayrayku kikinkuna munashpa yuyaykushkasapa suk ofrendata kachayta. ²⁷ Jesukristuta kreyik judiyukuna mana judiyu runakunata Tata Diospa rimananta yachachirkansapa. Chayrayku chay mana judiyu runakuna Jesukristuta kreyik judiyukunata yanapanankuna tiyan. Chayrayku paykuna sukmaman munashpa ofrendata kachashpangkuna allita rurashkasapa. ²⁸ Nuka chay ofrendakunata apashkayniwasha atipasha España partiman riya. Chayman rishpayni kankunawan suk tiempita kiparisha. ²⁹ Allita yachani kankunaman riptini Jesukristu sukmaman tukuy layapi yanapawananta.

³⁰ Wawkinikuna, paninikuna, Kankuna Señorninchi Jesukristuta sukmaman kuyankichi. Tata Diospa Espiritun yanapawanchisapa kuyananchikunapa. Chayrayku roygaykichi yanapawanaykichipa Tata Diosta sukmaman ūukupa roygashpa. ³¹ Tata Diosta roygaychi Judea partipi mana Jesukristuta kreyik runakunamanta kuydawanana. Roygaychi Jerusalenpi kreyikummasinchikuna apanayni ofrendata kushikushpa chaskinankunapa. ³² Roygaychi Tata Dios munaptin kushikushpa kankunapi chayanaynipa chaypi samanaynipa. ³³ Munani kushichikuk Tata Diosninchí tukuy kankunawan kananpa. Chashna kachun.

16

Pablu Jesukristuta kreyikmasinkunata rimachinsapa.

¹ Chaymanta willaykichi paninchi Febe Jesukristuta allita kreyishkanta. Payka Senkrea llaktapi Jesukristuta kreyikukkunapa diyakonisami. Utka rinka kawashuknikichi. ² Jesukristuta kreyikmasinkunata chaskinanchikunashina chay paninchitapish kushikushpa chaskiychi. Payka kreyikummasinchikunata sukmaman yanapashka. ūukatapish sukmaman yanapawashka. Chayrayku ima munanani yanapaychi.

³ Rimachipaychi Jesukristupa rimananta yachachikuyta yanapawak paninchi Prisilata kusan Akilasta. ⁴ Paykunami ūukarayku yaka wafturkansapa. Chayrayku sukmaman paykunata agradesini. Mana ūukallachu agradesini. Mana judiyu wawkinchikunapish sukmaman agradesinsapa. ⁵ Prisilata Akilaspa wasinpi tukuy tantanakuk wawkinchikunata paninchikunata rimachipaychi. Munanayni wawkini Epenetotapish rimachipaychi. Asia partipi manara ni pi Jesukristuta kreyik tiyaptinra payka kreyirkan.

⁶ Rimachipaychi paninchi Mariyata. Paymi sukmaman trabajashpa kankunata yanapashushkankichi. ⁷ Rimachipaychi llaktamasinikuna Andronikota Juniasta. Paykunaka karseladummasinikuna karkansapa. Jesukristupa disipulkunka paykunata sukmaman kuyansapa. Paykunaka ūukamanta ūawpakte Jesukristuta kreyirkansapa.

⁸ Chaymantapish rimachipaychi Jesukristuta kreyik kuyanayni wawkini Ampliatota. ⁹ Rimachipaychi Jesukristupa rimananta yachachikukmasini Urbanota. Rimachipaychi munanayni wawkinchi

Estakista. ¹⁰ Rimachipaychi wawkinchi Apeesta. Payka sukaman sufrishpapish Jesukristuta kreyishpa kawsan. Rimachipaychi wawkinchi Aristobulospa familyankunata.

¹¹ Rimachipaychi llaktamasini Herodionta. Rimachipaychi Señorninchi Jesukristuta kreyik Narsisopa familyankunata. ¹² Rimachipaychi paninchii Trifenata paninchi Trifosata. Paykunaka Señorninchita sirvishpa trabajaykansapa. Rimachipaychi kuyanayni paninchi Persidata. Paypish Señorninchita sukaman sirvishpa trabajashka. ¹³ Rimachipaychi sukaman alli yachak alli rurak wawkinchi Rufota. Paypa mamantapish rimachipaychi. Payka mamaynishinami kuyawashka.

¹⁴ Rimachipaychi wawkinchi Asinkritota, wawkinchi Flegontesta, wawkinchi Hermesta, wawkinchi Patrobasta, wawkinchi Hermasta, tukuy paykunawan kakkunata. ¹⁵ Rimachipaychi wawkinchi Filogota, paninchi Juliata, wawkinchi Nereota, paypa panintapish. Rimachipaychi chay wawkinchi Olimpasta. Rimachipaychi tukuy paykunawan tantanakuk wawkinchikunata.

¹⁶ Sukwan sukwan kushikushpa rimachinakuychi. Tukuy kaypi Jesukristuta kreyik kankunatapish rimachishunkichi.

¹⁷ Wawkinkuna, paninikuna, mash allita uyariwaychi. Suk runakuna alli yachachishkaynikunamanta chikan layata yachachikunsapa. Kankuna allita Jesukristuta kreyishpa kawsashkaykichimanta anchuchishunayashpaykichi uchallichishunayankichi. Chay laya runakunamanta ashuychi.

¹⁸ Paykunaka mana Señorninchi Jesukristutachu sirvinsapa. Kikinkunapa mana alli munanankunallata ruransapa. Allipi tukushpa alli yachachikukshina mana kuskanpi aynikuy yachak runakunata llullachinsapa.

¹⁹ Tukuy runakuna yachansapa kankuna allita Jesukristuta kreyishpa kawsanaykichita. Chayrayku sukaman kushikuni. Munani yachanaykichipa allillata rurayta. Munani ama yachanaykichipa mana allikunata rurayta. ²⁰ Kushichiwakinchi Tata Dios utkana yanapashunkichi kamachikuk supay Satanasta saru saru ruranykichipa. Munani Señorninchi Jesukristu llakichishushpaykichi yanapashunaykichipa.

²¹ Wawkinchi Timoteo Tata Diospa rimananta yachachikukmasini rimachishunkichi. Llaktamasinikuna Lusianowan Jason Sosipaterpish rimachishunkichi.

²² Ñuka Tersio wawkinchi Pablupa killkakuknín kashpayni kay kartata killkashpayni Señorninchita kreyikmasinikunata rimachiyykichi.

²³ Wawkinchi Kayo rimachishunkichi. Paypa wasinpi kawsaykani. Payka tukuy Jesukristuta kreyikkunata wasinpi kushikushpa chaskinsapa. Rimachishunkichi kay llaktapa kullki wakaychak Erasto. Rimachishunkichi wawkinchi Kuartu.

²⁴ Munani Señorninchi Jesukristu tukuy kankunata yanapashunaykichipa. Chashna kachun.

Pablu yachachikushkanta tukuchan.

²⁵ Akuychi Tata Diosta alabaypachi. Paymi atipan yanapawayninchikunata mana shaykushpa Jesukristuta allita kreyishpa kawsananchikunapa. Ñawpamantapacha Tata Dios yuyarkan salvawayninchikunata. Chashna yuyashpapish manara ni pita entiendichirkansaparachu imashnami salvawashunchisapa nishpa. Kunanka ñami entiendichiwashkanchisapano Jesukristu wañushkanrayku salvawananchikunata. Chayta yachachikuni.

²⁶ Mana tukuyniyuk Tata Diosninchika ñawpa alli yachachikukkunata willarkansapa killkanankunapa salvawananchikuna runa shamenanta. Kunanka Tata Dios ñami tukuy partipi kawsak runakunata yuyayninta

entiendichishkasapana tukuy runakuna Jesukristuta kreyishpa kasushpa kawsanankunapa.

²⁷ Tata Diosninchika alli yachakmi. Paylla tukuy layata yachan. Chayrayku Jesukristuta kreyishpanchikuna akuychi Tata Diosta alabaypachi. Chashna kachun.

Chayllata killkashkaykichi.

1 KORINTIOS

PABLУ KORINTO LLAKTAPI

KREYIKUKMASINKUNATA KILLKARKAN

Pablu Korinto llaktapi Jesukristuta kreyikmasinkunata rimachin.

¹ Tata Dios munaptin Jesukristu ñuka Pabluta akllawashka rimananta yachachikunaynipa. Kaypi ñukawan tantalla yanapawak wawkinchi Sostenes. ² Kankuna chay Korinto llaktapi Tata Diosta kuyakmasinikuna kaptikichi ñuka Pablu wawkinchi Sosteneswan kay kartata killkaykaykichi. Kankuna Jesukristuta kreyishpa kawsaptikichi Tata Dios akllashushkankichi paypa wambrankuna kanaykichipa allita rurashpa kawsanaykichipa. Chaymanta maypipish kaptin Jesukristuta kuyak runakunata killkaykani. Jesukristu ñukanchikunata paykunata kamachiwanchisapa. ³ Munani Tata Diosninch Señorninch Jesukristuwan kankunata sukaman tukuy layapi yanapashunaykichipa kushichishunaykichipa.

Pablu Tata Diosta agradesin Korinto llaktapi kreyikuk runakunata yanapatin.

⁴ Kankuna Jesukristuwan tantalla kawsaptikichi Tata Dios sukaman yanapashuykankichi. Chayrayku payta agradesini.

⁵ Kankuna Jesukristuta kreyishpa kawsaptikichi Tata Dios sukaman yanapashushkankichi rimananta entiendishpa allita rimashpa yachachikunaykichipa. ⁶ Chashnamanta ñukaykuna Jesukristu salvawananchikunata yachachiptinikuna kankuna allita kreyishkankichi. ⁷ Chashna kreyikushpaykichi Señorninch Jesukristu shamunanta shuyaptikichi Tata Dios atipachishunkichi alli ruranakunata rurashpa kawsanaykichipa. ⁸ Allpa tukanan diyakaman Tata Dios yanapashunkichi sinchikushpa allita rurashpa kawsanaykichipa. Chaymaña Jesukristu shamuptin maña ni pi chatashúnkicichu. ⁹ Tata Dios willawashkanchikunata ruranku. Chayrayku kayawashkanchisapa wambran Señorninch Jesukristuwan kuyanakushpa kawsananchikunapa.

Pablu yachachikun ama chikninakushpa ashuchinakunankunapa.

¹⁰⁻¹¹ Wawkinikuna, paninikuna, Kloepa wasinmanta suk runa willawashkasapa kankuna chikninakushpa kawsaykanaykichita. Chayrayku Señorninch Jesukristupa shutinpi roygaykichi tukuy Jesukristuta kreyikmasikichiwan kuyanakushpa yanapanakushpa kawsanaykichipa. Amana chikninakushpa ayninakushpa kawsaychinachu. ¹² Kankuna manashi allitachu parlankichi. Sukkuna rimankichi: “Ñuka Pablupa yachachikunanta kreyini.” Sukkuna rimankichi: “Ñuka Apolospa yachachikunanta kreyini.” Sukkuna rimankichi: “Ñuka Pedrupa yachachikunanta kreyini.” Sukkuna rimankichi: “Ñuka Jesukristupa yachachikunanta kreyini.”

¹³ Chashna rimashpaykichi mana kuskatachu rimaykankichi. Jesukristuka manami patumaduchu kashka. Manami ñukachu suk kruspi chakatadu kashkani kankunata salvanaynikunapa. Manami ñukapa shutinipichu bawtisakushkankichi. ¹⁴ Ñukaka wawkinchi Krispollata Kayollata bawtisashkani. Tata Diosta agradesini paykunamanta mana ni suk kankunata bawtisashkaynirayku. ¹⁵ Chayrayku mana

atipankichichu rimayta ūukapa shutinipi bawtisadu kanaykichita. ¹⁶ Ariya Estefanaspas familyankunatapish bawtisashkani. Paykunallata yuyani bawtisashkaynita. ¹⁷ Jesukristuka kachamuwashka salvakuk kananta yachachikunaynillapa. Mana bawtisanaynipachu kachamuwashka. Mana runakunapa yachanankunatachu yachachishkaykichi. Runakunallapa yachanankunata yachachikuptinika Jesukristu kruspi wañushkanta mana kreyimmansapachu.

Tukuy runakunapa yachananmanta Tata Diospa yachanan ashwan allimani.

¹⁸ Ņukanchikuna Jesukristu salvawananchikunapa kruspi wañushkanta yachachikuptinchikuna tukuy kastiguman rik runakuna rimansapa llul-lakunanchikunata. Chaykamanka ūukanchikuna uchanchikunamanta salvadu kashpanchikuna yachanchisapa Jesukristu kruspi wañushkanrayku Tata Dios atipananta salvawayninchikunata.

¹⁹ Tata Dios killkadunpi willawanchisapa: “Ñukaka yachaysapa runakunapa yachanankunata kulluchisha. Yuyayninkunata waklichisha.”

²⁰ Tukuy chay yachaysapakunapa, tukuy chay yachachikuk runakunapa, tukuy chay rimay shimikunapa yachanankunaka mana nimachu. Tata Dios yachachiwashkanchisapa tukuy paykunapa yuyayninkuna yachanankuna mana nima kananta. ²¹ Tata Dios alli yachak kashpa yacharkan mana ni suk runa yachaysapa kashpapish kikinllamanta payta riksintanta. Runakuna yachachikunaynikuna llulla kananta rimaptinkunapish Tata Dios munarkan rimananta kreyik runakunallata salvaysapata.

²² Judiyu runakuna munansapa ūukanchikuna almirana ruranakunata rurananchikunapa chayta kawashpara kreyinankunapa. Mana judiyu runakuna yachanankunallata kreyishpa yuyansapa Jesukristupa rimanan llulla kananta. ²³ Ņukanchikuna yachachikunchisapa Jesukristu Tata Diosmanta shamudu runa kashpa kruspi wañushkanta salvawananchikunapa. Chashna yachachikuptinchikuna judiyu runakuna yuyansapa yachachikunanchikuna millanapa laya kananta. Mana judiyu runakuna rimansapa llulla kananta.

²⁴ Tata Dios tukuy laya atipak kashpa Jesukristu wañushkanrayku atipan tukuy payta kreyik runakunata salvawayninchikunata judiyu mana judiyu kaptinchikunapish. Jesukristu ūukanchikunapi kawsashpa allimata yachachiwanchisapa allita rurashpa kawsananchikunapa. ²⁵ Runakuna alli yachak yuyanakushpa rimansapa Jesukristu salvawananchikunapa wañushkan llulla kananta. Chashna rimaptinkunapish Tata Dioska paykunamanta sukmaman ashwan alli yachakmi. Paykuna rimansapa Jesukristu wañushka kaptin mana nima atipak kananta. Chashna rimaptinkunapish Tata Dioska tukuy paykunamanta ashwan sinchi atipakmi.

²⁶ Wawkinikuna, paninikuna, yuyaychi mana aypa yachaysapa runakuna kanaykichita. Mana aypa kamachikuy yachak runakuna kankichi. Mana aypa kulliyukchu kankichi. Mana chay laya kaykaptikichi Tata Dios akllashushkankichi. ²⁷ Kankuna mana yachaysapa runakuna kaykaptikichi Tata Dios akllashushkankichi chay kikinkuna yachaysapa yuyanakuk runakunata pinkachinaykichipa. Mana kamachikuy yachak runakuna kaykaptikichi Tata Dios akllashushkankichi chay kamachikuk runakunata pinkachinaykichipa.

²⁸ Tukuy mana Tata Diosta kreyik runakuna washanchawaptinchikunapish mana munawaptinchikunapish Tata Dios akllawashkanchisapa.

Ñukanchikuna mana nimapa paykunapa kaptinchikunapish Tata Dios akllawashkanchisapa kikinla kreyinakuk runakunata kawachinanchikunapa mana yachak kanankunata.²⁹ Tata Dios akllawashkanchikunaryaku mana ni pi atipankasapachu alabanakushpa payta willayta yachaysapa kanankunata.

³⁰ Kikin Tata Dios salvawashkanchisapa Jesukristuwan tantalla kawsananchikunapa. Chashna Jesukristuwan tantalla kawsaptinchikuna payka yachachiwanchisapa Tata Diospa rimananta entiendinanchikunapa. Tukuy uchanchikunamanta perdonawashpanchikuna yanapawanchisapa paypa munananta rurashpa kawsananchikunapa. Ñawpa mana alli rurashkanchikunamanta salvawanchisapa amana uchallikushpa kawsananchikunapa.

³¹ Chashnashina Tata Diospa killkadunpi willawanchisapa: “Kankuna alabankunayashpaykichi Señorninchita riksishkaykichirayku alabankuaychi.”

2

Pablu Jesukristu salvawananchikunata yachachikun.

¹ Wawkinikuna, paninikuna, ñuka Tata Diospa rimananta kankunata yachachishpayni manami yuyaysapa yachaysapa runashinachu yachachishkaykichi. ² Kankunawan kawsashpayni sukaman allita yuyarkani yachachiynikichita Jesukristu suk kruspi wañuskashpa uchanchikunamanta salvawananchikunapa. Chayllata yachachishkaykichi. Mana chikan layatachu yachachishkaykichi. ³ Manchakushpa chukchukushpa yachachishkaykichi. Mallinakurkani mana atipanaynita allita yachachikuya.

⁴ Tata Diospa Espiritun yanapawaptin yachachishkaykichi. Mana sukaman yachaysapa runashinachu yachachishkaykichi. ⁵ Munarkani yachanaykicipa Tata Dios sukaman alli atipak kananta payllata kreyinaykicipa. Mana munarkanichu chay sukaman yachaysapa runakunapa rimanankunata kreyinaykicipa.

Tata Diospa Espiritun yachachiwanchisapa.

⁶ Chashna munashpaynipish kankuna Tata Diosta allita kreyiyta yachaptikichi ashwan ashwanta Tata Diospa yachananta yachachiykaykichi. Manami runakunallapa nima kamachikuk runakunallapa yachachikunankunallatachu yachachiykaykichi. Paykunaka utkami chinkansapa.

⁷ Tata Dios manara kay allpata rurashpara yuyarkan salvawayninchikunata sielipi kushikushpa paywan tantalla kawsananchikunapa. Kunankaman Tata Diospa yuyashkanta manara ni pi yachashkarachu. Ñukaka paypa yuyayninta yachachiykaykichi. ⁸ Kay allpapi kamachikuk runakuna mana Tata Diospa yuyashkanta entiendirkansapachu. Entiendishka kashpankunaka sukaman alli kamachiwakninchikuna Jesukristutaka mana kruspi chakatachinmansapachu karkan.

⁹ Tata Diospa killkadunpi willawanchisapa:
“Tata Dios sukaman allimakunata rurashka payta kuyak runakunapa. Mana ni suk runa chay allima rurashkanta kawashkachu nima uyarishkachu nima yuyashkachu.”

¹⁰ Ñukanchikuna chaykunata entiendinchisapa Tata Diospa Espiritun tukuy Tata Diospa yuyayninta entiendichiwaptinchikuna.

¹¹ Ñukanchikunalla yuyayninchikunata yachanchisapa. Mana ni pi yuyayninchikunata yachanchu. Chashnashina Tata Diospa Espiritunllami yuyayninta yachan. Mana ni pi paypa yuyayninta yachanchu. ¹² Tata Dioska

mana runakunapa yuyayninkunatachu yachachiwanchisapa. Kuyawashpanchikuna Espiritu natachu kachamurkan paypa allima yuyayninta yachachiwanchikunapa. ¹³ Tata Diospa Espiritu natachu yachachiwaptinchikuna suk runakunata yachachinchisapa. Mana kikinchikunapa yáhashkanchikunatachu yachachikunchisapa. Tata Diosta kreyik runakunallata paypa yuyayninta yachachinchisapa.

¹⁴ Chay mana Tata Diosta kreyik runakuna paypa Espiritu natachu yachachikunanta mana atipansapachu entiendiya. Rimansapa llulla kananta. Tata Diosta kreyik runakunalla atipansapa entiendiya. ¹⁵ Chaymanta Tata Diospa Espiritu yanapawaptinchikuna atipanchisapa paypa yuyayninta entiendiya. Chashna Tata Diospa yuyayninta entiendiptinchikuna chay mana Tata Diosta kreyik runakuna mana atipansapachu entiendiwayninchikunata. ¹⁶ Tata Diospa killkadunpi willawanchisapa: "Mana ni pi Tata Diospa yuyayninta entiendinchu. Mana ni pi Tata Diosta yachachinchu." Chashna Tata Dios killkadunpi rimaptin paypa Espiritu Jesukristupa yuyayninta entiendichiwanchisapa.

3

Pablu yachachiwanchisapa Jesukristullata kasunanchikunapa.

¹ Wawkinikuna, panikuna, kankuna Jesukristuta kreyik runakuna kashpaykic平ish manara allitarachu paypa yachachikunanta entiendinchichi. Taksha wambrakunashinallara kankichi. Manara Tata Diospa Espiritu natachu kashpaykic平ish. Chayrayku manara atipashkanirachu alita yachachiykic平ita. ² Tata Diospa rimananka iden alli mikunashinami. Kankuna manara chay alli mikunata atipashkankichirachu mikuya. Iden ūnukuykak wambrillukunashinara kashkankichi. Tata Diospa rimanana manara allitarachu entiendishkankichi. Chayrayku entiendinaykichi layallata yachachishkaykichi. Kunankaman chay layalla kankichi.

³ Kankuna kikichillapa munanaykic平ita rurashpa ayninakushpa yuyanakushpa chikninakushpa kawsaykankichi. Chashna kawsaykashpaykichi Jesukristuta mana kreyik runakunashinalla kawsankichi. ⁴ Sukkuna rimaykankichi ūukallata kreyiwanaykic平ita. Suk kankuna rimankichi Apolosllata kreyinaykic平ita. Chashna rimashpaykichi kikichillapa munanaykic平ita ruraykankichi. ⁵ ūuka Apoloswan kikinikunamanta mana nimachu kanisapa. Tata Dios ūukaykunata kachamuwashkasapa paypa rimananta yachachikunaykunapa. Chashna yachachikuptinikuna kankuna Jesukristuta kreyishkankichi.

⁶ ūuka Pablu murukunata tarpukshina kankunata yachachishkaykichi. Chaymanta wawkinchi Apoloska tarpudu murukunata yakuchakshina yachachishushkankichi. Chaymanta Tata Diosllami murukunata wiñachikshina rimananta entiendishishunkichi. ⁷ ūuka tarpukuk runashina kashpayni mana nimachu kani. Apolospish murukunata yakuchak runashina kashpa mana nimachu. Tata Diosllami murukunata wiñachin. Chayrayku payllata kasunaykichi tiyan.

⁸ ūuka tarpukuk runashina kashpayni Apolos murukunata yakuchak runashina kashpa paktalla trabajanisapa. Chashna ishkantinikuna Tata Diospa trabajaptinikuna paytapish ūkatapish pagarawankasapa. ⁹ ūuka Apoloswan paktalla Tata Diospa chakrangi trabajaykanisapa. Kankunaka Tata Diospa tarpuchishkan chakranchina kankichi.

Chaymanta Tata Diospa wasinshina kankichi. ¹⁰ Tata Dios yachachiwaptin ūukaka kankunata allita yachachishpayni wasi kallarinanta churakshinami kani. Suk runakuna kallarishkayni wasinta armansapa. ūukaka kallarishkayni yachachiynikichita. Sukkuna yachachikupi katinsapa. Tukuy yachachikuk runa yuyanan tiyan imashnami allita yachachikunka nishpa. ¹¹ Chay Tata Diospa wasinpa kallarinanka Jesukristumi. Mana ni pi suk chikan kallarinanta atipanchu churayta.

¹² Suk alli yachachikuk runakuna chay wasi kallarinanpi kurimanta kulikimanta allima rumikunamanta chay Tata Diospa wasinta ruransapa. Suk mana alli yachachikuk runakuna kaspimanta ukshamanta pintumanta Tata Diospa wasinta ruransapa. ¹³ Jesukristu kashkan shamuptin tukuy kaspimanta, ukshamanta, pintumanta ruradu wasikuna rupankasapa. Tukuy kurimanta kullkimanta allima rumikunamanta ruradu wasikuna mana rupankasapachu. Jesukristu kashkan shamushspa willawashchunisapa pikunami mana allita rurashkanchisapa pikunami allita rurashkanchisapa nishpa. ¹⁴ Chay rurashkanchikuna wasi mana rupaptin Tata Dios premyunchikunata kuwanchisapa. ¹⁵ Chaymanta rurashkanchikuna wasi rupaptin chay ninamanta kishpishpa mana nimayuk kiparishchunisapa.

¹⁶ ¿Manachu yachankichi kankuna Tata Diospa wasinshina kanaykichita? ¿Manachu yachankichi Tata Diospa Espiritun kankunapi kawsanata?

¹⁷ Chaymanta suk runakuna Tata Diospa wasinta kulluchinayansapa. Kankuna Tata Diospa wasin kaptikichi chay runakuna mana allita yachachishushpaykichi urmachishunayaykankichi. Kankuna Tata Diosllapa wasin kankichi. Chayrayku chay mana alli yachachikuk runakuna urmachishuptikichika Tata Dios paykunata kulluchinankuna tiyan.

¹⁸ Ama kikikichilla llullachinakuchichu. Kankuna runakunallapa yachanankunata yachashpaykichi mana nima yachakshina yuyanakuchi Tata Diospa yachanana allita yachanaykichipa. ¹⁹ Tata Dioska riman runakunapa yachanankuna mana nimá kananta. Paypa killkadunpi willawanchisapa: “Tata Dios yachaysapa runakunata chay yachanankunnallawan pantachichin waklichinakunankunapa.” ²⁰ Tata Diospa killkadun kashkan willawanchisapa: “Tata Dios yachan tukuy yachaysapa runakunapa yuyayninkuna llulla kananta.”

²¹ Chayrayku ama alabanakuchichu alli kanaykichita suk yachachikuk runallata katishpaykichi. Tukuy Tata Diospa alli yachachikkunaka kankunapami. ²² ūukapish Apolospish Pedrupish yanapaknikichimi kanisapa. Tata Dios kay allpapi tukuy laya tiyaka kuwashkanchisapa. Kawsaptinchikunapish wañuptinchikunapish kunanmantapacha tukuy tiempukaman Tata Dioska yanapawashchunisapa. ²³ Tukuy ūukanchikunami Jesukristupa kanchisapa. Jesukristupish Tata Diospami. Chayrayku tukuy laya tiyak allininchikunapa.

4

Pablu wawkinkunata yachachinsapa tukuy Tata Diospa yachachikuk runakunata kuyanankunapa.

¹ Jesukristu ūukata Apolosta Pedruta kachamuwashkasapa manara ni pi yachashkan Tata Diospa yuyayninkunata entiendichinaynikunapa. Chayrayku yuyaychi ūukaykuna Jesukristupa yanapakninkunalla kanaynikunata. ² ūukaykuna tukuy Tata Dios willawashkankunata kuskata yachachikunaynikuna tiyan tukuy runakuna yachanankunapa yachachikunaynikuna alli kananta.

³ Kankuna allita mana allita yachachikuptini yuyawaptikichipish ūukapa mana nimananchu. Suk kamachikuk runakuna imapipish yuyawaptinkuna mana nimananchu. Nima kikini yuyanakunichu allitachu manachu rurashkani nishpa. ⁴ Ariya yuyanakuni allillata rurashkaynita. Chashna yuyanakushpaynipish mana rimashachu mana uchayuk kanaynita. Ichará Tata Dios yachan suk mana alli rurashkaynita. Paylla riman alli mana alli rurashkaynita.

⁵ Señorninchí Jesukristu shamushpa tukuy tutayadupi yuyashkanchikunata rurashkanchikunata surkumunka luspi rikurinarpa. Tukuy yuyashkanchikunata tukuy rurashkanchikunata yachashpa willawashunchisapa allitachú rurashkanchisapa manachu nishpa. Chaymanta rurashkanchikuna alli kaptin alabawashunchisapa. Chayrayku manara Jesukristu shamuptinra amana ni pita chatashpa yuyashpa kawsaychinachu.

⁶ Wawkinikuna, paninikuna, ūuka allinikichipa yachachiykaykichi ama rimanaykichipa ūukallata Apolosllata kreyiwanaykichita. Chayta yachachishkaykichi yachakunaykichipa Tata Diospa rimananllata kasushpa kawsanaykichipa ama suk runakunallata kasushpa kawsanaykichipa. Ama kreyinakushpa rimaychichu suk yachachikuk runata munanaykichita sukninta mana munanaykichita. ⁷ Kankuna mana sukkunamanta ashwan alli yachakchu kankichi. Tata Diosllami tukuy yachanaykichita kushushkankichi. Tata Dios mana yanapashuptikichika mana atipankichimanchu nimata rurayta nimata yachayta. Chayrayku īmapatí kreyinakunkichi alli yachak kanaykichita?

⁸ Kankuna kikikichili yuyanakunkichi tukuy layata yachanaykichita. Yuyanakunkichi tukuy layayuk kanaykichita. Yuyanakunkichi ūukaykunamanta ashwan alli kamachikuk alli yachak runakuna kanaykichita. ūuka munayman kamachikkuna kanaykichipa ūukaykuna kankunawan tantalla kamachikunanchikunapa. ⁹ ūukaykuna Tata Diospa rimananta yachachikuk kayakashpayníkuna mana chashnachu yuyanakunisapa. Yuyanakunisapa Tata Dios churawashkankunata tukuy pimanta mana munadu washerushina kanaynikunapa maypipish kaptin waūunaynikunapa. Tukuy runakuna angelkunapish ūukaykunata suk pukllanakunapishina kawawansapa yachanankunata allitachu manachu Tata Diosta kasushpa kawsaykanaynikunata.

¹⁰ ūukaykuna Jesukristuta kreyishpa kuyashpa kawsaptinikuna suk runakuna rimansapa mana nima yachak kanaynikunata. Chaykamanka kankuna Jesukristuta kreyishpa kawsashpaykichi rimankichi sukaman alli yachak kanaykichita. ūukaykuna mana nimata atipanisapachu rurayta. Chaykamanka kankuna tukuy laya atipak kankichi. Runakuna ūukaykunata mana munawansapachu. Kankunata allita munashunkichi.

¹¹ Kunankaman ūukaykuna yarkaymanta yakumanta mana alli llachapayuk Kashpaynikuna purinisapa. ūuk runakuna sufrichiwansapa. Mana nima wasinikuna tiyawansapachu. ¹² Makinikunawan sukaman trabajashpaynikuna shaykunisapa. ūuk runakuna yuyawashpa rabyachiwaptinkunapish allita kuyashpalla ayninisapa. Runakuna chikniwashpa padescihiwaptinkunapish mana nimata rimanisapachu. ¹³ Mana alli kanaynikunata rimaptinkunapish paykunata allita kuyashpalla parlachinisapa. Kunankaman kawawansapa susya wishchudutashina usuykak runakunatashina.

¹⁴ Kankuna munanayni wambraynikunashina kaptikichi allita yachachiykaykichi. Mana pinkachinayashpachu killkaykaykichi.

15 Yachachishkaykichi Jesukristu mana alli rurashkanchikunamanta perdonawananchikunata. Chashna yachachiptinkuna Jesukristuta kreyiykankichi. Chayrayku ñukaka iden tataykichishina kani. Kankunapa chunka waranka allí yachachishuknikichi tiyapushuptikichipish ñukallami tataykichishina kani. **16** Chayrayku sukaman roygaykichi ñuka allita rurashpa kawsashkaynishina kankunapish allita rurashpa kawsaychi.

17 Chayrayku alli yachachikuk munanayni wambrayni Timoteota kankunaman kachashkani. Paymi willashunkichi imashnami ñuka allita rurashpa Jesukristuta kreyishpa kawsaykani nishpa. Yachachishunkichi tukuy pürishkayni llaktakunapi tukuy Tata Diosta kreyikkunata yachachishkaynikunata.

18 Kankunamanta sukkuna alabanakushpaykichi yuyankichi mana ri-naynitana pasyaknikichi. **19** Chashna yuyaptikichipish Tata Dios munaptinka utka risha pasyaknikichi. Chaypina kawasha chay kikinkunallapa yuyayninkunapi alábanakuk wawkinchikunata yachanaynipa allitachu manachu ruraykansapa nishpa. **20** Tata Dios sinchita yanapashuptikichi paypa mandunpi kawsankichi. Mana rimashpallachu paypa mandunpi kawsankichi. **21** Kankunata pasyak riptini ¿imata ruranaynipatí munankichi? ¿Piñakushpa kastiganaynitachu munankichi? ¿Kushikushpalla allillapi yachachinaynitachu munankichi?

5

Pablu yachachikun suk mana alli rurak runata karkunankunapa.

1 Yachashkani suk wawkikichi madraschanta apishkanta warmin kananpa. Ñuka sukaman llakini chayta yachashpa. Tata Diosta mana kreyik runakuna chay laya mana allita mana nima ruransapachu. **2** Chay wawkikichi chayta rurashkanrayku sukaman llakinkichiman karkan. Llakinaykichi kaptin alli kawsakshina alabanakunkichi. Chay mana alli rurak wawkikichita willanaykichi tiyan Tata Diospa wasinman amana rinanpa kankunawan tantanakuk.

3 Ñuka kankunaman manara rishpaynipish sukaman kuyashpalla yuyaykaykichi. Señorninchi Jesukristu kachamuwashka kaptin ñami willashkaykichina chay sakra mana alli rurak wawkikichita kastiganaykichipa. **4** Munani tantanakunaykichipa chay wawkikichipa mana alli rurashkanta parlanaykichipa. Chashna tantanakuptikichi ñuka sukaman yuyashkaykichi. Señorninchi Jesukristupish kankunawan kashpa yanapashunkichi.

5 Chaypi tantanakushpaykichi chay mana alli rurak wawkikichita karkuychi supappa munananta rurashpa kawsanarpa. Ichara chashnamanta wanaman amana chay laya mana alli ruranata ruranaarpa. Chashna wanashpa allita rurayta yachakuptin Señorninchi Jesukristu kashkan shamushpa uchankunamanta salvanka. **6** Kankuna chay wawkikichita manara karkushpaykichira ama rimaychichu alli rurak runakuna kanaykichita.

Suk rimanata rimanchisapa: “Suk tipi levaduralla aypa machkata pun-kichin.” **7** Chayrayku chay mana alli rurak wawkikichi levadurashina kaptin karkuychi suk wawkikichi ama yuyanankunapa payshina mana allita rurayta. Chay runata karkushpaykichi suk mana levadurayuk pashina kankichi.

Chayraykuna Tata Dioska Señorninchi Jesukristuta kachamurkan Paskua fiestapi suk ovejapa wawanshina wañunarpa tukuy mana alli rurashkanchikunamanta perdonawananchikunapa. **8** Punkichidu pan

yuyachiwanchisapa mana alli rurashkanchikunata. Chayrayku Paskua fiestapi mikunchisapa mana punkichidu pankunallata. Chayrayku willaykichi chay mana alli rurak runata karkunaykichipa mana punkichidu pankunashina kanaykichipa. Chaypi atipankichi kushikushpa Jesukristuta allita kreyishpa allillata rurashpa kawsayta.

⁹ Ñuka suk kartaynipi willashkaykichina ama suk chikan warmiwan uchallikuk runakunawan paktanakunaykichipa.

¹⁰ Chayta willashpayni mana munashkanichu willaynikichita tukuy mana alli rurak runakunamanta mana nima parlashpa ashunaykichipa. Chashna tukuy chikan warmiwan uchallikuk runakunamanta, tukuy kullkillata munak runakunamanta, tukuy suwakunamanta, tukuy ruradu dioskunata kreyik runakunamanta ashushpaykichika kay alpamanta llukshinkichiman karkan.

¹¹ Suk runakuna Jesukristuta kreyik runakuna kanankunata rimash-pankunapish chikan warmiwan uchallikunsapa. Tukuy laya tiyakta munashpalla kawsan. Ruradu dioskunata kuyashpa kawsan. Llullachikushpalla machashpalla suwakushpalla kawsan. Ñuka willashkaykichi chay laya mana alli rurak runakunawan ama paktanakunaykichipa. Ama nima munaychichu paykunawan mikuya.

¹²⁻¹³ Chay mana Jesukristuta kreyik runakuna uchallikuptinkuna ñuka mana nimata willashachu. Tata Diosmi paykunataka kastigankasapa. Chashna kaptinpish kankuna Jesukristuta kreyikmasikichikunata mana allita ruraptinkuna willanaykichi tiyan amana chay mana alli ruranata ruranankunapa. Chayrayku chay madraschanwan uchallikuk runata karkunaykichi tiyan.

6

Pablu yachachikun ama awtoridarkunapi rinanchikunapa wawkinchikunata mañakukuk.

¹ Kankuna Jesukristuta kreyikmasikichiwan piñanakushpaykichi suk Jesukristuta kreyikmasikichillata rillarychi willak yanapashunaykichipa allichayta. Ama llakta awtoridarkunapi rillarychichu mañakukuk. ² ¿Manachu yachankichi? Ñukanchikuna Jesukristuta kreyik kashpanchikuna tukuy mana Jesukristuta kreyik runakunata willashunchisapa allita rurashka mana allitachu rurashka nishpa. Chashna tukuy runakunata atipashpaykichi willayta ¿imapati mana atipankichi kankunapuralla chay mana alli rurashkankunata allichayta? ³ ¿Manachu yachankichi Tata Diospa angel-ninkunatapish willananchikunata pimi alli rurak pimi mana alli rurak nishpa? Chayrayku kay alppapi kawsashpaykichira atipankichi chay mana alli rurak runakunata yanapayta allita rúrashpa kawsanankunapa.

⁴ Chayrayku kankuna Jesukristuta kreyikmasikichiwan piñanakushpa ¿imapati chay mana Jesukristuta kreyik awtoridarpi rinkichi chatakuk?

⁵ Chayta willaykichi pinkachinaynipasapa. Ariya ¿manachu ni suk alli yachak wawkikichi tiyan willashunaykichipa imashnami allichankichiman nishpa? ⁶ ¿Imapatí kankunapura sukwan sukwan piñanakushpa mana Jesukristuta kreyik awtoridarpi chatanakuk rinkichi?

⁷ Jesukristuta kreyikmasikichiwan piñanakushpa kawsashpaykichi manami Tata Diostachu kushichiykankichi. Jesukristuta kreyikmasikichi mana allita rurashuptikichipish kushikushpalla kawsaychi. Imaykichita suwapushuptikichipish mana nima piñakushpalla kawsaychi. ⁸ Chaykunata yachaykashpaykichipish wawkikichita mana allita rurashpaykichi suwan-kichi.

⁹ ¿Manachu yachankichi chay mana alli rurak runakuna Tata Diospa mandunpi mana yakyunkasapachu? Ama llullachinakuchichu. Manara kasarashpa warmiwan tantanakuk runakuna, ruradu dioskunata kuyak runakuna, chikan warmiwan uchallikushpa kawsak runakuna, ullkumas-inwan warmiwanshina kawsak runakuna Tata Diospa mandunpi mana yakyunkasapachu. ¹⁰ Nima suwakuna, nima tukuy laya kikinllapa munak runakuna, nima machashpa kawsak runakuna, nima wasin wasinpi yuyaypi purik runakuna, nima llullachikushpa suwakuk runakuna Tata Diospa mandunpi yakyunkasapachu. ¹¹ Ñawpa tiempu kankunamanta sukkuna chay laya mana alli rurak runakuna karkankichi. Kunanka Señorninchi Jesukristu tukuy uchaykichimanta perdonashushpaykichi maylashushkankichi. Kunanka Tata Diospa Espiritun yanapashuykankichi Tata Diosllata kasushpa kawsanaykichipa.

Man alichu kanman mana allikunata rurashpa kawsananchikunapa.

¹² Runakuna rimansapa: "Imatapish kaptin ruranchimansapa." Ariya, imatapish kaptin munashpa ruranchimansapa. Chaykamanka mana allichu tukuy layata rurananchikunapa. Ariya, atipanchimansapa tukuy layata ruraya. Chaymanta munananchikunata rurashpanchikuna tipimanta tipimanta ashwan ashwanta munanchisapa chayllata ruraya. Chayrayku tipimanta allichu tukuy munananchikunata rurananchikunapa.

¹³ Chaymanta runakuna rimansapa: "Tata Dios tukuy laya mikunata kuwashkanchisapa mikunanchikunapa. Wilksanchikunata rurashka mikunanchita chaskinanpa." Ariya, Tata Dios tukuy laya mikunanchikunata rurashka mikunanchikunapa. Chaymanta suknin diya tukuy chay mikunanchikunata chay wilksanchikunatapish kulluchinan tiyan. Tata Dioska manami rurawashkanchisapachu chikan warmiwan uchallikushpa kawsananchikunapa. Tata Dioska rurawashkanchisapa payllata kasushpa kawsananchikunapa. Yanapawanchisapa allita rurashpa kawsananchikunapa. ¹⁴ Tata Dioska rikchak layata ruraya atipak Kashpa Señorninchi Jesukristuta wañushkanamanta kawsachimurkan. Chaymanta suknin diya ñukanchikunatapish wañushkanchikunamanta kawsachiwashunchisapa. Chayrayku amana uchallikushpa kawsaychinachu.

¹⁵ ¿Manachu yachankichi Jesukristu ñukanchikunapi kawsaptin paywan suklalla kananchikunata? Chashna paywan suklalla kashpanchikuna ¿imashnatí Jesukristuta sakinchimansapa suk waynandera warmiwan tantanakushpa paywan suklalla kananchikunata? Mana nima layapi allichu chayta rurananchikunata.

¹⁶ Tata Diospa killkadunpi willawanchisapa: "Tukuy ullku warmiwan tantanakushpa suklallami kanka." Chayrayku suk ullku suk waynandera warmiwan tantanakushpa paywanpish suklallami. ¹⁷ Chaymanta ñukanchikuna Señorninchi Jesukristuwantantanakushpanchikuna paywan suklallana kanchisapa. ¹⁸ Chayrayku ama munaychichu warmiwan uchallikushpa kawsayta. Suk ullku chikan warmiwan uchallikushpa kikinpa kuerpunta wakllichin. Chikan laya uchata rurashpa mana kikinpa kuerpuntachú wakllichin.

¹⁹ ¿Manachu yachankichi Tata Dioska Espiritu kuwashkanchikunata ñukanchikunapi wasipishina kawsananpa? Ñukanchikunapi kawsashpa ñukanchikunapa doyñunchikuna. Mananami kikinchikunapa munayninchipanipachu kawsanchisapa. ²⁰ Señorninchi Jesukristu sukaman sufrishpa wañurkan rant iwananchikunata. Chayrayku paypa kashpanchikuna payllata allita kushichishpa kawsananchikuna tiyan.

7

Pablu yachachikun kasaradukunata imashnami kawsankasapa nishpa.

¹ Kankuna suk kartapi tapuwashkankichi allichu manachu kanman suk ullku kasarananpa. Ņuka willaykichi alli kanman ama kasarananpa nima warmiwan uchallikushpa kawsanana. ² Chaymanta ama uchallikushpa kawsanankunapa alli kanman tukuy Jesukristuta kreyik ullkukuna kasarashpa warminwan kawsanankunapa. Chaymanta alli kanman tukuy paninchikunapish kasarashpa kusanwan kawsanankunapa. ³ Tukuy ullku warminwan tukuy warmi kusanwan allita wiwanakushpa kuyanakushpa kushichinakushpa kawsanankuna tiyan. ⁴ Tukuy kusayuk warmipa kuerpun kusanpana. Mananami kikinpanachu. Chaymanta tukuy warmiyuk ullkupa kuerpun warminpana. Manana kikinpanachu.

⁵ Chaymanta ama sukpidi sukpidi kuerpuycichita michanakuychichu. Ichara ishkantinkuna allita paktanakumansapa suk tiempullapa mana tantanakushpa puñunankunapa Tata Diosllawan parlanankunapa. Chaymanta chay churadu tiempu paktaptin kashkan tantanakunkasapa ama supay uchallichinankunapa.

⁶ Tukuy chayta willaykichi kankunata yanapanayashpa. Manami willaykichichu kamachikukshina. ⁷ Ņuka munayman tukuy kankuna ūukashina mana warmiyuk kawsanaykichipa. Chashna munaptinipish mana tukuychu atipamansapa mana warmiyuk kawsayta. Chayrayku' Tata Dioska allita riksiwashpachikuna sukkunata yanapansapa kushikushpa kasarashpa kawsanankunapa. Sukkunata yanapansapa kushikushpa mana kasarashpa kawsanankunapa.

⁸ Tukuy waynakunata shipashkunata viyudakunata willaykichi: Alli kanman ūukashina mana kasarashpa kawsanaykichipa. ⁹ Chaymanta mana warmiyuk mana kusayuk mana atipashpaykichi kawsayta alli kanman kasaranaykichipa ama sukta sukta munashpa kawsanaykichipa.

¹⁰ Tata Dios willawashka kaptin tukuy kasadukunata willaykichi: Kusayuk warmi kashpaykichi ama kusaykichita sakiychichu. Manami yuyaynimantachu chayta willaykichi.

¹¹ Ichara suk warmi kusanta sakinman. Alli kanman chay warmi kusanwan kashkan tantanakushpa kawsanana. Mana kusanwan kashkan tantanakuyta munaptin mana allichu suk chikan ullkuwan kasarananpa. Chaymantapish mana allichu suk ullku warminta wishchunanpa.

¹² Ichara suk wawkinchipa warmin mana Jesukristuta kreyishpa kawsanman. Señorninchi Jesukristu mana yachachiwaptinchikunapish ūuka willaykichi: Chay warmin mana kreyikuk kashpapish paywan kawsayta munaptin mana allichu chay wawkinchi warminta wishchunanpa.

¹³ Chaymantapish ichara suk paninchipa kusan mana Jesukristuta kreyishpa kawsanman. Chay kusan paywan kawsayta munaykaptin mana allichu chay paninchi kusanta wishchunanpa. ¹⁴ Chay kusan mana Jesukristuta kreyiptinpish Tata Dios paninchita yanapan kusanwan allita kuyanakushpa kawsanankunapa. Chaymantapish suk wawkinchipa warmin mana Jesukristuta kreyiptinpish Tata Dios wawkinchita yanapan warminwan allita kuyanakushpa kawsanankunapa. Chashna allita kuyanakushpa kawsaptinkuna wambrankunapish Tata Diospa kankasapa. Mana allita kuyanakushpa kawsaptinkunaka nima wambrankuna Tata Diospachu kankasapa.

¹⁵ Tata Dios munan allita kushikushpa mana piñanakushpa kawsananchikunapa. Chayrayku' kusaykichi warmikichi mana Jesukristuta kreyik kashpapkuna sakishunayaptikichi ama michaychichu.

Chashna sakishuptikichi manana kasadushinanachu kiparinkichi. **16** Kankuna paninikuna, chay mana Jesukristuta kreyik kusaykichi mana sakishuptikichika ichara kankuna paykunata yanapankichiman kreyishpa kawsanankunapa. Kankuna wawkinikuna, chay mana Jesukristuta kreyik warmikichi mana sakishuptikichi ichara kankuna paykunata yanapankichiman kreyishpa kawsanankunapa.

17 Wawkinikuna, paninikuna, tukuy llaktakunapi ñuka tukuy Jesukristuta kreyishpa kawsak runakunata kayta yachachiykichi: Tata Dios munaptin kasaraychi. Mana munaptin ama kasaraychichu. Imashnacha Tata Dios yachachishunkichi ruranaykichipa chayllata rurashpa kawsaychi.

18 Kankunamanta sukkuna judiyu runakuna kashpaykichi señaladu kankichi. Chashna señaladu kashpaykichi Jesukristuta kreyishpa kawsashpaykichi señaladu kipariyichi. Chaymanta sukkuna mana judiyu runakuna kashpaykichi mana señaladu kankichi. Kankuna ama señalachinakuychichu. **19** Ñukanchikuna señaladu mana señaladupish kashpanchikuna mana nimananchu. Tata Diospa kamachikunankunata kasushpalla kawsananchikuna tiyan. **20** Ichará señaladu ichará mana señaladu kashpaykichi Jesukristuta kreyishkankichi. Imashnami kankichi chay layalla kipariyichi.

21 Rantidu runa kashpa Jesukristuta kreyishpaykichi chay rantishuk runapa mandunllapi trábabashpa kawsaychi. Rantidu runa kashpaykipish ama llakichichu. Chaymanta patronnikichi mandunmanta llukshichishunayaptikichi llukshiychi. **22** Rantidu runakuna kashpaykipish kunanka Señorninchi Jesukristuta kreyishpa kawsaptikichi payka rantishushkankichi payllata kasushpa kawsanaykichipa.

Chashnashina mana rantidu runa kashpaykipish Jesukristupa mandunpi kankichi payllata kasushpa kawsanaykichipa. **23** Señorninchi Jesukristu sukaman sufrihpa kruspi wañushpa rantiwarkanchisapa amana uchallikushpana kawsananchikunapa. Chayrayku ama munaychichu ni suk llullachikuk runapa munananta ruraya. **24** Rantidu runa mana rantidu runa kashpaykichi Jesukristuta kreyishpa kunanmantapacha allita payllata kasushpa kawsaychi.

25 Kunanka mana kasaradukunata yachachiykichi. Señorninchi Jesukristu kay yachachikunaynita mana yachachiwarkanchu. Chashna kaptimpish payka sukaman kuyawashpa yanapawaptin yachachiykichi. Chayrayku kay yachachikunaynita allita kasuychi. **26** Kunan kay tiempu aypa sufrihwiakninchu runakuna tiyaptin ñuka rimani alli kanman tukuy mana warmiyuk runakuna chashnalla kawsanaykichipa. **27** Kankuna warmiyuk kashpaykichi ama warmikichita wishchuychichu. Mana warmiyuk kashpaykichi ama munaychichu warmiyuk kayta. **28** Chaymanta kasaranayashpaykichika kasaraychi. Kasarashpa mana uchallikunkichichu.

Chaymanta suk shipash kasarashpaka paypish mana uchallikunchu. Kankuna kasaradu kashpaykichi sukáman frabajanaykichi tiyan warmikichita wambraykichita wiwanaykichipa. Chayrayku willashkaykichi ama warmiyuk kanaykichipa ama llakishpa kawsanaykichipa.

29 Wawkinikuna, paninikuna, sukaman willaykichi. Mana unaytachu kawsashunchisapa. Chayrayku kunanmantapacha kankuna warmiyuk kashpaykichi amana payllata yuyashpanachu kawsaychi. **30** Kankuna llakidu kashpaykichi amana llakidushinanachu kawsaychi. Suk fiestapi kashpaykichi amana chay fiestapishinanachu kawsaychi. Suk imata rantishpaykichi mana nimayukshina kawsaychi. **31** Tukuy kay

kawananchikuna allpa tukunan tiyan. Chayrayku rikchak layayuk kashpaykichi mana nimayukshinalla kawsaychi.

³² Ņuka munayman ama kay allpapi rikchak layapi yuyaykushpalla kawsanaykicipa. Mana warmiyuk ullku ashwanta yuyan imashnami Tata Diosta sirvishpa kushichinka nishpa. ³³ Warmiyuk ullku yuyanan tiyan imashnami warminta kushichishpa wiwanka nishpa. ³⁴ Chayrayku ishkay layata yuyanan tiyan. Chashnashina mana kusayuk warmi ashwanta yuyan imashnami Tata Diosta sirvinka nishpa. Tata Diospa munanallanta rurashpa payllata kuyashpa kushichishpa kawsan. Chaykamanka kusayuk warmi yuyanan tiyan imashnami kusanta kushichishpa wiwanka nishpa.

³⁵ Tukuy kayta willaykichi Tata Diosllata tukuy shunku kuyashpa kasushpa sirvinaykicipa. Manami kasaranaykichimanta michashpachu kaytaka willaykichi.

³⁶ Kunanka shipashyuk runakunata yachachiykichi: Machuyaduna shipashnikichi parladunwan sukanan kasarayta munaptin kankuna kasaranankunapa munashpaykichi kasarachiychi. Chashna chay shipashnikichita kasarachishpa mana uchallikunkichichu. ³⁷ Chaymanta sukanan yuyashpaykichi mana allichu kasarananpa nishpa shipashnikichi mana kasarayta munaptinka alli kanman ama kasarachinaykicipa. ³⁸ Chashnashina kankuna shipashnikichita kasarachishpaykichi allita rurankichi. Shipashnikichita mana kasarachishpaykichi ashwan allita rurankichi.

³⁹ Kusayuk warmika kusan wañunankaman kusarpa munayninpi kawsanan tiyan. Chaymanta kusan wañuptin suk ullkuwan kashkan kasaranayashpa chay ullku Tata Diosta kreyik kaptin alli kanman kasarananpa. ⁴⁰ Ņuka yuyani chay viyuda mana kashkan kasarashpa ashwan kushikushpa kawsanman. Chayta rimani Tata Diospa Espiritun yanapawaptin.

8

Pablu yachachikun ruradu dioskunapa churadu mikunata mikushunchichu manachu nishpa.

¹ Kunanka yachachiykichi ruradu dioskunapa churadu mikunakunata mikushunchichu manachu nishpa. Ņukanchikuna yachanchisapa chay ruradu dioskuna mana nimata rurayta atipanankunata. Chay ruradu dioskunata kuyak runakuna mana chayta yachansapachu. Ņukanchikuna chayta yachashpanchikunapish ama alabanakuyapachichu paykunamanta ashwan alli yachak kananchikunata. Chay runakunata kuyashpalla yanapashpalla kawsaypachi ashwan ashwanta kuyanakushpa kawsananchikunata.

² Ichará kankunamanta sukkuna rimankichi yachaysapa kanaykicipa. Chashna alabanakushpaykichi manara allita yachankichirachu Tata Diosta kuyashpa kawsayta. ³ Allita Tata Diosta kuyashpa kawsaptikichi paymi kankunatapish riksishunkichi.

⁴ Ņukanchikuna yachanchisapa suklalla Tata Dios tiyananta. Yachanchisapa chay ruradu dioskuna mana nimata rurayta atipanankunata. Chayrayku yachanchisapa chay ruradu dioskunapa churadu mikunata mikuptinchikuna mana nimananchu. ⁵ Kay allpapi aypa ruradu dioskuna aypa supaykuna tiyan. Aypa runakuna chay ruradu dioskunata chay supaykunata kasushpa kawsansapa. ⁶ Chashna chay runakuna kawsaptinkunapish ūukanchikuna rikchak layata rurak suklalla Tata Diosninchita kasushpa kawsanchisapa. Pay Tatanchikuna kaptin payllata kuyashpa

sirvishpa kawsananchikuna tiyan. Chaymanta suklalla kamachiwakninchikuna Señorninchi Jesukristu tiyan. Payka rikchak layata rurashka. Ñukanchikunatipish rurawashkanchisapa.

⁷ Chaymanta Jesukristuta kreyikmasinchikunamanta sukkuna manara chayta yachansaparachu. Ñawpa tiempu chay wawkinchikuna chay ruradu dioskunata kuyashpa chay mikunata mikusapa. Kunankaman chay mikunata mikushpankuna yuyansapa chay ruradu dioskunata kuyaykanankunata. Chayrayku yuyansapa chay mikunanta mikushpa uchallikuykanankunata. ⁸ Ñukanchikuna yachanchisapa chay mikunata mikushpanchikunapish mana mikushpanchikunapish mana uchallikunanchikunata. Mikuptinchikuna mana mikuptinchikunapish Tata Dios kuyawanchisapalla.

⁹ Chaymanta suk wawkinchi yuyanman mikushpa uchallikunanta. Chashna yuyashpa kawawanchimansapa mikuykaptinchi. Chaymanta paypish mikushpa yuyanman uchallikunanta. ¹⁰ Tukuy chayta yachashpanchikuna ichara rinchimansapa suk fiestapi tiyariashpa chay ruradu dioskunapa churadu mikunata mikuk. Chaypina ichara Jesukristuta kreyikmasinchikuna manara allita yachashpara kawawashpanchikuna paypish munanman mikuyta.

¹¹ Chashna mikushpa chay mana yachak wawkinchi yuyanman uchallikunanta. Chaymanta ichara manana Jesukristuta kreyishpanachu kawsanman. Chay modomanta ñukanchikuna chay wawkinchita uchallichinchimansapa. Señorninchi Jesukristu wañurkan chay wawkinchitapish salvanañpa. Chayrayku ama chay mana yachak wawkinchikunata uchallichiypachichu. ¹² Chay wawkinchita uchallichishpanchikuna Jesukristuta manana kasuykanchisapanachu.

¹³ Chayrayku ama munaypachichu niman suk wawkinchita uchallichiyta. Ñukanchikuna ruradu dioskunapa churadu mikunata mikushpanchikuna wawkinchita uchallichishpanchikuna amana kutin chay mikunata mikuy-pachinachu.

9

Pablu riman Jesukristu kachamushkanta yachachikuk kananpa.

¹ Ñukaka Señorninchi Jesukristuta kawashkani. Ñukata kachamuwashka paypa rimananta yachachikunaynipa. Mana ni suk runapa mandunpichu kani. Kankunata yachachiptinikuna Jesukristuta kreyishpa kawsaykankichi.

² Yuyawak runakuna mana yachansapachu Jesukristu kachamuwashkanta yachachikunaynipa. Chay runakuna mana chayta yachaptinkunapish kankunata yachachiptini Jesukristuta kreyishpa kawsaykankichi. Chayrayku yachankichi Jesukristu kachamuwashkanta.

³ Chay yuyawak runakunata willani: ⁴ Jesukristu kachamuwashka kaptin kankuna mikunaynita upyanaynita kuwanaykichi tiyan.

⁵ Jesukristupa yachachikukmasinikunawan Pedruwan Jesuspa wawkunkunapish warminkunawan tantalla purinsapa Tata Diospa rimananta yachachikunankunapa. Ñukapish Jesukristuta kreyik warmiwan kasarayta munashpaynika chay warminiwan tantalla yachachikuypi puriyman.

⁶ Kankuna chay yachachikuk runakunata kullkita kunkichi yachachishunaykichi. ¿Manachu wawki Bernabewan ñukapish atipaymansapa kullkita mañaynikichita?

⁷ Suk soldadu servisiupi kashpa manana kikinnachu mikunantaka rantin. Suk runa chakranmanta uva wayunkunata pallashpaka mikun. Ovejakuna kuydak runa chay ovejankunapa lechinta surkushpa upyan. ⁸ Mana runakunapa yuyayninkunallatachu yachachiykichi. Ñawpa yachachikuk Moisespish chayta yachachikurkan.

⁹ Payka killkadunpi yachachiwanchisapa: “Toroykita murukunata pelachinanpa muyushpa saruykaprin ama shiminta watapuychu murukunata atipanapá mikuya.” Tata Dios chayta yachachiwashpanchikuna mana chay torokunallatachu yuyaykarkan. ¹⁰ Chayta yachachiwanchisapa ñukanchikuna yachananchikunapa tukuy Tata Diospa rimananta yachachikukkunata allita wiwananchikunapa.

Suk runa chakranpi allpata aspishtpa atarichin murukunata tarpunanpa. Chay tarpushkan pukuptin chikan runa pallan. Chay aspik runa chay pal-lak runa ishkantinkuna kushikushpa trabajansapa yuyashpa murukunata chaskinankunata.

¹¹ Ñukaykuna Tata Diospa rimananta yachachikukkunaka chay chakrapi tarpuuk runakunashinami kanisapa. Kankunata yachachiptinikuna kankuna mikunawan kullkiwan wiawanaykichi tiyan kawsanaynikunapa. ¹² Suk yachachikuk runakuna kankunata mañashunkichi yanapanaykichi. Bernabewar ñukapish munashpaynikuna mañaykichiman. Mañayta atipashpaynikunapish mana munanisapachu nimata mañaynikichita. Ñukaykuna sukaman sufrishpa trabajashpa kawsanisapa ama ni pi rimanankunapa Jesukristupa rimananta kullkita munashpalla yachachikunaynikunata.

¹³ Kankuna yachankichi Tata Diospa wasinpi trabajak runakuna Tata Diosta kuyashpa mikunata churashkankunata. Chaymanta Tata Diosta kuyashpa altarpí wañuchishkankuna animalkunapa aychanta mikunsapa. ¹⁴ Chashnashina Tata Dios munan kankuna Jesukristu salvakuk kananta yachachishuknikichita wiwanaykichi.

¹⁵ Ñukaka kankunamanta manami nimata chaskiyta munashkanichu. Ni kay kartata killkaykichichu kullkita kuwanaykichita munashpa. Chashna mana nimata mañashpayni sukaman kushikuni. Yarkaymanta wañunayshpaynipish manami nimata mañashkaykichichu. Ñuka suk imata mañashpayni mana kushikuymanchu.

¹⁶ Jesukristu salvawananchikunata yachachikushpaynipish manami alabanakunichu. Tata Dios kachamuwashkanrayku yachachikunaytiyan. Mana yachachikuptini Tata Dios kastigawanman. ¹⁷ Mana yachachikuya munashpaynipish yachachikunaytiyan Tata Dios kachamuwashka kaptin. Kushikushpa yachachikuptini payka premyuynita kuwanka. ¹⁸ Kankunamanta mana nimata mañashpayni Jesukristu salvawananchikunata yachachikushpa sukaman kushikuni. Kankunata yachachishkaynirayku atipayman kullkita mañaynikichita. Mana nimata mañashpayni sukaman kushikuni.

¹⁹ Ñuka mana rantidu runa kashpaynipish rantidu runashina tukuy runakunata yanapanisapa. Chashna yanapashpasapa munani ashwan aypa runakuna Jesukristuta kreyishpa kawsanankunapa. ²⁰ Judiyu runakuna Moisespa kamachikunankunata kasushpa kawsansapa. Ñuka judiyu runa kashpaynipish yachani chay kamachikunankunata kasushpa mana salvadu kanaynita. Chayta yachashpaynipish judiyu runakunawan tantalla kawsashpayni paykunashina Moisespa kamachikunankunata

kasushpa kawsani. Chashnamanta ashwan aypa judiyu runakunata yachachinisapa Jesukristuta kreyishpa kawsanankunapa.

²¹ Mana judiyu runakuna Moisespa kamachikunkunata mana kasush-pachu kawsansapa. Ñuka paykunawan tantalla kawsashpayni payku-nashinalla kawsani yachachikuptini Jesukristuta kreyinankunapa. Payku-nashinalla kawsashpaynipish Jesukristupa kamachikuskankunata ka-sushpayni Tata Diostapish kasushpa kawsaykani.

²² Jesukristuta kreyikmasinchikuna manara payta allita kasushpa kawsayta yachaptinkuna paykunawan kawsashpayni paykunashina kawsani. Tukuy piwanpish kawsashpayni paykunashinalla kawsani. Kuyashpalla paykunata yachachinisapa Jesukristuta kreyikuptinkuna salvadu kanankunapa. ²³ Ñuka Jesukristu salvawananchikunata yachachikuni payta kreyikmasinikunawan kushikunaynipa.

²⁴ Kankuna yachankichi aypa runakuna gananayashpa sinchita kallpash-pankuna suklalla premyuta chaskin. Kankunapish chay sinchita kallpak runashina allillata rurashpa Tata Diosllata kasushpa kawsaychi paymanta suk alli premyuta chaskinaykichipa. ²⁵ Pukllashpa premyuta chaskinayak runakuna wakllichikuk mikunata upyanata sasinsapa pukllashkan diya ama shaykunankunapa. Chay pukllak runakuna sasinsapa wakllik panka-manta ruradu koronata chaskinankunapa. Ñukanchikuna chay pukllak runakunashina allillata rurashpa kawsananchikuna tiyan Tata Dios mana wakllik alli premyuta kuwananchikunapa.

²⁶ Ñuka chay pukllak runakunashina allillata rurashpa kawsaykani. Mana kallpanichu suk mana yuyaykushpa kallpak runashina. Mana makanaku-nichu wayrallata sakmashpa. Kuskata yuyashpalla kawsani. ²⁷ Chay pre-myuta chaskinayak mana allikunata sasic runakunashina ñukapish mana kikinipa munanaynitachu rurani. Tata Diosta allita kasushpa kawsani sukkunata yachachishkayniwasha ama premyuynita pierdinaynipa.

10

Ama ñawpa awilunchikunashina ruradu dioskunata kuyaypachichu.

¹ Wawkinikuna, panikuna, mana munanichu kunkanaykichipa tukuy chay ñawpa awilunchikuna chakidu pampapi puriptinkuna Tata Dios puyuwan amachashkankunata.

Chaymanta Tata Dios chay manllayba Puka Kochata rakinachiption tukuy runakuna chayta purishpa pasarkansapa. ² Chashna Tata Dios chay puyuwan amachaptinkuna chay kochata pasashpa bawtisadukunashina karkansapa Moisesta kasushpa katinankunapa.

³ Tukuy diya Tata Dios chay ñawpa awilunchikunata sielumanta mikunankunata kurkansapa. ⁴ Chaymanta mana yaku tiyaptin suk manllayba rumimanta Tata Dios yakuta llukshichimurkan tukuy runakuna upyanankunapa. Chay manllayba rumi Jesukristuta yuyachiwanchi. Payka chay runakunawan tantalla purishpa amachashpa salvarkansapa ama yarkaymanta yakumanta wañunankunapa. ⁵ Chashna Jesukristu suka-man yanapaptinkunapish chay runakuna mana nima Tata Diosta kasuna-yarkansapachu. Chayrayku chay chunlla chakidu allpapi wañurkansapa.

⁶ Tata Dios chay ñawpa awilunchikunata kastigarkansapa ñukanchikuna ama munananchikunapa paykunashina mana allita rurashpa kawsayta.

⁷ Tata Diospa rimanan willawanchi: "Israel runakuna beshekuta kurimanta ruarkansapa. Chay beshekuta kuyashpangkuna sukaman mikurkansapa

upyarkansapa pukllarkansapa.” Kankuna ama chay runakunashina suk ruradu diosta kuyaychichu.

⁸ Ama paykunashina chikan warmiwan uchallikuyupachichu. Paykuna uchallikushkankunaryku suk diyalla unkuywan ishkay chunka kimsa waranka runakuna wañturkansapa.

⁹ Chaymanta ama chay ñawpa awilunchikunashina Tata Diosta rabyachiy-pachichu. Paykuna rabyachishkankunaryku Tata Dioska machakuyku-nata kacharkan mukuptinkuna wañunankunapa.

¹⁰ Chaymanta ama chay ñawpa awilunchikunashina rimaypachichu Tata Dios mana alli kananta. Chashna rimaptinkuna Tata Diospa angelin chay mana alli rimak runakunata wañuchirkansapa.

¹¹ Tata Dioska chay ñawpa awilunchikunata kastigarkansapa ñukanchikuna yachananchikunapa amana paykunashina mana allita rimashpa kawsayta. Tata Dios tukuy chayta killkachirkan kay kulluna tiempu kawsashpanchikuna yachananchikunapa payta allita kasussha kawsayta.

¹² Kankuna allita rurashpa kawsaykanaykichita yuyanakushpaykichika kuydanakuchi ama uchallikunaykichipa. ¹³ Kay allpapi kawsash-panchikuna tukuy runakuna mana alli ruranakunata munanchisapa rurayta. Tata Dios sukaman allima kashpa sukaman kuyawashpanchikuna yanapawanchisapa chay mana alli ruranayananchikunata ama rurananchikunapa. Chashna Tata Dios yanapawaptinchikuna atipashunchisapa allita rurashpa kawsayta.

¹⁴ Chayrayku munanayni wawkinikuna, paninikuna, amana ruradu dioskunata kuyaychinachu. ¹⁵ Kankuna alli yachak runakuna kashpaykichi yuyaychi allitachu manachu yachachishkaykichi nishpa. ¹⁶ Ñukanchikuna Tata Diosta kuyashpa tantanakushpa vinuta upyashpanchikuna Tata Diosta agradesinchisapa. Chashna chay vinuta upyashpanchikuna Jesukristu yawarninta ichashkanrayku paywan sukllalla kanchisapa. Chaymanta suk panta pakishpa mikushpanchikuna Jesukristu wañushkanrayku paywan sukllalla kanchisapa. ¹⁷ Aypa kashpanchikunapish chay panllata tantalla mikunchisapa. Chashna chay panta mikushpanchikuna sukwani sukwani sukllalla kanchisapa.

¹⁸ Chay israel runakunapish animalninkunata altarpí wañuchiksapa Tata Diosta kuyanankunapa. Chaymanta chay aychata tantalla mikushpankuna Tata Diosta tantalla kuyaksapa.

¹⁹ Chaymanta kashkan willaykichi chay ruradu dioskuna mana nimachu. Chay ruradu dioskunata kuyashpa wañuchinankuna animalpa aychanpish manami chikan laya aychachu. ²⁰ Chay Tata Diosta mana kreyik runakuna suk ruradu diosta kuyashpa animalninkunata wañuchishpa supaykunata kunsapa.

Ñuka mana munanichu kankuna chay supaykunata kushkankuna aychata mikushpa chay supaykunata kuyanaykichipa. ²¹ Kankuna supaykunata kushkankuna mikunata mikushpaykichi manana atipankichinachu tantanakushpa Jesukristuta kuyashpa vinuta upyayta panta mikuya. ²² Ñukanchikuna supaykunata kuyashpanchikuna Señorninchita rabyachinchisapa. Chashna Tata Diosta rabyachishpaka manami kastigawananchiku-namanta kishpishunchisapachu.

Jesukristuta kreyishpa kawsashpanchikuna kuyanakushpa kawsananchikuna tiyan.

²³ Ariya imatapish kaptin ruraptinchikuna mana nimananchu. Chashna mana nima kaptinpish mana állichu rurananchikunapa. Chaykunata

rurashpanchikuna manana atipanchisapanachu Jesukristuta ashwan allita kasushpa kawsayta. ²⁴ Tata Dios munan sukkunata yanapashpa kawsananchikunapa. Mana munanchu kikinchikunallapa munananchiku-nata rurananchikunapa.

²⁵ Kankuna merkadupi suk aychata rantishpa ama tapukuychichu: ¿Kay aychaka ruradu dioskunata kuyashpa wañuchishkankunachu? Mana tapukushpalla rantishpa mikuychi. ²⁶ Tata Dioska tukuy kay allpata tukuy kay allpapi tiyakta rurarkan. Chayrayku Tata Diosllapa kaptin rikchak layata mikushpanchikuna mana uchallikunchisapachu.

²⁷ Ichara Jesukristuta mana kreyik runa wasinman pushashunkichi-man mikuk. Chashna mikuk pushashuptikichi munashpaykichika rillary-chilla paywan mikuk. Ama tapukuychichu ruradu dioskunata kushkanku-nata. ²⁸ Chaymanta ichara chay karashunayak runa willashunkichi-man: "Kay mikunaka diosninikunata kuyashpa wañuchishkankunami." Chashna willashuptikichika ama chay aychata mikuychichu chay runa ama yuyanarpa kankunapish chay ruradu diosta kuyanaykichta.

²⁹ Chay aychata mikushpaykichika kankunapa mana ucha kaptinpish chay runa yuyanman uchallikunaykichta. Chaymanta ichara tapuwan-kichiman: "¿Imapatí sukpa yuyaynirayku chay aychata mana mikuyman?

³⁰ Ñuka suk imata mikushpa Tata Diosta agradesishpa chay aychata mikup-tini ¿imapatí suk runakuna mikushkaynirayku yuyawansapa mana allita ruraykanaynita?"

³¹ Chashna tapuwaptikichi willaykichi: Mikushpaykichi upyashpaykichi rikchak layata rurashpaykichi tukuy layata ruraychi Tata Diosllata kushichi-naykichipa. ³² Ama judiyu runakunata nima mana judiyu runakunata nima Tata Diosta kasukmasikichita uchallichiychichu. ³³ Ñukaka tukuy laya allita rurani tukuy runakunata yanapanaynikunapa. Manami kikinipa mu-nanaynitachu rurashpa kawsaykani. Tukuy runakunata yanapani payku-napish Jesukristuta kreyiptinkuna Tata Dios perdonanankunapa.

11

Pablu yachachikun imashnami Tata Diospa wasinpi kashunchisapa.

¹ Ñukaka Jesukristu rurashkanshina allita rurashpa kawsaykani. Kankunapish ruranaynishina allita rurashpa kawsaychi. ² Kankuna kuyawashpa tukuy yachachishkaynikunata mana kunkashpa allita kasuykankichi. Chayrayku alabaykichi.

³ Munani entiendinaykichipa. Jesukristuka Tata Diospa mandunpi kawsan. Tukuy kreyikuk runakuna Jesukristupa mandunpi kawsan. Tukuy kusayuk warmi kusarpa mandunpi kawsan.

⁴ Kankuna ullukuna Tata Diospa wasinpi kashpaykichi orashpa Tata Diospa rimananta yachachikushpa umaykichita pampachishpaykichi Jesukristuta washanchaykankichi. ⁵ Kankuna kusayuk warmikuna Tata Diospa wasinpi kashpaykichi orashpa Tata Diospa rimananta yachachikushpa umaykichita mana pampachishpaykichi kusaykichita washanchaykankichi.

⁶ Mana umaykichita pampachinayaptikichika alli kanman chukchaykichita rutuchinaykichipa. Ichara suk paninchi yuyanman chukchanta rutuchishpa pinkakuna laya kananta. Chashna tuyaptin alli kanman umanta pampachinanpa.

⁷ Tata Diospa wasinpi kashpaykichi mana allichu ullukuna umayki-chita pampachinaykichipa. Tata Dioska suk ullkuta rurarkan payshina alli rurak kananpa sukkunata riksichinanpa Tata Dios alli rurak kananta.

Chaymanta warmita rurarkan riksichikunanpa Tata Dios ullkuta allita rurashkanta. ⁸ Tata Dios ullkumanta warmitaka rurarkan. Manami warmimantachu ullkutaka rurarkan. ⁹ Ullku sapallan kaptin Tata Dios warmitaka rurarkan kusanta allita yanapashpa kawsananpá. Mana ullkutaka rurarkanchu warmin sapallan kaptin. ¹⁰ Chayrayku tukuy kusayuk paninchikuna umankunata pampachinkasapa kusanpa mandunpi kananta kawachikunanpa. Angelkunapish chayta kawashpa yachankasapa kusanta allita kasushpa kawsaykanankunata.

¹¹ Chaymanta Jesukristuta kreyishpanchikuna warmikunapish ullkukanapish sukwani sukwani yanapanakushpa animuchinakushpa kawsashun-chisapa. Mana paninchikuna nima wawkinchikuna atipansapachu sapal-lankuna Tata Diosta kuyashpa sirviya. ¹² Yachanchisapa Tata Dios tukuy layata rurashkanta. Kallarinanpi suk ullkuta rurarkan. Chaymanta chay ullkumanta suk warmita rurarkan. Ullkumanta warmita ruraptinpish tukuy ullkunkuna warmimanta nasinchisapa. Tata Dios warmikunata ullkukunata rurashka kaptin payllapa kanchisapa.

¹³ Kankuna yuyaychi allichu manachu kusayuk warmi mana umanta pampachishpa Tata Diostan parlananpa. ¹⁴ Chaymanta kankuna ul-kukuna, amañankichi chukchaykichi tipidu kawsayta. Pinkakunkichiman suk warmishina suni chukchayuk kawsayta. ¹⁵ Kankuna warmikuna, amañankichi suni chukchayuk kawsayta. Chashna suni chukchayuk kashpaykichi sukaman kushikunkichi. Tata Dios warmikunata suni chukchankunata kurkan chaywan umankunata pampachinankunata.

¹⁶ Ichara suk runakuna kankunata willashunkichiman: "Mana allichu chayta amañanaykichi." Nukaka chay runakunata willani: Nukaykunaka tukuy Jesukristuta kreyikmasinikunawan tukuy maypi chashna amañanisapa.

Pablu yachachikun Jesukristu wañuskanta yuyashpa tantalla mikunanchikunapa upyananchikunapa.

¹⁷ Wawkinikuna, panikuna, mash uyariwaychi. Tata Diosta kuyanaykichi sukipish tantanakushpaykichi manana yanapanakuykankichinachu. Chayrayku mana atipanichu alabaynikichita. ¹⁸ Suk runakuna willawashkasapa kankunashi Tata Diosta kuyanaykichi sukipish sukwani sukwani sukaman ayninakunkichi. Ichará chashna ayninakushpa kawsankichi. ¹⁹ Kankuna yuyankichi ayninakushpalla yachankichiman maykanmi ashwan allita Jesukristuta kreyinkichi nishpa.

²⁰ Chashna ayninakushpaykichi panta mikushpa vinuta upyashpa mana Jesukristu wañuskantachu yuyaykankichi. ²¹ Mana shuyanakushpaykichi sukipish sukipish kikikichipa mikunaykichillata mikunkichi. Sukkuna ay-pata upyashpa machankichi. Sukkuna mana nimata mikushpa nimata upyashpa yarkaymanta kiparinkichi. ²² ¿Imapatí kikikichipa mikunaykichillata apashpa mikunkichi? ¿Manachu wasikichi tiyan chaypi mikunaykichi upyanaykichi? ¿Imapatí chay mana nimayuk wawkiykhita mana karashpa pinkachinkichi? Chaykunarayku ¿imatati ñuka willashkaykichi? Chashna ruraptikichi manami alabashkaykichi.

Jesukristu wañuskanta yuyashpa mikunchisapa upyanachisapa.

(Mt 26.26-29; Mr 14.22-25; Lk 22.14-20)

²³ Señorninchi Jesukristu yachachiwashkanta yachachiykichi. Judas rantikunan tuta Señorninchi Jesukristu tukuy disipulunkunawan tantalla mikushpa suk panta apishpa Tata Diosta agradesirkan.

²⁴ Agradesishkanwasha chay panta pakishpa disipulunkunata

willarkansapa: "Kay panta mikuychi. Kay panka kuerpuynimi. Ņuka wañusha kankunata salvanaynipa. Kunanmantapacha kankuna tantanakushpa suk panta mikushpa wañunaynita yuyaychi."

²⁵ Chaymanta chay panta mikushkankunawasha Jesuska suk vasu vinuta apishpa willarkansapa: "Kay vinuka yawarninta yuyachishunkichi. Ņuka yawarninta ichashpa mushuk paktuta kankunawan rurasha. Kunamantapacha kankuna tantanakushpa vinuta upyashpaykichi wañunaynita yuyaychi."

²⁶ Chashna Jesus yachachikuptin kashkan shamunankaman ūukanchikuna chay panta mikushpanchikuna chay vinuta upyashpanchikuna yuyanchisapa Jesukristu wañushkanta.

Yuyanakunanchikuna tiyan allita rurashpachu kawsaykanchisapa manachu nishpa.

²⁷ Kankuna mana kuyanakushpa chay vinuta upyashpaykichi chay panta mikushpaykichi yuyaykankichi Jesukristu yawarninta ichashpa wañushkan mana nima kananta. Chashna yuyashpa mikushpaykichi Tata Diosta piñachinkichi. ²⁸ Chayrayku manara chay panta mikushpara chay vinuta upyashpara shunkunchikunapi yuyananchikuna tiyan allitachu manachu rurashpa kawsaykanchisapa nishpa. ²⁹ Chay panta mikushpa chay vinuta upyashpa Jesukristu wañushkanta allita yuyananchikuna tiyan. Mana allita yuyashpa mikuptinchikuna Tata Dios kastigawashunchisapa. ³⁰ Chashna Tata Dios kankunata kastigashuptikichika sukkuna unkudu sukkuna shaykudu kankichi. Sukkuna wañushkasapana.

³¹ Chayrayku ūukanchikuna allita yuyananchikuna tiyan allita rurashpachu kawsaykanchisapa manachu nishpa. Chashna allita yuyanakushpa mikuptinchikuna upyaptinchikuna Tata Dios mana kastigawashunchisapchu. ³² Mana allita rurashpa kawsaptinchikuna Tata Dios kuyawashpanchikuna kastigawanchisapa allita rurashpa kawsananchikunapa. Kastigawanchisapa ama chay mana Jesukristuta kreyik runakunashina mana tukuyniuk ninaman rinanchikunapa.

³³ Chayrayku wawkinikuna, paninikuna, tantanakushpaykichi chay panta mikunaykichipa chay vinuta upyanaykichipa sukwani sukwani shuyanakuychi tantalla mikunaykichipa upyanaykichipa. ³⁴ Ichara Jesukristuta kreyikmasikichi yarkaymanta kankunawan tantanakushpa aypata mikunman aypata upyanman. Alli kanman chay yarkak runa manara kankunawan tantanakushpara wasinpi allita mikunarpa ama Tata Dios kastigananropa.

Kankunaman rishpayni ashwanta yachachishkaykichi.

12

Tata Diospa Espiritun sukta sukta atipachiwananchisapa suk layata suk layata rurananchikunapa.

¹ Wawkinikuna, paninikuna, kunan yachachiykichi Tata Diospa Espiritun tukuy Jesukristuta kreyik runakunata atipachiwananchikunata sukta suk layata sukta suk layata rurananchikunapa. ² Kankuna allita yuyankichi manara Jesukristuta kreyishpa kawsaptikichira supay pantachishuptikichi mana rimakuk dioskunata kuyashpa kawsashkaykichita. ³ Kunanka munani yachanaykichipa imashnami yachanchisapa pimi allita yachachikun pimi mana allitachu yachachikun nishpa. Tata Diospa Espiritun suk runata

atipachiptinka mana atipanmanchu rimayta Jesus malditu kananta. Chaymanta Tata Diospa Espiritun mana atipachiwaptinchikuna mana atipan-chisapachu rimayta Jesus kamachiwakninchu kananta.

⁴ Tata Diospa Espiritun atipachiwaptinchikuna sukfish sukfish atipan-chisapa suk layata suk layata rurayta. Chashna suk layata suk layata rurapt-inchikunapish Tata Diospa Espiritunlla atipachiwaykanchisapa. ⁵ Rikchak laya ruranata rurashpanchikunapish Señorninchi Jesukristullata sirviykan-chisapa. ⁶ Rikchak laya rurana tiyan Tata Diosta sirvinanchikunapa. Chashna rikchak layata ruraptinchikuna Tata Dios tukuy laya ruray atipak kashpa atipachiwanchisapa tukuy chaykunata rurananchikunapa.

⁷ Tata Diospa Espiritun sukta sukta atipachiwanchisapa tukuy Jesukristuta kreyikmasinchikunawan yanapanakushpa kawsananchikunapa. ⁸ Tata Diospa Espiritun sukkunata atipachiwanchisapa suk runakunata yachachiya allita rurashpa kawsanankunapa. Sukkunata atipachiwanchisapa Tata Diospa rimananta allita entiendishpa yachachikunanchikunapa.

⁹ Tata Diospa Espiritun sukkunata atipachiwanchisapa tukuy shunku Tata Dioslata kreyishpa alli ruranakunata rurananchikunapa. Sukkunata atipachiwanchisapa unkudukunata alliyachiya. ¹⁰ Sukkunata atipachiwanchisapa milagrukunata rurayta. Sukkunata atipachiwanchisapa yachachikuyta imatami Tata Dios ruranayan nishpa. Sukkunata atipachiwanchisapa riksiya pimi allita Tata Diosta kasushpa yachachikuykan pimi supaykunata kasushpa llullachikushpa yachachikuykan nishpa. Sukkunata atipachiwanchisapa mana yachaypa laya rimanakunata rimayta. Sukkunata atipachiwanchisapa chay mana yachaypa laya rimashkunkunata entiendichikuya. ¹¹ Tata Diospa Espiritunlla munashpa tukuy kay alli ruranakunata suktu atipachiwanchisapa rurayta.

Jesukristuta kreyishpa kawsashpanchikuna suk kuerpushina kanchisapa.

¹² Kuerpunchikunapi aypa laya tiyaptinpish suk kuerpulla kanchisapa. Chashnashina suk laya suk laya alli ruranakunata rurashpanchikunapish Jesukristuta kreyishpanchikuna suk kuerpulla kanchisapa. ¹³ Judiyu mana judiyu runakuna kashpanchikunapish, rantidu mana rantidu runakuna kashpanchikunapish Jesukristuta kreyishpa suklalla kanchisapa. Tata Diospa Espiritun bawtisawashpanchikuna tantanachiwanchisapa suklalla kananchikunapa. Tata Dios tukuy ñukanchikunata Espiritunta kuwashkan-chisapa.

¹⁴ Kuerpunchikunapi aypa laya imanchikuna tiyawaptinchikunapish suk kuerpulla kanchisapa. ¹⁵ Ichara chakinchi willawanchiman: Ñuka mana makiki kashpaynika mana kanpachu kani nishpa. Chashna willawapt-inchikunapish chakinchika ñukanchillapami. ¹⁶ Ichara rinrinchi willawanchiman: Ñuka mana ñawiki kashpaynika mana kanpachu kani nishpa. Chashna willawaptinchipish rinrinchika ñukanchillapami.

¹⁷ Tukuy kuerpunchi ñawilla kaptin mana rinriyuk kashpanchikunaka mana nima atipanchimansapachu uyarkuya. Tukuy kuerpunchi rinri kaptin mana sinkayuk kashpanchikunaka mana atipanchimansapachu nimata mutkiya. ¹⁸ Tata Dioska tukuy imanchikunata mayipicha munarkan churayta chaypi churashka. ¹⁹ Rinrinchilla ñawinchilla sinkanchilla kashpanchikuna mana kuerpuvukchu kanchimansapa. ²⁰ Tukuy laya kuerpunchikunapi tiyaptinpish suklalla kanchisapa. Chaymantapish Jesukristuta kreyishpanchikuna suklalla kanchisapa.

21 Ñawinchikuna mana makinchikunata willanmanchu: Mana kawakuyta atipaptikichi mana munaykichichu. Umanchipish mana chakinchikunata willanmanchu: Kankunata mana munaykichichu. **22** Tukuy imanchikuna allima. Suk imanchikunata mana nimatashina yuyashpanchikunapish sukaman yanapanwanchisapa.

23 Suk imanchikunata mana kawachikunayashpa kuydashpa llachapawan arkanchisapa. Suk imanchikunata mana munanchisapachu ni pi kawanana. Chay imanchikunata ashwan allita arkanchisapa. **24** Suk imanchikunata kawachikunayashpa mana chashnachu arkanchisapa. Tata Dioska yachachiwashkanchisapa chay mana kawachikunayananchikunata arkananchikunapa. **25** Tata Dios mana munanchu ni suk imanchikunata mana nimatashina kawananchikunapa. Kuerpunchikunata rurarkan tukuy imanchikuna sukwani tantalla allita yanapanakunankunapa. **26** Suk imanchikuna nanapatin chaywan tukuy kuerpunchi sufrin. Suk imanchikunata kuydaptinchikuna tukuy kuerpunchi kushikun.

27 Kuerpunchikunapi aypa imanchikuna tiyan. Chashnashina Jesukrista kreyishpa aypa kashpanchikunapish paypa kuerpunschina kanchisapa. **28** Tata Dios atipachiwanchisapa suka laya suka laya ruranakunata rurananchikunapa. Sukkunata kachawashkanchisapa tukuy mayta rishpa rimananta yachachikunanchikunapa. Sukkunata atipachiwanchisapa yachachikuya imatami payka ruranayan nishpa. Sukkunata atipachiwanchisapa paypa rimananta yachachikuya. Sukkunata atipachiwanchisapa milagrukunata ruraya. Sukkunata atipachiwanchisapa unkudukunata aliyachiya. Sukkunata atipachiwanchisapa runakunata yanapayata. Sukkunata atipachiwanchisapa Jesukristuta kreyikmasinchikunata yachachiyta allita tantalla trabajanankunapa. Sukkunata atipachiwanchisapa mana yachaypa laya rimanakunata rimakuya.

29 Tata Dioska manami tukuytachu kachawanchisapa tukuy mayta rishpa paypa rimananta yachachikunanchikunapa. Manami tukuytachu atipachiwanchisapa yachachikuya imatami payka ruranayan nishpa. Manami tukuytachu atipachiwanchisapa paypa rimananta yachachikuya. Manami tukuytachu atipachiwanchisapa milagrukunata ruraya. **30** Manami tukuytachu atipachiwanchisapa unkudukunata aliyachiya. Manami tukuytachu atipachiwanchisapa mana yachaypa laya rimanakunata rimaya. Manami tukuytachu atipachiwanchisapa chay mana yachaypa laya rimanakunata entiendichikuya.

31 Chayrayku akuychi Tata Diosta mañaypachi atipachiwananchikunapa chay ashwan alli ruranakunata ruraya. Kunanka yachachiykichi imashnami tukuy chay alli ruranakunamanta ashwan allita kuyanakushpa kawsankichi nishpa.

13

Pablu yachachiwanchisapa imashnami kuyanakushpa kawsashunchisapa nishpa.

1 Runakunapa angelkunapa mana yachaypa laya rimanakunata rimashpanchikunapish mana kuyanakushpanchikunaka yankamanta chay mana yachaypa laya rimanakunata rimanchisapa. Chashna rimashpanchikunaka suka kampanata waktaykakshina suka bullata rurakshina kanchisapa.

2 Tata Dios ruranayananta yachachikushpanchikunapish mana kuyanakushpanchikunaka yankamanta chaykunata yachachikunchisapa. Tata Dios munananta manara yachachikushkanta yachashpanchikunapish mana kuyanakushpanchikunaka yankamanta chaykunata yachanchisapa.

Tata Diospa rimananta allita entiendishpanchikunapish mana kuyanakushpanchikunaka yankamanta entiendinchisapa. Sukaman Tata Diosta tukuy shunku kreyishpa sukaman almirana laya ruranakunata rurashpanchikunapish mana kuyanakushpanchikunaka yankamanta chaykunata ruranchisapa.

³ Tukuy tiyawananchikunata mana nimayuk runakunata kushpanchikunapish mana chay runakunata kuyashpanchikunaka yankamanta chaykunata kunchimansapa. Suk chikniwakninchu runakuna rupachiwashpa wañuchiaptinchikunapish chay wañuchiawkninchu runakunata mana kuyashpanchikunaka Tata Dios mana nimata kuwashunchisapachu.

⁴ Runamasinchikunata kuyashpanchikuna mana piñayashpa kushikushpalla yanapashpa kawsanchisapa. Mana sukpa ima tiyapukninta munanchisapachu. Mana kikinchikunallapa munananchikunata rurashpa mana alabanakushpa kawsanchisapa.

⁵ Runamasinchikunata kuyashpanchikuna mana millanapa layata rimanchisapachu nima ruranchisapachu. Mana kikinchikunallapa munanchisapachu. Mana kunanllachu piñakunchisapa. Mana ni pita chikninchisapachu. ⁶ Kuyashpanchikuna runamasinchikuna sufriptinkuna mana kushikunchisapachu. Runamasinchikuna allita rurashpa kawsaptinkuna kushikunchisapa.

⁷ Kuyashpanchikuna runamasinchikuna chikniwaptinchikunapish mana nimata rimashpalla kawsanchisapa. Runamasinchikunata kuyashpanchikuna suk runapa mana allita willawaptinchikuna manara allita yachashpa mana kreyinchisapachu. Runamasinchikuna mana allita ruraptin shuyanchisapa allita rurashpa kawsanankunata. Ima layata sufriptinchikunapish mana shaykushpalla kawsanchisapa.

⁸ Señorninchi Jesukristu shamuptin manana Tata Diospa ruranayanankunata yachachikushchunchisapanachu. Manana chay mana yachaypa laya rimakanata rimashchunchisapanachu. Tukuy yachashkanchikuna manana nimanachu kanan tiyan. Chashna tukuy yachananchikuna tukuptinpish kuyanakushchunchisapalla. ⁹ Kunan kay tiempu sukaman yachashpanchikunapish mana tukuytachu yachanchisapa. Tata Dios ruranayananta mana tukuytachu yachachikunchisapa. ¹⁰ Señorninchi Jesukristu shamuptin allita entiendishunchisapa. Chay ñawpa yachashkanchikunata mana nimatachina kawashunchisapa.

¹¹ Wambra kashpanchikuna mana atipashkanchisaparachu allita rimakuya yuyayta yachayta. Kunan runakuna kashpanchikuna manana wambrakunashinanachu yuyaykunchisapa. ¹² Iden puyuyadu espejupi uyanchita chinka chinkallata kawananchikunashina Tata Diospa yuyayinta manara allitarachu yachanchisapa. Señorninchi Jesukristu shamuptinra uya uya kawanakushpanchikuna tukuy mana yachashkanchikunafa allitana yachashchunchisapa. Kunan manara allitarachu Tata Diosta riksinchisapa. Jesukristu shamuptin Tata Dios riksiwananchikunashina paytapish allitana riksishunchisapa.

¹³ Jesukristu shamunankaman payta tukuy shunku kreyinanchikuna tiyan. Kushikushpa shuyananchikuna tiyan sielman rinanchikunapa. Sukwan sukwan kuyanakushpalla kawsananchikuna tiyan. Chashna kuyanakushpa kawsashpanchikuna Tata Diosta ashwan allita kushichinchisapa.

14

Akuychi munaypachi Tata Diospa Espiritun tukuy layapi atipachiwanchikunata.

¹ Chayrayku sukwan sukwan allita kuyanakushpalla kawsaychi. Chashna kuyanakushpalla munaychi Tata Diospa Espiritun suktapish suktapish atipachishunaykichipa tukuy alli laya ruranakunata ruranaykichipa. Tukuy chay alli ruranakunamanta ashwanta munaychi Tata Diospa ruranayananta yachachikunaykichipa. ² Mana yachaypa laya rimanata rimashpaykichi Tata Diosllata mana runakunatachu parlachinkichi. Tata Diospa Espiritun manara yachashkaykichita atipachishunkichi rimayta. Chay mana yachaypa laya rimanata rimaptikichipish runakuna mana entiendishunkichichu.

³ Chaymanta Tata Diospa ruranayananta yachachikushpaykichi tukuy uyarishuknikichita entiendichinkichi paykunapish Jesukristuta ashwanta kreyishpa kawsanankunapa. Paykunata animuchishpa yanapanicki ashwan allita rurashpa kawsanankunapa. ⁴ Chay mana yachaypa laya rimanata rimashpaykichi kikikichilla animuchinakunkichi ashwan allita Jesukristuta kreyishpa kawsanaykichipa. Chaymanta Tata Diospa ruranayananta yachachikushpaykichi Jesukristuta kreyikmasikichita yanapanicki ashwan allita kreyikushpa kawsanankunapa.

⁵ Ņuka munayman tukuy kankuna mana yachaypa laya rimanata rimaykichi. Chashna munashpaynipish ashwanta munayman Tata Diospa ruranayananta sukkunata yachachinaykichipa. Tata Diospa ruranayananta yachachikushpaykichi kreyikukmasikichita ashwan allita yanapanicki. Chay mana yachaypa laya rimanata rimaptikichi tiyanan tiyan suk runa chay rimanata entiendichikunarpa. Chaypina tukuy Jesukristuta kreyikmasikichita animuchinkichi ashwan allita katinankunapa.

⁶ Chayrayku wawkinikuna, paninikuna, kankunata pasyak rishpayni mana yachaypa laya rimanata rimashpayni mana nimapi yanapaykichi-manchu. Ashwan alli kanman Tata Dios yachachiwashkanta yachachinaynipa. Ashwan alli kanman Tata Diospa ruranayananta paypa rimananta yachachinaynipa. Chaypirami allita yanapaykichiman.

⁷ Suk runa kenata pukuptin guitarra takaptin mana kuska tononpi soynachiption mana yachanchimansapachu ima tonotami soynachiykan nishpa.

⁸ Servisiupi trompetata mana kuska tononta pukuptinka soldadukuna mana tantanakunmansapachu makanakuk rinankunapa.

⁹ Ņukanchikunapish tantanakushpa suk mana yachaypa laya rimanata rimaptinchikuna mana ni pi yachanmansapachu imatami willaykanchisapa nishpa. Chashna mana entiendiawaptinchikuna mana ni piwan parlaykakshina kanchisapa.

¹⁰ Tukuy runakunapa chikan laya chikan laya rimanankuna tiyan. Sukkish sukipish rimanankunata kikinkunalla entiendinsapa. ¹¹ Suk runakuna mana yachananchikuna rimanankunapi parlachiawaptinchikuna manami entiendinchimansapachu. Chay runakunawan mana entiendinakushpanchikuna mana parlayta mana riksinaukuya atipanchimansapachu. ¹² Imashnacha aypa laya rimanakuna tiyan Tata Diospa Espiritun suk layata suk layata atipachiwanchisapa rurayta. Kankuna sukaman munaykankichi Tata Dios rikchak layata atipachishunaykichipa. Chayrayku ashwanta munaychi Tata Diospa Espiritun atipachishunaykichipa kreyikukmasikichita ashwan allita yanapanaykichipa.

¹³ Chayrayku mana yachaypa laya rimanata rimashpanchikuna akuychi Tata Diosta mañaypachi chay rimashkanchikunata entiendichiwanchananchikunapa. ¹⁴ Tata Dioswan parlashpa suk mana yachaypa laya rimanata rimashpa payta kuyaykanchisapa. Chashna Tata Diosta kuyashpanchikunapish chay rimashkanchikunata mana entiendinchisapachu.

¹⁵ Chayrayku akuychi Tata Dioswan parlaypachi entiendinanchikuna layata orashpa mana entiendinanchikuna layatapish orashpa. Akuychi Tata Diosta kuyashpa kantaypachi entiendina layata kantashpa mana entiendina layatapish kantashpa. ¹⁶ Tata Diosta kuyashpa mana entiendinanchikuna layata alabaptinchikunaka Tata Diosta mana riksik runakuna mana entiendiwanchisapachu. Chayrayku mana atipansapachu ñukanchikunawan tantalla Tata Diosta alabayta. ¹⁷ Allimata Tata Diosta agradesishpanchikunapish chay mana entiendik runakunata mana yana-chapachisapachu Jesukristuta ashwan allita kreyishpa kawsanankunapa.

¹⁸ Ñukaka kankunamanta ashwan aya kuti mana yachaypa laya rimakunata rimani. Chayrayku Tata Diosta agradesini. ¹⁹ Chashna kaptipish Jesukristuta kreyikmasinikunawan tantanakushpayni entiendina layallata munayman yachachikuya pichka rimanallata rimashpapish. Mana munaymanchu mana yachaypa layata yachachikuya chunka waranka rimakunata rimashpapish.

²⁰ Wawkinikuna, panikuna, kay yachachishkaynita allita entiendiychi. Ama suk mana yuyaykuk wambrakunashina yuyaychichu. Chaymanta wambrakuna mana yuyansapachu mana allita ruraya. Paykunashina ama yuyaychichu mana allikunata ruraya.

²¹ Tata Dios rimanapi willawanchisapa: “Ñukami llaktaynimana chikan laya rimanayuk runakunata kachasha yachachikunankunapa allita ka-suwanankunapa. Chashna chay runakuna yachachikuptinkunapish llaktaynipi kawsak runakuna mana kasuwanayankasapachu.” ²² Kunanpish Tata Dios atipachiwanchisapa mana yachaypa laya rimanakunata rimayta. Chashna rimaptinchikuna mana Jesukristuta kreyik runakuna yachansapa Tata Diosmanta rimaykananchikunata. Chaymanta Tata Dios atipachiwanchisapa paypa ruranayananta Jesukristuta kreyikmasinchikunata yachachiyta ashwan allita payta kreyinankunapa.

²³ Tantanakushpanchikuna mana yachaypa laya rimanakunata tukuy ñukanchikuna rimaptinchikuna mana Jesukristuta kreyik runakuna yaykushpa rimanmansapa dementu kananchikunata.

²⁴ Chaymanta tukuy ñukanchikuna Tata Dios ruranayananta yachachikuptinchikuna mana Jesukristuta kreyik runakuna yaykushpa uyarishpanchikuna kikinkuna yuyanakunkasapa uchasapa kanankunata. ²⁵ Chashna yuyanakuptinkuna Tata Dioska riksichinkasapa shunkunkunamantapacha uchasapa kanankunata. Chaypina chay runakuna kunkurikushpa Tata Diosta kuyashpa rimankasapa payna deveras ñukanchikunawan tantalla kananta.

Pablu yachachikun Tata Diospa wasinpi tantanakushpanchikuna imash-nami sukpih sukpih rurashunchisapa nishpa.

²⁶ Wawkinikuna, panikuna, Tata Diosta kuyanaykichipa tantanakushpaykichi sukkuna salmokunata kantankichi. Sukkuna Tata Diospa rimananta yachachikunkichi. Sukkuna Tata Dios ruranayananta yachachikunkichi. Sukkuna mana yachaypa laya rimanakunata rimankichi. Sukkuna chay mana yachaypa laya rimanata entiendichikunkichi. Tukuy chaykunata ruraychi tukuy Jesukristuta kreyikmasikichi ashwan ashwanta payta kasushpa kawsanankunapa.

²⁷ Mana yachaypa laya rimanata rimashpaykichi ishkaylla kimsalla sukmanta sukmanta rimanaykichi tiyan. Chaypina Tata Diospa Espiritun yanapaptinkuna sukkuna chay mana yachaypa laya rimanankunata entiendichishunaykichi tiyan. ²⁸ Mana entiendichikuk runa tiyaptinka chay mana yachaypa laya rimanata sapallaykichilla Tata Diosllawan parlashpa rimaychi. Ama chaykunata rimaychichu runakuna uyarinankunapa.

²⁹ Chaymanta ishkaylla kimsalla sukmanta sukmanta Tata Dios ruranayananta yachachikuychi. Chaypina tukuy Jesukristuta kreyikmasikichi chay yachachikushkaykicita allita uyarishpa yuyanankuna tiyan allitachu manachu yachachikuykankichi nishpa.

³⁰ Chaypina suk yachachikuk runa yachachikuykaptin ichara Tata Dios suki tiyaridu uyariykak runata willanman yachachikunapa. Chaypina chay yachachikuykak runa upallayanan tiyan chay suknin yachachikuk runa yachachikunapa. ³¹ Chashna Tata Dios munananta suktapish suktapish willashuptikichi sukmanta sukmanta yachachikuychi. Chashnamanta tukuy Jesukristuta kreyikmasikichi allita yachakunkasapa ashwan allita kushikushpa payta kasushpa kawsanankunapa. ³² Tata Dios munananta willashuptikichi yachachikunaykicipa allita yuyakushpa shuyanaykichi tiyan chay yachachikuykak runa tukuchanankaman. ³³ Tata Dios munan tukuy llaktakunapi Jesukristuta kreyik runakuna allita sukmanta sukmanta yachachikunankunapa. Chayrayku kankunapish kushikushpalla sukmanta sukmanta allita yachachikuychi.

³⁴ Chaymanta tantanakushpaykichi suk yachachikuk yachachikuykaptin mana allichu paninchikuna sukwani parlanakunankunapa. Kusankunapa mandunpi kashpa chay yachachikuykakta upallada uyarinankuna tiyan. Tata Diospa rimananka chayta yachachiwanchisapa. ³⁵ Paninchikuna mana entiendishpankuna wasinpi chayashpankuna kusankunata tapunankuna tiyan. Mana allichu Tata Diospa wasinpi warmikuna ima yuyanankunata parlachikunankunapa.

³⁶ Aypa llaktakunapi Tata Diospa rimananta kasushpa kawsak runakuna tiyan. Manara kankuna Jesukristuta kreyiptikichira chay llaktakunapi kawsakkuna payta allita kreyishpa kawsashkasapa. Tata Dios mana kankunnallatachu rimananta entiendichishushkankichi. ³⁷ Tata Dios suk kankunata atipachishushkankichi ruranayananta yachachikuya. Paypa Espiritun kankunata suk layata suk layata atipachishunkichi rurayta. Chashna kaptinka yachankichi tukuy kay yachachishkayni Señorninchipa kamachikunan kananta. ³⁸ Suk runa yachachikunaynita mana kasunayaptinka ama paytapishe kasuychichu.

³⁹ Wawkinikuna, paninikuna, kankuna Tata Diosta kuyashpa tantanakushpaykichi munaychi Tata Dios ruranayananta yachachikuya. Ama ni pita michaychichu mana yachaypa laya rimanata rimaptin. ⁴⁰ Chashna allita yachachikushpaykichi allita yuyakushpa kuskata yachachikuychi.

15

Pablu yachachikun Jesukristu wañushkanmanta kawsamushkanta.

¹ Wawkinikuna, paninikuna, kunanka munani chay yachachishkaynikunata kashkan allita yuyanaykicipa. Ñuka yachachishkaykichi Jesukristu wañushpa salvawashkanchikunata. Chashna yachachikuptini kankuna chayta allita kreyishpa kawsaykankichi. ² Tukuy kay yachachikushkaynita allita mana shaykushpa kreyiptikichi Tata Dios mana alli rurashkaykicima manta perdonashushkankichi. Mana allita Jesukristuta kreyishpaykichika llullakushpa kreyikuykankichi.

³ Tata Dios yachachiwashkanta kankunata yachachishkaykichi: Jesukristu uchanchikunaryku wañurkan Tata Dios killkadu rimananpi willawashkanchishina. ⁴ Jesukristu wañuptin pampashkankunawasha kimsa diya ukun Tata Dioska kawsachimurkan. Tata Dios chaytapish killkadu rimananpi willawanchisapa. ⁵ Jesukristu wañuymanta kawsamushpa disipulun Pedrapi rikurirkan. Chaymanta chay chunka ishkay disipulunkunapi pipish rikurirkan. ⁶ Chaymanta pichka pachak Jesukristuta kreyikmasinchikunapi rikurirkan. Kunankaman yaka tukuy chay kawak runakuna kawsansapara. Sukkunaka wañushkasapana. ⁷ Chaymanta chay disipulun Jakobopipish rikurirkan. Chaymanta tukuy disipulunkunapi kashkan rikurirkan.

⁸ Chaymanta chay disipulunkunapi rikurishkanwasha Jesukristuka ñukapipish rikurirkan. Chayrayku yuyanakuni iden mana killan paktadupi nasidushina kanaynita. ⁹ Manara Jesukristuta kreyishpayni payta kreyik runakunata chiknishpa wañuchichikuk karkani. Chayrayku yuyanakuni tukuy Jesukristu kachashkan runakunamanta mana nima kanaynita. Yuyanakuni mana alli rurak kanaynita Jesukristu yachachikuk kachamuwananpa.

¹⁰ Chay laya kaptinipish Tata Dios sukaman kuyawashpa mana yankamantachu kachamuwashka paypa rimananta yachachikunaynipa. Tata Dios mana yanapawaptinka mana atipaymanchu karkan yachachikuya. Chashna yanapawaptin tukuy chay yachachikukmasinikunamanta ashwanta yachachikushkani.

¹¹ Mana nimananchu pimi kankunata yachachishushkankichi. Ñukapish paykunapish yachachikuptinikuna ñami kreyishkankichina.

Pablu yachachikun wañushkanchikunamanta kawsamunanchikunata.

¹² Ñukaykuna yachachikushkanisapa Jesukristu kawsamushkanta. Kankuna chay yachachishkaynikunata kreyishpaykichi ñimapati sukkuna rimankichi wañushkanchikunamanta mana kawsamunanchikunata? ¹³ Ñukanchikuna wañushkanchikunamanta mana kawsamuptinchikunaka Jesukristupish wañushkanmanta mana kawsamurkanchu.

¹⁴ Jesukristu mana kawsamushka kaptin ñukaykuna yankapa yachachikuy-mansapa. Kankunapish yachachikunaynikunata yankapa kreyiykankichiman. ¹⁵ Ñukaykuna allita yachachikunisapa Tata Dios Jesukristuta kawsachimushkanta. Mana kawsachimushka kaykaptinka ñukaykuna llullachikuk runakuna kaymansapa karkan. Ñukanchikuna mana kawsamunanchikuna kaptinka Tata Dios Jesukristuta mana kawsachimunmanchu karkan. ¹⁶ Ñukanchikuna wañushkanchikunamanta mana kawsamunanchikunapana kaptinka Jesukristupish mana kawsamunmanchu karkan.

¹⁷ Jesukristu mana kawsamushka kaptinka kankuna yankapa yachachikushkaynita kreyiykankichiman. Kunankaman Tata Dios uchaykichimanta manara perdonashunkichimanrachu karkan. ¹⁸ Chashna kaptinka chay Jesukristuta kreyik wañudukuna mana sielupi Tata Dioswan kawsaykanmansapachu. ¹⁹ Kay allpallapi kawsaptinchikuna Jesukristu yanapawananchikunata yuyashpanchikunaka tukuy runakunamanta ashwan sukmaman llakinchimansapa.

²⁰ Señorninchi Jesukristuka deverasmi wañushkanmanta kawsamushka. Manara ni pi wañushkanmanta kawsamuptinra Jesukristuka ñami kawsamushkana. Chayrayku ñukanchikunapish payshina wañushkanchikunamanta kawsamushunchisapa.

²¹ Chay ñawpa awilunchikuna Adan Tata Diosta mana kasushkanrayku wañurkan. Ñukanchikunapish payshinami wañushunchisapa. Chaymanta Jesukristu wañushkanmanta kawsamushkanrayku ñukanchikunapish payta kreyishpa wañushpa kawsamushunchisapa. ²² Tukuy Adanmanta mi-rakkuna wañunanchikuna tiyan. Tukuy Jesukristuta kreyik runakuna wañushkanchikunamanta kawsamushunchisapa. ²³ Tata Dios munashkan tiempu tukuy ñukanchikuna kawsamushunchisapa. Tukuy runakunamanta Jesukristu primeruka kawsamurkan amana kashkan wañunarpa. Chaymanta kashkan shamuptin ñukanchikunapish wañushkanchikunamanta kawsamushunchisapa.

²⁴ Jesukristu kashkan shamushpa tukuy kamachikuk runakunata, aw-toridar runakunata, tukuy supaykunata kamachikuk kanankunamanta wishchunkasapa. Chashna tukuy paykunata wishchushpa Tatan Diosta willanka payllana kamachikunanpa. ²⁵ Jesukristuka allita kamachikunan tiyan Tata Dios tukuy payta chiknik runakunata saru saru ruranankaman payllata kasunankunapa. ²⁶ Chay washa Jesukristullana kamachikuk Kashpa tukuy wañudu runakunata kawsachimunkasapa.

²⁷ Tata Dios tukuy Jesukristuta chiknik runakunata saru saru ru-rarkansapa. Tata Dios Jesukristuta willaptin tukuy layata kamachinanpa yachanchisapa Jesukristuka mana Tata Diosta kamachinanta.

²⁸ Chashna Tata Dios Jesukristuta kamachikunanpa willashka kaptin payka tukuy layata kamachinka. Tata Diospa wambran kashpa tukuy kamachikunanpa willashkanta Tatana mandunpi churanka. Chaypina Tata Dioslla tukuytana kamachikunka.

²⁹ Chayrayku yachanchisapa tukuy wañudukuna kawsamunankunata. Chaymanta sukkuna Jesukristuta kreyishpankunapish manara bawti-sakushpankunara wañurkansapa. Chaypina suk kuyanakukmasinkuna vesesninpí bawtisakurkansapa. Chay bawtisakuk runakuna mana kreyishpa wañudukuna kawsamunankunata mana chay wañudukunapa vesesnínkunapi bawtisakunmansapachu karkan.

³⁰ Ñukaykuna Tata Diospa rimananta yachachikushkaynikunaryku suk runakuna kuti kuti munansapa wañuchiwaysapata. Mana kawsamunanchikunata kreyishpaynikuna mana muchuymansapachu kuti kuti wañuchiwanayanankunata.

³¹ Wawkinikuna, paninikuna, tukuy diya chay chikniwak runakuna wañuchiwanayaykansapa. Chashna wañuchiwanayaykaptinkunapish sukaman kushikuni yachashpa kankuna allita Jesukristuta kreyishpa kawsaykanay-kichita. ³² Kay Efeso llaktapi iden sakra animalkunashina chikniwak runakuna wañuchiwanayashpankuna sukaman sufričiwarkansapa. Ñuka mana kreyishpa kashkan kawsamunaynita mana muchuymanchu karkan chashna sufričiwankunata. Suk runakunashina rimayman: "Kayakan wañushpa mana kawsamushunchisapanachu. Chayrayku akuychi tukuy layata mikupachi upyaypachi ruraypachi."

³³ Ama llullachinakushpa chaytaka rimaychichu. Chay llullachikuk runakunata kasushpaykichi paykunashina mana allita rurashpa kawsankichiman. ³⁴ Allita yuyaykushpa kawsaychi ama chay runakunashina mana allita rurashpa kawsanaykichipa. Sukkuna mana Tata Diosta kreyishpa kawsaykankichi. Chaykunata willaykichi pinkakunaykichipa.

Pablu yachachikun imashnami wañushkanchikunamanta kawsamushunchisapa.

35 Ichara kankuna tapuwankichiman: ¿Imashnatí wañushkanchikunamanta kawsamushunchisapa? ¿Ima layatí kawsamushpanchikuna kashunchisapa?

36 ¿Manachu yachankichi? Suk chakranchipi murukunata tarpuptinchi muru usun wiñaynin wiñananpa. **37** Chay murukunata tarpuptinchi mallkina tukun. Manana murukunallanachu kiparin. Trigu muruta tarpuptinchi trigu mallkina wiñan. **38** Murukunata tarpuptinchi Tata Dios wiñachin munanana layallata. Imatapish kaptin tarpuptinchi Tata Dios wiñachin chay layallata.

39 Imashnami murukuna chikan laya chikan laya tiyan chashnami runakunapa animalkunapa aychanpish chikan laya chikan layami. Pishkilukunapa challwakunapa aychankunapish chikan laya chikan layami.

40 Tiyan sielipi kawsakkuna. Tiyan allpapi kawsakkuna. Chay sielipi kawsakkuna chikan laya kuerpuuyuk sielipi Tata Diosta allita kushichishpa kawsanankunapa. Ñukanchikuna kay allpapi kawsashpanchikuna chikan laya kuerpuuyuk kanchisapa kay allpapi Tata Diosta kushichishpa allimata kawsananchikunapa.

41 Chaymanta intiwan killa chikan layata chikan layata lusichikunsapa. Aypa laya luserukuna tiyashpa chikan layata chikan layata lusichikunsapa.

42 Ñukanchikunapish wañushkanchikunamanta chikan layata kawsamushunchisapa. Wañuptinchikuna kuerpunchikuna allpana tukunka. Chikan laya kuerpuuyukna kawsamushunchisapa manana kutin wañunanchikunapano.

43 Wañuptinchikuna unkuk usuk kuerpunchikunata pampansapa. Chaymanta Tata Dios kawsachimuaptinchikuna kushikushunchisapa mushuk kuerpuuyuk Kashpanchikuna. Wañuk kuerpunchikunata pampaptinkuna kashkan kawsashpanchikuna manana wañushunchisapanachu.

44 Wañuptinchikuna wañuk usuk kuerpunchikunata pampansapa. Chaymanta chikan laya kuerpuuyukna kawsamushunchisapa sielipi kawsananchikunapa. Kay allpapi kawsashpanchikuna wañuk kuerpuuyuk kanchisapa. Chay sielipi kawsashpanchikuna mana wañuk kuerpuuyukna kashunchisapa.

45 Tata Diospa killkadun riman: “Tata Dios suk ullkuta rurarkan wañuk kuerpuuyuk kananpa.” Ñukanchikunapish Adanmanta mirashpa payshina wañuk kuerpuuyuk kanchisapa. Chaymanta Jesukristu wañushkanmanta kawsamushkanrayku wañushkanchikunamanta kawsachimuwashunchisapa.

46 Kay allpapi kawsashkanchikunawashara rishunchisapa sielipi Tata Dioswan kawsak.

47 Tata Dios awilunchikuna Adanta allpamanta rurarkan kay allpapi kawsanarpa. Chaymanta Señorninchi Jesukristu sielumanta shamurkan nasik runa kananpa. **48** Ñukanchikunapish Adanmanta mirashpa Adanshina kay allpapi kawsaykanchisapa. Chaymanta Jesukristu kawsamushkanshina ñukanchikunapish kawsamushunchisapa paywan tantalla sielipi kawsananchikunapa. **49** Kay allpapi kawsashpa allpamanta ruradu Adanshina wañuk kuerpuuyuk kanchisapa. Chaymanta sielipi kawsashpa Jesukristushina mana tukuyniyuktana kawsashunchisapa.

50 Wawkinikuna, paninikuna, mash uyariwaychi. Allpamanta ruradu kuerpunchikunawan mana atipanchisapachu Tata Diospa kawsanarpa yaykuya. Allpamanta ruradu wañuk yachak kashpanchikuna mana atipanchisapachu mana tukuyniyukta kawsayta.

51 Chaymanta kunanka suk allima manara yachashkaykichita yachachiýichi. Manami tukuychu wañushunchisapa. Jesukristu tukuy payta

kreyikukkunata chikan laya kuerpunchikunata kuwashunchisapa. ⁵² Raslla suk ratu ñawsayapi suk angel trompetata pukuptin Jesukristuka tukuy payta kreyik wañudu runakunata kawsachimunkasapa amana kashkan wañunankunapana. Kay allpapi kawsaptinchikunaká ñukanchikunatapish chikan laya kuerpunchikunata kuwashunchisapa. ⁵³ Kay allpapi kawsashpanchikuna wañuy yachak runakuna kanchisapa. Kay kuerpunchikunawan mana atipanchisapachu riyta sielipi Tata Dioswan kawsak. Chayrayku Jesukristuka chikan laya mana usuk mana wañuk kuerpunchikunata kuwashunchisapa sielipi mana tukuuniyukta kawsananchikunapa.

⁵⁴ Chashna kay usuk wañuk kuerpunchikunata mana tukuuniyuk layatana ruraptin manana kashkan wañushunchisapanachu. Tata Diospa killkadunpi willawanchisapa: "Sielipi Tata Dioswan kawsashpanchikuna manana wañushunchisapanachu." ⁵⁵ Chaypina manana nima unkushunchisapanachu. Manana nima llakishunchisapanachu. Nima wañuya manchashunchisapanachu. Manana nima wañushunchisapanachu.

⁵⁶ Kay allpapi kashpanchikuna Tata Diospa kamachikunankunata mana kasushpa kawsashpanchikuna uchallikunchisapa. Uchanchikunarayku wañunanchikuna tiyan.

⁵⁷ Chashna uchallikunanchikunarayku wañunanchikuna kaptin Señorninchi Jesukristu wañurkan Tata Dios uchanchikunamanta perdonawananchikunapa. Payka wañurkan wañushkanchikunamanta kawsachimuwananchikunapa. Chayta yachashpa sukaman kushikushpa Tata Diosta agradesinchisapa.

⁵⁸ Chayrayku munanayni wawkinikuna, paninikuna, tukuy chaykunata yuyashpa allita Jesukristuta kreyishpa paypa ashwan allita trabajaychi. Yachankichi Jesukristupa allita trabajashpaykichi mana yankapa traba-janaykichita.

16

Pablu roygakun ofrendata kukunankunapa Jesukristuta kreyikmasinkunapa.

¹ Ñuka Galasia partipi yachachishkanisapa Jesukristuta kreyikmasinkunata ofrendata kukushpa yanapanankunapa. Kankunapish paykunata yachachishkaynishina Jesukristuta kreyikmasikicha ofrendata kukushpa yanapaychi. ² Tukuy ganashkaykichimanta tipi kullkikichita ashuchiychi domingo diya tantanakushpaykichi Tata Diosta kunaykichipa. Ñuka rinaynikaman tantachiykaychi chayaptini amana tantanachinaykichipa.

³ Suk wawkinchikunata akllaychi chay tantachishkaykichi ofrendata Jerusalen llaktaman apanankunapa. Chaymanta ñuka chayashpayni kartakunata kllakashpa chay akllashkaykichi wawkinchikunata kachasha.

⁴ Ichará ñukapish Jerusalen llaktaman paykunawan tantalla riyman.

Pablu yuyan Korintoman riyta.

⁵ Kankunaman rishpayni chay Masedonia partimanpish rinayani. Chaymanta chay partimanta Korinto llaktaykichiman risha.

⁶ Llaktaykichipi kankunawan suk tiempata kiparinayani. Ichará tukuy tamya tiempu kankunawan kipariyman. Chaymanta chikan llaktaman riptynka kankuna atipankichiman yanapawayta rinaynipa. ⁷ Tata Dios munaptinka suk tiempata kankunawan kiparisha. Mana munanichu pasakshinalla kawaynikichita.

⁸ Kay Efeso llaktapi kiparisha judiyu runakunapa Pentekostes fies-taynikuna diyakaman. ⁹ Kay llaktapi Tata Diospa rimananta sukaman allita yachachikuykani. Aypa chikniwak runakuna sufrichiwaptinkunapish sukkuna yachachikunaynita uyariykanapa. Chayrayku kankunaman ma-nara risharachu.

¹⁰ Wawkinchi Timoteo kankunapi chayaptin yanapaychi kankunawan kushikunarpa. Paypish ūukashinami sukaman allita Tata Diospa ri-mananta yachachikun. ¹¹ Alli yachachikuk kaptin ama washanchay-chichu. Kushikushpa yanapaychi ūukaman shamunanarpa. ūukami paytaka shuyaykani suk wawkinchikunawan tantalla shamunankunapa.

¹² Wawkinchi Apolosta sukaman roygashkani suk wawkinchikunawan kankunaman rinankunapa. Kunanka mana munanchu riyta. Ichará suk tiempukaman rinka.

Pablu wawkinunata despidinsapa.

¹³ Jesukristuta allita yuyashpa allita kreyishpa mana manchakushpa kawsaychi. Sinchikushpa mana shaykushpa Jesukristuta kreyichi.

¹⁴ Tukuy ruranaykichita allita kuyanakushpa ruraychi.

¹⁵ Wawkinikuna, paninikuna, kankuna yachankichi kay Akaya partipi manara ni pi Jesukristuta kreyiptinkunara wawkinchi Estefanas tukuy familyankunawan kreyikurkansapa. Paykunaka kreyikukmasinchikunata sukaman yanapashpa kawsansapa. ¹⁶ Estefanas sukaman trabajashpa yanapakushkankunashina aypa wawkinchikuna paninchikuna tiyan. Munani kankunapish paykunata kasushpa yanapanakushpa kawsanaykichipa.

¹⁷ Sukaman kushikushkani wawkinchi Estefanas wawkinchi Fortuna-ton wawkinchi Akaykowan yanapawak shamuptin. Kankuna mana atipaptikichi shamuya chay wawkinchikuna allita yanapawaykansapa. ¹⁸ Kay kimsa wawkinchikuna kankunatashina ūukatapish yanapawashpa kushichiwashkasapa. Chay laya wawkinchikunata kuyaypachi.

¹⁹ Kay Asia partipi Jesukristuta kreyikmasinchikuna rimachishunkichi. Wawkinchi Akilas warmin Prisilawan rimachishunkichi. Tukuy paykunapa wasinpi tantanakuk Jesukristuta kreyikkuna rimachishunkichi. ²⁰ Tukuy kay wawkinchikuna rimachishunkichi. Kankunapish tantanakushpa kuyanakushpa sukwana rimachinakuychi.

²¹ ūuka Pablu kay kartata killkachishkayniwasha kikini makiniwan killkashpayni rimachiykichi. ²² Señorninchí Jesukristu ūami shamunkana. Chashna shamushpa tukuy mana payta kuyak runakunata mana tukuyniyuk ninapi kastigankasapa. ²³ Sukaman munani Señorninchí Jesukristu kankunata allita yanapashunaykichipa. ²⁴ Kankuna Jesukristuta kreyikmasinikuna kaptikichi sukaman kuyaykichi.

ūuka Pablu chayllata killkashkaykichi.

2 KORINTIOS

PABLУ ISHKAYNIN KUTI KORINTO LLAKTAPI KREYIKUKMASINKUNATA KILLKARKAN

Pablу rimachirkansapa Korinto llaktapi Jesukristuta kreyik runakunata.

¹ Munanayni wawkinikuna, paninikuna, ñuka Pablу wawkinchi Timoteowan tantalla kay kartata killkaykaykichi. Korinto llaktapi Akaya partipi Jesukristuta kreyishpa kawsakmasinkunata killkaykaykichi. Tata Diós munaptin Jesukristu ñukata kachamuwashka paypa rimananta yachachikunaynipa. ² Sukaman munani Tata Diósñinchí Señorninchí Jesukristuwani rikchak layapi yanapashunaykichipa kushichishunaykichipa.

Pablу sukaman sufrishkanta parlachikun.

³ Akuychi Señorninchí Jesukristupa Tatan Diosta kuyashpa alabaypachi. Tata Diósñinchikuna kashpa allimata kuyawashpanchikuna kushichiwan-chisapa.

⁴ Rikchak layapi sufriptinchikuna Tata Diós mi kushichiwan-chisapa. Tata Diós kushichiwananchikunashina ñukanchikunapish sufrik runakunata atipanchisapa yanapashpa kushichiyyta. ⁵ Jesukristu sukaman sufrishka kaptin ñukanchikunapish payta katishpa sukaman sufrishunchisapa. Chashna sufriptinchikuna payka sukaman yanapawashpanchikuna kushichiwan-chisapa.

⁶ Chayrayku ñukaykuna sufrishpaynikuna atipanisapa kankunata kushichiýníkitchita yachanaykichipa Jesukristu salvashukníkichi kananta. Tata Diós ñukaykunata kushichiwaptinkuna atipanisapa kankunata kushichiýníkitchita. Chashna kushichiaptinkuna kankunapish ñukaykunashina rikchak layata sufrishpaykichi atipankichi mana shaykushpa Jesukristuta katiyta. ⁷ Allita yachanisapa kankuna ñukaykunashina sufriptikichi Tata Diós ñukaykunatashina sukaman kushichishunaykichita.

⁸ Wawkinikuna, paninikuna, kunanka yuyachiykichi Asia partipi kashpaynikuna sufrishkaynikunata. Rikchak layata sukaman sufrishpaynikuna manana atiparkanisapanachu ashwanta muchuyta. Yuyarkanisapa wañuymanta mana kishpinaynikunata. ⁹ Yuyarkanisapa wañunaynikuna ora chayamushkantana. Sukaman sufriptinikuna wañudukunata kawsachimuk Tata Diosta yachachiwarkansapa payllata kreyishpa kawsanaynikunapa. Yachachiwarkansapa mana kikinikuna kreyinakushpa kawsanaynikunapa. ¹⁰ Wañunaynikunata yuyaptinikunapish Tata Diós wañuymanta kishpicchichiwashkasapa. Chaymanta yachanisapa kankuna Tata Diosta roygaptikichi kuti kuti kishpicchichiwanankunata. ¹¹ Kankuna ñukaykunapa roygaptikichi Tata Diós yanapawankasapa. Chashna yanapawaptinkuna ñukaykunawan tantalla sukaman Tata Diosta agradesinkichi.

Pablу Korintopi wawkinkunata willansapa imapami manara pasyak rin nishpa.

¹² Shunkuynikunamantapacha sukaman kushikushpa atipanisapa rimayta mana llullakushpa tukuy maypi allita rurashpa kawsashkaynikunata. Kankunawan kawsashkaynikuna pacha kawawashkankichí allita

rurashpa allita rimashpa kawsaptinikuna. Tata Dios kuyawashpangkuna sukaman yanapawashkasapa allita rurashpa kawsanaynikunapa. Mana kikinikunamantaka yachaymansapachu karkan allita rurashpa kawsayta.

¹³ Tukuy kartaynikunapi kuskallata entiendinapa layata killkashkaykichi. Mana munanisapachu llullachiynikichita ishkay laya yuyayta killkashpa. Munanisapa allita entiendinaykichipa. ¹⁴ Killkashkaynita leyishpaykichi tipitana entiendiykankichi. Munanisapa ashwan ashwanta entiendinaykichipa Señorninchchi Jesukristu shamuptin yachachikushkaynikunata yuyashpa kushikunaykichipa. Ñukaykunapish sukaman kushikushasapa kankuna ashwan ashwanta entiendishkaykichirayku.

¹⁵ Yachashkani kawanakushpa kushichinakunanchikunata. Chayrayku munarkani kankunaman riyta pasyaknikichi ishkaynin kuti kushikunanchikunapa. ¹⁶ Yuyarkani Masedonia partiman rishpayni pasyaynikichita chaymanta kutimushpayni kashkan pasyaynikichita. Chaymanta yu-yarkani yanapawanaykichipa Judea partiman riptyni. ¹⁷ Chashna pasyaknikichi riyta yuyashpayni ¿yuyashkankichichu mana deverasta yuyashkaynita riyta? ¿Yuyankichichu ishkay yuyayuk kashpa mana rinaynita?

¹⁸ Tata Dios mana llullakuya yachak kashpa yachan ñukaykuna mana ishkay yuyayuk kanaynikunata. ¹⁹ Tata Diospa wambran Jesukristu mana ishkay yuyayuk kashpa tukuy rimashkanta ruran. Ñukaka Timoteowan Silvanowan yachachishkaykichi Jesukristu tukuy rimashkanta deverasta rurananta. ²⁰ Tata Dios appa kuti willawashkanchisapa tukuy layapi yanapawananchikunapa. Jesukristuka tukuy Tata Dios willawashkanchikunashina yanapawanchisapa. Chashna yanapawaptinchikuna Tata Diosta sukaman alabanchisapa.

²¹ Tata Diосmi ñukaykunata kankunatapish yanapawashkanchisapa Jesukristuta allita kreyishpa mana shaykushpa kawsananchikunapa. Akllawashkanchisapa payta sirvinanchikunapa. ²² Tata Dios Espiritu kuwashpanchikuna selluchawashkanchisapa payllapa kananchikunapa. Ñukanchikunapi Espiritun kawsaptin yachanchisapa Tata Dios deveras tukuy willawashkanchikunata rurananta.

²³ Manara Korinto llaktaykichiman rishkanirachu ama kankunawan sukaman rabyakunaynipa. Tata Dios yachan mana llullakushpa rimeykanaynita. ²⁴ Mana munanichu kamachikuknikichishina riyta. Kankunaka ñami allitana Jesukristuta kreyiykankichi. Ñuka pasyaknikichi rishpayni sukaman yanapanayaykichi ashwan kushikuyppuru kawsanaykichipa.

2

¹ Chayrayku yuyarkani manara kankunaman riyta ama kankunata piñayashpayni llakita kunaynipa. ² Mana allichu kanman kankunata llakita kunaynipa. Llakidu kaptikichika ¿pití ñukata kushichiwanman? Kankunalla kushichiwanaykichi tiyan. ³ Chayrayku suk kartata piñakushpayni killkarkaykichi allita rurashpa kushichiwanaykichipa. Chayrayku manara kankunaman rinayashkanirachu ama llakita kuwanaykichipa. Allita yacharkani kushikuyppuru kaptini kankunapish kushikuyppuru kanaykichi. ⁴ Chay kartaymita killkashpayni sukaman llakishpa wakashpa kilkashkaykichi yachanaykichipa tukuy kankunata sukaman kuyanaynita. Mana munarkanichu llakita kuynikichita.

Pablu riman chay uchallikuk runata perdonashkantana.

⁵ Chay uchallikuk runa sukaman llakita kushurkankichi. Ñukatapish llakita kuwarkan. Mana mirachishpachu rimaykani. Manami kankunatashinachu ñukata llakita kuwashka. ⁶ Ñami yaka tukuyna chay uchallikuk runata willashkankichina ama kankunawan tantanakunarpa. Chashna willashpaykichika ñami aypatana kastigashkankichi. ⁷ Kunanka perdonanaykichi tiyan. Chaymanta kushichiychi ama sukaman llakishpa kawsanarpa. ⁸ Chayrayku roygaykichi chay wawkikichita yanapanaykicipa kuyanaykichita yachanarpa.

⁹ Chay kartaynita killkarkaykichi yachanaynipa kasuwankichichu manachu nishpa. Chay kartaynita ñami kasushkankichina. Kunanka kay killkanaynitapish kasushpa chay runata perdonaychi. ¹⁰ Kankuna pitapish kaptin perdonaptikichika ñukapish perdonasha. Ima laya uchapish tiyapuptin kankuna perdonaptikichika ñukapish Jesukristupa ñawpkninpi kankunata kuyashpa perdonasha. ¹¹ Chashna ñukanchikuna chay runata perdonaptinchikuna Satanas mana atipanchu llullachiwayninchikunata. Yachanchisapa mana kuyanakushpa kawsaptinchikuna supay kunanlla llullachikunata.

Pablu willansapa Troas llaktapi kashpa llakidu kashkanta.

¹² Kunanka parlachiykichi purishkaynita. Troas llaktaman rirkani yachachikunaynipa Jesukristu salvawakninchikuna kananta. Chay llaktapi kashpayni Tata Dios sukaman yanapawarkan aypa runakunata yachachikunaynipa. ¹³ Chashna aypa runakunata yachachishpaynipish mana gustuchu karkani mana chay llaktapi wawkinchikuna Titota tarishpayni. Chayrayku chay runakunata sakishpa Masedonia partiman kutirkani payta maskak.

Jesukristuyanapawanchisapa allita rurashpa kawsananchikunapa.

¹⁴ Akuychi Tata Diosta sukaman agradesiyipachi yanapawaptinchikuna Jesukristullata allita kreyishpa kawsananchikunapa. Suk alli desfilepishina Jesukristu ñawpaciwanchisapa payta katinanchikunapa. Tukuy runakuna kawawanchisapa supayta mana kasunanchikunata. Chaymanta tukuy llaktakunapi yachachikuptinchikuna chay yachachikunanchikunaka suk allima mishkilla asnakshinami. ¹⁵ Jesukristu ñukanchikunapi kawsashpa yanapawanchisapa Tata Diosta kushichishpa paypa allima mishkilla asnakshina kananchikunapa. Allima mishkilla asnakshina kanchisapa uchankunamanta perdonadu runakunapa uchankunamanta mana perdonadu runakunapapish.

¹⁶ Millanapa laya asnakshina kanchisapa Jesukristuta mana kreyinayak runakunapa wañuyman riptinkuna. Chaymanta allima mishkilla asnakshina kanchisapa Jesukristuta kreyik runakunapa sielupi kawsak riykaptinkuna. Mana Tata Dios yanapawaptinchikuna mana atipanchisapachu allima mishkik asnakshina kayta. ¹⁷ Ñukaykuna allima mishkik asnakshina kashpaynikuna mana chikan runakunashina kullkillata munashpa yachachikunisapachu. Tata Dios kachamuwaptinkuna Jesukristuwan tantalla kawsashpaynikuna mana llullachikushpa Tata Diospa ri-mananta yachachikunisapa.

3

Tata Diospa Espiritun shunkunchikunapi suk kartata killkakshina.

¹ Tukuy kaykunata killkaptinikuna mana kikinikunallachu alabanakuykanisapa. Kankuna allita riksiwapistikchi kankunaman rishpaynikuna mana nima kartata apanisapachu mana riksidi

runakunashina. Nima kankunamanta kartata mañaykichichu chikan llaktaman rinaynikunapa. ² Ñukaykuna kankunawan kashpaynikuna allita yachachishpaynikuna shunkuykichipi iden kartatashina killkashkanisapa. Chaymanta kankuna Jesukristuta kreyishpa allita rurashpa kawsaptikichi tukuy runakuna yachankasapa allita yachachikushkaynikunata. ³ Jesukristu yanapawashkasapa shunkuykichipi paypa kartantashina killkanaynikunapa. Tukuy runakuna kawashushpaykichi yachansapa Jesukristupa kartanshina kanaykichita. Payka mana tintawanchu killkarkan. Mana tukuyniyuk kawsak Tata Diospa Espiritun shunkuykichipi killkakukshina allita yachachishunkichi. Mana Moisesshinachu rumipi killkakun.

⁴ Jesukristu yanapawaptinkuna allita yachachikuykanisapa. Allita yachanisapa Tata Dios willawanankunata allita yachachikunaynikunata. ⁵ Ñukaykunaka kikinikunallamanta mana atipanisapachu allita yachachiynikchita. Tata Diosllami atipachiwansapa allita yachachikunaynikunapa. ⁶ Tata Dios atipachiwansapa paypa mushuk paktunta yachachinaynipasapa. Tata Diospa Espiritun shunkunchikunapi kawsashpa mushuk paktuta ruran. Mana chay ñawpa killkadu kamachikuskantashinachu ruran. Tata Diospa Espiritun kawsachiwanchisapa. Chay ñawpa killkadu kamachikunankunaka yachachiwanchisapa wañunanchikunata.

Tata Diospa mushuk yachachikunan sukaman allimami.

⁷ Moises Tata Diosmanta rumikunapi killkadu kamachikunankunata chaskiptin uyan sukaman llipyarkan. Chashna uyan llipyak likidu kaptin israel runakuna mana atiparkansapachu payta kawayta. Chaymanta tipimanta tipimanta Moisespua uyanka manana llipyarkannachu. Chay Moisespua kamachikunankuna wañunanchikunapa willawaptinchikunapish sukaman allima karkan. ⁸ Chay Moisespua kamachikunankuna allima kaptinpish Tata Diospa Espiritunpa mushuk yachachiwananchikunaka sukaman ashwan allimami.

⁹ Chay ñawpa kamachikunankuna allima kashpapish willawanchisapa Tata Dios kastigawananchikunata. Chaykamanka Tata Dios willawanchisapa Jesukristu wañushkanrayku uchanchikunamanta perdonawananchikunata. Chay willawananchikunaka ashwan allimami. ¹⁰ Chay ñawpa kamachikunankuna allima kaptinpish Tata Diospa mushuk yachachikunanka sukaman ashwan allimami. ¹¹ Chay ñawpa kamachikunankuna suk tiempullapa kashpapish allima karkan. Chaymanta Tata Diospa mushuk yachachikunanka mana tukuyniyuk kashpa sukaman ashwan allimami.

¹² Tukuy kayta yachashpaynikuna mana nimata pakashpaynikuna allita yachachikunisapa. ¹³ Mana Moisesshinachu yachachikunisapa. Moiseska uyanta llachapawan arkarkan ama israel runamasinkuna kawanankunapa uyan llipyaynin chinkaptin. ¹⁴ Chay ñawpa tiempu Moises yachachikuptinkunapish israel runakuna mana entiendirkansapachu yuyayninkuna arkadushina kaptinkuna. Kunankamanllara judiyumasinkuna chay ñawpa killkadu yachachikuskanta leyishpankuna manara entiendinsaparachu yuyayninkuna arkadushinara kaptinkuna. Jesukristu entiendichiptinkunara atipankasapa entiendiyyta.

¹⁵ Kunankaman chay ñawpa Moisespua killkadu yachachikuskanta leyishpankuna mana nima entiendinsapachu yuyayninkuna iden llachapawan arkadushina kaptin.

¹⁶ Chaymanta Señorninchi Jesukristuta kreyishpa kawsaptinchikuna yuyayninchikuna manana arkadushinanachu. Chaypina atipanchisapa Tata Diospa yachachikunanta allita entiendiyyta. ¹⁷ Jesukristuka Tata Diospa

Espiritunwan idenlata atipan yanapawayninchikunata allita rurashpa kawsayta. Chashna Espiritun yanapawaptinchikuna atipanchisapa mana uchallikushpa Tata Diosta kasushpa kawsayta.

¹⁸ Tata Diospa Espiritun yanapawaptinchikuna atipanchisapa paypa munananta allita entiendiyta. Yuyayninchikuna manana arkadushinanachu. Chashna entiendishpanchikuna espejushina tukuy runakunata kawachinchisapa Tata Dios sukaman allima kananta. Tukuy diya Jesukristu Espiritunwan yanapawaptinchikuna Tata Diospa munananta ashwan ashwanta atipanchisapa ruraya. Ashwan ashwanta Jesukristu kawsashkanshina ūukanchikunapish kawsashunchisapa.

4

Pablu riman yachachikunan lusshina kananta.

¹ Tata Dios ūukaykunata kuyawashpangkuna akllawarkansapa paypa rimananta yachachikunaynikunapa. Chayrayku mana shaykushpa yachachikunisapa. ² Mana munanisapachu nima pinkakunapa layakunata pakalla ruraya. Kuskallata mana llullachikushpa yachachikunisapa. Tata Diospa rimananllata allita yachachikunisapa. Chashna allita yachachikuptinikuna tukuy riksiwak runakuna yachansapa Tata Diospa ūawpakninpí yachachikunaynikuna sukaman allima kananta.

³ Suk runakuna mana kreyinayunasapachu Jesukristu uchanchikunamanta salvawananchikunata. Wañuyman riyakashpangkuna yachachikunaynikunata mana entiendinsapachu. ⁴ Paykuna mana kreyinayaptinkuna kamachikuknín supay yuyayninkunapi llullachinsapa mana kawakukshina kanankunapa. Chayrayku mana atipansapachu entiendiyta Jesukristu kawachiwananchikunata ima layami Tata Dioska nishpa. ⁵ Allita yachachikunisapa Jesukristu tukuy layapi sukaman sinchi kamachikuk kananta. Mana yachachikunisapachu tukuy runakuna yuyanankunapa ūukaykuna tukuy laya yachak kānaynikunata. Willaykichi Jesukristuta kuyashpaynikuna kankunapa yanapaknichilla kanaynikunata.

⁶ Kallarinan tiempu Tata Dioska rimashpalla tuta likidumanta lusta rikurichimurkan. Kunan tiempupish Tata Dios shunkunchikunapi lusninta rikurichimun payta riksinanchikunapa. Tata Dios wambran Jesukristuta kachamurkan lusninta kawachiwashpanchikuna entiendichiwananchikunapa pay sukaman allima kananta.

Jesukristullata kreyishpa kawsaypachi.

⁷ Jesukristu entiendichiwashpanchikuna Tata Dios allima kananta lusninta kuwanchisapa. Ūukanchikuna metomanta ruradu pakikuk kallanakunashinalla kashpanchikuna chay lusta kawachikunchisapa. Jesukristu ūukanchikunapi kawsaptin tukuy runakuna yachankasapa Tata Dios sukaman allimata yanapawaptinchikunara atipananchikunata allikunata ruraya. Yachankasapa mana kikinchikunallamanta nima allikunata atipananchikunata ruraya.

⁸ Tata Dios tukuy layapi ūukaykunata yanapawansapa. Chayrayku runakuna sukaman amichiwashpangkunapish mana atipansapachu Tata Diospa munananta ruranaynikunamanta michawaysapata. Sukaman sufrishpaynikunapish mana sukamanchu turbakunisapa. ⁹ Runakuna sukaman sufrichiwaptinkunapish Tata Dios mana sakiwansapachu. Runakuna waktakuwaptinkunapish mana atipansapachu wañuchiwaysapata. ¹⁰ Kuti kuti Jesukristushina yakallapa wañunisapa tukuy runakuna yachanankunapa Jesukristu ūukaykunapi kawsashpa sukaman yanapawanankunata.

11 Jesukristuta kreyishpa kawsaptinikuna imay orapish kaptin wañuymansapa tukuy runakuna yachanankunapa Jesukristu tukuy layapi yanapawanankunata. **12** Ñukaykuna yachachikuptinikuna sukaman wañuchiwanayansapa. Chaykamanka kankuna yachachikunaynikunata kreyishpaykichi rinkichi sielman Tata Dioswan kawsak.

13 Tata Diospa killkadu rimanandi willawanchisapa: “Ñuka Tata Diosta kreyishpa kawsashpayni tukuy pita parlachini payta kreyishpa kawsaykanaynita.” Ñukanchikunapish Jesukristuta kreyishpa kawsashpanchikuna tukuy pita parlachinchisapa payta kreyishpa kawsaykananchikunata. **14** Tata Dios Jesukristuta wañu shkanmanta kawsachimushkanrayku yachanchisapa ñukanchikunatapish kawsachimuwananchikunata. Chaymanta kankunawan paktata pushawashunchisapa paywan tantalla kawsananchikunata. **15** Ñukaykunaka rikchak layata sufrishkanisapa kankuna Jesukristuta kreyishpa kawsanaykicipa. Chaypina Tata Dios sukaman yanapashuptikichi ashwan appa runakuna payta kreyishpa kawsankasapa. Chaypina ashwan appa runakuna Tata Diosta kushichishpa agradesinkasapa.

16 Tata Diosta sukaman agradesishpanchikuna mana shaykushpa paylata kreyishpa kawsashunchisapa. Kuerpunchikuna viejuyaptinkunapish diyan diyan tukuy shunku ashwan ashwanta Jesukristuta kreyishpa kawsanchisapa. **17** Suk tiempullapa kay allpapi kawsashpanchikunara sufrischikunapish mana niemananchu. Sufrishkanchikunawasha Jesukristu sielman pushawashunchisapa chaypi kushikuypuru mana tukuyniyukta kawsananchikunata.

18 Chayrayku sufrishpanchikunapish amana sukaman llakiypachinachu. Sieluta manara kawayta atipashpanchikunapish chayta yuyashpalla kawsaypachi. Tukuy kay allpapi tiyak tukunan tiyan. Chay mana kawayta atipananchikuna mana kutin tukunkachu.

5

Pablu yachachiwanchi ima layami chay sielipi kawsananchikuna nishpa.

1 Yachanchisapa runakunapa ruradu wasinkuna wakllishpa urmananta. Ñukanchikunapish wañuptinchikuna kay kuerpunchikuna wasishina allpana tukunan tiyan. Yachanchisapa wañushkanchikunawasha Tata Dios kashkan kawsachimuwananchikunata. Chikan laya mushuk kuerpuyukna kashunchisapa sielipi mana tukuyniyukta kawsananchikunata. Chay mushuk kuerpunchikuna manami kay allpapi runakuna rurashkan wasikunashinanachu kanka. **2** Kay allpapi wañunanchikuna diyakaman sufrishpa kawsanchisapa. Sufrishpa aminakushpanchikuna sukaman rinayanchisapa chikan laya mushuk kuerpunchiwan sielipi kawsak.

3 Sielipi kawsashpanchikuna llachapawan arkanakukshina chikan laya mushuk kuerpuyukna kashunchisapa ama llatanllashina kananchikunata. **4** Kay allpapi kawsashpanchikunara sukaman padeshishpa kay unkundero kuerpunchikunawan aminakunchisapa. Manami kay kuerpunchikunataka sakinayanchisapachu. Chashna mana kuerpunchikunata sakinayashpanchikunapish munanchisapa sielipi mushuk kuerpunchikunawan kawsayta amana kutin wañunanchikunata.

5 Kikin Tata Dios rurawashkanchisapa mushuk kuerpunchikunawan sielipi kawsananchikunata. Chaymanta ñukanchikunaman Espiritunta kachamurkan allita yachananchikunata mushuk kuerpuyuk kananchikunata.

⁶ Tata Diospa Espiritun ūukanchikunapi kawsaptin yachanchisapa suk mushuk kuerpunchikunata chaskinanchikunata. Kay allpapi kawsashpanchikunara manara atipanchisaparachu sielipi Jesukristuwān tantalla kawsayta. ⁷ Jesukristuwān manara uyapura kawanakushpanchikunapi allita yachanchisapa sieluman rishpanchikuna paywan kawanakunanchikunata. ⁸ Chayta allita yachashpanchikuna sukaman munanchisapa wañushpa sieluman riyta Jesukristuwān tantalla kawsakna.

⁹ Chayrayku kay allpapi kawsashpanchikunara Jesukristupa munananllata allita rurashpalla kawsaypachi. Chaymanta wañushkanchikunawasha sielupipish paypa munananllata rurashpalla kawsashunchisapa.

¹⁰ Suk diya Jesukristu tukuy runakunata ūawpakinman kayawashunchisapa. Chaypina willawashunchisapa ima layatami kay allpapi kawsashkanchisapa nishpa. Allita rurashpa kawsaptinchikunaka sielipi kawsachiwashunchisapa. Mana allita rurashpa kawsaptinchikunaka kastigawashunchisapa.

Pablu yachachikun Tata Dioswan kuyanakushpa kawsananchikunapa.

¹¹ Ņukaykunaka allita yachanisapa Tata Dios tukuy mana alli rurak runakunata kastiganankunata. Chayta allita yachashpaynikuna tukuy runakunata sukaman willanisapa Jesukristuta kreyishpa kawsanankunapa. Tata Dios tukuy yuyaynínikunata riksishpa yachan ūukaykuna allita yachachikunaynínikunata. Sukaman munanisapa kankunapish chayta yachanaykichipa. ¹² Manami kashkanchu alabanakuykanisapa. Kayta parlachishkaykichi kushikuyperu kanaykichipa yachashpa ūukaykuna allita yachachikunaynínikunata.

Chayta yachashpaykichi chay chatawak runakunata atipankichi kuskanpi ayniyta. Chay chatawak runakunaka yuyansapa kikiñkunalla allita yachachikunankunata. Mana yuyansapachu ūukaykuna allita tukuy shunku Jesukristuta kreyishpa yachachikunaynínikunata. ¹³ Chay runakuna demento kanaynínikunata rimaptinkunapish allita yachachikunisapa Tata Diosllata kushichinaynínikunapa. Chaymanta yachankichi kankunapa allinikichipa trabajanaynínikunata.

¹⁴ Ņukanchikuna allita yachanchisapa Jesukristu sukaman kuyawananchikunata. Chayta yachashpanchikuna tukuy tiempu payllata kasushpa kawsashunchisapa. Yachanchisapa Jesukristu kuyawashpanchikuna ūukanchikunaryku wañushkanta. Chayrayku manana uchallikushpanchikuna kawsaykanchisapa. ¹⁵ Jesukristuka ūukanchikunaryku wañurkan payllatana kasushpa kawsananchikunapa. Wañushkanmanta kawsamurkan payllapa munananta rurashpa kawsananchikunapa amana kikinchikunallapa munananchikunata rurashpa kawsananchikunapa.

¹⁶ Ņukanchikuna manana runakunapa yuyaykunankunashinanachu rimanchisapa Jesukristuta kreyik runakuna mana alli rurak kanankunata. Manara Jesukristuta kreyishpa kawsashpanchikunara yuyarkanchisapa paypish mana alli kananta. Kunanka mananami chashnanachu yuyaykunachisapa. ¹⁷ Kunanka Jesukristuwān tantalla kawsashpanchikuna mushuk layata yuyaykushpana kawsanchisapa. Tata Dios mushuk runakunatana rurawashkanchisapa. Chay ūawpa mana alli rurashkanchikunata sakishpanchikuna mushuk alli ruranakunata rurashpana kawsanchisapa.

¹⁸ Tata Dios atipachiwanchisapa chay mushuk ruranakunata rurashpa kawsananchikunapa. Jesukristu wañushkanrayku Tata Dios perdonawashkanchisapa payta chiknishkanchikunamanta kuyashpa kawsananchikunapa. Kunanka Tata Dios kamachiwanchisapa tukuy runakunata yachachinanchikunapa imashnami paykunapish paywan

kuyanakushpa kawsankasapa nishpa. ¹⁹ Tata Dios allita entien-dichiwanchisapa Jesukristu wañushkanrayku perdonawananchikunata paywan tantalla kuyanakushpa kawsananchikunapa. Chashna Tata Dios perdonawashpanchikuna uchanchikunata manana yuyannachu. Chaymanta kamachiwanchisapa tukuy runakunata yachachinanchikunapa imashnami paykunapish Tata Dioswan kuyanakushpa kawsankasapa nishpa.

²⁰ Jesukristu ñukaykunata kachamuwaptinkuna Tata Dios kikin yachachishunaykichitashina yachachiykichi. Chayrayku Jesukristu willawashkankunata ñukapish willaykichi: Amana Tata Diosta chiknishpaykichi paywan kuyanakushpa kawsaychi. ²¹ Jesukristu mana nimapi uchallikuptinpish uchanchikunaryku Tata Dios ucha rurak runatashina payta kastigarkan. Tata Dios Jesukristuta kastigashkanrayku ñukanchikunata manana kastigawashunchisapanachu.

6

Jesukristupa parlachikushpanchikuna sufrishpanchikunapish kushikush-palla kawsashunchisapa.

¹ Kunanka ñukaykuna Tata Dioswan tantalla trabajashpaynikuna sukaman roygaykichi: Tata Dios kuyashunaykichita ama washanchaychichu. ² Tata Dios killkadunpi rimarkan:

“Yanapanayni tiempu uyarishkayki. Salvanayni diya yanapashkayki.” Chashna Tata Dios rimaptin willaykichi: Kunanka Tata Dios yanapawananchikuna tiempumi. Kunanka salvawananchikuna diyami.

³ Ñukaykuna allita yachachikushpaynikuna allita rurashpa kawsanis-apa ama ni pi yachachikunaynikunata washanchanankunapa. ⁴ Allita rurashpa kawsanisapa tukuy runakuna yachanankunata Tata Diospa tra-bajanaynikunata. Chashna Tata Diospa trabajashpaynikuna kushikush-palla sufrinisapa. Rikchak layakuna illawaptinkunapish llakishpayniku-napish mana nimata amishpaynikunalla Tata Diosllapa trabajaykanis-apa. ⁵ Aypa kuti runakuna makawarkansapa karselpi churawarkansapa piñyawashpankuna kaparichiwarkansapa. Rikchak layapi sukaman tra-bajkanisapa. Aypa kuti mana allitachu puñuk kanisapa. Aypa kuti mana nimata mikukchu kanisapa.

⁶ Chashna sufrishpaynikunapish allita rurashpa kawsaykanisapa. Tata Diospa rimananta allita yachachikunisapa. Mana piñakushpa tukuy runakunata yanapashpa kawsaykanisapa. Tata Diospa Espiritu yanapawaptinkuna mana llullachikushpa aypa runakunata kuyashpa kawsaykanisapa.

⁷ Tata Diospa rimananta mana llullachikushpa yachachikunisapa. Tukuy trabajuynikunapi Tata Dios sukaman yanapawansapa. Tata Dios suka-man yanapawaptinkuna atipanisapa chikniwak runakunata yachachiysapa-ta. Allita rurashpa kawsaptinikuna runakuna llullachiwanayashpankuna manami atipansapachu pantachichiwaysapata.

⁸ Suk runakuna kuyawansapa. Sukkuna yuyawansapa. Suk runakuna rimansapa alli rurak kanaynikunata. Sukkuna rimansapa mana alli rurak kanaynikunata. Ñukaykuna sukaman allimata yachachikuptinikunapish sukkuna rimansapa llullakushpa yachachikunaynikunata. ⁹ Sukkuna allita riksiwashpankunapish mana riksiwakshina tukunsapa. Wañuk runakuna kashpaynikunapish kawsaykanisapalla. Sukman makawashpankunapish mana wañuchiwashkasapachu.

10 Llakidu kashpaynikunapish kushikuypurullami kawsaykanisapa. Mana nimayuk kashpaynikunapish sukkunata yanapashkanisapa Jesukristuta kreyishpa rikchak layayukshina kanankunapa. Mana nimayuk kashpaynikunapish Jesukristupa tukuy tiyapunan ūukaykunapa.

11 Korinto llaktapi kawsak wawkinikuna paninikuna, tukuy shunku kuyaykisapa. Chayrayku mana nimata pakashpa kay kartata killashpa allimata yachachishkaykichi. **12** Mana nimata pakashpaynikuna kuyaykaykichi. Ichará kankuna yuyawashpaykichi mana kuyawankichinachu. **13** Chayrayku ūuka tataykichishina roygaykichi kuyawanaykichipa. Imashnacha ūuka mana nimata pakashpa yachachishkaykichi chashnashina kankunapish tukuy yuyanaykichita willawaychi.

Ama paktuta ruraypachichu mana Jesukristuta kreyik runakunawan.

14 Ama nimapi Jesukristuta mana kreyik runakunawan paktuta ruraychichu. Alli rurak runa mana alli rurak runamanta chikan'laya yuyayuk. Lus tiyaptin manana tuta tiyannachu. Lus tutawan mana atipanchu chakrunakuya. **15** Jesukristu mana atipanchu supaywan allillapi chay yuyaylla kawsayta. Chashnashina Jesukristuta kreyik runakuna mana atipansapachu mana Jesukristuta kreyik runakunawan allillapi chay yuyaylla kawsayta.

16 Ņukanchikunaka kawsak Tata Diospa wasinshinami kanchisapa. Paypa wasinshina kashpanchikuna mana nima layapi atipanchisapachu ruradu dioskunata kuyayta. Kikin Tata Dios killkadunpi rimarkan:

“Ñuka paykunapi kawsashpa paykunawan tantalla purisha.

Ñukaka Tata Diosninkuna kasha.

Paykunaka ūukapa wambraynikuna kankasapa.”

17 Chaymanta Tata Dios killkadunpi rimarkan:

“Chay uchallikuk runakunamanta llukshiychi.

Chay mana alli ruranankunata ama ruraychichu.

Chaypina ūukaka chaskishkaykichi.

18 Ñukami tataykichi kasha.

Kankuna wambraynikuna kankichi.

Tukuy laya atipak Tata Dios chayta willawanchisapa.”

7

Pablu kushikun Korintopi wawinkunkuna payta kasushkankunaryaku.

1 Munanayni wawkinikuna, paninikuna, Tata Dios sukaman allimata willawashkanchisapa yanapawananchikunata. Chayrayku tukuy laya mana alli ruranakunata amana ruraypachinachu nima yuyaypachinachu. Tata Diosllata allita kuyashpa kastigawananchikunata manchashpa paypa munananllata rurashpa kawsaypachi.

2 Chaymanta roygaykichi ūukaykunata tukuy shunku kuyawanaykichipa. Mana ni pita rabyachishkaykichichu. Mana ni pita uchallichishkaykichichu. Mana nima tiyapushuknikichita llullachishpa kichushkaykichichu. **3** Mana kankunata pinkachinaynikunapachu tukuy kaykunata killkaykaykichi. Nawpa willashkaynishiha tukuy shunku sukaman kuyaykichi. Kawsashpaynipish wañushpaynipish kuyaykichilla. **4** Chashna kuyashpayni mana nima yuyanaynita pakashpa willaykichi. Sukaman kushikuni kankuna allita rurashpa kawsaykaptikichi. Rikchak layata sufrishpaynipish kankunata yuyashpa sukaman animukushpa kushikuni.

⁵ Masedonia partipi chayashkaynikunamantapacha aypa runakuna sukaman sufrichiwaptinkuna mana atiparkanisapachu gustu kawsaya. Kaypi chaypi chay runakuna chikniwashpankuna manchachiwaksapa.

⁶ Llakidu kaykaptinikuna kushichiwakninch Tata Dios sukaman kushichiwarkansapa wawkinchi Tito ūukaykunapi chayamuptin. ⁷ Tito ūukaykunapi chayamushpa kankuna sukaman kushichishkaykichita parlachiwashpa kushichiwarkansapa. Willawashkasapa sukaman kawawanayanaykichita. Willawashkasapa sukaman llakichiwashpa kuyawashpa sukaman yuyawashkaykichita. Wawkinchi Tito tukuy chayta parlachiwaptinkuna ashwan sukaman kushikushkanisapa.

⁸ Chay kachashkayni kartata leyishpaykichi suk tiempullapa sukaman llakirkankichi. ūukapish llakirkani yachashpa kankunata sukaman llakita kushkaynita. Kunanka manana llakininachu. ⁹ Chay llakishkaynimanta sukaman kushikuni. Mana llakita kushkaynikunaraykuchu kushikuni. Kunanka kushikunimi mana alli rurashkaykichita sakishpaykichi Tata Diosman kutiptikichi payllata kasushpa kawsanaykicipa. Tata Dios munashkanshina llakirkankichi. Chayrayku chay kartayni allinikichipa karkan. ¹⁰Tata Dios munananshina llakishpanchikuna atipanchisapa mana alli rurananchikunata sakiyta. Chayta sakiptinchikuna payka perdonawanchisapa. Chay laya llakinanchikunaka allininchikunapami. Chaymanta wakinakuna llakishpankunapish mana Jesukristutachu kreyinayansapa. Chayrayku wañunankuna tiyan.

¹¹ Mash yuyaypachi imapami Tata Dioska munarkan llakinaykicipa. Kankunaka mana yankamantachu llakirkankichi. Chay kartaynita chaskishpaykichi kasukushkankichi. Chay uchallikushka wawkinchikunata piñayashpaykichi munarkankichi kastigaya. Manchakurkankichi yuyashpa payrayku Tata Dios kankunatapish kastigashunaykichita. Munarkankichi ūuka rinaynipa tukuyta allichak. Chay wawkikichita kastigashkankichi tukuy runakunata kawachinaykicipa mana uchayuk kanaykichita. ¹² Chay kartaynita killkashpayni mana chay uchallikushka runallatachu nima chay rabyachidu runallatachu yuyarkani. Chay kartaynita killkashkani entiedinaykicipa imashnami Tata Diospa ūwpakninpí kankuna kuyawankichi nishpa. ¹³ Chashna kuyawaptikichi sukaman kushikurkanisapa.

Chaymanta ashwan sukaman kushikurkanisapa kawashpa wawkinchi Tito kushikuypuru kananta kankuna kushichishkaykichirayku.

¹⁴ Wawkinchi Tito manara kankunaman riptin willashkani kankuna alli rurak runakuna kanaykichita. Chaymanta kankunamanta kutimuptin imashnacha ūuka rimashkaynishina willawashkasapa allita rurashpa kawsanaykichita. Chayrayku kushikushkani Titopa shiminmanta chayta uyarishpa. ¹⁵ Kunanka Titoka ashwanta kuyashunkichi yuyashpa tukuy kankuna kasushkaykichita. Paytaka kuyashpa yanapashpa allita chaskirkankichi. ¹⁶ Chashna Titota kasushka kaptikichi yuyashpayni sukaman kushikuni.

8

Pablu yachachiwanchisapa ofrendanchikunata Tata Diosta kuya.

¹ Munanayni wawkinikuna, paninikuna, kunanka parlachinayaykichi imashnami Masedonia partipi Tata Dios Jesukristuta kreyik runakunata sukaman kuyashpa yanaparkansapa. ² Paykunaka rikchak layata sufrishpankunapish kushikuypurulla kawsaykansapa. Mana aypa kullkiyuk kashpankunapish iden aypa kullkiyuk runakunashina rikchak laya tiyapushkankunata Tata Diosta kurkansapa.

³ Ņukaka kikini kawashkani kushikuypuru ofrendankunata Tata Diosta kuptinkuna. Tiyapunankunamanta atipashkankunata kurkansapa. Imankuna illapuptinkunapish kushikushpalla Tata Diosta kurkansapa.

⁴ Sukaman roygawashkasapa ofrendankunata apayanaynikunapa mana nimayuk Jesukristuta kreyikmasinkunata yanapanankunapa.

⁵ Mana yuyashkanisapachu aypata kunankunapa. Manara Tata Diosta nimata kushpankunara payta willarkansapa munananllata rurashpa kawsanankunapa. Chaymanta ūukaykunatapish sukmanta yanapawarkansapa.

⁶ Kankunapish paykunashina ofrendaykichita tantachishkankichi. Titoka kallarishka chay allima ofrendaykichita tantachiya. Kunanka kashkan payta kachaykani chay tantachidu ofrendaykichita chaskikuk. ⁷ Kankunaka allita Jesukristuta kreyishpa kawsaykankichi. Tata Diospa rimananta allita yachashpa sukmanta allita yachachikunkichi. Kushikushpalla llaktamasikichita yanapankichi. Ņukaykunatapish kuyawankichi. Kunanka tukuy kreyikukmasikichimanta ashwan alli ofrendakunata Tata Diosta kuyuchi.

⁸ Chayta willashpayni mana kamachikukshinachu willaykichi chay ofrendaykichita kukunaykichipa. Masedonia partipi runakuna ofrendankunata kukushkankunata willashkaykichi kankunapish paykunashina aypata kukunaykichipa. Aypa ofrendata kukushpaykichi tukuy pi yachankasapa mana nimayuk wawkitchita kuyanaykichita.

⁹ Kankuna allita yachankichi Señorninchi Jesukristu sukmanta kuyawashpanchikuna kay alppaman shamushkanta. Payka tukuy layayuk kayakashpa shamurkan mana nimayuk runa kananpa tukuy layayuk kananchikunapa.

¹⁰⁻¹¹ Kankuna suk wata washa kushikuypurulla munashpaykichi kallarirkankichi chay ofrendaykichita tantachiya. Kunanka yuyachiykichi chay kallarishkaykichi ofrendaykichita tukuchanaykichipa tantachiya. Kushikushpalla kallarishkaykichishina tukuy atipanaykichita tukuchaychi tantachiya. ¹² Tukuy shunku munashpa atipanaykichita kukuptikichi Tata Dios sukmanta kushikushpa chaskinka. Mana tiyapushuptikichika Tata Dios mana mañashunkichchu.

¹³ Ņuka mana munanichu sukkunata yanapanaykichirayku mana nimayuk kiparinaykichipa. ¹⁴ Kunanka kankunapa rikchak laya tiyapushunkichi. Chay mana nimayuk wawkinchikunapa mana tiyapunsapachu. Chayrayku paykunata yanapaykankichi. Suk tiempu kankunapa pishipti ichara paykunapa aypa tiyapunmansapa. Chaypina kankunata yanapashunkichiman. Chashna yanapanakushpa kawsashpanchikuna sukpapish sukpapish mana illapanchisapachu. ¹⁵ Tata Dios killkadunpi willawan-chisapa:

“Aypa mikunata tantachik runakunapa mana puchurkanchu. Tipillata tantachik runakunapish mana pishirkanchu.”

Pablu Titota ishkay wawkinawan kacharkansapa chay ofrendata apanankunapa.

¹⁶ Tata Dios Titota yuyachirkan ūuka kankunata kuyanaynishina paypish kuyashunaykichipa. Chayrayku Tata Diosta agradesini. ¹⁷ Tito munashpa yanapashuynikichita yuyarkan riyya pasyashuknikichi. Chayrayku willaptin rinanpa sukmanta kushikushpa almitiwashka riyya.

¹⁸ Chaymanta Titowan tantalla suk wawkinchita kachaykani. Ņukaykuna Jesukristu salvakuk kananta yachachikuptinkuna payka yanapawarkansapa. Chayrayku maypipish kaptin tukuy wawkinchikuna rimansapa alli yanapakuk kananta. ¹⁹ Chashna alli yanapakuk kaptin tukuy

Jesukristuta kreyikkuna payta akllashkasapa purikmasinikuna kananpa. Payka yanapawankasapa tukuy tantachishkaykichi ofrendaykichita apaya. Tukuy partimanta ofrendankunata apaykanisapa Señorninchi Jesukristuta sukaman kuyashpa kushichinaynikunapa. Chayta apaykanisapa tukuy runakuna yachanankunapa tukuy shunku yanapakuk kanaynikunata. ²⁰ Mana munanisapachu ni pi mana allita yuyawanankunapa kay aypa ofrendata apaptinikuna. Chayrayku chay wawkinchikuna ūukaykunawan tantalla rinkasapa. ²¹ Munanisapa allita ruraya Tata Dios kawanana runakunapish kawanankunapa alli rurak kanaynikunata.

²² Chaymanta suk wawkinchikunata chay wawkinchikunawan tantallata kachaykanisapa. Kay wawkinchita aypa kuti kawashkanisapa Jesukristuta kreyik runakunata kuyashpa yanapanankunata. Payka yachan kankuna alli kuyakuk runakuna kanaykichita. Chayrayku sukaman kushikun kawashuknikichi rinanta yachashpa.

²³ Ichara maykan llaktamasikichi tapushunkichiman pimi Titoka nishpa. Chashna tapushuptikichika willaychi Tito ūukapa yachachikukmasini kananta yanapashunaykicipa. Chaymanta ichara tapushunkichiman pikunamí Titopa purikmasinkuna nishpa. Chashna tapushuptikichika willaychi paykuna Jesukristuta kushichik runakuna captinkuna tukuy partikunapi Jesukristuta kreyikmasinkuna kachashkankunata.

²⁴ Ūukaka chay wawkinchikunata willashkanisapa kankuna allita kuyashpa chaskinaykicipa. Chayrayku paykuna kankunapi chayaptinkuna kuyashpa yanapaychi. Chashna allita yanapaptikichi yachankasapa paykunata willashkaynikuna mana llulla kananta. Chaymanta tukuy maypi Jesukristuta kreyikmasinchikuna yachankasapa chay wawkinchikunata kuyanaykichita.

9

Pablu yachachikun ofrendakunata Tata Diosta kushikushpa kukananchikunapa.

¹ Kankuna ūami yachankichina ofrendata kukuya wawkinchikunata yanapanaykicipa. Chashna yachaptikichi manana kashkanka killkanayashkaykichinachu ofrendata kukunaykicipa. ² Allita yachani kankuna tukuy shunku munanaykichita ofrendata kukuya. Chayrayku Masedonia partipi tukuy pita parlachini kankuna Akaya partipi kawsakkuna suk watatana ofrendata tantachishkaykichita.

Chashna parlachiptini kay Masedonia partipi kawsak runakunapish sukaman munansapa ofrendankunata kukuya. ³ Chayta parlachikush-paynipish yuyaykani ichará kankuna mana parlachikushkaynoshinachu ofrendata kukuykankichi. Chayrayku kay kimsa wawkinchikunata kachaykanisapa yanapashunaykicipa chay ofrendata kukunaykicipa.

⁴ Kay Masedoniamanta wawkinchikuna ūukawan tantalla pasyaknikichi riptinikuna ichará ofrendaykichita manara tantachishkankichirachu. Chashna manara tantachiptikichira sukaman pinkakuymansapa. Kankunapish pinkakunkichiman. ⁵ Ama pinkakunanchikunapa manara rishpaynikunara kay kimsa wawkinchikunata kachaykanisapa yanapashunaykicipa chay rimashkaykichi ofrendata tantachiya. Paykuna yanapashuptikichi ūukaykuna chayashpaynikuna tukuy tantachidutana tarishasapa. Chaypina tukuy pi yachankasapa tukuy shunku munashpa mana michakushpa ofrendata kukushkaykichita.

⁶ Mash yuyaychi. Suk runa tipi murukunallata tarpushpa mana aypatachau pallan. Aypa murukunata tarpushpa sukaman aypata pallan. ⁷ Kay rimana yachachiwanchisapa ofrendanchikunata kushikuypuru kukunanchikunapa. Manara kukushpanchikunara yuyananchikuna tiyan mashnatami kukushunchisapa nishpa. Ama llakishpachu kukuypachi. Mana ni pi apurawaptinchikunachu kushikushpalla kuypachi. Tata Dios sukaman kushikun kushikushpalla kukuptinchikuna. ⁸ Tata Dios atipan tukuy layapi yanapawayninchikunata tukuy laya aypa puchunankaman tiyawananchikunapa. Chashna Tata Dios sukaman yanapawaytinchikuna atipanchisapa kushikushpa tukuy layapi sukkunata yanapayta. ⁹ Tata Dios killkadunpi riman:

“Chay yanapakuk runa mana nimayuk runakunata kushikuypuru sukaman yanapaptin Tata Dios payta mana kutin kunkankachu.”

¹⁰ Tata Dios tarpukuk runakunata murukunata kunsapa. Mikunantapish kunsapa. Tata Dios tarpukuk runakunata murukunata kunankunashina kankunatapish sukaman yanapashunkichi mana nimayuk runakunata yanapanaykicipa. Paykunata yanapaptikichi paykunapish Tata Diosta kreyishpa kawsankasapa. ¹¹ Tata Dios yanapashuptikichi rikchak laya tiyapushunkichi kankunapish sukkunata kushikushpa yanapanaykicipa. Mana nimayuk wawkinchikuna tantachishkaykichi ofrendata makinikunamanta chaskishpanguna Tata Diosta sukaman agradesinkasapa.

¹² Chashna ofrendaykichita mana nimayuk wawkinchikunapa kachashpaykichi ima illapunankunapi yanapankichi. Chaymantapish chay chaskik runakuna Tata Diosta agradesinkasapa. ¹³ Paykuna ofrendaykichita chaskishpa yachankasapa Jesukristupa yachachikunanta allita kasushpa kawsanaykicipa. Chaypina Tata Diosta kuyashpa alabankasapa paykunata aypa runakunatapish sukaman allita kushikushpa yanapaptikichi.

¹⁴ Chaymantapish Tata Dios sukaman yanapashushkaykichirayku chay chaskik runakuna kuyashushpaykichi Tata Diosta roygankasapa ashwanta yanapashunaykicipa. ¹⁵ Rimananchikuna pishin Tata Diosta alabananchikunapa wambran Jesukristuta kachamushkanrayku.

10

Pablu washanchak runakunata upallayachinsapa.

¹ Wawkinikuna, paninikuna, Jesukristu kuyashunaykichishina ūukapish kankunata kuyashpayni rogyaykichi ama washanchawanaykicipa. Kankunamanta sukkuna rimansapa ūuka kankunawan kashpayni alli modoyuk kanaynita. Rimansapa mana kankunawan kashpayni kartaynipi sinchita yachachikunaynita.

² Chay yuyawak wawkinchikunaka rimansapa iden mana Jesukristuta kreyik runashina munanaynillata ruranaynita. Manara kankunaman rip-tini paykunata willani ama washanchawanankunapa. Mana munanichu chay wawkinchikunata sinchita willaysapata. ūuka rishpayni paykuna washanchawaykaptinkunallara sinchita willashasapa.

³ ūukaykuna runakunalla kashpaynikunapish mana kawsanisapachu chay mana Jesukristuta kreyik runakunashina kaparichinakushpa nima chikn-inakushpa. ⁴ Mana kikinikunapa yuyaynikunallatachu yachachikunapa. Chay chikniwak runakuna sukaman chatakuwansapa. Chashna chatakuwaptinkunapish Tata Dios sukaman yanapawaptinkuna atipanisapa paykunata upallayachiya. ⁵ Chaymanta suk runakuna tukuy pita michansapa ama Tata Diosta riksinankunapa. Chay michak runakunata atipanisapa upallayachiya. Tukuy pita atipanisapa yachachiya mana

alli yuyanankunata sakishpa Jesukristuta kreyishpa kawsanankunapa.
6 Kankunapi chayashpaynikuna yachachishkaykichi Jesukristuta allita kasunaykichikaman. Chaypina tukuy mana kasukuk runakunata kastigashasapa.

7 Kankunaka yuyankichi mana yachak kanaynikunata. Yuyanankichiki Jesukristuta alli sirvik kanaykichita. Chashna yuyanakushpaykichi allita yuyaychi. Ñukaykunapish Jesukristuta ashwan alli sirvik kanisapa.

8 Jesukristu kachamuwashkasapa kankunata yachachinaynikunapa ashwan allita payta kreyishpa kawsanaykichipa. Mana kachamuwashkasapachu wakllichinaynipasapa. Ichará sukaman rimakuni Jesukristu kachamuwashka kananta. Chashna rimashpaynipish mana pinkakunichu.

9 Mana munanichu kartaynikunata killkashpa manchachiynikichita.

10 Sukkuna rimansapa ñuka kartaynikunallapi sinchita yachachikunaynita. Rimansapa laduykicipi kashpayni mana atipanaynita yachachiynikichita. Rimansapa rimakuptini mana ni pi kasúwananta.

11 Chashna chay yuyawak runakuna rimaptinkunapish willaykichi yachanaykichipa. Karu llaktapi kashpayni imashnacha kartaynipi sinchita rimashkaynishina kankunapi chayashpaynikuna chashnalla sinchita rimanaynikuna tiyan.

12 Ñukaykuna mana alabanakunisapachu chay alabanakuk runakunashina. Paykunaka llullachinakushpa kikinkunalla yuyanakunsapa sukaman alli rurak kanankunata. Paykunapuralla sukwan sukwan parlachinakunsapa alli yachak kanankunata. Chashna parlachinakushpankuna mana alli yuyayuksapachu. **13** Ñukaykunaka mana chashnachu yuyanakunisapa. Tata Dios ñukaykunata kamachiwansapa maypimi riymansapa yachachikuk nishpa. Payka willawashkasapa kankunaman yachachikuk rinaynikunapa. Chashna Tata Dios kamachiwaptinkuna mana alabanakunisapachu. **14** Mana ni pi kankunata yachachishuptikichira Jesukristu kachamuwarkansapa yachachinaynikunapa. Chayrayku mana kikinikunallapa munanaynikunata rurashpachu rishkanisapa yachachiknikichi.

15 Mana chikan yachachikuk runakunapa trabajunpi yaykushpachu alabanakunisapa. Tata Dios kachamuwaptinkuna payllapa munananta rurashpa munanisapa kankunata yachachiya ashwanta Jesukristuta kreyishpa kawsanaykichipa. **16** Chaymanta Korinto llaktaykichimanta ashwan karu llaktakunapipish yachachikunaynisapa Jesukristu salvakuk kananta. Mana rinaynisapachu maypicha sukkuna yachachikushkankunaman. Mana chikan yachachikukpa trabajunpi yaykushpachu alabanakunaynisapa. **17** Tata Diospa rimananpi willawanchisapa: “Kankuna alabanakunayashpaykichi Tata Diosta riksishkaykichirayku alabanakuychi.”

18 Tata Diroska akllashkan runakunata alaban. Kikinlla alabanakuk runata mana alabanchu.

11

Ama kreyiypachichu llulla yachachikuk runakunata.

1 Kunanka munani ashwanta yachachiynikichita. Dementoshina kanaynita yuyashpaykichiish uyariwaychilla. **2** Tata Dios mana munanchu llulla yachachikuk runakunata uyarinaykichipa. Ñukapish tataykichishina kuydaykichi ama chay llulla yachachikuk runakunata uyarinaykichipa. Kankuna iden mañadu shipashninishina ñukaka novioykichi Jesukristuta almitishkani paypa kanaykichipa. Imashnacha suk shipashpa tatan

kasaranankuna diyakaman kuydakshina tukuy kankunata kuydaykaykichi Jesukristullata shuyashpa kawsanaykichipa.

³ Yuyani ichara yachaysapa supay chay ñawpa warmi Evata llullachishkanshina kankunatapish llullachishunkichiman. Ichara supay chikan layatana yuyachishunkichiman amana Jesukristullata kuyashpa kawsanaykichipa.

⁴ Jesukristu salvawananchikunata yachachishkaynikunata manana uyari-nayashpaykichi maykan runakunapish chikan layata yachachishuptikichi ¿imapati kushikushpalla kreyinkichi? Kankuna Tata Diospa Espiritunta chaskishkaykichiwasha ¿imapati chikan laya espirituta kushikushpalla chaskinayankichi? ¿Imapatí alli yachachikunata manana kreyishpaykichi chikan laya yachachikunata kreyinkichi?

⁵ Chay katinaykichi runakuna rimaptinkunapish alli yachachikukkuna kanankunata ñukaka yachani paykunamanta ashwan alli yachachikuk kanaynita. ⁶ Mana alli rimakuk kashpaynipish allita entiendini Jesukristupa yachachikunankunata. Allita rurashpa kawsashpayni allita kawachishkaykichi alli yachak kanaynita.

⁷ Ñuka kankunawan kawsashpayni sukaman trabajarkani ama nimata kankunata mañanaynipa. Chashna trabajashpa munarkani kankuna Jesukristuta allita kreyishpa kawsanaykichipa. Ichará mana allitachu rurashkani mana nimata kobrashpa kankunata yachachishpayni. ⁸ Chikan llaktakunapi kawsak wawkinchikunata mañarkani kullkita kachamuwanankunapa kankunata mana nimata kobrashpa yanapanaynikunapa.

⁹ Chay llaktaykichi yachachikushpayni suk ima pishiaptin mana nimata mañarkaykichichu. Wawkinchikuna Masedonia partimanta chayamushpankuna ima munanaynita kuwarkansapa. Kankunata mana nimata mañarkaykichichu. Chashnalla katisha mana nimata kankunata mañashpayni. ¹⁰ Jesukristupa yachachikunanta allita yachashpa sukaman kushikushpalla yachachikuni. Chay kawsanaykichi Akaya partipi mana ni maykan runa upallayachiwankachu yachachikuptini.

¹¹ ¿Imapatí kashna willaykichi? Ama yuyaychichu chayta willashpayni mana kankunata kuyanaynita. Tata Dios yachan kankunata sukaman kuyanaynita.

¹² Mana kobrakushpa yachachiynikichillapi katisha. Kankunamanta mana nimata chaskiptini chay llullachishuknikichi runakuna mana atipansapachu alabanakuya ñukashina yachachikuk runakuna kanankunata. ¹³ Chay runakuna llullakushpa rimansapa Jesukristu yachachikuk kachamushkankunata. Alli yachachikukshina tukushpankuna yachachikunsapa.

¹⁴ Ama almiraychichu chashna alli yachachikukshina rikuriptinkuna. Kikin Satanaspish llullachiwyanayashpanchikuna iden llipyakpuru angelshina tukun. ¹⁵ Chashna angelshina tukuptin chay llulla yachachikukkunapish iden alli yachachikukkunashina tukunsapa. Chashna llullachikushkankunaryku Tata Dios paykunata kastigankasapa.

Pablu parlachinsapa sukaman sufrishkanta.

¹⁶ Kashkan willaykichi. Ama yuyaychichu demento kanaynita. Demento kanaynita yuyaptikichipish uyarwaychi dementoshina alabanakushpa rimaynita. ¹⁷ Ñuka alabanakushpayni dementoshina rimaykani. Mana Señorninchí Jesukristu rimashkantashinachu rimaykani. ¹⁸ Aypa llulla yachachishuknikichi runakuna kikinkunalla alabanakunsapa alli yachak kanankunata. Ñukapish alabanakusha. ¹⁹ Kankuna yachaysapa likidu

kashpaykichi ¿imapatí chay alabanakuk runakunata kushikushpalla uyarinkichi?

²⁰ Chay llulla yachachikuk runakuna patronnikichishina sukanan sinchita trabajachishunkichi. Sukaman llullachishushpaykichi tiyapushuknichita kichushunkichi. Yuyanakunsapa kankunamanta ashwan alli kanankunata. Sukkuna uyaykichipi lapyashunkichi. Chashna rurashuptikichi ¿imapatí upallala kiparinkichi? ²¹ ¿Ariya pinkakunichu willaynikicha ñukaykuna mana patronnikichishina kanaynikunata? Chay llulla yachachikkuna mana ni pita manhashpa kikinkunalla alabanakunsapa. Ñukapish mana ni pita manhashpa dementoshina rimani paykunamanta ashwan allita atipanaynita alabanakuya.

²² Paykunaka rimansapa hebreo kasta kanankunata. Ñukapish hebreo kastamí kani. Rimansapa Tata Diospa aklladu israel runakuna kanankunata. Ñukapish israel runami kani. Sukaman rimansapa ñawpa awilunchi Abrahampa mirakninkuna kanankunata. Ñukapish Abrahampa miraknini kani. ²³ Paykunaka yuyansapa Jesukristuta uyarishpa trabajanankunata. Ñukaka paykunamanta ashwan allita Jesukristuta sirvishpa trabajani. Dementoshina kaykunata parlachiykichi. Ñuka paykunamanta ashwan allita trabajashkani. Paykunamanta ashwan aypa kuti karselpi churawashkasapa. Paykunamanta ashwan aypa kuti asutiwashkasapa. Aypa kuti yakallapa wañurkani.

²⁴ Chaymanta judiyukunapa awtoridarninkuna pichka kuti karawaskawan asutiwarkansapa. Chay pichka kuti asutiwashpa kimsa chunka iskun asutita asutiwarkansapa. ²⁵ Chaymanta romano awtoridarkuna kimsa kuti makawarkansapa. Suk kuti judiyumasinikuna ruminchawashpankuna yakallapa wañuchiwarkansapa. Kimsa kuti yakupi barku sumiptin yakallapa sipikurkani. Suk kuti manllayba atun kochapi suk tutata suk diyata chishyarkani.

²⁶ Tukuy mayta purishpayni yakukunapi aypa kuti yakallapa sipikurkani. Suwakunapish yakallapa wañuchiwarkansapa. Llaktamasinikuna chikan llaktakunamanta runakunapish aypa kuti wañuchiwanayarkansapa. Chaymanta chawpi llaktakunapi, chunlla partikunapi, manllayba kochakunata rishpayni yakallapa wañurkani. Chaymanta llullakushpa wawkinchikuna kanankunata rimashpankuna sufriñiwarkansapa.

²⁷ Sukaman trabajashpa sukanan shaykurkani. Aypa kuti mana puñushpa pakarirkani. Aypa kuti yakumanta yarkaymanta karkani. Aypa kuti mana mikukchu kani. Chaymanta mana llachapayuk kashpayni chirishpa sufrirkani.

²⁸ Chaymanta tukuy sufrinaynikunamanta ashwanta llakini tukuy diya yuyashpa imashnami Jesukristuta kreyikmasinikunata yanapayman nishpa. ²⁹ Maykan wawkinchikuna paninchikuna Jesukristuta manana allita kreyishpa kawsaptinkuna paykunapa llakini. Suk runakuna wawkinchikunata paninchikunata uchapi urmachiptinkuna sukanan llakishpa piñakuni. ³⁰ Tukuy chay sufrishkaynikunallapa alabanakuni. Mana chay llullachikuk runakunashinachu alabanakuni. ³¹ Señorninch Jesukristupa Tatan Dioska yachan tukuy rimashkaynita mana llulla kananta. Payllatami tukuy tiempu kuyananchikuna tiyan.

³² Chaymanta Damasko llaktapi kashkayni tiempu chay llaktapa gobernadorin chay kamachikuk Aretaspa yanapaknín karkan. Chay llakta vueltashnintin pirkakunawan alli wichadu karkan. Chay gobernador tukuy chay llaktapa punkunkunapi guardiyakunata churarkan

apiwanankunapa. ³³ Chaypina chay llakta pirkarpa ventananmanta wawkinikuna suk atun sestupi churawashpa urayachiwarkansapa. Chashna urayachiwaptinkuna chay sinchi gobernadormanta kishpirkani.

12

Jesukristu Pabluta muskuyninpishina sieluman pusharkan.

¹ Mana allichu kanman ashwanta alabanakunaynipa. Mana alli kaptinpish Jesukristu muskuyninipishina kawachiwashkanta willaykichi.

² Ñami chunka chusku watana muskuyninipishina Tata Dios sielman pushawarkan paypa kawsananta riksichiwak. Mana yachanichu kuerpuntinchu manachu sielman rishkaynita. Tata Diosllami yachan. ³ Kashkan willaykichi. Tata Diosllami yachan kuerpuntinchu manachu sielman rishkaynita. Ñuka mana yachanichu. ⁴ Tata Dios sielman pushawaptin pakallalla mana ni pi uyarishkan rimanakunata uyarirkani. Tata Dios chay uyarishkayni rimanakunata mana munanchu parlachikunaynipa.

⁵ Ñuka sukaman kushikuni Tata Dios kawsanan sieluta kawachiwashkan-rayku. Chashna kushikushpaynipish mana chaykunata kawashkayniraykuchu alabanakuni. Sukaman sufrishkayniraykulla alabanakusha tukuy runakuna yachanankunapa Tata Dios yanapawashkanta. ⁶ Chashna alabanakunayashpaynipish mana llullatachu rimayman. Chay rimanayni mana llulla kaptinpish manami kikinimantachu alabanakuni. Mana munanichu kankuna sukaman alabawanaykichipa sielipi Tata Diospa kawsananta kawashkaynirayku. Munani allita rurashpa kawsashpayni allita yachachikuptini rimanaykichipa alli runa kanaynita.

⁷ Muskuyninipishina sielipi kaptini Tata Dios chay almiranakunata kawachiwashkan-rayku alabanakuyman karkan. Chayrayku Tata Dios munarkan kuerpuynipi Satanas sukaman nanaykunata kuwananpa ama alabanakunaynipa. ⁸ Kimsa kutina Señorninchi Jesukristuta roygarkani kay nanayninita kichuwananpa. ⁹ Chashna roygaptini payka willawashka: “Ñuka kanta kuyashpa yanapaptini atipanki kushikupurulla kawsayta. Chashna sukaman sufrishpayki mana nima laya atipak kaptiki ñuka suka-man yanapayki.”

Chashna Jesukristu willawaptin ñuka sufrishpaynipish kushikuni tukuy runakuna yachanankunapa Jesukristu sukaman yanapawananta. ¹⁰ Chaymanta rikchak layapi Jesukristurayku sufrishpaynipish kushikunilla pay yanapawaptin. Ñuka unkudu kashpaynipish suk runakuna sufrichiwaptinkunapish chikniwashpa kaparichiwaptinkunapish rikchak laya illawaptinpish kushikushpalla kawsani. Mana nimata rurayta atipak mallinakushpayni allita yachani Jesukristu yanapawaptin tukuy layata atipanaynita rurayta.

Pablu llakirkan Korinto llaktapi Jesukristuta kreyik runakuna mana allita ruraptinkuna.

¹¹ Ichará yuyankichi ñuka mana atipanaynita allita yachachikuya. Allita yachankichiman karkan ñuka chay llullachishuknikichi runakunamanta ashwan alli yachachikuk kanaynita. Chayta yachaykashpaykichipish mana alabawashkankichichu. Chayrayku dementoshina tukushpa alabanakushkani. ¹² Tata Dios yanapawaptin kankunawan kashpayni mana killakushpa nima shaykushpa rikchak laya almiranakunata rurarkani. Chaykunata ruraptini yacharkankichi Jesukristu kachamuwashkanta

paypa rimananta yachachikunaynipa. ¹³ Chayrayku tapuykichi: ¿Imapatí kunanka yuyawaykankichi? Kankunawan kashpayni mana nimata mañarkaykichichu sukkunata mañashkaynoshina. ¿Kankunata mana nimata mañashkayniraykuchu rimawaykankichi? Chashna kaptinka kay mana alli rurashkaynimanta perdonawaychi.

¹⁴ Ñami rinayaykanina kimsaynin kutina kankunata pasyaknikichi. Kawaknikichi rishpayni yachachinaykichi. Manami munanichu nimata mañaynikichita. Mana nima tiyapushuknikichita munanichu. Ñukaka iden tataykichishinami kani. ¿Manachu suk tata sukaman trabajanañ tiyan wambrankunata allita wiwananpa? Chayrayku wambraynikunashina kaptikichi mana munanichu sirviwanaykichipa. ¹⁵ Chashna tataykichishina kashpayni sukaman kushikushpa tukuy tiyapananta kankunata yanapashpayni tukuchasha. Sukaman trabajasha kankunata kuyashpa yanapanaynipa. Kankunata ashwanta kuyaptini ¿imapatí kankuna manana ñawpashinana kuyawankichi?

¹⁶ Kankunawan kashpayni mana nimata mañashkaykichichu. Chayta yachaptikichipish sukkuna yuyawansapa llullachishpayni allinikichipa nishpa tiyapushunaykichita mañashkaynita. ¹⁷ ¿Yuyankichichu kankunaman chay wawkinchikunata kachashpayni willashkaynita kullkikichita ñukapa apamuñankunapa? Manami chayraykuchu kachashkanisapa.

¹⁸ Wawkini Titota sukaman roygarkaní pasyashuknikichi rinanpa. Paywan tantallata kacharkani suk wawkinchikunata. ¿Ariya Titochu llullachishshuskankichi? Manami. Titowan ñuka allita yachachirkaykichi. Tata Dios ishkantinikunata yanapawaptinkuna allita rurashpa kawsashkanisapa. Chashna kayaptin ¿imapatí mana alli kanaynita yuyawaykankichi? ¹⁹ Ichará yuyankichi allipi tukushpa kay kartata killkanaynikunata. Mana chashnachu. Tata Diospa munananllata rurashpa kay kartata killkashkani.

Munanayni wawkinikuna, paninikuna, Jesukristuwan tantalla kawsashpayni killkashkaykichi kankunata yanapanaynipasapa ashwan ashwanta payta kreyishpa kawsanaykichipa.

²⁰ Manchakuni pasyaknikichi rishpayni tariynikichita mana munashkayni layata rurashpa kawsaykaptikichi. Ichara kankunapi chayaptini kawawankichiman mana munawanaykichi layata. Manchakuni sukwani sukwani yuyanakushpa kawsaykanaykicha. Ichara chikanpa tiyapunanta munashpa piñanakushpa sukpiñish sukpiñish kikikichillapa munashpa kawsaykankichiman. Ichara chikninakushpa ayninakushpa alabanakushpa mana entiendinakushpa kawsaykankichiman.

²¹ Manchakuni kankunapi chayaptini mana alli ruranaykichimanta mana wanaptikichi. Ichara uchalllikushpaykichira chikan warmiwan kawsaykanichiman. Ichara mana allita yuyashpaykichira mana allita rurashpaykichira kawsaykankichiman. Chashna mana allita ruraptikichika sukaman llakishpa wakash. Chaymanta Tata Diospa ñawpaknippi kankunarayku pinkakusha.

13

Kartanta tukuchashpa Pablu wawkinikuna konsejansapa.

¹ Ñami willashkaykichina kashkan rinaynita pasyaknikichi. Kaywan kimsaynin kutina llaktaykichiman risha. Tata Dios rimananpi willawan-chisapa: “Ishkay kimsa runakuna suk runata chatakuptinkunara chayrak chay uchayuk runata kastiganaykichi tiyan.” ² Chashna Tata Dios rimaptin ñuka kankunamanta karupí kashpaynipish tukuy chay uchayuk runakunata

tukuy kankunatapish willaykichi: Chay ishkaynин kuti rishkayni tiempu chay mana alli rurashkaykichirayku piñayarkaykichi wanayakichipa. Kunanka kankunaman kashkan rishpayni sinchita piñakushpayni sinchita kastigashkaykichi.

³ Kankuna mana kreyiwashpa yachanayankichi Jesukristu yachachikunaynipa kachamuwashkachu manachu nishpa. Jesukristu sukaman tukuy layata atipak kashpa chay uchankunamanta mana wanak runakunata sukaman kastigankasapa. Chaypira yachankichi Jesukristu kachamuwashkanta. ⁴ Ariya Jesukristu kruspi wañurkan iden mana nimata atipak runashina. Chaymanta Tata Dios tukuy laya atipak kashpa payta kawsachimurkan. Ñukaykunapish kikinikunalla mana nima atipak runakuna kanisapa. Chayrayku Jesukristuwā tantalla kawsaptinikuna Tata Dios sukaman yanapawansapa atipanaynikunapa kankunata allita yanapayta.

⁵ Tukuy kankuna kikikichi allita yuyanakuychi allitachu manachu Jesukristuta kreyishpa kawsaykankichi nishpa. Allita kreyishpa kawsashpaykichika yachankichina pay kankunapi kawsananta. Mana Jesukristuta kreyishpa kawsashpaykichika manami paywanchu kawsaykankichi. ⁶ Allita yachani kankuna riksiwanaykichita mana llullakushpa Jesukristupa rimananta yachachikuykanaynikunata.

⁷ Tata Diosta sukaman roygani mana kankunata kastigaptinikunapish allillata rurashpa kawsanaykichipa. Mana munanichu kankunata kastigaynikichitá kawachinaynipasapa Jesukristu kachamuwashkanta. Ñukapa mana nimananchu kankuna yuyawaptikichi mana alli yachachikuk kanaynita. Yuyawaptikichipish munani allillata rurashpa kawsanaykichipa. ⁸ Chashna suk runakuna yuyawaptinkunapish Tata Diospa rimananllata kuskata yachachikunaynikuna tiyan. Manami llullatachu yachachikunisapa. ⁹ Sukaman kushikunisapa Jesukristuta allita kreyishpa kawsaptikichi. Kankuna allita Jesukristuta kreyiptikichi mana kastigashkaykichinachu. Chayrayku Tata Diosta sukaman roygani isapa allillata rurashpa kawsanaykichipa.

¹⁰ Manara pasyaknikichi rishpaynira karullamanta kay kartata killkaykichi ama kankunapi chayashpayni piñayanaynipasapa. Señorninchí Jesukristu kachamuwashka kankunata yachachinaynipasapa. Mana munanichu kankunapi chayashpa supta supta sukaman kastigaynikichita.

¹¹ Wawkinikuna, paninikuna, kay kartaynita tukuchaykani. Kushikushpalla kawsaychi. Allillata rurashpa kawsaychi. Sukwan sukwan animuchinakushpa kuyanakushpa allita kawsaychi. Kuyawakninchí kushichiwakninchí Tata Diroska kankunawanmi kawsanka. ¹² Sukwan sukwan kuyanakushpa rimachinakuychi. ¹³ Tukuy Jesukristuta kreyikmasinchikuna tukuy kankunata rimachishunkichi.

¹⁴ Señorninchí Jesukristu yanapashuchunnikichi. Tata Dios kuyashuchunnikichi. Tata Diospa Espiritun kankunawan kawsachun.

Ñuka Pablo chayllata killkashkaykichi.

GALATAS PABLUGALASIAPARTIPI KREYIKUKMASINKUNATA KILLKARKAN

Pablugalasia partipi wawkinkunata paninkunata rimachin.

¹⁻² Munanayni wawkinikuna, paninikuna, ūuka Pablugalasia partipi Jesukristuta kreyikumasinkunata rimachiykichi. Tukuy kaypi wawkinikunawan tantalla kay kartata killkaykisapa. Jesukristu kawsachimuk Tatan Dioswan ūukata kachamuwashka rimananta yachachikunaynipa. Manami runakunachu kachamuwashka.

³ Munani Tatanchi Dios Jesukristuwan tantalla kankunata kuyashushpaykichi kushichishunaykichipa. ⁴ Jesukristu kikin munashpa Tatanchi Diospa munananta rurashpa wañurkan uchanchikunamanta perdonawananchikunapa. Payka yanapawanchisapa amana ūawpashina sukaman mana allita rurashpalla kawsananchikunapa. ⁵ Tata Dios sukaman allima kaptin akuychi mana tukuy niyukta kushichiypachi.

Tata Dios salvawananchikuna rimanan sukkllala tiyan.

⁶ Jesukristu wañushkanrayku Tata Dios sukaman kuyashushpaykichi kayashushkankichi paypa wambrankuna kanaykichipa. Chashna kayashuptikichipish paymanta utka ashushpaykichi chikan laya yachachikunata kreyiykankichi. Mana yachanichu imapami ashushshankichi nishpa. ⁷ Jesukristulla salvawanchisapa. Chayllata yachachikunisapa. Manami chikan salvawakninchti tiyanchu. Mana alli yachachikuk runakuna mana kuskata yachachikushpa pantachichishuykankichi. Paykunaka manami Jesukristu salvawananchikunatachu yachachikunasa.

⁸ Chashna ūukaykunapa yachachishkaynikunamanta chikan layata yachachikuptinkuna Tata Dios kastigankasapa. Mana allita yachachikuptinikunaka Tata Dios ūukaykunatapish kastigawanmansapa. Suk angel sielumanta shamushpa chikan layata yachachishuptikichika Tata Dios paytapis kastiganman.

⁹ Allita willashkaynikunashina kashkan chayllata willaykichi. Jesukristullata kreyishpa kawsaptikichi Tata Dios perdonashunkichi. Chay alli yachachikushkaynita kreyishkankichi. Maykan runa chikan layata yachachishuptikichika Tata Dioska payta kastiganka. ¹⁰ Ūukaka sukaman munani Tata Dios willawananpa alli yachachikuk kanaynita. Mana maskanichu runakuna alabawanankunapa. Runakuna alabawanankunapa maskashpaynika manami Jesukristupa munanantachu rurayman.

Tata Dios Pabluta akllarkan yachachikuk kananpa.

¹¹ Wawkinikuna, paninikuna, allita willaykichi. Ūukaka Jesukristu salvawananchikunata allita yachachikuni. Manami runakunapa yuyayninkunatachu yachachikuni. ¹² Jesukristu kikin yachachiwarkan salvawananchikunata. Manami ni pi Jesukristupa rimananta yachachiwashkachu.

¹³ Kankuna yachankichi ūawpa tiempu judiyumasinkunapa yachachikunanta katishkaynita. Chayta katishpayn'i tukuy maypi Jesukristuta kreyik runakunata sukaman padesichishpa wañuchinayarkanisapa. ¹⁴ Tukuy wiñakmasinkunamanta ashwan allita judiyukunapa yachachikunankunata

katirkani. Ñukaka ñawpa awiluynikunapa yachachikunankunata paykunamanta ashwan allita kawsarkani.

¹⁵ Chaymanta manarapish nasiptinira Tata Dios sukaman kuyawashpa kikin munashpa akllawarkan paypa wambran kanaynipa. ¹⁶ Tata Dios wambran Jesukristuta riksichiwashpa willawarkan mana judiyu runakunata yachachinaynipasapa Jesukristu salvanankunata. Chayta willawaptin mana ni pita roygashkanichu yachachiwananpa. ¹⁷ Nima Jerusalen llaktaman ñukamanta ñawpakte Jesukristupa yachachikukkunaman rirkanicu roygak yachachiwanankunapa. Útkakushpa Arabia partiman rirkani. Chaymanta Damasko llaktaman kutirkani.

¹⁸ Chaymanta kimsa wata washra Jerusalenman rirkani Pedruwan parlak. Paywan karkani chunka pichka diyallata. ¹⁹ Chaypi kashpayni Señorninchí Jesukristupa wawkin Santiagowanpish parlarkani. Mana sukkunawan parlarkanichu.

²⁰ Tata Dios yachan tukuy kay killkashkayni mana llulla kananta.

²¹ Chaymanta Jerusalenmanta llukshishpayni Siria partiman Silisia partiman rirkani. ²² Chayrayku Judea partipi Jesukristuta kreyikkuna manara riksiwarkansaparachu. ²³ Mana riksiwashppankunapish sukkuna ñukapa rimaptinkuna uyarirkansapa: “Chay padesichiawkninchí runa Jesukristupa yachachikunanta manana kulluchinayashpa yachachikuykan.”

²⁴ Chayta uyarishpankuna Tata Diosta sukaman kuyashpa alabarkansapa.

2

Pablu Jerusalenman riptyin yachachikukmasinkuna chaskirkansapa.

¹ Chaymanta chunka chusku wata washra wawkinchikuna Bernabewan kashkan Jerusalenman rirkani. Wawkinchi Titotapish pusharkani.

² Chayman rirkani Tata Dios willawaptin rinaynipa. Chaypi chayashpayni Jesukristuta kreyikkunapa kamachikukninkunallawan tantanakurkani. Paykunataka entiendichirkansapa mana judiyu runakunata yachachinaynita Jesukristu salvawananchikunata.

Munarkani chay kamachikuk wawkinikuna almitiwanankunapa mana judiyu runakunata yachachinaynipasapa ama trabajashkayni yankamanta kananpa. Chashna entiendichiptinikuna chay kamachikukmasinikunaka almitiwarkansapa mana judiyukunata yachachinaynikunapa.

³ Chashna almitiwashppankuna purikmasini Titota mana judiyu kaptinpish mana apurarkansapachu señalachinakununpa. ⁴ Mana kuskata yachachikuk runakuna munarkansapa tukuy Jesukristuta kreyik runakuna señalachinakunankunapa. Chay runakuna llullakushpa wawkinchikunapi tukushppankuna yachachirkansapa tukuy Moisespa kamachikunankunata kasushpa kawsananchikunapa. ⁵ Chayta yachachikuptinkuna mana nima layapi paykunataka kasunayarkanisapachu. Munarkanisapa kankuna allita Jesukristullata kreyishpa kawsanaykichipa.

⁶ Chay kamachikuk wawkinikunaka yachashkaynimanta manami ashwantachu yachachiwarkansapa. Paykuna kamachikuk kaptinkunapish ñukapa mana nimananchu. Tata Dios yachan allita yachachikunaynita.

⁷ Chay kamachikuk runakunaka allita yacharkansapa Tata Dios ñukata kachamuwashkanta mana judiyu runakunata yachachinaynipasapa Jesukristu salvawananchikunata.

Tata Dios Pedruta kacharkan judiyu runakunata yachachinankunapa.

⁸ Kikin Tata Dios Pedruta judiyu runakunaman kachashpa ñukatapish kachamuwashka mana judiyu runakunata yachachinaynipasapa.

9 Chayrayku chay alli munadu kamachikuk wawkinikuna Santiagowan Pedru Juanpish yacharkansapa Tata Dios kachamuwashkanta. Chayta yachashpangkuna ūukata Bernabeta makinkunata kuwashpangkuna almitiwarkansapa yachachikumasininkuna kanaynikunapa. Willawarkansapa mana judiyu runakunata yachachinaynipasapa paykuna judiyu runakunata yachachinankunapa.

10 Chaykunata parlanakushpaynikuna willawarkansapa mana nimayuk runakunata yanapanaynikunapa. ūukapish chashnalla yuyashkani paykunata yanapaysapallata.

Pablu Pedruta willarkan mana allita ruraykananta.

11 Chaymanta wawkini Pedru Antiokiya llaktaman riptyn ūuka uyanpi willarkani mana alli ruraykananta. **12** Chay Antiokiya llaktapi kashpa Pedruka Jesukristuta kreyikmasinkunawan mana judiyukuna kaptinkunapish tantalla mikurkan. Chaypina Jerusalenmanta Santiago kachamushkan runakuna chayamushpankuna yacharkansapa Pedru mana judiyu runakunawan mikushkanta.

Chay Santiago kachashkan runakuna munarkansapa tukuy Jesukristuta kreyik runakuna Moisespa kamachikunankunata kasunankunapa. Chayrayku Pedruka mana judiyu wawkinikunawan manana mikunayarkannachu chay runakuna chatanankunata manhashpa.

13 Chaypina Pedru mana paykunawan mikuptin kawashpana judiyumasinkunapish manana munarkansapanachu mana judiyu wawkinikunawan mikuyta. Bernabepish manana paykunawan mikunayarkannachu. **14** Chashna Pedru paykunawan manana mikunayashpana Jesukristu yachachikushkanta manana kasurkannachu.

Chayrayku ūukaka tukuy wawkinchikunapa ūwapakninkunapi Pedrutaka piñayashpa willarkani: "Kanka judiyu runa kayakashpayki mana judiyu wawkinchikunawan mikushpayki entiendichishkankisapa Tata Dios tukuy runakunata chaskinankunata. Chaymanta chay mana judiyu wawkinchikunamanta anchushpayki ūami entiendichiykankisapano Moisespa kamachikunankunata kasunankunapa. ¿Imapatí mana allita entiendichiykankisapa?"

Jesukristuta kreyiptinchikuna Tata Dios salvawanchisapa judiyu runakunata mana judiyu runakunatapish.

15 Wawkinikuna, paninikuna, ūukanchikunamanta sukkuna judiyu kastamanta nasidu kanisapa. Mana judiyu runakuna uchasapa kashpankuna Moisespa kamachikunankunata mana kasunsapachu. ūukykuna mana paykunashinachu kanisapa. **16** Judiyu runa kashpaynikunapish yachanisapa Jesukristullata kreyiptinchikuna Tata Dios uchanchikunamanta perdonawananchikunata. Mana Moisespa kamachikunankunata kasushkanchikunaraykuchu perdonawanchisapa. Chayrayku judiyu mana judiyu runakunapish Jesukristullata kreyinchisapa Tata Dios perdonawananchikunapa. Mana Moisespa kamachikunankunata kasushkanchikunaraykuchu Tata Dios perdonawanchisapa. Tata Dioska manami ni pita perdonankachu Moisespa kamachikunankunallata kasushkankunarayku.

17 ūukanchikuna Jesukristuta kreyishpa kawsashpanchikuna yachanchisapa Tata Dios perdonawananchikunata. Mana Moisespa kamachikunankunata kasuptinchikunachu Tata Dioska salvawanchisapa. Chashna manana Moisespa kamachikunankunata kasuptinchikuna chay llullakuk runakuna willawanchisapa uchallikuykananchikunata. Chashna kaptinka ¿Jesukristuchu uchallichiwanachikunata? Manami

payka uchallichiwanchisapachu. ¹⁸ Ñawpa yachachikurkani Moisespa kamachikunankunata kasushpa kawsananchikunapa. Chayta sakishpa kunanka yachachikuni Jesukristullata kreyiptinchikuna Tata Dios salvawananchikunata. Chaymanta kashkan Moisespa kamachikunankunata kasunanchikunata yachachikushpaynika uchallikuykayman.

¹⁹ Moisespa kamachikunankunata mana allita kasuya atipashpanchikuna yachanchisapa uchasapa kananchikunata. Jesukristuta kreyishpara atipanchisapa Tata Diostá kushichishpa kawsayta.

²⁰ Jesukristu kruspi chakatadu kaptin ūukanchikunapi payta kreyishpanchikuna paywan tantalla chakatadushina kanchisapa. Chayrayku payka ūukanchikunapi kawsashpa yanapawanchisapa allita rurashpa kawsananchikunapa. Chayrayku kay allpapira kawsashpanchikunara Tata Diospa wambranta kreyishpa kawsanchisapa. Payka sukaman kuyawashpanchikuna wañurkan Tata Dios uchanchikunamanta perdonawananchikunapa.

²¹ Moisespa kamachikunankunata kasushkanchikunaryku Tata Dios perdonawaptinchikunaka Jesukristu yankamanta wañunman karkan. Tata Dios kuyawananchikunata ama kawaypachihu mana nimatashina.

3

Jesukristuta kreyiptinchikuna Tata Dios Espiritunta kuwanchisapa.

¹ Chay Galasiapi wawkinikuna, paninikuna, ūukaykuna allita yachachishkaykichi Jesukristu kruspi wañushkanta perdonawananchikunapa. ¿Ariya mana alli yuyayukchu kankichi? ¿Pití llullachishushkankichi Jesukristuta kreyishkaykichimanta chikan layata yuyanaykichipa?

² May willawaychi. ¿Ariya Moisespa kamachikunankunata kasushpalachu Tata Diospa Espiritunta chaskishkankichi? ¿Manachu Tata Diospa Espiritunta chaskishkankichi ūukaykuna yachachishkaynita kreyishpaykichi? ³ Chashna yachachishkaynita kreyishpa Tata Diospa Espiritunta chaskishpaykichi kunanka ¿imapati yuyankichi kikikichilla Moisespa kamachikunankunata kasushpa Tata Dioswan kawsanaykichita? ⁴ Moisespa kamachikunankunata kasushpa kawsaptikichi yankamanta Jesukristuta kreyishpa padeshishkankichi. Mana munanichu sufrishkaykichi yankapa kananta. ⁵ Jesukristupa yachachikunanta kreyishpa kawsaptikichi Tata Dioska Espiritunta kushushkankichi. Chaypina Espiritunka kankunapi almirana layata ruran. Manami Moisespa kamachikunankunata ka-sushkaykichiraykuchu Espirituntaka kushushkankichi.

⁶ Ñawpa tiempupish Abraham kreyirkana Tata Dios salvananta. Chashna Abraham kreyiptin Tata Dioska willarkan uchanmanta perdonananta.

⁷ Ñukanchikunapi kreyinanchikuna tiyan Tata Dios salvawananchikunata. Chashna kreyiptinchikuna iden Abrahamshina Tata Diospa wambrankuna kanchisapa.

⁸ Ñawpamantapacha Tata Dios yacharkan mana judiyu runakunatapish perdonanankunata paykuna salvanankunata kreyiptinkuna. Tata Dios chayta yachashpa Abrahamta kay alli rimananta willarkan: "Salvanaynita kreyishkaykirayku ūuka kantashina tukuy llaktakunapi kreyikukmasikiku-natapish yanapashasapa."

⁹ Abraham Tata Dios salvananta kreyiptin payka yanaparkan. Chashnashina tukuy Tata Dios salvakunankunata kreyikuk runakunatapish yana-pansapa.

¹⁰ Tata Diospa killkadun riman: "Maykan runa tukuy Moisespa kamachikunankunata mana allita kasuptin Tata Dios kastiganka." Chayrayku yachanchisapa tukuy kamachikunankunata mana allita kasuptinchikunaka Tata Dios kastigawananchikunata. ¹¹ Allita yachanchisapa mana Moisespa kamachikunankunata kasushkanchikunaraykuchu Tata Dios perdonawananchikunata. Tata Diospa killkadunpi riman: "Kankuna Tata Diosta allita kreyishpaykichika paywan tantalla mana tukuyniyukta kawsankichi." ¹² Moisespa kamachikunankunata allita kasushpa mana atipanchisapachu uchanchikunamanta salvanakuya. Tata Diospa killkadunpi riman: "Kankuna tukuy Moisespa kamachikunankunatara kasushpaykichira Tata Diroswan tantalla kawsankichi."

¹³ Moisespa kamachikunankunata mana tukuyta allita kasushpa kawsayta atipashpanchikuna wañunanchikuna tiyan. Chayrayku Jesukristuta iden uchasapa runashina ñukanchikunarayku kruspi chakatadu wañurkan. Jesukristu wañushkanrayku Tata Dioska manana ñukanchikunata kastigawashunchisapanachu. Tata Diospa killkadunpi riman: "Suk runa sukaman mana allita ruraptinka payta wañuchishpa kaspi chakatanaykichi tiyan." ¹⁴ Jesukristu tukuy mana judiyu runakunapapish kruspi wañurkan. Chayrayku Tata Dios Abrahamtashina tukuy paykunatapish yanapansapa. Tata Dios willawashkanchishina Jesukristu wañushkanrayku tukuy payta kreyik runakunata Espiritunta kuwashunchisapa.

Tata Dios kamachikunankunata Moiesta kushpa mana willarkanchu chaykunata kasuptinchikuna uchanchikunamanta salvawananchikunata.

¹⁵ Wawkinikuna, paninikuna, suk ejempluta willaykichi. Paktuta rurashpanchikuna ishkantin paktu rurak runakuna firmanchi. Chashna fir-mashpanchi chay paktuta allita rurananchikuna tiyan. Mana ni pi michawanchimansapachu ama chay paktuta rurananchikunapa. Mana ni pi willawanchimansapachu chay paktuta mirachinanchikunapa nima chikan layata rurananchikunapa.

¹⁶ Mash uyariwaychi. Suk paktuta rurananchikunashina ñawpa tiempu Tata Diospish awilunchikuna Abrahamta willarkan yanapananta. Willarkan miraknirayku tukuy runakunata yanapanankunapa. Mana willarkanchu aypa mirakninkunarayku tukuy runakunata yanapanankunapa. Tata Dios Abrahamta entiendichiykarkan paypa miraknin Jesukristurayku tukuy runakunata yanapanankunapa.

¹⁷ Kaytami willaykichi. Tata Dios Abrahamwan suk paktuta rurarkan. Chay killkadu paktuta rurashkanmanta chusku pachak kimsa chunka wata washan Moiesta kamachikunankunata kurkan. Chashna kamachikunankunata kushpa manami chay paktuta chikan layatachu rurarkan. Manami ni pita willarkanchu Abrahamwan rurashkan paku mana alli kananta. ¹⁸ Tata Dioska kikin munashpa Abrahamta willarkan yanapananta. Manami willarkanchu kamachikunankunata kasushpa kawsashkanrayku yanapananta. Tata Dioska kikin munashpa iden Abrahamtashina ñukanchikunatapish yanapawanchisapa. Moisespa kamachikunankunata kasushkanchikunarayku Tata Dios yanapawashpanchikunaka manana kikin munashpanachu yanapawanchimansapa.

¹⁹ Chashna Tata Dios willashkanraykulla Abrahamta yanapashpa ¿imapati Moiesta kamachikunankunata kurkan? Kamachikunankunata kurkan tukuy runakunata yachachinankunapa mana Tata Diosta kasuk runakuna kanankunata. Abrahampa willashkan miraknin

Jesukristu shamenankaman chay kamachikunankunata kurkan. Tata Dioska angelinkunata willarkansapa kamachikunankunata Moisesta kunankunapa. Chaymanta Moiseska angelkunamanta chaskishpa runakunata kurkansapa. ²⁰ Chaykamanka Tata Dios Abrahamta yanapananta willashpa mana angelkunata nima suk runata willarkanchu Abrahamta willanampa. Tata Dioska uya uya Abrahamta willarkan yanapananta.

Moisespa kamachikunankuna entiendichiwanchisapa Jesukristullata kreyinanchikunapa.

²¹ Ichará kankuna yuyaykankichi Tata Dios kamachikunankunata kushpa yachachiwaykananchikunata Abrahamta willashkan manana alli kanantana. Manami chaytachu Tata Dioska yachachiwaykanchisapa. Ñukanchikuna tukuy kamachikunankunata mana kasuya atipanchisapachu. Tukuy chaykunata kasushpa atipashpanchikunaka kikinchikunalla uchanchikunamanta salvanakuya atipanchimansapa. ²² Tata Dios rimanapi willawananchikunashina mana atipanchisapachu kikinchikunalla salvanakuya. Chayrayku Jesukristu salvawananchikunata kreyiptinchikuna Tata Dios salvawanchisapa. ²³ Manara Jesukristu shamuptinra Tata Diospa kamachikunankuna tukuy runakunata yachachirkansapa mana alli rurak kanankunata. Chaymanta Jesukristu shamuptinra Tata Dios yachachiwanchisapa payllata kreyishpa kawsananchikunapa.

²⁴ Moisespa kamachikunankuna wambrakunata yachachikshina Jesukristuman pushawanchisapa. Chaymanta Jesukristu shamuptinra payta kreyiptinchikuna Tata Dios uchanchikunamanta perdonawanchisapa. ²⁵ Kunanka Jesukristullata kreyiptinchikuna Moisespa kamachikunankuna manana yachachiwanchisapanachu. ²⁶ Kunanka Jesukristullata kreyishpanchikuna Tata Diospa wambrankunana kanchisapa.

²⁷ Bawtisakushpanchikuna Jesukristuwan tantalla kawsanchisapa. Mushuk llachapa churakudushina kanchisapa Jesukristu kawsashkanshina kawsananchikunapa. ²⁸ Paywan kuyanakushpa tantalla kawsaptinchikuna Tata Dioska judiyukunata mana judiyukunata rantidu mana rantidu runakunata ullukunata warmikunata tukuyllata kuyawanchisapa. ²⁹ Jesukristuta kreyishkanchikunarayku Abrahampa miraknirshina kanchisapa. Tata Dios Abrahamta yanapashkanshina ñukanchikunatapish yanapawashunchisapa.

4

Pabluka suk ejempluta yachachikun.

¹ Kunan suk ejempluta parlachiykichi. Suk runa wañuptin tukuy tiyapunan wambranpa kiparin. Wambran taksha kashpaka manara wasinpi atipanrachu kamachikuya. Wiñanankaman iden wiwachushina kawsan. ² Chay wambra taksha kashpa tatan willashkan tiempukaman tatan sakishkankunata kuydak runata yachachik runata kasunan tiyan.

³ Ñawpa tiempu ñukanchikunapish manara Jesukristuta kreyishpara chay taksha wiwachu wambrashina karkanchisapa. Chay wiwachu yachachikninkunata kasushpa kawsashkanshina ñukanchikunapish runakunapa amañanankunallata rurashpa kawsarkanchisapa. ⁴ Chaymanta Tata Dios munashkan tiempu chayamuptin chaylla wambran Jesukristuta kachamuptin suk warmimanta nasirkan. Jesukristu judiyu runa kashpa Moisespa kamachikunankunata allita kasushpa kawsarkan. ⁵ Jesukristu

salvawashkanchisapa Tata Diospa wambrankuna kananchikunapa amana Moisespa kamachikunankunatana kasunanchikunapa. ⁶ Chaymanta Tata Diospa wambrankuna kaptinchikuna paypa wambrarpa Espiritu kachamurkan ūukanchikunapi kawsanarpa. Payka yachachiwañchisapa Tata Diosta willaya: “Kanmi tatayni kanki.” ⁷ Tata Diospa wambrankuna kashpanchikuna manana rantidu wiwachushinanachu kanchisapa. Paypa wambrankuna kashpanchikuna tukuy paypa tiyapunan ūukanchikunapa.

Pabluka llakin Galasiapi wawkinkuna manana paypa yachachikunanta kreyishpana kawsaptinkuna.

⁸ Ñawpa tiempu kankuna manara Tata Diosta riksishpaykichira ruradu dioskunata kasushpa kawsarkankichi. ⁹ Kunanka Tata Diosta riksiptinchi paypish riksishunkichi. Chashna Tata Dios riksishuptikichi ¿imapatí munankichi runakunapa amañanankunallata rurashpa kawsayta? ¹⁰ Watan watan killan killan aypa fiestakunata rurashpaykichi yuyankichi Tata Diosta kushichiyyakanaykichita. ¹¹ Moisespa kamachikunankunata kasushpa kawsaptikichi llakishpa yuyani yankamanta sukaman yachachishkaynita.

¹² Wawkinikuna, paninikuna, kankuna ñawpa sukaman kuyawash-paykichi yanapawarkankichi. Chayrayku rogaykichi ūukashina amana Moisespa kamachikunankunata kasushpa kawsanaykichipa. ¹³ Allita yachankichi unkudu kashkaynirayku kallarishekaynita Jesukristu salvawananchikunata yachachiynikichita. ¹⁴ Unkudu kaykaptinipish munawarkankichilla. Suk angeltashina kikin Jesukristutashina uyariwashpa mana washanchawashpa chaskiwarkankichi. ¹⁵ Chay tiempu sukaman kuyawashpa yanapawanayashpaykichi ñawikichita kuwayta atipashpaykichika kuwankichiman karkan. ¿Imapatí kasuwashkaykichimanta kunan manana kuyawaykankichina? ¹⁶ Allita kankunata yachachiptini ¿imapatí kunanka yuyankichi chikninaynita?

¹⁷ Chay mana alli yachachikukkuna kuyashuknikichishina tukunsapa amana ūukata kasuwashpana kawsanaykichipa. Munansapa paykunallata sukaman kasunaykichipa. ¹⁸ Alli kanman chay runakuna deverasta kuyashunaykichipa. Mana allichu yachachishunaykichipa ama ūukata kuyawanaykichipa. ūuka kankunawan kaptini mana kankunawan kaptinipish kuyawanaykichi tiyan.

¹⁹ Munanayni wambraynikuna, sukaman llakini yachachikunaynita manana kasushpa kawsaptikichina. Iden wawayanayak warmishina kankunaryku sukaman llakishpa sufriykan. Llakishpaynipish katisha yachachiynikichillapi Jesukristullata alita tukuy shunku kuyashpa pay kawsashkanshina kawsanaykichikaman.

²⁰ Sukaman munayman kankunawan kayta allita yachachinaynipasapa. Kankunamanta karupi kashpayni mana yachanichu imashnamí yanapaykichiman nishpa.

Pabluk suj ejempluta parlachikun.

²¹ Mash uyariwaychi. Kankuna Moisespa kamachikunankunata kasushpa kawsanayashpaykichi ¿manachu yachankichi imatami Moiseska kil-karkan? ²² Chay killkadunpi riman: Abrahampa tiyapurkan ishkay wambrankuna. Suk karkan rantidu warmi Agarpa wawan. Suk karkan kikin warmin Sarapa wawan. Warmin Saraka mana rantiduchu karkan. ²³ Chay rantidu warmi Agarpa wawan nasirkaran tukuy wambrakuna nasi-nashinalla. Chaymanta Tata Dioska Abrahamta willarkan warmin Sara

vieja kaykashpapish wawayananta. Tata Dios willashkanshina Sara wawayarkan.

²⁴ Chay ishkay warmikuna yuyachiwanchisapa Tata Dios ishkay laya pak-tuta rurashpa yanapawananchikunata. Suk paktuta rurarkan Sinai urkupi. Chay Sinai urkupi ruradu paktu yuyachiwanchisapa Abrahampa rantidu warmin Agarta. Sinai urkupi Tata Dios kamachikunankunata Moisesta kurkan. Runakuna tukuy kamachikunankunata mana kasuptinkuna Tata Dioska kastigankasapa. Chayrayku tukuy Moisespa kamachikunankunata kasunayak runakuna rantidu runakunashinami kawsansapa.

²⁵ Chay warmi Agarka yuyachiwanchisapa Arabia partipi Sinai urkuta. Chay Sinai urkuka yuyachiwanchisapa llakta Jerusalenta. Chay llaktapi kunankaman judiyu runakuna Moisespa kamachikunankunata kasushpa rantidu runakunashina kawsansapa.

²⁶ Chaymanta ūukanchikuna Tata Diospa wambrankuna kashpanchikuna manana rantidu runakunashinanachu kawsanchisapa. Sielipi mushuk Jerusalen llaktaman rishunchisapa Tata Dioswan kawsananchikunapa.

²⁷ Tata Dios killkadunpi mana wawayak warmita willarkan:
“Kan mana niman suk wawayuk warmi kashpaykipish kushikuylla.
Mana wawayay nanaya mallishpaykipish kushikushpayki kapariy.
Kusayki sakishushka kaptinpish chay kusayuk warmimanta ashwan aypa miraknikikuna tiyanka.”

²⁸ Wawkinikuna, paninikuna, Tata Dios Abrahamta aypa mirakninkuna tiyananpa willashkanrayku ūukanchikuna iden Sarapa wawan Isakshina kanchisapa.

²⁹ Tata Dios yanapaptin Saraka wawan Isakta wawayarkan. Chaymanta Agarpa wawan Ismael Sarapa wawan Isakta chiknirkan. Kunanpish Moisepsa kamachikunankunata kasuk runakuna ūukanchikunatapish chikniwan-chisapa. ³⁰ Tata Diospa rimananka kashna willawanchisapa: Tata Dios Abrahamta willarkan: “Chay rantidu warmikita wawantinta karkuy ama Sarapa wawanwan tiyapushuknikita patumanakunanza.”

³¹ Wawkinikuna, paninikuna, chashna Tata Dios rimaptin yachanchisapa Jesukristullata kreyishpa kawsashpanchikuna Sarapa wawanshina Tata Diospa wambrankuna kananchikunata. Mana Agarpa wawanshinachu kanchisapa.

5

Pablu yachachikun Jesukristuta allita kreyishpa kawsananchikunapa.

¹ ūukanchikuna Jesukristuta kreyiptinchikuna payka yanapawanchisapa amana kikinchikunallapa munananchikunata rurashpa kawsananchikunapana. Chayrayku amana rantidu runakunashina Moisespa kamachikunankunata kasushpa kawsaychinachu.

² Mash uyariwaychi. ūuka Pablu allita willaykaykichi ama seña-lachinakuya munanaykichipa. Chashna seña-lachinakushpaykichika yankapa Jesukristuta kreyishkankichi.

³ Kashkan willaykichi. Kankuna seña-lachinakushpaykichika tukuy Moisespa kamachikunankunata kasushpalla kawsanaykichi tiyan. ⁴ Kankuna Moisepsa kamachikunankunata kasushpa kawsashpaykichi rimankichi chayta kasushkaykichirayku Tata Dios perdonashunaykichita. Manana Jesukristuta kreyishpanachu kawsaykankichi. Manana munankichinachu Tata Dios kuyashushpaykichi salvashunaykichita.

⁵ ūukanchikuna Tata Diospa Espiritunwan kawsashpanchikuna Jesukristuta kreyishpa kawsashpanchikuna yachanchisapa Tata Dios

uchanchikunamanta perdonawananchikunata. ⁶ Jesukristuwan kuyanakushpa kawsaptinchikuna mana nimananchu señaladu mana señaladu kaptinchikunapish. Jesukristullata kreyishpa kawsananchikuna tiyan. Payllata kreyishpanchikuna sukwana sukwana kuyanakushpa kawsashunchisapa.

⁷ Ñawpaka kankuna Jesukristuta allita kasushpa kawsaykashkankichi. Ñimapati kunanka chay llullachishuknikichi runakunata kreyishpaykichi manana alli yachachikunaynitaka kasunkichina? ⁸ Chay llullachishuknikichi runakunata mana kayashuknikichi Tata Diospa rimanantachu yachachishunkichi. ⁹ Chay runakunata kasuptikichi tipimanta tipimanta ashwanta llullachishunkichi. ¹⁰ Ñukaka yachani Tata Dios yanapashunaykichita kashkan Jesukristuta kreyishpa kawsanaykichipa. Pipish kaptin Tata Dioska chay llullachishuknikichi runakunata kastigankasapa.

¹¹ Wawkinikuna, paninikuna, chay runakunaka llullachishushpaykichi willashunkichi ñuka yachachikunaynita señaladu kaptinchikunara Tata Dios perdonawananchikunata. Manami chashnachu yachachikuni. Chashna yachachikuptinika chay runakunaka manana sufrichiwanmansapanachu. Jesukristu kruspi wañushkanrayku Tata Dios perdonawananchikunata yachachikuni. Chayrayku chikniwaykansapa. ¹² Ñukaka munayman chay llullachishuknikichi runakuna kapachinakunankunapa.

¹³ Wawkinikuna, paninikuna, Tata Dios uchanchikunamanta perdonawanchisapa. Chayrayku amana kikikichipa munanaykichikunallata rurashpanachu kawsaychi. Sukwan sukwana yanapanakushpa kuyanakushpa kawsaychi. ¹⁴ Tata Dios killkadunpi riman: “Kankuna kikikichilla kuyanakunaykichishina runamasikichita kuyashpa kawsaychi.” Chashna runamasikichita kuyashpa kawsashpaykichi tukuy Tata Dios kamachikunankunata kasuykankichi. ¹⁵ Chikninakushpa piñanakushpa kawsashpaykichika kikikichilla wakllichinakunkichi.

Allita Tata Diospa Espiritunta kasushpa kawsananchikuna tiyan.

¹⁶ Chayrayku wawkinikuna, paninikuna, willaykichi: Tata Diospa Espiritunta allita kasushpa kawsaychi. Amana kikikichillapa munanaykichita rurashpanachu kawsaychi. ¹⁷ Kikinchikunapa munananchikunata rurashpa kawsashpanchikunaka mana atipanchisapachu Tata Diospa Espiritunta kasushpa kawsayta. Allita rurayta munashpanchikunapish mana atipanchisapachu. Chaymanta Tata Diospa Espiritunta kasushpa kawsashpanchikunaka manana kikinchikunapa munananchikunata rurashpanachu kawsanchisapa. Tata Diospa Espiritun yanapawaptinchikunara atipanchisapa allita rurayta. ¹⁸ Tata Diospa Espiritun yachachiwaptinchikunaka Tata Diosllata kasushpa kawsanchisapa. Manana Moisespa kamachikunankunata kasushpanachu kawsanchisapa.

¹⁹ Chaymanta mana Tata Diosta kasunayak runakuna kikinkunapa munanankunallata rurashpa chikan warmiwan uchallikunsapa. Sukaman munansapa millanapa laya mana allikunallata rurashpa kawsayta. ²⁰ Ruradu dioskunata kuyansapa. Ñakakunsapa. Chikninakushpa ayninakushpa makanakushpa kawsansapa. Suk runakunapa imankuna tiyaptin paykunapish munansapa tiyapunankunapa. Kunanilla rabyansapa. Kikinkunalla alli kananta yuyashpa ashunakunsapa. Paykunapuralla yuyanakunsapa alli yuyayuk kanankunata. ²¹ Maykanpa tiyapunanta kichunayansapa. Machashpa kawsansapa. Mikuyllata yuyashpa kawsansapa. Tukuy chay

layakunallata rurashpa kawsansapa. Ñawpata willashkaykichi. Kunan kashkan willaykichi. Mana allita rurashpa kawsak runakuna mana atipankasapachu Tata Diospa mandunpi kawsayta.

²² Chaymanta Tata Diospa Espiritunta yanapawaptinchikuna atipanchisapa sukwan sukwan kuyanákushpá kushíkushpá mana turbakush-palla mana piñakushpa kawsayta. Atipanchisapa rimashkanchikunata rurayta. ²³ Atipanchisapa mana kreyinakushpa mana kikinchikunapa munananchikunata rurashpa kawsayta. Chashna allita rurashpa kawsaptinchikuna manami ni pi rimankachu mana allita rurashpa kawsananchikunata.

²⁴ Jesukristu mana kikinpa munananllata rurashpa kruspi chakatadu wañurkan. Ñukanchikunapish payshina manana kikinchikunapa munananchikunata rurashpanachu kawsashunchisapa. Manana munanchisapanachu mana allikunata rurashpa kawsayta. ²⁵ Kunanka Tata Diospa Espiritun yanapawaptinchikuna akuychi yachachiwananchikunata ashwanta kasushpa kawsaypachi. ²⁶ Ama kikinchikunalla kreyinakush-pachu kawsaypachi. Ama sukpa supka tiyapunanta munaypachichu. Ama sukwan sukwan chikninakushpa nima ayninakushpa kawsaypachichu.

6

Sukwan sukwan yanapananakushpa kawsaypachi.

¹ Wawkinikuna, paninikuna, ichara suk wawkinchi suk paninchi mana allita ruranman. Kankuna allita Jesukristuta kreyishpaykichi chay mana allita rurak wawkinchita paninchita yanapaychi amana mana allita ruranan-pana. Kuyashpalla allillapi yanapaychi. Allita yuyaychi ichara suknin diya kankunapish munankichiman uchallikuyta. ² Wawkinchi paninchi mana allita ruraptinkuna kankuna yanapashpa allillapi willashpa animuchiyichi allita rurashpa kawsanankunapa. Chashna animuchishpaykichi Jesukris-tupa munananta ruraykankichi.

³ Kankuna mana alli yachak Kashpa sukaman alli yachak kanayki-chita yuyanakushpaykichika kikikichilla llullachinakuykankichi. ⁴ Tukuy runakuna kikinchikuna yuyanakunanchikuna tiyan allitachu manachu rurashkanchisapa nishpa. Allita rurashpanchikunara kushikushunchisapa. Chayrayku ama ni pita yuyaypachichu. ⁵ Kikinchikunapa mana alli rurashkanchikunata yuyananchikuna tiyan.

⁶ Jesukristupa rimananta yachachiwakninchikunata tukuy laya tiyawakninchikunawan yanapananchikuna tiyan.

⁷ Ama kikikichilla llullachinakuychichu. Mana ni pi Tata Diostaka atipanmanchu llullachiyta. Tata Dios tukuy mana alli rurak runakunata kastigankasapa. Suk muruta tarpushpanchi chay laya murullata pallanchi.

⁸ Mana alli murukunata tarpushpanchikuna mana alli wayukunallata pallanchisapa. Mana allita rurashpa kawsaptinchikuna Tata Dios kasti-gawashunchisapa. Chaymanta alli murukunata tarpushpanchikuna alli wayukunata pallashunchisapa. Tata Diospa Espiritunta kasushpa kawsash-panchikuna mana tukuyniyukta kushikushpa Tata Dioswan kawsashun-chisapa.

⁹ Chayrayku ama shaykuypachichu allita rurashpa kawsayta. Suk tiempukaman Tata Dioska sukaman allita kushichiwashunchisapa mana shaykuptinchikuna allita rurayta. ¹⁰ Chayrayku atipashpanchikuna tukuy runamasinchikunata tiyawakninchikunawan yanapaypachi. Jesukristuta kreyikmasinchikunata ashwan allita yanapaypachi.

Pablu wawkinkunata rimachishpa kay kartata tukuchan.

¹¹ Mash kawaychi. Kikini makiniwan killkashpa atun letrakunata rurashpa kay kartata tukuchaykani.

¹² Chay señalachinakunaykichipa munak runakuna munansapa tukuy runakuna paykunallata kuyanankunapa. Mana munansapachu Jesukristu kruspi wañushkanta yachachikuptinkuna judiyumasinkuna chiknishpa padesichinankunapa. ¹³ Munansapa señaladu kanaykichipa tukuy runakuna yachanankunapa paykuna yachachikushkankunarayku señaladu kanaykichita. Moisepsa kamachikunankunata yachachishushpaykicipish kikinkuna mana tukuytachu kasunsapa.

¹⁴ Ñukaka mana paykunashinachu alabanakunayani. Jesukristu kruspi wañushkanrayku Tata Dios perdonawananchikunallata yachachikuni. Chayllata yachachikushpayni kay allpapi kawsak runakunapa yachachikunanka-nata manana munaninachu kasuya. Chashna kaptin chay alabanakuk runakuna ñukapa yachachikunaynita mana munansapachu kasuya.

¹⁵ Tata Dios perdonawaptinchikuna mushuk layata rurashpa kawsan-chisapa. Mana nimananchu señaladu mana señaladu kaptinchikuna.

¹⁶ Kankuna yachachikunaynita allita kasushpa kawsashpaykichi Tata Diosspa wambrankuna kankichi. Chayrayku Tata Dios kuyashushpaykichi kushichishunkichi.

¹⁷ Jesukristuta kreyishpa kawsashkaynirayku chikniwak runakuna sukaman makawashka kaptinkuna kuerpuynipi aypa igakuna tiyan. Chaykunata kawashpa tukuy runakuna yachansapa Jesukristuta kreyishpa kawsanaynita. Chayrayku mana munanichu ni pi yachachikushkaynirayku washanchawanankunata.

¹⁸ Wawkinikuna, paninikuna, munani Jesukristu tukuy kankunata suka-man kuyashushpaykichi yanapashunaykichipa.

Ñuka Pablu chayllata killkashkaykichi.

EFESIOS PABLUEFESO LLAKTAPI KREYIKUKMASINKUNATA KILLKARKAN

Pablu Efeso llaktapi wawkinkunata paninkunata rimachinsapa.

¹ Munanayni wawkinikuna, paninikuna, Tata Dios munaptin Jesukristu ñuka Pabluta kachamuwashka rimananta yachachikunaynipa. Kankunata Efeso llaktapi Jesukristuta allita kreyishpa kawsakkunata kay kartata killkaykichi. ² Tatanchi Diosta Señorninchí Jesukristuta roygani kuyashushpaykichi kushichishunaykipa.

Tata Dios sukaman allimaya yanapawanchisapa.

³ Señorninchí Jesukristupa Tatan Diosta akuychi alabaypachi. Jesukristuwana tantalla kawsaptinchikuna sielipi kawsak Tata Dios kushichiwashpanchikuna kuyawashpanchikuna tukuy layapi sukaman yanapawanchisapa.

⁴ Tata Dios manara kay allpata rurashpara ñukanchikunata kuyawashpanchikuna yuyarkan Jesukristuta kachamunanta paywan tantalla kawsananchikunapa. Akllawarkanchisapa payllata kasushpa allillata rurashpa kawsananchikunapa. ⁵ Tata Dios kuyawashpanchikuna sukaman munarkan paypa wambrankuna kananchikunapa. Chashna kuyawashpanchikuna wambran Jesukristuta kachamurkan wañunanza Tata Dios yuyashkanshina wambrankuna kananchikunapa. ⁶ Tata Dios sukaman kuyawashpanchikuna kuyadu wambran Jesukristuta kachamurkan yanapawananchikunapa. Chayrayku akuychi payta sukaman alabaypachi.

⁷ Tata Dios sukaman kuyawashpanchikuna wambran Jesukristu yawarninta ichashkanrayku uchanchikunamanta perdonawashkanchisapa amana kastigawananchikunapa. ⁸ Tata Dios tukuy layata yachak kashpa kuyawananchikunata entiendichiwashkanchisapa.

⁹ Ñawpa tiempu Tata Dios manara ni pita yuyananta entiendichirkanrachu. Kunanka ñami yachachiwashkanchisapano wambran Jesukristu salvawakninchikuna kananta. ¹⁰ Chaymanta Tata Dios munashkan tiempu chayamuptin tukuy sielipi kawsakkunata tukuy allpapi kawsakkunata tan-tanachiwashchunyisapa Jesukristu tukuy layapi kamachikuk kananpa.

¹¹ Ñawpamantapacha yuyashkanshina Tata Dioska akllawarkanchisapa wambran Jesukristuwana tantalla kawsananchikunapa. Kikinpa munananta rurashpa tukuy laya willawashkanchikunata kuwashchunyisapa. ¹² Tata Dios munananta rurarkan ñukaykuna ñawpamanta Jesukristuta kreyikakashpaynikuna payta alabanaynikunapa yanapawashkankunaryaku.

¹³ Kankunapish Tata Diospa alli yachachikunanta uyarishpaykichi kreyirkankichi Jesukristu salvakuknikichi kananta. Chayta kreyishpaykichi paywan tantalla kawsankichi. Kankunapi Tata Dios kachamunanta rimashkan Espiritunka kawsan yachachishunaykipa Tata Diospa wambrankuna kanaykichita. ¹⁴ Tata Dios Espiritunta kuwashkanchisapa allita yachananchikunapa tukuy willawashkanchikunata kuwananchikunata. Paypa kawsanan sielipi chayashpanchikunara tukuy willawashkanchikunata chaskishunyisapa. Chayta yachashpanchikuna akuychi payta sukaman alabaypachi sukaman allima kaptin.

*Pablu Tata Diosta royan wawinkuna paninkuna entiendinankunapa
Tata Dios tukuy laya atipak kananta.*

15 Ñukaka yachani kankuna Señorninch Jesukristuta kreyishpa tukuy kreyikmasinchikunata kuyashpa kawsanaykichita. **16** Chayrayku Tata Diosta sukanan agradesishpa kankunapa roygashpalla kawsani. **17** Señorninch Jesukristupa Tatan Diosta sukanan allima kaptin roygani allita yachachishunaykichipa. Chashna Tata Dios yachachishuptikichi entiendinkichi sukanan allima kananta ashwan allita payta riksinaykichipa.

18 Tata Diosta roygani yachachishunaykichipa sukanan allimata kayawashkanchikunata paywan tantalla kawsananchikunapa. Tata Diosta roygani yachanaýkichipa suknin diya kawsanan sielupi tukuy paypa wambrankunata sukanan allimata kushichiwananchikunata. **19** Tata Diosta roygani yachanaýkichipa sukanan layata atipak kashpa tukuy kreyikkunata sukanan yanapawananchikunata. Payka mana tukuyniyukta sukanan tukuy laya atipakmi.

20 Tata Dios tukuy laya atipak kashpa wambran Jesukristuta wañushkanmanta kawsachimurkan. Payta kawsachimushpa kawsanan sielupi alli ladunpi tiyachirkan. **21** Chaypi tiyachishpa payta willarkan mana tukuyniyukta tukuy patronkunata awtoridarkunata kamachikukkunata angelkunata supaykunata tukuy laya tiyakta kamachinanpa. **22** Tata Dios Jesukristuta tukuy layata kushpa willarkan payna tukuy layapi kamachikunanpa. Willarkan Jesukristu tukuy kreyikkunapa umanchikunashina kananpa payta allita kasunanchikunapa. **23** Jesukristu umanchikunashina kaptin paypa kuerpunshina kanchisapa. Payka ñukanchikunapi kawsan. Paylla rikchak layapi yanapawashpanchikuna kuydawanchisapa.

2

Tata Dios kuyawashpanchikuna salvawanchisapa.

1 Ñawpa tiempu kankuna mana allita rurashpa mana Jesukristuta kreyishpa kawsashpaykichi mana yachashkankichichu paywan tantalla kawsayta. **2** Jesukristuta mana kreyishpa kawsashpaykichi runakunallapa amañanankunata rurashpa kawsarkankichi. Kamachikuk supayta kasushpa kawsarkankichi. Chay supayka kay allpapi kamachikuk kashpa mana Tata Diosta kasunayk runakunata animuchinsapa mana allikunata ruranankunata.

3 Ñawpa tiempu mana alli rurak runakunashina ñukanchikunapish kawsarkanchisapa. Munananchikunallata rurashpa kawsarkanchisapa. Nasishkanchikunamantapacha tukuy mana alli yuyayninchikunallata rurashpa kawsarkanchisapa. Tata Dios tukuy mana alli rurak runakunashina ñukanchikunatapish kastigawanchimansapa karkan. **4** Chashna Tata Dios kastigawananchikuna kaptinpish sukanan kuyawashpanchikuna munarkan uchanchikunamanta perdonawayninchikunata. **5** Ñukanchikuna mana Tata Dioswan kawsayta yachaptinchikuna payka sukanan kuyawashpanchikuna uchanchikunamanta perdonawayninchikunata. Tata Dios Jesukristuta kawsachimushka kashpa ñukanchikunatapish yanapawanchisapa paywan tantalla kawsananchikunata.

6 Tata Dios suaman atipak kashpa Jesukristuta wañushkanmanta kawsachimurkan. Chashnashina ñukanchikunatapish kawsachiwashpanchikuna suaman atipachiwanchisapa Jesukristuwantantalla tukuy layapi kamachikunanchikunapa. **7** Tata Dios kamachikuyta atipachiwanchisapa shamunan tiempu tukuy kawsakkunata kawachinankunapa suaman kuyawananchikunata. Tukuy pita kawachinkasapa jesukristu wañushkanrayku salvawananchikunata.

8 Tata Dios kuyawashpanchikuna perdonawashkanchisapa Jesukristuta kreyiptinchikuna. Ñukanchikuna allita rurashpanchikunapish mana atipanchisapachu salvanakuya. Tata Dios kikin munashpa perdonawashkanchisapa. **9** Tata Dios mana perdonawashkanchisapachu allita rurashkanchikunaryku. Chayrayku mana ni pi atipanchisapachu alabanakuya. **10** Jesukristuta kreyishkanchikunaryku Tata Dios atipachiwanchisapa allita rurashpa kawsananchikunapa. Ñawpamantapacha manara Jesukristuta kreyiptinchikunara Tata Dios munarkan allita rurashpa kawsananchikunapa.

Jesukristu wañushkanrayku tukuy payta kreyikkuna suk familyalla kanchisapa.

11 Judiyumasinikuna yuyanakunsapa kuchuchinakushpa señaladu kashpankuna Tata Diospa wambrankuna kanankunata. Kankuna mana judiyu runakuna kaptikichi judiyu runakuna washanchashushpaykichi willashunkichi mana señaladu kaptikichi mana Tata Diospa wambrankuna kanaykicha.

12 Mash allita yuyaychi. Ñawpa tiempu kankuna manara Jesukristuta kreyishpara kawsarkankichi. Judiyu runakunawan chikninakushpa kawsarkankichi. Tata Dioska mana kankunawanchu paktuta rurarkan nima willashurkankichichu salvakuk shamunanta. Mana Tata Dioswanchu kawsarkankichi. Nima yacharkankichichu Tata Dios salvashunaykichita.

13 Chaymanta Jesukristu yawarninta ichashpa wañushkanrayku Tata Dios kankunata paywan tantanachishushkankichi. Mana Jesukristuta kreyishkaykichimanta kunanka ñami paywanna tantalla kawsaykankichi.

14 Jesukristu wañushkanrayku judiyu mana judiyu runakuna paywan kawsaptinchikuna Tata Dios yanapawanchisapa kushikuypurulla kawsananchikunapa. Kushikuypurulla kawsashpanchikuna suk familyalla kanchisapa. Manana chikninakushpanchikunachu kawsanchisapa.

15 Jesukristu wañushkanrayku Tata Dios salvawanchisapa. Mana Moisespa kamachikunankunata kasushkanchikunarykuchu salvawarkanchisapa. Jesukristu wañushkanrayku paywan tantalla kawsaptinchikuna ishkay familyamanta suk familyallata rurawashkanchisapa amana chikninakushpa kawsananchikunapa. **16** Jesukristu kruspi wañushpa chay ishkantin chikninakuk familyakunata atipachiwarkanchisapa Tata Dioswan allita kawsayta. Kunanka suk familyalla kashpanchikuna manana sukwankikashpanchikunachu kawsanchisapa.

17 Kay allpaman Jesukristu shamurkan judiyu runakunata mana judiyu runakunatapish yachachiwananchikunapa sukwankikashpanchikunapa kawsananchikunapa. **18** Jesukristu wañushkanrayku Tata Diospa Espiritun yanapawaptinchikuna judiyu mana judiyu runakunapish atipanchisapa Tata Diosta kuyashpa kawsayta.

¹⁹ Chayrayku kankuna mana judiyu runakuna Jesukristuta kreyishpaykichi judiyukunawan tantalla Tata Diospa wambrankuna kankichi. Jesukristuta kreyik runakunawan manana chikannachu kankichi. Tukuy ūukanchikuna suk familyallana kanchisapa.

²⁰ Tukuy ūukanchikuna rumikunamanta ruradu Tata Diospa wasinshina kanchisapa. Tata Diospa ūawpa rimananta yachachikuk runakunaka Jesukristupa disipulunkunaka chay wasi kimik rumikunashinami. Jesukristuka tukuy kimik rumikunamanta ashwan sinchi rumishinami.

²¹ Jesukristuwan tantalla kawsaptinchikuna Tata Dios rurawaykanchisapa paypa wasinshina kananchikunapa. Tantanachiwaykanchisapa Jesukristullawan tantalla allita rurashpa kawsananchikunapa. ²² Jesukristuwan tantalla kawsashpanchikuna sukwān sukwān kuyanakushpa kawsanchisapa. Tata Diospa Espiritu ūukanchikunapi kawsaptin Tata Diospa kawsanan wasinshina kanchisapa.

3

Tata Dios Pabluta kacharkan mana judiyu runakunata yachachinankunapa.

¹ Jesukristuta allita sirvishpa ūuka yachachikuni judiyu mana judiyu runakuna suk familyalla kananchikunata. Kankuna mana judiyu runakunata chayta yachachikushkaynirayku karselpi kani.

² Yachankichina Tata Dios sukaman kuyashushpaykichi kachamuwashkanta kankuna mana judiyu runakunata yachachinaynipasapa.

³ Tata Dios ūawpa tiempu manara yachachikushkanta kunanka ūukata yachachiwashka. Chay yachachiwashkanta tipillata killkarkaykichi. ⁴ Chay killkashkaynita leyishpaykichi yachankichi Jesukristu salvawananchikunata allita entiendinaynita. ⁵ Ūawpa tiempu Tata Dioska manara ni pita alitarachu yuyayninta yachachirkán. Kunanka Tata Diospa Espiritunka chay alli yuyayninta tukuy Jesukristupa disipulunkunata tukuy alli yachachikuk runakunata ūamī yachachiwashkasapana.

⁶ Kunanka Tata Dios yachachiwashkanchisapa kankuna mana judiyu runakuna kashpaykichiipish Jesukristuta kreyishpaykichi Tata Dioswan tantalla kawsaykanaykichita. Tata Diospa wambrankuna kashpaykichi Jesukristuta kreyik judiyu runakunawan suk familyalla kankichi. Chayrayku Tata Dios judiyu runakuna yanapawanankunata willawashkantashina kankunatapish willashunkichi yanapashunaykichita.

⁷ Tata Dios tukuy layata atipak kashpa ūukata sukaman kuyawashpa yanapawarkan chay alli yachachikunanta yachachikunaynipa.

⁸ Tukuy Jesukristuta kreyikmasinikunamanta ūuka yuyanakuni ashwan mana atipakshina kanaynita. Mana atipak kaykaptinipish Tata Dioska kachamuwashka mana yachaypa laya sukaman allima yachachikunanta mana judiyu runakunata yachachinaynipasapa. ⁹ Tata Dios tukuy layata rurashkanmantapacha yuyarkan mana judiyu runakunatapish salvaya. Chashna yuyashpapish manara ni pita willarkanrachu chay sukaman alli yuyananta. Kunan tiempu ūukata kachamuwarkan chay yuyananta yachachikunaynipa.

¹⁰ Kunanka aypa judiyu runakuna aypa mana judiyu runakunapish tantalla Jesukristuta allita kreyishpa kawsaykanchisapa. Jesukristuta tantalla kreyiptinchikuna sielupi sinchi kamachikkunka sinchi awtoridarkuna kawawashpanchikuna yachankasapa Tata Dios sukaman tukuy layapi yachaysapa kananta.

¹¹ Manara nima tiyaptinra Tata Dioska yuyarkan Señorninchi Jesukristuta wañushkanmanta kawsachimunanta tukuy payta kreyik runakunata salvanankunapa. ¹² Jesukristu wañushpa salvawashkanchikunaryku payta kreyishpanchikuna atipanchisapa kushikushpa mana manchakushpa Tata Diosta orashpa kuyashpa kawsayta. ¹³ Chayrayku roygaykichi kankunata yachachishkaynirayku padesintipish mana shaykushpa Jesukristullata kreyishpa kawsanaykichipa. Kankunaryku padesinaynita yuyashpa ashwanta kushikushpa animuchinakuychi.

Pablu Tata Diosta royan tukuy kreyikmasinkuna entiendinankunapa Jesukristu sukaman kuyanankunata.

¹⁴ Kankuna ashwanta animuchinakunaykichipa Tatanchikuna Diospa ñawpakninpí kunkurikushpa roygani yanapashunaykichipa. ¹⁵ Paypa wambrankuna allpapi sielipi rimanchisapa Tatanchikuna kananta.

¹⁶ Tatanchi Dios sukaman yachaysapa sukaman kuyakuk kaptin roygani paypa Espiritu sukaman yanapashunaykichipa. Roygani sinchichishunaykichipa allita Tata Dioswan kawsanaykichipa.

¹⁷ Tata Diosta roygani yanapashunaykichipa mana shaykushpa ashwan allita Jesukristuta kreyishpa kawsanaykichipa. Chaypina sapichakuk kaspishina sinchi kashpaykichi ashwan ashwanta yachankichi Jesukristu sukaman kuyashunaykichita. ¹⁸ Chayta yachashpaykichi tukuy kreyikumasikichiwan entiendinkichi tukuy layapi tukuy tiempu tukuy maypi kaptikichi Jesukristu sukaman kuyashunaykichita.

¹⁹ Mana atipanchisapachu entiendiya Jesukristu sukaman kuyawananchikunata. Mana entiendiya atipashpanchikunapish Tata Diosta roygani ashwan ashwanta entiendichishunaykichipa ashwan allita Tata Dioswan kushikushpa kawsanaykichipa.

²⁰ Tata Dios sukaman kuyawashpanchikuna royananchikunamanta ashwan allita yanapawanchisapa. Sukaman yachaysapa kashpa atipan tukuy yuyayninchikunamanta ashwanta yanapawayninchikunata. Chayrayku akuychi payta alabaypachi. ²¹ Jesukristuta kreyik runakuna kashpanchikuna tukuy tiempu kushikushpa Tata Diosta mana tukuyniyukta alabananchikuna tiyan. Chashna kachun.

4

Tata Diospa Espiritu yanapawaptinchikuna sukwana sukwana kuyanakushpa kawsashunchisapa.

¹ Nuka kay karselpiwichkadu kani Jesukristu salvawananchikunata yachachikushkaynirayku. Karselpi kashpayni roygaykichi Tata Diospa aklladu kashpaykichi allita rurashpa kawsanaykichipa. ² Roygaykichi ama kikikichilla kreyinakushpa sukwana sukwana kuyanakushpa yanapanakushpa mana piñanakushpa kawsanaykichipa.

³ Tata Diospa Espiritu yanapashuptikichi munaychi tantalla kushikushpa yanapanakushpa kuyanakushpa kawsayta. ⁴ Chashna kuyanakushpa kawsashpanchikuna suk kuerpushinalla kanchisapa. Tata Diospa Espiritu rikchak layapi yanapawashpanchikunapish payka sukkallami. Chashnalla Tata Dioska tukuy ñukanchikunata akllawashkanchirayku shuyaykanchisapa paywan tantalla mana tukuyniyukta kawsananchikunata.

⁵ Señorninchi Jesukristuka tukuy layapi kamachikukmi. Payllata kreyishpa kawsanchisapa. Payllata kreyishpa bawtisakushkanchisapa. ⁶ Tata Dioska

sukllallami. Payllami Tatanchikuna. Paylla tukuy layapi allita kamachiwanchisapa. Yanapawanchisapa paypa munananta rurananchikunapa. Ñukanchikunapi kawsan.

⁷ Jesukristu kikin munashpa tukuy ñukanchikunata sukkunata suk layata sukkunata suk layata atipachiwanchisapa sukwaniyanapanakananchikunapa. ⁸ Tata Diospa killkadunpi rimananshina Jesukristu chiknik runakunata kallpachishpa sieluman kutirkan. Chayman kutishpa runakunata atipachirkansapa chikan layata chikan layata ruranankunapa.

⁹ Tata Diospa killkadunpi rimashpa Jesukristu sieluman kutishkanta ¿imatati willawanchisapa? Willawanchisapa Jesukristu kay allpaman shamushkanta sieluman kashkan kutinanpa. ¹⁰ Jesukristu shamushka kashpa Tata Diospa kawsanan sieluman kutirkan tukuy maypi kashpa tukuy layata kamachinanpa.

¹¹ Chashna tukuy layata kamachishpa suk ñukanchikunata kachamuwashkanchisapa tukuy maypi yachachikuk rinanchikunapa. Sukkunata atipachiwanchisapa Tata Dios ruranayananta rimayta. Sukkunata atipachiwanchisapa tukuy mayta rishpa parlachikunanchikunapa Jesukristu salvawakninchikuna kananta. Sukkunata atipachiwanchisapa Jesukristuta kreyikmasinchikunata kuydashpa yachachinanchikunapa ashwan allita rurashpa kawsanankunapa.

¹² Jesukristu sukta sukta atipachiwanchisapa ashwan allita payta sirvinanchikunapa. Yanapawanchisapa sukwaniyanapanakanushpanchikuna Jesukristuta ashwan allita kreyishpa kawsananchikunapa.

¹³ Akuychi animuchinakuypachi tantalla ashwan allita Jesukristuta kreyishpa kawsananchikunapa. Chaypirami Tata Diospa wambran Jesukristuta ashwan allita riksishunchisapa. Sukwaniyanapanakanushpanchikuna Jesukristu kawsashkanshina allita rurashpa kawsashunchisapa.

¹⁴ Chashna Jesukristu kawsashkanshina kawsashpanchikuna manana wambrakunashinachu tukuy laya llullata kreyishunchisapa. Sukwaniyanapanakanushpanchikuna mana entiendishpa mana kuskatara yuyashpa llullachikuk runakunata kunanlla kreyin. Ama munaypachichu llullakuk mana kuska yachachikuk runakunata kreyiyta.

¹⁵ Jesukristu kamachiwakninchikuna kaptin ashwan ashwanta payllata kreyishpa kawsaypachi. Kuskata rimashpa sukwaniyanapanakanushpa kawsaypachi. ¹⁶ Jesukristuta allita kreyishpa sukwaniyanapanakanushpa kawsashpanchikuna ashwan allita kuyanakushpa kawsashunchisapa. Jesukristu sukta sukta yanapawashpanchikuna tantanachiwanchisapa sukwaniyanapanakanushpa kawsananchikunapa. Chaypirami ashwan ashwanta yachashunchisapa allita kuyanakushpa kawsayta.

Pablu yachachiwanchisapa Jesukristuta allita kreyishpa kawsananchikunapa.

¹⁷ Mana Jesukristuta kreyik runakuna kikinkunapa mana alli yuyayninkunallata yuyashpa kawsansapa. Jesukristu ñukata kachamuwashka kaptin willaykichi: Amana chay runakunashina kawsaychinachu. ¹⁸ Mana Jesukristuta kreyik runakuna sinchi shunku kashpangkuna mana Tata Dioswan tantallachu kawsansapa. Mana Tata Diospa rimananta entiendishpa tutapishina kawsansapa. ¹⁹ Sinchi shunku kashpangkuna mana pinkakushpa tukuy mana allikunata munashpa rurayta ashwan ashwanta rurashpalla kawsansapa.

²⁰ Señorninchi Jesukristuka manami chashna kawsananchikunapachu yachachiwashkanchisapa. ²¹ Payka kuskallata mana llullakushpa yachachikurkan. Ñuka yachani chay kuska yachachikushkanta allita kreyishpa kawsaykanaykichita. ²² Ñawpa tiempu kikikichillapa munanaykichita rurashpalla llullachinakushpa kawsarkankichi. Amana chay ñawpa rurashkaykichishina rurashpanachu kawsaychi. ²³ Kunanka allillata yuyashpa Tata Diosta kuyashpa kawsaychi.

²⁴ Tata Dios kikin munashpa rurawashkanchisapa payllata kasushpa kawsananchikunapa. Chayrayku paypa rimananta kasushpa allita rurashpa kawsaychi.

²⁵ Jesukristuta kreyishpa kawsashpanchikuna aypa kashpanchikunapish suk familyalla kanchisapa. Chayrayku tukuy piwan kuskallata rimashpa kawsaychi. Amana ni pita llullachiychinachu.

²⁶ Suk imapi piñanakushpaykichi kunanlla perdonanakuyuchi. Ama munaychihu piñakushpa chishyayta. ²⁷ Mana perdonanakushpa chishyashpanchikuna supaypa munananta ruraykanchisapa. Chayrayku ama munaychihu piñakushpa chishyayta.

²⁸ Ichará ñawpa suk kankuna suwa runa karkankichi. Suwakushka kashpaykichika kunanka amana kutin suwakuchinachu. Allita trabajaychi mana nimaykunakunata yanapanaykichi.

²⁹ Ama mana alli rimanakunata rimaychihu. Allillata rimashpa sukta suktu allita yachachishpa yanapashpa kawsaychi uyarishuk runakuna kushikunankunapa.

³⁰ Ama Tata Diospa Espiritunta llakita kuychihu mana allita rurashpa kawsashpaykichi. Jesukristu kashkan shamanun diyakaman Tata Diospa Espiritunka shunkunchikunapi selluchawanchisapa paypa wambrankuna kananchikunapa.

³¹ Ama piñakushpa nima makanakushpa nima ayninakushpa nima chikn-inakushpa nima yuyanakushpa kawsaychihu. Tukuy laya mana alli ruranakunata sakiychi. ³² Sükwan sukwani allita kuyanakushpa yanapanakushpa kawsaychi. Jesukristu wañushkanrayku Tata Dios uchanchikunamanta perdonawashkanchisapa. Chayrayku ñukanchikunapish sukwani sukwani perdonanakunanchikuna tiyan.

5

Pablu yachachiwanchisapa Tata Diospa wambrankuna kashpanchikuna imashnami kawsashunchisapa nishpa.

¹ Kankuna Tata Diospa kuyadu wambrankuna kashpaykichi pay kuyashu-naykichishina kuyanakushpa kawsaychi. ² Señorninchi Jesukristu sukaman kuyawashpanchikuna shamurkan wañuk Tata Dios uchanchikunamanta perdonawananchikunapa. Chashna wañushpa Tata Diosta kushichishpa rupachidu mishkilli asnakshina karkan. Ñukanchikunapish Jesukristu kuyawananchikunashina akuychi kuyanakushpa kawsaypachi Tata Diosta kushichinanchikunapa.

³ Tata Diospa wambrankuna kashpaykichi ama chikan warmiwan uchal-likuychihu. Ama uchallikushpa kawsaychihu. Ama kikikichillapa rikchak layata munaychihu tiyapushunaykichi. Allillata rurashpa kawsaychi ama ni pi rimanarpa mana allita rurashpa kawsanaykichita.

⁴ Ama pinkakunapa layata nima mana valekta rimaychichu. Ama mana allikunata rimaychichu sukkunata asichinaykichipa. Tata Dioska mana munanchu chay layakunata rimananchikunapa. Akuychi payta kushichishpa alabaypachí.

⁵ Allita yachankichi chikan warmiwan kawsak runakuna, chikan ulkuwan kawsak warmikuna, pinkakunapa layata rurak runakuna mana atipanankunata Tata Diospa Jesukristupa mandunpi kawsayta. Rikchak laya tiyananllata munak runakuna rúradu dioskunata kuyakshinami. Chayrayku paykunapish mana atipansapachu Tata Diospa Jesukristupa mandunpi kawsayta.

⁶ Runakuna mana alli rimanata rimashpa llullachishunayaptikichi ama kasuychichu. Tata Dioska tukuy mana alli rimak mana alli rurak runakunata sukanan kastigankasapa mana payta kasushkankunaryaku.

⁷ Chayrayku ama chay laya runakunashina kawsaychichu.

⁸ Ñawpa tiempu kankuna mana allita rurashpa tutapishina kawsarkankichi. Kunanka Jesukristuwan tantalla kawsashpaykichi luspishina kawsaykankichi. Chashna luspishina kawsashpaykichi allita rurashpa kawsaychi. ⁹ Luspishina kawsashpanchikuna kuyanakushpa allita rurashpa kuskata rimashpa kawsashunchisapa. ¹⁰ Chayrayku munaychi Señorninchi Jesukristuta kushichishpa kawsayta.

¹¹ Ama uchallikushpa tutapishina kawsak runakunashina kawsaychichu. Suk runa pakallalfa mana allita ruraptin willaychi mana allita ruraykananta. ¹² Pakallalla uchallikuk runakuna sukanan mana allita ruraptinkuna pinkakunchisapa mana alli rurashkankunata rimaya. ¹³ Chay mana alli rurak runakunata sinchita willananchikuna tiyan paykunapish luspishina kawsanankunapa. ¹⁴ Chashna luspishina kawsashpankuna manana tutapishinanachu kawsankasapa. Chayrayku rimanchisapa:

“Kanka mana allita rurashpa puñudushina kashpayki rikchamuyna.

Kanka mana allita rurashpa wañudushina kashpayki atarimuyna.

Chashna atarimuptiki Jesukristu luspishina kawsachishunki allita rurashpa kawsanaykipa.”

¹⁵ Chashna kaptin akuychi sukanan munaypachi allita rurashpa kawsayta. Alli yachak runakuna kaypachi. ¹⁶ Mana alli rurak runakuna ashwan ashwanta mana allikunata ruraykansapa. Chayrayku akuychi tukuy tiempu Tata Diospa munananllata rurashpa kawsaypachi. ¹⁷ Akuychi munaypachi Tata Diospa munananta yachayta allita rurashpa allita yuyaykushpa kawsananchikunapa.

¹⁸ Ama machaychichu. Machadu runakuna imatapish kaptin mana pinkakushpa ruransapa. Tata Diospa Espiritun kankunapi kawsaptin allita amayaychi payllata uyarinaykichipa.

¹⁹ Salmokunata himnokunata kantukunata kantashpa sukwan sukwan animuchinakuychi. Señorninchi Jesukristuta tukuy shunku kushichishpa alabaychi. ²⁰ Señorninchi Jesukristuwan tantalla kawsashpaykichi kushikushpaykichiwichipish sufrishpaykichiwichipish tukuy tiempu Tatanchi Diosta agradesiychi. ²¹ Jesukristuta kuyashpa kawsashpaykichi sukwan sukwan ksunakushpa kawsaychi.

Pablu kasaradukunata yachachinsapa imashnami kawsankasapa nishpa.

²² Kankuna kusayuk warmikuna, Señorninchi Jesukristuta ksunaykichishina kusaykichitapish allita kasuychi. ²³ Señorninchi Jesukristu tukuy payta kreyik runakunapa kamachiwakninchikuna

kashpa salvawashpanchikuna kuydawanchisapa. Jesukristu kuydawananchikunashina tukuy runa warminpa kamachikuknín kashpa payta kuydashpa kawsanán tiyan. ²⁴ Jesukristuta kreyik runakuna payta kasunanchikunashina tukuy kusayuk warmikuna kusanta kasunankuna tiyan.

²⁵ Jesukristu ñukanchikunata sukaman kuyawashpanchikuna wañurkan salvawananchikunapa. Jesukristu sukaman kuyawananchikunashina kankuna warmiyuk runakuna warmikichita kuyaychi.

²⁶ Jesukristu wañurkan Tata Dios uchanchikunamanta perdonawananchikunapa. Yachachiwanchisapa payllata kasushpa kawsananchikunapa. Chay alli yachachiwananchikunata kreyiptinchikuna uchanchikunamanta yakuwanshina mayllawanchisapa.

²⁷ Mayllawashpanchikuna Jesukristu yanapawaykanchisapa allita rurashpa Tata Diosllata kuyashpa kawsananchikunapa. Paypa novianshina kaptinchikuna prontanachiwaykanchisapa yurak chuya chuya llachapayuktashina mana uchayukta chaskiwananchikunapa.

²⁸ Ñukanchikuna kuerpunchikunata kuydananchikunashina tukuy warmiyuk runakuna warminta kuyashpa kuydanankuna tiyan. Suk runa warminta kuyashpa kikin kuyanakuykan. ²⁹ Mana ni pi kuerpunchita chikninchichu. Tukuy ñukanchikuna mikushpa kuydanakunchisapa sanulla kawsananchikunapa. Señorninchi Jesukristupish yachachiwashpanchikuna kuydawanchisapa paywan tantalla kawsananchikunapa. ³⁰ Ñukanchikuna Jesukristuta kreyik kashpanchikuna paypa kuerpunshiña kanchisapa.

³¹ Kallarinanmantapacha Tata Dios rimarkan: “Tukuy ullkukuna tatanta mamanta sakinankuna tiyan warminwan tantanakushpa kawsanarpa. Tukuy ullku warminwan tantanakushpa suklallahshina kawsankasapa.” ³² Chashna tukuy ullku warminwan suklallahshina kaptinkuna ñukanchikunapish Jesukristuwán suklallahshina kanchisapa. Chay yachachikunanka sukaman allima kashpapish mana entiendina layami. ³³ Mana entiendina laya kaptinpish tukuy warmiyuk runa kikin kuyanakukshina warminta kuyanan tiyan. Chaymanta tukuy kusayuk warmi kusanta kuyashpa kasunan tiyan.

6

Pablu yachachiwanchisapa wambrakuna tatankunata kasunankunapa.

¹ Kankuna wambrakuna, Jesukristuta kuyashpaykichi tataykichita mama ykichita kusuychi. Paykunata kasushpaykichi allita rurashpa kawsanichi.

² Tata Dios tukuy kamachikunankunata kuwashpanchikuna kay kamachikunankunata willawarkanchisapa kasuptinchikunaka yanapawananchikunata. Willawarkanchisapa: “Tataykichita mama ykichita kuyashpa kawsaychi. ³ Chaypirami aypa watakunata chay alli llaktaykichipi kushikushpa kawsankichi.”

⁴ Kankuna tatakuna, mamakuna, ama wambraykichita sukaman piñachichichu. Señorninchi Jesukristuta kasushpa kuyashpa paykunata kastigashpaykichi entiendichishpa yachachishpa kawsaychi.

Pablu yachachiwanchisapa rantidu runakuna patronnikunata kasunankunapa.

⁵ Chaymanta kankuna rantidu runakuna, patronnikichita manchashpa tukuy shunku munashpa mana llakita kushpa Jesukristuta kasunaykichishina allita kusuychi. ⁶ Ama patronnikichi kawashuptikichilla

munaychichu trabajayta. Patronnikichi kawashuptikichi mana kawashuptikichipish trabajaychilla. Jesukristuta sirvik kanaykichishina Tata Diospa munananta tukuy shunku rurashpa trabajaychi. ⁷ Patronnikichipa kushikushpa trabajaychi Señorninchi Jesukristupa trabajakshina mana runakunata agradakshinachu. ⁸ Allita yachanchisapa rantidu mana rantidu runakuna kaptinchikunapish tukuy alli rurashkanchikunamanta Tata Dios pagarawananchikunata.

⁹ Kankuna patronkuna, allita yuyaychi kankunapa trabajadornikichipish paktallapa sielipi kawsak Señorninchi Jesukristu patronnikichi kananta. Payka tukuy patrontapish tukuy rantidu runakunatapish paktallata kuyashunkichi. Chayrayku trabajadornikichita kuyashpalla mana jorachishpa allillapi kamachiychi.

Pablu yachachiwanchisapa imashnami supaykunata kallpachishunchisapa nishpa.

¹⁰ Chaymanta wawkinikuna, paninikuna, Señorninchi Jesukristu sukaman sinchita yanapawaptinchikuna akuychi sukaman sinchikuypachi supaykunata kallpachinanchikunapa.

¹¹ Soldadukuna makanakunankunapa fierrumanta ruradu sombreruwan kamisawan mudakushpa arkanakunsapa. Chashnashina Tata Dios sukaman yanapawaptinchikuna ñukanchikunapish payta kuyashpa kasushpa suk arkanatashina churanakunanchikuna tiyan ama supay llullachiwananchikunapa.

¹² Ñukanchikuna mana alli rurak sinchi kamachikuk supaykunawan makanakykanchisapa. Mana runamasinchikunawancha makanakykanchisapa. Chay sinchi kamachikuk supaykunata mana Kawaptinchikunapish tukuy maypi puriykansapa. Kay allpapi sukaman tutapishina purishpa mana allita rurashpa sukaman sinchita kamachikuykansapa.

¹³ Chayrayku akuychi yuyappachi Tata Dios arkanantashina kuwashpanchikuna allita amachawananchikunata. Chaypina chay sinchi supaykuna llullachiwanayaptinchikuna Tata Diospa soldadunkunashina atipashunchisapa sinchikuyta ama supaykunata kasunanchikunapa.

¹⁴ Chayrayku mana llullakushpa kuskallata rimashpa kawsaypachi. Chaypirami soldadupa chumbinta churakukshina kanchisapa sinchikushpa kawsananchikunapa. Chaymanta allillata rurashpa kawsashpanchikuna soldadupa fierrumanta ruradu kamisantashina churakunchisapa.

¹⁵ Chaymanta akuychi llaktan llaktanpi Jesukristu salvawananchikunata yachachikuypachi. Tukuy mayta yachachikuypi purishpanchikuna soldadu ushutakudushina kanchisapa.

¹⁶ Chaymanta supayka uchallichewanayashpanchikuna rupaykak wachiwanshina shitawanchisapa amana Jesukristuta kreyishpa kawsananchikunapa. Akuychi Jesukristuta kreyiypachi ama supay uchallichewananchikunapa. Chashna payta allita kreyishpa soldadupa fierrumanta ruradu amachanakunanwanshina arkanakunchisapa.

¹⁷ Chaymanta akuychi allita yuyaykuypachi Tata Dios salvawananchikunata. Chayta yuyaykushpanchikuna soldadupa uman fierrumanta ruradu arkanan churakukshina kanchisapa ama supay llullachiwananchikunapa. Chaymanta akuychi Tata Diospa rimananta allita yachakushpa kawsaypachi. Tata Diospa rimananta yachakushpanchikuna Espiritun sinchichiwanchisapa soldadupa machetinwanshina supayta manchachishpa kallpachinanchikunapa.

¹⁸ Tata Diospa Espiritun yanapawaptinchikuna tukuy tiempu akuychi oraypachi. Akuychi sinchikushpa mana shaykushpa Tata Diosta roygaypachi tukuy Jesukristuta kreyikmasinkunata yanapanankunapa.

¹⁹ Roygaykichi ñukapa oranaykichipa Tata Dios yanapawanana Je-sukristu salvawananchikunata mana manchakushpa allita yachachikunaynipa. Chashna allita yachachikuptini aypa runakuna yachankasapa Tata Dios munananta paykunatapish salvayta.

²⁰ Tata Dios ñukata kachamuwashka tukuy willawashkankunata kankunata yachachinaynipa. Willawashkanta yachachikushkaynirayku karselpi wickadu kani. Chayrayku Tata Diosta roygaychi mana nima manchakushpa yachachikunaynipa.

Pablu kay kartata tukuchashpa Jesukristuta kreyikmasinkunata rimachinsapa.

²¹ Munananchi wawkinchi Tikiko sukaman allita yanapawashka Tata Diospa rimananta yachachikuya. Kankunaman rishpa willashunkichi kay karselpi imatami ruraykani nishpa. ²² Chayrayku kankunaman kachani willashunaykichipa imashnami ñukaykuna kawsaykanisapa nishpa. Chayta willashushpaykichi animuchishunkichi ashwanta Jesukristuta kreyiyta.

²³ Tatanchi Diosta Señorninchi Jesukristuta roygaykani kankunata kushichishunaykichipa yanapashunaykichipa ashwanta payta kreyishpa kuyanakushpa kawsanaykichipa. ²⁴ Kankuna Señorninchi Jesukristuta mana shaykushpa kuyaptikichi Tata Diosta roygaykani sukaman yanapashunaykichipa.

Ñuka Pablu chayllata killkashkaykichi.

FILIPENSES PABLУ FILIPOS LLAKTAPI KREYIKUKMASINKUNATA KILLKARKAN

Pablу karselmanta Filipos llaktapi wawkinkunata paninkunata killkaransapa.

¹ Ñuka Pablу wawkini Timoteowan Jesukristuta sirvik kashpaynikuna kankuna Filipos llaktapi Jesukristuta kreyikkunata ansianuykichita diyakonoykichitapish killkaykaykichi. ² Tata Diosta Señorninchи Jesukristuta roygani yanapashunaykichipa Kushichishunaykichipa.

Pablу Tata Diosta roygarkan wawkinkunata paninkunata yanapanankunapa.

³ Kankunata yuyashkayni oras Tata Diosninita sukaman agradesini. ⁴ Tata Diosta roygashpayni sukaman kushikushpa roygani kankunata yanapashunaykichipa. ⁵ Kankuna Jesukristuta kreyishkaykichimantapacha kunankaman yanapawaykankichi Jesukristu salvawananchikunata yachachikuya.

⁶ Tata Dioska kallarirkan yanapashuynikichita paypa munananta rurashpa kawsanaykichipa. Ñukaka allita yachani Jesukristu shamuñankaman Tata Dios katinka yanapashuynikichillapi allita rurashpa kawsanaykichipa.

⁷ Kankunata sukaman kuyashpaynikuna yachani Tata Dios sukaman yanapashunaykichita. Tata Dios ñukatashina kankunatapish yanapashunaykichi Jesukristu salvawananchikunata yachachikuya. Karselpi kaptinipish awtoridarkunata yachachiptinipish kankuna sukaman yanapawashkankichi.

⁸ Jesukristu ñukanchikunata kuyawananchikunashina ñukapish kankunata kuyaykaykichi. Tata Dios yachan sukaman kankunata kuyashpayni munanaynita kawaynikichita. ⁹ Chayrayku Tata Diosta roygani ashwan ashwanta kuyanakushpa kawsanaykichipa. Roygani ashwanta payta riksishpaykichi yachanaykichipa allita rurashpa kawsayta. ¹⁰ Munani yachanaykichipa imami alli ruranaykichipa imami mana alli ruranaykichipa. Chaypira atipankichi allita rurashpa kawsayta Jesukristu kashkan shamuptin ama ni pi chatashunaykichipa. ¹¹ Jesukristu sukaman yanapashuptikichi allita rurashpa kawsaptikichi runakuna rimankasapa Tata Dios alli kananta.

Pablу chay karselpi wickkadu kaptinipish aya runakuna Tata Diospa rimananta uyarikansapa.

¹² Wawkinikuna, paninikuna, munani allita yachanaykichipa kay karselpi kaptinipish aya runakuna yachachikuykansapa Jesukristu salvawananchikunata. ¹³ Tukuy kay karselpi kuydawak soldadukuna kay awtoridarkuna kay llaktapi kawsak runakuna yachansapa Jesukristuta kreyishpa kawsaptini kay karselpi wickkadu kanaynita. ¹⁴ Kay karselpi kashpaynipish kushikushpalla yachachikuptini aya wawkinchikuna kawawashpa animukunsapa mana manchakushpa Tata Diospa rimananta yachachikuya.

¹⁵ Ariya suk wawkinchikuna washanchawashpangkuna yuyanakunsapa ñukamanta ashwan allita yachachikunankunata. Suk wawkinchikuna ñukata kuyawashpa Jesukristu salvawananchikunata yachachikunsapa.

¹⁶ Chay kuyawak wawkinchikuna yachansapa Tata Dios munaptin kay

karselpi kanaynita kaypipish Jesukristu salvawananchikunata yachachiku-naynipa.¹⁷ Chay mana kuyawak wawkinchikuna Tata Diospa rimananta yachachikunsapa kikinkunallapa munanankunata rurashpa. Yuyansapa yachachikushpa kay karselpi kaptini ashwanta sufrichiwanankunata.

¹⁸ Chashna sufrichiwanankunata yuyaptinkunapish mana llakinichu. Paykuna kuyawashpa mana kuyawashpapish Jesukristu salvawananchikunata yachachikuykansapa. Chashna yachachikuptinkuna ūukaka sukaman kushikuni. Ashwanta kushikushpalla katisha.

¹⁹ Chaymanta kankuna Tata Diosta roygaptikichi Jesukristupa Espiritun yanapawaptin allita yachani kay karselmanta llukshinaynita.

²⁰ Sukaman munani allillata rurashpa kawsayta ama nimapi pinkaku-naynipa. Allita yachachikushkaynishiha sukaman munani wañunaynikaman mana manchakushpa yachachiylapi katiyta. Wañushpaynipish kawsash-paynipish sukaman munani aypa runakuna yachanankunata Jesukristu sukaman yanapawanana.

²¹ Kay allpapi kawsashpaynika kushikushpa Jesukristullapa munananta rurashpa kawsasha. Wañushpaynipish paywan tantalla ashwan allita kushikushpa kawsasha.²² Chayrayku mana yachanichu wañuytachu kawsaytachu munani nishpa. Kay allpapi kawsashpaynira Jesukristupa trabajaylapi atipani katiyta.

²³ Mana yachanichu maykan kaktami munani nishpa. Suk oraska munani kawsayta. Suk oraska munani wañuya Jesukristuwā tantalla kawsak rinaynipa. Wañuptini ūukapa ashwan alli kanman.²⁴ Chaymanta kawsash-paynira atipani kankunata yanapaynikichita.²⁵ Chayrayku yachani kankunawan kiparinaynita yanapanaynipa Jesukristuta ashwanta kreyishpa kushikushpalla kawsanaykichipa.²⁶ Kay allpapi kawsanaynitara yachash-payni kashkan rinayani kawaknikichi. Chashna kawanakushpanchikuna Jesukristuta agradesishpa sukaman kushikushunchisapa.

²⁷ Mash uyariwaychi. Imashnacha Jesukristu yachachikushkanshina allillata rurashpa kawsaychi. ūuka kankunaman rishpaynipish mana rishpaynipish munani yachayta kankuna sufrishpaykichihihpa sukwan sukwan tantalla allita Jesukristuta kreyishpa kawsanaykichita. Munani Jesukristu salvawananchikunata tantalla yachachikuyllapi katinaykichipa.

²⁸ Ama chiknishuk runakunata manchaychichu. Mana manchakushpa yachachikuptikichi paykuna yachankasapa Tata Dios salvashunaykichita paykunata kastiganankunata.

²⁹ Tata Dios yanapawanchisapa Jesukristuta kreyinanchikunata. Chaymantapish yanapawanchisapa sufrishpanchikunapish payllata kreyishpa kawsananchikunata.³⁰ Kankuna ūukawan tantalla sufriyankichi. Yachashkankichi chikniwaptinkuna sukaman sufrishkaynita kunankaman sufriyakanaynita.

2

Pablu yachachikun imashnami Jesukristu sielumanta shamurkan salvawananchikunata.

¹ Kankuna sufriyakaptikichihihpa Jesukristu sukaman kuyashushpaykichi animuchishunkichi kushichishunkichi. Tata Diospa Espiritun kankunawan

kawsashpa yanapashunkichi kuyanakushpa llakichinakushpa kawsanaykichi. ² Tata Diospa Espiritun yanapashuptikichi sukwana sukwana yanapanakushpa paktanakushpa kuyanakushpa llakichinakushpa suku yuyaylata yuyashpa kawsaychi. Chashna allita kawsashpaykichi ūukata kushichiwankichi.

³ Ama sukwana sukwana yuyanakushpa ayninakuychichu. Ama kiki-kichillapa munanaykitchita rurashpa nima alabanakushpa kawsaychichu. Ama rimaychichu suku wawkikichimanta ashwan alli yachak kanaykitchita. ⁴ Ama kikikichillapa munanaykitchita yuyashpallachu kawsaychi. Sukkuna munanankunatapish yuyaychi.

⁵ Jesukristu tukuy runakunata kuyashpa mana kikinpa munanantachu rurarkan. Kankunapish payshina ama kikikichillapa munanaykitchita yuyashpallachu kawsaychi.

⁶ Jesukristu sielipi Tatan Dioswan tantalla kawsaykashpa Tatanshina tukuy laya atipak kayakashpa Tatanpa munananllata ruranayashpa paypa mana nimachu karkan tukuy atipananta sakiya.

⁷ Jesukristuka alli sinchi kamachikuk kayakashpapish Tatan Diosllata kashpa sielumanta shamurkan suku warmimanta nasik sirvikuk runa kananpa.

⁸ Chashna sirvikuk runa kashpa Tatan Diosta sukaman kasushpa mana uchayuk kayakashpa iden uchayuk runashina pinkakunapa laya wañuya suku kruspi wañurkan.

⁹ Chashna Tatanta kasushpa wañuptin Tata Dioska paytaka kawsachimushpa willarkan ladunpi tiyarinanpa. Chaypina willarkan tukuy kamachikuk runakunamanta ashwan sinchi kamachikuk kananpa.

¹⁰ Chashna Tatan Dios willaptin tukuy sielipi kawsakkuna tukuy all-papi kawsakkuna tukuy wañudu runakuna Jesukristupa ūawpakinipi kunkurikushpa kasunankuna tiyan.

¹¹ Rikchak laya rimanayuk runakuna kunkurikushpa willankasapa tukuy pimanta ashwan sinchi kamachikuk kananta. Tata Diosta kuyashpa willankasapa sukaman allima kananta.

Pablu yachachikun suk lusshina kananchikunata.

¹² Munanayni wawkinikuna, paninkuna, ūuka kankunawan kashpayni yachachikupfini allita kasuwashkankichi. Kunan kankunamanta karupi kaptinipish ashwan allita kasuwashpa kawsaychi. Salvadu kanaykitchita yuyashpa uchallikuyta manchashpa Tata Diosta kuyashpa kasushpa kawsaychi. ¹³ Tata Dios munashpa yuyaynikichi munachishunkichi allita rurashpa kawsanaykichi. Yanapashunkichi chay alli ruranata ruranaykichi.

¹⁴ Mana nima piñakushpa mana ayninakushpa Tata Diospa munananta rurashpa kawsaychi. ¹⁵ Chay mana allita rurashpa kawsak waklidu yuyayuk runakuna tutapishina kawsaykansapa. Paykunapa chawpinkunapi kawsashpaykichi Tata Diospa wambrankuna kashpaykichi allita rurashpa kawsaychi ama ni pi chatashunaykichi. Chashna allita rurashpa kawsashpaykichi tuta likidupi llipiyak luserukunashina kankichi.

¹⁶ Lusta altipi churakshina Tata Dios mana tukuyniyukta kawsachiwananchikunata yachachikuchi Jesukristu shamuptin ūuka sukaman kushikunaynipa. Chaypi yachasha mana yankamanta kankunata yachachishkaynita. ¹⁷ Kankuna Jesukristuta kreyishpaykichi padesishpaykichiish payllata katiykankichi. ūukapish kankunashina sukaman padesishpayn'i ichara wañuptini yawarnini ichakunman. Chashna

wañushpaynipish kankunawan tantalla kushikusha.¹⁸ Kankunapish ñukawan tantalla kushikuychi.

Filipos llaktaman Pablu Timoteota Epafrditota kacharkan

¹⁹ Señorninchi Jesukristu munaptin kankunaman wawkinchi Timoteota utka kachanayani. Paymi kutimushpa willawanka imashnami kawsaykanchi nishpa. Chayta willawaptin ñukaka kushikusha.²⁰ Mana tiyanchu payshina ñukawan pakta yuyaykuk runa. Payka ñukashina sukanman munan kankuna allita rurashpa kawsanaykichipa.²¹ Sukkuna kikinkunapa munanankunallata rurashpa kawsansapa. Mana Jesukristupa munananta rurashpachu kawsansapa.

²² Kankuna allita yachankichi wawkinchi Timoteo allita rurashpa kawsananta. Payka wambraynishina yanapawashpa ñukawan tantalla Tata Diospa rimananta yachachikushka.²³ Yuyaykani payta kankunaman kachayta yachashpayni kay karselmanta kachariwankasapachu manachu nishpa.²⁴ Allita yachani Señorninchi Jesukristu yanapawananta utka rinaynipa kawaknikichi.

²⁵ Chaymanta yuyaykani wawkinchi Timoteowan tantalla wawkinchi Epafrditota kankunaman kachayta. Kankuna payta kachamushkankichi ñukata yanapawananpa. Payka trabajakmasini kashpa sukanman yanapawaykan.²⁶ Paypish sukanman munan kawashuynikichita. Kankuna unkushkanta yachaptikichi payka sukanman llakin.²⁷ Ariya payka unkushka wañunayanankaman. Chashna unkuptin Tata Dios payta kuyashpa ñukatapish kuyawashpa sanuyachishka ama llakishkaynimanta ashwanta llakinaynipa.²⁸ Chayrayku Epafrdito sukanman kawashuynikichita munaptin utkana kachanayani payta kawashpa kushikunaykichipa ñukapish amana sukanman llakinaynipa.²⁹ Kawashuknikichi riptyin Jesukristuta kreyik wawkinchikuna kaptin kushikushpa chaskiychi. Tukuy payshina allita rurak wawkinchikunatapish kuyashpa chaskiychi.

³⁰ Epafrdito Jesukristuta sirvishpa wañunayanankaman unkurkan. Kankuna karu llaktapi kashpaykichi mana yanapawayta atipashpaykichi payta kachamushkankichi yanapawananpa.

3

Pablu munarkan Jesukristuta ashwanta riksiyta.

¹ Wawkinikuna, paninikuna, kashkan willaykichi: Kankuna padesishpaykichipish Señorninchi Jesukristuta kuyashpa kushikuychilla. Chashna aypa kuti kushikunaykichipa killkashpaynipish mana aminichu kashkan killkaynikichita ashwanta kushikushpa kawsanaykichipa.

² Kuydanakuychi chay wakllichishunayk runakunamanta. Paykunaka yachachishunkichi señaladu kashpaykichira Tata Diospa wambrankuna kanaykichita.³ Tata Diospa Espiritun yanapawaptinchikuna ñukanchikuna Tata Diosta kuyashpa kawsashpanchikuna paypa wambrankuna kanchisapa. Jesukristuta kreyishpa kawsashpanchikuna sukanman kushikunchisapa manana yuyanchisapanachu señaladu kashpanchikunara Tata Diospa wambrankuna kananchikunata.

⁴ Ñawpa ñukapish yuyashkani señaladu kashkanchikunaryku Tata Diospa wambran kanaynita. Ñuka tukuy runakunamanta ashwanta yuyashkani Moisespa kamachikunankunata kasushpalla Tata Diospa wambran kanaynita.⁵ Pusak diyayuk kaptini tatayni señalachiwarkan. Chay ñawpa kawsak runa Israelmanta miraknin kani. Benjamimpay ayllun kani.

Judiyu runa kani. Awiluynikuna judiyu runakuna karkansapa. Moisespa kamachikunanta allita kasushpa fariseo runa karkani.

⁶ Moisespa kamachikunankunata sukaman kasushpa kawsaptini mana ni pi chatawayta atiparkanchu. Chay kamachikunankunata sukaman kasushpa kawsashpayni Jesukristuta kreyikkunata chiknishpa sukaman padescirkanicasa. ⁷ Yuyarkani Moisespa kamachikunankunata kasushpa Tata Diosta kushichinaynita. Kunanka Jesukristuta kreyishpa kawsashpayni manana yuyaninachu chay rurashkaynikunata ruraptini Tata Dios perdonawananta.

⁸ Ñawpa tiempu sukaman yachaysapa fariseo runa kashpaynipish kunnaka chay ñawpa kawsashkaynita mana nimatashina kawani. Señorninchu Jesukristuta riksishpa sukaman allimata kawsaykani. Payta kuyashkaynirayku tukuy chay ñawpa rurashkaynita susyatashina kawani payta ashwan allita riksinaynipa.

⁹ Kunanka Jesukristuta kreyishpayni sukaman munani paywan tantalla kawsayta. Manana yuyaninachu Moisespa kamachikunankunata kasushpayni alli runa kanaynita. Kunanka yachani Jesukristuta kreyiptini Tata Dios tukuy uchaynikunamanta perdonawananta. ¹⁰ Sukaman munani Jesukristuta ashwan ashwanta riksitya. Tata Dios rikchak laya atipak kashpa Jesukristuta kawsachimushkanshina sukaman munani ñukatapish atipachiwanarpa allita rurashpa kawsayta.

Jesukristu Tata Diosta kasushpa padescirkanskshina ñukapish munani padesshpaynipish payllata kreyishpa kawsayta. Jesukristu Tata Diosta kasushpa wañushkanshina ñukapish payllata kasushpa kawsashpayni manana kikinipa munanaynita rurashpanachu kawsani. ¹¹ Chashna payta kasushpa kawsashpayni yuyani wañushkaynimanta Tata Dios kawsachimuwananta.

Pablu munarkan Jesukristuta ashwan allita kasushpa kawsayta.

¹² Ñukaka yachani manara Jesukristushina allita rurashpa kawsanaynitar. Payka akllawarkan allita rurashpa kawsanaynipa. Chayrayku sukaman sinchikushpa katini ashwan ashwanta payta kasushpa paypa munananta rurashpa kawsanaynipa.

¹³ Wawkinikuna, paninikuna, ñukaka kikinilla mana atipanichu Jesukristupa munananllata rurashpa kawsayta. Chayrayku tukuy chay ñawpa rurashkaynita kunkashpa sukaman sinchita trabajashpa Jesukristullata ashwanta kasushpa kawsanayani. ¹⁴ Tata Dios munan premyuta kuwayinchikunata. Chayrayku Jesukristu yanapawaptin ñukapish sukaman munani allita rurashpa kawsayta premyuynita chaskinaynipa.

¹⁵ Kankuna Jesukristuta allita kreyishpa kawsashpaykichi tukuy chay willashkaynita ñuka rurashkaynisha kankunapish ruraychi. Kankuna manara tukuy chay yachachikushkaynita entiendiptikichira Tata Dios yachachishunkichi. ¹⁶ Tukuy allita yachananchikunata allita kasushpa kawsananchikuna tiyan.

¹⁷ Wawkinikuna, paninikuna, ñuka allita Jesukristuta kasushpa kawsanaynishina kankunapish payta allita kasushpa kawsaychi. Suk wawkinchikuna ñukashina allita rurashpa kawsaptinkuna paykunashina allita rurashpa kawsaychi.

¹⁸ Aypa kutina willashkaykichi aypa runakuna Jesukristuta chiknishpa mana kreyinsapachu kruspi wañushkanta salvawananchikunapa. Kunan llakishpa wakashpa kashkan chayllata willaykichi. ¹⁹ Tata Dios chay

runakunata mana tukuuniyukta kastigankasapa. Mana Tata Diosta ka-sunayashpangkuna mikuyllata yuyansapa. Pinkakunapa layata rurashpa-pish alabanakunsapa. Tata Diosta kunkashpa tukuy kay alfpapi tiyakkllata yuyashpalla kawsansapa.

²⁰ Chaykamanka ñukanchikunaka mana chashnachu kawsanchisapa. Ñukanchikunapa tiyan sielupi alli llaktanchikuna. Sukaman shuyaykanchisapa sielumanta salvawakninchi Jesukristu shamunanta chay llaktanchikunaman pushawananchikunapa. ²¹ Chashna shamushpa tukuy layata kamachikuya atipak kashpa unkuy yachak kuerpunchikunata chikan layata ruranka. Allima kuerpulta paypa kuerpuntashina kuwashunchisapa.

4

Kushikushpa Tata Diosta katiyachi.

¹ Kuyanayni wawkinikuna, paninikuna, sukaman rinayani kawaknikichi. Kankuna sukaman kushichiwashpaykichi premyuynishina kankichi. Je-sukristuta allita kreyishpa kawsaychi.

² Chay paninchikuna Evodiata Sintikata willani: Jesukristuta kreyishpa allita kuyanakushpa kawsaychi.

³ Yachachikumasini, kanta roygayki chay ishkay paninchikunata yanapanaykipa. Paykunaka sukaman ñukawan tantalla Jesukristu salvawananchikunata yachachikushkasapa. Wawkinchi Klementepish suk wawkinchikunapish ñukawan tantalla yachachikushkasapa. Tata Diospa librunpina tukuy paykunapa shutinkuna killkaduna sielman rinankunapa paywan tantalla kawsak.

⁴ Kankuna Jesukristuta kreyishpa Tata Diospa wambrankuna kashpay-kichi kushikushpalla kawsaychi. Kashkan willaykichi kushikushpalla kawsanaykicipa. ⁵ Señorninchi Jesukristu utkana shamunka. Chayrayku munani tukuy runakuna yachanankunapa kankuna allita kuyanakushpa kawsanaykichita.

⁶ Ama nimapi turbakuychichu. Suk imapi llakishpa turbakushpaykichika Tata Diosta roygaychi yanapashunaykicipa. Chashna roygashpaykichi tukuy imapa Tata Diosta agradesiychi. ⁷ Tata Diosta agradesiptinchikuna payka mana entiendina layata sukaman kushichiwanchisapa. Jesukristuta kreyiptinchikuna Tata Dios kushichiwaptinchikuna mana turbakunchis-apachu nima mana allikunata yuyaykunchisapachu.

Pablu yachachikun allikunallata yuyaykunanchikunapa.

⁸ Chaymanta wawkinikuna, paninikuna, tukuy alli yachanakunallata tukuy alli rimanakunallata tukuy alli ruranakunallata tukuy alli yuyanakunallata yuyaykuypachi. Tukuy kushikuna layata tukuy alli famayuk runakunapa rurashkanta tukuy alabanapa layallata yuyaykuypachi.

⁹ Tukuy yachachikushkaynita allita kasushpa kawsaychi. Ñuka allita rimaptini uyarirkankichi. Allita ruraptini kawarkankichi. Kankunapish ñukashina allita rimashpa allita rurashpa kawsaychi. Chashna kawsaptikichi kushichiwakninchi Tata Dios kankunawan tantalla kawsanka.

Pablu Filipospi wawkinikuna agradesirkanyapashkankunaryku.

¹⁰ Señorninchi Jesukristuta sukaman agradesini kankuna kashkan yuyawashpa kullkita kachamuwaptikichi. Sukaman yanapawayta munashpaykicipish suk tiempu mana atiparkankichichu kullkita kachamuwayta. ¹¹ Chayta willashpayni mana nimata mañaykaykichichu. Nami yachakushkanina tiyawaknininillawan kushikushpalla kawsayta.

¹² Aypa tiyawaptin mana tiyawaptinpish yachani kushikushpalla kawsayta. Aypata mikushpayni mana aypata mikushpaynipish aypa imayuk kashpayni mana nimayuk kashpaynipish ñami yachakushkanina kushikushpalla kawsayta. ¹³ Jesukristu yanapawaptin sufrishpaynipish tukuy paypa munananta atipani rurayta. ¹⁴ Sukaman sufriptini yanapawashpaykichi allita rurashkankichi.

¹⁵ Kankuna Filipos llaktapi kawsakkunata yachachishkayniwasha Masedonia partimanta llukshirkani chikan llaktakunapi Jesukristu salvawananchikunata yachachikuk. Chay llaktakunaman riptini kankunalla yachachishkaynirayku agradesiwashpa ofrendata kachamu warkankichi. ¹⁶ Chaymanta Tesalonika llaktapi kaptini kuti kuti ofrendata kachamuwashkankichi ima illawaptin rantinaynipa.

¹⁷ Tukuy chaykunapa agradesiykichi. Chashna agradesishpayni mana mañaykaykichchu suk ofrendata kashkan kachamuwanaykicipa. Munani Tata Dios ofrendaykichita kuwashkaykichirayku suk premyuykichita kushunaykicipa. ¹⁸ Ñami kachamuwashkaykichi ofrendata chaskishkanina. Kunanka puchu puchunami tiyawan. Wawkinchi Epafroditowan kachamuwashkaykichita chaskiptini aypami tiyawan. Chay kachamuwashkaykichika iden mishki asnak wira rupachidushinami. Chay ofrendaykichika Tata Diosta kushichin. ¹⁹ Chay ofrendata kuwaptikichi Tata Diosninchika kankunatapish tukuy illashuknikichita kushunkichi. Jesukristuwantantalla kawsapükichi Tata Dioska tukuy laya allimata atipan kushuynikichita. ²⁰ Akuychi tukuy oras Tata Diosninchita alabaypachi. Chashna kachun.

Pablu wawkinkunata rimachirkan.

²¹ Tukuy chaypi Jesukristuta kreyikmasinchikunata ñukapa rimachipaychi. Tukuy ñukawan tantalla wawkinchikunapish kankunata rimachishunkichi. ²² Tukuy kaypi Jesukristuta kreyikmasinchikunapish rimachishunkichi. Ashwan sinchi romano kamachikuk Sesarpa sirvikuk wawkinchikunapish rimachishunkichi.

²³ Munani Señorninchi Jesukristu kankunata yanapashushpaykichi kushichishunaykicipa. Chashna kachun.

Ñuka Pablu chayllata killkashkaykichi.

KOLOSENSES PABLУ KOLOSAS LLAKTAPI KREYIKUKMASINKUNATA KILLKARKAN

Pablу Kolosas llaktapi Jesukristuta kreyikkunata rimachinsapa.

¹ Munanayni wawkinikuna, paninikuna, Tata Dios munaptin Jesukristu ñuka Pabluta kachamuwashka paypa rimananta yachachikunaynipa. ² Kolosas llaktapi mana shaykushpa Jesukristuta kreyishpa kawsak wawkinikuna paninikuna kaptikichi wawkinchi Timoteowan kay kartata killkaykaykichi. Sukaman munanisapa Tatanchi Dios kushichishunaykipa yanapashunaykipa.

Pablу royan Tata Dios Kolosas llaktapi wawkinkunata paninkunata yanapanankunapa.

³ Tukuy oras ñukaykuna Señorminchi Jesukristupa Tatan Diosta kankunapa orashpa agradesinisapa. ⁴ Uyarishkanisapa rimaptinkuna kankuna sukaman allita Jesukristuta kreyishpa kawsanaykichita. Yachashkanisapa tukuy kreyikukmasinchikunata kuyashpa kawsanaykichita. ⁵ Kankuna kreyishkankichi Tata Dios mana llullakushpa salvawananchikunata. Chayrayku yachankichi rinaykichita Tata Dioswan mana tukuyinyukta kawsak. Chayta yachashpaykichi tukuy Jesukristuta kreyikmasinchikunata kuyashpa kawsaykankichi.

⁶⁻⁷ Munananchi wawkinchikuna Epafras ñukaykunawan sukaman yachachikushka. Jesukristuta alli sirvik kashpa kankunata yachachishurkankichi Tata Dios kuyashunaykichita. Chayta uyarishpa allita entiendishpa ashwan ashwanta sukwana sukwana kuyanakushpa yanapanakushpa kawsaykankichi. Suk llaktakunapipish aypa runakuña kankunashina ashwan ashwanta Jesukristuta kreyishpa kawsaykansapa. ⁸ Wawkinchi Epafras shamushpa willawashkasapa Tata Diospa Espiritu yanapashuptikichi kuyanakushpa kawsaykanaykichita.

⁹ Chayta yachashkaynikunamanta pacha ñukaykuna kankunapa oraykanisapa. Tata Diosta roygaykanisapa yachachishunaykipa imatami munan ruranaykicipa nishpa. Roygaykanisapa yachanaykicipa allita rurashpa kawsayta. ¹⁰ Tata Diospa munananta yachashpaykichi atipankichi allita rurashpa Tata Diosta kushichishpa kawsayta. Roygaykanisapa runamasikichita yanapashpaykichi ashwan allita Tata Diosta riksinaykicipa. ¹¹ Tukuy laya yachak Tata Diosninchita roygaykanisapa yanapashunaykipa. Chashna yanapashuptikichi sufrishpaykicipish kushikushpalla sinchikushpa payllata ashwan allita kasushpa kawsankichi.

¹² Tata Diosta roygaykani kushikushpalla payta agradesinaykipa. Ñukanchikuna Tata Diospa wambrankuna kaptinchikuna atipachiwanchisapa allita rurashpa paypa mandunpi luspishina kawsananchikunapa. ¹³ Tata Dioska supaypa mandunmanta surkuwashkanchisapa amana tutapishina mana allita rurashpa kawsananchikunapa. Kuyadu wambran Jesukristupa mandunpi churawashkanchisapa. ¹⁴ Jesukristurayku uchanchikunamanta perdonawashpanchikuna salvawanchisapa.

Jesukristu wañurkan Tata Dios uchanchikunamanta perdonawananchikunapa.

¹⁵ Mana ni pi Tata Diosta kawashkachu. Chayrayku mana yachanchisapachu ima layami payka nishpa. Manara allpa tiyaptinra Tata Diospa chaylla wambran Jesukristu tiyarkanna. Payllámi Tatan Diosta riksichiwanchisapa. ¹⁶ Tata Dios Jesukristuta kamachiptin payka tukuy layataturarkan. Tukuy sielupi tiyakta tukuy allpapi tiyakta tukuy kawananchikunata tukuy mana kawananchikunata rurarkan. Sielupi allpapi awtordidakunata kamachikukkunata rurarkan. Tukuy layata rurarkan paylla tukuy rurashkanta kamachikunana. ¹⁷ Manara nima tiyaptinra Jesukristuka tiyarkanna. Payka tukuy rurashkanta allita kuydan amá wakllinana.

¹⁸ Ñukanchikuna Jesukristuta kreyishpa kawsashpanchikuna paypa kuerpunshina kanchisapa. Payka umanchikunashinami. Manara ni pi wañushkanmanta kawsamuptinra payka wañushkanmanta kawsamurkan tukuy layapi ashwan sinchi kamachikuk kananpa.

¹⁹ Tata Dios munarkan wambran Jesukristu tukuy layapi iden payshina kananpa. ²⁰ Tata Dios munarkan wambran Jesukristu kruspi yawarinta ichashpa wañunarpa atipanarpa perdonawayninchikunata. Jesukristu wañurkan tukuy allpapi kawsakkunata tukuy sielupi kawsakkunata waklidu kashkankunamanta allichanankunapa paywan tantalla kushikushpa kawsanankunapa.

²¹ Ñawpa tiempu kankuna mana alli ruranakunallata yuyashpa kawsashpaykichi Tata Diosta chiknishpa paymanta ashudu karkankichi. ²² Chayrayku Jesukristu shamurkan runa kananpa. Runa kashpa kruspi wañurkan Tata Dios atipanarpa perdonashuynikichita. Jesukristu wañurkan payllata kasushpa manana uchayuk kaptikichi Tatan Diosman pushashunaykichipa. ²³ Jesukristu Tata Diosman pushashunaykichipa mana sampayashpa payllata kreyishpa kawsanaykichi tiyan. Kankuna Tata Dios salvashunaykichita uyarishkankichi. Chay yachachikunata allita kasushpa kawsaychi. Tukuy llaktakunapi aypa runakuna chay alli rimanata yachachishkasapa. Tata Dios ñuka Pabluta kachamuwashka chayllata yachachikunaynipa.

Jesukristu Pabluta kacharkan yachachikunana.

²⁴ Kankunata yachachishkaynirayku kay karselpi sufrishpaynipish kushikuni. Jesukristuta kreyikkunaka paypa kuerpunshinami. Chashna paypa kuerpunshina kaptikichi kankunarayku sufrishpayni Jesukristuwantantalla sufriykani.

²⁵ Tata Dios kachamuwashka allinikichipa tukuy paypa rimananta allita yachachinaynipasapa. ²⁶ Ñawpa tiempu Tata Dios tukuy yuyayninta manara allitarachu ni pita entiendichirkan. Kunanka yuyayninta tukuy Jesukristuta kreyik runakunata ñami yachachiwashkanchisapano. ²⁷ Tata Dios kikin munashpa yachachiwanchisapa mana judiyu runakunatapish sukaman allimata kuyashpa salvanankunata. Jesukristu tukuy ñukanchikunapi kawsaptin yachanchisapa sukaman kushikushpa sielman rinanchikunata mana tukuyuyukta kawsak.

²⁸ Tukuy maypi ñukaykuna Jesukristu salvawananchikunata parlachikunisapa. Tukuy runakunata yachachishpa animuchinisapa allita rurashpa kawsanankunapa. Munanisapa Tata Diospa ñawpakinipi paykunata rikurichiaptinikuna alli yachak alli rurak kanankunapa. ²⁹ Chayrayku sukaman yachachikushpa sinchikushpa trabajaykani Jesukristu sukaman allimata yanapawaptin.

2

Pablu Tata Diosta royan wawinkunata paninkunata yanapanankuna-napa.

¹ Wawkinikuna, paninikuna, allita uyariwaychi. Ñukaka kankunapa sukaman oraykani. Laodisea llaktapi Jesukristuta kreyik runakunapa manara riksiwak runakunapapish sukaman oraykani. ² Tata Diosta sukaman roygaykani kankunata allita animuchishunaykichipa ashwan allita kuyanakushpa kawsanaykichipa. Roygaykani kankuna Tata Diospa ñawpa manara yachachikushkanta ashwan allita entiendinaykichipa. Chaypirami Jesukristuta ashwan allita riksinkichi.

³ Jesukristulla Tata Diospa sukaman alli yachananta alli yuyayninta entiendichiwanchisapa. ⁴ Chayta willaykaykichi ama ni pi allipi tukushpa parlachishushpaykichi llullachishunaykichipa. ⁵ Mana kankunawan tantalla kashpaynipish sukaman kuyashpa yuyaykaykichi. Kushikuni yachashpa mana sampayashpa Jesukristuta allita kreyishpa kawsanaykichita. Kushikuni allita kuyanakushpa kawsaykaptikichi.

Pablu yachachiwanchisapa Jesukristuwан tantalla kuyanakushpa kawsananchikunapa.

⁶ Imashnacha Señorninchi Jesukristuta kreyishkaykichishina kunanka paywan tantalla kawsaychi. ⁷ Jesukristuwан tantalla kawsashpaykichi paypi alli sapichakudushina kankichi. Yachachikushkaynikunata mana shaykushpa allita kasushpa Tata Diosta agradesishpa kawsaychi.

⁸ Jesukristuta mana kreyinayak runakuna kankunata llullachishunayanaykichi. Chay runakuna mana munansapachu Jesukristupa yachachikunankunata kreyiyta. Amañansapa mana Tata Diosta kasuk runakunallapa munanankunata rurashpa kawsaya. Llullachikuk runakunapa yachachikunankunallata rurashpa kawsansapa. Ama chay laya llullachikuk runakunata munaychichu kasuya.

⁹ Jesukristu shamurkan nasik runa kananpa tukuy runakunata kawachiwananchikunapa ima layami Tata Dios nishpa. ¹⁰ Jesukristulla tukuy awtoridarkunata supaykunata angelkunata sinchita kamachinsapa. Chayrayku ñukanchikunapi kawsashpa atipachiwanchisapa tukuy layapi sukaman allimata kawsaya.

¹¹ Chaymanta kankuna Jesukristuwан tantalla kawsaptikichi payka tukuy mana alli rurashkaykichimanta perdonashunkichi amana chay mana allikunata rurashpa kawsanaykichipa. Jesukristu perdonashuptikichi señaladushina kankichi. Judiyukuna señalachidu kashpankuna yuyansapa Tata Diospa wambrankuna kanankunata. Ñukanchikuna Jesukristuwан tantalla kawsashpanchikuna señaladushina kashpanchikuna yachanchisapa Tata Diospa wambrankuna kananchikunata.

¹² Kankunaka allita yachankichi Tata Dios tukuy laya atipak kashpa Jesukristuta wañushkamanta kawsachimushkanta. Chayta yachashpaykichi bawtisakushkankichi. Bawtisakushpaykichi Jesukristuwан wañudu pam-padushina kankichi amana ñawpashina kawsanaykichipana. Chaymanta Tata Dios Jesukristuta kawsachimushkanta kreyiptikichi kankunatapish yanapashunkichi mushuk layata allita rurashpa kawsanaykichipa.

¹³ Ñawpa tiempu Tata Dioska manara uchaykichita perdonarkanrachu. Paymanta ashudu wañudukunashina karkankichi. Kunanka Jesukristuwан tantalla kawsaptikichi Tata Dios uchaykichimanta perdonashushpaykichi yanapashunkichi allita rurashpa kawsanaykichipa.

14 Ñawpa tiempu Tata Diospa kamachikunankunata mana kasushkanchikunaryku Tata Dioska kastigawanchimansapa karkan. Chaypina Jesukristu wañurkan amana Tata Dios kastigawananchikunapana. Jesukristu kruspi wañushkanrayku Tata Dios uchanchikunamanta perdonawashkanchisapa amana ni pi chatawananchikunapana.

15 Jesukristu kruspi wañushkanrayku Tata Dios tukuy supaykunapa yachayninta waklichirkan. Tukuy runakunata allita kawachirkansapa Jesukristulla sinchi kamachikuk kananta.

Pablu yachachiwanchisapa amana runakunapa munananllata rurashpa kawsananchikunapana.

16 Suk runakuna llullachishushpaykichi willashunkichi amana suk mikunata mikunaykichipa amana suk upyanata upyanaykichipa. Willashunkichi fiesta diyakuna llullu killa diyakuna fiestakunaykichipa. Chashna chay runakuna willashuptikichi ama kasuychichu. **17** Chay fiestakuna yuyachiwanchisapa Jesukristu shamunanta salvawananchikunapana. Kunánka Jesukristu shamushka kaptin manana chay fiestakunata rurananchikunachu tiyan.

18 Chay llullachishuknikichi runakuna angelkunata kuyansapa. Alli modoyuk tukushpa kikinkunalla yuyanakunapa ashwan alli yachak kanankunata. Muskuyninkunapi kawashkankunata parlachikunsapa. Ama chay runakunashina kawsaychichu. **19** Paykunaka kikinkuna alabanakushpa mana Jesukristuwant tantallachu kawsaykansapa. Ñukanchikuna Jesukristuwant tantalla kawsaptinchikuna payka allita yachachiwanchisapa ashwan ashwanta Tata Diospa munananta rurashpa kawsananchikunapana. Sukaman allita tantanachiwanchisapa sukwani sukwani kuyanakushpa kawsananchikunapana.

20 Jesukristu wañurkan amana runakunapa amañanankunata rurashpa kawsananchikunapana. Kankuna paywan tantalla kawsaykashpaykichi ¿imapatí runakunapa amañanankunata rurashpa kawsaykankichi? **21** Chay runakuna amañansapa rimaya: “Ama suk imakunata llankaychichu. Ama suk mikunakunata mikuychichu. Ama suk imakunata apiychichu.” **22** Chay amañanankuna runakunapa yuyayninkunalla kashpa tukunan tiyan. **23** Chay runakuna chay amañanankunata yachachikushpa alli yachakshina rikurinsapa. Chaykunata rurashpankuna kuerpunkunata sukmanta waklichinsapa. Yuyansapa sukwani runakunamanta ashwan allita ruraykanankunata. Chashna yuyanakushpankunapish yankamanta chay amañanankunata ruransapa. Chayta rurashpankuna mana atipansapachu allita rurashpa kawsayta.

3

Pablu yachachiwanchisapa Jesukristuwant tantalla kawsananchikunapana.

1 Tata Dios Jesukristuta wañushkanmanta kawsachimushpa willarkan ladunpi tiyarinanpa tukuy laya tiyakta kamachikunapana. Tata Dios Jesukristuta kawsachimushkanshina ñukanchikunatapish yanapawashkanchisapa paywan tantalla allita rurashpa kawsananchikunapana. Chayrayku kay allpapi kawsashpaykichira munaychi ashwan ashwanta payta riksishpa allita kasushpa paywan tantalla kawsayta. **2** Yuyaychi Jesukristu sielipi kamachimuwaykananchita payllata kasushpa kawsananchikunapana. Amana yuyaychinachu kay allpapi mana alli ruranakunata.

³ Jesukristu wañushka kaptin paywan tantalla wañushkanchisapa amana uchallikunanchikunapa. Jesukristu kawsamushka kaptin paywan tantalla kawsaykanchisapa. Tata Dios arkawanchisapa ama ni pi wakllichawananchikunapa. ⁴ Jesukristu ūukanchikunapi kawsan. Chaymanta kay allpaman kashkan shamuptin paywan tantalla kushikushpa sielupi kawsashunchisapa.

⁵ Chayrayku ama munaychichu Tata Diosta mana kasuk runakunashina kawsayta. Ama chikan warmiwan uchallikuychichu. Ama uchallikushpa mana valekkunata ruraychichu. Ama kikikichillapa munanaykichita rurashpa kawsaychichu. Ama rikchak laya kawanaykichita munaychichu. Chashna rikchak layata sukmanta munashpa kawsashpaykichika ruradu dioskunatashina kuyashpa kawsaykankichi. ⁶ Mana Tata Diosta kasushpa uchallikuk runakunata Tata Dios sukmanta kastigankasapa.

⁷ Ñawpa kankunapish chay mana allikunata rurashpa kawsarkankichi. ⁸ Kunanka Jesukristuta kreyishpa kawsashpaykichi ama piñakushpa ni pita chiknishpa nima pinkakunapa layata rimashpa kawsaychichu. Ama runamasikichiwani piñanakushpa nima ayninakushpa kawsaychichu. ⁹ Ama sukwani sukwani llullachinakushpa kawsaychichu. Ñawpa mana allita rurashpa kawsarkankichi. Kunanka manana chashnanachu kawsaykankichi.

¹⁰ Kunanka rurawakninchikuna Tata Dios kawsananshina mushuk layata rurashpana kawsaykankichi. Tata Dios yanapashuykankichi ashwan allita payta riksinyaykichi.

¹¹ Jesukristu ūukanchikunapi kawsaptin ima laya runakuna kaptinchikunapish mana nimananchu. Judiyu mana judiyu runakuna, señaladu mana señaladu runakuna, chikan llaktamanta runakuna, awka runakuna, rantidu mana rantidu runakuna kaptinchikunapish mana nimananchu. Payka tukuy layapi kamachikukmi.

¹² Tata Dios kankunata kuyashushpaykichi akllashushkankichi paypa wambrankuna kanaykichi. Chayrayku mushuk layata rurashpa sukwani sukwani kuyanakushpa yanapanakushpa kawsaychi. Ama yuyaychichu sukkunamanta ashwan alli kanaykichita. Allima modoyuklla kawsaychi. Suk runa imatapish willashuptikichi allillapi ayniyichi. ¹³ Sukwan sukwani allimallata kawsaychi. Runakuna ima mana allita rurashuptikichipish perdonaychilla. Señorninchi Jesukristu kankunata perdonashushkaykichishina kankunapish sukwani sukwani perdonanakushpalla kawsaychi. ¹⁴ Tukuy alli rurañaykichimanta ashwan allimi kuyanakushpa kawsanaykichi. Kuyanakushpa kawsashpaykichira atipankichi allillapi tantalla kawsaychi.

¹⁵ Tata Diosmi akllashushkankichi suku kuerpushinalla kanaykichi. Chayrayku tukuy shunku kushikushpa Tata Diosta agradesishpa sukwani sukwani allillapi tantalla kawsaychi.

¹⁶ Jesukristupa yachachikunanta allita yuyashpa kawsaychi. Sukwan sukwani allita yachachinakuychi. Animuchinakuychi Jesukristuta ashwan allita kasunaykichi. Tata Diosta agradesishpa salmokunata himnokunata kantukunata kantaychi payta alabanaykichi. ¹⁷ Tukuy layata rurashpaykichi rimashpaykichi Señorninchi Jesukristuta kasushpa kawsaychi. Jesukristu yanapashuptikichi Tatanchi Diosta agradesishpa kawsaychi.

Pablu yachachiwanchisapa imashnami Jesukristuta kasushpa kawsashunchisapa nishpa.

¹⁸ Kankuna kusayuk paninikuna, Señorninchi Jesukristuta kreyik kashpaykichi kusaykichita kasushpa kawsaychi.

¹⁹ Kankuna warmiyuk wawkinikuna warmikichita kuyanaykichi tiyan. Ama warmikichita rabyashpa sientichiychichu.

²⁰ Kankuna wambrakuna, tukuy layapi tataykichita mamaykichita allita kasushpa kawsaychi. Paykunata kasushpa kawsashpaykichi Tata Diosta kushchinkichi.

²¹ Kankuna tatakuna, ama wambraykichita sukaman sinchita kamachishpa sientichiychichu. Paykunata sientichiptikichi ichara manana kasushunayankichimannachu.

²² Kankuna rantidu runakuna, patronnikichita allita tukuy layapi kasunaykichi tiyan. Patronnikichi kawashuptikichi mana kawashuptikichipish tukuy shunku munashpa Tata Diosta kuyashpa allillata rurashpa trabajaychi. Ama trabajaychichu patronnikichi alabashunaykichillapa.

²³ Tukuy layapi kushikushpa mana killakushpa allita trabajaychi Señorninchi Jesukristuta kushichinaykichipa. ²⁴ Señorninchi Jesukristu aliw patroninchikunashina kaptin yachanchisapa payta kasushpa kawsashpanchikuna willawashkanchikunashina paywan tantalla sielipi kawsashunchisapa. ²⁵ Tata Dioska tukuy mana alli rurak runakunata kastiganankuna tiyan patron mana patron kaptinkunapish.

4

¹ Kankuna patronkuna, rantidu trabajadornikichita allita wiwashpa allilapi trabajachiyichi. Allita yuyaychi sielipi kankunapapish patronnikichi Jesukristu kananta.

² Allita uyariwaychi. Ama kunkaychichu Tata Dioswan parlayta. Chashna mana shaykushpa paywan parlashpa agradesiychi. ³ Tata Diosta roygaychi ñukaykunata yanapawanankunapa Jesukristu salvakuk kananta manara yachak runakunata allita yachachinaynikunapa. Chayta yachachikuskaynirayku kay karselpi kani. ⁴ Tata Diosta roygaychi atipanaynipa allita yachachikuya tukuy runakuna allita entiendinankunapa.

⁵ Jesukristuta mana kreyik runakunapa ñawpagninkunapi allita rurashpa kawsaychi. Jesukristu salvawananchikunata parlayta atipashpaykichi parlachiychi. ⁶ Paykunawan allillapi kuskata kushikushpa parlayschi. Paykuna imatapish tapushuptikichi yachanaykichi tiyan allillapi sukta suktaya niyisapata.

Pablu wawkinkunata rimachin.

⁷ Kay munananchikuna wawkinchi Tikiko Jesukristuta sirvikmasini kashpa sukaman allita yanapawashka yachachikuya. Paymi willashunkichi imashnami kaypi kawsaykani nishpa. ⁸ Kankunaman paytaka kachashkani willashunaykichipa imashnami kawsaykanisapa nishpa animuchishunaykichipa ashwan allita Jesukristuta kreyinaykichipa. ⁹ Paywan tantalla llaktamasikichi munananchi wawkinchikuna Onesimo rinka. Payka Jesukristuta allita kreyishpa kawsan. Paykunami willashunkichi imashnami kawsaykanisapa nishpa.

¹⁰ Ñukawan tantalla kay karselpi wawkinchi Aristarko. Paypish rimachishunkichi. Wawkinchi Bernabepa primun Markospish rimachishunkichi. Nami willashkaykichina Markos kankunaman riptin allita chaskinaykichipa.

¹¹ Chaymanta wawkinchi Jesuspish rimachishunkichi. Paypa suknin shutin Justo. Jesukristuta kreyik judiyu runakunamanta chay wawkinchikunalla ñukawan tantalla Tata Dios kamachikuk kananta

yachachikushkasapa. Chashna ñukawan yachachikushpa sukaman kushichiwashkasapa.

¹² Wawkinchi Epafraspish rimachishunkichi. Payka Jesukristuta sirvikmi. Llaktamasikichi kashpa Tata Diosta kankunapa sukaman royan. Chashna royashpa munan mana shaykushpa Jesukristuta kreyishpa Tata Diospa munananta sukaman allita rurashpa kawsanaykichipa.

¹³ Allita willaykichi wawkinchi Epafras kankunapa sukaman Tata Diosta royananta. Chaymanta Laodisea llaktapi Yerapolis llaktapi kawsak wawkinchikunata kuyashpa sukaman paykunapa Tata Diosta róyan.

¹⁴ Kay munananchi wawkinchi doktor Lukas wawkinchi Demaspish rimachishunkichi.

¹⁵ Chaymanta Laodisea llaktapi kawsak wawkinchikunata rimachipaychi. Wawkinchi Ninfotapish rimachipaychi. Wawkinchi Ninfopa wasinpi tantanakuk wawkinchikunatapish rimachipaychi.

¹⁶ Kay kartaynita leyishkaykichiwasha Laodisea llaktapi kawsak wawkinchikunaman kachaychi paykunapish leyinankunapa. Chaymanta Laodiseaman kachashkayni kartatapish paykuna kachamushuptinkuna leyaychi.

¹⁷ Wawkinchi Arkipota kayta willaychi: “Jesukristu willashurkan rimananta yachachikunaykipa. Chay willashushkanta allita ruray.”

¹⁸ Kay rimachinaynikunata kikini killkaykani yachanaykichipa ñuka Pablu killkashkaynita. Ama kunkaychichu kay karselpi kanaynita. Tata Diosta royani yanapashunaykichipa. Chayllatami killkaykichi.

1 TESALONISENSES PABLUTESALONIKA LLAKTAPI KREYIKUKMASINKUNATA KILLKARKAN

Tesalonikapi kawsak runakuna aypa partipi Tata Diospa rimananta yachachikurkansapa.

¹ Munanayni wawkinikuna, paninikuna, ñuka Pablu wawkinchi Silvanowan wawkinchi Timoteowan kay kartata Tesalonika llaktapi Jesukristuta kreyikmasinikunata killkaykaykichi. Kankuna Tata Dioswan Jesukristtuwan tantalla kuyanakushpa kawsaykankichi. Munani Tata Dioswan Señorninchi Jesukristu yanapashunaykichipa kushichishunaykichipa.

² Ñukaykuna Tata Dioswan parlashpaynikuna kankunata yuyashpa payta agradesinisapa allita paywan kawsaykaptikichi.

³ Tata Diosninchawan parlashpaynikuna willanisapa kankuna sukanan payta kreyishpa trabajashkaykichita. Tata Diosta kuyashpa tukuy runakunata sukanan yanapashpa kawsashkankichi. Jesukristu shamunanta shuyaykashpaykichi sukanan sufrishpaykicipish mana shaykushpa payllata katiykankichi.

⁴ Wawkinikuna, paninikuna, ñukaykuna yachanisapa Tata Dios sukanan kuyashushpaykichi akllashushkaykichita paypa wambrankuna kanaykichipa. ⁵ Kankunata Jesukristu salvakuk kananta yachachiptinikuna Tata Diospa Espiritun sukanan allita yanapawarkansapa yachachinaynikunapa. Mana rimanaynikunallawanchu yachachishkaykichi. Allita yakashkanisapa yachachishkaykuna alli kananta. Kankunawan kashpaynikuna allita rurashpa kawsarkanisapa allinikchita maskashpa.

⁶ Kankunapish ñukaykunashina Jesukristushina allita rurashpa kawsarkanichi. Tata Diospa Espiritun kushichishuptikichi sukanan padesiykashpaykicipish paypa rimananta sukanan kushikushpa kreyirkankichi.

⁷ Chashna Jesukristuta allita kreyishpa kawsaptikichi Masedonia partipi Akaya partipi Jesukristuta kreyik runakuna animukunsapa kankunashina kawsayta. ⁸ Kankunamanta suk wawkinchikuna Masedonia partiman Akaya partiman aypa partikunaman rirkansapa Tata Diospa rimananta yachachikuk. Chashna allita yachachikuptinkuna aypa runakuna yachansapa kankuna allita Tata Diosta kreyishpa kawsaykanaykichita. Chayrayku chay partikunapi ñukaykuna manana nimata parlachikunisapanachu.

⁹ Chay llaktakunapi kawsakkuna tukuy pita parlachinsapa kankunaman riptinkuna allita chaskiwashkaykichita. Parlachikunsapa kankuna ruradu dioskunata sakishpa mana tukuyniyuk kawsak mana llullakuk Tata Diosta kreyishpa sirvishpa kawsaykanaykichita. ¹⁰ Chaymanta chay runakuna parlachikunsapa kankuna sielumanta Tata Diospa wambran Jesukristuta shuyaykanaykichita. Jesukristu wañushkanmanta kawsamushpa uchanchikunamanta perdonawanchisapa ama Tata Dios piñakushpa kastigawananchikunapa.

¹ Wawkinikuna, paninikuna, kankuna yachankichi ñukaykuna pasyaknikichi riptinikuna sukaman kushikushpa kreyiwashkaykichita. Mana yankamantachu rishkanisapa. ² Yachankichi manara kankunaman riptinikuna Filipos llaktapi runakuna sukaman chickriwashpangkuna makawashkankunata. Piñakushpa rimarkansapa mana alli rurak runakuna kanaynikunata. Llaktaykichi pi chickriwaptinkunapish Tata Dios yanapawarkansapa mana manchakushpa Jesukristu salvakuk kananta sukaman allita yachachikunaynikunapa.

³ Allita yuyashpalla yachachishkaykichi. Mana llullachikushpaynikuna mana nimata kankunamanta munashpaynikuna Tata Diospa rimananta allita yachachishkaykichi. ⁴ Tata Dioska willawashkasapa alli yachachikkuna kanaynikunata. Kachamuwashkasapa Jesukristu salvakuk kananta yachachikunaynikunapa. Chayrayku ñukaykuna Tata Diosllata munanisapa kushichiya rikchak laya yuyayninchikunata yachak kaptin. Mana munanisapachu runakanallata kushichiya.

⁵ Kankuna yachankichi ñukaykuna niman suk kuti mishki shimi tukushpa alabashkaynikunata. Mana kullkikichita munashpachu yachachishkaykichi. Tata Diosmi tukuy chaykunata yachan. ⁶ Mana ni pita willashkanisapachu alabawanankunapa. Nima kankunata willashkaykichichu alabawanaykichi.

⁷ Jesukristu kachamuwashkankunaryku atipaymansapa willaynikichita sinchi kamachikuk kanaynikunata. Mana chashnachu kamachishkaykichi. Allillapi llakichishpaynikuna yachachishkaykichi. Iden wawankunata alli kuydak mamashina kankunata allita yachachishpaynikuna wiwashkaykichi. ⁸ Chay alli wawan wiwak mamashina sukaman kankunata kuyashpaynikuna sukaman munashkanisapa Jesukristu salvakuk kananta yachachiynikichita. Sukaman kuyashkaynikunaryku yanapashpa wañuymansapapish karkan.

⁹ Wawkinikuna, paninikuna, yuyankichi ñukaykuna diyapi tutapi sukaman sufrishpa trabajashkaynikunata mikunaynikunata wasinikunata tarinaynikunapa. Tata Diospa rimananta yachachikushpa mana munashkanisapachu nimata kankunata mañaynikichita.

¹⁰ Tata Dios yachan kankunapish yachankichi kankunawan tantalla kashpaynikuna allita rurashpa Tata Diospa munananllata rurashpa kawsashkaynikunata. Mana niman suk mana allita rurashkanisapachu.

¹¹ Yachankichi iden wambrankunata alli wiwak tatashina kankunata allita yachachishpa animuchishpa kawsashkaynikunata. ¹² Tata Dioska kayashushkankichi paypa mandunpi paywan tantalla kushikushpa kawsanaykichi. Chashna kayashuptikichi ñukaykuna sukaman yachachishkaykichi Tata Diospa wambrankuna kashpaykichi allita rurashpa kawsanaykichi.

¹³ Ñukaykuna Tata Diospa rimananta yachachikuptinikuna kankuna allita kreyishkankichi. Yachashkankichi Tata Diospa rimanallata mana ñukaykunapa munanaynikunatachu yachachikushkaynikunata. Tata Diospa rimananta tukuy shunku kreyiptikichi payka sukaman yanapashushkankichi allita rurashpa kawsanaykichi. Chayrayku ñukaykuna Tata Diosta sukaman agradesinisapa.

¹⁴ Wawkinikuna, paninikuna, llaktamasikichi kankunata chiknishushpa sufrichishuptikichi iden chay Judea partipi Tata Diosta kreyikmasikichishina sufriykankichi. Chay Judea partipi kawsak judiyu runakuna Jesukristuta kreyikmasikichitapish kankunatashina sukaman sufrichirkansapa. ¹⁵ Judiyu awilunchikuna ñawpa tiempu Tata Diospa

rimananta yachachikuk runakunatapish wañuchirkansapa. Jesukristutapish wañuchirkansapa. Ñukaykunatapish chikniwashpankuna llaktankunamanta kallpachiwarkansapa. Tata Diostapish mana kushichinsapachu. Tukuy runakunata chikninsapa.

¹⁶ Ñukaykuna chay mana judiyu runakunata yachachinayaptinikuna judiyumasinikuna mana munansapachu yachachikunaynikunapa. Mana munansapachu Tata Dios chay mana judiyukunata salvanankunapa. Chayta mana munashpankuna sukaman uchallikuykansapa. Chayrayku Tata Dios sukaman sinchita piñakushpa kastigankasapa.

Pablu rinayan wawkinkunata pasyak.

¹⁷ Wawkinikuna, paninikuna, suk tiempullata kankunata sakishpaynikuna mana kawashpaynikunapish sukaman yuyaykaykichi. Sukaman munanisapa riyta kawaknikichi. ¹⁸ Ñukaykuna rinayarkanisapa kawaknikichi. Aypa kuti ñuka Pablu rinayarkani. Rinayaptinikunapish supay mana munarkanchu rinaynikunapa. ¹⁹ Ñukaykuna yachanisapa kankuna allita rurashpa kawsanaykichita. Chayta yachashpaynikuna sukaman kushikunisapa. Yachachikunaynikunata allita kreyiptikichi sukaman kushikunisapa. Chaymanta Jesukristu kashkan shamuptin kankunarayku sukaman kushikushasapa. ²⁰ Ariya kankuna Jesukristuta kreyiptikichi kushikunisapa.

3

Pablu Timoteota Tesalonikaman kacharkan yachanayashpa imashnami kawsaykansapa nishpa.

¹ Chaymanta sukaman kankunata yuyashpa munashkanisapa yachayta allitachu manachu kawsaykankichi nishpa. Mana atipashpaynikuna riyta kay Atenas llaktapi yuyarkani sapallayni kipariya. ² Kankunaman wawkinchi Timoteota kacharkanai chapashuknikichi. Chay wawkinchika sukaman allita Tata Diosta kreyishpa yanapawashkasapa Jesukristu salvawananchikunata yachachikuytā. Payta kacharkanisapa kushichishunaykichipa animuchishunaykichipa ashwanta Jesukristuta tukuy shunku kreyishpa kawsanaykichipa. ³ Chay wawkinchika yachachishushkankichi sufrishpaykic平ish Tata Diosta katinaykichillapa. Kankuna yachankichina tukuy Jesukristuta kreyikkuna sufrinanchikunata.

⁴ Ñukaykuna kankunawan kashpaynikuna yachachishkaykichi sufrinanchikunata. Chay yachachishkaynikunashina sufriyankankichi.

⁵ Chayrayku sukaman yachanayashkanisapa allitachu manachu Tata Diosta katiyankankichi nishpa. Wawkinchi Timoteota kachashkani tapushunaykichipa Jesukristuta kreyiyankankichi manachu nishpa. Yuyashkanisapa supay mana alli ruranata munachishuptikichi ichará Tata Diosta manana kreyiyankichinachu. Yuyashkanisapa ichará yankapa yachachishkaynikunata.

⁶ Kunanka Tesalonika llaktaykichimanta wawkinchi Timoteo kutimushkana. Willawashkasapa kankuna allillata Jesukristuta kreyishpa kuyashpa katiykanaykichita. Willawashkasapa ñukaykunata kuyawashpaykichi sukaman watukuwanaykichita. Kankunata sukaman kawanayanaynikunashina kankunapish kawawanayankichi.

⁷ Wawkinchi Timoteo willawaptinkuna Jesukristuta allita katiykanaykichillata llakidu kashkaynikunamanta sukanan kushikunisapa. ⁸ Allita Jesukristuta katiykanaykichita yachashpaynikuna sukanan kushikushkanisapa. ⁹ Sukaman kushikushpaynikuna Tata Diosta agradesinisapa payta allita kreyiykaptikichi. ¹⁰ Diyapi tutapi Tata Diosta royanisapa almitiwanankunapa rinaynikunapa kawaknikichi. Yachachinayaykichi ashwan allita Jesukristuta kreyishpa kawsanaykichipa.

¹¹ Chashna kawaynikichita munashpaynikuna Tata Diosninchita Señorninchi Jesukristuta sukanan royanisapa yanapawanankunapa rinaynikunapa kawaknikichi. ¹² Munanisapa Tata Dios ashwanta yachachishunaykichipa ashwanta sukan sukan kuyanakushpa kawsanaykichipa. Ñukaykuna kankunata kuyashkaynikunashina munanisapa kankuna tukuy runakunata kuyashpa kawsanaykichipa. ¹³ Munanisapa Tata Dios yanapashunaykichipa allita payta kuyashpa allita rurashpa kawsanaykichipa. Chashna mana uchallikushpa kawsaptikichi Señorninchi Jesukristu tukuy katikninkunawan shamuptin mana ni pi Tata Diosninchipi chatashunkichichu.

4

Pablu yachachikun Tata Diosta kushichishpa kawsananchikunapa.

¹ Wawkinikuna, paninikuna, Jesukristu yachachiwashkankunata ñukaykunapish yachachiykichi. Kankunapish allita Tata Diosta kushichishpa kawsaykankichi. Chayrayku kankuna Jesukristuwant tantalla kawsaptikichi roygaykichi ashwan ashwanta Tata Diosta kushichishpa kawsanaykichipa.

² Kankuna yachankichi Jesukristu kachamuwaptin imakunatami yachachishkaykichi nishpa. ³ Tata Dios munan payllapa munananta rurashpa kawsananchikunapa. Mana munanchu chikan warmiwan chikan ullkuwan uchallikushpa kawsanaykichipa. ⁴ Tata Dios munan yachanaykichipa paypa munananta rurashpa warmikichita kuyashpa kawsanaykichipa. ⁵ Ama chikan warmita munashpa kawsaychichu mana Tata Diosta riksik runakunashina.

⁶ Ama munaychichu wawkipichipa kawsananta wakllichiyta warminwan uchallikushpa. Ñami yachachishkaykichina chikan warmiwan uchallikuptikichi Tata Dios sinchita kastigashunaykichita. ⁷ Tata Dios kayawashkanchisapa paypa munananta rurashpa kawsananchikunapa. Mana munanchu mana allita rurashpa kawsananchikunapa. ⁸ Tata Diroska Espiritunta kachamushka yanapawananchikunapa allita rurashpa kawsananchikunapa. Chayrayku kay yachachishkaynikunata mana munashpaykichika Tata Diosta washanchaykankichi. Mana ñukaykunatachu washanchawaykankichi.

⁹ Tata Dios yachachishuptikichi yachankichina sukan sukan kuyanakushpa kawsayta. Chayrayku manana munaninachu killkashpa kashkan yachachiynikichita. ¹⁰ Kankuna tukuy Masedonia partipi Jesukristuta kreyikmasikichiwan kuyanakushpana kawsaykankichi. Roygaykichi, wawkinikuna, paninikuna, ashwanta kuyanakushpa kawsanaykichipa. ¹¹ Kushikushpalla kikikichillapa trabajuykichita rurashpa kawsaychi. Yachachishkaynikunashina mana killakushpa makikichiwan trabajashpa kawsaychi. ¹² Allita trabajashpa kawsaychi tukuy llaktamasikichi yachanankunapa alli rurak kanaykichita ama nima illapushunaykichipa.

Pablu yachachikun Jesukristu kutimunanta.

¹³ Wawkinikuna, paninikuna, munanisapa yachanaykichipa Jesukristuta kreyishpa wañushpanchikuna rinanchikunata paywan kawsak. Chayta yachashpaykichi Jesukristuta kreyikmasinchikuna wañuptinkuna mana sukananchu llakinkichi Jesukristuta mana kreyik runakunashina.

¹⁴ Yachanchisapa Jesukristu wañushkanmanta kawsamushkanta. Payta kreyishpa kawsashpanchikuna yachanchisapa Jesukristu shamuptin Tata Dios wañudu kashkanchikunamanta kawsachimuananchikunata.

¹⁵ Chaymanta Jesukristu yachachiwaptinkuna ñukaykuna kayta willaykichi: Jesukristu kashkan kutimushpa tukuy payta kreyishpa wañushka runakunata primeru kawsachimunkasapa. Ñukanchikuna kay allpapira kawsayakashpanchikunara chay wañudukunamanta mana ñawpashunchisapachu. ¹⁶ Señorninchi Jesukristu kikin sinchita kamachikushpa sielumanta urayamunka. Suk kamachikuk angel Tata Diospa trompetanta pukushpa sukanan sinchita rimanka Jesukristu shamanunta. Chashna Jesukristu shamuptin payta kreyik wañudu runakuna primeru kawsamunkasapa. ¹⁷ Chaypina Jesukristuka tukuy ñukanchikuna kawsayakkunata chay kawsachimudu runakunawan tantallata alsawashunchisapa. Chaypina puyu ukunpi altupi paywan tinkunakushunchisapa. Chashna pushawaptinchikuna paywan tantalla mana tukuyniyukta kawsashunchisapa. ¹⁸ Tukuy kay yachachishkaynikunata sukwana sukwana yachachinakushpa kushichinakushpa kawsayachi.

5

Jesukristu shamunan tiempukaman akuychi Tata Diosta kasushpa kawsaypachi.

¹ Wawkinikuna, paninikuna, kankuna yachankichi Tata Dios munanan tiempupi Jesukristu kashkan shamananta. ² Allita yachankichi mana yuyananchikuna orapi Jesukristu kashkan shamunanta iden tutapi suwa runa shamukshina. ³ Suk okupada warmi mana yachanchu ima orami nanay apinka nishpa. Chashnami mana Jesukristuta kreyik runakuna mana yachansapachu ima orami kullunkasapa nishpa. Paykuna kushikushpalla kawsayakanankunata rimaptinkuna Jesukristu raslla shamunka kulluchik-sapa. Chashna shamuptin mana kastigumanta kishpinkasapachu.

⁴ Wawkinikuna, paninikuna, kankuna Jesukristuta kreyishpa allita rurashpa luspishina kawsaykankichi. Chashna luspishina kawsayakash-paykichi yachankichi Jesukristu shamunanta. Chayrayku suwa runashina shamuptin mana manchakunkichichu. ⁵ Allita rurashpa kawsayakashpanchikuna luspishina kawsaykanchisapa. Manana tutapishinanachu kawsaykanchisapa. ⁶ Chayrayku Jesukristuta allita yuyashpa allita kreyishpa kawsaypachi. Ama kawsaypachichu mana kreyikuk runakunashina.

⁷ Jesukristuta mana kreyinayak runakuna mana allita rurashpa tutapishina kawsaykansapa. Iden machadukunashina mana allita yuyaykushpa tutapishina kawsansapa. ⁸ Chaymanta ñukanchikuna luspishina kawsashpanchikuna kikinchilla kamachinakushpa kawsananchikuna tiyan. Yuyayninchikunaman suk mana alli yuyaykuna shamuptin Jesukristullata allita kasushpa allita kuyashpa kawsaypachi. Jesukristu salvawananchikunapa shamunanta yuyaypachi. Chashna Jesukristu shamunanta yuyashpanchikuna suk soldadu umanpi arkanan kaskuta churakudushina kanchisapa.

⁹ Tata Dios akllawarkanchisapa Jesukristu wañushkanrayku salvawananchikunapa. Mana piñakushpa kastigawananchikunapachu akllawarkanchisapa. ¹⁰ Jesukristu ñukanchikunarayku wañurkan kay allpapi kawsashpanchikuna sielman rishpanchikunapish paywan tantalla kawsananchikunapa. ¹¹ Kankuna tukuy chayta yachashpa sukwani kushichinakushpa animuchinakushpa kawsaykankichi. Kunanmantapacha ashwan ashwanta kushichinakushpa animuchinakushpa kawsaychi.

Pablu animuchiwanchisapa ashwan allita Jesukristuta kreyishpa kawsananchikunapa.

¹² Wawkinikuna, paninikuna, roygaykichi Jesukristuta kuyak kamachishuknikichita yachachishuknikichita kuyanaykicipha. ¹³ Paykunata sukmanta kuyanaykichi tiyan Tata Diospa rimananta yachachishuptikichi. Sukwan sukwani kuyanakushpa kawsanaykichi tiyan.

¹⁴ Wawkinikuna, paninikuna, willaykichi mana trabajanayak wawkinchikunata willanaykicipha allita trabajanankunapa. Shaykudu wawkinchikunata animuchiychi. Katishkankunamanta sampayadukunata yanapaychi. Tukuy piwan alli modoyuklla kawsaychi.

¹⁵ Chaymanta llaktamasikichi mana allita rurashuptikichi ama kutipaychihu. Paykunata yanapaychilla. Jesukristuta kreyikmasikichiwan tukuy piwanpish yanapanakushpa kawsaychi. ¹⁶ Kushikushpalla kawsaychi. ¹⁷ Tata Dioswan parlashpalla kawsaychi. ¹⁸ Llakishpaykicipish kushikushpaykicipish Tata Diosllata agradesiychi. Tata Dios munan Jesukristuta kreyikkuna llakishpapish kushikushpapish payta agradesinanchikunapa.

¹⁹ Tata Diospa Espiritun ninashina kaptin ama payta sampayachiychichu. ²⁰ Tata Dios yanapaptinkuna ichará paninchikuna wawkinchikuna Tata Dios ruranayananta yachachishunkichi. Ama chay yachachishunaykichi chita washanchaychichu. ²¹ Suk yachachikuk runa yachachishuptikichi allita yuyaychi Tata Diospa rimanantachu manachu yachachishuykankichi nishpa. Tata Diospa rimanan kaptin chayta kasuychi. ²² Ama nima laya mana alli ruranakunata ruraychichu.

²³ Kushichiwakninchchi Tata Diosta roygani kikin yanapashunaykicipha allita rurashpa kawsanaykicipha. Tata Diosta roygani Jesukristu shamanankaman kuydashunaykicipha ama uchata rurashpa kawsanaykicipha. Chashna kuydashuptikichi payllata tukuy shunku kuyashpa payllata yuyashpa allita rurashpa kawsankichi. ²⁴ Tata Dios akllawashkanchikunarayku allita kuydawashunchisapa. Tukuy willawashkanchikunatami ruranku.

²⁵ Wawkinikuna, paninikuna, ñukaykunapapish Tata Diosta roygaychi.

²⁶ Tukuy chay llaktapi wawkinchikunata paninchikunata shutinipi rimachiychi. ²⁷ Tata Dios kachamuwaptin willaykichi kay killkashkaynikunata leyiyichi tukuy wawkinchikuna paninchikuna uyarinankunapa.

²⁸ Señorninchchi Jesukristuta roygani kankunata yanapashunaykicipha allita rurashpa kawsanaykicipha.

Ñuka Pablu chayllatami killkashkaykichi.

2 TESALONISENSES

PABLUS ISHKAYNIN KUTI TESALONIKAPI KREYIKUKMASINKUNATA KILLKARKAN

Pablu Tesalonikapi kawsak wawinkunata paninkunata rimachinsapa.

¹ Munanayni wawkinikuna, paninikuna, ūuka Pablu wawkinchi Silvanowan wawkinchi Timoteowan kay kartata Tesalonikapi kawsak Jesukristuta kreyikmasinkunata killkaykaykichi. Kankuna Tatanchi Dioswan Señorninchi Jesukristuwan tantalla kawsaykankichi.
² Tata Diosninchita Señorninchi Jesukristuta royanisapa ashwanta yanapashunaykichipa kushichishunaykichipa.

Jesukristu shamuptin Tata Dios tukuy mana alli rurak runakunata kastigankasapa.

³ Wawkinikuna, paninikuna, kankuna Jesukristuta sukaman ashwan ashwanta kreyishpa kawsaykankichi. Ashwan ashwanta sukwan sukwan kuyanakushpa kawsaykankichi. Chayrayku ūukaykuna kushikushpa Tata Diosta agradesinisapa. ⁴ Chiknishuk runakuna padesischishuptikichipish Jesukristuta ashwanta kreyishpa kawsaykankichi. Chayrayku tukuy llaktakunapi ūukaykuna Jesukristuta kreyikmasinchikunata kushikushpa willanisapa kankuna mana shaykushpa Jesukristuta kreyishpa kawsaykanaykichta. ⁵ Kankuna padesishpaykichipish Tata Diosta allita kreyiptikichi payka willashunkichi mandunpi yaykunaykichipa. Tukuy runakuna chayta kawashpankuna yachankasapa Tata Dios kuskanpi kastigakuk kananta.

⁶ Tata Dios uchayuk runakunata kuskanpi kastigakuk kashpa chay padesischishuknikichi runakunata padesischinkasapa. ⁷ Suknin diya Jesukristu alli atipak angelinkunawan manllayba rawraykak nina ukupi sielumanta shamunka. Chashna shamushpa tukuy padesishkanchikunamanta kushichiwashunchisapa. ⁸ Shamunka Tata Diosta mana riksik runakunata kastiganankunapa. Señorninchi Jesukristu salvakuk kananta mana kreyikuk runakunata kastigankasapa. ⁹ Señorninchi Jesukristu paykunata mana tukuyniyukta kastigankasapa. Paymanta chikanman wishchunkasapa ama kawanankunapa sukaman allimata kamachikuptin kushichikuptin.

¹⁰ Jesukristu shamuptin tukuy payta kreyik runakuna tantalla kuyashun-chisapa. Payta sukaman almirashpa willashunchisapa sukaman allima kananta. Kankunapish yachachishkaynikunata kreyishkaykichirayku Jesukristuta kuyanaykichi tiyan.

¹¹ Chayrayku Tata Diosta kankunata royanisapa kayashushkaykichishina sukaman yanapashunaykichipa allita rurashpa kawsanaykichipa. Tata Dios tukuy laya alli atipak kaptin royanisapa yanapashunaykichipa tukuy alli munanaykichta rurashpa payllata kreyishpa kawsanaykichipa. ¹² Chashna Tata Dios sukaman yanapashuptikichi tukuy runakuna rimankasapa Señorninchi Jesukristu alli kananta. Chaymanta Tata Dioswan Jesukristu kuyashushpaykichi rimankasapa alli rurak kanaykichta.

¹ Wawkinikuna, paninikuna, ūukaykuna ūami yachachishkaykichina Jesukristu shamuptin rinanchikunata paywan tinkunakuk. ² Chaymanta tiyan llullachishunayak runakuna. Paykuna rimansapa Jesukristu kutimushkantana. Kartata kachashushkankichi rimashpa ūukaykuna kachashikaynikunata. ūukaykunaka manami chay kartata killkaraykichichu. Chay runakuna Tata Diospa Espiritu yanapananta rimaptinkunapish ama kreyiyichichu. Ama manchakushpa yuyaychichu Jesukristu kashkan shamushkantana.

³ Imatapish willashuptinkuna ama nima layapi chay llulla runakunata kreyiyichichu. Yachanchisapa manara Jesukristu kutimuptinra yaka tukuy runakuna Tata Diosta sukaman chiknishpankuna mana kasunayanankunata. Chaypina suk sakra mana alli rurak llullakuk runa shamunka. Tata Dios rimashka chay sakra mana alli rurak runata mana tukuyniyuk ninaman kachananpa. ⁴ Chay Tata Diosta chiknik runaka Tata Diospa wasinpi yaykushpa doyñuyanka. Chaypi tiyarishpa tukuy runakunata willankasapa paylla dios kaptin payllata kuyanankunata.

⁵ ¿Manachu yuyankichi chay llaktaykichi kashpaynikuna tukuy kayta yachachishkaynikunata? ⁶ Kankuna yachankichina pimi chay sakra runata michaykananta manara tiempun kaptin amara rikurinanza.

⁷ Kunan tiempu ūami aypa mana alli rurak runakuna pakallalla llullachikupi puriykansapa. Llullachikupi katinankuna tiyan chay sakra runata michaykak llukshinan tiempukaman. ⁸ Chaypina mana ni pi michak tiyaptin chay sakra mana alli rurak llullachikuk runaka rikurinka. Chaymanta Jesukristu allima llipyaynin ukupi shamushpa shiminwan pukushpa chay mana alli rurak runataka mana tukuyniyuk ninaman kachanka.

⁹ Jesukristu manara shamuptinra Satanas chay sakra mana alli rurak runata yanapaptin sukaman llullachikushpa manchakuna layata ruranka. ¹⁰ Chaypina tukuy laya mana allita rurashpa rawrak ninaman riykak runakunata sukaman llullachinkasapa. Chay runakunaka mana munarkansapachu Tata Diospa rimananta kuyashpa kasuya. Chayrayku Tata Dios chay rawraykak ninamanta mana salvankasapachu. ¹¹ Tata Dios paykunata sakinkasapa tukuy shunku llullata kreyinankunapa. ¹² Chay mana Tata Diospa rimananta kreyinayak runakuna sukaman kushikunsapa mana allita rurashpankuna. Chayrayku Tata Dioska kastigankasapa.

Tata Dios sukaman kuyawashpanchikuna animuchiwanchisapa allita rurashpa kawsananchikunapa.

¹³ Munanayni wawkinikuna, paninikuna, ūukaykuna kushikushpa Tata Diosta agradesinisapa kankuna paypa rimananta kreyiptikichi. Tata Diospa Espiritu yanapashuptikichi allita rurashpa kawsaykankichi. Tata Dios kuyashushpaykichi kallarinan tiempumantapacha akllashushkankichi salvadu kanaykichi. ¹⁴ ūukaykuna Tata Dios salvawananchikunata yachachikuptinkuna payka kayashushkankichi allita kreyishpa kawsanaykichi. Kayashushkankichi sielman rinaykichi Señorninchi Jesukristutwan tantalla sukaman kushikushpa kawsanaykichi.

¹⁵ Wawkinikuna, paninikuna, yachachishkaynikunata killkashkaynikunata allita kreyishpa mana kunkashpa kawsaychi.

¹⁶ Kikin Señorninchi Jesukristu Tata Diósñinchiwan mana tukuyniyukta kuyawashpanchikuna sukaman kushichiwashunchisapa. Willawashkanchisapa sielman rinanchikunata paywan tantalla kawsak. ¹⁷ Chayrayku Tata Diosta roygani kankunata animuchishunaykichiyanapashunaykichi allita rurashpa allita rimashpa kawsanaykichi.

3

Pablu wawkinkunata paninkunata royan paypa oranankunapa.

¹ Wawkinikuna, panikuna, Señorninchi Jesukristupa yachachikunanta kushikushpa allita chaskishkankichi. Chayrayku roygaykichi ñukaykunapa Tata Diosta royanaykicipa tukuy partikunaman riptinikuna allita yachachikunaynikunapa. Chashna allita yachachikuptinikuna aypa runakuna kankunashina Jesukristu yachachikushkanta allita chaskinkasapa. ² Manara tukuy runakuna Jesukristuta kreyinsaparachu. Chayrayku Tata Diosta roygaychi sakra mana alli rurak runakunamanta amachawanankunapa.

³ Jesukristu alli rurak kashpa kankunata sukaman allita yanapashunkichi allita rurashpa kawsanaykicipa. Amachashunkichi ama supay wakllichishunaykicipa. ⁴ Jesukristu sukaman yanapawaptinkuna ñukaykuna yachanisapa kankuna yachachishkaynikunata allita kreyishpa kawsaykanaykichita. Yachanisapa allita kasushpa katinaykichita.

⁵ Tata Diosta roygani yanapashunaykicipa sukta sukta allita kuyanaykicipa. Roygani padeshipaykicipish Jesukristushina mana sampayashpa allita rurashpalla kawsanaykicipa.

Pablu yachachiwanchisapa allita trabajananchikunapa.

⁶ Wawkinikuna, paninikuna, Jesukristu ñukaykunata yachachiwaptinkuna willaykichi tukuy mana trabajanayak wawkinchikunamanta ashunaykicipa. Sukkuna yachachishkaynikunata mana kasunayaptinkuna paykunamanta ashuychi. ⁷ Yachankichi ñukaykuna kankunawan kashpaynikuna mana killakushpa sukaman trabajashpa kawsashkaynikunata. Chashnashina kankünapish mana killakushpa trabajashpa kawsaychi. ⁸ Kankunawan kashpaynikuna tukuy mikushkaynikunapa pagarashkaykichi. Diyapi tutapi sukaman trabajashkanisapa ama amichinaynikunapa mikunaynikunata mañashpa. ⁹ Alli kanman karkan kankunata mikunaynikunata mañianaynikunapa. Mana nimata mañashpaynikuna trabajarkanisapa ñukaykunata kawawashpaykichi yachanaykicipa allita trabajayta. ¹⁰ Kankunawan kashpaynikuna kayta yachachishkaykichi: Suk wawkinchi mana trabajanayashpa ama mikuchunchu.

¹¹ Yachashkanisapa suk kankunashi mana trabajanayankichichu. Wasin wasin chapakuypishi puriykankichi. ¹² Jesukristu yachachiwaptinkuna chay mana trabajanayak wawkinchikunata willanisapa: Kushikushpalla mikunankunapa trabajachunsapa.

¹³ Wawkinikuna, paninikuna, ama shaykuychichu allita rurashpa kawsayta. ¹⁴ Suk wawkinchi suk paninchi kay yachachishkaynikunata mana allita kasushpa kawsaptin ama paywan tantanakuychichu. Payta mana kasuptikichi mana alli rurashkankunamanta pinkakunka. ¹⁵ Chay mana kasukunayak wawkinchita paninchita ama chikniyichichu. Wawkinchi paninchi kaptinkuna kuyashpalla yachachiychi kashkan allita rurashpa kawsanankunapa.

Pablu kartanta tukuchashpa wawkinkunata rimachinsapa.

¹⁶ Kushichikuk Señorninchi Jesukristuta roygani tukuy tiempu kankunatapish kushichishunaykicipa. Payta roygani kankunawan tantalla kawsanarpa.

¹⁷ Ñuka Pablu kay kartata tukuchashpa kikini makiniwan killkashpa rimachiykichi.

Tukuy kartaynikunata tukuchashpayni shutinita killkani yachanay-
kichipa ñuka kikini killkashkaynita. ¹⁸ Munani Señorninchi Jesukristu tukuy
kankunata sukaman yanapashunaykichipa.
Chayllata ñuka Pablo killkashkaykichi.

1 TIMOTEO PABLУ TIMOTEOTA KILLKARKAN

Pablу Timoteota rimachin.

¹ Munanayni wawkini Timoteo, salvawakninchи Tata Dios munaptin Jesukristu kachamuwashka paypa rimananta yachachikunaynipa. Pay kutimunanta shuyaykanchisapa. ² Jesukristuta allita kreyishkaykirayku willayki wambrayni kanaykita. Kay kartata killashpa munani Tata Diosninchи Señorninchи Jesukristuwan yanapashunaykipa kuyashunaykipa kushichishunaykipa.

Pablу Timoteota yachachin paypa alli yachachikunanta ama sakinanpa.

³ Masedonia partiman rishpayni willashkayki Efeso llaktapi kiparinykipa. Willashkayki chaypi kawsak mana alli yachachikuk runakunata yachachinaykipa ama chikan layata yachachikunankunapa. ⁴ Chay runakunata yachachiysapa ama kasunankunapa ñawpa awilunkunapa kuentunkunata mana tukuk parlunkunata. Chay kuentunkunata sukaman kasushpankuna ayninakushpa kawsansapa. Chay parlunkuna mana nimapi yanapansapachu Tata Diospa munananta kasushpa ruraya.

⁵ Chayta willashkayki yachachikunaykipa tukuy shunku Jesukristuta kreyishpa kawsanankunapa. Yachachiysapa allita rurashpa kawsanankunapa yuyayninkuna mana nimapi chatanankunapa mana nima estorbo tiyapunankunapa. Chaypina atipankasapa sukwан sukwан kuyanakushpa kawsayta.

⁶ Suk wawkinchikuna Tata Diospa alli yachachikushkanta mana kreyinayashpankuna ayninakushpalla kawsansapa. ⁷ Chay runakuna Tata Diospa kamachikunankunata mana allita entiendishpapish yachachikunayansapa. Nima kikinkunapa yachachikunankunata entiendinsapachu. ⁸ Yachanchi Tata Diospa kamachikunankuna alli kananta munanantashina yachachikuptinchikuna. ⁹ Yachanchi Tata Dios kamachikunankunata mana kuskankunata alli rurak runakunapa. Mana kasukukkunapa sakra likidu mana alli rurakkunapa kurkansapa. Uchallikkukkunapa Tata Diosta mana kuyakkunapa, mamanta tatanta wañuchikkunapa, runamasinkunata wañuchikkunapa kurkansapa. ¹⁰ Tata Dios kamachikunankunata chikan warmiwan kawsak runakunapa kurkansapa. Warmiwanshina ullkupuralla tantanakuk runakunapa, runamasinta rantikuk runakunapa kurkansapa. Llullakushpa jurak runakunapa, llullachikuk runakunapa, alli yachachikukkunata mana kasunayak runakunapa kurkansapa.

¹¹ Yanapawakninchи Tata Dios ñukata kachamuwashka alli rimananta yachachikunaynipa. Chay alli rimananka willawanchisapa Jesukristu allimata salvawananchikunata.

Pablу kushikun Tata Dios sukaman kuyaptin.

¹² Señorninchи Jesukristu riksiwarkan alli yachachikuk kanaynita. Chayrayku sukaman atipachiwashpa kachamuwashka rimananta yachachikuk. Chashna kachamuwaptin sukaman agradesini. ¹³ Ñawpa tiempu Jesukristuta sukaman chiknishpa rabyachiptinipish Tata Dios llakichiwashpa kuyawarkan. Manara Jesukristuta kreyik kashpaynira payta kreyik runakunata sukaman sufrichirkani. Chashna sufrichishpayı mana yacharkanichu mana allita ruraykanaynita. ¹⁴ Mana allita

ruraptinipish Señorninchi Jesukristu sukaman llakichiwashpa sukaman yanapawashka payta kreyishpa kuyashpa paywan tantalla kawsanaynipa.

¹⁵ Mash uyariway suk alli rimanata yachachiptini: Tukuy runakuna kreyinankuna tiyan kay allpaman Jesukristu shamushkanta uchankunamanta salvanankunapa. Ñawpa ñuka Jesukristuta kreyik runakunata sufrichishpa kawsak kani. Chayrayku yuyanakuni tukuy runakunamanta ashwan uchasapa kanaynita. ¹⁶ Chashna uchasapa kaykaptinipish Tata Dios sukaman llakichiwashpa salvawashka tukuy runakuna yachanankunapa Jesukristu llakichiwananchikunata. Chayta yachashpangkuna paykunapish ñukashina Jesukristuta kreyinkasapa sielman rinankunapa paywan mana tukuyniyukta kawsak. ¹⁷ Chayrayku mana tukuyniyuk kamachiwakninch Tata Diosta sukaman kuyapachi. Mana kawashpanchikunapish akuychi mana tukuyniyukta mana wañuk Tata Diosninchita alabaypachi. Chashna kachun.

¹⁸ Wambrayni Timoteo, ñawpaka wawkinchikuna Tata Diospa munananta rimashpa willashushkasapa Tata Diospa rimananta yachachikunaykipa. Ñukapish willayki chay alli rimananta yuyashpa animukunaykipa suk alli makanakuk soldadushina allita yachachikunaykipa. ¹⁹ Jesukristuta allita kreyishpa kawsay. Suk runakuna mana allikunata rurashpa kawsashpa mana Tata Diosta kreyishpanachu kawsaykansapa. ²⁰ Himeneowan Alejandro katiyakashkankunamanta manana katinsapanachu. Chayrayku ñuka rimashkaní chay ishkay wawkinchikuna supaypá mandunpi kawsanankunapa. Chaypina yachakunkasapa amana Tata Diosta rabyachinankunapa mana allikunata rimashpangkuna.

2

Pablu yachachiwanchisapa Tata Dioswan parlananchikunapa.

¹ Mash allita uyariway. Tata Diosta kreyik runakunata yachachiysapa Tata Diosta royanankunapa tukuy runakuna payta kreyishpa kawsanankunapa. Yachachiysapa Tata Diosta agradesinankunapa sukaman yanapaptinkuna. ² Yachachiysapa tukuy llaktapi awtoridarninkunapa tukuy kamachikukninkunapa royanankunapa. Paykuna alli kamachikuk kaptinkuna ñukanchikuna kushikushpa Tata Diosta allita kreyishpa tukuy layapi allita rurashpa kawsashunchisapa. ³ Chashna paykunapa roygashpanchikuna allita ruranchisapa. Chaymanta salvawakninch Tata Diosta sukaman kushichinchisapa. ⁴ Tata Dios sukaman munan tukuy runakunata salvayta. Munan tukuy runakuna rimananta yachanankunapa.

⁵ Tata Dioska suklallami. Ñukanchikuna uchanchikunaryku paymanta ashudu karkanchisapa. Chaymanta suk runalla atipan Tata Diosman pushawayninchikunata paywan tantalla kawsananchikunapa. Chay pushawakninchikuna runaka Jesukristumi. ⁶ Jesukristuka wañushpa rantiwarkanchisapa wañuymana salvawananchikunapa. Tata Dios munashkan tiemu yachachiwashkanchisapa Jesukristu wañushpa rantiwananchikunata.

⁷ Tata Dios ñukata akllawashpa kachamuwashka paypa rimananta mana judiyu runakunata yachachinaynipasapa payta kreyishpa kawsanankunapa. Mana llullakunichu. Deverastami Tata Dios kachamuwashka mana judiyu runakunata yachachinaynipasapa. ⁸ Chashna kaptin munani tukuy llaktakunapi tukuy wawkinchikuna Tata Dioswan parlanankunapa. Munani tantanakushpa mana piñanakushpa mana ayninakushpa makinkunata atarichishpa Tata Dioswan parlanankunapa.

⁹ Chaymanta paninchikunata yachachini allimallata llachapakunankuna. Mana munanichu paninchikuna pinkakuna laya sukaman taksha llachapakunata churakuñankunapa. Mana munanichu aypa chaniyuk llachapakunata rantishpa churakuñankunapa. Paninchikunata yachachini allimallata chukchankunata allichanankunapa. Mana munanichu aypa chaniyuk kuriwan perlaswan sukaman sumachinankunapa. ¹⁰ Tata Diosta kuyashpa kushichik paninchikuna allita rurashpa kawsanankuna tiyan.

¹¹ Paninchikunata yachachinisapa alli yachachikuk runa yachachikuykaptin mana nima parlashpa uyarinankunapa. ¹² Mana munanichu paninchikuna kusankunata yachachinankunapa nima kamachinankunapa. Yachachinisapa Tata Diospa rimananta yachachikuykaptinkuna upallalla uyarinankunapa.

¹³ Tata Dios Adanta rurashkanwasha Evata rurarkan. ¹⁴ Chaymanta Evata supay llullachirkan. Mana Adantachu llullachirkan. Chaypina supay llullachiptin Evaka Tata Dios willashkanta manana kasunayashpa uchallikurkan. ¹⁵ Chashna kaptinpish warmikuna wawayashpa wawankunata wiwashpa allita rurashpa Jesukristuta tukuy shunku kreyishpa kawsashpankuna Tata Diosta kushichinkasapa.

3

Pablu yachachikun imashnami ansianukuna kawsankasapa nishpa.

¹ Kunanka suk allima rimanata willayki: Ansianukuna kreyikukmasinkunata allita kuydashpa yachashipha kawsanankuna tiyan. Chayrayku suk wawkinchi ansianu kanayashpaka alli trabajuta yuyan rurayta. ² Suk wawkinchi ansianu kanayashpa allillata rurashpa kawsanan tiyan ama ni pi rimanarpa mana allita rurashpa kawsaykananta. Warminllawan kawsanan tiyan. Allita yuyashpa Tata Diospa munananlata rurashpa kawsanan tiyan. Wasinpi maykan chayaptin kushikushpa chaskinan tiyan. Yachachikuya allita yachanan tiyan. ³ Chay wawkinchi ansianu kanayashpa mana machashpa mana makanakushpa mana piñanakushpa kawsanka. Mana kullkita sukaman munashpallachu kawsanka. Llaktamasinkunawan yanapanakushpa kuyanakushpa kawsanaran tiyan. ⁴ Tukuy wasinpi kawsakkunata allita kamachiyya yachanan tiyan. Wambrankunata allita yachachinan tiyan alli kasukuk ama aynidorkuna kanankunapa. ⁵ Chay wawkinchi wasinpi mana allita kamachikuya yachashpaka Tata Diospa wasinpipish mana allita kamachikuya yachankachu.

⁶ Suk wawkinchi mana unaytara Tata Diosta katiyaptinra mana allichu ansianu kananpa. Chayrak katiyak runa ichara kreyinakunman tukuy layata yachanananta. Chashna kreyinakuptin Tata Dios supaytashina kastiganka. ⁷ Ansianuka allita rurashpa kawsanan tiyan tukuy mana Jesukristuta kreyik runakuna rimanankunapa allita rurashpa kawsananta. Ansianu mana allita ruraptin ichara runakuna washanchanmansapa. Chaypina supay llullachinman ashwan mana allita rurananpa.

Pablu yachachiwanchisapa alli rurak runakunata akllananchikunapa diyakonokuna kanankunapa.

⁸ Chashnashina diyakonokuna allita rurashpa mana llullakushpa kawsanankuna tiyan. Mana llullachikushpa mana machashpa mana sukaman kullkita munashpa kawsanankuna tiyan. ⁹ Diyakonokuna Tata Diospa yachachikunanta tukuy shunku kreyishpa allita yachachikunankuna tiyan. Allita rurashpa kawsanankuna tiyan ama kikinkunapa yuyayninkuna chatanankunapa. ¹⁰ Kan diyakonokunata

akllashpayki kawanayki tiyan allitachu manachu rurashpa kawsaykansapa nishpa. Allita rurashpa kawsaykaptinkunaka almitinki diyakonokuna kanankunapa.

¹¹ Chashnashina paninchikunapish allita rurashpa kawsanankuna tiyan. Mana llullakushpa mana sukta sukta yuyashpa kawsanankuna tiyan tukuy runakuna rimanankunapa alli rurak warmikuna kanankunata.

¹² Diyakonokuna warminllawan kawsanankuna tiyan. Wambrankunata wasinpi kawsakkunata allita kamachiya yachanankuna tiyan.

¹³ Diyakonokuna allita rurashpa kawsaptinkunaka tukuy llaktamasinkuna rimankasapa alli rurak runakuna kanankunata. Chaypina chay diyakonokuna mana pinkakushpa ashwan allita Jesukristuta katishpa kawsankasapa.

Pablu Timoteota allima rimanata yachachin.

¹⁴ Ñuka mana unayashpa rinayani kawakniki. ¹⁵ Manara riya atipash-painira kay kartata killayki yachanaykipa Tata Diospa wambrankuna sukwana sukwana kuyanakushpa kawsanankunapa. Kawsak Tata Diospa wambrankuna kashpanchikuna paypa wasinshina kanchisapa. Paypa rimananta kuskata allita yachachikushpanchikuna wasin orkonninshina kanchisapa. ¹⁶ Allita yachanchi Tata Diospa rimanan tukuy runakunapa rimanankunamanta ashwan allima kananta:

Jesukristu sielumanta shamurkan runa kananpa.

Tata Diospa Espiritu willarkan alli rurak kashkanta.

Angelkuna Jesukristu nasishkanta wañushkanmanta kawsamushkanta kawarkansapa.

Disipulunku tukuy llaktakunapi yachachikurkansapa Jesukristu sal-vakuk kananta.

Chaypina tukuy partipi aypa runakuna payta kreyishpa kawsarkansapa.

Chaymanta Tata Dios Jesukristuta sielupi chaskirkan.

4

Sukkuna Jesukristuta kreyikmasinkunamanta ashunkasapa.

¹ Tata Diospa Espiritu allita willawanchisapa Jesukristu kashkan shamanun tiempu suk runakuna payta kreyishkankunamanta manana kreyinankunata. Llullachikuk supaykunapa yachachikunanta kreyishpa kawsankasapa. ² Llullachikuk runakunata kasunkasapa. Chay llullachikuk runakuna sukmanta mana allita ruraykashpankunapish rimansapa alli rurak kanankunata. Manana yuyansapanachu uchallikuykanankunata.

³ Chay llullachikuk runakuna yachachikunsapa mana allichu kasaranaykichipa nishpa. Llullachikushpa yachachikunsapa kay mikunata chay mikunata mikushpanchikuna uchallikuykananchikunata. Tata Dios tukuy layata rurarkan mikunanchikunapa. Chayrayku Jesukristuta kreyishpanchikuna paypa rimananta entiendishpanchikuna payta agradesishpa tukuy layata mikushunchisapa.

⁴ Tata Dios tukuy layata allita rurarkan. Chayrayku ñukanchikuna Tata Diosta agradesishpanchikuna tukuy layata mikunchisapa. Mana riman-chisapachu kay mikuna chay mikuna mana allichu nishpa. Chashna Tata Diosta agradesishpa ima laya mikunatapish mikushpanchikuna mana uchallikunchisapachu. ⁵ Tata Diospa rimananta kreyishpanchikuna payta agradesiptinchikuna ima laya mikuna kaptinpish alli mikunanchikunapa.

Pablu Timoteota yachachin allita yachachikunarpa.

⁶ Kanka Jesukristu salvakuk kananta allita kreyinki. Yachachikunaynikunata allita kreyishpa kawsaykanki. Tukuy chayta wawkinchikunata paninchikunata yachachishpapika Jesukristuta alli sirvikmi kanki.

⁷ Runakunapa mana valek kuentunkunata ama kasuychu. Tata Diosllata kuyashpa kawsay. ⁸ Allimi kuerpunchikunata kuydananchikunapa. Chaymanta kuerpunchita kuydananchikunamanta ashwan alli Tata Diosta allita kuyashpa kawsananchikunapa. Tata Diosta allita kuyashpa kawsashpanchikuna kay allpapi allimata kawsanchisapa. Chaymanta sielman rishunchisapa paywan kawsak.

⁹ Kay yachachikunayni allima kaptin tukuy runakuna kreyinankuna tiyan. ¹⁰ Chayrayku sukanman sinchita trabajashpa sufrishpa Tata Diospa rimananta yachachikunchisapa. Tukuy shunku yachanchisapa Tata Dios salvawananchikunata. Jesukristu wañurkan tukuy runakunata salvanankunapa. Ñukanchikuna payta kreyishpa kawsaptinchikuna salvawanchisapa.

¹¹ Tukuy kay yachachikunayita kanpish allita kamachikushpa yachachikuy. ¹² Allita rurashpa allita rimashpa kawsanayki tiyan. Jesukristuta allita kreyishpa tukuy runakunata kuyashpa kawsay. Chashna allita kawsaptiki tukuy runakuna kawashushpayki yachankasapa paykunapish allita rurayta. Waynalla kashpaykipish allita rurashpa kawsanayki tiyan ama ni pi washanchashunaykipa.

¹³ Manara kanpi chayaptinira Jesukristuta kreyikmasikikunawan tantanakushpayki paypa rimananta leyishpayki yachachishpa animuchiysapa.

¹⁴ Allita yuyay suk kuti ansianukuna Tata Dios yanapaptinkuna kanpa umaykipi makinkunata churashkankunata. Tata Diosta roygarkansapa yanapashunaykipa paypa rimananta yachachikunaykipa. Chashna Tata Diosta roygaptinkuna payka sukanman yanapashuykanki. ¹⁵ Chayta allita yuyay tukuy wawkinchikuna paninchikunata kawanankunata ashwan allita yachachikuykanaykita. ¹⁶ Allita kuydanakuy allita rurashpa kawsanaykipa allita Tata Diospa rimananta yachachikunaykipa. Chashna allita Jesukristuta kreyishpa kawsaptiki ñami salvaduna kanki. Chaypina chay uyarishuk runakunata yanapanakisapa paykunapish Tata Diosta kreyishpa salvadu kanankunata.

5

Pablu yachachikun imashnami viyudakunata yanapashunchisapa nishpa.

¹ Ichara suk vieju wawkinchi mana allita ruranman. Kan chay vieju wawkinchita kuyashpa mana piñakushpa tataykitashina allillapi yachachiy. Chaymanta wayna wawkinchikunatapish kuyashpa wawkitashina allilapi yachachiy.

² Vieja paninchita kuyashpa mamaykitashina allillapi yachachiy. Shipash paninchikunatapish kuyashpa iden panikitashina allillapi yachachiy.

³ Viyuda paninchikunata yanapay mana ni pi yanapak tiyaptin. ⁴ Suk viyuda paninchikunata wawankuna ñetunkuna tiyaptin paykunata yachachiy sapa mamanta kuyashpa yanapanankunata. Paykunata wiwashkankunaryku mamanta tatanta kuyashpa yanapashpa Tata Diosta kushichinsapa. ⁵ Wakcha viyuda mana ni pi familyan yanapananpa tiyaptin diyapi tutapi orashpa yachan Tata Dios yanapananpa. Chay laya viyudata yanapanaykichi tiyan. ⁶ Chaymanta kikinpa munananta rurashpa kawsak viyuda kawsananta wakllichin.

⁷ Jesukristuta kreyikkunata allita yachachiy sapa viyuda paninchikunata yanapanankunata ama ni pi paykunata washanchanankunata.

⁸ Jesukristuta kreyik runakuna mamankunata ayllunkunata yanapanankuna tiyan. Mana yanapashpankunaka Jesukristuta mana kreyik runakunamanta ashwan mana allita ruraykansapa.

⁹ Kunanka yachachiysi ima laya viyudakunatami yanapashunchisapa nishpa. Sokta chunka ashwan watayukta kusanllawan kawsashka viyudakunata yanapanaykichi tiyan. ¹⁰ Chay viyudata riksinanchikuna tiyan allita rurashpa kawsashkanta allita wawankunata wiwashkanta. Chay viyudata riksinanchikuna tiyan wasinpi maykan pasyaptin allita kushikushpa chaskishkanta, Jesukristuta kreyikmasinkunata kushikushpa yanapashkanta, sufrik runakunata yanapashkanta. Tukuy laya alli rurashkankunata kawashpanchikuna yanapananchikuna tiyan.

¹¹ Chaymanta paninchikuna viyuda shipashllara kaptinkuna ama paykunata akllaychu yanapanaykichipa. Paykunaka shipashllara kashpanku-nara ichara kikinkunapa munanankunallata ruranayashpa Jesukristu-manta ashushpa kawsanayanmansapa. ¹² Paykuna Jesukristullata sirviyta almitishkankunawasha mana sirvinayaptinkuna Tata Dios kastigankasapa. ¹³ Chay laya shipashllara viyuda killa likidu tukushpa wasin wasin purinsapa. Tukuy layata yachanayashpa sukta sukta yuyaypi purinsapa. Mana alli rimanata rimashpa kawsansapa.

¹⁴ Chayrayku munani chay shipashllara viyuda paninchikuna kashkan kasaranankunapa. Munani wawayashpankuna chay wawankunata allita wiwanankunapa. Chashna allita rurashpa kawsaptinkuna mana ni pi yuyankasapachu. ¹⁵ Suk paninchi viyudakuna manana Jesukristuta kreyi-nayashpana supayta kreyishpa kawsaykansapa.

¹⁶ Suk paninchikunapa familyan viyuda tiyaptinka familyanlla mana nimata michashpa yanapanankuna tiyan. Paykuna allita yanapaptinkuna Jesukristuta kreyikmasinkuna manana yanapankasapanachu. Chaypina mana ni pi yanapak tiyaptin viyudakunata atipankasapa yanapayta.

Ansanunchikunata yanapananchikuna tiyan.

¹⁷ Alli yachachikuk ansianuykichi allita kamachishuptikichi sukmankuyanaykichi tiyan. Tata Diospa rimananta allita yachachishuptikichi ashwan allita kuyashpa yanapanaykichi tiyan. ¹⁸ Chayrayku Tata Dios rimanapi willawanchisapa: “Toroykichita trabajachishpaykichi mana bosalchashpa mikunanta yakunta künaykichi tiyan.” Chaymanta willawanchisapa: “Suk runata trabajachishpaykichi chay trabajashkanpa pagaranaykichi tiyan.”

¹⁹ Suk runa maykan yachachikuk ansianuta kanpi chatakuptin ama kreyiychu. Ichará llullakushpa chatakuykan. Ishkay kimsa runakuna idenllata willashuptinkunara chaypira kreyinayki tiyan. ²⁰ Ansanukuna mana allita rurashpa kawsaykaptinkuna tukuy Tata Diosta kreyikku-napa ñawpaknинpi willanki amana mana allita rurashpa kawsanku-napa. Chashna chay ansianukunata willaptiki tukuy Jesukristuta kreyik-masikunka manchakunkasapa mana allikunata rurayta.

²¹ Kawawakninchí Tata Diospa ñawpaknинpi Jesukristupa ñawpaknинpi Tata Diospa aklladu angelkunapa ñawpakninkunapi allita willayki: Tukuy kay yachachikushkaynita tukuy runakunata pipish kaptin idenllata yachachiysapa. ²² Suk wawkikita ansianu kananpa munashpayki allita yuyay allitachu manachu rurashpa kawsaykan nishpa. Mana allita rurashpa kawsaptinka ama akllaychu ansianu kananpa. Mana allita kawsaptinka tukuy llaktamasikunka yuyashunkimansapana mana alli rurakmasin kanaykita. Ama yuyashunankunapa allita rurashpalla kawsay.

²³ Shunku nanaywan unkudulla kawsashpaykika ama yakullata upyaychu. Suk tipi vinutapish upyay nanayniki alliyananpa.

²⁴ Suk wawkinchikuna mana allita ruraptinkuna manara Tata Dios kastigaptinkunara kunanlla tukuy runakuna uchankunata yachansapa. Chaymanta suk wawkinchikuna pakallalla mana allita rurashpa kawsaptinkuna suk tiempu washanra yachanchisapa. ²⁵ Chashnashina suk wawkinchikuna allita rurashpa kawsaykaptinkuna kunanlla yachanchisapa. Suk wawkinchikuna alli ruranata ruraptinkuna manara yachanchisaparachu. Chashna pakallalla alli ruranata ruraptinkunapish suknin diya yachananchikuna tiyan.

6

Pablu rantidu runakunata yachachin patronpa allita trabajanankunapa.

¹ Wawkinchikuna rantidu kashpankuna patronninkunata allita kuyashpa kasushpa trabajanankuna tiyan. Mana allita trabajaptinkuna ichara patronninka rimanman Tata Dios mana alli kananta. Rimannman kay yachachikunanchi mana alli kananta. ² Chaymanta wawkinchikunapa patronnini Jesukristuta kreyikmasinkuna kaptinkuna paykunata ashwan allita uyarinankuna tiyan. Chay patronninkuna alli kuyadu wawkinkuna kaptinkuna mana piñakushpa nima aynishpa ashwan allita kasunankuna tiyan. Tukuy kayta allita yachachiysapa.

Pablu yachachiwanchisapa ama sukaman kullkita munananchikunapa.

³ Wakin runakuna chikan layata yachachikunsapa. Señorninch Je-sukristupa alli yachachikunanta mana munansapachu uyarinanchikunapa. Mana munansapachu yachachikunanchikunapa allita rurashpa kawsananchikunapa.

⁴ Chay mana alli yachachikuk runakuna kikinkunapura kreyinakunsapa. Tata Diospa rimananta mana entiendishpa kikinkunalla llullachinakushpa rimanankunaryakkulla ayninakunsapa. Chashna ayninakushpangkuna mana munansapachu llaktamasinkunapa ima tiyapunankunapa. Chikninakushpa yuyanakushpa mana ni pita kreyinayashpangkuna kawsansapa. ⁵ Mana kuskata yuyaykushpa sukaman sukwana sukwana ayninakunsapa. Tata Diospa rimananta mana entiendinsapachu. Yachachikunsapa kullkillata chaskinankunapa. Chay laya runakunamanta ashuy.

⁶ Deverasmi Jesukristuta kreyishpa kawsashpanchikuna ima tiyawakninchillawan kushikushpa kawsanchisapa. Chay kullkita munak runakunamanta ashwan kushikuyupuru kawsanchisapa. ⁷ Nasishpanchikuna mana nimata apamushkanchisapachu. Chaymanta wañushpanchikuna mana nimata apashunchisapachu. ⁸ Chayrayku mikunanchikuna llachapanchikuna tiyawaptinchikuna kushikushpalla kawsaypachi.

⁹ Wakin runakuna kullkiyayta munashpa kunanlla tukuy laya mana allita yuyaykushpa kawsansapa. Sukaman kullkita munashpangkuna mana alli munanankunata rurashpa kawsansapa. Chayrayku ashwan ashwanta wakllichinakuptinkuna Tata Dios kastigankasapa. ¹⁰ Chay runakuna kullkiyayta munashpangkuna tukuy laya mana allikunata rurashpa kawsansapa. Paykunaka Jesukristuta manana kreyinayansapanachu. Sukaman llakishpa sufrishpa kawsansapa.

Pablu Timoteota yachachin allita rurashpa kawsanana.

¹¹ Wawkini Timoteo, Tata Diosta sirvik kashpayki ama chay runakunashina sukaman kullkiyayta munashpa kawsaychu. Allillata rurashpa

Tata Diosta kuyashpa Jesukristuta kreyishpa kawsay. Llaktamasikiku-nawan kuyanakushpalla mana piñanakushpa alli modoyuk kawsanayki tiyan. ¹² Suk alli soldadushina sufrishpaykipish Jesukristullata allita kreyishpa kawsay. Tata Dios akllashushka sieluman rinaykipa paywan tantalla kawsak. Aypa runakunata willashkanki Jesukristuta kreyinaykita.

¹³ Tata Dios tukuy kay allpapi kawsakkunata kawsachiwaykanchisapa. Jesukristu romano kamachikuk Pilatopa ñawpakinipi rimarkan sinchi kamachikuk kananta. Kawsachiwakninch Tata Diospa ñawpakinipi alli rimak Jesukristupa ñawpakinipi sukaman kamachiyki: ¹⁴ Señorninch Jesukristu kashkan shamenankaman tukuy yachachishkaynikunata allita kasushpa allita rurashpa kawsay ama ni pi rimananpa mana alli rurak kanaykita. ¹⁵ Tata Dios churashkan diya Jesukristu kashkan shamunka. Payllami yachaysapa kamachikuk. Paymi tukuy kamachikukkunamanta ashwan sinchi kamachikuk. Tukuy awtoridarkunamanta ashwan sinchi awtoridar.

¹⁶ Tata Diosllami mana tukuyniyukta kawsan. Payka alli lus ukupim kawsan. Lus ukunpi kawsaptin mana ni pi atipanchu ladunchayta. Mana ni pi payta kawashkachu nima atipanchu kawayta. Akuychi sinchi kamachikuk Tata Diosninchita mana tukuyniyukta kuyaypachi.

¹⁷ Chay aypa kullkiyuk runakunata yachachiysapa ama kikinkunalla kreyinakunankunapa. Yachachiysapa ama chay raslla tukuk kullkinllapi yuyaykushpa kawsanankunapa. Yachachiysapa Tata Diosllata yuyashpa kreyishpa kawsanankunapa. Payka rikchak laya ashwan aypa allikunata kuwanchisapa kushichiwananchikunapa. ¹⁸ Chay aypa kullkiyukkunata yachachiysapa allita rurashpa kawsanankunapa. Yachachiysapa mana nimayukkunata kushikushpa mana michashpa kullkitka kushpa yanapanankunapa. ¹⁹ Chashna mana nimayukkunata yanapaptinkuna Tata Dios yanapankasapa suknin tiempu tukuy laya tiyapunankunapa. Chaymanta sieluman pushankasapa mana tukuyniyukta kawsanankunapa.

²⁰ Wambrayni Timoteo, Tata Dios yachachikunaykipa willashuptin allita yachachikushpalla kawsay. Ama runakunapa mana valek parlanankunata ayninakunankunata kasuychu. Chay runakuna yuyansapa yachaysapa kanankunata. ²¹ Sukkuna chashna yachaysapa yuyanakushpankuna Je-sukristuta kreyishkankunamanta manana kreyinsapanachu.

Tata Diosta roygani tukuy kankunata yanapashunaykichipa. Ñuka Pablu kay kartata killkashkayki.

2 TIMOTEO

PABLУ ISHKAYNNIN KUTI TIMOTEOTA KILLKARKAN

Pablу Timoteota rimachin.

¹ Munanayni wambrayni Timoteo, Tata Dios rimarkan Jesukristuta kreyik runakuna sielmanan rinankunapa paywan kawsak. Chaymanta Tata Dios munaptin Señorninchi Jesukristu ūuka Pabluta kachamuwashka chay rimananta yachachikunaynipa. ² Kay kartata killkayki munashpa Tata Dioswan Jesukristu kuyashushpayki kushichishunana yanapashunana.

Pablу Timoteota willan mana pinkakushpa yachachikunana.

³ Ņukapa awiluynikuna allita Tata Diosta sirvishpa kawsarkansapa. Ņukapish chay awiluynikunashina Tata Diosta allita sirvishpa allita rurashpa kawsaykani. Diyapi tutapi Tata Diosta agradesishpa sukanan roygani kanta yanapashunaykipa.

⁴ Sukanan yuyani kanta sakiptini llakishpa wakashpa kiparimushkaykita. Chayta yuyashpa sukanan munani kashkan kawaynikita kushikunaynipa. ⁵ Chaymanta yuyani awilayki Loida mamayki Eunise sukanan Tata Diosta kreyishpa kawsashkankunata. Yachani kanpish paykunashina allita Tata Diosta kreyishpa kawsaykanaykita. ⁶ Chayrayku yuyachiyki makinita churashpayni Tata Diosta kanpa roygashkaynita. Tata Diosta roygarkani yanapashunaykipa paypa rimananta mana manchakushpa allita yachachikunaykipa.

⁷ Tata Dios mana munanchu ni pita manchananchikunapa. Paypa Espritun sukanan yanapawanchisapa animuchinakushpa kuyanakushpa allita rurashpa kawsananchikunapa. ⁸ Chayrayku ama pinkakuychu par-lachikuyta Señorninchi Jesukristu salvakuk kananta. Ama pinkakuychu ūuka paypa rimananta yachachikushkaynirayku karselpi kaptini. Mana pinkakuptiki Tata Dios sukanan yanapashunki allita yachachikunaykipa Jesukristu salvakuk kananta. Sufrishpaykipish allita yachachikuyllapi katiy.

⁹ Tata Dios manara kay allpata niman suk runata rurashpara ūnkanchikunata kuyawarkanchisapa. Payka sukanan munarkan yanapawayninchita payta kreyishpa kawsananchikunapa. Mana allita ruraptinchikunapish Tata Dios sukanan kuyawashpanchikuna Jesukristuta kachamurkan uchanchikunamanta perdonawananchikunapa. Paymi akllawashkanchisapa allita rurashpa kawsananchikunapa. ¹⁰ Tata Dios salvawakininchikuna Jesukristuta kachamushpa kawachiwashkan-chisapa sukanan kuyawananchikunata. Yachachiwashkanchisapa paywan tantalla mana tukuyuniyukta kawsananchikunapa amana kutin waňunanchikunapan. Tuta likidumanta surkuwashkanchisapa lus likidupi kawsananchikunapa.

¹¹ Tata Dios ūkata akllawarkan paypa rimananta yachachikuypa purinaynipa. Kachamuwashka salvawananchikunata yachachikunaynipa. ¹² Chayta yachachikushkaynirayku sukanan padesiykani. Chikniwak runakuna sufrichiwaptinkunapish mana pinkakunichu. Allita yachani pitami kreyishkani nishpa. Yachani kashkan shamunankaman Jesukristu atipananta yanapawayta willawashkanta yachachikunaynipa.

¹³ Ņuka allita yachachikushkaynishina kanpish allita yachachikuy. Jesukristuwani tantalla kawsashpa payta kreyishpa kuyashpa kawsay. ¹⁴ Tata

Diospa Espiritun ñukanchikunapi kawsashpa sukaman yanapawanchisapa. Chayrayku Tata Dios yachachishushkanta allita yachachikuy.

¹⁵ Kan yachanki chikniwak runakuna karselpi churawaptinkuna Asia partimanta wawkinchikuna sakiwashkankunata. Figelowan Hermogenespish manchakushpangkuna sakiwarkansapa. ¹⁶ Ñuka karselpi kaptini wawkinchi Onesiforo mana pinkakushpa aypa kuti chapawak shamushpa kushichiwashka. Chayrayku ñuka Tata Diosta roygani tukuy paypa familyankunata yanapanankunapa. ¹⁷ Kay Roma llaktapi wawkinchi Onesiforo chaymushkanshinalla sukaman maskawarkan tariwanankaman. ¹⁸ Kan allita yachanki Efeso llaktapipish chay wawkinchi Onesiforo ñukanchita sukaman yanapawashkanchita. Chayrayku munani Jesukristu kashkan shamushpa payta sukaman kuyashpa llakichishpa yanapananpa.

2

Soldadushina sufrishpapish allita Jesukristuta kreyishpalla kawsaypachi.

¹ Wambrayni Timoteo, Jesukristu sukaman yanapashuptin allita animukushpa payta kreyishpa kawsay. ² Ñuka aypa runakunata yachachishkaynita uyarishkanki. Chayllata alli rurak alli yachachikuk runakunata yachachiyaspa paykunapish sukkunata yachachinankunapa.

³ Jesukristupa alli soldadushina sufrishpapish payllata sirviy. ⁴ Suk alli soldadu serviþupi kashpa mana kikinpa munananta rurashpachu kawsan. Kamachikuknipa munananta rurashpa kawsan tiyan. Iden chay alli soldadushina kamachiwakninch Jesukristupa munananta rurashpa kawsananchikuna tiyan.

⁵ Chashnashina pukllak runakuna pukllashpa pukllay yachachikukta kasunankuna tiyan. Mana chay yachachikukta kasushpangkunaka mana atipansapachu premyuta ganayta. Chay pukllak runakunashina yachachiwakninch Jesukristuta kasunanchikuna tiyan premyunchita chaskinanchikunapa.

⁶ Chashnashina suk runa chakranpi sukaman trabajashpa aypata tarpushpa paylla primeru wayunkunata pallanan tiyan. ⁷ Kay willashkaynita allita yuyay. Chashna allita yuyaptiki Jesukristu entiendichishunki.

⁸ Ama kunkaychu Jesukristu chay ñawpa kamachikuk Davidpa familyanmanta nasishkanta. Chaymanta wañushkanmanta kawsamurkan uchanchikunamanta salvawananchikunapa. Ñuka kay alli rimanata yachachikuni. ⁹ Tata Diospa rimananta allita yachachikuptini mana kreyikunayak runakuna kay karselpi wickawashkasapa. Makinikunata kadenawan watawashkasapa mana alli rurak runatashina. Chashna watawaptinkunapish Tata Diospa rimananta mana watayta atipansapachu. ¹⁰ Chayrayku sufrishpaynipish kushikushpalla yachachikuykani. Chashna yachachikuptini Tata Diospa akllashkan runakuna Jesukristuta kreyik runakuna sielman rinkasapa paywan tantalla mana tukuy niyukta kawsanankunapa. ¹¹ Kay willanaynika sukaman allimami:

Paywan tantalla wañushpanchikuna paywan tantalla kawsamushunchisapa.

¹² Jesukristuta kreyishkanchikunaryku sufrishpanchikuna paywan tantalla kamachikushunchisapa.

Rimaptinch Jesukristuta mana riksinanchikunata paypish willawashunchisapa mana riksiwananchikunata.

¹³ Sukaman sufrishpa Jesukristuta katishpa shaykuptinchikunapish payka sukaman yanapawayninchikunallapi katin.

Mana atipanchu willawayninchita mana yanapawananchikunata.

Pablu Timoteota yachachin allita Tata Diospa rimananta yachachikunana.

¹⁴ Tukuy chaykunata alli rurak wawkinchikunata allita yuyachiysapa. Tata Diospa ñawpakinipi allita willaysapa ama ayninakunankunapa runakuna yachachikunankunaryku. Chay ayninakunankuna mana nimapi yanapansapachu. Sukkuna chay ayninakushkankunata uyarishpankuna yuyayninta wakllichin. ¹⁵ Kan allita Tata Diospa rimananta yachachikushpa payta kushichishpalla kawsay. Chashna allita yachachikuptiki ñawpakinipi mana pinkakunkichu. Paymi willashunki alli yachachikuk kanaykita.

¹⁶ Wakin runakuna kikinkunapa mana valek yuyayninkunallata parlachikushpa ayninakushpankuna kawsansapa. Chay mana alli parlak runakuna ashwan ashwanta Tata Diomanta ashunsapa. Ama munaychu paykunashina mana allita parlashpa kawsayta. ¹⁷ Chay runakunapa mana alli parlunkunaka aychanchi usuchik unkuyshinami. Chay ishkay runakuna Himeneo Filetowan mana allikunata parlashpa kawsaykansapa. ¹⁸ Tata Diospa rimananta kunanka mana kuskatanachu yachachikunapa. Yachachikunapa wañudukuna kawsamushkankunatana. Chayraykushi Jesukristu manana kawsachimuwashunchisapanachu. Chashna llullachikushpankuna Jesukristuta kreyik runakuñata pantachichinsapa.

¹⁹ Chashna kaptinpish Tata Diospa rimananka wasipa orkonnin alli timbidushinami. Paypa rimananka allita yachachiwanchisapa: "Tata Diroska wambrankunata allita riksiwanchisapa." Chaymanta yachachiwanchisapa: "Jesukristuta kreyik kananta rimak runa rikchak laya mana alli ruranakunamanta ashunan tiyan."

²⁰ Atun wasipi tiyan kurimanta kullkimanta rikchak laya ruradukuna fiestakunallapa sirvikunankunapa. Chaymanta chay wasillapi tiyan metomanta kaspimanta rikchak laya ruradukuna tukuy diya sirvikunankunapa. ²¹ Chay ruradu kallanakuna susya likidu kaptinka mana allichu nimata churanchipa. Ñukanchikuna mana allita rurashpanchikuna chay susya likidu kallanashina kashpanchikuna mana atipanchisapachu Señorninchi Jesukristuta sirviyta. Chayrayku allita rurashpa payllata kasushpa kawsananchikuna tiyan payta sirvinanchikunapa.

²² Waynakunapa mana alli munanankunamanta ashuy. Jesukristuta ka-suk alli rurak wawkinchikunawan tantalla puriy. Allita rurashpa Jesukristuta kreyishpa kuyashpa kushikushpa kawsay. ²³ Runakuna mana valekta ayninakuptinkuna ama kasuychu. Chay runakuna mana entiendishpa parlashpankuna kunanlla piñanakunsapa.

²⁴ Ñukanchikuna Jesukristuta sirvik runakuna kashpanchikuna mana piñanakushpa kawsananchikuna tiyan. Tukuy llaktamasinchikunata kuyashpalla alli modoyuklla allillata yachachikunanchikuna tiyan. ²⁵ Chay mana kreyikunayak runakunata allillapi mana piñayashpa yachachinanchikuna tiyan. Allillapi yachachikushpanchikuna munanchisapa Tata Dios yanapanankunapa payta kreyinankunapa rimananta entiendinankunapa. ²⁶ Munanchi Tata Dios chay runakunata yanapaptinkuna supaypa trampamanta kishpinankunapa amana paypa munananta ruranankunapa.

¹ Yachanayki tiyan Jesukristu shamunan tiempu sukaman sufrinanchikunata. ² Chay tiempu aypa runakuna kikinkuna alli kanankunata yuyashpa kawsankasapa. Sukaman kullkillata munashpa kawsankasapa. Kikinkunalla kreyinakunkasapa alabanakunkasapa. Tata Diosta mafdisinkasapa. Mana tatankunata nima mamankunata kasunkasapachu. Mana yachankasapachu ni pita agradesiyta. Tata Diosta kuyakkunata asichinkasapa. ³ Mana ni piwan kuyanakushpa nima perdonanakushpa kawsankasapa. Sukwan sukwana yuyanakushpalla kawsankasapa. Munanankunallata rurashpa kawsankasapa. Mana ni pita llakichinkasapachu. Mana munankasapachu allita rurashpa kawsaya.

⁴ Chay mana alli rurak runakuna runamasinkunata chiknishpa chikanpi valekunkasapa wañuchinankunapa. Mana allita ruranayashpa mana ni pita manchashpa kawsankasapa. Yuyanakunkasapa kikinkunalla alli yachak kanankunata. Tata Diosta mana maskanayashpa kikinkunapa munanankunallata rurashpa kawsankasapa. ⁵ Llullakushpa rimankasapa Tata Diosta kuyak kanankunata. Chashna rimashpapish mana kreyinkasapachu Tata Dios atipananta yanapaysapata. Ama chay mana alli rurak runakunata kasuychu.

⁶ Chay laya mana alli rurak runakuna wasin wasinpi yakyushpa mana alli yuyayuk uchasapa warmikunata llullachinsapa. Chay laya warmikunaka mana alli munanankunallata rurashpapkuna ashwanta munansapa uchallikuyta. ⁷ Chay warmikuna kuti kuti yachakushpapkunapish mana atipansapachu Tata Diospa alli yachachikunanta entiendiyta.

⁸ Ñawpa tiempu chay ishkay ñakakuk runakuna Janes Jambreswan Moi-sesta chiknishpa willarkansapa mana kuskata yachachikuykananta. Chash-nashina kunan tiempupish chay laya runakuna rimansapa Tata Diospa rimanan mana alli kananta. Mana kuskata yuyaykushpa kawsansapa. Jesukristuta mana kreyishpapkuna mana atipansapachu Tata Diospa ri-mananta kasuya. ⁹ Chay runakuna mana atipankasapachu ashwanta llullachikuyta. Utka tukuy pi yachankasapa chay laya runakuna mana alli yuyayuk kanankunata. Moisespa tiempunpipish tukuy runakuna yacharkansapa chay ishkay ñakakuk runakuna mana alli yuyayuk kanankunata.

Pablu Timoteota yachachin pay kawsashkanshina kawsanana.

¹⁰ Wambrayni Timoteo, yachachishkaynita allita kasushkanki. Ñami yachankina ñuka allita rurashpa kawsashkaynita. Yachanki Tata Diospa munananta ruranaynita. Jesukristuta kreyishpa kawsaykani. Yachanki llaktamasinikunawan kuyanakushpa mana piñanakushpa kawsanaynita. Sufrish-paynipish allita yachachikuyllapi purishkani.

¹¹ Yachanki Antiokiya llaktapi Ikonio llaktapi Listra llaktapi chikniwak runakuna sukaman sufrichiwashkankunata. Chashna sufrichiwapinkunapish Tata Dios wañuymanta salvawarkan. ¹² Ñukata sufrichiwashkankunashina chiknikuk runakuna Jesukristuta kreyishpa kawsak runakunat-apish rikchak layapi sufrichinkasapa. ¹³ Chay chikniwakninchu runakuna chay llullachikuk runakuna ashwan ashwanta mana allita rurashpa kawsankasapa. Ashwan ashwanta llullachikushpa kikinkunalla llullachi-nakushpa kawsankasapa.

¹⁴ Kan, wambrayni, yachachikushkaynita allita kreyishpa kawsay yachashpayki alli kananta. Yachanki pikunami yachachishushka nishpa.

¹⁵ Mash allita yuyay takshaykimantapacha Tata Diospa rimananta yachakushkaykita. Paypa rimananka yachachishunki Jesukristuta kreyiptiki mana alli rurashkaykikunamanta salvashunanta.

¹⁶ Ñawpa tiempu Tata Dioska alli rurak runakunata willarkansapa rimananta killkanankunapa. Chayrayku paypa rimananka sukaman allimi yachachiwananchikunapa. Mana allita ruraptinchikuna Tata Diospa rimananka yachachiwanchisapa ama chay mana allikunata rurananchikunapa. Yachachiwanchisapa allita rurashpa kawsananchikunapa. ¹⁷ Chashna Tata Diospa rimanan yachachiwaptinchikuna paypa kashpanchikuna atipanchisapa tukuy laya allikunata rurashpa kawsayta.

4

Pablu Timoteota willan Tata Diospa rimananta allita yachachikunana.

¹ Jesukristu kashkan shamunka tukuy layapi sinchi kamachikuk kananpa. Chashna shamushepa tukuy wañudu runakunata tukuy kawsak runakunatapish willawashunchisapa allitachu manachu rurashkanchisapa nishpa. Jesukristu shamunanta yuyashpayni paypa ñawpakninpí Tata Diospa ñawpakninpí sinchita willayki paypa rimananta allita yachachikunaykipa. ² Runakuna allita uyarishuptinkuna mana uyarishuptinkunapish Jesukristupa rimananta yachachiysapa. Mana piñakushpa allita animuchishpa yachachiysapa yachanankunapa allillata rurashpa kawsayta. Mana allita ruraptinkuna kuyashpalla yachachiysapa amana kashkan mana allita ruranankunapa.

³ Yachanki suk tiempukaman wakin runakuna kay alli yachachikunata manana kreyinayankasapanachu. Chay runakuna munanankunallata rurashpa kawsashpa munanankunallata yachachikuk runakunata maskankasapa. ⁴ Chay runakuna kay alli yachachikunata mana uyari-nayashpa kikinkunapa kuentunkunallata kasunkasapa. ⁵ Kan wambrayni, allita yuyaykushpa kawsay. Runakuna sufrichiuptinkunapish allita rurashpa kawsay. Allita yachachikuy Jesukristu salvakuk kananta. Tukuy runakunata yanapashpa kawsay.

⁶ Ñuka Tata Diospa rimananta allita yachachikushkaynirayku suk runakuna ovejatashina utka wañuchiwanakasapa. Yachani utka wañunaynita. ⁷ Runakuna sufrichiwaptinkunapish alli aluchakshina sinchikushkani. Kallpkashina chayanaynipi chayashkani. Allillata Jesukristuta kreyishpa kawsashkani. ⁸ Tukuy willawashkanta allita rurashkaynirayku alli rurak juesninchí Jesukristu kashkan shamushpa premyuynita kuwanka. Mana ñukallatachu kuwanka. Tukuy payta kuyashpa shamunanta shuyak runakunatapish premyunkunata kunkasapa.

Pablu Timoteota royan yanapananpa.

⁹ Wawkini, utkana shamuy kawawakna. ¹⁰ Wawkinchi Demas kay all-papi vanidarkunata munashpa rurayta sakiwarkan. Rishka Tesalonika llaktaman. Wawkinchi Kresente rishka Galasia partiman. Wawkinchi Titopish rishka Dalmasia partiman. ¹¹ Wawkinchi Lukaslla ñukawan kiparishka. Kan shamushpayki wawkinchi Markosta pushamuy tukuy layapi yanapawanana. ¹² Wawkinchi Tikikota kachashkani Efeso llaktaman. ¹³ Ponchoynita sakimushkani wawkinchi Karpopa wasinpi Troas llaktapi. Kan wambrayni, shamushpayki chay ponchoynita apamupay. Libruynikunata killkashkaynunikunata apamupay.

¹⁴ Erero trabajak Alejandro chikniwashpa sufrichiwarkan. Sufrichi-washkanrayku Tata Dios kastiganka. ¹⁵ Chay Alejandro yachachikunaynita mana alli kananta rimashpa nima layapi munanchu yachachikunaynipa. Paymanta kuydanakuy.

¹⁶ Kay Roma llaktapa awtoridarninkunapi chatawaptinkuna mana ni suk wawkinchikuna shamurkanchu yanapawak. Tukuy wawkinchikuna manchakushpa sakiwarkansapa. Sakiwashka kaptinkunapish mana munanichu Tata Dios kastiganankunapa. ¹⁷ Chay awtoridarkunapa ñawpkninpi kaptini Tata Dios sukaman yanapawarkan Jesukristu salvakuk kanana yachachikunaynipa. Chashna yachachikuptini appa mana judiyu runakunapish Tata Diospa rimananta kreyirkansapa. Tata Dios yanapawaptin kishpirkani amara chay chikniwak runakuna wañuchiwanankunapa. ¹⁸ Tata Dios tukuy laya mana allimanta amachawanka. Kuydawanka sielman pushawanana paywan kawsanaynipa. Ñuka sukaman kushikushpa Tata Diosta mana tukuuniyukta agradesisha.

Pablu wawkinkunata paninkunata rimachin.

¹⁹ Ñukapa shutinipi rimachiysapa paninchi Prisilata wawkinchi Akilasta wawkinchi Onesiforopa familyankunata. ²⁰ Korinto llaktapi wawkinchi Erasto kiparishka. Chaymanta wawkinchi Trofimota unkudu kaptin Mileto llaktapi sakimushkani. ²¹ Amara tamya tiempu kaptinra utkakushpa shamuy. Wawkinchi Eubulo wawkinchi Pudente wawkinchi Lino paninchi Klaudia tukuy wawkinchikuna rimachishunkisapa.

²² Ñuka munani Jesukristu kushichishunaykipa. Munani Tata Dios yanapashunaykichipa.

Ñuka Pablu chayllata killkashkayki.

TITO PABLУ TITOTA KILLKARKAN

Pablу Titota rimachin.

¹ Munanayni wawkini Tito, ūuka Pablу Tata Diospa mandunpi kaptini Jesukristu kachamuwashka paypa rimananta yachachikunaynipa. Kachamuwashka Tata Dios akllashkan runakunata yachachiptini Jesukristuta kreyinankunapa. Yachachikuni payllata kreyishpa allita rurashpa kawsanankunapa. ² Jesukristuta kreyishpanchikuna yachanchisapa mana tukuuyiyukta Tata Dioswan kawsananchikunata. Tata Dios mana llullakuk kashpa manara kay allpata rurashpara rimarkan sielman pushawananchikunata. Chaypi paywan tantalla mana tukuuyiyukta kawsashunchisapa.

³ Kunan Tata Diospa munashkan tiempu kaptin chay alli rimashkanta ūukanchikunata yachachiwashkanchisapa. Salvawakninch Tata Dios ūukata kachamuwashka chay alli rimashkanta yachachikunaynipa. ⁴ Tata Diospa rimananta yachachikuptini kanka ūukashina Jesukristuta tukuy shunku kreyishpa kawsaykanki. Chayrayku wambraynishina kaptiki kay kartata killkaykayki. Munani Tata Diosninch salvawakninch Jesukristiwan tukuy layapi yanapashunaykipa kushichishunaykipa.

Pablу Titota yachachin ansianukunata akllanana.

⁵ Wawkini Tito, chay atun ishla Kretapi kanta sakishpayni allita willashkayki tukuchanaykipa ruraykashkanchita. Willashkayki tukuy llaktakunapi wawkinchikunata akllanaykipa ansianukuna kanankunapa.

⁶ Ansianuka allita rurashpa kawsanan tiyan ama ni pi rimanarpa mana allita rurashpa kawsaykananta. Warminllawan kawsanan tiyan. Wambrankunapish Jesukristuta kreyishpa kawsanankuna tiyan ama ni pi rimanarpa mana tatanta kasuk mana alli rurak kanankunata.

⁷ Ansianuka yachanan tiyan tukuy wawkinkunata paninkunata allita yanapayta allita rurashpa kawsanankunapa. Chayrayku allita rurashpa kawsanan tiyan. Mana piňakushpa mana kikinpa munananllata rurashpa kawsanan tiyan. Suk ansianu mana machashpa mana makanakushpa kawsanan tiyan. Mana llullachikushpa kullkita gananan tiyan. ⁸ Wasinpi maykan chayaptin ansianuka kushikushpa chaskinan tiyan. Yanapakuya yachak runa kanan tiyan. Alli rurak kuskanpi rimak runa kanan tiyan. Tata Diospa munananta rurashpa kawsanan tiyan. Kikin kamachinakunan tiyan allita kawsanarpa.

⁹ Ansianuka Tata Diospa yachachikunanta allita kasunan tiyan. Chaypina atipanka Tata Diospa rimananta yachachikushpa tukuy llaktamasinkunata allita animuchiyya. Chaymanta atipanka Tata Diospa rimananta mana alli kananta rimakkunata upallayachiyya.

¹⁰ Aypa runakuna mana munansapachu Tata Diosta kasuya. Llullachikushpa yankamanta sukaman rimakushpa kawsansapa. Paykunaka mana judiyu runakunata sukaman apuransapa paykunashina señaladu kanankunapa. ¹¹ Chayta yachachikushpankuna aypa llaktamasinkunata familyankunatapish llullachinsapa. Llullachikushpa kullkita chaskinayashpalla mana allikunata yachachikunsapa. Chayrayku paykunata michaysapa ama llullachikunankunapa.

¹² Chay Kreta ishlapi yachachikuk runa llaktamasinkunapa rimarkan: "Kretapi kawsak runakuna llullakushpa animalshina mana alli

yuyayuk kawsansapa. Sukaman killa likidu mikuyllata munashpa kawsansapa.”¹³ Chay yachachikuk runa chashna rimashpa kuskata rimarkan. Chayrayku kretino runakunata sinchita yachachiysapa allita rurashpa Jesukristuta kreyishpa kawsanankunapa.¹⁴ Yachachiysapa judiyu runakuna yuyayninkunallamanta yachachikuptinkuna ama kreyinankunapa. Yachachiysapa mana kuskata yachachikuk runakunata ama kreyinankunapa.

¹⁵ Suk allita ruranayak runa yuyaynин alli kaptin yuyan tukuy laya alli kananta. Jesukristuta mana kreyinayak runa yuyaynин sukaman mana alli kaptin yuyan tukuy laya mana alli kananta.¹⁶ Chay mana alli yuyayuk runakuna rimansapa Tata Diosta riksinankunata. Chashna rimashpanku-napish mana allita rurashpankuna yuyachiwanchisapa mana Tata Diosta riksinankunata. Mana Tata Diosta kasushpa millanapa laya ruranakunata rurashpa kawsansapa. Chayrayku mana atipansapachu allita rurashpa kawsayta.

2

Pablu Titota yachachin allita yachachikunapa.

¹ Tata Diospa alli yachachikunanta chay runakunata allita yachachiysapa. ² Vieja wawkinchikunata yachachiysapa allita rurashpa kawsanankunapa llaktamasinkuna kawanankunapa alli rurak kanankunata. Yachachiysapa allita Tata Diosta tukuy shunku kreyishpa tukuy piwan kuyanakushpa kawsanankunapa. Yachachiysapa sufrishpankunapish Tata Diosmanta ama ashunankunapa.

³ Chashnashina vieja paninchikunata yachachiysapa allita Tata Diosta kuyashpa kawsanankunapa. Chaypirami warmimásinkuna paykunata kawashpa yachankasapa allita rurayta. Yachachiysapa ama ni pita yuyaypi purinankunapa nima machanankunapa.⁴ Vieja paninchikunata yachachiysapa kusayuk ñañankunata yachachinankunapa kusankunata wawankunata kuyashpa kawsanankunapa.⁵ Chay paninchikuna ñañankunata yachachinankuna tiyan alli yuyayuk alli rurak warmikuna kanankunapa. Yachachinankuna tiyan wasinkunata allichashpa kusankunata kasushpa kawsanankunapa ama ni pi Tata Diospa rimananta washanchankunapa.

⁶ Chashnashina wayna wawkinchikunata yachachiysapa alli yuyayuk kanankunapa.⁷ Kan, Tito, tukuy layapi allita rurashpa kawsay chay wayna wawkinchikuna kanta kawashushpa allita rurashpa kawsanankunapa. Tata Diospa rimananta yachachikushpa kuskata allita yuyaykushpa kawsanayki tiyan.⁸ Kuskata rimashpa yachachikuy ama ni pi rimanankunapa mana allita yachachikunaykita. Chashna kuskata yachachikuptiki chay yuyashuk runakuna pinkachinakunkasapa. Mana atipankasapachu rimayta ñuñanchikuna mana alli rurak kananchikunata.

⁹ Rantido wawkinchikunata yachachiysapa tukuy layapi patronninkunata allita uyarinankunapa. Yachachiysapa patronninkunata kushichishpa allillapi aynishpa kasunankunapa.¹⁰ Yachachiysapa ama patronninkunapa ima tiyapunkunata suwanankunapa. Yachachiysapa rikchak layata allita rurashpa trabajanankunapa. Chaypina tukuy runakuna kawashpankuna yachankasapa salvawakninch Tata Diospa rimanan sukaman allima kananta.

¹¹ Tata Dios munan tukuy runakunata salvawayninchikunata. Chayrayku Jesukristu shamurkan Tata Dios kuyawananchikunata entiendichiwananchikunapa.¹² Tata Dios kuyawashpanchikuna

yachachiwanchisapa kay allpapi kawsashpanchikunara allita yuyashpa payta kuyashpa kawsananchikunapa. Yachachiwanchisapa allita rurashpa kawsananchikunapa. Yachachiwanchisapa amana kikinchikunapa munananchikunallata rurashpa kawsananchikunapa.

¹³ Salvawakninch Jesukristu Diosninch kashpa allimata rikurishpa kashkan shamunka. Chay allima shamenanta shuyashpa kushikushpalla kawsananchikuna tiyan. ¹⁴ Jesukristu wañurkan tukuy mana alli rurashkanchikunamanta salvawananchikunapa. Tukuy uchanchikunamanta pichawashkanchisapa paypa wambrankuna kananchikunapa. Chaypina munanchisapa allita rurashpa kawsayta.

¹⁵ Tata Dios yanapashuptiki tukuy chay runakunata tukuy yachachishkaynikunata sinchita yachachiysapa. Animuchishpa willaysapa ama mana allikunata rurashpa kawsanankunapa. Allita yachachiysapa ama ni pi washanchashunaykipa.

3

Pablu yachachikun imashnami Jesukristuta kreyik runakuna kawsankasapa nishpa.

¹ Chay wawkinchikunata paninchikunata yuyachiysapa tukuy awtoridarkunata kamachikukkunata allita kasushpa kawsanankunapa. Yachachiysapa kamachikuk runakuna suk alli imapi trabajachiptinkuna mana killakushpa ruranankunapa. ² Yachachiysapa ama ni pita yuyashpa ni piwan ayninakushpa kawsanankunapa. Yachachiysapa alli modoyuk tukuy runakunawan kawsanankunapa.

³ Nawpa tiempu ūukanchikunapish Tata Diosta mana kasushpa mana alli yuyayuk kawsarkanchisapa. Pantakudu kashpanchikuna tukuy laya vanidarpi kawsarkanchisapa. Tukuy laya mana allita rurashpa kawsarkanchisapa. Maykanpa ima tiyapukninkunata kawashpa munarkanchisapa. Sukkuna chikniwaptinchikuna sukwana sukwana chikninakushpa kawsarkanchisapa.

⁴ Chashna mana allita rurashpa kawsaptinchikunapish salvawakninch Tata Dios kuyawananchikunata llakichiwananchikunata kawachiwashkan-chisapa. ⁵ Manami salvawashkanchisapachu allikunata rurashkanchikunaryku. Llakichiwashpanchikunalla salvawashkanchisapa. Tata Dios uchanchikunamanta mayllawashpanchikuna rurawanchisapa kashkan nasidushina kananchikunapa mushuk layata yuyananchikunapa. Tata Diospa Espiritu munachiwanchisapa mushuk alli ruranakunata rurashpa kawsananchikunapa.

⁶ Salvawakninch Jesukristu wañushkanrayku Tata Dioska kushikushpa mana michakushpa Espiritunta kachamushka ūukanchikunapi kawsanampa. ⁷ Tata Dios kuyawashpanchikuna uchanchikunamanta perdonawashkan-chisapa sielman rinanchikunapa paywan mana tukuyniyukta kawsak. Sukman kushikushpa shuyaykanchisapa sielman pushawananchikunapa.

⁸ Kuskata yachachiykayki. Tukuy chayta sinchita yachachiysapa tukuy Tata Diosta kreyik runakuna yachanankunapa allita rurashpa kawsayta. Alli kanman tukuy runakuna kay yachachishkaynita kasushpa kawsanankunapa.

⁹ Yachachikushpayki ama ni piwan awilunchikunapa kuentunkunarayku nima Moisespa kamachikunankunaryku ayninakuychu. Chay layakuna mana nimapa allichu. Mana ni pita yanapansapachu.

¹⁰ Ichará suk llullachikuk runa wawkinchikuna allita kawsaykashkankunamanta wakllichinayan chikininakushpa kawsanankunapa. Chay laya runata suk ishkay kuti sinchita willay ama chayta rurananpa. Chay runa mana kasushuptikika willay amana kankunawan tantanakununpa. ¹¹ Chashna wawkinchikunata wakllichiptin yachankina chay runa mana kuskata yuyaykushpa mana allita rurashpa kawsaykananta. Kikinpa uchanrayku Tata Dioska kastiganka.

Pablu kay kartata tukuchashpa Titota despidin.

¹² Ichará wawkinchi Artemasta kanman kachasha. Mana payta kachash-paynika wawkinchi Tikikota kachasha. Kanpi chay wawkinchi chayaptin utkakushpa Nikopolis llaktaman rillay tariwak. Munani chay llaktapi tamya tiempu kawsayta.

¹³ Abogado wawkinchi Senas wawkinchi Apoloswan kanpi chayaptinkuna yanapaysapa. Tukuy layata kuysapa chikan llaktakunaman riptynkuna ama nima illapunankunapa.

¹⁴ Munani Jesukristuta kreyikmasinchikuna yachakunankunapa allita rurashpa kawsayta. Munani yachakunankunapa mana nimayukkunata yanapayta. Chashna yanapashpa llaktamasinkunata kushichinsapa.

¹⁵ Tukuy ūukawan wawkinchikuna rimachishunkisapa. Kan shutinipi rimachiysapa chay llaktapi munadu Jesukristuta kreyikmasinchikunata. Ñuka munani Tata Dios tukuy kankunata yanapashunaykichipa.

Ñuka Pablu chayllata killkashkayki.

FILEMON PABLУ FILEMONTA KILLKARKAN

Pablу yachachikukmasin Filemonta rimachin.

¹ Munanayni yachachikukmasini Filemon, ūuka Pablу kay karselpi kani Jesukristupá rimananta yachachikuskaynirayku. Wawkinchi Timoteowan tantalla kay kartata killkaykayki. ² Wasikipi tantanakuk wawkinchikunata paninchikunata killkaykani. Paninchi Apiata trabajakmasini Arkipotapish killkaykani. ³ Munani Tata Diosninchi Señorninchi Jesukristuwān yana-pashunaykichipa kushichishunaykichipa.

Pablу Tata Diosta agradesin Filemon payta kuyaptin.

⁴ Tata Dioswan parlanayni oras kanta yuyashpayni payta agradesini. ⁵ Yachashkani sukaman Señorninchi Jesukristuta kreyishpa kuyashpa kawsanaykita. Yachashkani Jesukristuta kreyikmasinchikunatapish kuyanaykita. Chayrayku Tata Diosta agradesini. ⁶ Kan tukuy pita parlachinki Jesukristuta kreyikunaykita. Chayrayku Tata Diosta roygani allita entiendinaykipa Jesukristu sukaman kuyawashpanchikuna tukuy layapi yanapawananchikunata. ⁷ Kan, wawkini, Jesukristuta kreyikmasinchikunata kuyashpa kushichinki. Chayrayku ūuka sukaman kushikushpa animukuni.

Pablу Filemonta royan Onesimota perdonananpa.

⁸ Wawkini Filemon, Jesukristu ūukata kachamuwashkanrayku atipayman kamachiynikita imatapish kaptin ruranaykipa. ⁹ Chashna kamachiynikita atipashpaynipish mana nimapi kamachinayaykicu. ūuka Pablу viejuna kašpa munani roygaynikita kuyawashpa kasuwanaykipa. Jesukristupa rimananta yachachikuskaynirayku kay karselpi kani. ¹⁰ Kay karselpi kaptini Onesimo yachachikuskaynita kreyishkanrayku kunanka ūami wambraynina. Chayrayku kay wambraynipa suk favorita mañayki.

¹¹ ūwpa tiempu Onesimo mana alli yanapashuk karkan. Kunanka ūukatana allita yanapawaykan. Kanman kutishpa kantapish allita yanapashunka. ¹² Chayrayku kay munanayni wambrayni Onesimota kachaykani kanman kutinanpa. Kushikushpa ūukata chaskiwakshina paytapis chaskiy. ¹³ Jesukristu salvakuk kananata yachachikuskaynirayku ūuka kay karselpi kani. Chayrayku munayman Onesimo ūukawan kiparinanpa kan yanapawanaykishina pay yanapawananpa. ¹⁴ Kay wambrayni kiparinanpa munashpaynipish kan mana munaptiki mana kiparinkachu. Munayman tukuy shunku willanaykipa yanapawananpa.

¹⁵ Ichará alli kashka suk tiempullapa Onesimo sakishunanpa kashkan kutimushpa kanwan tukuy tiempu kawsanarpa. ¹⁶ Kunanka Onesimota kuyadu wawkitashina chaskiy. Manana rantidutashinanachu kaway. ūuka wambraynitashina kuyani. Kanpish ūukamanta ashwanta kuyanayki tiyan. Payta kuyanayki tiyan runamasiki kaptin. Chaymanta ashwanta kuyanayki tiyan Jesukristuta kreyikmasiki kaptin.

¹⁷ Jesukristuta kreyikmasiki kanaynita yuyashpaykika Onesimota ūukatashina chaskiy. ¹⁸ Ichará wambrayni Onesimo dañuta rurashushpa nitikurkan. Debishuptikika ūukata kobraway. ¹⁹ ūuka Pablу kay kartata makiniwan kikini killkashpa willayki pagaranaynipa. Chaymanta ama kunkaychu kanta yachachiptini Jesukristuta kreyinaykita. Chayrayku

sukaman debiwanki. ²⁰ Ariya wawkini, Jesukristuta kreyikmasini kashpayki yanapawashpa wambraynita chaskipay. Wawkini kashpayki kushichiway.

²¹ Chashna killkashpayni yachani kasuwashpa kay roygashkaynimanta ashwanta ruranaykita. ²² Chaymanta kankuna Tata Diosta roygaptikichi pay munaptin risha kawaknikichi. Chayrayku suk kuartuta allichapay chaypi chayanaynipa.

²³ Wawkinchi Epafras Jesukristupa rimananta yachachikushkanrayku kay karselpi ūukawan tantalla. Paypish rimachishunki. ²⁴ Tata Diospa rimananta yachachikukmasinikuna Markos Aristarkowan Demaswan Lukaswan rimachishunkisapa.

²⁵ Jesukristuta roygani tukuy layapi yanapashunaykichipa.

Ñuka Pablu chayllata killkashkayki.

HEBREOS

SUK YACHACHIKUK RUNA KREYIKUK

HEBREOMASINKUNATA KILLKARKAN

Tata Diospa wambran Jesukristu yachachiwanchisapa ima layami Tata Dioska nishpa.

¹ Ñawpa tiempu kuti kuti Tata Dios alli yachachikuk runakunata rikchak layata yachachirkansapa. Chaymanta chay yachachikuk runakuna ñawpa awilunchikunata yachachirkansapa. ² Kunan kay tukunan tiempu Tata Dios wambran Jesukristuta kachamurkan paypa rimananta yachachiwananchikunapa. Mana nima laya tiyaptinra Tata Dios wambranta willarkan tukuy laya tiyakta rurananpa. Chaymanta tukuy layata payta kurkan kamachikunapa.

³ Jesukristu ñukanchikunata kawachiwanchisapa Tata Dios llipyak lusshina sukaman allima kananta. Payka Tatan Dios laya kashpa kawachiwanchisapa ima layami Tatanka nishpa. Sukaman alli yachak kashpa rimananllawan tukuy laya tiyakta kuydashpa sinchichiykan. Kay allpaman shamushpa wañurkan uchanchikunamanta perdonawashpa pichawananchikunapa. Chashna pichawashpanchikuna sielipi kawsak Tata Diospa alli ladunpi tiyarirkan paywan tantalla tukuy layata kamachikunapa.

Tata Diospa wambranka tukuy angelkunamanta ashwan atipakmi ashwan sinchi kamachikukmi.

⁴ Chayrayku Jesukristu Tata Diospa wambran kashpa angelkunamanta ashwan sinchi kamachikukmi. Tata Dios paytaka willarkan angelkunamanta ashwan allima shutiyuk kananpa. ⁵ Tata Dios Jesukristullata willarkan:

“Kanka wambraynimi kanki.

Kanta wañushkaykimanta kawsachimuptini tukuy layapi kamachikukmi kanki.”

Tata Dios mana niman suk angelta willarkanchu wambran kananta. Chaymanta Tata Dios chaylla wambranpa rimarkan:

“Ñukaka paypa tatanmi kani.

Payka ñukapa wambraynimi.”

Tata Dios manami niman suk angelta chashnachu willarkan. ⁶ Chaymanta Tata Dios chaylla wambranta kay allpaman kachamushpa tukuy angelkunata willarkan wambranta kuyanankunapa.

⁷ Chaymanta Tata Diospa ñawpa killkadunpi angelkunapa riman:

“Tata Dios angelkunanta kachan wayrashina rawraykak ninashina tukuy mayta rinankunapa payta sirvik.”

⁸ Chaymanta Tata Dios killkadunpi wambranpa riman:

“Mana tukuyniyukta kanka sukaman kuskata allillata kamachikunki.

⁹ Kanka sukaman munanki allillata rurayta.

Mana niman suk mana allita munankichu rurayta.

Chayrayku ñuka Tata Diosniki kantaka akllashkayki kamachikunaykipa.

Tukuy kamachikukmasikikunamanta tukuy angelkunamanta kanta ashwanta kushichiyki.”

¹⁰ Chaymanta Tata Diospa killkadunpi riman:

“Kallarinanmantapacha Señor,
kanmi allpata rurashpa sinchichishkanki.

Kanlla sielutapish rurashkanki.

11 Tukuy chay rurashkayki allpaka sieluka tukunan tiyan. Chashna tukuptinpish mana tukuyniyukllata kanka kawsanki. Allpawan sieluka llachapashina mawkayashpa usunka.

12 Chashna usuptin suk mawkayak llachapatashina wankunki. Allpata mushukyachinki mushuk llachapata mudachikshina. Allpa sielu tukuptinpish kanka chashnalla kanki.

Mana tukuyniyukta kawsanki.”

13 Chaymanta Tata Dios wambranllata willarkan:

“Alli laduynipi shamuy tiyarik ñuka chiknishuknikikunata saru saru ru- ranaynikaman kanta allita kasushunankunapa.”

Tata Dios manami niman suk angelta chashnachu willarkan.

14 Angelkunata mana kawayta atipanchisapachu. Paykunaka Tata Diosta allita sirvishpa kawsansapa. Tata Dios paykunata kachamunsapa ñukanchikuna sielman rik runakunata yanapawananchikunapa.

2

Akuychi Tata Diospa rimananta allita rinrillikushpa kawsaypachi.

1 Jesukristu sinchi kamachikuk kapitin akuychi paypa yachachikunanta ashwan allita kasushpa kawsaypachi ama paymantu ashunanchikunapa.

2 Ñawpa tiempu Tata Dios angelkunata willarkansapa ñawpa awilunchikunata kamachikunankunata yachachinankunapa. Chashna Tata Diospa kamachikunankunata angelkuna paykunata willashka kapitin chay ñawpa awilunchikuna kasunankunapa karkan. Mana kasushkankunaryku Tata Dios kuskampi kastigarkansapa.

3 Payka ñukanchikunatapish ashwan sinchita kastigawashunchisapa wambran Jesukristu yachachikushkanta mana kasuptinchikuna. Kikin Señorninchi Jesukristu disipulunkunata willarkansapa ñukanchikunata uchanchikunamanta salvawananchikunata. Chaymanta paykunaka Jesukristu yachachikushkanta yachachiwarkanchisapa.

4 Tata Dios munaptin paypa Espiritu disipulunkunata rikchak layata atipachirkansapa aypa almirana milagrukunata ruranankunapa. Chaykunata rurashpa yachachiwanchisapa Jesukristu yachachikunamanta sukanan allima kananta.

Jesukristu shamurkan nasik runa kananpa uchanchikunamanta salvawananchikunapa.

5 Kay kartapi rimashkaynishina Tata Dios Jesukristullata willanka tukuy layapi kamachikunampa. Mana angelkunatachu willankasapa kamachikunankunapa. **6** Tata Diospa rimananpi suk runa payta willarkan:

“Ñukaykuna runakuna kashpaynikuna mana nimachu kanisapa.

¿Imapatí llakichiwankisapa?

¿Imapatí llakichishpa yuyawankisapa?

7 Kay allpapi kawsaptinikunara angelkunata willashkanki ñukaykunamanta ashwan atipak kanankunata.

Chaymanta ñukaykunata salvawashpaykisapa paykunamanta ashwanta kuyawankisapa kushichiwankisapa.

8 Tukuy sielipi tukuy allpapi tiyakta kuwashkankisapa kamachikunaynikunapa.”

Chayta Tata Diospa rimananpi rimaptin yachanchisapa Tata Dios willawashkanchikunata tukuy allpapi tukuy sielipi tiyakta kamachinanchikunapa. Tukuy layata kamachishunchisapa. Chashna

Tata Dios rimaptinpish manara kawanchisaparachu tukuy laya tiyak kasuwananchikunata. ⁹ Manara tukuy tiyakta kamachikushpanchikunapish yachanchisapa Tata Dios Jesukristuta allpaman kachamushkanta. Payka kay allpapi kawsashpa suk tiempullata mana angelkunata kamachirkansapachu. Tata Dios sukaman kuyawashpanchikuna munarkan Jesukristu ñukanchikunaryku wañunanpa. Chaymanta wañushkanrayku Tata Dios payta willarkan tukuy runakuna tukuy angelkuna payllata kuyashpa kasunankunapa.

¹⁰ Tata Dios tukuy tiyakta rurarkan payllapa kananpa payllata kushichinapna. Tukuy tiyak payllapa kaptin payka munan tukuy wambrankuna paywan tantalla sukaman kushikushpa allita kamachikunanchikunapa. Chayrayku kay allpaman wambran Jesukristuta kachamurkan sukaman sufrinanpa. Chashna sukaman sufrishpa Jesukristu atiparkan uchanchikunamanta salvawayninchikunata.

¹¹ Jesukristu salvawaptinchikuna ñukanchikunapish payshina Tata Diospa wambrankuna kanchisapa paypa munananllata rurashpa kawsananchikunapa. Tata Diospa wambrankuna kaptinchikuna Jesukristu mana pinkakunchu willawayninchikunata wawkinkuna paninkuna kananchikunata. ¹² Chayrayku Tata Diospa killkadunpi Jesukristu riman: "A, Tatayni, wawkinkunata panikunata willasha sukaman allima kanaykita.

Paykunawan tantanakushpa kushikushpa himnokunata kantashasapa."

¹³ Chaymanta Tata Diospa rimananpi Jesukristu riman:

"Ñuka tukuy shunku Tata Dios yanapawananta kreyishpa kawsasha."

Chaymanta riman:

"Kaypi kani tukuy Tata Dios kuwashkan wambraynikunawan."

¹⁴ Ñukanchikuna runakuna kashpanchikuna nanayta unkuyta wañuya mallinchisapa. Jesukristupish nasirkan ñukanchikunashina nanayta wañuya mallinanpa. Chaymanta wañushkanrayku wañuchikuy atipak supaypa yachayninta wakllichipurkan ama ñukanchikuna wañuya manchananchikunapa. ¹⁵ Payka supaypa yachayninta kichushpa wañuya sukaman manchashpa kawsak runakunata yanapansapa amana wañuya manchanankunapa.

¹⁶ Jesukristu mana shamurkanchu angelkunata yanapanankunapa. Payka shamurkan Abrahampa mirakninkunata yanapanankunapa. ¹⁷ Shamurkan ñukanchikunashina runa kananpa. Chashna runa kashpa Tata Diosta sukaman allita kasushpa ñukanchikunata kuyawashpanchikuna atiparkan Tata Diospa ñawpkninpi kamachikuk saserdotenchikuna kaya. Chayrayku kruspi wañurkan Tata Dios uchanchikunamanta perdonawananchikunapa.

¹⁸ Jesukristu runa kashpa nanayta mallishpa sufrikan. Chaymanta supay uchallichinayarkan. Chayrayku kunanka supay ñukanchikunata uchallichinayanayaptinchikuna Jesukristu allita atipan yanapawayninchikunata ama uchallikunanchikunapa.

3

Jesukristu ñawpayachachikuk Moisesmanta ashwan alliyachachikukmi.

¹ Tata Diosta kasuk wawkinikuna, paninikuna, Tata Dios kankunata akllashushkankichi paypa wambrankuna kanaykichipa. Ñukanchikuna ri-manchisapa Tata Dios Jesukristuta kachamushkanta saserdotenchikuna

kananpa. Jesukristu saserdotenchikuna kaptin akuychi payllata yuyashpa kawsaypachi.

² Tata Dios willaptin ñawpa yachachikuk Moises israel runakunata suka-man allita sirvirkansapa. Chaymanta Tata Dios Moisestashina Jesukristuta willarkan saserdotenchikuna kananpa. Chashna willaptin Tata Diosta suka-man allita sirvirkan.

³ Rurashkan wasimanta ashwanta wasi rurak runata alabanchisapa. Chashnashina Jesukristu tukuy runakunata rurashkanrayku Moisesmanta payta ashwanta munashpa alabananchikuna tiyan.

⁴ Wasikuna tiyan runakuna ruraptinra. Chashnashina Tata Dioslla tukuy laya tiyakta rurarkan. ⁵ Moises Tata Diosta allita sirvishpa tukuy israel runakunata sukaman allita yachachirkansapa salvakuk runa shaman-nanta. ⁶ Chaymanta Jesukristu Tata Diospa chaylla wambran kashpa tukuy ñukanchikunta ashwan allita kamachiwanchisapa. Kushikushpa mana shaykushpa shamunanta shuyashpa kawsashpanchikunaka wasinshina kanchisapa.

Tata Dios willawanchisapa ama paymanta ashunanchikunapa.

⁷⁻⁸ Chashna Jesukristu allita kamachiwaptinchikuna akuychi payta kashushpa kawsaypachi. Tata Diospa Espiritu killkadunpi willawanchisapa: "Chunlla likidu pampapi ñawpa kawsak wambraynikuna mana munarkansapachu kasuwayta. Mana munawashpa rabyachiwarkansapa.

Ñuka yachachinaynita uyarishpaykichi ama chay ñawpa mana kasuwak runakunashina rabyachiwaychichu.

⁹ Chusku chunka watata ñawpa awiluykichi alli rurashkaynikunata kawash-pankunapish mana munawashpa rabyachiwarkansapa.

¹⁰ Chayrayku chay rabyachiwak runakunata piñayarkani.

Paykunata willarkani: "Kankuna shunkuykichipi llullachinakushpa mana munashkankichichu kamachikunaynikunata kasuya."

¹¹ Chayrayku piñakushpa sinchita paykunata willarkani ama chay kushiku-nankuna llaktapi yaykunankunapa."

¹² Wawkinikuna, paninikuna, mana tukuuniyuk kawsak Tata Dios-ninchita tukuy shunku kreyishpa kawsaychi ama paymanta ashunay-kichipa. ¹³ Tata Diospa killkadunpi willawanchisapa kunan payta allita ka-sunanchikunapa. Chayrayku wañunaykichi diyakaman tukuy diya sukwan sukwan animuchinakuychi ama uchallikushpa nima llullachinakushpa sinchi shunku tukunaykichi. ¹⁴ Jesukristuta kreyishkanchimantapacha wañunanchikuna diyakaman mana shaykushpa mana karuyashpa payllata allita kreyishpa kawsananchikuna tiyan. Chaypirami paywan tantalla kushikushpa kawsashunchisapa.

¹⁵ Chayrayku Tata Diospa killkadun willawanchisapa: "Kankuna Tata Diospa rimananta allita kasushpaykichi ama chay ñawpa mana kasukunayak runakunashina shunkuykichita sinchiyachichichu."

¹⁶ ¿Pikunawanti Tata Diospa rimananta yachaykashpankuna manana mu-narkansapanachu kasushpa kawsayta? Chay Egipto llaktamanta Moises llukshichishkan runakuna.

¹⁷ ¿Pikunawanti chusku chunka watata Tata Dios sukaman piñakurkan? Chay mana kasunayak runakunawan. Mana Tata Diosta kasunayashkanku-narayku chay chunlla chakidu pampapi wañurkansapa.

18 ¿Pikunatati Tata Dios sinchita willarkansapa mana chay alli kushikunankuna llaktapi yaykunankunapa? Chay mana kasunayak runakunata. **19** Yachanchisapa chay runakuna Tata Diosta mana kasushpa kawsashkankunarayku chay kushikunankuna llaktapi mana yaykuya atipashkankunata.

4

Tata Dios willawanchisapa paywan tantalla kushikushpa kawsananchikunapa.

1 Tata Dios awilunchikunatashina ūukanchikunatapish willawanchisapa paywan tantalla kushikushpa kawsananchikunapa. Chashna willawaptinchikuna akuychi kuydanakuypachi ama Tata Diosmanta ashunanchikunapa. **2** Tata Dios chay ūawpa awilunchikunatashina ūukanchikunatapish willawashkanchisapa kuyawashpanchikuna uchanchikunamanta salvawananchikunata. Chay awilunchikuna Tata Diospa rimananta uyarishpankunapish mana munarkansapachu tukuy shunku payta kreyishpa kawsayta. Chayrayku mana atiparkansapachú chay alli kushikunankuna llaktapi yaykuya.

3 Tata Dios killkadunpi rimarkan:
“Chay runakuna mana kasuwanayaptinkuna sukanan piñakushpa willarkanisapa

ama chay alli kushikunankuna llaktapi yaykunankunapa.”
Chay runakuna mana kushikunan llaktapi yaykuptinkunapish ūukanchikuna Jesukristuta allita kreyishkanchikunarayku Tata Dioswan kushikushpalla kawsashunchisapa. Tata Dios tukuy tiyakta rurashkanmantapacha kushikushpa kawsaykan. Chayrayku munan ūukanchikunapish paywan tantalla kushikushpalla kawsananchikunapa. **4** Tata Diospa killkadun willawanchisapa:

“Soktaynín diya Tata Dios tukuy rurashkanta tukuchashpa kushikushpa samarkan.”

Chashna Tata Dios yachachiwanchisapa yanapawaptinchikuna kushikushpalla kawsananchikunapa.

5 Chaymanta Tata Dios killkadunpi kashkan willawanchisapa:

“Chay kushikunan llaktapi chay runakuna mana yaykunkasapachu.”

6 Kunankamanlla Tata Dios munan paywan tantalla kushikushpa kawsananchikunapa. Chay ūawpa awilunchikuna Tata Dios salvakuk kananta yachashpankunapish chay rimanata mana kasurkansapachu. Chayrayku mana atiparkansapachu chay kushikunankuna llaktapi yaykuya. **7** Paykuna mana yaykuptinkuna aypa watakuna washa Tata Dios awilunchi Davidta kashkan willarkan:

“Kunan rimanaynita allita uyarishpaykichi ama sinchi shunku tukuy-chichu.”

Chayta willashpa Tata Dios yachachiwanchisapa kunankaman munananllata tukuy runakuna payta kasushpa kushikushpa kawsananchikunapa.

8 Chaymanta Josueta katik runakuna chay kushikunan llaktapi yaykushpankunapish mana kushikushpachu kawsarkansapa. Allita kushikushpa kawsashkankuna kaptinka aypa watakuna washan Tata Dios mana kashkan willanmansapachu karkan payta kasushpa kushikushpa kawsanankunapa. **9** Chashna Tata Dios paykunata willashpa yachachiwanchisapa kunankaman munananta ūukanchikunapish paywan tantalla kushikushpa kawsananchikunapa.

10 Tata Dios tukuy tiyakta rurashkanwasha kushikushpa samarkan. Nukanchikunapish Tata Dios kushikushkanshina sukaman kushikushpa mana turbakushpa payllata kreyishpa kawsashunchisapa. **11** Chayrayku akuychi sinchikushpa Tata Diosta allita kasushpa kawsaysypachi paywan tantalla kushikushpa kawsananchikunapa. Ama chay ñawpa mana kasunayak runakunashina kawsaysypachichu.

12 Tata Diospa rimanan atipachiwanchisapa mushuk layata allita rurashpa kawsananchikunapa. Ishkantin ladunpi filuyuk machetimanta Tata Diospa rimananka ashwan filuyukshinami. Shunkunchikunapi kawachiwanchisapa yuyananchikuna munananchikuna allichu manachu nishpa. **13** Tata Dios tukuy yuyayninchikunata allita riksins. Tata Dios rurawashkanchikuna kaptin paymanta mana atipanchimansapachu pakakuya. Paytaka tukuy alli mana alli rurashkanchikunata willananchikuna tiyan.

Jesukristu sukaman sufrishkanrayku atipan yanapawayninchikunata.

14 Tata Diospa chaylla wambran Jesukristu kawsamushkanwasha Tata Diospa kawsanan sielipi yaykurkan alli kamachikuk saserdotenchikuna kananpa. Chayrayku imashnacha Jesukristu kreyinanchikunata willashkanchikunashina akuychi mana shaykushpa payllata allita kreyishpa kawsaysypachi.

15 Jesukristu kay allpapi kawsashpa ñukanchikunashina rikchak layata sufrirkan. Chashna sukaman sufrishpapish mana niman suk kuti uchallikurkanchu. Rikchak layata sufrishkanrayku yachan sufrinanchikunata. Chayrayku saserdotenchikuna kashpa atipan llakichiwashpanchikuna yanapawayninchikunata. **16** Chayrayku sufrishpanchikuna akuychi Tata Diospa kamachikunan tiyarinanman riypachi allita yachashpa sukaman kuyawashpanchikuna yanapawananchikunata. Chayta yachashpa payta roygaypachi llakichiwashpanchikuna yanapawananchikunapa.

5

Tata Dios Jesukristuta akllarkan ashwan sinchi kamachikuk saserdote kananpa.

1 Judiyu saserdotekekuna paykunamanta suklallata akllaksapa ashwan sinchi kamachikukninkuna kananpa. Chay ashwan sinchi kamachikuk saserdoteka Tata Diosta roygarkan runamasinkunata yanapanankunapa. Chaymanta ofrendankunata Tata Diosta kurkansapa. Animalkunata wañuchishpa Tata Diosta kurkansapa uchankunamanta perdonanankunapa. **2** Saserdotekekuna atiparkansapa mana yachak mana allita rurashpa kawsak runakunata llakichiya paykunapish wañuk runakuna kashpankuna. **3** Wañuk runakuna kashpankuna paykunapish uchallikuk runakuna karkansapa. Chayrayku animalkunata wañuchiksapa kikinkunapa uchankunata Tata Dios perdonanankunapa llaktamasinkunapish uchankunata perdonanankunapa.

4 Tata Dios Aronta akllarkan kamachikuk saserdote kananpa. Chaymanta Tata Dios Arontashina tukuy saserdotekekuna akllarkansapa. Tata Dios mana akllaptinka mana ni suk runa kikinmanta atipanmanchu saserdote kayta. **5** Jesukristupish mana kikinmantachu akllanakurkan kamachikuk saserdote kananpa. Tatan Diosmi paytaka akllarkan chaylla wambran kaptin saserdote kananpa. Tata Dios killkadunpi wambranta willarkan: "Kanka wambraynimi kanki."

Kanta wañushkaykimanta kawsachimuptini tukuy layapi kamachikukmi kanki.”

⁶ Chaymanta Tata Dios killkadunpi chaylla wambranta willarkan: “Ñukaka akllayki Melkisedekshina mana tukuyniyukta kamachikuk saserdote kanaykipa.”

⁷ Jesukristu kay allpapi kawsashpa sukaman kaparikushpa wakakurkan. Tukuy laya atipak Tatan Diosta roygarkan manara tiempun chayamuptinra amara wañunarpa. Sukaman Tata Diosllapa munananta rurashkanrayku payka sukaman yanaparkan. ⁸ Jesukristu Tata Diospa chaylla wambran kayakashpapish kay allpaman shamurkan sufrinanpa. Chashna sukaman sufrishpa yachakurkan imashnami kay allpapi kawsashpa Tata Diospa munananta rurashpa kawsanka nishpa. ⁹ Chashna Tata Diospa munananta rurashkanrayku payta kasuk runakunata atipan uchanchikunamanta salvawayninchipunku mana tukuyniyukta paywan tantalla kawsananchikunapa. ¹⁰ Chayrayku Tata Dioska willarkan Melkisedekshina ashwan sinchi kamachikuk saserdote kananpa.

Ama ñuñukuk wambrakunashina kaypachichu.

¹¹ Aypara tiyan kankunata yachachinaynipa. Yachachinayaptinipish sinchi shunkuyuk kaptikichi mana atipanichu entiendichiynikichita.

¹² Unay tiemptutana kankuna Tata Diospa rimananta sukaman yachakushkankichi. Ñawpata sukkunata yachachinkichiman karkan. Kunankaman manara entiendinayankichichu. Munankichi ñukaykuna kashkan kuti chay kallarinanmantapacha yachachikushkaynikunata yachachinaynipasapa. Ñuñukuk wambrakunashinami kankichi. Manara alli mikunata mikukshinarachu kankichi. ¹³ Ñuñukuk wambrakunashina kashpaykichi manara Tata Diospa rimananta entiendishpa manara yachankichirahu allita rurashpa kawsyta. ¹⁴ Manana wambrakuna kashpanchikuna tukuy laya mikunata yachanchisapa mikuya. Tata Diospa rimananta kasushpa kawsashpanchikuna alli mikunata mikukshina kanchisapa. Amañanchisapa allita rurayta. Yachanchisapa imami alli rurananchikunapa imami mana allichu rurananchikunapa nishpa.

6

Ama munaypachichu Jesukristuta kreyishkanchikunamanta ashuya.

¹ Akuychi Jesukristupa yachachikunanta ashwan ashwanta yachakushpa kawsaypachi. Ama yachakushkanchikunata kashkan kuti chayllata munaypachichu yachakuya. Ñami yachakushkanchisapano amana uchalilikushpa kawsyta. Ñami yachakushkanchisapano Jesukristuta kreyishpa kawsyta. ² Ñami yachakushkanchisapano bawtisakunanchikunapa. Ñami yachakushkanchisapano wawkinchikunapa paninchikunapa umankunapi makinchikunata churashpa Tata Diosta roygayta yanapanankunapa. Ñami yachakushkanchisapano wañushpanchikuna kashkan kawsamunanchikunata. Ñami yachakushkanchisapano suknin diya Tata Dios tukuy runakunata willawananchikunata allita mana allita rurashkanchikunata. ³ Tata Dios yanapawaptinchikuna kunanmantapacha akuychi ashwan ashwanta Jesukristupa yachachikunanta yachakuypachi.

⁴ Suk runakuna Tata Diospa rimananta kreyishpa suk tiempullapa lus-pishina purishkasapa. Mishkik mikunata mallikshina Tata Dios perdonanankunata kreyik tukurkansapa. Tata Diospa Espiritu su imakunapi paykunata yanaparkansapa. ⁵ Chay runakuna yachashkasapa Tata Diospa rimanan mishkik mikunashina kananta. Yachashkasapa kay tiemu tukunankaman Tata Dios almirana layata atipananta rurayta. ⁶ Chaykunata yachashpankunapish manana nima munansapanachu Jesukristuta kreyiyta sinchi shunku tukushpankuna. Manana ni pi paykunata atipankasapanachu yachachiysapata kashkan Jesukristuta kreyinankunapa. Mana Jesukristuta kreyiyta munashpankuna kashkan kruspi payta wañuchikshina tukunsapa. Aypa runakuna paykunata kawashpankuna Jesukristuta washanchankasapa.

⁷ Alli ūyudu allpapi tarpudu murukuna allimata wiñan. Chay alli allpapi murukuna allimata wayuchakun doyñun pallananpa. Suk runakuna allita Jesukristuta kreyishpa kawsashpankuna chay alli murukunata wiñachik allpashinami. Tata Dios paykunata sukaman yanapankasapa. ⁸ Chaymanta suk runakuna kashayuk kiwakunallata wiñachik allpashinami. Mana nimapa valensapachu. Tata Dios paykunata mana tukuyniyuk ninapi suka-man kastigankasapa.

Tata Dios alli kaptin akuychi payllata allita kreyishpa kawsaypachi.

⁹ Kuyanayni wawkinikuna, paninikuna, Tata Diospa kastigunta rimash-paynikunapish yachanisapa kankunata Tata Dios salvashunaykichita. Jesukristuta allita kreyishpa kawsashpaykichi chay alli allpashina kankichi. ¹⁰ Allita rurashpa kawsaykankichi. Tata Diosta kuyashpa tukuy Jesukristuta kreyikmasikichita yanapashpa kawsaykankichi. Kunankaman sukwan sukwan yanapanakushpa kawsaykankichi. Tata Dios alli rurak kashpa alli rurashkaykichita mana kunkankachu.

¹¹ Ņukaykuna sukaman munanisapa wañunaykichi diyakaman tukuy kankuna yanapanakushpa allita rurashpa kawsanaykichi. Chashna allita rurashpa kawsashpaykichi yachankichi sieluman rinaykichita Tata Dioswan kawsak. ¹² Mana munanisapachu killa likidu tukunaykichi. Aypa runakuna mana shaykushpa tukuy Tata Dios willashkankunata kreyishpa kawsarkansapa. Kunanka sielipi Tata Dioswan kushikushpa kawsaykansapa. Munanisapa kunkunapish paykunashina Tata Dios willashushkaykichita allita kreyishpa kawsanaykichi.

¹³ Tata Dios ūawpa awilunchikuna Abrahama turašhpwa willarkan yanapananpa. Kikinpa shutinpi jurarkan mana tiyaptin ashwan sinchi shutipi juranana. ¹⁴ Chaypina Abrahama taka willarkan: "Ariya, kantami suka-man allita kuyashpa yanapashkayki. Miraknikitapish yanapasha suka-man aypata miranankunapa." ¹⁵ Chashna Tata Dios willaptin Abrahamka mana shaykushpa shuyarkan yanapananta. Chayrayku Tata Dios tukuy willashkanta rurashpa sukaman allita yanaparkan.

¹⁶ Runakuna suk imapa sukaman sinchita jurashpankuna willansapa: "Tata Diosmi yachan mana llullakuykanaynita." Chashna willaptinkunara tukuy pi kreyinsapa. Chaypira manana ayninakunsapanachu. ¹⁷ Tata Dios Abrahampa miraknikunata munarkan allita entiendichiyta tukuy willashkankunata rimashkanshina rurananpa. Chayrayku jurarkan tukuy willashkankunata rurananpa.

¹⁸ Ņukanchikunapish yachanchisapa Tata Dios mana nima llullakuk kananta. Tata Dios jurashpa willawaptinchikuna allita yachanchisapa yanapawananchikunata. Chayrayku animukunchisapa sukaman

kushikushpa kawsayta yachashpa Tata Dios tukuy willawashkanchikunata runanapa.

¹⁹ Yakupi purik barkupa tiyan suk llashak fierrumanta ruradu ankla yakupi churanankunapa. Chay llashak ankla barkuta sinchichin ama suchunanpa. Ñukanchikuna Jesukristuta allita kreyishpa kawsaptinchikuna payka chay barkupa anklanshina sinchichiwanchisapa ama paymanta suchunanchikunapa.

Tukuy chayta yachashpanchikuna Tata Diospa wasinpi llachapawan arkadun ukuta yaykunchisapa paywan tinkunakunanchikunapa.

²⁰ Chay llachapawan arkadu wasi ukuta Jesukristu yaykurkan Melkisedekshina mana tukuyniyukta saserdotenchikuna kananpa. Payka saserdotenchikuna kashpa ñukanchikunatapish yaykuchiwanchisapa Tata Dioswan parlananchikunapa.

7

Levipa miraknin saserdotekunamanta Melkisedek ashwan sinchi kamachikuk saserdote karkan.

¹ Melkisedek Salem llaktapa kamachikuknin karkan. Chaymanta paylla altu sielipi kawsak sukaman sinchi kamachikuk Tata Diospa saserdote karkan. Chay tiempu Abraham pichka kamachikuk runakunawan makanakushpa kallpachirkansapa. Chashna kallpachishpa aypa tiyapunankunata kichurkansapa. Chay kichushkankunata apashpa llaktaman kutiykaptin chay saserdote Melkisedek llaktanmanta llukshishpa rirkan Abrahamta tinkuk. Payta tinkushpa Tata Diosta roygarkan Abrahamta yanapananpa. ² Chaypina Abrahamka chay kamachikukkunata kichushkankunamanta chunkaynin partita chay saserdote Melkisedekta kurkan. Chay Melkisedekpa shutin ñawpa rimaypi riman “Allita Rurashpa Kamachikuk.” Chaymanta Salem llaktapa shutin riman “Kushikuy Llakta.” Chayrayku Melkisedekpa suknin shutin karkan “Kushikuy Llaktapa Kamachikuknin.”

³ Mana ni pi yachanchichu pimi Melkisedekpa tatan maman awilunkuna karkansapa nishpa. Manami niman suk librupi niman nasishkan niman wañushkan killkadu rikurinchu. Chayrayku yuyachiwanchisapa Tata Diospa wambran Jesukristushina mana tukuyniyuk saserdote kananta.

⁴ Mash allita yuyaychi. Melkisedek sukaman sinchi kamachikuk saserdote karkan. Chayrayku awilunchi Abrahamka chay kamachikukkunata makanakushpa kichushkankunamanta payta chunkaynin partita kurkan. ⁵ Moisespa kamachikunankuna rimarkan Levipa mirakninkuna saserdotekuna kanankunapa. Paykuna saserdote kashpangkuna Abrahampa mirakninkuna kashpangkunapish Abrahampa mirakmasinkunamanta chaskirkansapa tukuy chunka tiyapunankunamanta sukta.

⁶ Chaymanta chay saserdote Melkisedek mana Levipa miraknin kaykashpish Abrahammanta chunka tiyapunankunamanta sukta chaskirkun. Tata Dios Abrahamta yanapananpa willashka kaptinpish Melkisedek Tata Diosta roygarkan yanapananpa. ⁷ Yachanchisapa Melkisedek Abrahambanta ashwan sinchi kamachikuk kashpa atipashkanta Tata Diosta roygaya payta yanapananpa.

⁸ Kunanpish Levipa miraknin saserdotekuna wañuk runakuna kashpangkuna ñukanchikunata tukuy chunka tiyapakninchikunamanta sukta mañawanchisapa. Chaymanta Tata Diospa killkadunpi willawanchisapa Melkisedekshina mana tukuyniyuk saserdotenchikuna tiyananta.

⁹⁻¹⁰ Chaymanta chay saserdote Melkisedekwan Abraham tinkunakushkan tiempu manara nima Levi nima mirakninkuna nasirkansaparachu.

Manara nasiptinkunapish Tata Dios yacharkan nasinankunata. Chayrayku willanchimansapa Abrahampa miraknin saserdotekekunapish paywan tantalla Melkisedekta chunka tiyapanunkunamanta supta kushkankunata.

Jesukristu Melkisedekshina sinchi kamachikuk saserdotenchikunami.

¹¹ Levipa miraknin saserdotekekuna israel runakunata Tata Diospa kamachikunankunata yachachirkansapa. Chashna yachachishpankunapish mana atiparkansapachu uchankunamanta perdonayta runakunalla kashpanguna. Chayrayku Jesukristu mana tukuyniyukta kawsak kashpa Melkisedek saserdoteshina shamurkan perdonawananchikunapa. Mana tukuyniyukta kawsak kashpa Aronpa miraknin saserdotekekunamanta sukaman ashwan alli tukuy laya yachakmi. Chay Levipa miraknin saserdotekekuna perdonawayninchikunata atipashka kaptinkunaka Jesukristu mana shamunmanchu karkan salvawakninchikuna.

¹² Jesukristu shamurkan chikan laya saserdote kananpa. Chayrayku chikan laya kamachikunankunata yachachiwanchisapa. ¹³ Tata Diospa killkadu rimananpi willawanchisapa Jesukristu kamachiwakninchisaserdote kananta. Payka Judapa miraknin karkan. Judapa mirakninmanta mana niman suk saserdote tiyarkanchu. ¹⁴ Yachanchisapa Señorninchis Jesukristu Judapa miraknin kananta. Moiseska mana rimarkanchu Judapa mirakninkuna saserdote kanankunapa.

¹⁵ Chayrayku allita yachanchisapa Jesukristu Melkisedekshina chikan laya saserdote kananta. ¹⁶ Chay ūawpa saserdotekekuna Levipa ayllunmanta nasishkankunaryku saserdotekekuna karkansapa. Manami chayraykuchu Jesukristuka saserdotenchikuna. Payka wañushkanmanta kawsamushpa mana tukuyniyukta kawsanarayku saserdotenchikuna. ¹⁷ Tata Dios killkadu rimananpi chaylla wambranta willarkan:

“Kanmi kanki Melkisedekshina mana tukuyniyukta kamachikuk saserdote.”

¹⁸ Mana ni pi Moisespa kamachikunankunata kasushpa atiparkanchu uchankunamanta perdonadu kayta. Chayrayku Tata Dios rimarkan chay kamachikunankunata amana kasunanchikunapa. ¹⁹ Chay kamachikunankuna mana ni pita yanaparkanchu allita rurashpa kawsayta. Kunanka saserdotenchikuna Jesukristu uchanchikunamanta perdonawananchisapa. Chashna perdonawaytinchikuna atipanchisapa Tata Diosta ladunchayta.

²⁰ Tata Dios sinchita jurashpa willawashkanchisapa Jesukristu saserdotenchikuna kananta. Tata Dios mana jurashpachu willarkansapa Levipa mirakninmanta saserdotekekuna kanankunapa. ²¹ Tata Dios sinchita jurashpa willawarkanchisapa Jesukristu saserdotenchikuna kananta. Paypa killkadu chaylla wambranta willarkan:

“Ñukaka kanta sinchita

jurashpa mana chikan layata willashkaykichu.

Kanmi kanki mana tukuyniyukta kamachikuk saserdote.”

²² Chashna Tata Dios jurashpa willaptin Jesukristu Moisespa kamachikunankunamanta ashwan allita atipan yanapawayninchikunata.

²³ Levipa miraknin saserdotekekuna wañuk runakuna kashpanguna suk tiempullata saserdotekekuna karkansapa. Chayrayku paykunaka aypalla karkansapa. ²⁴ Chaymanta Jesukristu manana kutin wañushpana mana tukuyniyuk saserdotenchikunami. ²⁵ Chayrayku ñukanchikuna payta kreyishpa Tata Diosta ladunchaptinchikuna payka atipan uchanchikunamanta mana tukuyniyukta salvawayninchikunata. Mana tukuyniyukta kawsashpa Tata Diosta mana shaykushpa roygaykan yanapawananchikunapa.

26 Jesukristu Tata Diosllata kasushpa allillata rurashpa kawsarkan. Uchallikuk runakunawan kawsashpapish mana nima uchallikukchu karkan. Chashna Tata Diosllata kasushpa kawsaptin sielman pusharkan paywan tantalla kawsananpa. Allininchikunapa chay laya alli kamachikuk saserdotenchikuna tiyan.

27 Tukuy diya ñawpa kamachikuk saserdotekuna animalkunata wañuchirkansapa kikinkunapa uchankunamanta israel runakunapa uchankunamanta Tata Dios perdonananpa. Chaykamanka saserdotenchikuna Jesukristuka mana tukuy diyachu animalkunata wañuchin Tata Dios perdonawananchikunapa. Suk kutillami kikin munashpa kruspi wañurkan Tata Dios uchanchikunamanta perdonawananchikunapa.

28 Moisespa kamachikunankuna rimarkan Levipa mirakninkuna uchallikuk runakuna kashpapish kamachikuk saserdotekuna kanankunata. Tata Dios chay kamachikunankunata kushkanwasha chaylla wambranta jurashpa willarkan ashwan sinchi kamachikuk saserdote kananta. Payka mana nima uchallikuk kashpa mana tukuyniyuk sinchi kamachikuk saserdotenchikunami.

8

Saserdotenchikuna Jesukristu ñukanchikunawan mushuk paktuta rurarkan.

1 Allita uyariwaychi. Allitana yachachishkaykichi saserdotenchikuna Jesukristu sukaman allima kashpa sielipi Tata Diospa alli ladunpi tiyarishpa yanapawaykananchikunata. **2** Jesukristu kamachikuk saserdotenchikuna kashpa Tata Diospa sielipi wasinmanta yanapawaykanchisapa. Chay alli wasinta Tata Dioslla rurarkan. Manami runakunachu rurarkan. **3** Tata Dios ñawpa kamachikuk saserdotekunata aklarkan ofrendakunata wañuchidu animalkunata payta kunankunapa. Chayrayku Jesukristupish ofrendakunata kukunan tiyan. **4** Kunanka Jesukristu mana Levipa miraknin kashpa kay allpapi kashpaka mana saserdotechu kanman. Kay allpapi aypa saserdotekuna tiyan Moisespa kamachikunankunata kasushpa wañuchidu animalkunata Tata Diosta kunankunapa. Jesukristuka mana chay laya saserdotechu.

5 Ñukanchikuna dibujuta kawashpa pishillata riksinchisapa ima layami chay dibujadu nishpa. Chashnallami ñawpa tiempu Sinai urkupi Tata Dios Moisesta yachachirkan imashnami saserdotekuna animalkunata wañuchinkasapa nishpa. Chay saserdotekuna animalkunata wañuchishpa dibujutashina rurashpa tukuy runakunata yachachirkansapa imashnami Jesukristu wañunka nishpa. Moises Tata Diospa wasinta ruranayaykaptin Tata Dioska willarkan: "Allita uyariway. Wasinita tukuy layayukta iden kay urkupi kawachishkaynitashina ruray."

6 Animalkunata wañuchik saserdotekunamanta saserdotenchikuna Jesukristuka sukaman ashwan allita yanapawananchisapa. Mushuk layata ñukanchikunawan paktuta rurashka Tata Dioswan tantanachiwananchikunapa. Jesukristu wañushkanrayku Tata Dios willawanchisapa chay ñawpa kamachikunankunamanta ashwan allita yanapawananchikunata. Jesukristu mushuk paktuta ñukanchikunawan rurarkan salvawananchikunapa.

7 Chay ñawpa awilunchikuna Moisespa kamachikunankunata allita kasshpa salvanakuya atipaptinkunaka Jesukristu mana mushuk paktuta ñukanchikunawan ruranmanchu karkan. **8** Chay ñawpa awilunchikuna mana allita rurashpa kawsashkankunaryku Tata Dioska willarkansapa: "Suk tiempukaman ñukaka Israelpa mirakninkunawan Judapa mirakninkunawan mushuk paktuta rurasha.

⁹ Mushuk paktuta rurashpayni mana ñawpa awiluykichiwan paktuta rurashkaynishinanachu rurasha.

Ñawpa tiempu Egipto llaktamanta awiluykichita kuyashpayni llukshichimurkanisapa.

Chashna llukshichimuptinipish mana munarkansapachu rurashkayni paktuta kasuya.

Chayrayku manana yanaparkanisanpanachu.

¹⁰ Suk tiempu washan kankunapa miraknikichiwan mushuk paktuta rurashpa paykunata yuyachisha allita rurashpa kawsanankunapa.

Shunkunkunapi munachisha ñukata kasuwashpa kawsanankunapa.

Ñukaka paykunapa Tata Diosnimmi kasha.

Paykunaka wambraynikunami kankasapa.

¹¹ Tukuy chay wambraynikuna taksha atun riksiwankasapa.

Manana ni pi llaktamasinkunata familyankunata yachachinkasapanachu ñukata riksiwanankunapa.

¹² Uchankunamanta perdonashasapa.

Manana nima uchankunata yuyashanachu.”

¹³ Tata Dios chayta willawashpanchikuna yachachiwanchisapa manana chay ñawpa rurashkan paktuta yuyanantana. Chay ñawpa rurashkan paktuka mawkayashkanami. Manami ni pita yanapanchu. Mana ashwannachu illan tukunarpa. Chayrayku Tata Dios ñukanchikunawan mushuk paktuta rurashka.

9

Tata Dios yachachiwanchisapa imashnami payta kuyashunchisapa nishpa.

¹ Tata Dios ñawpa tiempu israel runakunawan paktuta rurashpa yachachirkansapa imashnami rurashkankuna wasipi payta kuyankasapa nishpa.

² Tata Diospa wasin ukupi ishkay kuartukuna tiyarkan. Suknin kuartupi kanchis brasuyuk lampara karkan. Chaymanta chaypi mesa sawanpi Tata Diosta kushkankuna pankuna karkan. Chay kuartupa shutin karkan “Tata Diosta Kuyanankuna Kuartu.”

³ Chaymanta suk alli awadu llachapa washanpi suk kuartu tiyarkan. Chay kuartupi kamachikuk saserdotella Tata Diowan tinkunakuk. Chayrayku shutin karkan “Tata Diowan Tinkunakuna Kuartu.” ⁴ Chay alli awadu llachapa ladunpi kuriwan tupadu taksha altar tiyarkan chaypi mishkilli asnakta rupachinankunapa. Chaymanta chay alli awadu llachapapa washan kuartupi suk kaja tiyarkan. Chay kaja ukunpi washanpi kuriwan tupadu karkan. Chay kuriwan tupadu kaja ukunpi kurimanta ruradu puyñu tiyarkan. Chay puyñu ukunpi suk tipi ñukñuk likidu sielumanta urmadu mikuna tiyarkan. Chaymanta chay kaja ukunpi Aronpa wiñashkan baston-nin tiyarkan. Chaymanta chay kaja ukunpi Tata Diospa killkadu kamachiku-nan tablakuna tiyarkan. ⁵ Chay kaja sawanpi ishkay kurimanta ruradu llipyak likidu angelkunashina tiyarkan. Chay angelkunapa rikrankuna chay kajata arkaksapa. Chay angelkuna chawpinmanta Tata Dios kamachikuk saserdotewan parlak. Manana chaykunata yachachinaykichinachu.

⁶ Tata Dios ñawpa awilunchikunata willarkansapa tukuy chaykunata ru-ranankunapa. Tukuyta rurashkankunawasha chay primeru kuartupi tukuy diya saserdotekuna yaykuksapa Tata Diosta sirvishpa kuyanankunapa.

⁷ Chaymanta chay alli awadu llachapa washan kuartu ukupi suk kutilla kada wata kamachikuk saserdotella yaykuk. Chaypi yaykushpa animalkunapa yawarninta apak kikinpa llaktamasinkunapapish mana yuyashpa uchallikushkankunata Tata Dios perdonanankunapa.

⁸ Chaywan Tata Diospa Espiritu yachachiwanchisapa kay allpapi Tata Diospa wasin tiyaptinra saserdotekunalla yaykunankunapa. Tata Dios mana munarkanchu chay washan uku kuartupi mana saserdote runakuna yaykunankunapa.

⁹ Tata Dios tukuy chaykunata rimashpa allita ūukanchikunata yachachiwanchisapa. Chay runakuna ofrendakunata wañuchidu animalkunata Tata Diosta kushpapish mana yacharkansapachu Tata Dios perdonanankunata paywan kushikushpa kawsanankunapa.

¹⁰ Chay runakunaka yuyarkansapa suk mikunallata mikushpa suk upyanallata upyashpa tukuy laya tiyakta mayllashpa Tata Diosta kushichiyanankunata. Chaykunata rurarkansapa Tata Dios mushuk paktuta ruranankaman.

Jesukristu kamachikuk saserdotenchi kashpa wañurkan uchanchikunamanta pichawananchikunapa.

¹¹ Kunanka Jesukristuka ūami shamushkana. Chaymanta sielmanu kutishpa Tata Diospa wasinpi yaykurkan ūukanchikunapa kamachikuk saserdotenchi kanañpa. Chashna saserdotenchi kuna kashpa sukaman tukuy layapi yanapawanchisapa. Tata Diospa wasin mana kay allpapi kaptin runakuna mana rurarkansapachu. Tata Dios chay sielupi wasita rurashka kaptin kay allpapi wasinmanta sukaman ashwan allimami.

¹² Jesukristu mana chivukunapa beshekukunapa yawarninta apashpachu sielupi Tata Diospa kawsanampi yaykurkan. Payka kruspi wañushpa kikinpa yawarninta ichashkanrayku suk kutilla chaypi yaykurkan mana tukuy niyukta kawsanampa. Chashna sielupi yaykuptin Tata Dios uchanchikunamanta perdonawanchisapa mana tukuy niyukta sielupi kawsananchikunapa.

¹³ Ñawpa tiempu saserdotekuna torokunapa chivukunapa yawarninwan, rupachidu beshekupa uchpanwan runakunata chakchuksapa. Chashna chakchuptinkuna chay runakuna Tata Diospa ñawpaknini allimana karkansapa atipanankunapa Tata Diosta kuyaya. ¹⁴ Chaykamanka Jesukristu yawarninta ichashkanrayku ashwan allita atipan uchanchikunamanta pichawayninchikunata. Mana tukuy niyuk Tatan Diospa Espiritu Jesukristuta yanapaptin payka mana uchayuk kayakashpa Tata Diosta kasushpa kruspi wañurkan. Yawarninta ichashpa uchanchikunamanta perdonawanchisapa amana kikinchikunapa munananchikunata rurashpa kawsananchikunapa. Chashna perdonawaptinchikuna atipanchisapa mana tukuy niyukta kawsak Tata Diosninchita sirvishpa kawsayta.

¹⁵ Jesukristu wañushkanrayku Tata Dios atiparkan runakunawan mushuk paktuta ruraya. Jesukristu wañushkanrayku Tata Dios atiparkan chay ñawpa kamachikunankunata kasushpa kawsak runakunatapish uchankunamanta perdonayta. Chay akllashkan runakunata atiparkan sielmanu pushayta paywan tantalla kawsanankunapa.

¹⁶ Runakuna manarapish wañushpara suk killkaduta ruransapa rimanankunapa pikunapami tukuy tiyapunkuna kiparinka nishpa. Chaymanta chay runa wañuptin chay killkadupi shutin churadu runakunapa tukuy layankuna kiparin. ¹⁷ Chay runa wañuptinra chay killkadupi shutin churadu runakuna tiyapunkunata chaskinsapa. Chay runa kawsaptinra manara ni pi tiyapunkunata chaskinkarachu.

¹⁸ Chayrayku Tata Dios ñawpa paktuta ruraptin saserdotekuna animalkunata wañuchishpa yawarninkunata ichachirkansapa. ¹⁹ Chaypina Moises tukuy runakunata Tata Diospa tukuy kamachikunankunata yachachikushkanwasha puka lanata isopo kaspi ramapi wankurkan. Chay wankudu ramata wañuchidu beshekukunapa chivukunapa yawarnin yakuwan chakrudupi ñuyuchirkan. Chaymanta chaywan chay killkadu libruta tukuy runakunata chakchurkansapa. ²⁰ Chay runakunata chakchushkankunawasha Moiseska willarkansapa: “Káy yawarwan kankunata chakchuptini yachankichi Tata Dios kankunawan allí paktuta rurashkanta.”

²¹ Chaymanta Moises Tata Diospa wasinta chay wasinpi sirvinan tiyakkunata chay yawarwan chakchurkan. ²² Tata Dios kamachikunankunata Moisesta kúshpa yachachikurkan yaka tukuy layata yawarwan chakchudu kashpara payllapa kananpa. Chay runakuna animalkunata wañuchishpa yawarninta ichaptinkunara Tata Dios uchankunamanta perdonaksapa.

Jesukristu wañurkan uchanchikunamanta perdonawananchikunapa.

²³ Chayrayku allí karkan ñawpa saserdotekuna animalkunata wañuchishpa yawarninwan tukuy layata tukuy runakunata chakchunankunapa. Chashna chakchuptinkuna Tata Diospa ñawpkainipi allimana karkansapa. Chay saserdotekuna animalkunapa yawarninwan chakchushpankuna yachachikuykarkansapa Jesukristu shamunanta wañuk yawarninta ichananpa. Tata Diospa wambran wañushpa yawarninwan chay animalkunapa yawarninmanta ashwan allita pichawanchisapa. Chashna Jesukristu wañushpa yawarninta ichapta Tata Dios perdonawashpanchikuna kawsanan sielipi yaykuchiwanchisapa.

²⁴ Jesukristu wañushkanwasha mana runakuna rurashkan Tata Diospa wasinpichu yaykurkan. Chay allpapi Tata Diospa wasinka yuyachiwanchisapa sielipi kawsanan wasita. Jesukristu wañushkanwasha sielullaman yaykuk-pacha rirkana. Chaypi yaykushpa kunanka Tata Diosta ñukanchikunapa royan.

²⁵ Ñawpa kamachikuk saserdotekuna tukuy wata chay Tata Diospa wasinuki animalpa yawarninta apashpa yaykuksapa. Jesukristuka manami chashnachu yaykurkan. Payka suk kutillami wañurkan sielipi Tata Diospa wasinpi yaykunanza. ²⁶ Jesukristu tukuy wata saserdotekunashina Tata Diospa wasinpi yaykuptinka kay allpata rurashkanmantapacha aypa kuti wañunman karkan. Payka manami aypa kuticu wañurkan. Tata Dios munashkan tiempu kay allpaman suk kutilla shamurkan kruspi wañunanza uchanchikunamanta perdonawananchikunapa.

²⁷ Tukuy runakuna suk kutilla wañunanchikuna tiyan. Chaymanta wañushkanchikunawasha Tata Dios willawashunchisapa allitachu manachu rurashkanchisapa nishpa. ²⁸ Jesukristupish suk kutilla wañurkan uchanchikunamanta perdonawananchikunapa. Chaymanta ishkaynin kuti shamunka tukuy payta shuyashpa kawsakkunata Tata Diospa kawsananman pushawananchikunapa. Manana shamunkanachu uchanchikunamanta perdonawakninchikunana.

10

Jesukristu wañushkanrayku manana animalkunata wañuchinchisapanachu Tata Dios perdonawananchikunapa.

¹ Moiséspa kamachikunankuna ñawpa runakunata yuyachirkansapa suknin diya Jesukristu wañushpa uchankunamanta salvanankunapa. Chay runakuna watan watan animalkunata wañuchishpankunapish

mana yacharkansapachu Tata Dios perdonanankunata paywan kushikushpa kawsanankunapa. ² Chay runakuna uchankunamanta perdonadu kashpankunaka manana yuyanakunmansapanachu uchasapa kanankunata. Manana animalkunata wañuchinmansapanachu Tata Dios uchankunamanta perdonanankunapa. ³ Kada wata chay runakuna animalkunata wañuchishpa yuyaksapa uchasapa kanankunata. ⁴ Mana chivukunapa nima torokunapa yawarninkunaraykuchu Tata Dios atiparkan uchankunamanta perdonayta. ⁵ Chayrayku kay allpaman Jesukristu shamushpa Tatan Diosta willarkan:

“Kanka mana munankichu runakuna animalkunata wañuchishpa kushu-nankunapa.

Chayrayku kay allpaman kachamuwashkanki runa kanaynipa.

⁶ Runakuna uchankunaryku animalkunata wañuchishpa rupachish-pankuna ofrendakunata kushushpa mana kushichishunkisapachu.

⁷ Chayrayku willashkayki: ‘A, Tatayni Dios, killkadu rimanayki rimashkan-shina kaypi kani munanaykita ruranaynipa.’”

⁸ Jesukristu chayta rimashpa yachachiwanchisapa chay runakuna uchankunaryku wañuchishkankuna animalkunata rupachishpa mana Tata Diosta kushichiykanankunata. Moisespa kamachikunapi animalkunata wañuchinankunapa rimashka kaptinpish chaykunaka mana nima Tata Diosta kushichirkansapachu.

⁹ Chaymanta Jesukristu Tata Diosta willarkan: “Allpaman shamushkani munanaykita rurak.” Chayta rimashpa yachachiwanchisapa Tata Dios man-na munanantana ñawpashina animalkunata wañuchinankunapa. Munarkan Jesukristu wañunarpa runakunata uchankunamanta perdonanankunapa. ¹⁰ Jesukristu Tata Diospa munananta rurashpa suk kutilla kruspi wañurkan amana kashkan wañunarpa. Pay wañuptin Tata Dios perdonawanchisapa payllapa kananchikunapa.

¹¹ Diyan diyan saserdoteckuna altar ñawpakpi shayarinsapa kuti kuti animalkunapa yawarninta Tata Diosta kunankunapa. Chashna kuti kuti Tata Diosta kúptinkunapish payka mana uchankunamanta perdonansapachu. ¹² Chayrayku suk kutilla Jesukristu wañurkan runakunata uchankunamanta perdonanankunapa. Wañushkanwasha Tatan Diospa alli ladunpi tiyarirkan. ¹³ Kunanka chaypi tiyarishpa shuyaykan Tata Dios tukuy payta chiknik runakunata saru saru ruranarpa payta kasunankunapa. ¹⁴ Suk kutilla Jesukristu wañurkan uchanchikunamanta perdonawananchikunapa. Kunanka perdonadu kaptinchikuna Tata Dios yachachiwaykanchisapa al-lita rurashpa kawsananchikunapa. ¹⁵ Tata Diospa Espiritun chashnalla willawanchisapa:

¹⁶ “Tata Dios chay ñawpa runakunata willarkan:

Suk tiempu washa ñukaka kankunapa miraknikichiwan mushuk paktuta rurasha.

Paykunataka yuyachisha munanaynita rurashpa kawsanankunapa.

Shunkunkunapi munachisha ñukata kasuwashpa kawsanankunapa.

¹⁷ Mana kutin uchankunata yuyashanachu.”

¹⁸ Tata Dios chayta rimashpa uchanchikunamanta perdonawapt-inchikuna manana animalkunata wañuchinanchikunachu tiyan perdonawananchikunapa.

Akuychi Tata Diosta ladunchaypachi.

¹⁹ Wawkinikuna, paninikuna, Jesukristu wañushpa yawarninta ichashkanrayku atipanchisapa Tata Diospa ñawpakinipi mana

manchakushpa yaykuya paywan tantalla kawsananchikunapa. **20** Jesukristu wañushkan oras Tata Dios wasinpi chay uku kuartupi arkanan llachapata llikirkan. Chayta llikishpa yachachiwanchisapa atipananchikunata paypa ñawpaknypi chayayta.

21 Kunanka Señorninchi Jesukristu kamachikuk saserdotenchikuna Kashpa Tata Diospa kawsanani kamachikuykan. **22** Chayrayku tukuy shunku payta allita kreyishpanchikuna akuychi Tata Diosta ladunchaypachi. Mana allita rurashpanchikunaka akuychi Tata Diosta roygaypachi perdonawananchikunapa. Uchanchikunata wanashpa chuya chuya armakudushina akuychi Tata Diosta ladunchaypachi. **23** Yachanchi Tata Dios tukuy willawashkanchikunata rurananta. Chayrayku akuychi mana manchakushpa Jesukristu salvawananchikunata parlakupachi.

24 Akuychi yuyaypachi imashnami sukwani sukwani yanapanakushun-chisapa nishpa allita kuyanakushpa allita rurashpa kawsananchikunapa. **25** Akuychi sukwani sukwani animuchinakuypachi tantanakuya Tata Diosta kuyananchikunapa. Yachaykaspa Señorninchi Jesukristu utka shamunanta ama munaypachihu sukkunashina mana tantanakushpa kawsayta.

Tata Dios mana kasunayak runakunata kastigankasapa.

26 Tata Diospa rimananta allita yachaykaspa tukuy shunku munashpa uchallikushpalla kawsaptinchikunaka Jesukristu uchanchikunamanta mana perdonawananchisapachu. Jesukristu mana perdonawaptinchikunaka mana ni pi wañushpa atipanchu perdonawayninchikunata **27** Jesukristuta mana nima layapi kreyinayaptinchikunaka manchana laya rawrak ninapi Tata Dios kastigawashunchisapa. Chaypi tukuy payta chiknik runakunata kastigankasapa.

28 Maykan runa Moisespa kamachikunankunata mana nima layapi kasunayaptin ishkay kimsa runakuna chataptinkunara awtoridarkuna willankasapa mana llakichishpa wañuchinankunapa.

29 ¿Manachu kreyinkichi Tata Diospa wambran Jesukristuta rabyachik runakunata ashwan sinchita kastiganankunata? Jesukristu wañushpa yawarninta ichashkanrayku Tata Dios ñukanchikunawan paktuta rurarkan uchanchikunamanta perdonawananchikunapa. Chay runakunaka rimansapa Jesukristu ichashkan yawar mana nimapa alli kananta. Chashna rimashpa kuyawakninchii Tata Diospa Espirituntapish rabyachinsapa. Chayrayku Tata Dios paykunata sukaman kastigankasapa.

30 Yachanchisapa Tata Dios rimashkanta: “Ñukalla mana alli rurak runakunata kastigashasapa. Ñukalla uchankunarayku kastigashasapa.” Chaymanta rimarkan: “Ñukami tukuy mana alli rurak wambraynikunatapish kastigashasapa.” **31** Mana tukuuniyuk kawsak Tata Diospa kastigunka sukaman manchanapa layami.

Sufrishpanchikunapish akuychi mana sampayashpalla Tata Diospa munananta rurashpa kawsaypachi.

32 Allita yuyaychi ñawpa tiempu Jesukristu yachachikushkanta kreyishpua luspishina kawsashkaykichi. Jesukristuta kreyishkaykichirayku sukanan sufrishpaykichiipish allita kreyishpalla kawsashkankichi. **33** Aypa runakuna kawashushkankichi chiknishuk runakuna suk kankunata mana allikunata willashushpaykichi sufrishshuptikichi. Chaypina suk kankuna chay sufrichidu wawzikichita llakichishpa yanapashkankichi.

34 Chaymanta karselpi wickhadu wawzikichita llakichishpa yanapashkankichi. Chiknishuk runakuna tiyapushuknikichita kichushuptikichiipish mana piñakushpaykichi kushikushpalla Jesukristuta

kreyishpa kawsashkankichi. Yachankichi Tata Dios kawsanan sielupi kankunapa ashwan alli mana tukuyniyuk tiyapushunaykichita.
 35 Yachashpaykichi paywan tantalla kushikushpa mana tukuyniyukta kawsanaykichita ama kreyikunaykichimaanta sampayaychichu.
 36 Sufrishpaykichiipish mana shaykushpa payllata kreyinaykichi tiyan paypa munananta rurashpa kawsanaykichipa. Paypa munananta rurashpa kawsaptikichi Tata Dios tukuy rimashkanta rurashpa sielman pushashunkichi. ³⁷ Tata Dios killkadunpi riman:

“Salvashuknikichi mana unayashpa utkana shamunka.

38 Ñukata kreyiwashpaykichi ñukawan tantalla kushikushpa kawsankichi. Ñukamanta ashushpaykichiika manami kushichiwankichichu.”

39 Ñukanchikunaka mana Tata Diomanta ashunchisapachu ama rawrayak ninaman rinanchikunapa. Jesukristuta kreyishpanchikuna allita yachanchisapa sielman rinanchikunata Tata Diowan mana tukuyniyukta kawsak.

11

Aypa runakuna Tata Diosta tukuy shunku kreyishpa kawsarkansapa.

¹ Tata Diosta allita kreyishpa kawsashpanchikuna allita yachanchisapa tukuy willawashkanchikunata rurananta. Chay willawashkanchikunata mana kawashpanchikunapish yachanchisapa mana llulla kananta.

² Tata Dios ñawpa awilunchikunata willarkansapa alli rurak runakuna kanankunata payta allita kreyishkankunarayku.

³ Ñukanchikunapish Tata Diosta kreyishpanchikuna allita yachanchisapa pay rimashpalla tukuy laya tiyakta rurashkanta. Payka mana tiyakmanta tukuy laya kawananchikunata rurarkan.

⁴ Abel Tata Diosta kreyishpa allima ovejanta wañuchishpa payta kuyashpa kurkan. Wawkin Kayinpa ofrenda kushkanmanta ashwan alli ofrendata kurkan. Chayrayku Tata Dios ofrendanta chaskishpa willarkan alli rurak kananta. Chashna Abel allita Tata Diosta kreyishpá kushichishpa wañudu kashpapish kunankaman yuyachiwanchisapa payshina Tata Diosta kreyishpa kawsananchikunapa.

⁵ Enopish Tata Diosta allita kreyishpa kawsashkanrayku sielman kawsakllata pusharkan. Payka mana wañurkanchu. Chashna Tata Dios sielman pushashka kaptinna manana ni pi allpapika kawarkansapanachu. Rimanapi willawanchisapa manarapish Tata Dios pushaptin payta kushichishpa kawsashkanta.

⁶ Mana ni pi Tata Diosta atipanchisapachu kushichiyyta mana payta kreyishpanchikuna. Paywan kawsayta munashpanchikuná kreyinanchikuna tiyan Tata Dios tiyananta. Chaymanta kreyinanchikuna tiyan Tata Diosta maskaptinchikuna yanapawananchikunata.

⁷ Noepish Tata Diosta kreyishpa kawsarkan. Tata Dios paytaka willarkan manllaybata yaku llokllananta. Manara ni suk kuti llokllananta kawashpapish Noeka Tata Diosta kreyishpa atun barkuta rurarkan. Chay barkupi llokllakuk yakumanta familyanta salvarkan. Chay atun barkuta ruraptipish runamasinkuna mana kreyirkansapachu Tata Dios kastiganankunata. Chayrayku sipikushpa wañurkansapa. Noe Tata Diosta kreyishkanrayku Tata Dios willarkan alli rurak runa kananta.

⁸ Chaymanta Tata Dios awilunchi Abrahamta willarkan alli llaktata kumananta. Chashna Tata Dios willaptin Abrahamka allita kreyishpa llaktamanta llukshirkan Tata Dios willashkan llaktaman rinanpa. Llukshishpa manara yacharkanrachu maymanmi riyan nishpa. ⁹ Chaymanta Tata Dios

willashkan llaktapi chayashpa chay llaktaka manara payparachu karkan. Chay llaktapi manara terrenuyuk kashpara Tata Dios kunanta kreyishpa millwamanta awadu raku llachapawan ruradu wasipi kawsarkan. Tata Dios Abrahampa wambran Isakta ñetun Jakobotapish willarkansapa chay llaktata kunankunapa. Chashna willashka kaptin paykunapish Tata Diosta kreyishpankuna millwamanta awadu raku llachapawan ruradu wasiku-napi kawsarkansapa. ¹⁰ Chay laya ruradu wasipi kawsashpa Abrahamka mana tukuyniyuk sielipi tiyak mana waklllik llaktaman shuyaykarkan riyta. Chay llaktata Tata Dios rurarkan.

¹¹ Chaymanta Tata Dios Abrahamta willarkan warmin Sara wawayananta. Chaypina Sara mana niman suk wawayuk kashpa vieja kayakashpapish kreyirkan Tata Dios alli rurak kashpa willashkanta rurananta. Chayrayku Tata Dios Sarata yanaparkan wawayanarpa. ¹² Abrahampa wambrayanan tiempu pasashka kaptinpish Sara paypa wambran Isakta wawayarkan. Chaymanta Isakmanta luserukunashina atun kocha mañanpi playakunashina mana yupanya layata sukaman aypata mirarkansapa.

¹³ Manara Tata Dios willashkanta kuptinkunara chay ñawpa awilunchikunaka wañunankuna diyakaman kreyirkansapa Tata Dios willashkanta rurananpa. Chayta kreyishpankuna kushikushpa karullamanta chay llaktata kawakshina yuyanakurkansapa. Chayrayku kay alppapi kawsashpara mana llaktayukshina kawsarkansapa. ¹⁴ Chashna mana llaktayukshina Tata Diosta kreyishpalla kawsashpankuna tukuy pita entiendichirkansapa sielipi kawsanan llaktankunaman riykanankunata. ¹⁵ Mana chay llukshimuskankuna llaktallamanchu kutinayarkansapa. Chay llaktaman kutinayashpankunaka chayman kutinmansapa karkan. ¹⁶ Paykunaka chay ashwan alli sielipi llaktaman munarkansapa riyta. Chayrayku Tata Dios sielipi alli llaktankunata rurashka. Mana pinkakushpa paykunata willarkansapa Tata Diósinkuna kananta.

¹⁷⁻¹⁸ Chaymanta Tata Dios Abrahamta willarkan chaylla wambran Isakta wañuchishpa kunanpa. Chashna willaptin Abrahamka kreyirkan Tata Dios willashkanta rurananpa. Yacharkan chay wambran Isakmanta aypa mirakninkuna tiyananta. Chayrayku Tata Diosta kreyishpa wambranta payta kushpa mana michashpa wañuchinayarkan. ¹⁹ Abrahamka yacharkan Isak wañuptin Tata Dios atipananta kawsachimuya. Tata Diosta allita kreyiptin chay wambranta wañudu kashkanmantashina kawsachimurkan.

²⁰ Chaymanta Isakpish Tata Diosta kreyishpa wambrankuna Jakobota Eswata willarkansapa Tata Dios mirakninkunata sukaman yanapanankunata.

²¹ Jakobopish wañunayaykashpa Tata Diosta kreyishpa wambran Josepa ishkantin wambrankunata willarkansapa Tata Dios yanapanankunata. Chaypina bastonnnipí kimikushpa Tata Diosta kuyarkan.

²² Josepish wañunayaykashpa Tata Diosta kreyishpa wawkinkunata willarkan suk tiempukaman tukuy israel runakuna Egito llaktamanta llukshinankunata. Kamachirkansapa llukshishpankuna tullunkunata apanankunapa Tata Dios willashkan llaktapi pampak.

²³ Chaymanta Moises nasishkan tiempu sinchi kamachikuk runa kamachikurkan tukuy ullku wambrakunata wañuchinankunapa. Chashna kamachikuptinpish Moises nasiptin tatan maman Tata Diosta allita kreyishpa chay kamachikuk runata mana kasurkansapachu. Alli wambra kananta kawashpankuna kimsa killata pakarkansapa ama ni pi wañuchinanpa.

²⁴ Moises runa kashpana Tata Dios yanapananta allita kreyishpa manana munarkannachu kamachikuk runapa shipashninpá wiwachun kayta.

25 Yacharkan chay mandakukpa ñetun kashpa suk tiempullata atipananta kushikushpa mana allita rurashpa kawsayta. Chayrayku Tata Diospa wambrankunawan tantalla sufrishpapish munarkan paykunallawan kawsayta. **26** Egipto llaktapi kiparishpaka Moiseska kullkisapa kanman karkan. Chashna kaptinpish Moiseska yacharkan Tata Dios suk salvakuk runata kachamunanta. Chayrayku yuyarkan ashwan alli kananta Tata Diospa wambrankunawan tantalla sufrinanza. Munarkan Tata Dios sielman pushananta kushikushpalla paywan tantalla kawsananpa.

27 Moises Tata Dios kuydananta kreyishpa chay kamachikuk runa piñakunanta mana manchashpa Egipto llaktamanta llukshirkan. Tata Diosta mana kawashpapish iden kawakshina allita mana shaykushpa payllata kreyishpalla kawsarkan. **28** Tata Dios salvanankunata kreyishpa Paskua fiestata rurarkan. Tukuy israelmasinkunata yachachirkan oveja wawankunata wañuchishpa yawarninwan wasin punkunkunata chakchunankunapa. Chay yawarta kawashpa Tata Diospa angelin israel runakunapa piwi wambrankunata mana wañuchirkansapachu.

29 Chaymanta israel runakuna Tata Diosta kreyiptinkuna chay atun Puka Yakuta rakinachishpa ñanta rurarkan purinankunapa. Chaymanta Egipto runakuna katishpankuna chay ñanta riykaptinkuna Tata Dios yakuta wichkanachirkan. Chaypina sipikurkansapa.

30 Chaymanta israel runakuna Tata Diosta allita kreyishpankuna kanchis diyata Jeriko llaktapa vueltashnintinta purirkansapa. Chashna puriptinkuna kanchisnin diya chay llaktapa pirkankuna tikrarkansapa.

31 Chaymanta waynandera warmi Rahab Tata Dios salvananta kreyishpa Jerikopi chapakuk rik ishkay israel runakunata pakarkansapa. Chayrayku israel runakuna chay Jerikopi mana Tata Diosta kreyinayak runakunata wañuchishpankuna mana paytaka wañuchirkansapachu.

32 Tiyanllara aypa Tata Diosta kreyik runakunapa willanaynipa. Tiemu pishin Gedeonpa Barakpa Samsonpa Jeptepa Davidpa Samuelpa Tata Diospa rimananta yachachikukunapa willanaynipa. **33** Chay runakuna Tata Diosta allita kreyishpa makankushpa llaktakunata kichukurkansapa. Sukkunaka kuskata kamachikuksapa. Sukkunaka Tata Dios willashkankunata chaskirkansapa. Sukkunaka kawarkansapa Tata Dios pumakunapa shiminkunata wichkapuptinkuna ama wañuchinankunapa.

34 Tata Dios yanapaptin sukkunaka manllayba rawraykak ninata wañuchirkansapa. Sukkunaka kishpirkansapa ama chiknik runakuna ishkay filuyuk machetiwan wañuchinankunapa. Sukkunaka sampayadu kaptinkuna Tata Dios sinchiyachirkansapa. Sukkunaka chiknik runakunawan sukaman makanakushpankuna atiparkansapa paykunata kallpachiyya. **35** Tata Diosta kreyik warmikuna kawarkansapa Tata Dios wañudu wawankunata kawsachimuptinkuna.

Chaymanta chiknik runakuna wañuchinankaman sukaman sufričiptinkunapish sukkuna manami munarkansapachu Tata Diosta niegaya. Yacharkansapa wañushpa sielipi Tata Diospa kawsanamman rinankunapa chaypi ashwan allita kawsak. **36** Sukkunata asichirkansapa. Sukkunata makarkansapa, kadenawan watarkansapa, karselkunapi wichkarkansapa. **37** Sukkunata ruminchashpa wañuchirkansapa. Sukkunata chawpinkunapi tipishpankuna sukkunata ishkantin ladu filuyuk machetiwan wañuchirkansapa. Sukkunata wasinkunamanta karkurkansapa kayta chayta purinankunapa. Ovejakunapa chivukunapa karapankunawan llachapakuksapa. Paykunata rikchak layapi sufričiksapa. Mana nimayuk llakidu kawsarkansapa. **38** Chakidu chunlla

pampakunapi sachakunapi pantakudushina chayta chayta purirkansapa. Machaykunapi allpa uchkukunapi kawsarkansapa. Mana allichu karkan chay Tata Diosta kreyik runakuna mana alli rurak runakunawan kawsanankunapa.

39 Chay runakuna Tata Diosta allita kreyishpa kawsashkankunaryaku payka willarkansapa alli rurak kashkankunata. Chashna willaptinkunapish kay alppapi kawsashpankuna manara kawarkansaparachu Tata Dios willashkankunata ruraptin. **40** Tata Dios ūukanchikunata yuyawashpanchikuna munarkan chay ūawpa kreyikuk runakuna Jesukristu shamananta shuyanankunapa. Chaypina Tata Dios paykunata ūukanchikunawan tantallata pushawashunchisapa paywan sielupi kawsananchikunapa.

12

Sufrishpanchikunapish Jesukristuta kreyishpa kawsaypachi.

1 Chashna chay runakuna sukaman allita Tata Diosta kreyishpa kawasaptinkuna akuychi paykunashina payta allita kreyishpa kawsaypachi. Kalppak runa ūawpayta munashpa mana suni llachapayukchu kalppan atipanarpa allita kalppayta. Ūukanchikunapish akuychi tukuy uchanchikunata wanaypachi atipananchikunapa mana shaykushpa Tata Diosta kreyishpa kawsayta.

2 Akuychi allita yuyaypachi Señorninchí Jesukristu kruspi pinkakuna layata sufrishpa wañushkanta. Payka pinkakuna layata sufrishpa wañunanta yachashpapish munarkanlla wañuya. Yacharkan sufrishkanwasha sielman rinanta Tatan Dioswan kushikushpa kawsak. Chayman rishpa Tatan Diospa tiyarinan alli ladunpi tiyarirkan. Kunanka yanapawanchisapa sufrishpanchikunapish payta allita kreyishpa kawsananchikunapa.

3 Chayrayku yuyaychi uchasapa runakuna Jesukristuta sukaman sufrichishkankunata. Chayta yuyashpaykichi mana shaykushpa mana sampayashpa payta kreyishpa kawsaychi. **4** Chashna payta kreyishpa kawsashpaykichi sukaman sinchikuykankichi ama uchallikunaykichipa. Sukaman sinchikushpaykichipish manara Jesukristushinarachu wañunaykichikaman sufrishkankichi. **5** Ichará Tata Dios willashushkaykichita kunkashkankichi. Wambrankuna kaptikichi rimanampi willashunkichi: "Munanayni wambrayni, kanta kuyashpa kastigashpayni yachachiyki ashwan allita kawsanaykipa. Chashna kastigaptini allita kasuway.

Yachachiptini ama llakishpa sampayaychu.

6 Kanta kuyashpayni kastigashpa yachachiyki.

Wambrayni kanaykipa chaskishkaynirayku kastigashkayki."

7 Tukuy runakuna wambrankunata kuyashpkä kastigashpa yachachin-sapa. Chayrayku kankuna Tata Diospa wambrankuna kashpaykichi kastigashuptikichi kushikushpalla payllata kasuychi. **8** Tata Dios tukuy wambrankunata kastigawashpanchikuna yachachiwanchisapa. Kankunata mana kastigashuptikichika mana deveraschu paypa wambrankuna kankichiman.

9 Ūukanchikuna taksha wambrakuna kaptinchikuna tatanchikuna kastigawashpanchikuna yachachiwashkanchisapa. Chashna kastigawaptinchikuna kuyashpa kasushkanchisapa. ¿Manachu sielupi kawsak Tatanchi Diostaka ashwan allita kuyashpa kasunanchikuna tiyan paywan tantalla kawsananchikunapa? **10** Suk tiempullapa kay alppapi tatanchikuna kikinkuna munanankunashina yachachiwashkanchisapa. Chaymanta Tatanchi Dios allininchipa yachachiwanchisapa payshina

alli rurak kananchikunapa. ¹¹ Tata Dios kastigawaptinchikuna chay ratulla llakinchisapa. Chashna kastigawaptinchikuna yachakunchisapa kushikushpa ashwan allita rurashpa kawsayta.

Tata Diosta allita kasushpa kawsaypachi.

¹² Suk wawkikichi panikichi sukaman shaykushpa manana Jesukristuta katiptinkuna paykunata animuchishpa yanapaychi. ¹³ Allita rurashpa kuska ñantashina puriychi shaykudu wawkikichi panikichi katishushpaykichi ama uchallikushpa mitkakukshina urmanankunapa.

¹⁴ Munaychi tukuy runamasikichiwan kushikushpa mana ayninakushpa kawsayta. Allita rurashpa Tata Diospa munananllata rurashpa kawsaychi. Mana paypa munananta rurashpa kawsashpaykichika mana payta kawan-kichichu. ¹⁵ Chayrayku sukwan sukwan yanapanakuychi ama niman suk wawkikichi panikichi Tata Diosmanta ashunankunapa. Jesukristuta kreyik-masikichiwan piñanakushpa ayninakushpa kawsashpaykichi sapinmanta-pacha ayak likidu kaspikunashinami kankichi. Ayak likidu kaspishina kash-paykichi wawkikichi panikichi allita rurashpa kawsaykashkankunamanta sampayachinkichi.

¹⁶ Ama chikan warmiwan chikan ullkuwan uchallikushpa kawsaychichu. Chaymanta ama ñawpa Esawshina yuyaychichu Tata Dios yanapanan mana alli kananta. Esawka mana nimatashina kawarkan piwi kaptin Tata Dios tukuy layapi yanapananta. Chayrayku wawkin Jakobota suk kallana mikunallapa Tata Dios yanapananpa willashkanta rantichirkan.

¹⁷ Chaymanta aypa watakunawashan Esawpa Jakobopa tatankuna wañunayaykaptin Esawka munarkan Tata Diosta royananpa payllata yanapananpa. Chayta munaptinpish tatanka manami almitirkanchu. Esaw sukaman llakishpa wakakuptinpish tatanka Tata Diosta roygarkan wambran Jakobollata tukuy layapi yanapananpa.

¹⁸ Ñukanchikuna niman suk kuti ñawpa awilunchikunashinachu ninawan rawraykak Sinai urkuta ladunchashkanchisapa. Yana likidu puyukuna chay urkutawichkarkan. Sukaman sinchita wayrashpa llipyashpa troynarkan. ¹⁹ Mana nima chay urkumanta sinchita trompeta pukunanta uyarishkanchisapachu Tata Dios rimakuptin. Awilunchikuna chay trompeta pukunanta uyarishpankuna Moisesta roygarkansapa amana Tata Dios paykunata parlachinankunapa. ²⁰ Sukaman manchakurkansapa Tata Dios kamachikuptin: “Suk runa sük animal kay urkuta ladunchaptin pitapish kaptin ruminchashpaykichi lansawan tuksishpaykichi wañuchinaykichi tiyan.” ²¹ Moises chay urkuta sukaman manchanapa layata kawashpa rimarkan: “Ñukapish manchakuywan sukaman chukchukuni.”

²² Ñukanchikuna mana chashnachu manchakuywan kawsanchisapa. Mana tukuyniyuk Tata Diospa sielipi Jerusalen llaktanman Sion urkuman Tata Diosta kuyak waranka waranka angelkunaman riykanchisapa. ²³ Tata Diosta ñawpa kreyik runakunawan tantalla kawsak riykanchisapa. Paykunapa shutinkuna sielipi killkadu tiyan. Tata Dios tukuy runakunata willawashunchisapa allitachu manachu rurashkanchisapa nishpa. Riykanchisapa paywan sielipi kawsak. Riykanchisapa Tata Dios perdonashkan alli rurak runakunawan tantalla kawsak.

²⁴ Chay ñawpa Kayin wawkin Abelta wañuchishpa yawarninta ichachiptin Tata Dios kastigarkan. Jesukristu wañushpa yawarninta ichaptin Tata Dios uchanchikunamanta perdonawanchisapa. Jesukristu wañushkanrayku ñukanchikunawan mushuk ashwan alli paktuta rurarkan. Riykanchisapa paywan tantalla kawsak. ²⁵ Chayrayku akuychi yachachiwakninchí Jesukristuta allita kasushpa kawsaypachi. Chay ñawpa

awilunchikuna alli yachachikuk runakunata mana kasushkankunaryku mana atiparkansapachu Tata Dios kastiganankunamanta kishpiyta. Ñukanchikunapish sielumanta shamuk yachachiwakninch Jesukristuta mana kasushpanchikunaka manami atipashunchisapachu Tata Dios kastigawananchikunamanta kishpiyta.

26 Ñawpa tiempu Sinai urkumanta Tata Dios rimashpa tukuy allpata kuyuchirkan. Chaymanta kunanka willawanchisapa: “Kashkan rimashpayni mana allpallatachu kuyuchisha. Sielutapish kuyuchisha.”

27 Tata Dios chayta rimashpa yachachiwanchisapa tukuy kuyuchinapa laya rurashkanta kulluchinanta tukuy mana kuyuchinapa layalla kiparinanpa.

28 Maypicha Tata Dios kamachikun chaypi mana nima kuyunkachu. Chayrayku akuychi payta sukaman tukuy shunku agradesishpa sirviypachi. Payta kuyashpa kushichiypachi. **29** Tata Diosninchika rawraykak kulluchikuk ninashinami.

13

Tata Diosta kushichishpa kawsaypachi.

1 Tukuy Jesukristuta kreyikmasikichikunawan mana shaykushpa kuyanakushpa kawsaychi. **2** Ama kunkaychichu wasikichipi chayak runakunata kushikushpa chaskiyta. Sukkuna wasinpi chayak runakunata chaskishpa runakuna nishpa angelkunata chaskirkansapa. **3** Yuyaychi karselpi wichkadu runakunata yanapayta. Yuyaychi kankuna karselpi paykunawan tantalla wichkadushina kanaykichita. Sufrichidu runakunata llakichishpa yuyaychi kankunapish sufriyakshina kanaykichita.

4 Tukuy kasaradukuna warminllawan kusanllawan kuyanakushpa kawsanankuna tiyan. Ama chikan warmiwan chikan ullkuwan uchallikushpa kawsaychichu. Tata Dios kastigankasapa chikan warmiwan chikan ullkuwan uchallikushpa kawsakkunata. Mana kasarashpara uchallikkunatapish sukaman kastigankasapa.

5 Tata Dios willawashkanchisapa: “Ñukaka mana kunkashkaykichichu nima sakishkaykichichu.” Chayrayku ama sukaman kullkiyatay munaychichu. Tiyapushuknikichillawan kushikushpa kawsaychi. **6** Chashna Tata Dios mana sakiwaptinchikuna mana manchakushpa atipanchisapa willayta:

“Tata Dios yanapawaptin mana ni pita manchanichu.

¿Imatati runamasini rurawanman?”

7 Tata Diospa rimananta yachachishushpaykichi yanapashuknikichita allita yuyaychi. Paykuna allita rurashpa kawsashkankunata yuyaychi paykunashina allita Jesukristuta kreyishpa kawsanaykichipa. **8** Kayna kunan kaya Jesukristu chay layallami kawsan. Tukuy tiempu idenllata ruran. **9** Chayrayku ama munaychichu chikan laya llulla yachachikunata kasuya. Ashwan alli kanman Tata Diosta allita kuyashpalla kawsanaykichipa. Awilunchikunaka Moisespa kamachikunankunata kasushpalla mana atiparkansapachu Tata Diosta kushichiyyta. Chayrayku ama yuyaychichu mikunata mikushpa mikunata sasishpa Tata Diospa munananta ruraykanaykichita.

10 Jesukristu kruspi wañushkanrayku Tata Dios perdonawanchisapa. Jesukristu wañushka kaptin ñukanchikuna manana animalkunata wañuchishpanachu Tata Diosta sirvinchisapa. Chayrayku chay ñawpa saserdote kuna manana atipansapanachu animalkunata wañuchishpa Tata Diosta kushichiyyta.

¹¹ Kamachikuk saserdote animalkunata wañuchishpa yawarninta apashpa Tata Diospa wasinpi yaykuk payta kuk. Yawarta kuptin Tata Dios uchankunamanta perdonarkansapa. Chaymanta chay wañuchidu animalkunata llakta washaman aparkansapa chaypi tukuya rupachinankunapa. ¹² Jesukristupish Jerusalen llakta washapi wañurkan kikinpa yawarninta ichashpa uchanchikunamanta perdonawananchikunapa. ¹³ Jesukristu Tata Diospa munananllata rurashpa kawsaptin runakuna sufrichirkansapa. Ñukanchikunapish ñawpa amañananchikunata kunkashpa akuychi Jesukristushina kushikushpalla sufriypachi.

¹⁴ Kay allpapi mana unaytachu kawsashunchisapa. Shuyaykanchisapa mana tukuuniyuk Tata Diospa llaktanman riyta. ¹⁵ Chayrayku Jesukristu yanapawaptinchikuna tukuy diya tukuy shunku munashpa akuychi Tata Diosta alabashpa agradesiypachi. Tukuy pita kushikushpa willananchikuna tiyan Tata Dios sukaman allima kananta.

¹⁶ Ama kunkaychichu sukkunata yanapaychi. Tiwashuknikichiwan mana nimayuk runakunata yanapaychi. Chashna yanapashpa Tata Diosta suk ofrendata kukshina kushichiykankichi. ¹⁷ Tata Diospa rimananta yachachishuknikichi runakunata kasuychi. Paykunaka mana shaykushpa allita kuydashushpaykichi yanapashunkichi. Paykunapish Tata Diosta willanankuna tiyan allitachu manachu kuydashushkankichi nishpa. Chayrayku paykunata allita kasuychi kushikushpa mana nima llakishpa kankunata yanapashunaykichipa. Mana paykunata kasushpaykichika kankunapish sufrinkichi.

¹⁸ Ñukaykunapa Tata Diosta roygaychi yanapawanankunapa. Yuyanisapa allita rurashpa kawsashkaynikunata. Munanisapa allita rurashpa kawsayllata. ¹⁹ Tata Diosta roygapaychi pay munaptin utka kashkan kankunaman kutinaynipa.

Tata Dios sukaman yanapawananchisapa.

²⁰ Jesukristu wañuptin kushichiwakninchu Tata Dios wañushkanmanta kawsachimurkan. Chashna Tata Dios kawsachimuptin Señorninchu Jesukristu alli oveja kuydak runashina kuydawashpanchikuna yanapawananchisapa.

Payka wañurkan yawarninta ichashpa mana tukuuniyuk mushuk paktuta rurananpa. ²¹ Chayrayku munani Tata Dios yanapashunaykichipa allita rurashpa paypa munananta rurashpa kawsanaykichipa. Munani Tata Dios Jesukristurayku ñukanchikunata yanapawananchikunapa tukuy layapi paypa munananta rurashpa kawsananchikunapa. ¡Tata Dios sukaman yanapawaptinchikuna mana tukuuniyukta payta kushichishpa alabaypachi!

²² Wawkinikuna, paninikuna, kankunata animuchishpa kay taksha kartaynita killkashkaykichi. Roygaykichi kushikushpa chaskishpa leyinaykichipa.

²³ Chaymanta willaykichi wawkinchi Timoteo karselmantu llukshishkanta. Kayman utka shamuptin payta pushashpa risha kawakanikichi.

²⁴ Tukuy Jesukristuta kreyik runakunata rimachipaychi. Tata Diospa rimananta yachachishuknikichitapish rimachipaychi. Tukuy kay Italia llaktamanta wawkinchikuna rimachishunkichi. ²⁵ Tata Diosta roygani tukuy kankunata yanapashunaykichipa.

Chayllata killkashkaykichi.

SANTIAGO

TUKUY MAYPI KREYIKUKMASINKUNATA KILLKARKAN

Tata Diosmi tukuy laya allikunata yachachiwanchisapa.

¹ Nuka Santiago, Tata Diospa Señorninchi Jesukristupa mandunpi kawsani. Kankuna judiyu aylluynikuna kaptikichi rimachiykichi. Maypipish chaypi chaypi kawsaykaptikichi ūnuka kay kartata killkaykaykichi.

² Munanayni wawkinikuna, panikuna, kankuna ima layatapish sufrishpaykichi kushikushpalla kawsanaykichi tiyan. ³ Yachankichi sufripitkichi Tata Dios kawachishunaykichita allitachu manachu payta tukuy shunku kreyiykankichi nishpa. Chashna sufrishpaykichi yachakunkichi sinchikushpa allita Tata Diosta kasushpa kawsayta. ⁴ Sufrishpaykicipish payllata tukuy shunku kreyishpa kawsaychi ama nima illashunaykicipha. Tata Diosta kreyishpa kawsashpaykichi alli yachak alli rurak runakuna kankichi.

⁵ Ichara kankuna mana yachankichimanchu allita rurashpa kawsayta. Mana allita yachashpaykichika Tata Diosta roygaychi yachachishunaykicipha. Payta roygaptikichi kushikushpa yachachishunkichi. Payka mana piñakushpa mana michakushpa allita yanapashunkichi. ⁶ Tata Diosta mañashpaykichi tukuy shunku payta kreyishpa mañaychi. Ama rimaychichu ¿Tata Dios yanapawankachu manachu? nishpa. Chashna rimashpaykichika iden wayra chayta chayta yakuta kuyuchinanshina kankichi. ⁷ Mana tukuy shunku Tata Diosta kreyiptikichika payka manami yanapashunkichichu. ⁸ Sukta sukta mana kuskata yuyakushpaykichi chikan chikanta rurankichi.

Kullkinchi kunanlla tukun.

⁹ Kankunapa mana aypa kullki tiyashuptikicipish kushikushpalla kawsanaykichi tiyan Tata Dios kuyashuptikichi. ¹⁰ Tukuy kullkiyuk runakuna chakik kiwa sisakunashina wañunkasapa. Chayrayku Tata Dios paykunata kullkinkunata kichuptinkunapish kushikushpalla kawsanankuna tiyan. ¹¹ Rupay sinchita nanaptin kiwakuna chakin. Sisakuna urmashpa usun. Chay usuk sisakunashina kullkiyuk runakuna negosyunta ruraykaptinkuna raslla wañunkasapa.

Sufrishpanchikunapish kushikushpalla kawsanchisapa Tata Dioswan kawsananchikunata yuyashpa.

¹² Mana allita rurayta munashpanchikunapish ama chaytaka ruraypachichu. Chashna mana rurashpa Tata Diossalata kasushpa kawsaptinchikuna sukanman kushichiwanchisapa. Willawashkanchisapa payta kuyaptinchikuna kushichiwashpanchikuna suk koronata premyunchikunatashina kuwananchikunata. Chay koronata kuwaptinchikuna paywan tantalla kawsashunchisapa.

¹³ Mana allikunata munashpanchikuna rurayta ama rimaypachichu: "Tata Dios ūnukata yuyachiwashka mana allikunata ruranaynipa." Tata Dioska tukuy laya allillata ruran. Manami niman suk mana allikunata yuyanchu rurayta. Chayrayku nima ūnukanchikunata yuyachiwanchisapachu mana alli ruranata rurananchikunapa. ¹⁴ Kikinchikunalla yuyayninchikunamanta yuyanchisapa mana allikunata rurayta. ¹⁵ Chay mana alli yuyayninchikunata rurashpa uchallikunchisapa. Chaymanta sukanman uchalikushpa kawsashpanchikuna wañunanchikuna tiyan.

¹⁶ Munanayni wawkinikuna, paninikuna, ama kikikichi llullachinakuy-chichu. ¹⁷ Tata Diosmi tukuy alli tiyawakninchikunata kuwashkanchisapa. Paymanta tukuy laya alli shamen. Tata Dios intita killata luserukunata rurarkan. Payka manami nima chikan layachu tukun. Rikchak laya allillatami ruran.

¹⁸ Chayrayku Tata Dios kikin munashpa rimananta yachachiwash-panchikuna yanapawanchisapa mushuk layata kawsayta. Yachachi-wanchisapa ñukanchikuna tukuy rurashkankunamanta ashwan munadu wambrankuna kananchikunata.

Tata Diospa rimananta kasushpa kawsananchikuna tiyan.

¹⁹ Munanayni wawkinikuna, paninikuna, Tata Diospa munadu wambrankuna kashpaykichi múnaychi paypa rimananta allita kasuya. Chay rimanata manara allita kasushpaykichira amara chayta yachachikuychirachu. Ama kunanlla rabyaychichu. ²⁰ Kunanlla piñakushpaykichi mana Tata Diospa munanantachu ruraykankichi. ²¹ Chayrayku tukuy ñawpa mana alli rurashkaykichita sakishpa amana chayta kashkan rurashpa kawsaychinachu. Kushikushpalla Tata Dios yachachishushkaykichita allita uyarissha chaskiychi. Chayta allita chaskiptikichi Tata Dios uchaykichimanta salvashunkichi.

²² Ama Tata Diospa rimananta rinrikichillawan uyariyichichu. Tata Diospa rimananta allita kasushpa kawsanaykichi tiyan. Mana kasushpaykichika kikikichilla llullachinakunkichi.

²³ Tata Diospa rimananka espejushinami. Ñukanchikuna Tata Diospa rimananta mana kasushpanchikuna espejupi kawanakuk runakunashina kanchisapa. ²⁴ Espejupi kawanakushkanchikunawasha kunkanchisapa ima layami kanchisapa nishpa. ²⁵ Tata Diospa alli kamachiwananchikunata allita yuyashpa allita kasushpa mana kunkashpa kawsananchikuna tiyan. Chay kamachiwananchikunata kasuptinchikuna Tata Dios yanapawanchisapa amana kikinchikunallapa munananchikunata rurashpa kawsananchikunapa. Chaypina sukaman kushikuypuru kawsashunchisapa.

²⁶ Ichara kankuna rimankichiman: “Ñuka Tata Diosta allita kasushpa kawsaykani.” Chashna rimashpaykichiish mana shimikichita mediyta yachashpaykichika kikikichilla llullachinakunkichi. Manami Tata Diostachu kushichiykankichi. ²⁷ Ñukanchikuna tukuy shunku Tata Diosta kushichinayashpa sufriyak viyudakunata wakchakunata yanapananchikuna tiyan. Chaymanta mana kawsashunchisapachu mana alli rurak runakunashina.

2

Tukuy pita kuyananchikuna tiyan.

¹ Wawkinikuna, paninikuna, sukaman allima kamachiwakninch Jesukristuta kreyishpa kawsashpaykichi tukuy runakunata idenllata kuyanaykichi tiyan. Ama suk runakunallata kuyaychichu.

²⁻³ Kankuna tantanakuptikichi ichara suk kuri anilluyuk allima mudanayuk runa yaykunman. Kushikushpa payta willankichiman: “Yaykumuy. Shamuy kay allima sillapi tiyariy.” Chaymanta ichara suk mana nimayuk llikillichi mudanayuk runa yaykunman. Payta willankichiman: “Chayllapi shayariy. Munashpaykika allpapi tiyariy.” ⁴ Chashna willash-paykichika rimaykankichi chay kullkiyuk runa alli kananta chay mana nimayuk runa mana alli kananta. Chashna rimashpaykichika mana allitachu yuyaykankichi.

⁵ Munanayni wawkinikuna, paninikuna, mash uyariwaychi. Tata Dios rimarkan tukuy payta kuyak runakunata sielman pushanankunapa. Chayrayku mana nimayuk runakunata akllashkasapa payta sukaman allita kreyishpa kawsanankunapa chaymanta sielman pushanankunapa.

⁶ Kankuna chay mana nimayuk runakunata pinkachinkichi. Mash yuyaychi. ¿Pikunatí llullachishushpaykichi suwashunkichi? ¿Manachu chay aypa kullkiyuk runakuna? Kankuna debikushkaykichita mana pagarakuya atipaptikichi ¿pikunatí awtoridarpí chatashunkichi? ¿Manachu chay aypa kullkiyuk runakuna? ⁷ Ñukanchikuna rimanchisapa Jesukristuta kreyik kananchikunata. Paykuna rimansapa paypa shutin mana alli kananta.

⁸ Tata Dios rimananpi allita yachachiwanchisapa: “Kankuna kiki-kichi kuyanakuksina tukuy runamasikichita kuyanaykichi tiyan.” Chay Tata Diospa kamachikunanta allita kasushpaykichika allita ruraykankichi.

⁹ Kankuna aypa kullkiyuk runakunallata kuyashpaykichi uchallikushpa kawsaykankichi. Tata Diospa kamachikunankuna chatashunkichi mana alli rurak kanaykichita. ¹⁰ Kankuna Tata Diospa kamachikunankunamanta sukta mana kasushpaykichika uchayuk kankichi. Mana tukuy kamachiku-nankunatachu kasushkankichi.

¹¹ Tata Dios killkadunpi riman: “Ama chikan warmiwan uchallikushpa puñuychichu.” Chaymanta riman: “Ama runamasikichita wañuchiychichu.” Kankuna mana chikan warmiwan puñushpapish runamasikichita wañuchishpaykichika mana Tata Diospa kamachikunankunatachu kasushpa kawsaykankichi. ¹² Tata Diosta kuyashpanchikuna atipanchisapa kamachikunankunata kasuya. Mana Tata Diospa kamachikunankunata kasuptinchikuna payka kastigawashunchisapa. Chayrayku akuychi allita rimashpa allita rurashpa kawsaypachi. ¹³ Allita kuyanakushpa kawsaptinchikuna Tata Dioska ñukanchikunatapish kuyawashpanchikuna mana kastigawashunchisapachu. Chaymanta runamasinchikunata mana kuyashpa kawsaptinchikuna Tata Diospish mana llakichiwashpanchikuna kastigawashunchisapa.

Jesukristuta kreyishpanchikuna allita rurashpa kawsananchikuna tiyan.

¹⁴ Wawkinikuna, paninikuna, ichara su runa mana allita rurashpa kawsaykashpa rimanman: “Ñukapish Jesukristuta allita kreyishpa kawsaykani.” Chashna rimashpapish manami tukuy shunkuchu Jesukristuta kreyiykan. Manami atipankachu kastigumanta salvanakuya.

¹⁵ Ichara su wawkinchipa su paninchipa llachapunkuna mikunankuna illanman. ¹⁶ Ichara paykunata mana nimata kuyakashpa willankichiman: “Rillarychi allita mudakushpa mikumuychi.” Chashna mana nima llachapanta nima mikunanta kunayashpaykichika manami Tata Diospa munanantachu ruraykankichi. ¹⁷ Mana yanapanakushpa kawsashpaykichika manami tukuy shunkuchu Tata Diosta kreyishpa kawsaykankichi. Yankamanta rimankichi Tata Diosta kreyiykanaykichita.

¹⁸ Ichara su runa rimanman: “Kanka Jesukristuta kreyinki. Ñukaka alli rurak runami kani. Kanka kreyinaykita rimashpalla mana allita rurashpa kawsashpaykika mana tukuy shunkuchu Jesukristuta kreyiykanki. Ñukaka Jesukristuta kreyishpa allita rurashpa kawsaykani.” ¹⁹ Kanka rimanki suklalla Tata Dios tiyananta. Chayta rimashpa allita rimanki. Supaykunapish yachansapa suklalla Tata Dios tiyananta. Paykuna Tata Dios tiyananta yachaykashpankunapish mana kasunayansapachu. Manchakushpa chukchukunsapa kastiganankunata yuyashpa. ²⁰ Ama llullachinakushpa rimaychichu Jesukristuta kreyinaykichita. Mana allita rurashpa

kawsashpaykichika manami deverastachu payta kreyishpa kawsaykankichi.

²¹ Ñawpa awilunchikuna Abraham Tata Diosta kreyishpa wambran Isaka ovejata wañuchikshina payta kurkan. Allita kreyishkanrayku Tata Dioska willarkan alli rurak runa kananta. ²² Abraham wambranta Tata Diosta kushkanrayku yachanchisapa payta tukuy shunku kreyishpa kawsashkanta. Abraham Tata Diosta wambranta kushpa ashwan ashwanta payta kreyishpa kawsarkan. ²³ Chayrayku Tata Diospa rimanan willawanchisapa: “Abraham sukaman Tata Diosta kreyishpa kawsaptin Tata Dioska willarkan sukaman alli rurak kananta.” Chay tiempumantapacha Tata Dioska rimarkan Abraham kuyanakukmasin kananta.

²⁴ Ñukanchikuna Tata Diosta kreyinanchikunata rimaptinchikunalla payka mana willawanchisapachu alli rurak kananchikunata. Tata Diosta allita kreyishpa allita rurashpa kawsaptinchikunara willawanchisapa alli rurak kananchikunata.

²⁵ Chaymanta chay ñawpa waynandera warmi Rahab ishkay judiyu soldadukunata wasinpi yaykuchirkansapa. Chaymanta paykunata yanapashpa chikan ñanta kacharkansapa llaktamasinkuna ama wañuchinankunapa. Chayrayku Tata Dios willarkan alli rurak warmi kananta.

²⁶ Yachanchisapa mana samaykuk kuerpu wañudu kananta. Chashnashina Tata Diosta kreyinanchita rimashpalla mana allita rurashpa kawsaptinchikuna wañudushina kanchisapa.

3

Mana allikunata rimashpanchikuna kunanlla uchallikunchisapa.

¹ Wawkinikuna, paninikuna, ama kikikichillamanta munaychichu yachachikuk runakuna kayta. Yachankichi Tata Dios yachachikuk runakunata ashwan sinchita kastigawananchikunata mana allita ruraptinchikuna. ² Tukuy ñukanchikuna mana allikunata ruranchisapa. Chaymanta allillata rimashpa kawsashpanchikunaka yachanchimansapa allillata rurashpa kikinchilla kamachinakushpa kawsayta.

³ Ñukanchikuna bestiata waskawan bosalchishpa atipanchisapa munashkanchita pushayta. Ñukanchikunapish chay bestiata purichikshina allikunallata rimaya yachashpanchikunaka yachanchimansapa allikunallata rurashpa kawsayta.

⁴ Mash yuyaychi. Sinchi wayra atun barkukunata sukaman tankaptinpish purichik runa taksha timonwan maytacha munan chayta pushan.

⁵ Kallunchikunaka barkupa timonniñshinami. Kallunchikuna taksha timonshina kayakashpapish sukaman mana alli rimanakunata riman.

Chaymanta suk taksha killaminshamanta sachapi apikushpa miran atun nina rawraykak kananpa. ⁶ Kallunchikunaka ninashinami. Ñukanchikuna kallunchikunawan rimashpa atipanchisapa piñakushpa sukaman mana allikunata rimaya. Mana allita rimashpanchikuna venenowanshina wakllichinakunchisapa. Supay sukaman munachiwanchisapa piñakushpa mana allikunata rimananchikunapa. Chaypina mana allikunata rimashpanchikuna allita kawsashkanchikunamanta mana allitana sukaman llakispa kawsanchisapa.

⁷ Tukuy laya sakra animalkunata pawak animalkunata machakuykunata yakupi kawsak animalkunata yachanchisapa amañachiyya. ⁸ Mana ni pi atipanchisapachu kikinchikunalla kallunchikunata amañachiyya allillata rimanarpa. Kallunchikunawan sakra mana allikunata rimaptinchikuna

kallunchikunaka wañuchikuk venenoshinami. ⁹ Kallunchikunawan rimanchisapa Tata Diosninchu sukaman allima kananta. Chaymanta kallunchikunallawan maldisinchisapa runamasinchikunata Tata Dios pay laya kanankunapa rurashkankuna kaptinkunapish.

¹⁰ Shiminchikunawan alli rimanata mana alli rimanata rimanchisapa. Wawkinikuna, panikuna, Tata Dios mana munanchu piñakushpa mana allikunata rimananchikunapa.

¹¹⁻¹² Suk pukyumanta ñukñukpuru yaku llukshin. Chikan pukyumanta ayak yaku llukshin. Suk pukyullamanta mana ishkay laya yakuchu llukshinman. Kankunapish alli layakunallata rimashpa kawsaychi.

Chaymanta igo kaspi mana chikan laya wayutachu wayuchakun. Uva tronko mana igo wayutachu wayuchakun. Kankunapish allikunallata rimashpa kawsaychi.

Alliyachak kashpanchikuna kuyanakushpa kawsaypachi.

¹³ Kankuna alli yachak kashpaykichika allillata rurashpa mana alabanakushpa kawsanaykichi tiyan. Chashna modomanta tukuy runakuna yachankasapa deveras alli yachak runakuna kanaykichita.

¹⁴ Kankuna wawkikichita chiknishpa paykunapa imankunata munashpa paykunawan ayminakushpaykichika ama kreyinakushpa rimaychichu alli yachak runa kanaykichita. Kikichilla llullachinakuykankichi. ¹⁵ Chashna chiknishpa kawsashpaykichika mana Tata Dirosa munanantachu ruraykankichi. Runakunapa yachanankunallata ruraykankichi. Supaypa munananta ruraykankichi. ¹⁶ Kankuna sukkunapa imankunata munashpa ayminakushpa kawsashpaykichika sukaman turbakushpa tukuy laya mana allikunata rurashpa kawsankichi.

¹⁷ Ama chay layata kawsaychichu. Tata Dios yachachiwanchisapa allita rurashpa kawsananchikunapa. Alli yachak runakuna kashpanchikuna kushikushpalla kuyanakushpa kawsashunchisapa. Mana kikichikunala pa munananchikunatachu rurashpa kawsashunchisapa. Tukuy piwan llakichinakushpa sukwana sukwana yanapanakushpa allita rurashpa mana llullakushpa kawsashunchisapa. ¹⁸ Mana piñakushpa kawsashpanchikuna llaktamasinchikunata yachachinchisapa paykunapish allita rurashpa allita kuyanakushpa kawsanankunapa.

4

Ama sukwana sukwana chikninakushpa chatanakuypachichi.

¹ Kankuna kikichipa munanaykichillata rurashpa kawsashpaykichi sukwana sukwana chikninakushpa yuyanakushpa llakita kunakunkichi. ² Suk imata sukmaman munankichi. Mana tarishpaykichika sukkunata chiknishpa tiyapunanta munashpa kawsankichi. Sukman tarinayashpaykichi chikninakushpa makanakushpa kawsankichi. Chashna makanakushpa kawsashpaykichika mana uyayukchu kankichi nimata Tata Diosta mañanaykichi. Mana mañaptikichika Tata Dios mana nimata kushunkichichu. ³ Chaymanta kikichipa munanaykichillata munashpa Tata Diosta sukmata mañaptikichipish payka mana nimata kushunkichichu.

⁴ Mash uyariwaychi. Kankuna Tata Diosta manana allitanachu kreyishpa kawsaykankichi. ¿Manachu yachankichi munanaykichillata rurashpa kawsashpaykichika Tata Diosta chikniyakanaykichita? Tukuy kay all-papi runakunapa ruranankunallata ruranayashpaykichika manami Tata Diosta kuyashpachu kawsankichi. ⁵ Chayrayku Tata Dirosa rimanan willawanchisapa: “Tata Dirosa Espiritu ñukanchikunapi kawsashpa sukmaman kuyawanchisapa. Sukman munan payllata kuyananchikunapa.”

6 Tata Dios sukaman kuyawashpanchikuna yanapawanchisapa. Chayrayku Tata Diospa rimana willawanchisapa: “Tata Dios tukuy kuyashpa kasushpa kawsak runakunata sukaman kuyashpa yanapankasapa. Kikinlla kreyinakuk runakunata kastigankasapa.”

7 Chayrayku Tata Diosta allita kuyashpa allita kasushpa kawsaychi. Ama munaychichu supayta kasuya. Sinchikushpa supayta mana kasupistikichi kankunamanta ashunka. **8** Tata Diossalata kuyashpa ladunchaychi. Chashna ladunchaptikichi Tata Diospish ladunchashunkichi. Mana atipankichichu Tata Diosta kuyashpa vanidartapish rurashpa kawsayta. Ama chashna ishkay yuyayuk kawsaychichu. Tata Diospa munananllata allita rurashpa kawsaychi. **9** Uchaykichita yuyashpa sukaman llakishpa wakaychi. Asikushkaykichimanta wakaychi. Kushikushkaykichimanta llakiychi. **10** Uchaykichita yuyashpa llakishpa wakaptikichi Tata Dios sukaman kushichishunkichi.

Ama yuyanakushpa mana allita rimashpa kawsaypachichu.

11 Wawkinikuna, paninikuna, Tata Dios willawashkanchisapa kuyanakushpa kawsananchikunapa. Chayrayku ama suktapish suktapish yuyashpa kawsaychichu. Yuyanakushpa kawsashpaykichika Tata Diospa kamachikuntantapish washanchashpa rimaykankichi mana alli kananta. Tata Diospa kamachikunanta kasunanchikuna tiyan. Ama rimaychichu mana alli kananta. **12** Tata Diossalami kamachiwanchisapa. Payllami willawashunchisapa pimi allita rurashka pimi mana allitachu rurashka nishpa. Tata Diossalami atipan salvakuyta atipan kastigakuya. Chayrayku ama chatanakushpa kawsaychichu.

Manayachanchichu kaya imami pasanka nishpa.

13 Mash uyariwaychi. Ichara rimankichiman: “Kunan kaya rishunchisapa chikan llaktapi suk watata kawsak. Chaypi tukuy layata rantishpa rantikushpa aypa kullkita chaskishpa kawsashunchisapa.”

14 Chashna rimashpaykichipish manami yachankichichu imashnami kaya pakarinckichi nishpa. Puyukunashina raslla rikurinkichi raslla chinkankichi. **15** Chayrayku alli kanman rimanaykichipa: “Tata Dios munaptin kawsashunchisapa. Tata Dios munaptin imatapish kaptin rurashunchisapa.” **16** Chayta rimanaykichi kaktaka sukaman alabanakushpa kreyinakunkichi. Chashna alabanakushpaykichika manami allitachu rimaykankichi. **17** Allita rurayta yachaykashpaykichika mana chayta rurashpaykichika uchallikuykankichimi.

5

Tata Dios kastigankasapa kullkiyuk runakunata mana allita rurashpa kawsaptinkuna.

1 Kankuna aypa kullkiyuk runakuna, uyariwaychi. Sukaman sufrinaykichi tiyan. Chayrayku sukaman llakishpa turbakushpa wakaychi.

2 Tukuy tiyapushuknikichi usuykan. Alli llachapaykichipish mamayaykan.

3 Kullkikichi kurikichi yanayan. Chayta kawashpa yachankichi utka tukunanta. Kay tukunan tiempu kullkikichita sukaman tantachishkankichi. Sukaman kullkita munashpaykichi ninapishina kikikichi sukaman turbakushpa kulluchinakuykankichi.

4 Runakunata chakraykichipi trabajachishpaykichi mana pagarashkankichichu. Mana pagarashkaykichirayku chay trabajadornikichika Tata Diorsi chatakushushkankichi. Chashna chatashuptikichi tukuy laya ruray atipak Tata Dios uyarishka. **5** Kay allpapi imatapish

rurashpa kushikushpalla kawsankichi. Raku likidu wañuchinapa animalshina kankichi. Chayrayku Tata Dios utka kastigashunkichi. ⁶ Kankuna allita rurashpa kawsak runakunata mana pagarashpaykichi wañuchishenkankichi. Chashna wañuchiaptikichi paykunaka mana atipashkasapachu amachanakuya.

Kamachiwakninch Jesukristu shamunanta shuyashpanchikuna sukwan sukwan yanapanakushpa kawsaypachi.

⁷ Wawkinikuna, panikuna, akuychi kushikushpa shuyaypachi Señorninchi Jesukristu kashkan shamunanta. Suk runa chakranpi murukunata tarpushpa tamyata shuyan chay tarpudu murukuna wiñaptin wayunkunata pallananpa. ⁸ Kankunapish chay tarpukuk runashina kushikushpa mana shaykushpa shuyaychi Señorninchi Jesukristu utka shamunanta.

⁹ Wawkinikuna, panikuna, kunanlla Señorninchi Jesukristu shamunka willawanchikunapa allitachu manachu rurashkanchisapa nishpa. Chayrayku ama sukwan sukwan yuyanakushpa kawsaychichu ama Tata Dios kastigashunaykichipa.

¹⁰ Wawkinikuna, panikuna, chay ñawpa alli yachachikukkuna sukaman Tata Diospa rimananta yachachikushpankuna sukaman sufrirkansapa. Paykunaka sufrishpankunapish mana piñakushpalla kawsarkansapa. Kankunapish paykunashina sufrishpaykichiipish mana piñakushpalla kawsaychi.

¹¹ Yachanchisapa mana piñakushpa kushikushpalla sufrishpanchikuna Tata Dios kushichiwananchikunata. Yachashkankichi chay ñawpa awilunchikuna Job sukaman sufrishpapish sukaman Tata Diosta kreyishpalla kawsashkanta. Sufrishkanwasha Tata Dios sukaman rikchak layata kushpa kushichirkan llakichikuk kuyak Tata Dios kashpa.

¹² Wawkinikuna, panikuna, mash uyariwaychi. Ama juraychichu suk runa kreyishunaykichipa. Ama Tata Diospa shutinpi nima alppapa shutinpi nimapa shutinpi juraychichu ama Tata Dios kastigashunaykichipa. Suk ima deveras kaptinka rimaychi: “Ariya.” Mana deveras kaptinka rimaychi: “Mana.”

¹³ Suk kankuna imapapish llakidu kashpaykichihi Tata Diosta roygaychi kushichishunaykichipa. Suk kankuna kushikushpaykichihi Tata Diosta alabashpa kantaychi. ¹⁴ Suk kankuna unkudu kashpaykichihi kayaychi ansianuykichita chay unkuduta tipi wirawan Tata Diospa shutinpi tupashpa oranankunapa. ¹⁵ Chay ansianukuna allita Jesukristuta kreyishpalla roygaptikuna payka chay unkuduta alliyachinka. Uchallikushka kaptinka Tata Dios perdonanka. ¹⁶ Chayrayku kankuna mana allita rurashpaykichihi uchaykichita sukwan sukwan willanakuychi. Chashna willanakushpaykichihi sukpa sukpa Tata Diosta roygaychi unkuynikichimanta alliyachishunaykichipa. Allita rurashpa kawsashpaykichihi Tata Diosta roygaptikichihi payka uyarishunkichi.

¹⁷ Chay ñawpa yachachikuk Eliyas iden ñukanchikunashina runa karkan. Suk tiempu chay runa Eliyaska Tata Diosta sukaman roygarkan ama tamyananpa. Chashna roygaptin kimsa wata sokta killata manana nima tamyarkannachu. ¹⁸ Chaymanta Eliyaska kashkan Tata Diosta roygarkan tamyamunanpa. Chashna roygaptinna tamyamurkan. Kashkan tarpudu murukuna wiñashpankuna wayuchakurkansapa.

¹⁹ Wawkinikuna, panikuna, ichará suk wawkinchi suk paninchi Tata Diospa rimananta manana kasunnachu. Kankuna chay mana kasukuk

wawkinchita paninchita allita yachachiichi kashkan Tata Diosta ka-sunanpa. ²⁰ Chashna allita yachachiptikichi Tata Diosman kutiptin payta wañuymanta salvankichi. Chaypina Tata Dios uchankunamanta perdonanka.

Ñuka Santiago chayllata killkashkaykichi.

1 PEDRU

PEDRU TUKUY MAYPI KREYIKUKMASINKUNATA KILLKARKAN

Pedru wawinkunata paninkunata rimachin.

1 Munanayni wawkinikuna, paninikuna, Jesukristu ñuka Pedruta kachamuwashka rimananta allita yachachikunaynipa. Chiknishuk runakuna kankunata llaktaykichimanta llaktan llaktan pushashushkankichi. Ponto partipi Galasia partipi Kapadosia partipi Asia partipi Bitinia partipi kawsaykankichi. Tukuy kankunata kay kartata killkaykaykichi.

2 Ñawpamantapacha Tata Dios kankunata sukaman kuyashushpaykichi akllashushkankichi paypa wambrankuna kanaykichipa. Jesukristu yawarninta ichashkanrayku Tata Diospa Espiritu uchaykichimanta perdonashushkankichi. Sukaman yanapashuykankichi Jesukristuta allita kasushpa kawsanaykichipa. Chayrayku ñuka Tata Diosta roygani sukaman yanapashunaykichipa kushichishunaykichipa.

Jesukristu kashkan shamunanta yuyashpa allita rurashpa kawsaypachi.

3 Wawkinikuna, paninikuna, akuychi Señorninchí Jesukristupa Tatan Diosta kuyaypachi. Tata Dios wambran Jesukristuta wañushkanmanta kawsachimurkan. Chaymanta wambran Jesukristuta kawsachimushkan-shina ñukanchikunatapish sukaman kuyawashpanchikuna yanapawan-chisapa mushuk kawsayta kawsananchikunapa. Chashna mushuktana kawsashpanchikuna yachanchisapa sielipi Tata Dioswan rinanchikunata kawsak. **4** Yachanchisapa sielipi kawsak riptinchikuna Tata Dioska mana tukuyniuk alli rurashkanta kuwananchikunata. Chaypi kawsashpanchikuna mananami uchallikushunchisapanachu nima viejuyashunchisapanachu. **5** Kunanka allita Tata Diosta kreyishpa kawsaptinchikuna payka tukuy laya yachak kashpa sukaman yanapawashunchisapa sielipi chayananchikunapa. Chay sielipi Tata Dioska rikchak layakunata rurarkan Jesukristu kashkan shamushpa kawachiwananchikunapa.

6 Kay allpapi kawsashpaykichira suk tiempullatana sufrishpa llakinay-kichi tiyan. Chashna llakishpaykichiipish sielman rinaykichita yachashpa sukaman kushikushpalla kawsankichi.

7 Suk runakuna ninapi kurita chulluchinsapa tukuy allpan urmananpa chay kuri sukaman llipyak likidu kiparinanpa. Tata Dios chay kurimanta kankunata ashwanta kuyashushpaykichi munan allita rurashpa kawsanay-kichipa. Chayrayku chay kurita chulluchik runashina sufrihishunkichi yachakunaykichipa payllata kreyishpa kawsayta. Allita rurashpa kawsaptikichi Jesukristu kashkan shamushpa kushichishunkichi. Willashunkichi alli rurak runakuna kanaykichita.

8 Kunanka mana Jesukristuta kawashpaykichiipish sukaman kuyashpa kawsaykankichi. Payta mana kawashpaykichiipish allita kreyishpa kawsashpaykichi sukaman kushikuypurú kawsaykankichi. Maña atipankichichu kushikunaykichita sukkunata entiendichiyta. **9** Jesukristuta kreyishpa kawsashpaykichi sukaman kushikunkichi. Chaymanta sielman rinkichi paywan tantalla kawsak.

10 Ñawpa tiemu Tata Diospa rimananta yachachikuk runakuna yachachikurkansapa Tata Dios ñukanchikunata kuyawashpanchikuna salvawananchikunata. Paykunaka Tata Diospa rimananta leyishpa

munarkansapa entiendiyta imata Tata Dios ruranka salvawananchikunapa. ¹¹ Jesukristupa Espiritun chay alli yachachikuk runakunapi kawsashpa willarkansapa salvakuk runa shamunanta kay allpapi wañuk. Willarkansapa wañushkanwasha kashkan kawsamunanta sieluman kushikushpa kutinanpa. Chay alli yachachikuk runakuna sukaman munarkansapa yachayta pimi chay salvakuk runa aykapimi shamunka nishpa.

¹² Chashna yachanayaptinkunapish Tata Diospa Espiritun willarkansapa chay salvakuk runata mana kawanankunata. Willarkansapa suk tiempukuna washan ñukanchikuna kawananchikunata. Tukuy chayta Tata Diospa angelninkunapish sukaman munarkansapa yachayta. Kunanka sielumanta Tata Dioska Espiritunta kachamurkan. Chaypina Tata Diospa Espiritun ñukaykunata yanapawaptinkuna kankunata yachachishkaykichi.

Tata Dios munan allillata rurashpa kawsananchikunapa.

¹³ Wawkinikuna, paninikuna, Jesukristu kashkan shamuptin Tata Dios kankunata sukaman kuyashushpaykichi sieluman pushashushpaykichi allikunata kushunkichi. Chayta allita yachashpa prontanakushpa Jesukristu kashkan shamunanta shuyaychi. ¹⁴ Kankuna Tata Diospa wambrankuna kashpaykichi payllata kasushpa kawsaychi. Amana ñawpa kawsashkaykichishinanachu kawsaychi. ¹⁵ Allita rurashpa kawsaychi kayawakninchí Tata Dios alli rurak kaptin. ¹⁶ Tata Dios rimananpi willawanchisapa: "Allilata rurashpa kawsaychi ñuka Tata Diosnikichi alli rurak kaptini."

¹⁷ Kankuna rimankichi Tata Dios Tataykichi kananta. Suk diya payka tukuy runakunata suktapish suktapish willankasapa allitachu manachu rurashpa kawsashkasapa nishpa. Chaypina tukuy mana alli rurak runakunata kastigankasapa. Chayta yachashpaykichi kay allpapi kawsashpaykichira payta allita kasushpa allita kuyashpa kawsaychi.

¹⁸ Ñawpa tiempu kankuna awiluykichishina yankapa kawsaykarkankichi. Chaymanta Tata Dios mana alli kawsanaykichimanta surkushushkankichi. Manami yanayak kullkiwanchu nima kuriwanchu rantishushkankichi.

¹⁹ Jesukristu suk allima chuya chuya mana unkuyuk ovejashina wañuptin yawarnin ichakurkan. Chashna wañushpa yawarnin ichakuptin Tata Dios uchanchikunamanta perdonawashkanchisapa paypa wambrankuna kananchikunapa.

²⁰ Tata Dios manara kay allpata rurashpara willarkan wambran Jesukristu shamunanta salvawananchikunapa. Kunan kay tiempu Tata Dios wambran Jesukristuta kachamurkan salvawananchikunapa. ²¹ Jesukristu wañuptinna Tata Dios kashkan kawsachimushpa sieluman pusharkan chaypi paywan sukaman kushikushpa kawsanarpa. Chayta yachashpaykichi sukaman Tata Diosta kreyishpa kawsaykankichi. Yachanchi Tata Dios kankunatapish kawsachimushunaykichita paywan tantalla sielipi kawsanaykichipa.

Tata Diospa wambrankuna kashpanchikuna akuychi kuyanakushpalla kawsaypachi.

²² Kunanka Tata Diospa rimananta tukuy shunku allita kasushpa kawsaykankichi. Tukuy mana alli rurashkaykichita sakishkankichi Jesukristuta kreyikmasikichiwan kuyanakushpa kawsanaykichipa. Chashna allita kuyanakushpa kawsashpaykichi tukuy shunkuykichimantapacha allita kuyanakushpalla kawsaychi.

²³ Tatanchi mamanchikunamanta nasishpanchikuna wañuk runakuna kanchisapa. Chaymanta Tata Diospa rimananta kreyishpa kawsashpanchikuna mushuk nasidushina kanchisapa. Tata Díospa rimananka manami tukunkachu nima kullunkachu. Chayrayku ñukanchikunapish Tata Diospa rimananta kreyishpa kawsashpanchikuna mana tukuyniyukta kawsashunchisapa. ²⁴ Tata Diospa rimananka willawanchisapa:

“Tukuy kiwakuna chakinkasapa.

Kiwapa sisankunapish urmankasapa.

Tukuy runakuna chay kiwashina raslla wañunankuna tiyan.

Runakunapa rurashkankunapish chay kiwa sisankunashina chinkankasapa.

²⁵ Chashna runakuna wañuptinkunapish Tata Diospa rimananka manami tukunkachu.”

Ñukaykuna chay mana tukuyniyuk Tata Diospa rimananta kankunataka ñami yachachishkaykichina.

2

¹ Wañunaykichita yachashpaykichi amana chay ñawpa mana alli rurashkaykitchita ruraychinachu. Amana llullachikuychinachu. Mana allita ruraykashpaykichika ama llullakushpa rimaychichu alli rurak kanaykichita. Amana munaychinachu llaktamasikichipa imankuna ama tiyapunankunapa. Amana wasin wasinpi suktu suktu yuyaypi puriychinachu.

² Chayrak nasidu wambra sukaman lechita munan. Chay lechita munak wambrashina sukaman munaychi Tata Diospa alli rimananllata yachakushpa kawsayta. Chashna yachakushpa ashwan ashwanta kreyinkichi Tata Dios salvashunaykichita. ³ Allita yachankichi Jesukristu llakichishunaykichita. Chayrayku ashwan ashwanta payta kreyishpa kawsaychi.

Tata Diospa wasinshina kashpanchikuna paypa munananllata rurananchikuna tiyan.

⁴ Tata Dioska rumikunawan wasichakuk runashinami. Jesukristuka suk ashwan alli atun wasi kallarinan rumishinami. Ñukanchikuna paypa sawanpi churadu apichidu rumikunashinami kanchisapa. Chayrayku akuychi payta ladunchaypachi Tata Diospa wasinpi churadu rumikunashina kananchikunapa. Aypa runakuna mana munansapachu kreyikuya Jesukristu chay ashwan alli rumishina kananta. Chashna mana munaptinkunapish Tata Dios sukaman Jesukristuta kuyashpa akllarkan sukaman alli kallarinan rumishina kananpa. ⁵ Ñukanchikuna Jesukristuta kreyishpa kawsaptinchikuna Tata Dios wasinta rurashpa rumikunatashina churawanchisapa.

Chaymanta Tata Dios rurawanchisapa alli rurak saserdoteckunashina kananchikunapa. Jesukristu yanapawaptinchikuna Tata Diosta kushichishpa alabashpa kuyashpa kawsanchisapa. ⁶ Tata Dios rimanani willawanchisapa:

“Llaktayni Sionpi aypa rumikunawan wasinita rurasha.

Chay wasinipa allpa ukupi kallarinanpi churasha suk allima aklladu rumita. Suk alli rurak runata kachasha chay kallarinan rumishina kananpa.

Pipish kashtpa chay kachashkayni runata kreyishpa kawsashpankuna mana pinkakunkasapachu.”

⁷ Jesukristuka chay kallarinan churadu rumishinami.

Ñukanchikuna payta kreyishpanchikuna yuyanchisapa sukaman allima kananta. Jesukristuta mana kreyinayak runakuna sukaman washanchansapa. Tata Dios rimanani willawanchisapa:

“Suk wasi rurak runakuna chay ashwan alli rumita wishchukurkansapa mana alli nishpa.

Chashna wishchukuptinkunapish wasichakuk runa chay ashwan alli rumita churarkan wasi kallarinanpi tukuy rumikunapa sikipi.”

⁸ Chaymanta Tata Diospa rimanan willawanchisapa:

“Tiyan suk allima kallarinanpi churadu rumi.

Chay rumi allima kaptinpish suk runakuna chay rumipi mitkakushpa urmansapa.”

Jesukristuka chay kallarinanpi churadu rumishinami. Paypa rimananta mana kasunayak runakuna chay rumipi mitkakushpa urmak runakunashinami. Payta mana uyarishkankunaryku Tata Dios kastigankasapa.

Tata Dios akllawashkanchisapa paypa wambrankuna kananchikunapa.

⁹ Tata Dios sukaman kuyawashpanchikuna akllawashkanchisapa paypa wambrankuna kananchikunapa. Akllawashkanchisapa saserdotekuna kananchikunapa. Saserdotekuna kashpanchikuna kamachiwakninch Je-sukristuta kuyashpa sirvishpa kawsanchisapa. Akllawashkanchisapa payl-lapa llaktan kananchikunapa. Tata Dios kayawashkanchisapa paypa almirana laya rurashkankunata yachachikunanchikunapa. Kayawashkanchisapa paypa almirana laya lusninpishina kawsananchikunapa. Mana kayawashkanchisapachu uchallikushpa tutapishina kawsananchikunapa.

¹⁰ Ñawpa tiempu kankuna manara Jesukristuta kreyishpa kawsashpay-kichira manara Tata Diospa wambrankunarachu karkankichi. Manara yacharkankichirachu Tata Dios kuyashunaykichita. Kunanka allitana yachankichi kuyashunaykichita.

Tukuy awtoridarkunata kasunanchikuna tiyan.

¹¹ Munanayni wawkinikuna, paninikuna, suk tiempullatami kay allpapika kawsaykanchisapa. Sielman rishunchisapa Tata Dioswan kawsak. Chayrayku roygaykichi amana kikikichipa munanaykichillata rurashpa kawsanaykichipa. Mana allikunata ruranayashpaykichipish amana ruraychinachu. ¹² Chaymanta allillata rurashpa kawsaptikichipish ichara Tata Diosta mana riksik runakuna llullakushpa rimanmansapa mana alli rurak kanaykichita. Chashna paykuna rimaptinkunapish allillata rurashpa kawsaychi. Jesukristu kashkan shamuptin chay yuyashuknikichi runakuna Tata Diosta alabashpa rimankasapa allita rurashpa kawsashkaykichita.

¹³ Tata Diosta kuyak runakuna kashpanchikuna tukuy awtoridarkunata kasunanchikuna tiyan. Chay ashwan sinchi kamachikuk awtoridartapish allita kasunanchikuna tiyan. ¹⁴ Tata Dios awtoridarkunata churansapa tukuy mana alli rurak runakunata kastiganankunapa tukuy alli rurak runakunata alabanankunapa. ¹⁵ Tata Dios munan kankuna allita rurashpa kawsanaykichipa ama chay mana alli rurak mana entiendik runakuna washanchashunaykichipa.

¹⁶ Kankuna Jesukristuta kreyik runakuna kaptikichi Tata Dios ñawpa mana alli rurashkaykichimanta perdonashushkankichi. Tata Diospa mandunpi kawsashpaykichi allita rurashpalla kawsaychi. Amana kashkan mana allita ruraychinachu Tata Dios perdonawanka nishpa. ¹⁷ Tukuy runamasikichita kuyaychi. Jesukristuta kreyikmasikichiwan allita kuyañakushpa kawsaychi. Tata Diosta allita kuyashpa kawsaychi. Chay ashwan sinchi awtoridarta kasushpa kawsaychi.

Sufrishpanchikunapish allillata rurashpa kawsananchikuna tiyan.

¹⁸ Kankunapa patronnikichi tiyaptin payta allita kasushpa mana washanchashpa allita trabajashpa kawsaychi. Chay patronnikichi kuyashuptikichipish piñayashuptikichipish allita kasushpalla kawsaychi. ¹⁹ Ichara allillata rurashpa trabajaykaptikichipish patronnikichi piñayashunkichiman. Piñayashuptikichipish Tata Diosta kuyashpa patronnikichita kasushpalla kawsaychi. Chashna allita kasuptikichi Tata Dioska kushichishunkichi.

²⁰ Ichara kankuna mana allikunata rurashkaykichirayku patronnikichi kastigashunkichiman. Uchaykichipi kastiguykichita upallalla muchuptikichika mana ni pi alabashunkichichu. Chaymanta ichara allillata ruraptikichipish patronnikichi kastigashunkichiman. Mana uchaykichipi kastiguykichita upallalla muchuptikichi Tata Dios alabashunkichi. ²¹ Tata Dioska kayashushkankichi allita rurashpa kawsanaykichipa. Jesukristupish allillata rurashpa kawsayakashpa kankunarayku sukaman sufrirkan. Chashna sufrishpa yachachishunkichi sufrishpaykichipish allita rurashpalla kawsanaykichipa.

²² Jesukristuka manami niman suk kuti uchallikurkanchu. Manami niman suk kuti ni pita llullachirkanchu. ²³ Runakuna payta chiknishpankuna rabyachiptinkunapish mana nimata aynirkansapachu. Chay runakuna sufrichiptinkunapish paykunata mana jorachirkansapachu. Tata Diospa makinpi chay runakunata churarkan. Yacharkan suknin diya Tata Dios chay mana alli rurak runakunata kastiganankunata.

²⁴ Jesukristu ñukanchikunashina runa kashpa kruspi wañurkan uchanchiku-namanta perdonawananchikunapa. Wañurkan allillata rurashpa kawsananchikunapa amana uchallikushpa kawsananchikunapana. Suk runakuna paytaka yawaryanankaman makarkansapa ñukanchikunata alliyachiwananchikunapa.

²⁵ Ñawpa tiempu kankuna pantakudu ovejakunashina chayta chayta purirkankichi. Kunanka Jesukristuwan kawsaptikichi payka oveja kuydak runashina amachashunkichi.

3

Pedru yachachiwanchisapa imashnami kasaradukuna kawsankasapanishpa.

¹⁻² Kunanka kasaradukunata yachachiykichi. Kankuna paninikuna, kusaykichita allita kasushpa kawsaychi. Kusaykichi mana Tata Diospa rimananta kreyik kaptinpish kuyashpa kasushpa kawsaychi. Chaypira mana nimata rimaptikichi kusaykichi kawashushpaykichi alli rurak warmi kanaykichita Jesukristuta kreyinmansapa.

³ Ama sukaman allichanakuya yuyashpallachu kawsaychi. Ama aypa chaniyuk llachapaykichillata nima kuri mulluykichillata mudakushpal-lachu kawsaychi. Ama chukchaykichita sukaman allichashpachu kawsay-chi sawallalamata allimata rikurinaykichipa. ⁴ Jesukristuta tukuy shunku kreyishpa kawsaychi alli modoyuk kushikuyupuru warmi kanaykichipa. Chashna kushikuyupuru kawsashpaykichi Tata Diosta sukaman kushichin-kichi.

⁵ Chashnami chay ñawpa alli rurak warmikunapish Tata Diosta tukuy shunku kreyishpa kawsarkansapa. Chayrayku kusankunata kasushpa kushichishpa kawsarkansapa. ⁶ Chay warmi Sarapish kusan Abrahamta kasushpa kawsarkan. Kusanta willarkan kamachiknin kananta. Kankunapish allita kusaykichita kasushpa mana nimata manchashpalla kawsash-paykichika Sara rurashkantashina ruraykankichi.

⁷ Kunanka kankuna kasaradukunata yachachiykichi. Warmikichita allita kuyashpa paykunapa munananta yuyashpa kawsaychi mana ullukunashinachu sinchi kaptinkuna. Tata Dios paykunatipish sukaman kuyashpa willarkansapa paypa wambrankuna kanankunata. Paykunapish ullukunashina rinkasapa sielupi Tata Dioswan kawsak. Kankuna warmikichita mana allita kuyashpa kawsaptikichika Tata Dios manami royanay-kichita uyarinkachu.

Allita rurashpa sufriptinchikuna Tata Diosmi yanapawanchisapa.

⁸ Chaymanta tukuy Jesukristuta kreyikmasikichiwan alli modollapi kawsaychi. Allita kuyanakushpa yanapanakushpa mana kreyinakushpalla kawsaychi.

⁹ Suk runamasikichi mana allita rurashuptikichika ama kutipaychichu. Ama nimata ayniyichichu. Tata Dios sukaman kuyashushpaykichi munan yanapashuynikichita. Chayrayku kankunapish tukuy mana alli rurashuknichiki runakunata allita kuyashpalla yanapaychi. ¹⁰ Tata Dios rimananpi willawanchisapa:

“Kankuna kushikushpalla kawsanayashpaykichika ama nima mana allikunata rimashpa kawsaychichu.

Ama llullakushpa kawsaychichu.

¹¹ Allillata rurashpa kawsaychi.

Ama kawsaychichu mana allita rurashpa.

Tukuy llaktamasikichiwan allita kuyanakushpa kawsaychi.

¹² Tata Dios tukuy alli rurak runakunata yanapansapa.

Suk imata mañaptinkuna uyarinsapa.

Runakuna mana allikunata rurashpa kawsaptinkuna Tata Dios piñakun.”

¹³ Kankuna allita rurashpa kawsaptikichi yaka tukuy runakuna allita tratashunkichi. ¹⁴ Ariya chashna allita rurashpa kawsaptikichipish ichara suk runakuna chiknishushpaykichi mana allita tratashunkichiman. Chashna mana allita tratashuptikichipish kushikuychilla. Ama chay mana alli rurak runakunata manchaychichu. ¹⁵ Jesukristullata tukuy shunku kuyaychi kamachishuknikichi kaptin. Ichara runakuna tapushunkichiman: “¿Imapatí kankuna sufrishpaykichipish Jesukristuta kuyashpalla kasushpalla kawsaykankichi?” Chashna tapushuptikichi allillapi mana piñakushpa yachachiychi.

¹⁶ Jesukristuta kreyishpa allita rurashpa kawsaptikichipish ichara runakuna rimanmansapa mana allikunata rurashpa kawsaykanaykichita. Chaypina allita rurashpa kawsashkaykichita kawashpa pinkachinakunkasapa.

¹⁷ Mana allita rurashkaykichirayku sufriptikichi ali kanman sufrinay-kipa. Ashwan alli kanman Tata Dios munaptin allita rurashkaykichirayku sufrinaykichipa.

¹⁸ Jesukristu sukaman sufrishpa suk kutilla wañurkan tukuy mana alli rurananchikunamanta perdonawananchikunapa. Mana alli rurak runakuna kaykaptinchikuna Jesukristu mana nima uchayuk kayashpa ñukanchikunaryku wañurkan. Payka wañurkan Tata Diosman pushawananchikunapa paywan tantalla kawsananchikunapa. Jesukristu runa kashpa wañurkan. Wañushpapish espiritu kashpa kawsarkanlla.

¹⁹ Chashna Jesukristu espiritu kashpa rirkana wañushka runakunata willaksapa tukuy layapi kamachikuk kananta. ²⁰ Chay wichkadu wañudu runakuna ñawpa awilunchi Noeta mana kasunayarkansapachu. Noeka barkuta ruraykashpa tukuy runamasinkunata willarkansapa Tata Diosta kreyishpa kawsanankunata. Tata Dios sukaman kuyashpankuna sukaman

munarkan kreyinankunapa. Chay runakuna mana kreyiptinkuna Tata Dios tukuy allpata yakuwan untachirkan paykuna sipikushpa wañunankunapa. Noe rurashkan barkupi pusak runakuna yakyushpa sipikuymanta kish-pirkansapa. ²¹ Tata Dios chay pusak runakunata yakumanta kish-pichishkankuna yuyachiwanchisapa bawtisakunanchikunata.

Bawtisakushpanchikuna yachanchisapa Jesukristu kawsamushkanrayku Tata Dios salvawananchikunata. Mana bawtisakunchisapachu may-lanakuya munashpalla. Bawtisakushpanchikuna Tata Diosta royganchis-apa yuyayninchikunata allichananpa allita rurashpa kawsananchikunapa.

²² Jesukristu kawsamushkanwasha sielman rirkana Tata Diospa alli ladunpi kawsanana. Tukuy supaykuna angelkuna kamachikukkuna Jesukristullata kasunankuna tiyan tukuy awtoridarkunamanta ashwan sinchi kamachikuk kaptin.

4

Tata Dios yanapawaptinchikuna atipanchisapa sukwana sukwana yanapanakuya.

¹ Jesukristu sukaman sufrishkanrayku ñukanchikunapish kushikushpalla mana rabyashpa sufrinanchikuna tiyan. Sufrishpanchikuna manana ñawpashinanachu mana allikunata rurashpa kawsashunchisapa. ² Chashna sufrishpanchikuna munanchisapa kay allpapi kawsashpara Tata Diospa munananllata rurashpa kawsayta. Manana munanchisapanachu kik-inchikunapa munananchikunallata rurashpa kawsayta.

³ Unay tiemputana kankuna Jesukristuta mana kreyishpa kawsak runakunashina mana allikunata rurashpa kawsarkankichi. Tukuy laya mana al-likunata munarkankichi rurayta. Kikichipa munanaykichillata rurashpa kawsarkankichi. Sukaman mikushpa upyashpa machashpa sukwana sukwana millanapa layakunata rurashpa kawsarkankichi. Millanapa laya ru-rada dioskunata kuyashpa kawsarkankichi.

⁴ Kunanka manana llaktamasikichiwan tantallana mana allita rurashpa kawsaptikichi paykuna chikan layatana kawashunkichi. Yuyashushpay-kichi rimansapa mana alli rurak runakuna kanaykichita. ⁵ Tata Dios tukuy wañudu runakunata kawsak runakunata tapuptinkuna ayninankuna tiyan allitachu manachu rurashkasapa nishpa. ⁶ Ñawpa alli yachachikuk runakuna ñawpa kawsak runakunata yachachirkansapa Tata Diosta kreyishpa kawsanankunapa. Chay Tata Diosta kreyik runakuna wañuy yachak runakuna kashpankuna wañurkansapa. Chashna wañushpankunapish kunnaka Tata Diowan mana tukuyniyukta kawsaykansapa.

⁷ Rikchak laya tiyak utkana tukunka. Chayrayku allita yuyashpa allita rurashpa kawsaychi. Tukuy diya tukuy shunku Tata Diowan parlashpa kawsaychi. ⁸ Sukaman allita sukwana sukwana kuyanakushpa kawsaychi. Chashna kuyanakushpaykichi sukwana sukwana perdonanakunkichi. ⁹ Wasikichipi wawzikichita panikichita kushikushpalla mana uayashpa chaskiyichi.

¹⁰ Tata Dios tukuy kankunata atipachishunkichi rikchak laya allikunata rurashpa yanapanakunaykichi. Chashna Tata Dios atipachishuptikichi kushikushpalla sukwana sukwana yanapanakuychi. ¹¹ Tata Dios kankunata yachachikuya atipachishuptikichi allita kuskata paypa rimananta yachachikuychi. Tata Dios kankunata atipachishuptikichi runamasikichita yanapayta kushikushpalla yanapaychi. Chashna allita yanapaptikichi tukuy runakuna Tata Diosta kuyashpa yachankasapa Jesukristu sukaman yanapashushkaykichi. Ariya Tata Diroska mana tukuyniyuk sukmaman

allimami. Sukaman rikchak layata atipan rurayta. Chayrayku akuychi payllata kuyashpa kawsaypachi.

Runakuna chikniwaptinchikunapish kushikushpalla kawsaypachi.

¹² Munanayni wawkinikuna, paninikuna, sufrishpaykichi ama rimaychichu imapatí sufriykani nishpa. Sufriptikichi Tata Dios yachanayan paylattachu katinkichi manachu nishpa. ¹³ Kay allpapi sufrishpaykichi Jesukristushina sufriykankichi. Chayrayku sukaman kushikushpalla kawsaychi. Jesukristu kashkan shamuptin payta llipyakpuruta kawashpaykichi ashwan allimata kushikunkichi. ¹⁴ Kankuna allita Jesukristuta kreyishpa kawsaplikichi suk runakuna kamishuptikichipish kushikushpalla kawsaychi. Tata Diospa Espiritu sukaman kushikishushpaykichi yanapashuykankichi Jesukristuta kuyashpa kawsanaykichipa.

¹⁵ Mana munanichu runamasikichita wañuchikshina suwakukshina uchalikukshina mana allikunapi yayukukshina sufrinaykichipa. ¹⁶ Chaymanta Jesukristuta allita kreyishkaykichirayku sufrishpaykichi kushikushpalla mana pinkakushpa Tata Diosllata alabaychi.

¹⁷ Kay tiempu sufriykanisapa Tata Dios kawananchikunapa allitachu manachu rurashunchisapa nishpa. Ñukanchikuna paypa wambrankuna kayakashpa sufriptinchikuna Tata Diospa rimananta mana kasukuk runakuna ashwan sinchita sufrinkasapa. ¹⁸ Allita rurashpa sufriptinchikunapish Tata Dios salvawanchisapa. Tukuy mana alli rurak runakuna ñukanchikunamanta ashwan sinchita sufrinankuna tiyan. ¹⁹ Chayrayku Tata Dios munaptin sufrishpanchikunapish allillata rurashpa kawsaypachi. Rurawakninchikuna Tata Diospa makinpi churanakuypachi. Payka tukuy laya ruray atipak kashpa mana llullachiwanchisapachu.

5

Jesukristuta kreyik runakuna allita rurashpa kawsananchikuna tiyan.

¹ Kunanka kankunapa ansianuykichita yachachini. Ñukapish paykunashina Tata Diospa rimananta yachachikuk ansianu kani. Jesukristuta kawarkani sukaman sufrishpa wañuptin. Chaymanta Jesukristu kashkan shamushpa allimata rikurimuptin Tata Dios chay ansianukunatashina ñukatapish kushichiwanka.

² Tata Dios kankunata willashushkankichi ovejakunata kuydak runakunashina tukuy Tata Diosta kreyikmasikichita allita kuydanaykichipa. Chayrayku allita munashpaykichi paykunata kuydaychi. Mana kullkillata munashpaykichiilla kuydaychi. Kushikushpalla trabajaychi. ³ Ama sinchi kamachikuk patronshina kamachikuychichu. Allillata yachachikuychi. Allillata rurashpa kawsaychi Jesukristuta kreyikmasikichi kankunata kawashushpaykichi paykunapish allillata rurashpa kawsanankunapa.

⁴ Jesukristuka tukuy ovejakunata kuydak runakunamanta ashwan alli kuydakukmi. Chaymanta kashkan shamuptin Tata Dios kankunatapish mana tukuyniyuk premuykichita koronatashina kushunkichi paywan tantalla alli kamachikuk kanaykichipa.

⁵ Chaymanta kankunata waynakuna, shipashkuna willaykichi: Chay kuydashuknikichi ansianukunata allita kasushpa kawsaychi. Tukuy kankuna sukwani sukwani kasunakuychi. Ama kikikichilla kreyinakushpa kawsaychichu. Tata Diospa rimananpi willawanchisapa:

“Tata Dios tukuy kuyashpa kasushpa kawsak runakunata sukaman kuyashpa yanapankasapa.

Kikinlla kreyinakuk runakunata kastigankasapa.”

⁶ Chayrayku Tata Dios rikchak layata ruray atipak kaptin paypa makinpi churanakuychi. Chashna paypa makinpi churanakuptikichi suknin diya payka willashunkichi ali rurak kanaykichita. ⁷ Tata Dios sukanman kuyashushpaykichi yanapashunkichi. Chayrayku sufrishpaykichiipish tukuy llakinaykichita payta willaychi.

⁸ Supay iden mikunanta maskak pumashina chiknishushpaykichi sukanman munan uchapi urmachishuynikichita. Chayrayku allita kuydanakuychi ama uchapi urmachishunaykichipa. ⁹ Jesukristullata allita kreyishpa kawsashpaykichi sinchikuychi ama supayta kasunaykichipa. Yachankichi tukuy partipi Jesukristuta kreyikmasikichikuna iden kankunashina sufrishpa kawsanankunata.

¹⁰ Suk tiempullata sufrishkaykichiwasha Tata Dios yanapashunkichi allita rurashpa payllata katishpalla kawsanaykichipa. Yanapashunkichi sinchikunaykichipa ama uchapi urmanaykichipa. Amachashunkichi ama ni pi Tata Díosmanta ashuchishunaykichipa. Chaymanta Tata Dios sukanman kuyashushpaykichi sielman pushashunkichi mana tukuyniyukta Jesukristtuwan tantalla kushikushpa kawsanaykichipa. ¹¹ Tata Dios rikchak layata atipak kaptin akuychi mana tukuyniyukta payllata kuyashpa kawsaypachi.

Pedru kay kartata tukuchashpa wawinkunata rimachinsapa.

¹² Wawkinchi Silvano Jesukristuta alli kreyik runa kashpa yanapawarkan kay kartata killkayta. Yanapawaptin ñuka kay taksha kartata kankunata animuchishpa killkashkaykichi. Yachachishkaykichi Tata Dios kuyashushpaykichi yanapashunaykichita. Kankuna Tata Dios kuyashunaykichita yachashpaykichi payta allita katishpalla kawsaychi.

¹³ Kay Babilonia llaktamanta Jesukristuta kreyikmasikichi rimachishunkichi. Tata Dios kankunatashina paykunatapish akllashkasapa paypa wambrankuna kanankunapa. Wambrayni Markospish rimachishunkichi.

¹⁴ Kankuna tantanakushpaykichi kuyanakushpa rimachinakuychi. Jesukristuta kreyikkuna kaptikichi ñuka kankunapa Tata Diosta roygaykani kushichishunaykichipa.

Ñuka Pedru kayllatami killkashkaykichi.

2 PEDRU

PEDRU ISHKAYNNIN KUTI KREYIKUKMASINKUNATA KILLKARKAN

Pedru Tata Diosta kreyik runakunata rimachinsapa.

¹ Munanayni wawkinikuna, paninikuna, Jesukristupa mandunpi kaptini payka ñuka Pedruta kachamuwashka rimananta yachachikupi purinaynipa. Salvawakninch Jesukristu sukaman alli rurak Diosninch kaptin kankuna ñukaykunashina sukaman kushikushpa payta kreyishpa kawsaykankichi. Payta kreyiptikichi kay kartata killkaykaykichi. ² Kankuna Tata Diosta Señorninch Jesukristuta riksiptikichi sukaman yanapashushpaykichi kushichishunkichi.

Pedru yachachiwanchisapa imashnamí Jesukristuta katishunchisapa nishpa.

³ Jesukristuta riksiptinchikuna Tata Dios sukaman tukuy laya atipak kashpa yanapawanchisapa allita rurashpa payta kuyashpa kawsananchikunapa. Jesukristu sukaman almirana laya alli rurak kashpa sukaman kuyawashpanchikuna kayawashkanchisapa payllata kasushpa kawsananchikunapa. ⁴ Jesukristu sukaman kuyawashpanchikuna willawashkanchisapa sukaman allimata yanapawananchikunata. Kankuna chay alli willawashkanchikunata kasushpa kawsashpaykichi atipankichi Jesukristushina allita rurashpa kawsayta. Manana chay mana Jesukristuta kreyik runakunashinanachu munanaykichillata rurashpa kawsankichi.

⁵ Chayrayku Jesukristuta kreyishpa kawsashpaykichi sinchikushpa allillata rurashpa kawsaychi. Chashna allillata rurashpa kawsashpaykichi Tata Diospa rimananta allita yachakuychi. ⁶ Tata Diospa rimananta yachakushpaykichi kikikichi kamachinakuychi. Kikikichi kamachinakushpaykichi mana shaykushpalla Jesukristuta katishpa kawsaychi. Jesukristuta katishpa kawsashpaykichi payta kuyashpalla kawsaychi. ⁷ Jesukristuta kuyashpalla kawsashpaykichi tukuy Jesukristuta kreyikmasikichiwan kuyanakushpa kawsaychi. Kuyanakushpa kawsashpaykichi tukuy runamasikichita kuyashpa kawsaychi. ⁸ Ashwan ashwanta allita rurashpa kawsashpaykichi kamachiwakninch Jesukristuta sukaman kushichinkichi. Payta ashwan allita riksinkichi. Payta riksishpaykichi manami yankapachu katiykankichi.

⁹ Mana Jesukristuta ashwan ashwanta kasushpa kawsashpanchikunaka iden mana alli kawakuk runakunashinami kanchisapa. Manana yuyanchisapanachu Tata Dios ñawpa uchanchikunamanta perdonawashkanchikunata.

¹⁰ Wawkinikuna, paninikuna, Tata Dios akllashushkankichi paypa mandunpi kawsanaykichi. Chayrayku mana shaykushpa tukuy shunku kreyishpa payllata katiychi. Tata Diospa rimananta allita kasushpaykichi mana uchapi urmankichichu. ¹¹ Chashna allita rurashpa kawsaptikichi Tata Dios sukaman kushikushpa sielman pushashunkichi paywan kushikushpa kawsanaykichi. Chaypi salvawakninch Jesukristu mana tukuyniyukta sukaman allimata tukuy layapi kamachikuykan.

Pedru tukuy yachachikushkanta yuyachiwanchisapa.

¹² Kankunaka ñami Tata Diospa rimananta allitana yachankichi. Chayta allita kreyishpa kawsaykankichi mana llulla kaptin. Chayta

allita yachaykaptikichipish ñuka kashkan tukuya yuyachiykaykichi. ¹³ Amarapish wañushpaynira sukaman munani tukuy yachachishkaynikunata yuyachiynikichita. ¹⁴ Señorninchi Jesukristu willawashka utka wañunaynitana. ¹⁵ Chayrayku tukuy yachachishkaynikunata yuyachiykaykichi wañushkayniwasha ama kunkanaykichipa.

¹⁶ Ñuka yachachikukmasinikunawan ñami allitana yachachishkaykichi Señorninchi Jesukristu tukuy laya ruray atipak kananta. Yachachishkaykichina kashkan shamunanta. Chashna yachachishpaynikuna manami kikinikunapa yuyanaynikunamantachu kuentukunara parlachishkaykichi. Ñukaykuna tukuy laya yachak Jesukristuta kikinikuna ñawinikunawan kawarkanisapa. ¹⁷ Suk cuti urkupi kashpaynikuna kawarkanisapa Tata Dios Jesukristuta sukaman kuyashpa llipyachiptin. Uyarirkanisapa Jesukristuta kuyashpa alabaptin. Sielumanta Tata Dios willarkan: "Kayka wambraynimi. Paytami sukaman kuyani." ¹⁸ Chashna Tata Dios sielumanta willaptin chay akllashkan urkupi kashpaynikuna uyarirkanisapa.

¹⁹ Tata Dios sielumanta rimashka kaptin yachanchisapa chay ñawpa yachachikuk runakunapa killkashkankuna deveras allima kananta. Chayrayku chaykunata allita kasuychi. Chay killkashkankunaka alkusa tutapi rawraykakshinami. Jesukristu kashkan shamunankaman Tata Diospa rimanan pakarinan llukshimuykak luserushina yachachiwanachikunashina tukuy layata yachachiwashunchisapa.

²⁰ Allita uyariwaychi. Ñukanchikuna manami kikinchikunallachu atipanchisapa Tata Diospa rimananta entiendiyta. ²¹ Ñawpa alli yachachikuk runakuna mana kikinkunapa yuyayninkunallatachay yachachikurkansapa. Tata Diospa Espiritun chay alli rurak runakunata yachachiptinkuna Tata Diospa rimananta allita yachachikurkansapa.

2

Aypa llulla yachachikuk runakuna tiyan. (Judas 4-13)

¹ Ñawpa tiempu aypa mana alli yachachikuk runakuna israel runakunata llullachirkansapa. Kunanpish kankunapi aypa mana alli yachachikuk runakuna tiyan. Kan kunma malisyaptikichi llullachishunkichi amana Jesukristuta allita kreyishpa kawsanaykichipa. Mana kreyinayansapachu Jesukristu wañushsha uchankunamanta salvanankunata. Chashna llullachikushpa yachachikuptinkuna Tata Dios raslla kastigankasapa.

² Aypa runakuna chay llullachikuk runakunata katishpa mana alli runakunata rurashpa kawsankasapa. Chayrayku suk runakuna rimankasapa Jesukristupa yachachikunana mana alli kananta. ³ Chay llullachikuk runakuna kikinkunapa yuyayninkunallata yachachikushpa munansapa kullkita kunaykichipa. Ñawpamantapacha Tata Dios rimarkan tukuy llullachikuk runakunata kastiganankunata. Chayrayku mana kishpinkasapachu Tata Diospa kastigunmanta.

⁴ Ñawpa tiempu suk angelkuna mana allikunata ruraptinkuna Tata Dios mana perdonarkansapachu. Chay angelkunata kadenashpa rawraykak ninaman wishchukurkansapa tuta likidupi kiparinankunapa. Chay tuta likidupi Tata Dios paykunata wakaychaykansapa willanan diyakaman maymaní kachankasapa nishpa.

⁵ Chaymanta ñawpa tiempu Noepish runamasinkunata allita yachachiptinkunapish mana munarkansapachu kreyiyta. Chayrayku

Tata Dios mana perdonashpa tukuy allpapi yakuta untachirkan. Chaypina tukuy chay mana alli rurak runakuna sipikushpa wañurkansapa. Tata Dios alli rurak Noeta kanchis runakunawan tantallata salvarkansapa ama sipikushpa wañunankunapa.

⁶ Chaymanta Tata Dios chay ishkay ñawpa llaktakuna Sodomata Gomorrata rupachirkansapa uchpa tukunankunakaman. Paykunata rupachirkansapa tukuy runakuna yachanankunapa Tata Dios mana alli rurak runakunata kastiganankunata. ⁷ Chay Sodomapi kawsak runa Lot sukaman llakirkan llaktamasinkuna mana allita rurashpa kawsaptinkuna. Chayrayku Tata Dios chay ishkay llaktakunata rupachishpa chay alli rurak Lottaka salvarkan ama rupanarpa. ⁸ Chay Lotka tukuy diya kawarkan llaktamasinkunata sukaman mana allita rurashpa kawsaptinkuna. Uyarirkan mana allita rimashpa kawsaptinkuna. Chayta kawashpa uyarishpa sukaman tukuy shunku llakishpa kawsarkan.

⁹ Tata Dios allita yachan yanapawayninchikunata ama llaktamasinchikunashina mana allita rurananchikunapa. Chaymanta Tata Dios tukuy mana alli rurak runakunata kawapayansapa suknin diyakaman kastiganankunapa. ¹⁰ Mana alli munanankunallata rurak runakunata ashwan sinchita kastigankasapa. Chay runakuna mana nima Jesukristupa kamachikunanta kasunayansapachu. Sukaman kikinkuna kreyinakushpa munanankunallata rurashpa kawsansapa. Mana manchansapachu sielupi kawsak sinchi awtoridarkunata rabyachiya. ¹¹ Angelkuna paykunamanta ashwan sinchi atipak kayakashpankunapish Jesukristupa ñawpkninpí mana animukunsapachu nima mana alli rurak kamachikkunata chatashpa rabyachiya.

¹² Chay awtoridarkunata rabyachik runakuna animalkunashina mana entiendinsapachu allitachu manachu ruraykansapa nishpa. Mana kuentata kunakushpalla munanankunallata rurashpa kawsansapa. Nasinsapa animalkunashina trampapi urmeshpa wañunankunapa. Tata Diospa rimananta mana entiendishpankuna washanchansapa. Chayrayku iden animalkunashina wañunkasapa. ¹³ Chay runakuna sukkunata sufričishkankunashina Tata Diroska paykunatapish sufričinkasapa. Diyapipish mana pinkakushpa kushikushpalla mana allita rurashpa kawsansápa. Kankunawan tantanakushpa mikushpankuna pinkakuna layakunata ruransapa. Mana allikunata ruraykashpankuna kikinkunalla kushikushpa llullachinakunasa.

¹⁴ Chay llullachikuk runakunaka maykan warmikunata kawashpa yuyansapa paykunawan uchallikuya. Mana kunkanayansapachu uchallikuya. Raslla kreyikuk runakunata llullachinsapa mana allita ruranankunapa. Rikchak laya kawanankunallata munansapa. Tata Dios chay laya runakunata sukaman kastigankasapa.

¹⁵ Chay llullachikuk runakuna allita rurashkankunamanta manana allita rurashpana kawsansapa. Chay ñawpa tiempu kawsak Beorpa wambran Balamshina kawsansapa kullkita sukaman munashpa maña allita rurashpa. ¹⁶ Chay yachachikuk Balam kullkita sukaman chaskinayashpa suk burru sawanpi riykarkan Tata Diosta royananpa llaktanta kulluchinanpa. Chashna riykashpa chay burrun rasllana iden runashina rimakushpa willarkan ama chay mana alli yuyananta rurananpa.

¹⁷ Chay mana alli yachachikuk runakunaka mana yakuyuk pukyukunashinami. Paykunaka puyukuna wayra chinkachinanshinami. Tata Dios chay llullachikuk runakunata mana tukuyniyuk tuta likiduman churankasapa. ¹⁸ Chay laya runakuna sukaman alabanakushpankunapish

yankamanta rimakunsapa. Chaymanta runakuna uchankunamanta llukshinayaptinkuna llullachinsapa kashkan paykunashina munanankunallata rurashpa kawsankunapa. ¹⁹ Chay runakunaka mana alli rurak runakunata willansapa yanapanankunata mana alli ruranunkunamanta llukshichiya. Chashna willashpankunapish mana atipansapachu ni pita yanapayta. Paykunaka mana alli ruranata amañashpa rurayta chay mana alli ruranunkunata ruransapa.

²⁰ Chay llullachikuk runakuna suk tiempullata Señorninchi salvawakinchi Jesukristuta riksishpa manana uchallikushpana kawsarkansapa. Chaymanta Jesukristuta riksishkankunamanta sukan munarkansapa kashkan mana allikunata rurashpa kawsayta. Mana alli kawsashkankunamanta ashwan mana allikunata rurashpana kawsansapa. ²¹ Chay runakuna allita Tata Diospa kamachikunankunata riksishkankunamanta manana kasunayansapanachu. Paykunapa ashwan alli kanman karkan mana Tata Diospa rimananta riksinankunapa.

²² Runakuna rimansapa: “Suk allku kipnashpa chay kipnanllata mikun. Chaymanta suk kuchi chuya chuyata armakushpa kashkan turupi rin kuchpakushpa chapunakuk.” Chay runakuna kashkan mana allita rurashpa kawsashpankuna iden chay kipnanllata mikuk allkushinami. Iden chay turupi chapunakuk kuchishinami.

3

Jesukristu kashkan shamunka.

¹ Munanayni wawkinikuna, paninikuna, kay ishkaynin kartata killkaykichi. Kay ishkantin kartaynikunapi allita yuyachiykichi allillata yuyashpa kawsanaykichipa. ² Allita yuyaychi ñawpa alli yachachikuk runakuna yachachikushkankunata. Chaymanta salvawakinchi Señor Jesukristu ñukaykunata kachamuwashkasapa paypa yachachikunankunata yachachikunaynikunapa. Kay yachachikunaynikunatapish allita yuyaychi.

³ Tukuy yachachikunaynikunamanta ashwan allita kayta yuyaychi: Jesukristu shamunan tiempu aypa runakuna kikinkunapa munanankunallata rurashpa kawsankasapa. Tata Diospa rimananta mana munashpa asichinkasapa. ⁴ Chashna asikushpa tapuwashunchisapa: “¿Aykapítie Jesukristu shamunka? Payka rimarkan kashkan shamunanta. Chashna rimashka kashpapish manara shamunrachu. Aypa tatanchikuna Jesukristuta shuyashpana wañushkasapa. Tata Dios alpata rurashkanmantapacha tukuy runakuna idenllata kawsanchisapa.”

⁵ Chay asikuk runakunaka mana munansapachu kreyikuyta ñawpa tiempu Tata Dios rimashpalla tukuy sieluta alpata rurashkanta. Mana kreyinapachu Tata Dios yakuta tantanachishkanta allpa rikurinanpa. ⁶ Chay runakunaka mana kreyinayansapachu ñawpa tiempu Tata Dios yakuwan alppata untachishpa tukuy uchasapa runakunata sipichishkankunata.

⁷ Jesukristu kashkan shamushpa tukuy runakunata willawashunchisapa ima layatami kawsashkanchisapa nishpa. Tapuwashkanchikunawasha Tata Dios tukuy mana alli rurak runakunata ninaman kachankasapa. Tata Dios chay mana alli rurak runakunata kastigashpankuna rimashpalla tukuy sieluta tukuy alpata rupachinka.

Jesukristu mana unayankachu shamuya.

⁸ Munanayni wawkinikuna, paninikuna, allita yuyaychi. Tata Dios yuyan waranka watakuna iden suk diyalla kananta. Paypa suk diyaka iden waranka watakunashinami. ⁹ Chay asikuk runakuna yuyansapa Jesukristu

sukaman unayananta shamunanpa. Chashna yuyaptinkunapish mana unayankachu shamunanpa. Payka sukaman tukuy runakunata kuyashpa munan uchankunamanta wanankunapa. Mana munanchu ni pi kullunanpa. Chayrayku manara shamunrachu.

¹⁰ Suknin diya mana ni pi yuyashkan oras Jesukristu suwa runa shamukshina kashkan shamunka. Kashkan shamuptin tukuy sielu inti killa luserukuna sukaman manchanapa layata sukaman bullata rurashpa chinkanankuna tiyan. Tukuy laya tiyak rawraykak ninapi rupashpa kulunankuna tiyan. Alipa tukuy allpapi tiyakkunapish ninawan sukaman rupanankuna tiyan.

¹¹ Chashna manchanapa layata tukuy tiyak kullunanta yachashpaykichi allita rurashpa Jesukristuta kuyashpa kawsaychi. ¹² Sukaman kushikushpa munaychi Jesukristu utka shamunanta. Jesukristu shamushpa tukuy sielipi tiyakta rupachinka. Chay rawraykak nina ukupi tukuy alppa chullunka.

¹³ Allpawan sielu rupanankunapa kaptinpish Tata Dios willawashkanchisapa: “Suk mushuk sieluta suk mushuk allpata rurasha. Chay mushuk allpapi tukuy runakuna allillata rurashpa kawsankasapa.” Chashna Tata Dios willawaptinchikuna akuychi chay mushuk allpata chay mushuk sieluta sukaman munashpa shuyaypachi.

Jesukristu shamunanta yuyashpa allita rurashpa kawsaypachi.

¹⁴ Munanayni wawkinikuna, paninikuna, chay mushuk allpata shuyaykashpanchikuna akuychi allita rurashpa kawsaypachi. Chaypina Jesukristu kutimushpa kushikushpalla allillata ruraykaptinchikuna tarimuwashunchisapa.

¹⁵ Mash allita yuyaychi. Jesukristu runakunata llakichishpa manara shamunrachu paykunata munashpa salvayta. Munananchi wawkinchi Pablupish Tata Dios yachachiptin kartankunata killkashpa chayllata yachachishushkankichi. ¹⁶ Payka kartankunapi yachachishushkankichi Jesukristu shamunanta. Paypa kartankunapi mana entiendina laya tiyaptin chay mana alli yachachikuk runakuna mana allita Jesukristuta kreyishpankuna mana entiendinsapachu. Chayrayku mana kuskatachu yachachikunsapa. Chay runakunaka Tata Diospa ñawpa rimanantapish mana kuskatachu yachachikunsapa. Chayrayku Tata Dios sukaman kastigankasapa.

¹⁷ Munanayni wawkinikuna, paninikuna, tukuy yachachishkaynikunata allita yuyaychi ama chay llullachikuk runakuna llullachishunaykicipa. Ama chay mana alli rurak runakunata kasuychichu ama paykunashina mana allita rurashpa kawsanaykicipa. ¹⁸ Salvakuk Señorninchi Jesukristuta ashwan ashwanta riksishpa kuyashpa kawsaychi. Mana tukuyniyukta payta alabaychi.

Ñuka Pedru chayllata killkashkaykichi.

1 JUAN

JUAN TUKUY MAYPI KREYIKUKMASINKUNATA KILLKARKAN

Manara allpa tiyaptinra Jesukristu Tatan Dioswan kawsaykarkan.

¹ Munanayni wawkinikuna, paninikuna, ūuka Juan kay kartata killkashpa kankunata sukaman allita yachachishkaykichi. Manara kay allpa tiyaptinra Jesukristu Tatanchi Dioswan kawsaykarkan. Payka kay allpapi nasirkan runa kananpa yachachiwananchikunapa imashnami Tata Dioswan kawsashunchisapa nishpa. ūukaykuna payta ūwinikunawan kawashkanisapa makinikunawan llankashkanisapa. Parlaptin uyarishkanisapa. Rikchak laya allikunata ruraptin kawashkanisapa. ² Jesukristu Tatan Dioswan kawsaykashkanmanta kay allpaman shamurkan kaypi kawsanapna. ūukaykuna paytaka kawashkanisapa. Kunanka yachachiykaykichi kankunapish ūukaykunashina Tata Dioswan mana tukuuniyuksa kawsanaykichipa.

³ Kashkan willaykichi Jesukristu kay allpapi kaptin payta kawashkaynikunata uyarishkaynikunata. ūukaykuna Tata Dioswan wambran Jesukristuwan tantalla kuyanakushpa kawsaykanisapa. Chayta willaykichi kankunapish ūukaykunawan tantalla kuyanakushpa kawsanaykichipa. ⁴ Chayta killkaykaykichi kankunapish ūukaykunashina sukaman kushikunaykichipa.

Tata Dioska lus likidumi.

⁵ ūukaykuna Jesukristu yachachiwashkanta yachachiykaykichi: Tata Dioska lus likidumi. Paypika manami nima tuta tiyanchu.

⁶ Ichara ūukanchikuna mana allita ruraykashpanchikuna rimanchimansapa Tata Dioswan kuyanakushpa kawsaykananchikunata. Chashna rimashpanchikuna tutapishinalla kawsaykanchisapa. Kikinchikunalla llullachinakuykanchisapa. Tata Diospa rimananta mana kasushpachu kawsaykanchisapa.

⁷ Tata Dioska lus likidumi. Allillata rurashpa kawsan. ūukanchikunapish payta kreyishpanchikunaka allita rurashpa kawsashunchisapa. Luspishnami kawsashunchisapa. Tukuy Jesukristuta kreyikmasinchikunawan kuyanakushpa kawsashunchisapa. Chay layata kawsaptinchikuna Tata Diospa wambran Jesukristupa yawarnin uchanchikunamanta pichawan-chisapa.

⁸ Mana uchayuk kananchikunata rimashpanchikunaka kikinchikunalla llullachinakuykanchisapa. Mana kuskatachu rimaykanchisapa.

⁹ Uchanchikunata Tata Diosta willaypachi. Chashna uchanchikunata payta willashpanchikuna yachanchisapa perdonawananchikunata alli rurak kassha. Chay uchanchikunamanta pichawanchisapa. ¹⁰ Tata Dios willawanchisapa tukuy runakuna uchayuk kananchikunata. Chayrayku ama llullakushpa rimaypachichu mana uchayuk kananchikunata. Chashna rimashpanchikunaka rimaykanchisapa Tata Dios llulla kananta. Tata Diospa rimananta manami kreyishpachu kawsaykanchisapa.

¹ Munanayni wambraynikuna, kay kartata killkaykaykichi ama uchallikushpa kawsanaykichipa. Chaymanta mana allikunata ruraptinchikuna Jesukristuka alli rurak kashpa abogadonchikunami. Payka Tata Diospa ñawpakanipi favorninchikunapi rimakushpa amachawanchisapa. ² Jesukristu sielumanta shamurkan kay allpapi wañunarpa. Wañurkan ñukanchikunata perdonawananchikunapa ama chay uchanchikunarayku Tata Dios kastigawananchikunapa. Chaymanta wañurkan tukuy runakunapa uchankunarayku.

³ Tata Diospa kamachikunankunata kasushpa kawsashpanchikunaka yachanchisapa payta riksinanchikunata. ⁴ Wakin runakuna mana nima Tata Diospa kamachikunankunata kasushpa rimansapa payta riksinankunata. Chashna rimashpankuna kikinkunalla llullachinakuykansapa. Mana kuskatachu rimansapa.

⁵ Ñukanchikuna Tata Diospa rimananta allita kasushpa kawsashpanchikuna payta kuyaykanchisapa. Yachanchisapa Tata Dioswan tantalla kuyanakushpa kawsaykananchikunata. ⁶ Ñukanchikuna rimanchisapa Tata Dioswan tantalla kuyanakushpa kawsananchikunata. Chashna rimashpanchikuna Jesukristu alli rurashkanshina allita rurashpa kawsananchikuna tiyan.

Sukwan suwan kuyanakushpa kawsashpanchikuna iden luspishina kawsaykanchisapa.

⁷ Wawkinikuna, paninikuna, Tata Dios ñawpamantapacha kamachiwashkanchisapa tukuy runamasinchikunata kuyashpa kawsananchikunapa. Ñawpamantapacha kankuna Tata Diospa rimananta uyarishkankichina. Chayllata ñukapish yachachiykaykichi. Manami chikan laya kamachikunatachu killkaykaykichi.

⁸ Jesukristu Tata Diospa kamachikunanta kasushpa tukuy runakunata kuyarkan. Kankunapish payshina kuyanakushpa kawsaykankichia. Ashwan ashwanta allita rurashpa luspishina kawsaykankichia. Manana tutapishinanachu kawsaykankichia. Chashna kuyanakushpa kawsashpaykichi mushuk kawsaytana kawsaykankichia. Chayrayku chay ñawpamantapacha kamachikunanka mushuk kamachikunanshinati.

⁹ Ichara suk kankuna Jesukristuta kreyikmasikichita chikninkichiman. Paykunata chiknishpaykichi rimankichiman luspishina allillata rurashpa kawsaykanaykichita. Chashna rimashpaykichi tutapishinalla kawsaykankichia. ¹⁰ Jesukristuta kreyikmasikichita kuyashpa kawsashpaykichi luspishinami kawsaykankichia. Luspishina kawsaptikichi mana ni pi uchallichishunkichichu. ¹¹ Jesukristuta kreyikmasikichita chiknishpaykichika tutapishina kawsaykankichia. Tutapishina kawsashpaykichika mana allita yuyaykushpa mana yachankichichu maymanmi riykankichi nishpa. Mana yachankichichu allita rurashpa kawsayta.

Juan tatakunata waynakunata yachachinsapa.

¹² Munanayni wambraynikuna, Jesukristu wañushkanrayku Tata Dioska tukuy uchallikushkaykichimanta perdonashushkankichia. Chayrayku kankunata killkaykaykichi. ¹³ Kankuna, tatakuna, kallarinanmantapacha kawsak Jesukristuta riksinkichi. Chayrayku kankunatapish killkaykaykichi. Kankuna, waynakuna, sinchikushpa supayta mana kasushpana kawsaykankichia. Chayrayku kankunatapish killkaykaykichi.

¹⁴ Munanayni wambraynikuna, kankuna Tatanchi Diosta riksinkichi. Chayrayku kankunata killkashkaykichi. Kankuna, tatakuna, kallarinamantrapacha kawsak Jesukristuta riksinkichi. Chayrayku kankunatapish killkashkaykichi. Kankuna, waynakuna, sinchikushkankichi ama uchallikushpa kawsanaykichipa. Tata Diospa rimananta shunkullikushpa kawsaykankichi. Supay llullachishunayaptikichipish payta mana kasushpana kawsaykankichi. Chayrayku kankunatapish killkashkaykichi.

¹⁵ Ama munaychichu rurayta kay allpapi Tata Diosta chiknik runaku-nashina. Nima kay allpapi mana alli tiyakta munaychichu. Chayta munash-paykichika manami Tata Diostaka kuyaykankichichu. ¹⁶ Tata Diosta mana kasuk runakuna kikinkunapa munanankunallata rurashpa kawsansapa. Rikchak laya kawanankunata munashpanguna kawsansapa. Rikchak laya tiyapunankunawan sukanam alabanakunsapa. Chashna kawsashpanguna manami Tata Diospa munanantachu rurashpa kawsaykansapa. Tata Dioska mana munanchu paykunashina vanidarkunata rurashpa kawsananchikunapa.

¹⁷ Kay allpaka tukunan tiyan. Tukuy munanankunallata rurak runaku-napish kulluyupimi riykansapa. Chaymanta tukuy ūukanchikuna Tata Diospa munananllata rurashpa kawsashpanchikuna paywan mana tukuyniyukta kawsashunchisapa.

Ama llullachikuk runakunata uyariypachichu.

¹⁸ Wambraynikuna, ūami tukunan tiempuna kawsaykanchisapa. Yachanchiki Jesukristuta chiknik runa shamunanta. Kunanka Jesukristuta chiknik runakuna aypa rikurimushkasapana. Chayrayku yachanchisapana tukunan tiempuna kawsaykananchikunata. ¹⁹ Chay Jesukristuta chiknik runakuna ūukanchikunamanta ashushkasapa mana deveras wawkinchikuna kashpanguna. Paykuna deveras wawkinchikuna kashpaka manami ūukanchikunamanta ashunmansapachu karkan. Paykuna ashuptinkunaka yachanchisapa mana Tata Diospa kashkankunata.

²⁰ Jesukristumi kankunatapish Espiritu kushushkankichi. Chashna kushuptin allita Tata Diospa rimananta entiendinkichi. ²¹ Tata Diospa Espiritu entiendichishuptikichi yachankichi pimi allita yachachikun pimi mana allitachu yachachikun nishpa. Chayta yachaykaptikichi killkaykaykichi. Mana yakashka kaptikichika mana killkaykichimanchu karkan.

²² Chay llulla runakuna rimansapa Jesukristu mana Tata Dioskachamushkan salvakuk runa kananta. Chashna rimaptinkunaka yachanchisapa Jesukristuta chiknik runakuna kanankunata. Paykunaka nima Jesukristuta nima Tata Diosta riksinsapachu. ²³ Ūukanchikuna Jesukristu Tata Diospa wambran kananta rimaptinchikuna Tata Dioska ūukanchikunapa Tatanchikunami. Chaymanta pipish kashpa rimaptin Jesukristu mana Tata Diospa wambran kananta manami paykunapa Tatankunachu.

²⁴ Nawpa tiempumantapacha Jesukristupa yachachikunanta yachankichi. Chay yachachikunallata allita shunkullikuychi. Chayta shunkullikushpa kawsashpaykichika Jesukristuwan Tata Dioswan tantalla kuyanakushpalla kawsaykankichi. ²⁵ Jesukristu willawashkanchisapa paywan tantalla kuyanakushpa kawsashpanchikuna mana tukuyniyukta paywan kawsananchikunata.

²⁶ Kankunata killkaykaykichi ama chay llullachikuk runakuna llullachishunaykichipa. ²⁷ Jesukristu Tata Diospa Espiritu kankunata kushushkankichi. Kankunapi Tata Diospa Espiritu kawsashpa rikchak laya allikunata entiendichishunkichi. Mana llullatachu yachachishunkichi.

Tata Diospa Espiritun allita yachachishuptikichi Jesukristullawan tantalla kuyanakushpa kawsaychi.

²⁸ Wambraynikuna, akuychi Jesukristuwan tantalla kuyanakushpa kawsaypachi kashkan shamuptin ama manchakunanchikunapa nima pinkakunanchikunapa. ²⁹ Allitana yachankichi Jesukristu sukaman alli rurak kananta. Chaymanta yachanaykichi tiyan tukuy alli rurak runakuna Tata Diospa wambrankuna kanankunata.

3

Tata Diospa wambrankuna kashpanchikuna allita rurashpa kawsananchikuna tiyan.

¹ Mash allita yuyaychi. Tata Diosninchu sukaman kuyawashpanchikuna willawanchisapa paypa wambrankuna kananchikunata. Chashna willawaptinchikuna paypa wambrankuna kanchisapa. Tata Diosta mana kreyik runakuna mana payta riksishpankuna mana entiendinsapachu paypa kuyadu wambrankuna kananchikunata.

² Munanayni wawkinikuna, paninikuna, Tata Diospa wambrankunami kanchisapa. Yachanchisapa Jesukristu kashkan shamuptin kushikushpa payta kawashunchisapa. Chashna payta kawashpa ūukanchikunapi iden payshina kashhunchisapa. Manara yachanchisaparachu ima layam̄i kashhunchisapa nishpa. Ariya chikan laya tukushhunchisapa iden payshina kananchikunata. ³ Jesukristu shamananta yachashpanchikuna iden paykawsashkanshina allita rurashpa kawsaypachi.

⁴ Tukuy mana alli rurak runakuna Tata Diospa kamachikunankunata mana kasunsapachu. Mana allita rurashpankuna mana Tata Diospa kamachikunankunata kasushpa uchallikuykānsapa.

⁵ Yachanchisapa Jesukristu allillata rurashpa kawsashkanta. Payka manami niman suk kuti uchallikurkanchu. Kay allpaman shamurkan wañushpa uchanchikunamanta perdonawananchikunata. ⁶ Chayrayku ūukanchikuna Jesukristuwan tantalla kuyanakushpa kawsashpanchikuna mana uchallikushpa kawsanchisapa. Tukuy uchallliku runakuna mana Jesukristuta riksishkasapachu nima shunkunkunapi chaskishkasapachu.

⁷ Wambraynikuna, ama niman suk llullachikuk runata uyariyichichu. Jesukristuka sukaman alli rurakmi. ūukanchikunapi allita rurashpa kawsashpanchikuna payshina alli rurak kashhunchisapa.

⁸ Kallarinamantapacha supay uchallikushpa kawsaykan. Uchallikuk runakuna supayllata kasushpa kawsaykansapa. Chayrayku Tata Diospa wambran Jesukristu shamurkan supaypa ruranankunata wakllichik amana uchallikushpa kawsanchikunata. ⁹ Chayrayku Tata Diospa wambrankuna kashpanchikuna manana uchallikuypinachu katishhunchisapa. Tata Dios sukaman yanapawanchisapa paypa kawsaykanan layata kawsanchikunata. Tata Diospa wambrankuna kashpanchikuna manana munanchisapanachu uchallikushpa kawsayta.

¹⁰ Yachanchisapa pimi Tata Diospa wambrankuna pimi supayta uyariikkuna nishpa. Tukuy runakuna mana allita rurashpa runamasinkunata chiknishpa kawsashpankuna mana Tata Diospa wambrankunachu.

Akuychi sukwani sukwani kuyanakushpa kawsaypachi.

¹¹ Ñawpamantapacha Tata Diospa rimanan yachachiwashkanchisapa allita kuyanakushpa kawsanchikunata. ¹² Ñawpa tiempu chay ullku Kayin mana allita rurashpa supaypa munananta rurashpa kawsarkan. Paypa

wawkin Abel allita rurashpa kawsarkan. Chashna Abel allita rurashpa kawsaptin Kayinka wawkinta chiknishpa wañuchirkan. Ama Kayinshina sukkunata chiknishpa kawsaychichu.

13 Wawkinikuna, paninikuna, Tata Diosta mana kasuk runakuna chiknishuptikichipish ama llakiychichu. **14** Ñukanchikuna tukuy Jesukristuta kreyikmasinchikunata kuyashpa kawsashpanchikuna yachanchisapa Tata Dioswan mana tukuyniyukta kawsananchikunata. Maykan mana kuyakuk runa wañudushina kashpa mana Tata Dioswanchu kawsaykan. **15** Jesukristuta kreyikmasikichita chiknishpaykichi iden wañuchikuk runashinami uchallikuykankichi. Yachankichi wañuchikuk runakuna manami atipansapachu Tata Dioswan tantalla kawsayta.

16 Jesukristu sukaman kuyawashpanchikuna wañurkan perdonawananchikunapa. Wañushka kaptin yachanchisapa sukaman kuyawananchikunata. Jesukristu kuyawashkanchikunashina ñukanchikunapish tukuy Jesukristuta kreyikmasinchikunata kuyashpa yanapananchikuna tiyan. **17** Ichara Jesukristuta kreyikmasinchikunapa suk imankuna illanman. Chashna illaptin ichara ñukanchikuna tiyawakninchikunawan mana yanapanayanchimansapachu. Mana paykunata yanapanayashpanchikunaka mana Tata Diostachu kuyashpa kawsaykanchisapa.

18 Wambraynikuna, tukuy Jesukristuta kreyikmasinchikunata kuyashpa akuychi yanapaypachi. Ama ni pita willaypachichu kuyananchikunata shiminchikunallawan rimashpa.

Sukwan suwan yanapanakushpanchikuna mana pinkakushunchisapachu Tata Dioswan parlayta.

19 Jesukristuta kreyikmasinchikunata kuyashpa yanapashpanchikuna alita yachanchisapa Tata Diospa rimananta kasushpa kawsaykananchikunata. Kushikushpalla mana pinkakushpa Tata Dioswan kawsanchisapa.

20 Chaymanta mana alli rurashkanchikunata yuyashpa pinkakunchisapa Tata Dioswan parlayta. Yachanchisapa Tata Dios alli yachak kashpa mana alli rurashkanchikunata yachananta.

21 Munanayni wawkinikuna, paninikuna, yuyayninchikuna mana chatawaptinchikunaka mana pinkachinakushunchisapachu Tata Dioswan kushikushpalla parlayta. **22** Tata Diospa kamachikunankunata kasushpa paypa munananta rurashpa kawsashpanchikuna suk ima munananchikunata mañaptinchikuna payka kushikushpa kuwashunchisapa.

23 Tata Dios kamachiwashkanchisapa wambran Jesukristuta kreyishpa kawsananchikunapa. Chaymanta kamachiwashkanchisapa suwan suwan kuyanakushpa kawsananchikunapa. Jesukristupish chayllata kamachiwashkanchisapa. **24** Chay kamachikunankunata kasushpa kawsashpanchikuna Tata Dioswan tantalla kawsaykanchisapa. Chaymanta payka ñukanchikunapi kawsan. Allita yachanchisapa paywan tantalla kawsananchikunata Tata Dios Espiritunta kuwaptinchikuna.

4

Allita yuyaykuypachi pimi allita yachachikun pimi mana allitachu yachachikun nishpa.

1 Munanayni wawkinikuna, paninikuna, ama tukuy yachachikuk runakunata kreyiyichichu. Allita yuyaychi allita yachanaykichipa Tata Diospa rimanantachu yachachikuykansapa, supaypa rimanantachu

yachachikuykansapa nishpa. Aypa mana alli yachachikuk runakuna tiyan. Llullakushpa rimansapa Tata Diospa Espiritun yachachiptin paypa rimananta yachachikuykanankunata.

² Kunanka yachachiykichi imashnami yachankichi pitami Tata Diospa Espiritun yanapaykan nishpa. Tukuy alli yachachikuk runakuna yachansapa Jesukristu sielumanta shamushkanta suk warmimanta nasishpa runa kananpa. Chayta yachachikuptinkuna yachankichi Tata Diospa Espiritun paykunata yanapanankunata.

³ Chaymanta mana alli yachachikuk runakuna yachachikunsapa Jesukristu mana sielumanta shamushkanta runa kananpa. Chayta yachachikuptinkuna yachankichi Tata Diospa Espiritun paykunata mana yanapaykanankunata. Jesukristuta chiknik supaymi paykunata yanapaykansapa. Kankuna yachankichi Jesukristuta chiknik runa shamenunata. Jesukristuta chiknik runakuna ñami llullachikupina puriykansapa.

⁴ Wambraynikuna, Tata Diospa wambrankuna kaptinchikuna payka ñukanchikunapi kawsan. Chay llullachikuk runakuna kikinkunapa munanankunallata rurashpa supayta kasushpa kawsansapa. Ñukanchikunapi kawsak Tata Dioska chay supaymanta ashwan tukuy laya atipakmi. Chayrayku Tata Dios allita yanapawaptinchikuna chay llullachikuk runakuna mana atipansapachu llullachiwayninchikunata.

⁵ Chay llullachikuk runakuna kay allpapi vanidarkunallata rurashpa kawsansapa. Kikinkunapa yuyayninkunallamanta yachachikunsapa. Chashna yachachikuptinkuna Tata Diosta mana kreyinayak runakuna paykunata uyarinsapa.

⁶ Ñukanchikuna Tata Diospa wambrankunami kanchisapa. Tukuy Tata Diosta riksik runakuna ñukanchikunata uyariwanchisapa. Paykuna uyariwaptinchikunaka yachanchisapa Tata Diosta kreyikmasinchikuna kanankunata. Tata Diosta mana kreyik runakuna manami uyariwanayanchisapachu. Chaypina yachanchisapa llullachikuk supayta kasushpa kawsaykanankunata.

Tata Dios kuyawaptinchikuna akuychi sukwani sukwani kuyanakushpa kawsaypachi.

⁷ Munanayni wawkinikuna, paninikuna, Tata Dios sukaman kuyawashpanchikuna yanapawanchisapa sukwani sukwani kuyanakuya. Chayrayku sukwani sukwani kuyanakushpa kawsananchikuna tiyan. Allita kuyanakushpa kawsashpanchikuna Tata Diospa wambrankuna kashpanchikuna payta riksinchisapa. ⁸ Tata Dios sukaman kuyawanchisapa. Chayrayku sukwani sukwani runamasinkunawan kuyanakushpa kawsashpankunaka mana Tata Diosta riksinsapachu. ⁹ Tata Dios chaylla wambranta kay allpaman kachamurkan wañushkanrayku mana tukuyniyukta kawsananchikunapa. Chashna Tata Dios wambranta kachamushpa yachachiwashkanchisapa sukaman kuyawananchikunata.

¹⁰ Ñukanchikuna Tata Diosta kuyanchisapa. Tata Diosta kuyashpanchiku-napish manami kuyawananchikunashinachu kuyanchisapa. Tata Dios sukaman kuyawashpanchikuna chaylla wambranta kachamurkan kruspi wañunarpa uchanchikunamanta perdonawananchikunapa. Chashna chaylla wambranta Jesukristuta kachamushka kaptin yachanchisapa sukaman kuyawananchikunata.

¹¹ Munanayni wawkinikuna, paninikuna, Tata Dios sukaman kuyawaptinchikuna ñukanchikunapish akuychi sukwani sukwani kuyanakushpa kawsaypachi. ¹² Manami ni pi ñawinchikunawan Tata

Diosta kawashkanchisapachu. Sukwan suwan kuyanakuptinchikuna Tata Dios ūukanchikunapi kawsan ashwan ashwanta kuyanakushpa kawsananchikunapa. ¹³ Tata Dioska Espiritu kuwashkanchisapa ūukanchikunapi kawsanpanpa. Chashna ūukanchikunapi kawsaptin yachanchisapa Tata Dioswan kawsananchikunata. Yachanchisapa pay ūukanchikunapi kawsananta.

¹⁴ Kay allpapi Jesukristu kawsaptin ūukaykuna payta allita kawarkanisapa. Chayrayku willaykichi: Tata Dios wambranta kay allpaman kachamurkan tukuy runakunapa salvakuknin kananpa. ¹⁵ Ūukanchikuna rimashpanchikuna Jesukristu Tata Diospa wambran kananta Tata Dioswan kawsanachisapa. Tata Diospish ūukanchikunapi kawsan.

¹⁶ Ūukanchikuna Tata Dioswan kawsashpanchikuna yachanchisapa Tata Dios sukanan kuyawananchikunata. Tata Dios sukanan kuyawaptinchikuna ūukanchikunapish suwan suwan kuyanakushpa kawsashunchisapa. Chashna suwan suwan kuyanakushpa kawsashpanchikuna Tata Dioswan kawsaykanchisapa. Paypish ūukanchikunapi kawsan.

¹⁷ Tata Dios ūukanchikunapi kawsaptin payta sukanan allita kuyashpa kawsanachisapa. Kay allpapi kawsashpanchikunara Jesukristu kuyawashkanchikunashina paytapis kuyanchisapa. Chayrayku manami manchakushunchisapachu Jesukristu kastigakuk shamuptin. ¹⁸ Allita Tata Diosta kuyashpa kawsashpanchikuna mananami kastigawananchikunata manhashunchisapanachu. Manhashpanchikunaka manara Tata Diosta allitarachu kuyashpa kawsaykanchisapa.

¹⁹ Manara Tata Diosta kuyaptinchikunara payka sukanan kuyawashkanchisapa. Chayrayku ūukanchikunapish payta kuyanchisapa.

²⁰ Ichara rimanchimansapa Tata Diosta kuyananchikunata. Chashna rimashpanchikuna ichara Jesukristuta kreyikmasinchikunata chiknishpa kawsaykanchimansapa. Paykunata chiknishpanchikunaka kikinchikunalla llullachinakuykanchisapa. Riksinanchi runata chiknishpanchikunaka mana kawananchikuna Tata Diosta mana nima kuyanchisapachu. ²¹ Jesukristu kamachiwashkanchisapa Tata Diosta kuyashpanchikuna paypa wambrankunatapis kuyananchikunapa.

5

Tata Diospa wambrankuna kashpanchikuna paypa kamachikunanta kushikushpa kasunanchikuna tiyan.

¹ Ūukanchikuna kreyishpanchikuna Jesukristu Tata Diospa wambran kananta Tata Diospa wambrankuna kanchisapa. Chaypina Tata Diospa wambrankuna kashpanchikuna payta sukanan kuyashpa kawsanachisapa. Chashna Tata Diosta kuyashpanchikuna tukuy paypa wambrankunatapis kuyananchikuna tiyan. ² Tata Diosta kuyashpanchikuna paypa kamachikunankunata kasushpa kawsashpanchikuna yachanchisapa Tata Diospa wambrankunatapis kuyananchikunata. ³ Tata Diosta kuyashpanchikuna kushikushpalla paypa kamachikunankunata kasushpa kaw-sanachisapa. Tata Dios yanapawaptinchikuna atipanchisapa kasuyta.

⁴ Tata Diospa wambrankuna kashpanchikuna manana vanidarta urashpanachu kawsashunchisapa. Tata Diosta tukuy shunku kreyishpa kawsashpanchikuna manana uchallikushpanachu kawsashunchisapa. ⁵ Jesukristu Tata Diospa wambran kananta tukuy shunku kreyishpanchikuna manana vanidarpinachu kawsashunchisapa.

Tata Dios yachachiwanchisapa Jesukristu paypa wambran kananta.

⁶ Jesukristu sielumanta kay allpaman shamushpa yakupi bawtisakurkan. Chaymanta wañushpa yawarninta icharkan. Yakupi bawtisakushkanrayku yawarninta ichashkanrayku yachanchisapa Tata Diospa wambran kananta. Jesukristu shamurkan mana bawtisakunllapachu. Shamurkan yawarninta ichashpa wañunampa. Chaymanta Tata Diospa Espiritun mana llulkushpa yachachiwanchisapa Jesukristu Tata Diospa wambran kananta.

⁷ Sielipi kimsa yachachiwakninchikuna tiyan: Tata Dios, Tata Diospa wambran, Tata Diospa Espiritun. Chay kimsantin idenllata willawanchisapa Jesukristu Tata Diospa wambran kananta.

⁸ Chaymanta allpapi kimsa laya yachachikunanmanta allita yachanchisapa Jesukristu Tata Diospa wambran kananta. Tata Diospa Espiritun chayta yachachiwanchisapa. Chaymanta Jesukristu yakupi bawtisakushkanrayku chaymanta wañuptin yawarnin ichakushkanrayku yachanchisapa Tata Diospa wambran kananta. Kimsantinkuna idenllata yachachiwanchisapa.

⁹ Runakuna suk imata willawaptinchikuna allita kreyinchisapa. Tata Diospa rimanan chay runakunapa rimankunkunamanta ashwan allimami. Tata Dios yachachiwanchisapa Jesukristu paypa wambran kananta. Chayrayku akuychi Tata Dios yachachiwananchikunata tukuy shunku kreyiyipachi.

¹⁰ Ñukanchikuna tukuy shunku Jesukristuta kreyishpa kawsashpanchikuna allita yachanchisapa pay Tata Diospa wambran kananta. Tata Dios rimaptin Jesukristu paypa wambran kananta wakin runakuna mana kreyinsapachu. Chashna mana kreyishpankuna rimaykansapa Tata Dios llullakunanta.

¹¹ Tata Dioska willawashkanchisapa wambran Jesukristuta kreyishpa kawsashpanchikuna paywan tantalla mana tukuuniyukta kawsananchikunata. ¹² Tata Diospa wambran Jesukristuwani tantala kawsashpanchikuna Tata Dioswan mana tukuuniyukta kawsashunchisapa. Jesukristuta mana kreyik runakuna manami Tata Dioswanchu kawsankasapa.

Tata Diosta kreyishpanchikuna yachanchisapa sielman rinanchikunata mana tukuuniyukta kawsak.

¹³ Kankuna allita kreyinkichi Jesukristu Tata Diospa wambran kananta. Chayrayku kay kartata killkaykaykichi allita yachánaykichipa sielman rinaykichita Tata Dioswan mana tukuuniyukta kawsak.

¹⁴ Tata Dios yachachiwanchisapa paypa munananllata royananchikunapa. Chashna munananllata roygashpanchikunaka allita yachanchisapa uyariwananchikunata. ¹⁵ Tata Dios uyariwananchikunata yachashpanchikuna yachanchisapa tukuy roygashkanchikunata kuwananchikunata.

¹⁶ Ichará kawanchisapa Jesukristuta kreyikmasinchikuna mana allita ruraykanankunata. Mana allita rurashpankunapish mana wañuymanchu riykansapa. Chayta kawashpanchikuna Tata Diosta roygaypachi paykunata yanapanankunapa. Paykunata roygaptinchikuna Tata Dios perdonashpa yanapankasapa ashwan allita rurashpa kawsanankunapa. Mana wañunapa laya úchata ruraykaptinkuna Tata Dios perdonankasapa. Chaymanta suk runakuna sukaman mana allita rurashpa kawsashpa Tata Diosta mana nima kasunayansapachu. Chay runakuna wañuyman riykansapa. Mana Tata Dioswanchu kawsansapa. Ñuka mana rimanicu chay laya runakunapa Tata Diosta royananchikunapa. ¹⁷ Mana allita rurashpanchikuna uchallikunchisapa. Tiyan mana wañunapa laya ucha.

¹⁸ Yachanchisapa Tata Diospa wambrankuna kashpanchikuna mana uchallikushpachu kawsashunchisapa. Tata Diospa wambran Jesukristu

kuydawaptinchikuna supayka mana atipanchu uchallichiwayninchikunata.

¹⁹ Yachanchisapa tukuy kay allpapi supay sukaman kamachikuykananta. Chashna supay kamachikuykaptinpish yachanchisapa Tata Diospa wambrankuna kananchikunata. ²⁰ Yachanchisapa sielumanta Tata Diospa wambran Jesukristu shamushkanta riksichiwananchikunapa Tatan Dios deveras Dios kananta. Chaypina ñukanchikuna Tata Diosta riksishpanchikuna wambran Jesukristuwан tantalla kuyanakushpa kawsanchisapa. Payka deveras Diosmi. Paymi mana tukuyniyukta kawsachiwanchisapa.

²¹ Wambraynikuna, ama ruradu dioskunata munaychichu.

Ñuka Juan chayllata killkashkaykichi.

2 JUAN

JUAN ISHKAYNIN KUTI KREYIKUKMASINKUNATA KILLKARKAN

Tata Dios kamachiwanchisapa kuyanakushpa kawsananchikunapa.

¹ Munanayni wawkinikuna, paninikuna, ñuka Juan alli yachachikuk ansianu kashpayni kankunata Tata Dios aklladumasinikunata killkaykaykichi. Ñuka tukuy shunku kuyaykichi. Mana ñukallachu kuyaykichi. Tata Diospa rimananta yachakmasinikunapish kuyashunkichi.

² Ñukanchikuna Tata Diospa rimananta tukuy shunku kreyishpanchikuna mana tukuy niyukta kreyiyllapi katinchisapa. Chayrayku kankunata suka-man kuyaykichi. ³ Munani Tata Dioswan wambran Jesukristu yana-pashushpa kuyashunaykichipa kushichishunaykichipa. Tata Dios yana-pashuptikichi kuyanakushpa mana llullakushpa kawsankichi.

⁴ Kaypi ñuka tarimushkani kankunamanta shamudu wawkikichita allita Tata Diospa kamachikunankunata kasushpa kawsaykaptinkuna. Paykunata tarimushpayni sukan man kushikushkani.

⁵ Munanayni wawkinikuna, paninikuna, roygaykichi suwan suwan kuyanakushpa kawsanaykichipa. Kankunata killkashpayni manami chikan layatachu yachachiykaykichi. Jesukristuta kreyishkanchikunamantapacha yachashkanchisapa Tata Dios munananta kuyanakushpa kawsananchikunapa. ⁶ Tata Diosninchita kuyashpanchikuna paypa kamachikunankunata allita kasushpa kawsananchikuna tiyan. Ñawpamantapacha Tata Dios kamachiwashkanchisapa suwan suwan allita kuyanakushpa kawsananchikunapa.

Ama munaychichu llullachikuk runakunata kasuyta.

⁷ Kay allpapi aypa llullachikuk runakuna puriykansapa. Rimansapa Jesukristu mana Tata Diospa wambran kananta. Mana kreyinsapachu sielumanta shamushkanta warmimanta nasishpa runa kananpa. Chay llullachikuk runakuna Jesukristuta chiknishpanguna kankunata llullachishunaykaykichi. ⁸ Chayrayku kuydanakuychi ama chay llullachikuk runakuna llullachishunaykichipa. Paykuna llullachishuptikichika ichará mana premyuykichita chaskinkichichu trabajashkaykichipa. Chayppina pierdinkichiman Tata Dios kushunaykichita. Allita rurashpa kawsaptikichi Tata Dios paktadu premyuykichita kushunkichi.

⁹ Kankuna Jesukristupa yachachikushkanta allita kreyishpalla kawsash-paykichi Tata Dioswan kuyanakushpa Jesukristuwanpish kuyanakushpa kawsaykankichi. Chaymanta Jesukristupa yachachikushkanmanta ashuk runakuna mana Tata Dioswanchu kawsaykansapa. ¹⁰ Chaymanta kankunapi mana alli yachachikuk runakuna chayaptinkuna ama wasikichipi yakyuchiychichu. Ama nima rimachiychichu. ¹¹ Paykunata rimachishpaykichi yanapaykankichi llullachikuyta.

¹² Ñuka ashwanta yachachinayashpaynipish mana munanichu kartaynipi yachachiynikichita. Chayraykumi rinayani kankunawan tantanakushpa uya uya kawanakuk sukan man kushichinakunanchikunapa.

¹³ Kaypi ñukawan tantalla Tata Dios akllashkanmasinchikuna rimachishunkichi.

Chayllatami ñuka Juan killkashkaykichi.

3 JUAN

JUAN KIMSAYNIN KUTI KILLKARKAN

Yachachikuypi purik wawkinchikunata akuyichi yanapaypachi.

¹ Munanayni wawkini Gayo, ūuka Juan alli yachachikuk ansianu kashpa sukaman kuyayki. Chayrayku kay kartata killkaykayki.

² Munanayni wawkini, yachani sukaman allita Tata Diosta kreyishpa kawsanaykita. Chayrayku Tata Diosta kanpa roygaykani sukaman allita tukuy layapi yanapashunaykipa sanulla kawsanaykipa.

³ Wawkinchikuna ūukapi chayamushpa willawashkasapa Tata Diospa rimananta allita kreyishpa kawsaykanaykita. Chaya yachashpa sukaman kushikuykani. ⁴ Tukuy layamanta ashwanta kushikuni yachashpa wambraynukuna allita Tata Diospa rimananta kasushpa kawsaptinkuna.

⁵ Munanayni wawkini, chikan llaktakunamanta chayak wawkinchikunata yanapashpayki allita rurashkanki. ⁶ Chay wawkinchikunka kaypi chayamushpankuna Tata Diosta kreyikmasinchikunanta tantanakushpa willawashkasapa paykunata kuyashpa yanapashkaykita. Kashkan kanpi chayaptinkuna Tata Diosta kushichishpa ima munanankunata kushpa yanapaysapa Tata Diospa rimananta yachachikuypi purinankunapa.

⁷ Kay wawkinchikunaka Jesukristupa rimananta yachachikuypi sukaman purinsapa. Paykunaka Jesukristuta mana kreyik runakunamanta manami nima kullkita nima mikunankunata chaskishkasapachu.

⁸ Chayrayku ūukanchikuna chay laya yachachikuypi purik wawkinchikunata yanapananchikuna tiyan Tata Diospa rimananta yachachikunankunapa.

Ama munaypachichu mana alli rurak runakunashina kawsayta.

⁹ ūukaka suk kartata killkashkani chay llaktaykipi Jesukristuta kreyikmasinchikunata. Chay wawkinchi Diotrefes mana munashkachu chay kartapi willashkaynita kasuya. Munan Jesukristuta kreyikmasinchikunata kamachiyllata. ¹⁰ Payka shimishanka kashpa sukaman llullachikushpa riman ūukaykuna mana allita yachachikuykanaynikunata. Chaymanta chay alli yachachikukmasinikuna chaypi chayaptinkuna mana chaskinayansapachu. Chaymanta suk wawkinchikuna chay alli yachachikuk runakunata chaskinayaptinkuna michansapa ama chaskinankunapa. Chaymanta Tata Diospa wasinmanta chay chaskinayak wawkinchikunata karkunksapa. Chayrayku chayman rishpayni chay mana alli rurak wawkinchita tratasha kuskata kawsanampa.

¹¹ Munanayni wawkini Gayo, tukuy allita rurashpa kawsak runakunaka Tata Diospa wambrankunami. Tukuy mana allita rurashpa kawsak runakuna mana Tata Diosta riksinsapachu. Chayrayku chay alli rurak runakunashina allita rurashpa kawsay. Ama munaychu mana alli rurak runakunashina kawsayta.

¹² Chay wawkinchi Demetrio alli rurak runa. Tukuy Jesukristuta kreyikmasinchikuna rimansapa alli rurak runa kananta. ūukaykunapish rimansapa allita rurashpa kawsak runa kananta. Yachanki ūukaykuna allillata rimashpa mana llullakushpa kawsanaynikunata.

¹³ Wawkini, tiyanlara aypa willanaynipa. Mana munanichu tukuyta killkaynikita. ¹⁴ Utka rinayani kawakniki. Chaypina uya uya kawanakushpanchi parlashunchi.

15 Tata Diosta kanpa roygani sukaman kushichishunaykipa. Jesukristuta kreyikmasinchikuna kaymanta rimachishunkisapa. Chaypi tiyak Jesukristuta kreyikmasinchikunata sukta sukta rimachinisapa.

Ñuka Juan kay kartata killkashkayki.

JUDAS

TUKUY MAYPI KAWSAK KREYIKUKMASINKUNATA KILLKARKAN

Judas Jesukristuta kreyik runakunata rimachin.

¹ Munanayni wawkinikuna, paninikuna, ūuka Judas Jesukristuta sirvishpa kawsani. Santiagopa wawkinmi kani. Kay kartata killkaykaykichi Tata Diosninchi kankunata kuyashuptikichi. Kuyashushpaykichi kayashushkankichi Jesukristuta kreyishpa kawsanaykichipa. Jesukristu allita kuydashuykankichi. ² Chashnashina Tata Diosta kankunapa roygani sukaman kuyashunaykichipa kushichishunaykichipa yanapashunaykichipa.

Jesukristu kashkan shamushpa tukuy llullachikuk runakunata kastiganankuna tiyan.

(2 Pe 2.1-7)

³ Munanayni wawkinikuna, paninikuna, kankuna ūukashina Jesukristuta kreyik runakuna kankichi. Chayrayku sukaman munashkani kankunata killkaynikichita. Tata Diospa wambrankuna kaptinchikuna payka allita yachachiwashkanchisapa Jesukristulla salvawakninchikuna kananta. Kunanka kankunata roygaykichi sinchikushpa mana ni pita manchashpa Tata Dios yachachiwashkanchikunata allita yachachikunaykichipa. ⁴ Suk runakuna llullachishushpaykichi kankunapi yaykushkasapa. Paykuna mana alli rurak runakuna kayakashpa yuyansapa imatapish ruraptinkuna Tata Dios mana kastiganankunata. Kamachiwakninch Señorninch Jesukristuta mana kasunayansapachu. Ñawpamantapacha Tata Diospa rimanan willawanchisapa chay runakunata sukaman kastiganankunata.

⁵ Kankuna allita yachaptikichipish kashkan yuyachinayaykichi Egipto llaktamanta Tata Dios chay ūawpa awilunchikunata llukshichimushkankunata. Chaymanta chay awilunchikunamanta tukuy mana Tata Diosta kreyik runakunata kulluchirkansapa.

⁶ Mana alli rurak angelkuna Tata Diosta manana kasuptinkuna paymanta ashuptinkuna Tata Dios kastigarkansapa. Paykunata kacharkansapa mana tukuyniyuk yana tutaman kadenawan watadu kiparinankunapa Jesukristu kastigakuk shamanun diyakaman.

⁷ Chay mana alli rurak angelkunatastina Tata Dioska ūawpa mana alli rurak runakunatapish kastigarkansapa. Chay Sodomapi Gomorrapi ladunkunapi tiyak llaktakunapi kawsak runakuna chikan warmiwanawan uchallikushpa kawsarkansapa. Ullkukuna ullkupura warmiwanashina uchallikushpa kawsarkansapa. Chay runakuna sukaman uchallikushpa kawsashkankunaryku Tata Dioska sinchi rawraykak ninawan kulluchirkansapa. Chashna Tata Dios kulluchishpankuna yachachiwanchisapa tukuy uchallikuk runakunata mana tukuyniyukta kastiganankunata.

⁸ Chay llullachishuknikichi runakuna Tata Dios kastiganankunata yachaykashpangunapish mana alli muskukushkankunata kreyishpa yachachikunsapa. Millanapa laya sukaman uchallikushpa kawsansapa. Tukuy awtoridarkunata chiknishpa mana kasunayansapachu. Paykunaka angelkunatapish mana nima manchashpa piñachishpa rimansapa mana alli rurak kanankunata.

⁹ Suk kuti chay ashwan sinchi kamachikuk angel Miguel kamachikuk supaywan ayninakurkan Moisespa kuerpunrayku. Chashna ayninakushpa chay kamachikuk angel Miguelka mana animukurkanchu kamachikuk su-payta maldisishpa rabyachiya. Paytaka allillapi willarkan: "Tata Diосmi kastigashunki." ¹⁰ Chaykamanka chay llullachishunayak runakuna Tata Diосpa rimananta mana entiendishpankuna willashunkichi mana alli kananta. Yuyayninkuna iden animalkunapa kaptim mana yachansapachu imami alli imami mana allichu nishpa. Kikinkunapa munanankunallata rurashpa kawsansapa. Kikinkunalla kulluchinakunsapa.

¹¹ ¡Alaw! paykunata llakichini. Tata Diосmi sukaman kastigankasapa. Chay runakunaka chay ñawpa kawsak runa Kayinshina chikninakushpa kawsansapa. Chay ñawpa yachachikuk runa Balamshina sukan kulkilata munashpankuna llullachinakushkasapa. Chaymanta ñawpa kawsak runa Koreshina Tata Diosta mana kasunayashpankuna wañunankuna tiyan.

¹² Kankuna kuyanakushpa mikunaykichipa tantanakuptikichi chay llullachikuk runakuna pinkakuna layata mana ni pita kuyaykashpa aypata mikunsapa upyansapa. Yachachikushpa kikinkunalla kuydanakunsapa. Chay runakunaka mana yakuyuk puyukunashinami. Suk tipi wayralla ashuchinsapa. Paykunaka suk chakidu urmadu kaspikunashinami. Wayuchakunan tiempu kaptinpish chay chakidu urmadu kaspikuna mana nima wayuchakuya atipansapachu. Chay llullachikuk runakunapish mana atipansapachu allita yachachikuya.

¹³ Paykunaka sakra manllaybata olasyak yakushinami. Paykunapa yachachikunankuna pinkakuna laya kashpa chay yaku pusuknirshinami. Suk kalppak luserukunashina kaptinkuna Tata Diос kachankasapa mana tukuyniyuk tuta likiduman.

¹⁴ Ñawpa awilunchikuna Enok ñawpa awilunchi Adanmanta kanchisn miraknin karkan. Tata Diос chay awilunchi Enokta willaptin paypish chay laya llullachikuk runakunapa rimarkan: "Kawashkani Señorninchi waranka waranka angelinkunawan shamuptin tukuy mana alli rurak runakunata kastiganankunapa." ¹⁵ Payka tukuy runakunata tapushpa tukuy uchallikuk runakunata uchallikushkankunaryku kastigankasapa. Payta rabyachik runakunata kastigankasapa mana allita rimashkankunaryku." Awilunchi Enokka chayta rimarkan.

¹⁶ Chay uchallikuk runakuna mana nimawan kushikunayansapachu. Runamasinkunata yuyaypi purinsapa. Kikinkunapa munayninkunallata rurashpa kawsansapa. Kikinkunalla alabanakushpa kawsansapa. Suk runakunapa ñawpknnillapi mishkikpuruta parlachikunsapa yanapanankunata munashpalla.

Akuychi Tata Diосpa rimananta allita yachachikushpa kawsaypachi.

¹⁷ Munanayni wawkinikuna, panikuna, Señorninchi Jesukristupa disipulunkuna yachachishushkaykichita yuyaychi. ¹⁸ Paykunaka yachachishushkankichi: "Allpa tukunan tiempu aypa llullachikuk runakuna Tata Diосpa rimananta asichinkasapa. Kikinkunapa mana alli munanankunallata rurashpa kawsankasapa." ¹⁹ Chay llullachikuk runakunaka munansapa Jesukristuta kreyikmasikichimanta ashuchishuyunikichita. Kikinkunapa munanankunallata rurashpa kawsansapa. Tata Diосpa Espiritunka mana paykunapi kawsaykanchu.

²⁰ Munanayni wawkinikuna, panikuna, Tata Diосpa rimananta allita sukwana sukwana yachachinakuychi ashwan allita Tata Diosta kashshpa kawsanaykichipa. Tata Diосpa Espiritun yanapashuptikichi oraychi. ²¹ Tata Diос kuyashunaykichita yuyashpa kawsaychi. Señorninchi

Jesukristu shamenanta allita yuyashpa kawsaychi. Payka kuyawash-panchikuna shamunka pushawakninchikuna paywan mana tukuyuniyukta kawsananchikunapa.

²² Chaymanta ishkay yuyayuk runakunata llakichishpa animuchiichi Jesukristuta allita kreyinankunapa. ²³ Paykunata yachachiychi ama Tata Dios ninapi kastiganankunapa. Mana allí rurak runakunata llakichishpa yachachiychi. Allita kuydanakuychi ama paykunashina mana allita rurashpa kawsanaykicipa.

²⁴ Tata Dios tukuy laya atipak kashpa yachan kuydawayninchikunata ama uchallikushpa kawsananchikunapa. Jesukristu kashkan shamushpa Tata Diospa llipyak likidu ñawpakniipi ñukanchikunata mana uchayukta sukaman kushikuypuruta rikurichiwashunchisapa. ²⁵ Payllami sapallan salvawakn-inchi yachaysapa Dios. Tukuy pacha kunankaman mana tukuyuniyukta payka tukuy pimanta ashwan allimami. Tukuy pimanta sukaman ashwan yachakmi ashwan sinchi kamachikukmi. Jesukristu yanapawaptinchikuna akuychi payta sukaman alabaypachi.

Ñuka Judas chayllata killkashkaykichi.

APOKALIPSIS TATA DIOS SUK ALMIRANA LAYAKUNATA JUANTA KAWACHIRKAN

Juan Jesukristu kawachishkankunata killkarkan.

¹ Tata Dios manara ni pita yachachishpara Jesukristuta yachachirkan imakunatami utka ruranka nishpa. Chaymanta Jesukristuka angelninta kachamurkan Tata Dios yachachikushkanta ūnka Juanta kawachiwananpa. Chaymanta ūnka Jesukristuta sirvik kashpayni tukuy payta sirvikmasinikunata chay yachachiwashkanta yachachinisa. ² Ūnka chay angel kawachiwashkanta killkashkani kankunapish entiendinaykichipa. Tata Dios Jesukristuta yachachishkanta ūnkapish yachachiykaykichi. ³ Tata Dios chay yachachiwashkanta utka ruranka. Chayrayku kay killkaduynita leyishpaykichi uyarishpaykichi kasushpaykichi kushikunkichi.

Juan kanchis llaktakunapi Jesukristuta kreyikkunata killkarkan.

⁴ Ūnka Juan Asia partipi kanchis llaktakunapi Jesukristuta kreyikmasinikunata killkaykaykichi. Tata Diroska mana kallarinayuk kawsak karkan. Kunanpish kawsaykarlla. Mana tukuyuniyukta kawsanka. Munani Tata Dios kuyashushpaykichi kushichishunaykichipa. Chaymanta Tata Dirosa Espirituun kanchis alli layakunata ruran. Payka Tata Dirosa kamachikunan tiyarinanpa ūnawpaknini kawsan. Munani paypish kuyashushpaykichi kushichishunaykichipa.

⁵ Chaymanta munani Jesukristupish kuyashushpaykichi kushichishunaykichipa. Payka allimata mana shaykushpa Tata Dirosa rimananta yachachikurkan. Payka kuyawashpanchikuna yawarninta ichashpa uchanchikunamanta perdonawashkanchisapa. Chaymanta manara ni pi wañushkanmanta kawsamuptin payla kawsurkan amana kashkan wañunanpa. Chashna kawsamuñu kashpa payka tukuy sinchi kamachikuk runakunapa kamachikukninmi.

⁶ Ūnukanchikunatapish willawashkanchisapa payshina kamachikunanchikunapa. Chaymanta willawanchisapa saserdotekunashina paypa Tatan Diosta sirvinanchikunapa. Tata Dios sinchita kamachikuptin sukaman allima kaptin akuychi payta mana tukuyuniyukta alabaypachi. Chashna kachun.

⁷ Puyukuna ukunpi Señorninchi Jesukristuka shamunka. Chashna shamuptin tukuy runakuna kawankasapa. Payta tuksishpa wañuchik runakunapish kawankasapa. Tukuy allpapi kawsak runakuna payta kawashpa sukaman llakishpa wakakunkasapa. Chashna kachun.

⁸ Tukuy layata atipak Tata Dios mana tukuyuniyukta kawsak karkan. Kunanpish kawsaykarlla. Chaymanta mana tukuyuniyukta kawsanka. Payka riman: “Nukami A letrashina kashpayni tukuy layata kallarini. Chaymanta Z letrashina kashpayni tukuy layata tukuchani.”

Juan kawarkan Jesukristuta sukaman allimata llipyaptin.

⁹ Ūnka Juan Jesukristuta kreyikmasikichi kani. Ūnkapish kankunashina padesishpak kawsaykani. Kankunashina Tata Dirosa mandunpi kashpayni padesishpaynipish kushikushpalla payta kasuykani. Jesukristu salvakuk kananta Tata Dirosa rimananta yachachikushkaynirayku suk runakuna kay chunlla Patmos ishlapi churawashkasapa. ¹⁰ Tata Diosta kuyana diya paypa Espirituun yanapawaptin muskuyniipishina washaynipi uyarirkani

suk runa sinchita rimakuptin. Chay rimashkanta suk trompetata sinchita pukuntantashina uyarirkani.

¹¹ Chaypina chay runa willawarkan: “Suk librupi tukuy kawanaykita killkay. Chay killkanaykita kachay Asia partipi kanchis llaktakunapi kreyikukmasikikunata. Efesoman Esmirnaman Pergamoman Tiatiraman Sardisman Filadelfiaman Laodiseaman kachay.”

¹² Chayta uyarishpayni washaynita chaparkani yachanaynipa pimi chashna willawaykan nishpa. Washaynita chapashpayni kurimanta ruradu kanchis velerokunata kawarkani. ¹³ Chay kanchis velerokuna chawpinpi suk runatashina allpapi takakuk suni llachapayukta kawarkani. Kaskunpi kurimanta ruradu sinturonwan watadu karkan. ¹⁴ Chukchan lanashina nieveshina yurak likidu karkan. Ñawinkuna rawraykak ninashina rikurirkana. ¹⁵ Chakinkuna ninawan chulluchidu bronseshina llipyarkan. Rimakuptin manllayba yaku urmananshina sukaman sinchita soynarkan. ¹⁶ Alli ladu makinpi tiyapurkan kanchis luserukuna. Shiminmanta llukshirkan ishkantin ladu filuyuk punta likidu macheti. Inti chawpi diyata sukaman llipyakshina uyan sinchita llipyarkan.

¹⁷ Payta kawashpayni sukaman manchakuywan wañudushina chakin kuskapi urmarkani. Chaypina payka alli ladu makinta sawaynipi churashpa willawarkan: “Ama manchakuychu. Ñukaka mana kallarinayukmi kani. Mana tukuyniyukta kawsasha. ¹⁸ Mana tukuyniyukta kawsaykani. Wañushkaynimanta kawsamurkani mana tukuyniyukta kawsanaynipa. Chayrayku suk llaviyuk runashina kashpayni munanayni oras tukuy runakuna supkish supkish wañunkasapa. Chay wañudukunata churanaynipi kamachikuni. ¹⁹ Tukuy kawashkaykita killkay. Tukuy kunan kawachiyanaynita killkay. Chaymanta kawachinaynitapish killkay.

²⁰ Kunanka chay kawashkayki alli ladu makinipi kanchis luserukunapa chay kurimanta ruradu kanchis velerokunapa entiendichiyki. Chay kanchis llaktakunapi ñukata kreyiwak runakuna chay kanchis velerokunashinami. Chay kanchis llaktakunapi ñukata kreyiwak runakunapa yachachikukninkuna chay kanchis makinipi luserukunashinami.” Chashna Jesukristuka willawarkan.

2

Jesukristu Juanta willarkan Efeso llaktapi payta kreyik runakunata killkanapa.

¹ Chaymanta Jesukristu ñuka Juanta willawarkan Efeso llaktapi payta kreyikkunapa yachachikukninta killkanaynipa. Kashna rimarkan killkanaynipa: “Ñukapa alli ladu makinipi chay kanchis luserukuna tiyan. Chay kanchis velerokunapa chawpinpi purini. ² Ñukaka tukuy ruranaykichita yachani. Allita yachani maña shaykushpa rimanaynita yachachikushpa trabajayanaykichita. Allita yachani maña kuskata yachachikuk runakunata mana munanaykichita uvariya. Paykunaka llullakushpa rimansapa: Ñukapish Tata Diospa rimananta yachachikupi purini nishpa. Chashna rimaptinkunapish riksishkankichi llulla likidu kanankunata. ³ Ñukata kreyiwashkaykichirayku sukaman surfishkankichi. Chashna surfishpaykichiish mana shaykushpaykichi kreyiwashpalla kawsaykankichi.

⁴ Chashna allita kreyiwashpa kawsaptikichipish sukaman llakini manana ñawpa kuyawashkaykichishinana kuyawaptikichi. ⁵ Chayrayku chay ñawpa kuyawashkaykitchita allita yuyaychi ñawpashina kashkan kuyawashpa

kawsanaykichipa. Mana kasuwaptikichika utka risha kastigaknikichi. Ashuchishkaykichi amana velerokunashinana ñawpaknini pi kanaykichipa. Manana atipankichinachu Tata Diospa rimananta yachachikuya.

⁶ Chashna mana allita kuyawashpaykichipish chay Nikolaytakunapa mana alli ruranankunata millankichi. Chashna millaptikichi sukaman kushikuni. Ñukapish chay mana alli ruranankunata millani.

⁷ Tata Diospa Espiritu willashuptikichi allita rinrillikushpa uyariyichi. Kankuna sukaman sufrishpaykichipish allillata rurashpa kawsaptikichi ñukaka kawsachikuk kaspipa wayunta karashkaykichi. Chay kaspika Tata Diospa kawsanapimi.” Chashna Jesukristu willawarkan Efeso llaktapi payta kreyikkunapa yachachikukninta killkanaynipa.

Jesukristu Juanta willarkan Esmirna llaktapi payta kreyik runakunata killkananpa.

⁸ Chaymanta Jesukristu ñuka Juanta willawarkan chay Esmirna llaktapi kreyikkkunapa yachachikukninta killkanaynipa. Kashna rimarkan killkanaynipa: “Ñukaka mana kallarinayukmi kani. Mana tukuyniyukta kawsani. Ñukaka wañurkani. Chaymanta wañushkaynimanta kawsamurkani.

⁹ Allita yachani ñukata kreyiwashkaykichirayku sukaman sufrinaykchita. Yachani mana nimayuk kanaykichita. Mana nimayuk kashpaykichipish ñukata kreyiwashpa kushikushpa kawsashpaykichi rikchak layayuk kankichi. Chay llaktaykicipi tiyan Tata Diosta kuyanankunata rimak judiyukuna. Chashna rimashpankunapish mana Tata Diostachu kuyansapa. Paykunaka tantanakushpankuna supayta kuyansapa. Ñukaka yachani chay runakuna rimansapa kankuna mana alli rurak kanaykichita. ¹⁰ Sufrinaykchita yuyashpa ama manchakuychichu. Supaykunapa kamachikuknin suk kankunata karselpi churachishunkichi tukuy runakuna yachanankunapa ñukata allita kreyiwanaykichita. Chashna karselpi churachishuptikichi suk tiempullata sufrinaykichi tiyan. Wañunaykichi diyakaman ñukata allita kreyiwashpa kawsaptikichi suk koronatashina kushkaykichi mana tukuyniyukta kawsanaykichipa.

¹¹ Tata Diospa Espiritu kankunata willashuptikichi allita rinrillikushpa uyariyichi. Sukaman sufrishpaykichipish wañunaykichi diyakaman ñukata allita kreyiwashpa kawsashpaykichika manami kashkanka wañunkichinachu.” Chashna Jesukristu willawarkan Esmirna llaktapi payta kreyikkunapa yachachikukninta killkanaynipa.

Jesukristu Juanta willarkan Pergamo llaktapi payta kreyik runakunata killkananpa.

¹² Chaymanta Jesukristu ñuka Juanta willawarkan Pergamo llaktapi kreyikkkunapa yachachikukninta killkanaynipa. Kashna rimarkan killkanaynipa: “Ñukapa tiyawan ishkantin ladu filuyuk punta likidu machetini.

¹³ Chay llaktaykicipi aypa runakuna Satanaspa mandunpi kawsansapa. Chashna paypa mandunpi kawsaptinkunapish kankuna kreyiwashpalla kawsankichi. Chay alli yachachikuk Antipas rimanaynita allita yachachikuptin maypicha Satanas kawsan chaypi wañuchirkansapa. Payta wañuchiptinkunapish kankunaka ñukallata allita kreyiwashpa mana shaykushpalla kawsaykankichi.

¹⁴ Chashna kreyiwashpa kawsaptikichipish kankunamanta sukkuna rabyachiwaykansapa. Chay ñawpa Balampa yachachikunanta kreyishpa kawsaykansapa. Ñawpa chay yachachikuk runa Balamka chay kamachikuk Balakta willarkan israel runakunata uchallichinankunapa.

Yachachirkansapa ruradu dioskunata kuyashpa kukudu mikunata mikunankunapa. Yachachirkansapa chikan warmikunawan uchallikunankunapa.

¹⁵ Chaymantapish kankunamanta sukkuna chay mana alli rurak Nikolaytakunapa yachachikunankunata mana sakinayansapachu. ¹⁶ Chayrayku mana alli rurashkaykichimanta wanashpa kashkan ñukata allita kreyiwashpa kawsaychi. Mana ñukata kreyiwanayaptikichika utka risha shiminimanta llukshik machetiniwanshina chay mana alli rurak runakunawan makanakuk.

¹⁷ Tata Diospa Espiritun kankunata willashuptikichi allita rinrillikushpa uyariychi. Kankuna ñukallata allita mana shaykushpalla kreyiwashpa kawsaptikichi sielipi pakadu mikunata karashkaykichi. Chaymanta suk alilia yurak rumisilluta kushkaykichi. Chay rumisillupi suk mushuk shutikichi killkadu kanka. Chay killkadu rumisilluta chaskishpaykichi mushuk shutikichita yachankichi. Chikankuna mana shutikichita yachankasapachu." Chashna Jesukristu willawarkan Pergamo llaktapi payta kreyikkunapa yachachikunkinta killkanaynipa.

Jesukristu Juanta willarkan Tiatira llaktapi payta kreyik runakunata killkananipa.

¹⁸ Chaymanta Jesukristu ñuka Juanta willawarkan Tiatira llaktapi payta kreyikkunapa yachachikunkinta killkanaynipa. Kashna rimarkan killkanaynipa: "Ñukaka Tata Diospa chaylla wambranmi kani. Ñawinikuna nina rawraykakshina rikurin. Chakinikuna ninapi chulluchidu bronseshina allimata llipyen.

¹⁹ Ñukaka allita tukuy ruranaykichita yachani. Yachani sukaman sukwani kuyanakushpa yanapanakushpa kawsaykanaykichita. Chaymanta allita yachani mana shaykushpa allita kreyiwashpa kawsanaykichita. Chaymanta allita yachani kreyiwayta kallarishkaykichimanta kunan ashwan allita rurashpa kawsaykanaykichita. ²⁰ Chashna allita rurashpa kawsashpaykicipish rabyachiwaykankichi. Kawapayaykankichi chay ñawpa Jesabelshina suk mana alli rurak warmi yachachikuptin. Chay warmika mana allita ruraykashpa llullakushpa riman Tata Diospa rimananta yachachikunanta. Ñukata sirviwak runakunata yachachiykansapa mana nimananchu chikan warmiwan uchallikushpa kawsanaykichipa. Yachachiykansapa mana nimananchu ruradu dioskunata kuyashpa kukudu mikunata mikunaykichipa.

²¹ Chay warmi mana allita rurashpa kawsaykaptin sukmaman yachachishkani uchankunata wananaampa. Chashna yachachiptinipish payka mana kasuwanayashpa sukmaman uchallikuyllapi kawsan.

²² Chayrayku ñukaka chay warmita sukmaman unkuchishpa kastigasha. Tukuy paywan uchallikuk runakuna mana uchankunata sakiptinkunaka paykunatapish sukmaman sufrichisha. ²³ Chay warmipa wawankunatapish sufrichishpa wañuchishasapa. Chashna paykunata sufrichtipini tukuy kreyiwashpa kawsak runakuna yachankasapa tukuy runakunapa shunkunkunata yuyayninkunata yachanaynita. Yachankasapa tukuy mana alli rurak runakunata kastiganaynita tukuy alli rurak runakunata kushichinaynita.

²⁴ Tiatira llaktaykicipi sukkuna chay warmipa yachachikunanta mana kasukkuna tiyan. Chay warmi Satanaspa pakashkan rimananta yachachikuptin mana nima yachanayashkasapachu. Kankuna ñukallata allita kasuwashpa kawsaychi. Chayllata kamachiykichi. ²⁵ Shamunayni tiempukaman chay yachachikunaynita allita kasushpa kawsaychi.

26 Wañunaykichi tiempukaman tukuy munanaynita rurashpa kawsaptikichi ñukaka churashkaykichi allpapi kawsak runakunapa kamachikukninkuna kanaykicipa.

27 Tatayni Dioska willawashka kay allpapi kawsak runakunata kamachinaynipa. Ñukapish kankunata willashkaykichi sinchi kamachikuk kanaykicipa. Kankunaka suk fierrumanta ruradu varawan kamachikunkichi. Sinchi kamachikuk kashpaykichi tukuy kay allpapi kawsak runakunata iden metomanta ruradu ollata pakikshina kastigankichi.

28 Chaymanta chay pakarinan alba luseruta kawashpa yachankichi utkana pakarinanta. Chay luserushina ñukapish yachachiykichi utkana ñukawan tantalla kawsak rinaykichita.

29 Tata Diospa Espiritun kankunata willashuptikichi allita rinrillikushpa uyariychi.” Chashna Jesukristu willawarkan Tiatira llaktapi payta kreyikkunapa yachachikukninta killkanaynipa.

3

Jesukristu Juanta willarkan Sardis llaktapi payta kreyik runakunata killkananpa.

1 Chaymanta Jesukristu ñuka Juanta willawarkan chay Sardis llaktapi kreyikkunapa yachachikukninta killkanaynipa. Kashna rimarkan killkanaynipa: “Ñukapa makinipi chay kanchis llipyak luserukuna tiyan. Tata Diospa kanchis laya alli rurak Espiritun tiyawan. Aypa runakuna ñukawan tantalla kawsanaykichta rimaptinkunapish ñuka allita yachani mana alli rurak kanaykichta. Chashna mana alli rurak kaptikichi wañudutashina kawaykichi.

2 Ñukaka kawaykichi mana allita rurashpa mana Tatayni Diosta kushichishpa kawsaptikichi. Chayrayku atarimuychi allita rurashpana kawsanaykicipa. Sampayashkaykichimanta kashkan ñukata kasuwashpana kawsaychi. **3** Yachachishkaynita allita yuyaychi. Mana alli rurashkaykichta sakishpa Tata Diosta kashkan allita kasushpa kawsaychi. Mana allita kasushpa kawsaptikichika mana yuyashkaykichi oras ñukaka suk suwa runashina shamusha sukaman kastigaknikichi.

4 Chay Sardis llaktaykicipi sukkuna ñukata allita kasuwashpa allita rurashpa kawsansapa. Paykunaka chuya chuya llachapayukshinami. Mana nima uchallikushpa mana llachapankunata susyachishkasapachu. Chayrayku suknin diya ñukawan tantalla yurak llachapayuk purinkasapa. **5** Ñukata allita kasuwashpa allita rurashpa kawsaptinkuna allima yurak llachapata churachishasapa. Tatayni Dios suk librundi tukuy mana tukuyniyukta kawsak runakunapa shutinkunata killkan. Chay librumenta chay alli rurak runakunapa shutinkunata mana surkushachu. Tataynipa ñawpakninpí angelninkunapa ñawpakninkunapi willashasapa paykuna allita kasuwashpa kawsashkankunata. **6** Tata Diospa Espiritun kankunata willashuptikichi allita rinrillikushpa uyariychi.” Chashna Jesukristu willawarkan Sardis llaktapi payta kreyikkunapa yachachikukninta killkanaynipa.

Jesukristu Juanta willarkan Filadelfia llaktapi payta kreyik runakunata killkananpa.

7 Chaymanta Jesukristu ñuka Juanta willawarkan chay Filadelfia llaktapi kreyikkunapa yachachikukninta killkanaynipa. Kashna rimarkan killkanaynipa: “Ñuka allillata rurashpa kawsani. Mana nimapi llullakunichu. Ñukapa tiyan chay ñawpa sinchi kamachikuk Davidpa llavin. Chayrayku

atipani tukuy runakunata willayta Tata Diospa mandunpi yaykunkachu manachu nishpa. Suk runata yaykunanpa willaptinika yaykun. Mana yaykunanpa willaptinika mana yaykunchu.

⁸ Tukuy ruranaykichita allita kawaykani. Mana tukuy layata rurayta atipashpaykichipish rimanaynita kasushpa kawsaykankichi. Mana rimashkankichichu mana riksiwanaykichita. Chayrayku suk punkutashina kicharishkani ūukapa rimanaynita yachachikunaykichipa. Mana ni pi michashunkichichu yachachikunaykichipa.

⁹ Chaymanta chay llaktaykichipi suk runakuna tantanakunsapa Satanasta kuyanankunapa. Paykunaka llullakushpa rimansapa judiyu runakuna kanankunata. ūuka chay runakunata ūawpaknikichipi kunkurichishasapa yachanankunapa kankunata sukaman kuyanaynita.

¹⁰ Tukuy allpapi kawsak runakuna sufrinankuna tiyan Tata Dios yachananpa pikunami kasushpa kawsansapa pikunami mana kasushpa kawsansapa nishpa. Kankunaka kamachikunaynita mana shaykushpa allita kasushpa kawsashkankichi. Chayrayku sukaman sufriptikichipish sukaman amachashkaykichi ama supay uchallichishunaykichipa.

¹¹ ūukaka utkami shamusha. Chayrayku mana shaykushpa allita kasuwashpa kawsaychi ama ni pi premyuykichita kichushunaykichipa.

¹² Chashna wañunaykichi tiempukaman ūukata allita kasuwashpa kawsaptikichi Tata Diospa wasinpi orkonninkunatashina churashkaykichi. Chaypi mana tukuyniyukta kawsankichi. Kankunapi Tatayni Diospa shutinta killkasha. Chaymanta kankunapi Tatayni Diospa sielumanta shamuk mushuk Jerusalenpa shutinta killkasha. Chaymanta kankunapi ūukapa mushuk shutinita killkasha. ¹³ Tata Diospa Espiritun kankunata willashuptikichi allita rinrillikushpa uyariyichi.” Chashna Jesukristu willawarkan Filadelfia llaktapi payta kreyikkunapa yachachikukninta killkanaynipa.

Jesukristu Juanta willarkan Laodisea llaktapi payta kreyik runakunata killkananpa.

¹⁴ Chaymanta Jesukristu ūuka Juanta willawarkan chay Laodisea llaktapi kreyikukunapa yachachikukninta killkanaynipa. Kashna rimarkan killkanaynipa: “Ūuka sukaman alli yachak kashpayni manami llullakunichu. ūukaka Tata Diospa rimananta kuskata yachachikuni. Manara nima laya tiyaptinra Tata Dios willawaptin tukuy laya tiyakta rurarkani.

¹⁵ ūukaka yachani tukuy laya ruranaykichita. Chayrayku allita yachani mana tukuy shunku kreyiwashpa kawsaykanaykichita. Suk tibyu yakushina kankichi. Mana chirik yakushinachu nima rupak yakushinachu kankichi. ūukaka munayman chirik yakushina rupak yakushina kanaykichipa. ¹⁶ Mana tukuy shunku kreyiwashpaykichi mana chirik nima rupak yakushinachu kankichi. Chashna tibyu yakushina kaptikichi millanayashpa shiminimanta wishchushkaykichi.

¹⁷ Kankuna rimankichi tukuy layayuk kanaykichita. Tukuy munashkaykichi tiyapushunkichi. Mana nima illashunkichichu. Chashna rimaptikichipish ūukaka kawaykaykichi llakidu sufridu mana nimayuk mana kawakuy atipak mana llachapayuk runakunatashina.

¹⁸ Chayrayku allita willaykichi ūukamanta kuri ninapi chulluchidutashina rantinaykichipa. Yachachikunaynika chay chulluchidu kurishinami. Yachachikunaynita kasushpa kawsashpaykichi tukuy layayukshina kankichi. Chaymanta willaykichi ūukamanta yurak llachapaykichitashina rantinaykichipa ama llatanllashina kanaykichipa. Chay yurak llachapaka yuyachishunkichi pinkakuna laya uchaykichimanta perdonashkaynita.

Chaymanta willaykichi ñukamanta ñawi ampinatashina rentinaykichipa yachachinaynita entidinaykichipa.

¹⁹ Kankunata sukaman kuyashpayni sinchita willaykichi allita kawsashpa kawsanaykichipa. Mana allita ruraptikichika kastigashkaykichi. Chayrayku mana alli rurashkaykichita wanashpa sukaman tukuy shunku kuyawashpa kawsaychi.

²⁰ Mash uyariwaychi. Ñukaka shunkuykichipa punkunpishina kayaykaykichi. Kankuna munawashpa yaykuchiaptikichika wasikichipishina yakyusha. Chaypina tantalla mikukshina kushikupuru kawsashunchisapa.

²¹ Ñuka sukaman sufrishpaynipish allita Tatayni Diosta kasushpa kawsashkaynirayku paypa ladunpi tiyarishkani paywan tantalla kamachikunaynipa. Kankunatapish laduynipi tiyachishkaykichi ñukawan tantalla kamachikunaykichipa ñukata allita kasuwashpa kawsaptikichi.

²² Tata Diospa Espiritun kankunata willashuptikichi allita rinrillikushpa uyariyichi.” Chashna Jesukristu willawarkan Laodisea llaktapi payta kreyikkunapa yachachikukninta killkanaynipa.

4

Tata Diospa kawsanani tukuy kawsakkuna payta kuyaykansapa.

¹ Jesukristu tukuy chayta willawashkanwasha ñuka Juan sieluta chapashpayni muskuyninipishina suk kicharidu punkuta kawarkani. Chaypina kashkan uyarirkani Jesukristu sinchita rimashpa suk trompetata pukukshina willawaptin: “Shamuy kayman. Ñuka kawachishkayki suk tiempukan man rikchak laya tiyanankunata.”

² Chashna oras Tata Diospa Espiritun yanapawaptin sielupi kawarkani kamachikukpa tiyarinanta. Chay tiyarinapi Tata Dios tiyariidu karkan.

³ Paypa uyanta kawarkani aypa chaniyuk puka likidu jaspe kornalina rumishina llipyaptin. Chaymanta chay tiyarinapa tukuy vueltashninpí suk allima chirapa tiyarkan. Chay chirapa chikyak likidu esmeralda rumishina llipyarkan.

⁴ Chaymanta chay kamachikukpa tiyarinanpa tukuy vueltashninpí ishkay chunka chusku kamachikukkunapa tiyarinankuna tiyarkan. Chay tiyarinankunapi ishkay chunka chusku kamachikuk ansianukuna tiyariidu karkansapa. Paykunaka yurak likidu llachapayuk kurimanta ruradu koronayuk karkansapa.

⁵ Chay kamachikukpa tiyarinanmanta sukaman llipyarkan bullakurkan troynarkan. Chaymanta chay tiyarinanpa ñawpakninpí kanchis rawraykak velerokunata kawarkani. Chay kanchis rawraykak velerokunaka Tata Diospa kanchis laya alli rurak Espiritunni.

⁶ Chay kamachikukpa tiyarinan ñawpakninpí kawarkani manllayba kochata chuya likidu vidroshina llipyaptin. Chay atun tiyarinapa tukuy vueltashninpí chusku animalkuna tiyarkan. Chay animalkunapa kaskunkunapi lomonkunapi aypa ñawiyuk karkansapa. ⁷ Chay chusku animalkunamanta sukka pumashina rikurirkana. Ishkaynin toroshina kimsaynin runashina chuskuynin waman pawaykakshina rikurirkana.

⁸ Tukuy chuskuntin animalkunapa sokta rikrankuna tiyapurkansapa. Rikrankunapa sawanpi sikiñpi aypa ñawinkuna tiyarkan. Ñaykuna mána shaykushpa diyapi tutapi Tata Diosta willaksapa:

“Tata Diosnikuna,
tukuy pimanta kanka sukaman ashwan allimami kanki.
Kanka atipanki tukuy layata ruraya.

Kanka mana kallarinayukta kawsak karkanki.
Kunanpish kawsaykankilla.
Chaymanta mana tukuyniyukta kawsanki.”

⁹ Chashna rimashpankuna kuti kuti chay chusku animalkunaka chay tiyarinapi tiyaridu mana tukuyniyuk kawsak Tata Diosta kushichishpa agradesishpa kuyansapa. ¹⁰ Chashna chay animalkuna Tata Diosta kuyaptinkuna chay ishkay chunka chusku kamachikuk ansianukunapish kunkurikushpa kuyansapa. Chay kurimanta ruradu koronankunata umankunamanta surkushpa Tata Diospa tiyarinanpa ñawpkninpi churansapa. Chashna koronankunata churashpankuna mana tukuyniyuk kawsak Tata Diosta willansapa:

¹¹ “Kan Tata Dios, tukuy laya tiyakta rurashkanki.

Tukuy laya ruray atipak kanki.

Kikiki munashpa tukuya rurashkanki.

Chayrayku kanllata sukaman kuyanaynikuna tiyan.

Kanllata sukaman kushikushpa agradesinaynikuna tiyan.”

5

Sielupi Juan suk killkadu roskaduta kawarkan.

¹ Chaymanta ñuka Juan chay tiyaridu kamachikukpa alli ladu makinpi killkakunankuna roskadu karapata kawarkani. Chay roskadu karapapa washanpi ukunpi killkadu karkan. Chay killkadu roskadu karapa kanchis partipi apichidu karkan ama ni pi kicharinanpa.

² Chaypina suk sinchi kamachikuk angel sukaman sinchita rimarkan: “Pití sukaman alli rurak kashpa kay roskadu karapapa apichidunkunata atipan llikishpa kichariyta?”

³ Chashna chay kamachikuk angel rimaptin mana ni suk alli rurak tiyarkanchu chay apichidukunata llikishpa kicharinanpa. Mana ni sielupi nima allpapi kawsakkuna nima wañushkarunakuna atiparkansapachu chay roskadu karapata kichariyta nima kawayta.

⁴ Mana ni pi chay roskadu karapata kichariyta nima kawayta atipak tiyaptin ñuka Juan sukaman wakakurkani.

⁵ Sukaman wakakuptini chay kamachikuk ansianukunamanta suk willawarkan: “Amana wakakuynachu. Mash kaway. Chay ñawpa awiluykichi Judapa ayllunmanta pumashina sinchi kamachikuk tiyan. Payka chay ñawpa kamachikuk Davidpa miraknini. Wañushkanmanta kawsamushkanrayku tukuy runakunata atipan sinchita kamachiyya. Paymi atipan chay kanchis apichidukunata llikiyta chay roskadu karapata kicharinanpa.”

⁶ Chaypina chay kamachikukpa tiyarinan ñawpkninpi suk Oveja Wawanta kawarkani. Payka chay chusku animalkunapa chay ishkay chunka chusku kamachikuk ansianukunapa chawpikunapi shayaridu karkan. Chay Oveja Wawanta wañuchidu layata kawarkani. Chashna wañuchidushina rikurishpapish shayaridu karkan. Payka kanchis wakrayuk kanchis ñawiyuk karkan. Chay kanchis ñawinkunaka Tata Diospa kanchis laya alli rurak Espiritunmi. Tata Dioska Espiritunta kachamun allpapi kawsak runakunata yanapanankunapa.

⁷ Chaypina chay Oveja Wawanka chay tiyarinanpi tiyaridu Tata Diospa alli ladu makinmanta chay roskadu karapata chaskirkhan. ⁸ Chayta chaskiptin chay chusku animalkunaka chay ishkay chunka chusku ansianukunaka paypa ñawpkninpi kunkurikurkansapa. Tukuy paykunapa arpankuna tiyarkan. Chaymanta tukuyta kurimanta ruradu kopankuna

tiyapurkansapa. Chay kopankunapi aparkansapa mishkilla asnak wikita rupachinankunapa. Chay rupachidu mishkilla wikika Tata Diospa wambrankunapa orasyonninkunami.

⁹⁻¹⁰ Chaypina paykunaka chay Oveja Wawanta kushichishpa kay mushuk kantuta kantarkansapa:

“Kanka tukuy runakunapa uchankunarayku yawarnikita ichashpa wañurkanki.

Chashna wañushpayki tukuy ayllukunamanta tukuy llaktakunapi kawsakkunamanta tukuy laya rimanayukkunamanta aypa runakunata rantishkankisapa Tata Diospa wambrankuna kanankunapa.

Kanka tukuy chay runakunata willarkankisapa kamachikkunkuna kanankunapa.

Willarkankisapa saserdoteshina Tata Diosta sirvinankunapa.

Chashna willaptiki paykunaka kay allpapi kamachikunkasapa.

Chay runakunata salvashkaykirayku kanlla atipanki chay apichidukunata llikishpa chay roskadu karapata kichariyta.”

¹¹ Chaypina kawarkani sukaman aypa angelkunata kantaykaptinkuna. Chay angelkuna Tata Diospa tiyarinanpa, chay chusku animalkunapa, chay ishkay chunka chusku kamachikuk ansianukunapa vueltashnippi karkansapa. Chay angelkunaka mana yupapya laya waranka waranka karkansapa. ¹² Tukuy chay aypa angelkuna sinchita kantarkansapa:

“Chay Oveja Wawanka tukuy runakunapa uchankunarayku wañuchidu karkan.

Payka tukuy kawsakkunapa kamachikuknini.

Tukuy allpapi tiyakmi paypa.

Payka tukuy laya yachakmi.

Payka tukuy laya munananta atipan ruraya.

Chayrayku tukuy runakuna payta kushichishpa rimanankuna tiyan sukaman allima kananta.

Payta sukaman kuyashpa alabanankuna tiyan.”

¹³ Chashna chay aypa angelkuna kantaptinkuna tukuy Tata Dios rurashkan kawsakkunatapish uyarirkani kantaptinkuna. Tukuy sielipi kawsakkuna tukuy allpapi kawsakkuna tukuy atun yakukunapi kawsakkuna tukuy wañushka runakuna kantashpa willarkansapa:

“Akuychi chay kamachikukpa tiyarinanpi tiyaridu Tata Diosta chay Oveja Wawanta mana tukuyniyukta alabaypachi.

Paykuna sukaman alli kamachiwakninchikaptinkuna kushichishpa willaypachi sukaman allima kanankunata.”

¹⁴ Chashna tukuy Tata Dios rurashkan kawsakkuna kantaptinkuna chay chusku animalkunaka rimarkansapa: “Ñukaykunapish Tata Diosta Oveja Wawanta alabanisapa.” Chay ishkay chunka chusku kamachikuk ansianukunapish kunkurikushpa Tata Diosta Oveja Wawanta kuyarkansapa.

6

Oveja Wawan chay roskadu karapapa kanchis apichidunkunata llikirkan.

¹ Chaypina muskuyninipishina kawarkani chay Oveja Wawan chay roskadu karapapa kanchis apichidunkunamanta suk apichidunta llikiptin. Chayta llikiptin chay chusku animalkunamanta suk iden troynoshina sinchita kaparikushpa rimarkan: “¡Shamuy kawak!”

² Chashna kayawaptin kawarkani suk yurak kaballuta. Chay kaballuta montak runa makinpi suk balistata apaykarkan. Chaypina suk angel chay

runata suk koronata kurkan. Chay runaka tukuy makanakukmasinkunata makarkan. Chashna paykunata makashpankuna sinchi kamachikuk kiparirkan.

³ Chaymanta chay Oveja Wawan chay roskadu karapapa ishkaynin apichidunta llikiptin uyarirkani chay chusku animalkunamanta ishkaynin sinchita rimaptin: “¡Shamuy kawak!”

⁴ Chaypina kawarkani suk puka kaballuta llukshimuptin. Suk angel chay kaballu montadu runata willarkan allpaman rinanpa tukuy runakunata wakllichik. Chashna wakllichiptinkuna allita kawsaykashkankunamanta sukwana sukwana makanakushpa wañuchinakunkasapa. Chay angel chay runata suk atun ishkaynin ladupi filuyuk machetita kurkan.

⁵ Chaymanta chay Oveja Wawan chay roskadupa kimsaynin apichidunta llikiptin uyarirkani chay chusku animalkunamanta kimsaynin rimaptin: “¡Shamuy kawak!”

Chaypi suk yana kaballuta kawarkani. Chay yana kaballuta montak runapa makinpi suk balansa tiyarkan.

⁶ Chaymanta chay chusku animalkunapa chawpinkunamanta suk vosta uyarirkani chay kaballu montadu runata willaptin: “Yarkay tiempu tiyanka. Chayrayku suk kilu trigu suk diya trabajupa chanin. Kimsa kilu sebada suk diya trabajupa chanin. Ama mikuna wirata nima vinuta wakllichiychu.”

⁷ Chaymanta chay Oveja Wawan chay roskadu karapapa chuskuynin apichidunta llikiptin uyarirkani chay chusku animalkunamanta chuskuynin rimaptin: “¡Shamuy kawak!”

⁸ Chayta uyarishpayni suk killuyadu kaballuta kawarkani. Chay killuyadu kaballuta montadu runapa shutin karkan Wañuy. Chay runapa washanta shamurkan wañudukuna churanankunapi kamachikuk. Tata Dioska paykunata almitirkansapa tukuy runakunamanta chuskuynin partita unkuywan yarkaywan sakra animalkunawan wañuchinankunapa. Willarkansapa runakuna kikinkunapura makanakushpa wañuchinakunkunapa.

⁹ Chaymanta chay Oveja Wawan chay roskadupa pichkaynin apichidunta llikishkan oras atun altar sikipi aypa wañudu runakunata kawarkani. Chiknik runakuna chay runakunata wañuchirkansapa Tata Diospa rimananta yachachikuskankunaryaku.

¹⁰ Chay runakunaka Tata Diosta sukaman sinchita willarkansapa: “Kan, Tata Dios, sukaman sinchi kamachikuk kanki. Kanka sukaman allima kanki. Tukuy rimashkaykita ruranki. ¿Aykapiti allpapi mana alli rurak runakunata wañuchiwashkankunaryaku kastigakisapa?”

¹¹ Chaypina Tata Dioska chay wañuchidu runakunata sukta sukta yurak likidu llachapankunata kurkansapa. Willarkansapa suk tiempukan shuyanankunapa Jesukristuta sirvikmasinkunata paykunatashina wañuchinankunakaman.

¹² Chaymanta chay Oveja Wawan chay roskadu karapapa soktaynin apichidunta llikiptin allpa sinchita kuyurkan. Inti lutu llachapashina yana likidu tukurkan. Killapish yawarshina puka likidu tukurkan.

¹³ Chaymanta sukaman sinchita wayrapatin igo kaspipa llullu wayun urmakshina sielumanta allpakan luserukuna urmarkansapa. ¹⁴ Suk karapa rollanakukschina sielu chinkarkan. Chaymanta tukuy urkukuna tukuy ishlakuna kuyushpa chikan partiman suchurkansapa.

¹⁵ Chayta kawashpa tukuy allpapi kamachikuk runakuna machaykunapi sachakunapa urku rarkakunapi pakakurkansapa. Chaymanta awtoridarkuna soldadukunapa kamachikukninkuna aypa kullkiyuk runakuna tukuy laya atipak runakuna rantidu runakuna mana rantidu runakunapish sukaman manchakushpa machaykunapi pakakurkansapa.

16 Paykunaka chay urku rarkakunata chay atun rumikunata sukaman kaparishpa willarkansapa: “¡Nitiwashpa arkawaysapa chay atun tiyarinanpi tiyaridu Tata Dios ama kawanankunapa! Arkawaysapa chay Oveja Wawan ama piñakushpa kastigawanankunapa. **17** Tata Dios kastigakunan diyaka ñami chayamushkana. Mana ni pi chay kastigunmanta kishpinkachu.”

7

Juan Israelpa ayllunkunamanta aklladu runakunata kawarkan.

1 Tukuy chaykunata kawashkayniwasha muskuyninipishina kay allpapa chuskuntin ladunkunapi chusku shayaridu angelkunata kawarkani. Paykunaka wayrata sukaman sinchichiykarkansapa ama allpata nima yakukanata nima sachakunata wayrashpa wakllichinpana.

2 Chaymanta kawarkani chikan angelta inti llukshimunan partimanta shamuptin. Chay angelka mana tukuyniyukta kawsak Tata Diospa sellunta apaykarkan. Chaypina chay shamuk angelka chay allpata manllayba kochata wakllichik chusku angelkunata sinchita rimashpa willarkansapa: **3** “Manara Tata Diosninchita sirvik runakunapa urkunkunapi selluchashkanisaparachu. Chayrayku amara allpata nima sachakunata nima manllayba kochata wakllichichirachu.”

4 Chaypina uyarirkani mashnami chay selluchadu runakunaka. Jesukrista kreyik israel runakunapa ayllunkunamanta suk pachak chusku chunka chusku waranka selluchaðukuna karkansapa Tata Dios paykunata kuydanankunapa. **5** Judapa ayllumanta chunka ishkay waranka selluchadu runakuna karkansapa. Rubenpa ayllumanta chunka ishkay waranka karkansapa. Gadpa ayllumanta chunka ishkay waranka karkansapa.

6 Aserpa ayllumanta chunka ishkay waranka karkansapa. Neptalipa ayllumanta chunka ishkay waranka karkansapa. Manasespa ayllumanta chunka ishkay waranka karkansapa. **7** Simeonpa ayllumanta chunka ishkay waranka karkansapa. Levipa ayllumanta chunka ishkay waranka karkansapa. Isakarpa ayllumanta chunka ishkay waranka karkansapa.

8 Sabulonpa ayllumanta chunka ishkay waranka karkansapa. Josepa ayllumanta chunka ishkay waranka karkansapa. Benjaminpa ayllumanta chunka ishkay waranka selluchadu runakuná karkansapa.

Juan mana yupapya laya yurak llachapayuk runakunata kawarkan.

9 Chaymanta mana nima yupapya laya runakunata kawarkani. Chay appa runakunaka tukuy ayllukunamanta tukuy kastakunamanta tukuy laya rimanayukkunamanta tukuy llaktakunamanta karkansapa. Paykunaka Tata Diospa tiyarinan ñawpakinipi Oveja Wawanpa ñawpakinipi shayaridu karkansapa. Tukuy chay runakuna yurak likidu llachapayuk karkansapa. Makinkunapi polponta pankakunata aparkansapa Tata Diosta alabanankunapa. **10** Chaypina tukuy chay runakunaka sinchita rimashpa willarkansapa:

“Akuychi atun tiyarinanpi tiyaridu Tata Diosninchita alabaypachi. Chay Oveja Wawantapish alabaypachi.

Paykunaka uchanchikunamanta salvawashkanchisapa.”

11 Chay atun tiyarinanpa chay ansianukunapa chay chusku animalkunapa vueltashninipi tukuy angelkuna shayaridu karkansapa. Chaypina chay angelkunaka chay atun tiyarinan ñawpakinipi urkunkunawan allpakaman takakushpa Tata Diosta kuyarkansapa. **12** Willarkansapa:

“Chay appa runakunashina ñukanchikunapish Tata Diosninchita alabaypachi. Paytaka kushichishpa willaypachi sukaman allima kananta.

Sukaman tukuy laya alli yachak kaptin akuychi paytaka sukaman agrade-siypachi.

Sukaman tukuy laya atipak kaptin alli kamachikuk kaptin akuychi kuyay-pachi.

Mana tukuyniyukta payta alabashpa kawsaypachi.”

¹³ Chaypina chay ansianukunamanta sukka ñukata tapuwarkan: “¿Yachankichu pikunatí chay yurak llachapayuk runakuna? ¿Yachankichu maymantí shamushkasapa?”

¹⁴ Chashna tapuwaptin aynirkani: “Kanlla allita yachanki pikunami chay runakunaka nishpa.”

Chashna willaptini chay ansianuka willawarkan:

“Chay yurak llachapayuk runakunaka sukaman llakina tiempata pasarkansapa.

Chay Oveja Wawan wañushpa yawarninta icharkan.

Chay yurak llachapayuk runakunaka Oveja Wawanta kreyishpa paypa yawarninpi llachapunkunata takshakshina yurakyachishkasapa.

Chayrayku Tata Dios uchankunamanta perdonashkasapa.

¹⁵ Uchankunamanta perdonadu kashpana paykunaka shayaridusapa Tata Diospa tiyarinan ñawpaknинpi.

Diyapi tutapi Tata Diospa wasinpi payta sirvishpa kawsansapa.

Chayrayku tiyarinani pi tiyaridu Tata Dioska tukuy layapi yanapashpa amachankasapa.

¹⁶ Chashna Tata Dios amachaptinkuna manana nima yarkankasapanachu nima yakunayankasapanachu.

Nima rupay nanashpa rupachinkasapanachu.

Nima kaloryankasapanachu.

¹⁷ Chay Oveja Wawan Tata Diospa tiyarinan ñawpaknинpi shayaridu kashpa ovejakunata kuydakshina chay yurak llachapayuk runakunata kuy-dankasapa.

Paykunata pushankasapa yaku pachyamunanman chay yakuta upyashpa kawsanankunapa.

Wakaptinkuna Tata Dioska ñawinkunata chakichipunkasapa.”

8

Oveja Wawan roskadu karapapa kanchisnin apichidunta llikirkan.

¹ Chaymanta chay Oveja Wawanka chay roskadu karapapa kanchisnin apichidunta llikiptin medya orata sielupi chunlla tukurkan.

² Chaypina ñuka Juan kanchis kamachikuk angelkunata Tata Diospa ñawpaknинpi shayaridukunata kawarkani. Tata Dios chay kanchis angelkunata trompetankunata kurkansapa.

³ Chaymanta kawarkani chikan angelta kurimanta ruradu kusnichikuk kopata apamushpa shamuptin. Chaypina Tata Diospa ñawpaknинpi kuri-manta ruradu altarpa ladunpi chay angelka shayarirkan. Paypa tiyarkan aypa mishkilla asnak wiki chay kurimanta altarpi churashpa rupachinanpa. Chay mishkilla asnak wikita Tata Diosta kreyik runakunapa orasyonninkunawan paktallata rupachirkan. ⁴ Chaypina chay kopapi mishkilla asnak wiki rupaykakpa kusnin Tata Diosta kreyikkunapa orasyonninkunawan tantalla altuta rirkana. Chay kusni Tata Diósma ñawpakninkaman chayarkan.

⁵ Chaypina chay angelka chay altarmanta suk tipi pukalla killaminshata apishpa chay kopapi churashpa sielumanta allpaman wishchukumurkan. Chay killaminshata allpaman wishchukumuptin troynarkan bullakurkan lliyarkan. Chaymanta allpa kuyurkan.

Chay kanchis angelkuna trompetankunata pukurkansapa.

⁶ Chaypina chay kanchis angelkunaka prontanakurkansapa chay kanchis trompetankunata pukunankunapa.

⁷ Chaypina chay kallariknin angelka trompetanta pukurkan. Chayta pukuptin allpapi granius ninawan yawarwan chakrudu urmarkan. Ur-mamuptin tukuy allpamanta sachakunapa kiwakunapa kimsaynin parti ruparkan.

⁸ Chaymanta chay ishkaynin angel trompetanta pukurkan. Chayta pukuptin suk atun rawraykak urkushina chay manllayba kochapi ur-markan. Chay nina rawraykak urmamuptin chay manllayba kochamanta kimsaynin parti yaku yawar tukurkan. ⁹ Chay manllayba kochapi kawsak animalkunamanta kimsaynin parti wañurkansapa. Tukuy barkukunamanta kimsaynin parti kullurkansapa.

¹⁰ Chaymanta chay kimsaynin angelka trompetanta pukurkan. Chayta pukuptin kimsaynin parti yakukunapi, yaku pachyamunankunapi suk manllayba luseru rawraykak uchinashina sielumanta urmarkan. ¹¹ Chay luserupa shutin karkan Ayak. Chaypina kimsaynin parti yakukuna ayak likidu tukurkan. Apya runakuna chay ayak likidu yakuta upyashpanguna wañurkansapa.

¹² Chaymanta chay chuskuyin angelka trompetanta pukurkan. Chayta pukuptin kimsaynin parti inti killa luserukuna waklirkansapa. Chaypina manana allitana lusichikuptinkuna diya tutayarkan. Tutapish ashwan yana likidu tukurkan.

¹³ Chaymanta kawarkani suk wamanta sielupi pawaykaptin. Chay wamanka sinchita kaparikushpa rimarkan: “¡Alaw alaw alaw!” Tiyanra kimsa angelkuna trompetankunata pukunankunapa. Paykuna pukuptinkuna tukuy allpapi kawsakkuna sukaman sufrinkasapa.”

9

¹ Chaypina chay pichkaynin angelka trompetanta pukurkan. Chayta pukuptin kawarkani suk luseruta sielumanta allpaman urmaptin. Chaypina Tata Dioska chay allpaman urmamudu angelta kurkan supaya wickkanan manllayba uchku punkupa llavinta. ² Chaypina chay angelka chay manllayba uchkuta kicharirkan. Chayta kichariptin chay uchkumanta suk ornomanta kusni llukshimukshina altuta rirkan. Chay kusni intita wayrata arkashpa tutayachirkan.

³ Chay kusnimanta apya atun marukuna llukshishpa tukuy allpaman rirkansapa. Tata Dioska chay atun marukunata atipachirkansapa iden alakrashina tuksikunankunapa. ⁴ Chaymanta Tata Dios chay marukunata micharkansapa ama nima kiwakunata nima sachakunata nima ukshakunata wakllichinankunapa.

Willarkansapa Tata Diospa sellunwan mana urkunkunapi selluchadu runakunallata tuksinankunapa. ⁵ Tata Dioska chay marukunata willarkansapa runakunata ama wañuchinankunapa. Willarkansapa tuksishpa nanayta kushpalla pichka killata sukaman sufrichinankunapa. Chay marukuna runakunata tuksishpa sukaman sinchita nanachirkansapa alakra nanananshina.

⁶ Chay sufrinankuna tiempu runakuna wañuya munankasapa. Wañuya munaptinkunapish mana atipankasapachu wañuya. Wañunayashpapish marnara wañunkasaparachu.

⁷ Chay marukunaka kaballukuna makanakunankunapa prontanakudushina rikurirkansapa. Umankunapi kurimanta koronashina

tiyarkan. Uyankuna runakunapa uyankunashina rikurirkan.

⁸ Chukchankuna warmipashina rikurirkan. Kirunkuna pumapa kirunshina rikurirkan. ⁹ Fierrumanta ruradushina kuerpunta arkanankuna tiyarkan. Pawaptinkuna rikrankuna sukaman soyarkan aypa kaballukuna makanakunankunapa karrukunata aysakshina. ¹⁰ Chay marukunapa chupankunapi alakrapa lansetanshina punta likidu karkansapa. Chay punta likidu lansetankunawan atiparkansapa runakunata tuksiyta. Chashna tuksishpankuna pichka killata runakunata nanayta kurkansapa. ¹¹ Chay manllayba uchku marukunapa kamachikukninkuna shutinka hebreo rimanapi Abadon. Griego rimanapi shutinka Apolion. Chay shutika riman "Kulluchikuk".

¹² Ñami suk sufrina tiempu pasashkana. Ishkay sinchi sufrina tiempu illan.

¹³ Chaymanta soktaynin angelka trompetanta pukurkan. Chaypina ñuka Juan uyarirkani suk runashina rimakuptin. Payka Tata Diospa ñawpknnipi tiyak kurimanta ruradu altarpa chusku wakrankuna chawpinmanta rimakurkan. ¹⁴ Chay rimakukka chay soktaynin trompeta pukuk angeltaka willarkan: "Chay manllayba Eufrates yaku ladunpi chay chusku watadu angelkunata kachariy."

¹⁵ Chayta willaptinna chay angelka chay chusku watadu angelkunata kacharirkan. Kachariptin chay chusku angelkunaka allpaman rirkansapa kimsaynin parti runakunata wañuchik. Tata Dios chay angelkunata prontanachirkansapa chay ora chay diya chay killa chay wata chay runakunata wañuchinankunapa.

¹⁶ Chaymanta uyarirkani mashna kaballukunata montak soldadukuna tiananta. Ishkay pachak waranka waranka tiyarkansapa.

¹⁷ Muskuñinipishina chay kaballukunata kawarkani. Chay montak soldadukunapa kaskun arkanankuna ninashina rikurirkan. Jasintoshina ankash asufrißhina killu karkan. Kaballukunapa umankuna pumapa umanshina rikurirkan. Chaymanta chay kaballukunapa shiminkunamanta nina rawray kusniwan asufriwan llukshirkan. ¹⁸ Chay kaballukunapa shiminkunamanta nina rawray kusniwan asufriwan llukshirptin kimsaynin parti runakuna wañurkansapa. ¹⁹ Chay kaballukunaka shiminkunawan chupankunawan chay runakunata wañuchirkansapa. Chupankunaka machakuykunashina rikurirkan. Chay machakuykunashina umankunawan chay runakunata waklichirkansapa.

²⁰ Chay manara wañuk runakuna sukaman sufrishpankunapish mana nima wanashpankuna katirkansapalla mana allikunata ruraya. Supaykunata kuyayllapi katirkansapa. Kurimanta kullkimanta bronsementa rumimanta kaspimanta ruradu dioskunata kuyashpalla kawsarkansapa. Chay ruradu dioskuna mana atipansapachu kawakuya nima uyariyta nima puriya. ²¹ Chaymanta runamasinkunata wañuchiymanta ñakakuymanta mana wanarkansapachu. Chikan warmikunawan uchallikuyllapi suwakuyllapi kawsarkansapa.

10

Suk angel suk taksha killkadu roskadu karapata apamurkan.

¹ Tukuy chaykunata kawashkayniwasha kawarkani chikan alli atipak angelta sielumanta puyu ukunpi urayamuptin. Chay angelpa uman sawanpi suk chirapa tiyarkan. Uyanka intishina sukaman llipyarkan. Chankankuna rawraykak orkonkunashina rikurirkan. ² Chay angelka suk taksha killkadu karapa kichariduta makinpi aparkan. Alli ladu chakinwan manllayba kochapi sarukurkan. Lluki ladu chakinwan allpapi sarukurkan.

³ Chaypina chay angelka pumashina sinchita kaparirkana. Kapariptinna runa rimakunanshina kanchis kuti sinchita troynarkan. ⁴ Chashna chay kanchis troynokuna rimakushkanwasha ñuka Juan rimashkankunata kilkanayaykarkani. Chaypina uyarirkani sielumanta suk angel willawaptin: "Chay kanchis troynokuna rimashkankunata ama killkaychu ama ni pi yachanankunapa."

⁵ Chaypina chay manllayba kochapi allpapi shayaridu kawashkayni angelka alli ladu makinta altuta chutachirkana. ⁶ Chashna makinta altuta chutachishpa rimarkan: "Tata Dioska mana tukuy niyukta kawsan. Paymi sieluta allpata manllayba kochata rurarkan. Tukuy laya chaykunapi tiyakta rurarkan. Mananamí illannachu Tata Dios tukuy rimashkanta rurananpa. ⁷ Chay kanchisnin angel kallariptin trompetanta pukuya Tata Dioska ñawpamantapacha yuyashkanta rurankana. Payka ñawpa alli yachachikukkunata willashkanshina tukuy layata ruranka."

⁸ Chaypina chay sielumanta shamuk angelka ñuka Juanta kashkan willawarkan: "Rillary chay kicharidu roskaduta chaskik chay kochapi allpapi shayaridu angelpa makinmanta."

⁹ Chashna willawaptin rirkani chay angeltaka chay roskaduta mañak. Payka kuwashpa willawarkan: "Kay killkadu roskaduta mikuy. Mikuptiki shimikipi mishkishina ñukñuk kanka. Wiksaykipi ayak likidu tukunka."

¹⁰ Chay killkadu roskaduta chay angelmanta chaskishpayni mikurkani. Mikuptini shiminipi sukaman mishkishina ñukñuk likidu karkan. Chayta mikushkayniwashana wiksaynipi ayak likidu tukurkan.

¹¹ Chaypina chay angelka willawarkan: "Kanka tukuy llaktakunapi kawsak runakunata, tukuy chay runakunapa kamachikukninkunata, tukuy laya rimanayuk runakunata kashkan willanayki tiyan tukuy Tata Dios rimashkanta rurananta."

11

Tata Dios ishkay paypa parlachikuk runakunata kachamunka.

¹ Chaymanta suk angel suk kuska pintushina medidata ñukata kuwarkan. Chayta kuwashpa willawarkan: "Utkakushpa chay medidata apashpa rillary Tata Diospa wasinta medik. Kurimanta ruradu altartapish mediý. Chay wasipi Tata Diosta kuyak runakunata yupaysapa. ² Ama chay wasi pampata mediychu. Chay wasi pampapi chay mana jüdiyu runakuna yaykunkasapa. Paykunaka chusku chunka ishkay killata Tata Diospa Jerusalen llaktanta doyñuyashpa sarushpa wakllichinkasapa. ³ Ñukaka ishkay lutu llachapayuk yachachikuk runakunata kachasha. Chashna kachaptini chay ishkay yachachikuk runakuna chusku chunka ishkay killata runakunata yachachinkasapa uchankunamanta wanananankunapa."

⁴ Chay ishkay yachachikuk runakunaka chay ishkay olivos kaspishinami. Paykunaka chay ishkay velerokunashina kamachikuk Tata Diospa ñawpakninpí allpapi lusichikunsapa. Chashna lusichikushpankuna Tata Diospa rimananta yachachikunsapa.

⁵ Chaymanta suk runakuna chay ishkay yachachikukkunata wakllichinayaptinkuna paykunapa shimpinkunamanta nina llukshinka. Chay ninawan tukuy chiknik runakunata rupachishpa kulluchinkasapa. Tata Diospa rimananta yachachikuptinkuna chay mana kasukunayak runakuna ninawanshina wañunkasapa. ⁶ Chay ishkay yachachikukkunaka Tata Diospa rimananta yachachikuyta tukuchanankuna diyakaman atipankasapa tamyata michayta ama tamyamunanpa. Chaymanta atipankasapa

yakuta willayta yawar tukunarpa. Chaymanta mashna kuti munashpa atipankasapa manchakuna layata rurashpa allpapi kawsakkunata sufrichiyta uchankunamanta wanankunapa.

⁷ Chaymanta chay ishkay yachachikukkuna yachachikuyta tukuchaptinkuna supaykuna churadu manllayba uchkumanta suk manchana laya animalshina llukshimunka. Payka chay ishkay yachachikukkunata makashpa wañuchinkasapa. ⁸ Chashna wañuchishpankuna atun Jerusalen llakta kallipi kuerpunkunata wishchunkasapa. Chay llaktapi paykunapa kamachikukninta kruspi chakatashpwa wañuchirkansapa. Chay llaktapi kawsak runakuna sukaman mana alli rurak kaptinkuna chay Sodoma llaktapi kawsak runakunashina chay Egipto llaktapi kawsak runakunashina kawsarkansapa.

⁹ Chaymanta kimsa diya medyakaman tukuy partimanta tukuy ayllukenamanta tukuy chikan laya rimanayukkunamanta tukuy atun llaktakunamanta runakuna chay ishkay wañudukunata wishchudu kuerpunkunata kawankasapa. Paykunaka mana munankasapachu chay wishchudu kuerpunkunata pampanankunata. ¹⁰ Chay ishkay yachachikuk runakuna tukuy llaktakunapi kawsak runakunata sukaman sufrichishkankunaryku wañuptinkuna sukaman kushikunkasapa. Kushikuyinkunawan regalukanata sukwan sukwan kunakunkasapa.

¹¹ Chaymanta chay kimsa diya medya washan Tata Dioska chay ishkay wañudukunata kawsachimunka. Chashna Tata Dios kawsachimuptinkuna atarinkasapa. Chay runakuna chay ishkay kawsamudukunata kawashpankuna sukaman manchakunkasapa. ¹² Chaypina chay ishkay yachachikuk runakunaka uyarinkasapa sielumanta willamuptinkuna: "Kayman shamuychi." Chayta uyarishpankuna puyu ukunpi sielman rinkasapa. Sielman riptinkuna chay chiknik runakunaka kawankasapa. ¹³ Chashna sielman chay ishkay yachachikuk runakuna riykaptinkuna allpa sinchita kuyunka. Allpa sukaman kuyuptin chay aypa wasikunamanta sukkuna urmankasapa. Chay aypa wasikuna urmaptin kanchis waranka runakuna wañunkasapa. Chaypina wañuymanta kishpidu runakuna manchakuywan sielipi kawsak Tata Diosta alabankasapa.

¹⁴ Ñami ishkay sufrina tiempu pasashkana. Kimsaynin sufrina tiempu illan.

Chay kanchisinin angel trompetanta pukurkan.

¹⁵ Chaymanta chay kanchisinin angel trompetanta pukuptin aypa angelkuna sinchita rimarkansapa:

"Manana niman suk kamachikuk kay allpapi kamachikunkasapanachu. Kunanmantapacha Tata Diosninchika paymanta shamudu salvakuk wambranpish tukuy llaktakunapi kawsak runakunata kamachinkasapa.

Mana tukuuniyukta kamachikunankuna tiyan."

¹⁶ Chaypina chay ishkay chunka chusku ansianukunaka Tata Diospa ñawpaknippi tiyarinankunapi tiyaridu kashkankunamanta kumurayashpankuna Tata Diosta kuyarkansapa. ¹⁷ Tata Diosta kuyashpankuna willarkansapa:

"Kamachiwakninkuna Tata Dios, sukaman agradesiykisapa sukaman tukuy laya atipak kaptiki.

Kanka mana tukuuniyukta kawsashkanki.

Kunankaman kawsaykanki.

Sukaman tukuy laya atipak kashpa kallarishkanki kamachikuyta.

¹⁸ Tukuy llaktakunapi kawsak runakuna mana kasushunayashpa sukaman rabyakushkasapa.

Rabyakuptinkunapish kanpa piñakunayki diya ñami chayamushkana tukuy wañudukunata kastiganaykipasapa.

Chaymanta sirvishuk yachachikukkunata pagarankisapa allita rurashkankunaryku.

Kamachikuk mana kamachikuk runakuna kaptinkunapish tukuy allita kashuk kuyashuk runakunata pagarankisapa.

Chaymanta kanmi, Tata Dios, allpata wakllichik runakunata kulluchinkisapa.”

¹⁹ Chaypina kawarkani sielipi Tata Diospa atun wasinpa punkunta kicharinakuptin. Punkun kicharidu kaptin Tata Dios kamachikunankuna wakaychana kurimanta ruradu baulta kawarkani. Chashna oras sukaman llipyarkan bullakurkan troynarkan. Chaypina allpa sinchita kuyurkan. Aypa gronisukuna urmamurkan.

12

Juan suk almirana laya warmita suk millanapa laya machakuya kawarkan.

¹ Chaymanta ñuka Juan muskuyninipishina sielipi suk almirana layata kawarkani. Suk warmita intishina llipyak likidu llachapayukta kawarkani. Chakin kuskapi killata kawarkani. Umanpi chunka ishkay luserukunawan ruradu koronan tiyarkan. ² Chay warmika okupada kashpa wawayanayashpa nanaywan sukaman kaparikurkan.

³ Chaymanta sielipi chikan manchakuna layata kawarkani. Suk manllayba manchanapa laya puka likidu machakuytashina kawarkani. Chay manllayba machakuya kanchis umayuk chunka wakrayuk karkan. Chay kanchisnintin umankuna koronayuk karkansapa. ⁴ Chay machakuya chupanwan sielumanta kimsaynin parti luserukunata aysamushpaa allpaman wishchukumurkan. Chaymanta shayarirkan chay wawayanayak wärmipa ñawpaknippi wawan nasiptin mikunarpa.

⁵ Chaypina chay warmika suk ullku wambrata wawayarkan. Chay wawanka suk fierrumanta ruradu varawan tukuy llaktakunamanta runakunata sinchita kuskata kamachinkasapa. Chay manllayba machakuyama chay wambrata mikunanpa Tata Dios ladunman pusharkan paywan tantalla kamachikunarpa. ⁶ Tata Dios chay wambrata pushaptin chay warmika suk chunlla chakidu pampaman nitikurkan. Chay chakidu pampapi Tata Dios suk alli kawsanata rurarkan chaypi waranka ishkay pachak sokta chunka diyata karachinanpa.

⁷ Chaymanta sielipi sinchita makanakurkansapa. Angelkunapa kamachikunkinkuna Miguel tukuy angelninkunawan tantalla chay manllayba machakuywan makanakurkansapa. Chay manllayba machakuypish supayninkunawan tantalla Tata Diospa angelninkunawan makanakurkansapa. ⁸ Chashna makanakushpankuna chay machakuya tukuy supayninkunawan mana atiparkansapachu angelkunata kallpachiyta. Angelkunaka supaykunata makashpa sielumanta karkurkansapa amana chaypi yaykunankunapa. ⁹ Chay kamachikuk angel Miguelka chay machakuytaka tukuy supayninkunatapish kallpachishpa sielumanta allpaman wishchukumurkansapa. Chay machakuya kay allpa kallarinanmantapacha tukuy runakunata llullachishpa kawsan ama Tata Diosta kreyinankunapa. Chay machakuya shutinka Satanasmii.

¹⁰ Chaymanta sielipi aypa runakunata uyarirkani sinchita rimaptinkuna:

“Diyapi tutapi Satanas wawkinchikunata Tata Diospi chatakurkansapa. Kunanka Tata Dioska chay kreyikukmasinchikunata perdonashkasapa amana paykunata chatakunankunapana.
 Tata Dios sukaman tukuy laya atipak Kashpa
 kunan sielumanta chay chatakukta wishchukumushka.
 Tata Diosninchika ñami tukuy runakunatana allita kamachinsapa.
 Chaymanta salvakuk wambran Jesukristuta willarkan tukuy layapi ka-machikunapana.

11 Jesukristu oveja wawanshina wañushpa yawarninta ichashkanrayku
 Tata Dios payta kreyik runakunata perdonansapa.
 Chayrayku chay chatakuk Satanasta manana kasunsapanachu.
 Chaymanta Jesukristuta kreyik runakuna mana Satanasta manchash-pankuna nima kasushpankuna rimansapa Jesus salvakuk kananta.
 Chashna rimashpankuna mana nima wañuya mancharkansapachu.

12 Chayrayku kankuna, sielipi kawsakkuna, sukaman kushikuychi.
 Kankuna, allpapi kochapi kawsak runakunata,
 sukaman llakichiyichi.
 Chay supaykunapa kamachikukninka allpaman ñami urayashkana.
 Payka yachan utkana Tata Dios kastigananta.
 Chayrayku sukaman piñakushpa padesichishuykankichi.”

13 Chayta uyarishkayniwasha kawarkani chay manllayba machakuya allpaman wishchumudu Kashpa chay wawayadu warmita sukaman padescihiptin. **14** Chashna padescihiptin Tata Dioska chay warmitaka ishkay atun wamanpa rikrankunata kurkan. Chay rikrankunawan pawashpa chay manllayba machakuymanta kishpishpa chunlla pampaman nitikurkan. Chay chunlla pampapi Tata Dios chay warmipa kawsananta allicharkan chaypi kimsa wata sokta killata karachinanpa.

15 Chayta kawashpa chay machakuya shiminmanta aypa yakuta wishchurkan chay manllayba kalppak yakuwan chay warmita urayachinanpa. **16** Chashna chay machakuy shiminmanta manllayba kalppak yakuta wishchuptin allpa chay warmita yanapashpa yakuta shakarkan. **17** Chaypina chay manllayba machakuya chay warmita mana nimanachiya atipashpa sukaman rabyarkan. Rirkana chay warmipa mirakninkunawan makanakuk. Chay mirakninkunaka Tata Diospa kamachikunankunata Jesukristupa yachachikunanta allita kasushpa kawsansapa. **18** Chaypina chay machakuy rabyashpa chay manllayba kocha mañanpi shayarirkan.

13

Juan ishkay manchana laya animalkunatashina kawarkan.

1 Chaymanta ñuka Juan muskuyninipishina kawarkani suk manchana laya animaltashina chay manllayba kochamanta llukshiptin. Chay animalka kanchis umayuk chunka wakrayuk karkan. Chunkantin wakrankuna koronayuk karkansapa. Chay kanchis umankunapi Tata Diosta rabyachinanpa killkadu shutinkuna tiyarkan. **2** Chay kawashkayni manchana laya animalka yana pumashina karkan. Chakinkuna ishnachi chakinshina rikurirkana. Shimin pumapa shiminshina rikurirkana. Chaypina chay manllayba machakuya chay manchana laya animalta sukaman yanaparkan sinchi kamachikuk kanapana.

3 Chay kanchis umayuk animalpa suk umanpi wañunanpa laya kuchudu karkan. Wañunanpa laya kuchudu kashpapish alliyarkan. Chayta kawashpa tukuy runakuna sukaman almirashpa payta kreyishpa katirkansapa. **4** Chay

runakunaka chay manllayba machakuya kuyarkansapa chay manchana laya animalta tukuy layapi atipachiptin. Chay manchana laya animaltapish kuyarkansapa. Kuyashpa rimarkansapa: "Mana ni pi payshina tukuy layata atipanchu runayta. Mana ni pi paytaka atipankachu makayta."

⁵ Chaymanta chay manllayba machakuya chay manchana laya animalta almitirkan Tata Diosta rabyachishpa washanchashpa rimananpa mana alli kananta. Chaymanta yanaparkan chusku chunka ishkay killata sinchita kamachikunapa.

⁶ Chashna almitiptin chay manchana laya animalka Tata Diosta suka-man rabyachishpa washanchashpa rimarkan mana alli kananta. Chaymanta Tata Dios kawsanan wasita sielipi kawsakkunata washanchashpa willarkansapa mana alli kanankunata.

⁷ Chaymanta chay manllayba machakuya chay manchana laya animalta almitirkan Tata Diosta kreyik runakunawan makanakushpa makanankunapa. Chaymanta yanaparkan tukuy ayllukunamanta tukuy atun llakたく namanta tukuy laya rimanayuk runakunata kamachinankunapa. ⁸ Chashna sinchi kamachikuk kaptin tukuy allpapi mana Tata Diosta kreyik runakuna payta kuyarkansapa. Tata Dios allpata rurashkanmantapacha tukuy kreyikuk runakunapa shutinkuna chay wañuchidu Oveja Wawanpa librunpi killkadu. Chay librupi chay manchana laya animalta kuyak runakunapa shutinkuna manami killkaduchu.

⁹ Tukuy willashkaynita allita rinrillikushpa uyariyichi:

¹⁰ "Tata Diosta kreyishkaykichirayku karselman rinaykichi kaptinka kushikushpalla mana llakishpa rillaychi.

Ishkay ladu filuyuk machetiwan wañuchishunaykichi kaptinka kushikushpalla mana llakishpa almitiychi wañuchishunaykichipa."

Chashna Tata Diospa killkadun rimaptin kankuna sufrishpay-kichipish Jesukristullata kreyishpa kawsanaykichi tiyan.

¹¹ Chaymanta ūuka Juan kawarkani chikan manchana laya animal-tashina allpamanta llukshimuptin. Chay manchana laya animalpa ti-yarkan ishkay wakrankuna iden ovejapa wakrankunashina. Payka manllayba machakuysina llullakushpa rimakurkan. ¹² Chay wañunarpa laya kuchudumanta alliyadu animalpa ūawpakniipi kashpa payshina sinchi kamachikuk karkan. Tukuy allpapi kawsak runakunata willarkansapa chay alliyadu animalta kuyanankunapa.

¹³ Chay animalka aypa almirana layakunata rurarkan runakuna kawanankunapa. Sielumanta allpakaman ninatapish urmachimurkan.

¹⁴ Payka chay alliyadu animalpa ūawpakniipi almirana layakunata rurashpa atiparkan tukuy allpapi kawsak runakunata llullachiyta. Chaypina runakunata willarkansapa chay ishkay filuyuk machetiwan kuchudumanta alliyadu animalpa figuranta ruranankunapa chayta kuyanankunapa.

¹⁵ Chay figurata ruraptinkuna Tata Dios chay ishkaynin manchana laya animalta almitirkan chay figura iden kawsakshina rimakuya ati-papanpa. Chay figura atipashpa rimakuya rimarkan tukuy payta mana kuyak runakunata wañuchichinankunapa. ¹⁶ Chaymanta willarkansapa tukuy runakunata selluchanankunapa sukkunata alli ladun makinkunapi sukku-nata urkunkunapi. Willarkansapa tukuy kamachikuk mana kamachikuk runakuna, aypa kullkiyuk mana kullkiyuk runakuna, rantidu mana rantidu runakuna selluchadu kanankunapa.

¹⁷ Chay alliyadu manchana laya animalka willarkan suk runakuna sel-lunwan selluchadu kanankunapa, suk runakuna shutinwan selluchadu

kanankunapa, suk runakuna shutinpa numerunwan selluchadu kanankunapa. Runakuna mana selluchadu kashpankunaka mana nimata rantiyta nimata rantikuya atiparkansapachu.

¹⁸ Kankuna entiendinayashpaykichi allita yuyaychi ama chay manchana laya animal llullachishunaykichipa. Chay animalpa numerunka runakunapa numerunmi. Chay numerunka sokta pachak sokta chunka soktami.

14

Juan uyarirkan Tata Diosta kreyik runakunata suk mushuk kantuta kaptinkuna.

¹ Chaymanta ñuka Juan muskuyninipishina chay Oveja Wawanta chay Sion urkupi shayariduta kawarkani. Paywan tantallata suk pachak chusku chunka chusku waranka runakunata kawarkani. Paykunapa urkunkunapi chay Oveja Wawanpa shutin Tatanka shutin killkadu karkansapa.

² Chaypina uyarirkani sielumanta suk ruyduta yaku urmanashina sinchi troynoshina soynaptin. Chay ruydu aypa arpakanata takaptinkuna soynak-tashina uyarirkani.

³ Chaypina Tata Diospa atun tiyarinanpa ñawpaknippi, chay chusku animalkunapa ñawpaknippi, chay ishkay chunka chusku ansianukunapa ñawpaknippi chay aypa runakunaka suk mushuk kantuta kantarkansapa. Jesukristu tukuy allpapi kawsak runakunamanta akllashpa chay pachak chusku chunka chusku waranka runakunata uchankunamanta salvarkansapa. Chayrayku paykunalla atiparkansapa chay mushuk kantuta yachakuya kantanankunapa. ⁴ Chay Tata Diosta kreyik runakunaka mana warmikunawan uchallikushpachu kawsarkansapa. Chay Oveja Wawanta maytapish riptin katirkansapa. Chayrayku payka tukuy allpapi kawsak runakunamanta paykunata uchankunamanta salvarkansapa payllata Tata Diosllata sirvishpa kawsanankunapa. ⁵ Chashna Tata Diosllata sirvishpa kawsashpangkuna mana yachansapachu llullakuya. Mana ni pi Tata Diospi paykunata atipanchu chataysapata.

Juan kimsa avisakuk angelkunata kawarkan.

⁶ Chaymanta ñuka Juan kawarkani suk angelta sielipi pawaykaptin. Payka Tata Diospa mana tukuyniyuk alli rimananta yachachikurkan. Tukuy allpapi kawsak runakunata, tukuy llaktakunapi kawsak runakunata, tukuy kastakunata, tukuy laya rimanayuk runakunata yachachirkansapa. ⁷ Chay angelca sinchita rimarkan: “Ñami oraka chayamushkana Tata Dios tukuy runakunata willanankunapa pimi allita rurashka pimi mana allita rurashka nishpa. Chayrayku Tata Diosta manchashpa alabaychi. Tata Dioska tukuy sieluta allpata manllayba kochata tukuy yaku llukshimunankunata rrarkan. Chayrayku payllata kushichishpa kuyaychi.”

⁸ Chashna chay angel rimashkanwasha ishkaynin angel shamushpa rimarkan: “Chay manllayba Babilonia llaktaka ñami kullushkana. Ñami kullushkana. Chay llaktapi kawsak runakunaka tukuy allpapi kawsak runakunata sukaman yachachirkansapa uchallikushpa kawsanankunapa.”

⁹⁻¹⁰ Chay ishkaynin angel rimashkanwasha kimsaynin angel shamushpa sinchita rimarkan: “Tata Dioska sukaman piñakushpa chay manchana laya animalta kuyak runakunata chay figuranta kuyak runakunata kastigankasapa. Tukuy urkunpi makinpi manchana laya animalpa sellunta chaškik runakunatapish kastigankasapa. Chayta kawashpa Oveja Wawan tukuy angelninkunawan rimankasapa alli kananta Tata Dios kastigashkankunata.

Paykunapa ñawpagninkunapi chay runakuna asufriwan rawraykak ninapi sukaman sufinkasapa.

¹¹ Chashna Tata Dios kastigaptinkuna chay manchana laya animalta kuyak runakuna, figuranta kuyak runakuna, sellunta chaskik runakuna mana tukuyiyukta sufinkasapa. Mana samashpa diyapi tutapi chay asufriwan rawraykak ninapa kusnинwan sufinkasapa.”

¹² Kankuna chay kimsa angelkunapa rimananta kasushpa animukuychi. Tata Diospa wambrankuna kashpaykichi paypa kamachikunankunata allita kasushpa kawsaychi. Sufrishpaykichiipish Jesukristullata allita kasushpa kawsaychi.

¹³ Chaymanta ñuka Juan uyarkani sielumanta willamuaptin: “Kay alli rimanata killkay. Kunanmantapacha Jesukristuwan tantalla kawsak runakuna wañushpankuna sukaman kushikunkasapa.”

Chashna willamuaptin Tata Diospa Espiritun willawarkan: “Ariya. Chay runakuna Jesukristuta sirviyakashpankuna wañushpa trabajunkunamanta samankasapa.”

Juan kawarkan Tata Dios tukuy mana alli rurak runakunata kastiganankunata.

¹⁴ Chaymanta ñuka Juan suk yurak puyuta kawarkani. Chay puyu sawanpi iden suk tiyaridu runata kawarkani. Paypa umanpi kurimanta ruradu korona tiyarkan. Makinpi suk atun wiksu pallakunapa macheti tiyarkan.

¹⁵ Chaypina Tata Diospa manllayba wasinmanta suk angel llukshimurkan. Payka sinchita rimashpa chay puyu sawanpi tiyaridu runata willarkan: “Allpapi murukuna ñami pukuduna pallanaykipa. Chayrayku rillay chay pallakunapa wiksu machetikiwan pallakuk.”

¹⁶ Chashna chay angel willaptinna chay puyu sawanpi tiyaridu runaka kay allpaman shamurkan wiksu machetinwan murukunata tipishpa pallakuk.

¹⁷ Chay runa pallashkanwasha sielupi Tata Diospa wasinmanta suk angel llukshimurkan. Chay angelpish pallakunapa suk wiksu alli filuyuk machetita aparkan.

¹⁸ Chaymanta altarmanta chikan angel llukshimurkan. Payka chay altarpini nata kamachik angel karkan. Payka chay wiksu pallakunapa alli filuyuk machetita apak angelta sinchita willarkan: “Chay wiksu machetikiwan allpapi uva chakrakunamanta tukuy uvakunata pallay. Tukuy chay uvakunaka ñami pukuduna.”

¹⁹ Chashna willaptinna chay angelka allpaman shamushpa wiksu pallakunapa machetinwan uva chakrakunapi uvakunata pallarkan. Tukuy chay uvakunata churarkan suk atun aspidu uchkupi chaypi kapinankunapa. Tukuy chaykuna entiendichiwanchisapa Tata Dios tukuy mana alli rurak runakunata sukaman sinchita kastiganankunata. ²⁰ Chay uchkuka chay llakta washapi karkan. Chaypina chay uvakunata kapiptinkuna yawarshina ichakumurkan. Chay yawar ichakushpa kimsa pachak kilometrua kaballukunapa kunkan sikkaman chayarkan.

15

Juan kawarkan sielupi Tata Diospa wasinmanta kanchis kastigakuk angelkuna llukshimuptinkuna.

¹ Chaymanta ñuka Juan muskuyninipishina sielupi sukaman manchakuna almirana layata kawarkani. Kanchis angelkuna llukshimurkansapa tukuy mana alli rurak runakunata sukaman kastiganankunapa. Chashna kastigaptinkunara Tata Dios manana rabyankanachu.

² Chaypina suk manllayba llipyak vidroshina kochata kawarkani. Rawraykak ninawanshina chakrudu rikurirkana. Chay llipyak kocha mañanpi aypa runakuna Tata Dios kushkankuna arpakanawan shayaridu karkansapa. Paykunaka chay kuchudumanta alliyadu manchana laya animalta mana kuyarkansapachu. Nima chaypa ruradu figuranta kuyarkansapachu. Nima chay animalpa shutinpa numerunwan selluchadu karkansapa.

³ Chay runakunaka Tata Diosta sirvik Moisespa kantunta chay Oveja Wawanta kuyashpa kashna kantarkansapa:
“A, Tata Dios, tukuy rurashkaykika sukaman almirana layami.
Kanka tukuy layata atipanki rurayta.”

Sukaman allita rurashpa mana llullakushpa kanlla tukuy llaktakunapi kawsak runakunata kamachinkisapa.

⁴ Kanllami sukaman allima kanki.

Chayrayku tukuy runakuna kanllata manchashunayki tiyan.

Tukuy runakuna kanllata alabashunayki tiyan.

Tukuy llaktakunapi kawsak runakuna kawankasapa alli rurak kanaykita.
Chayrayku kanman rinkasapa kuyashunankunapa.”

⁵ Chaymanta kawarkani sielupi Tata Diospa wasin ukupi paywan tinku-nakuna kuarta kicharinakuptin. ⁶ Chay kuartumanta chay kanchis kasti-gakuk angelkunaka llukshimurkansapa. Paykunapa llachapankuna suka-man yurak llipyak likidu karkansapa. Kaskunkunapi kurimanta ruradu chumbinkuna tiyarkan.

⁷ Chaypina Tata Diospa ñawpkninpí chay chusku animalkunamanta sukka chay kanchis angelkunata sukta supta kurimanta ruradu kopakunata kurkansapa. Chay kopankunamanta talliptinkuna mana tukuy niyukta Tata Dios mana alli rurak runakunata sinchita kastigankasapa. ⁸ Chaypina tukuy laya atipak Tata Diosmanta suk kusni shamurkan tukuy wasinta untachik. Chashna Tata Diospa wasin kusniwan untaptin chay kanchis angelkuna kastigakuya tukuchanankunakaman mana ni pi atiparkanchu yaykuya.

16

Juan kawarkan chay kanchis kastigakuk angelkunata kopankunata talliptinkuna.

¹ Tukuy chayta kawashkayniwasha ñuka Juan muskuyninipishina suk angelta uyarirkani. Payka Tata Diospa wasinmanta llukshishpa chay kanchis kastigakuk angelkunata willarkansapa: “Rillarychi chay kanchis kopaykicha allpapi tallik Tata Dios mana alli rurak runakunata sukaman sinchita kastiganankunapa.”

² Chashna willaptinkuna chay kallariknin angelka rirkan allpapi chay kopanmanta Tata Diospa kastigunta tallik. Chaypina chay kuchudumanta alliyadu animalpa figuranta kuyak runakuna, paypa sellunwan selluchadu runakuna mana alliyanayak sinchi nanak kiriwan unkurkansapa.

³ Chaypina chay ishkaynin angelka manllayba kochapi kopanmanta Tata Diospa kastigunta tallirkan. Chayta talliptinna chay manllayba kochaka iden wañuchidu runapa yawarninshina tukurkan. Chashna yawar tukuptin tukuy chay yakupi kawsak animalkuna wañurkansapa.

⁴ Chaypina chay kimsaynin angelka tukuy yakukunapi tukuy yaku pachyamunankunapi kopanmanta Tata Diospa kastigunta tallirkan. Chashna talliptinna tukuy chay yakukuna yawarshina tukurkan.

⁵ Chay washa uyarirkani yakukunata kamachik angel Tata Diosta willaptin:

“A, Tata Dios, kanlla alli rurak kanki.

Mana tukuuniyukta kawsak kanki.

Kunankaman kawsaykanki.

Yakukunata yawartashina rurashpayki allita rurashkanki.

6 Mana alli rurak runakuna

kanpa wambraykikunata rimanaykita yachachikukkunata yawarninkunata ichachishpa wañuchirkansapa.

Chayrayku kunanka chay wañuchikuk runakunata yawarta upyachishkankisapa.

Chashna kastigashpayki allita rurashkanki.”

7 Chashna chay yakukunata kamachik angel Tata Diosta willaptin uyarirkani chay atun altarmanta rimakuptin:

“Ariya kanmi, Tata Dios, sukaman tukuy laya atipak kanki.

Chashna chay mana alli rurak runakunata kastigashpayki allita rurashkanki.”

8 Chaymanta chay chuskuynin angelka inti sawanpi kopanmanta Tata Diospa kastigunta tallirkan. Chaypina intika sukaman nanashpa chay runakunata sukaman sinchita rupachirkansapa. **9** Chashna sukaman rupachidu kashpankunapish chay runakunaka mana Tata Diosta kasunaykansapachu. Mana nima uchankunamanta wanarkansapachu Tata Diosta alabanankunapa. Tata Dios paykunata kastigashkankunaryaku sukaman washanchashpa rimarkansapa mana alli rurak kananta.

10 Chaypina chay pichkaynin angelka chay manchana laya animalpa kamachikunan tiyarinanpi kopanmanta Tata Diospa kastigunta tallirkan. Chay tiyarinanpi kopanmanta talliptin tukuy chay manchana laya ani-malta kasuk runakunapa llaktankuna tuta likidu tukurkan. Chaypina chay runakuna sukaman manchakuywan nanaya mallirkansapa. Nanaywan kallunkunata mukurkansapa. **11** Chay nanaya mallishpankunapish uchankunamanta mana wanayanaykansapachu. Paykunaka chay nanaywan chay mana alliyanayak kiriwan sufriishpankunapish sielipi kawsak Tata Diosta sukaman washanchashpa rimarkansapa mana alli rurak kananta.

12 Chaymanta chay soktaynin angelka chay atun Eufrates yakupi kopanmanta Tata Diospa kastigunta tallirkan. Chaypina chay manllayba yakuka chakirkan aypa kamachikuk runakuna soldadunkunawan inti llukshimunan partimanta shamunankunapa.

13 Chaypina ñuka Juan kawarkani kimsa millanapa laya sapushina rikurik supaykunata. Suk supayka chay manllayba machakuypa shiminmanta llukshimurkan. Ishkaynin supayka chay manchana laya animalpa shiminmanta llukshimurkan. Kimsaynin supayka chay mana alli yachachikuk ishkaynin manchana laya animalpa shiminmanta llukshimurkan. **14** Chay kimsa supaykunaka aypa almirana milagrukunata rurarkansapa. Chayta rurashpankuna rirkansapa tukuy allpapi kamachikukkunata aypa runakunawan tantanachik tukuy laya atipak Tata Dioswan makanakunankunapa.

15 Chaypina uyarirkani Jesukristu rimaptin: “Mash uyariwaychi. Mana ni pi yuyashkan ora suwa runashina ñukaka shamusha. Shamuptini kankuna allita kasuwashpa kawsashpaykichi sukaman kushikunkichi. Mana prontanakudu shuyawashpaykichiha ñuka shamuptini iden llatanlashina pinkakunaykichi tiyan.”

16 Chaymanta kawarkani suk pampapi chay kimsa supaykuna tukuy allpapi kamachikukkunata aypa runakunawan tantanachiptinkuna. Chay pampapa shutin hebreo rimanapi Armajedon.

¹⁷ Chaypina chay kanchisnin angelka kopanmanta Tata Diospa kastigunta wayrapi tallirkan. Chashna wayrapi talliptin uyarirkani Tata Dios sielupi wasinmanta kamachikunan tiyarinanmanta sinchita rimakuptin: "Kaywan tukuchashkani mana alli rurak runakunata kastigaya."

¹⁸ Chashna Tata Dios rimaptinna sukaman llipyarkan troynarkan. Chaypina allpa sukaman kuyurkan. Kay allpapi runakuna kawsashkankunamantapacha mana chay layata allpa kuyurkanchu. ¹⁹ Chashna allpa sukaman sinchita kuyuptin chay manllayba llakta kimsa partipi llikikurkan. Chaypina allpapi llaktakunapi wasíkuna urmarkansapa. Tata Dioska chay Babiloniapi kawsak runakunapa mana alli rurashkankunata mana kunkarkanchu. Chayrayku sukaman piñakushpa sukaman sinchita kastigarkansapa.

²⁰ Chashna allpa kuyuptin tukuy ishlakuna tukuy urkukuna sumishpa chinkarkansapa. ²¹ Chaypina sielumanta runakunapa sawanpi manllayba grانisukuna urmamurkan. Chay grانisukuna chusku chunka kiluta llasharkansapa. Chashna Tata Dios sukaman kastigashkankunaryku chay runakuna payta sukaman washanchashpa willarkansapa mana alli rurak kananta.

17

Juan suk waynandera likidu warmita kawarkan.

¹ Chaymanta chay kanchis kopankunata tallik angelkunamanta suk shamurkan ūuka Juanta willawak: "Mash shamuy. ūuka kawachishkayki Tata Dios aypa yakukunapi tiyariyu waynandera warmita kastigaptin. ² Chay warmika tukuy allpapi kamachikuk runakunata yachachirkansapa Tata Diosta washanchashpa ruradu dioskunata kuyanankunapa. Chay runakuna chay ruradu dioskunata kuyashpangkuna chay waynandera warmiwanshina uchallikuykansapa. Chashna paywan uchallikushpa machadu runakunashina kawsansapa."

³ Chashna chay angel willawaptin Tata Diospa Espiritun muskuyninipishina suk almirana layata kawachiwarkan. Chay angelka suk chunlla partiman pushawaptin chay warmita kawarkani manchana laya puka animal montaduta. Chay puka animalka kanchis umayuk chunka wakrayuk karkan. Paypa tukuy kuerpunpi Tata Diosta chiknishpa washanchak killkadu shutikuna tiyarkan.

⁴ Chay warmipa llachapan pukawan sani karkan. Chaymanta kuriwan, allima llipyak rumiwan, yurak perlaswan sumachidu karkan. Makinpi kurimanta ruradu atun kopa tiyarkan. Chay kopaka millanapa layakanawan untachidu karkan. Chay millanapa layakuna yuyachiwanchi chay warmi sukaman uchallikushpa aypa runakunata yachachinanta ruradu dioskunata kuyanankunapa.

⁵ Chaymanta urkunpi suk mana entiendinapa laya shutin killkadu karkan. Chay killkaduka rimarkan: "ūuka kani tukuy laya atipak Babilonia. Tukuy waynanderakunapa mamankuna kani. Tukuy allpapi ruradu dioskunata kuyak runakunapa mamankuna kani."

⁶ Chay warmika Jesukristuta kreyik runakunata paypa rimananta par-lachikukunata sukaman chiknishpa wañuchirkansapa. Chaypina entiendirkani paykunapa yawarninkunata ichashpa sukaman kushikunanta. Chashna yawarninkunata kushikushpa ichashpa machadushina kawsan. Tukuy chayta kawashpayni sukaman manchakurkani.

⁷ Chaypina chay chunlla partiman pushawak angelka willawarkan: "Jmaraykutí sukaman manchakunki? Kunanka yachachishkayki pimi chay

warmika nishpa. Chaymanta yachachiyki imami chay warmita pushak kanchis umayuk chunka wakrayuk manchana laya animalka nishpa.⁸ Chay manchana laya kawashkayki animalka ñawpa kawsak karkan. Kunanka manana allpapinachu kawsan. Chaymanta manarapish Tata Dios allita kulluchiptin supaykuna churadu manllayba uchkumanta llukshimunka. Chashna llukshimuptin tukuy mana Tata Diosta kreyinayak runakuna payta kuyankasapa. Chay manchana laya animal mana allpapi kawsananmanta kashkan kawsamuptin aypa runakuna sukaman almirashpa kuyankasapa. Allpata rurashkanmantapacha Tata Diospa librunpi chay animalta kuyak runakunapa shutinkuna mana killkaduchu.”

⁹ Chaymanta chay angelka yachachiwayllapi katirkan: “Tata Dios runaku-nata yachachiptinkunara atipansapa kay yachachiykanaynita entienditya. Chay manchana laya animalpa kanchis umankunaka kanchis urkukunashinami. Chay warmika chay kanchis urkukuna sawanpi kawsan. Chaymanta chay kanchis urkukunaka Tata Diosta chiknik kanchis kamachikkunashinami.

¹⁰ Chay kanchis sinchi kamachikkunkunamanta pichka manana kamachikunsapanachu. Kunanka soktaynini kamachikuykan. Kanchisnin manara kamachikuykanrachu. Chay kanchisnin kamachikukka shamushpa mana unaytachu kamachikunka. ¹¹ Chaymanta chay mana kawsananmanta kashkan kawsamuk manchana laya animalka pusaknin kamachikukmi. Payka chay kanchis kamachikkunkunashina Tata Diosta sukaman chiknin. Chashna kashkan kawsamushpa kamachikuptinpish Tata Dioska allita kulluchinka.

¹² Chay kawashkayki manchana laya animalpa chunka wakrankunaka chunka sinchi kamachikkunkunami. Paykunaka manara kamachikunsaparachu. Chay manchana laya animalwan tantalla suk tiempullata kamachikunkasapa. ¹³ Chay chunka kamachikkunkunaka idenllata yuyaykushpankuna chay manchana laya animalta willarkansapa paykunapa kamachikunkinkuna kananpa.

¹⁴ Tukuy chay kamachikkunkuna Oveja Wawanwan makanakunkasapa. Chaypina Oveja Wawanka tukuy payta allita kreyikkunawan Tata Diospa akllaškankunawan tantalla chay chunka kamachikkunkunata makankasapa. Chay Oveja Wawanka tukuy sinchi kamachikkunkunamanta ashwan sinchi kamachikukmi. Payka tukuy awtoridarkunamanta ashwan sinchi awtoridarni. Chayrayku tukuy kamachikkunkunata makankasapa.”

¹⁵ Chaymanta chay angel yachachiwayllapi katirkan: “Chay waynandera warmita yaku sawanpi tiyariduta kawashkanki. Chay tiyarinan yakuka rikchak laya rimanayuk aypa llaktakunapi kawsak runakunami.

¹⁶ Chaymanta chay kawashkayki manchana laya animalpa chunka wakrankunaka Tata Diosta chiknik kamachikkunkunami. Paykunaka chay waynandera warmita chikninkasapa tukuy layayuk kaptin. Payta chiknishpa tukuy llachapanta tukuy imankunata kichushpa llatanllata sakishpa aychanta mikunkasapa. Puchushkankunata rupachinkasapa.

¹⁷ Tata Dios chay chunka kamachikkunkunapa shunkunkunapi yuyachiptinkuna chay waynandera warmita kulluchinkasapa. Tata Dios yuyachiptinkuna chay chunka kamachikkunkuna idenllata yuyaykushpa chay manchana laya animalta willankasapa kamachikkunkinkuna kananpa. Tata Dios rimashkanta ruranankaman chay animalka kamachikunka. ¹⁸ Chay kawashkayki waynandera warmika chay manllayba kamachikuk llaktami. Tukuy allpapi kamachikuk runakunata kamachinkasapa ama Tata Diosta kuyankunkunapa.”

18

Juan kawarkan Tata Dios chay Babilonia llaktata kulluchiptin.

¹Tukuy chaykunata kawashkayniwasha ñuka Juan suk angelta kawarkani sielumanta urayamuptin. Chay angelka sukaman sinchi kamachikuk karkan. Sielumanta urayamushpa tukuy allpata lusichirkan. ² Payka sukaman sinchita rimarkan:

“Tata Dios kastigaptin chay manllayba llakta Babiloniaka kullushkana.

¡Nami kullushkana!

Chay llaktapi supaykuna yaykushkasapa kawsak.

Rikchak laya mana alli rurak supaykuna chaypi kawsansapa.

Aypa chikninapa millanapa laya pawak animalkuna chaypi kawsansapa.

³ Chay Babilonia llaktapi kawsak runakuna

tukuy laya munanankunallata rurashpa kawsarkansapa.

Chayrayku kullushkasapa.

Paykunaka tukuy llaktakunapi kawsak runakunata yachachirkansapa sukaman uchallikunankunapa.

Tukuy llaktakunapa kamachikukninkunata yachachirkansapa ruradu dioskunata kuyanankunapa.

Tukuy llaktakunapi rantikuk runakuna

Babiloniapi mana valek tiyapunankunata rantikushpa

sukaman kullkiyarkansapa.”

⁴ Chaymanta uyarirkani Tata Dios sielumanta rimaptin:

“Kankuna wambraynikuna,

chay llaktamanta llukshiychi

ama chaypi kawsak runakunashina uchallikunaykichipa.

Mana munanichu paykunatashina kankunata kastigaynikichita.

⁵ Chay llaktapi kawsak runakuna sukaman uchallikuptinkuna

ñuka Tata Dios rabyakuni.”

⁶ Chashna Tata Dios rimashpa chay kastigakuk angelkunata willarkansapa:

“Chay llaktapi kawsak runakuna wambraynikunata sukaman sufrichirkansapa.

Chayrayku paykunatapish ashwan sinchita kastigashpa sukaman sufrichiy-chi.

Chay runakuna wambraynikunata sukaman sufrichishkankunarayku ashwan sinchita sukaman kastigaychi.

⁷ Chay mana alli rurak runakuna sukaman kreyinakushkasapa.

Munanankunallata rurashpa kawsashkasapa.

Chayrayku sinchita kastigashpa sufrichiychi.

Chay runakuna alabanakushpa shunkunkunapi yuyanakurkansapa sukaman kullki likidu sinchi kamachikuk kanankunata.

Yuyanakurkansapa mana viyudashina sufrinankunata.

⁸ Chashna yuyanakuptinkunapish ñukaka raslla kastigashasapa.

Sukaman tukuy layata atipak Tata Diosmi kani.

Chashna kastigaptinikuna sukaman yarkankasapa llakinkasapa wañunkasapa wasinkuna rupankasapa.”

⁹ Chashna Tata Dios rimaptin chay llakta sukaman rupashpa kusninka. Tukuy allpapi kamachikuk runakuna chayta kawashpa sukaman llakishpa wakankasapa. Chay kamachikuk runakuna munanankunallata rurashpa chay llaktapi kawsak runakunawan ruradu diosninkunata kuyashpa uchallikurkansapa. ¹⁰ Chashna chay llakta rupaptin chay sinchi kamachikuk runakuna kawashpa karullamanta manchakushpankuna rimankasapa:

“¡Alaw alaw! Chay atun Babilonia llaktapi kawsak runakuna sukaman sufriyaksapa.

Chay llaktapi kawsak runakuna tukuy allpapi kawsak runakunata sinchita kamachishkasapa.

Kunanka raslla Tata Dios paykunata kastigaykansapa.”

¹¹ Chay llakta rupaptin tukuy layata rantikuk runakunapish sukaman llakishpa wakankasapa manana ni pi tiyapunankunata rantik tiyaptinna.

¹² Chay rantikuk runakuna chay llaktapi rantikurkansapa kurita, yurak kullkimanta ruradukunata, allima llipiyak rumikunata, yurak perlaskunata, allima linumanta sedamanta ruradu llachapakunata, puka sani llachapakunata, mishkilla asnak kaspikunata. Chaymanta rantikurkansapa elefantepe kirunkunamanta rikchak laya ruradukunata, sinchi kaspikunamanta bronsemanta fierrumanta yurak rumimanta ruradukunata. ¹³ Chaymanta rantikurkansapa kanelata, mikuna mishkichikkunata, mishkilla wiki rupachinapaasnakkunata, tukuy laya allima mishkik asnakkunata, vinuta, wirata, triguta, trigu machkata, aparikuk animalkunata, ovejakunata, kaballukunata, karrukunata. Chaymanta runakunatapish rantikuksapa chay rantik runakunapi trabajanankunapa.

¹⁴ Chashna chay llakta rupaptin chay rantikuk runakunaka rimankasapa: “Chay llaktapika manana tiyannachu chay munanankuna mishkik wayukuna.

Tukuy chay runakunapa rikchak laya munanankuna tukuy kullkinkuna ñami kullushkana.”

¹⁵ Nawpa chay rantikuk runakuna chay llaktapi kawsak runakunata rantichishpankuna sukaman kullkiyarkansapa. Chayrayku Tata Dios kastigashpa rupachiptin kawashpa manchashpa karullapi kiparinkasapa. Chayllapi sukaman llakishpa wakankasapa. ¹⁶ Sukaman wakashpa rimankasapa:

“¡Alaw alaw! Chay atun llaktaka ñami rupaykanna.

Nawpa chay llakta allima linumanta ruradu llachapayuk warmishina karkan.

Chay allima llachapanka puka sani karkan.

Chaymanta kurimanta allima llipiyak rumimanta yurak perlasmanta ruradukunawan sumachidu karkan.

¹⁷ Chay tukuy layayuk llakta rasllana kullushka.”

Chaypina chay llakta rupaptin chay manllayba kochapi barkukunata purichik runakunawan yanapakninkunawan tukuy barkukunapi trabajk runakuna karullamanta rupananta kawankasapa. ¹⁸ Chay llakta rupashpa kusniptin kawashpankuna sinchita rimankasapa: “Chay llakta tukuy llak-takunamanta ashwan sinchi ashwan atun karkan.”

¹⁹ Chashna rimashpa sukaman llakishpa umankunapi allpata churankasapa. Wakashpa sinchita rimankasapa:

“¡Alaw alaw! Chay manllayba llakta rupaykan.

Nawpa chay llaktapi barkuyuk runakuna tukuy laya allimakunata rantikushpa sukaman kullkiyarkansapa.

Kunanka chay llaktaka rasllana kullushka.”

²⁰ Chaypina chay sinchi kamachikuk angelka rimarkan:

“Kankuna sielupi kawsakkuna chay llakta rupashkanrayku sukaman kushikuychi.

Kankuna Tata Diospa wambrankuna, kushikuychi.

Jesukristupa yachachikunanta yachachikukkuna,

Tata Diospa rimananta yachachikuk runakuna, kushikuychi.

Chay llaktapi kawsakkuna kankunata sufrichishushkaykichirayku

Tata Dios ñami paykunataka kastigashkasapana.”

²¹ Chaypina suk sinchi kamachikuk angel suk manllayba kutakuna rumita apishpa chay manllayba kochapi wishchukurkan. Chayta wishchukushpa rimarkan:

“Tata Dioska chay manllayba Babilonia llaktapi kawsak runakunata kasti-gankasapa.

Ñuka chay manllayba rumita wishchukukshina chashnashinalla Tata Dioska chay runakunata kastigankasapa.

Chaypina mana kutin ni pi paykunata kawankasapanachu.

²² Chay llakta chunlla kipariptin manana ni pi kallinkunapi uyarinkasapanachu arpakunata takaptinkuna nima flawtankunata nima trompetankunata pukuptinkuna.

Manana nima laya trabajadorkuna tiyankanachu.

Manana ni pi uyarinkasapanachu kutakushpa soyenachiptinkuna.

²³ Chay llaktapi manana niman suk lampara lusichikunkanachu.

Manana nima funsia fiesta bullakunata uyarinkasapanachu.

Chay llaktapi rantikuk runakunata tukuy allpapi rantikuk runakunamanta ashwan kullkiyuk karkansapa.

Chayrayku tukuy allpapi kawsak runakunata ñakachishpa llullachirkansapa.

²⁴ Chay llaktapi kawsakkunaka

Tata Diosta kreyik runakunata

tukuy allpapi aypa runakunata wañuchirkansapa.

Tata Diospa rimananta yachachikuk runakunatapish wañuchiptinkuna yawarnin ichakurkan.

Chayrayku Tata Dioska chay llaktapi kawsak runakunata sukanan kasti-gashpa kulluchinkasapa.”

19

Juan kawarkan sielipi kawsak runakunata Tata Diosta alabaptinkuna.

¹ Chaymanta sielipi ñuka Juan aypa runakunata uyarirkani rimakuptinkuna:

“Akuychi Tata Diosta alabaypachi.

Payka uchanchikunamanta salvawashkanchisapa.

Tukuy layata atipan rurayta.

Sukanan allimami.

² Payka tukuy mana alli rurak runakunata kuskanpi allita kastigan.

Chayrayku chay llaktapi kawsakkunata allitana kastigashkasapa waynandera warmishina kaptinkuna.

Paykunaka tukuy allpapi kawsak runakunata yachachirkansapa mana allita rurashpa kawsanankunapa.

Tata Diosta sirvik runakunatapish wañuchirkansapa.

Kunun Tata Dioska paykunata kutipashpa sukanan kastigashkasapa.

Chayrayku akuychi Tata Diosta alabaypachi.”

³ Chashna chay sielipi kawsak runakuna rimashpa kashkan Tata Diosta alabarkansapa:

“Tata Dios chay llaktata rupachiptin mana tukuuiyukta kusninka.

Chayrayku akuychi Tata Diosta alabaypachi.”

⁴ Chaypina chay ishkay chunka chusku ansianukuna Tata Diospa ñawpakinipi chay chusku animalkunawan tantalla pakchanakushpa tiyarinanpi tiyariyu Tata Diosta kuyarkansapa. Chashna kuyashpa rimarkansapa: “Ariya, ñukaykunapish rimanisapa Tata Dios alli kananta. Akuychi payllata alabaypachi.”

⁵ Chaypina Tata Diospa tiyarinan ladunmanta uyarirkani rimakuptin: “Tukuy kankuna, kamachikuk mana kamachikuk kashpaykichiipish Tata Diosninchita alabaychi.

Tukuy kankuna Tata Diosta kuyashpa sirvik runakuna, payta alabaychi.”

Juan uyarirkana rimaptinkuna chay Oveja Wawanpa funsia fiestanta runanckunata.

⁶ Chaymanta ñuka Juan muskuyninipishina aypa runakuna rimakuktashina uyarirkani. Rimakunakuna iden yaku úrmanashina iden sinchi troynakshina soynarkan. Chay aypa runakuna rimarkansapa:

“Akuychi Tata Diosninchita alabaypachi.

Payka tukuy layata rurayta atipashpa kallarishkana tukuy layapi kamachikuyta.

⁷ Akuychi kushikuypachi.

Kushikuyninchikunawan willaypachi sukaman allima kananta.

Chay Oveja Wawan funsia diya chayamuskhana.

Paypa novian ñami allitana allichanakushka funsiaman rinanpa.

⁸ Chay novia allita Tata Diosta kasushpa allita rurashpa kawsarkan.

Chayrayku Tata Dios allima linumanta ruradu chuya chuya llipyak llachapunkunata kushka.”

⁹ Chay aypa runakuna rimashkankunawasha suk angel ñuka Juanta willawarkan: “Tukuy willanaynita killkay: ‘Chay Oveja Wawanpa funsia fiestaman konvidadu runakuna sukaman kushikunkasapa.’ ” Chayta willawashpa chay angel kashkan willawarkan: “Kikin ‘Tata Dios chay willashkaynita willashunki.”

¹⁰ Chashna chay angel willawaptin ñuka ñawpakninpí kunkurikurkani kuyanaynipa. Chaypina payka willawarkan: “Ama kuyawaychu. Kan tukuy Tata Diosta sirvikmasikikunawan allita mana shaykushpa yachachikunkichi Jesukristu salvakuk kananta. Tukuy ñawpa Tata Diospa rimananta yachachikukkunapish yachachikurkansapa Jesukristu salvakuk shamunanta. Ñukapish kankunashina Tata Diosta sirvishpa kawsani. Chayrayku ama ñukata kuyawaychu.”

Juan suk alli kamachikuk runata yurak kaballupi kawarkan.

¹¹ Chaymanta ñuka Juan muskuyninipishina kawarkani Tata Dios kawsanan sielu kicharinakuptin. Chashna kicharinakuptin suk yurak kaballuta kawarkani. Chay kaballuta montak runa alli kamachikuk alli makanakuk runa karkan. Chayrayku shutin karkan Alli Rurak Kuskata Yachachikuk.

¹² Nawinkuna nina rawraykakshina llipyarkan. Umanpi aypa koronakuna tiyarkan. Urkunpi shutinka killkadu karkan. Paylla yacharkan imatami riman chay killkadu shutinka nishpa. ¹³ Llachapan yawarwan chapudu karkan. Shutin karkan Tata Diospa Rimana.

¹⁴ Sielipi kawsak soldadukuna yurak kaballukunata montashpa payta katirkansapa. Chay soldadukuna allima linumanta ruradu yurak chuya chuya llachapayukkuna karkansapa.

¹⁵ Chay alli kamachikukpa shiminmanta llukshirkan ishkantin ladu alli filadu macheti chaywan tukuy llaktapi kawsak runakunata kuchunarpa. Sinchi kamachikuk kashpa suk fierrumanta ruradu varawan tukuy payta chiknik runakunata kamachinkasapa. Uva wayunta chakinwan sarushpa kapikshina tukuy mana alli rurak runakunata kastigankasapa. Tukuy laya atipak Tata Dios chay chiknik runakunata piñayashpa chay kamachikuk runata willanka sukaman kastiganankunapa. ¹⁶ Sawa llachapanpi susunan

partipi paypa shutin killkadu karkan: "Tukuy kamachikukkunamanta ashwan sinchi kamachikuk. Tukuy awtoridarkunamanta ashwan sinchi awtoridar."

¹⁷ Chaypina ūuka Juan suk angelta inti sawanpi shayariduta kawarkani. Chay angelka tukuy pawak aycha mikuk animalkunata sinchita kayarkan: "Tata Dios aypa mana alli rurak runakunata kastigaptin wañunkasapa. Shamuychi chay wañudukunapa aychankunata mikuk. ¹⁸ Shamuychi aypa runakunapa aychankunata mikuk. Kamachikuk runakunapa soldadukuna kamachikukninkunapa sinchi makanakuk runakunapa kaballunkunapa chay kaballukuna purichik runakunapa patronkunapa rantidu runakunapa aypa kullkiyuk runakunapa mana nimayuk runakunapa aychankunata shamuychi mikuk."

¹⁹ Chaymanta kawarkani chay manchana laya animalta tukuy kay all-papi kamachikuk runakunata soldadunkunawan tantanachiptinkuna. Tantanakurkansapa chay yurak kaballu montak runawan tukuy paypa soldadunkunawan makanakunankunapa.

²⁰ Chaypina chay kaballuta montak runaka chay manchana laya animalta apirkan preso kananpa. Chaymanta chay mana allita yachachikuk almirana layakunata rurak animaltapish apirkan preso kananpa. Ñawpa chay almirana layakunata rurak animalka chay manchana laya animalpa figuranta rurachirkan runakuna chayta kuyanankunapa. Rikchak laya almiranakunata rurashpa chay figurata kuyak runakunata chay manchana animalpa sellunwan selluchadu runakunata llullachirkansapa. Chaypina chay kaballuta montak runaka chay ishkantin llullachikuk animalkunata chay asufriwan rawraykak ninapi kawsakllata wishchukurkansapa.

²¹ Chaymanta chay kaballuta montak runaka shiminmanta llukshik machetinwan tukuy chay manchana laya animalpa soldadunkunata wañuchirkansapa. Chaypina tukuy chay pawak aycha mikuk animalkuna paykunapa aychanta mikushpa saksarkansapa.

20

Juan kawarkan waranka watata Jesukristu kreyik runakunawan tantalla kamachikuptinkuna.

¹ Chaymanta ūuka Juan muskuynipishina suk angelta kawarkani sielumanta urayamuptin. Paypa makinpi tiyarkan supay wichkanan manllayba uchku punkun kicharinan llavi. Chaymanta makinpi suk manllayba kadena tiyarkan. ² Chay angelka chay manllayba machakuya apirkan. Chay machakuy supay kashpa allpa kallarinanmantapacha runakunata llullachirkan. Paypa shutinka Satanasm. Payka tukuy supaykunapa kamachikuknini. Chay angelka payta apishpa waranka watapa kadenawan watarkan. ³ Chashna watashpa chay manllayba uchkupi wishchukurkan. Chaymanta chay uchkupa punkunta sellucharkan waranka watata amana allpapi kawsak runakunata llullachinapa. Chay washan Tata Dios chay machakuya suk tiempullapa kacharichinka.

⁴ Chaymanta kawarkani aypa kamachikukkunapa tiyarinankunata. Chaypi kawarkani aypa tiyariyu runakunata. Paykuna manara wañushpara Tata Diospa rimananta Jesukristupa yachachikunanta allita yachachikurkansapa. Chay runakunaka chay kanchis umayuk manchana laya animalta mana kuyarkansapachu. Nima ruradu figuranta kuyarkansapachu. Nima makinkunapi nima urkunkunapi chay animalpa sellunwan selluchadu karkansapa.

Chashna Tata Diospa rimananta allita yachachikuptinkuna chay manchana laya animalka umankunata tipichishpa wañuchichirkansapa. Paykunata wañuchichtinkunapish Tata Dios kawsachimushpa willarkansapa waranka watata Jesukristuwan tantalla kamachikunkunapa.⁵ Tata Dios manara ni pita kawsachimushpara chay kamachikuk runakunata kawsachimurkansapa. Chay waranka watakuna washan Tata Dios suk wañudukunatapish kawsachimunkasapa.

⁶ Chay kawsachimudu runakuna sukanman kushikunkasapa Tata Diospa wambrankuna kashpankuna. Paykunaka manana kashkanka wañunkasapanachu. Saserdotekunashina Tata Diosta Jesukristuta sirvinkasapa. Waranka watata Jesukristuwan tantanlla kamachikunkasapa.

Tata Dios supaykunapa kamachikunkinta ninaman wishchukunka.

⁷ Chaymanta chay waranka watakuna washan chay wichkadu uchku-manta Tata Dios Satanasta kacharichinka. ⁸ Chaypina Satanaska rinka tukuy allpapi kawsak runakunata llullachik. Chay Gok llaktapi Magok llaktapi kawsak runakunatapish llullachinkasapa. Chay llaktakunapa soldadunkuna playashina mana yupaya laya tantanakunkasapa Tata Diospa wambrankunawan makanakunankunapa.

⁹ Chaypina tukuy maymanta chay soldadukuna shamunkasapa Tata Diosta kasuk runakunapa llaktanta kulluchik. Tata Dios kuyanan llaktata kulluchinayaptinkuna Tata Dios sielumanta ninata urmachimushpa tukuy paykunata rupachinkasapa.

¹⁰ Chaypina chay manllayba asufriwan rawraykak ninapi Tata Dioska runakunata llullachik Satanasta wishchukunka. Chayllaman chay kanchis umayuk manchana laya animaltapish chay mana alli yachachikuk animal-tapish wishchukunka. Chaypi diyapi tutapi mana tukuuniyukta sufrinkasapa.

Juan Tata Diosta kawarkan allimayurak likidu kamachikunan tiyarinanpi tiyariduta.

¹¹ Chaymanta ñuka Juan muskuyninipishina suk atun allima yurak likidu kamachikukpa tiyarinanta kawarkani. Chaypi Tata Diosta tiyariduta kawarkani. Chaypina Tata Diospa ñawpakninmanta tukuy allpa tukuy sielu chinkarkan. Chashna chinkashpa manana ni maypi rikurirkannachu.

¹² Chaypina ñuka Juan kamachikuk mana kamachikuk wañudukunata Tata Diospa tiyarinan ñawpakninpí shayaridukunata kawarkani.

Chaymanta aypa libruckenata kicharidukunata kawarkani. Chaymanta chikan libruta kawarkani maypicha mana tukuuniyukta kawsak runaku-napa shutinkuna killkadu karkan. Chaypina Tata Dios chay libruckenapi tukuy runakunapa alli mana alli rurashkankunata kawarkan. Chay libruckenapi killkadu rimananshina chay runakunata kastigarkansapa.

¹³ Chaypina manllayba yakukunamanta, wañudukuna churanankunamanta tukuy wañudukuna shamurkansapa Tata Diospa ñawpakninpí shayarik. Tata Dioska paykunata willarkansapa mana alli rurashkankunaryku kasti-ganankunata.

¹⁴ Chaypina chay wañudukuna churanankunata Tata Dios rawraykak nianman wishchukurkan. Chashna wishchukushkanwasha manana ni pi wañunkasapanachu. Chay rawraykak ninapi chay mana alli rurak runakuna mana tukuuniyukta sufrishpankuna ishkaynin kuti wañukshina kankasapa.

¹⁵ Tata Diospa librungi mana tukuuniyukta kawsak runakunapa shutinkuna killkadu. Tata Dios chay librungi shutinkuna mana killkadu runakunata chay rawraykak nianman wishchukurkansapa.

21

Juan mushuk sieluta mushuk allpata kawarkan.

1 Chaymanta ñuka Juan muskuynipishina mushuk sieluta mushuk allpata kawarkani. Kay riksinanchi sieluка kay riksinanchi allpaka kay riksinanchi manllayba kochapish chinkarkansapa. **2** Chaymanta kawarkani Tata Dios akllashkan mushuk Jerusalen llaktata paypa ñawpakninnmanta urayamuykaptin. Chay mushuk llaktaka rikchak layawan allima sumachidu karkan iden suk allichanakudu kasaranayak shipashshina novionta shuyanpana.

3 Chaypina uyarirkani Tata Diospa tiyarinanmanta suk sinchi rimakukta rimakuptin: “Kunanka Tata Dios runakunawan kawsykan. Paykunawan kawsanka. Paykunaka Tata Diospa wambrankunami. Kikin Tata Dioska paykunawan tantalla kawsashpa paykunapa Diosninkuna kanka. **4** Paykuna wakakuptinkuna Tata Dios ñawinkunata pichapunkasapa. Chay mushuk llaktapi kawsak runakunaka manana wañunkasapanachu. Manana nima llakishpa wakankasapanachu. Paykunapa manana nima nanay tiyankanachu. Tukuy chay ñawpa allpa chinkashkanrayku chay runakunaka mushuk layatana kawsankasapa.”

5 Chaypina Tata Dios chay alli tiyarinanpi kashpa rimarkan: “Ñukaka tukuy layata mushukyachini.”

Chaymanta ñuka Juanta willawarkan: “Tukuy rimashkaynika sukaman al-limami. Tukuy runakuna yachankasapa mana llullakushpa rimashkaynita. Chayrayku tukuyta killkay.”

6 Chaymanta Tata Dioska kashkan willawarkan: “Tukuy rimashkaynita ñami rurashkanina. Ñukami A letrashina kashpayni tukuy layata kallarini. Chaymanta Z letrashina kashpayni tukuy layata tukuchani. Ñuka suk allima kawsachikuk yakuta tukuy yakunayak runakunata mana chaninpachu yakuchishasapa. Tukuy ñukawan kawsayta munak runakunata mana chaninpachu yanapashasapa ñukawan mana tukuy niyulta kawsanankunapa. **7** Tukuy runakuna wañunankunakaman ñukata allita kasuwashpa kawsashpa willashkaynishina chay mushuk llaktaynipi kushikushpa kawsankasapa. Ñukaka paykunapa Tata Diosninkunami kani. Paykunaka wambraynikunami kankasapa.

8 Chaymanta tukuy sufriya manchak runakuna, mana ñukata kreyi-wakkuna, chiknikukkuna, runamasinkunata wañuchik runakuna, chikan warmiwan uchallikushpa kawsak runakuna, chikan ullkuwan uchallikushpa kawsak warmikuna, tukuy brujukuna, tukuy ruradu dioskunata kuyak runakuna, llulla likidu runakuna chay asufriwan rawraykak ninaman rinkasapa. Chay rawraykak ninapi sufrishpankuna ishkaynin kuti wañunkasapa.”

Juan kawarkan mushuk Jerusalen llaktata.

9 Chaymanta chay kanchis kopankunata tallishpa kastigakuk angelkunamanta sukka ñuka Juanman shamushpa willawarkan: “Mash shamuy chay Oveja Wawanpa novianta kawachinaynipa.”

10 Chashna chay angel willawaptin Tata Diospa Espiritunka muskuynipishina suk almirána layata kawachiwarkan. Chay angelka suk manllayba alto atun urku sawanman pushawashpa Tata Diospa kawsanan Jerusalen llaktata kawachiwarkan. Sielumanta Tata Diospa ñawpakninnmanta chay allima llaktan urayamuykarkan. **11** Chay allima llakta Tata Diospa llipyayn-inwan sukaman allimata llipyarkan. Iden aypa kullkiwan rantidu ankash

likidu llipyak rumishina llipyarkan. Allima chuya likidu vidroshina llipyarkan.¹² Chay llakta tukuy vueltashnintin manllayba pirkawan wichkadu karkan. Chay pirkaka chunka ishkay punkuyuk karkan. Tukuy punkunkuna napi suk kuydakuk angel tiyarkan. Chay punkunkunapi israel runaku-napa chunka ishkay ayllunkunapa shutinkuna killkadu karkan.¹³ Kimsa punkukuna inti llukshimunan partipi karkan. Kimsa punkukuna inti yaykunan partipi karkan. Kimsa punkukuna yaku anaknin partipi karkan. Kimsa punkukuna yaku uraynin partipi karkan.¹⁴ Chay llaktapa pirkasik-inpi ishkay chunka sinchi manllayba suni rumikuna tiyarkan. Chay chunka ishkay rumikunapi chay Oveja Wawanpa chunka ishkay disipulunkunapa shutinkuna killkadu karkan.

¹⁵ Chay ūukawan parlak angelka makinpi apaykarkan kurimanta ruradu pintushina medidata chay llaktapa punkunkunata pirkanta medinapna.¹⁶ Chay llaktapa chuskuynin ladun chay chika anchu chay chika sunilla karkan. Chay angelka chay pintushina medidanwan chay llaktata medirkan. Allita medishpa rimarkan ishkay waranka ishkay pachak kilometru kananta. Suniynin anchuynin altuynin chashnalla karkan.¹⁷ Chaymanta chay angelka runakuna amañashkankuna medidawan chay pirkasik-inpi altuyninta medirkan. Chayta mediptin sokta chunka pichka metro karkan.

¹⁸ Chay llaktapa pirkanka vueltashnintin puka likidu llipyak jaspe rumikunawan ruradu karkan. Kuriwan ruradu kashpa chuya likidu vidroshina llipyarkan.¹⁹ Chay llaktapa pirkasik-inpi rumikuna rikchak laya allima llipyak rumikunawan sumachidu karkansapa.

Kallariknin sumachinan rumi ancash llipyak jaspe karkan. Ishkaynin chuyayadu ancash llipyak safiro karkan. Kimsaynin chikyakyadu ancash llipyak agate karkan. Chuskuynin chikyak likidu llipyak esmeralda karkan.²⁰ Pichkaynin killuyadu puka llipyak onise karkan. Suktaynin puka likidu llipyak kornalina karkan. Kanchisnin kurishina killu llipyak krisolito karkan. Pusaknin yanayadu chikyak likidu llipyak berilu karkan. Iskunnin chuyayadu killu likidu llipyak topasio karkan. Chunkaynin killu killuyadu ancash llipyak krisoprasa karkan. Chunka suknin saniyadu llipyak jasinto karkan. Chunka ishkaynin chuyayadu sani llipyak amatista karkan.

²¹ Chaymanta chay llaktapa pirkanpi chunka ishkay punkunkuna chunka ishkay yurak likidu perlaskunamanta ruradu karkansapa. Kada punku suk atun perlaswan ruradu karkan. Chaymanta kallin kuriwan ruradu kashpa chuya likidu vidroshina llipyarkan.

²² Chaymanta chay mushuk llaktapi Tata Diosta kuyana wasita mana kawarkanichu. Chay llaktapi kawsak runakuna maypiish kashpa tukuy laya atipak kamachikuk Tata Diosta chay Oveja Wawanta kuyankasapa. Chayrayku Tata Diosta kuyana wasi manami chaypika tiyankachu.²³ Chay mushuk llaktapi mana inti nima killa tiyankachu. Tata Dioska kikinpa llipyaynинwan llipyachinka. Chay Oveja Wawanpish rawraykak lampara-shina kashpa llipyanka.

²⁴ Tukuy llaktakunamanta runakuna chay mushuk llakta lusnippi purinkasapa. Tukuy llaktakunapa kamachikukninkuna rinkasapa tukuy tiyapunankunata chay llaktapi churak.²⁵ Chay mushuk llaktapi mana tutá tiyaptin tukuy tiempu chay punkunkuna kicharidulla kankasapa.²⁶ Tukuy llaktakunamanta runakuna alli tiyapunankunata chay llaktaman apanksapa.²⁷ Chay llaktapi manami niman suk millanapa laya yaykunkachu. Mana niman suk millana layata rurak runakuna, niman suk llullakuk runakuna yaykunkasapachu. Chay llaktapika chay Oveja Wawanpa alli librunpi shutinkuna killkadu

runakunalla yaykunkasapa. Chay librunpi shutinkuna killkadu kaptin mana tukuyniyukta kawsankasapa.

22

Juan suk chuya chuya yakuta kawarkan.

¹ Chaypina chay angelka suk chuya likidu kawsachikuk yakuta kawachiwarkan. Chay yakuka chuya likidu kashpa vidroshina rikurirkan. Tata Diospa tiyarinanmanta Oveja Wawanpa tiyarinanmanta chay yakuka llukshimuk.

² Chay yakuka chay llaktapa chawpi kallinta kallparkan. Ishkantin mañanpi kawsachikuk kaspikuna wiñarkan. Chay llaktapi kawsak runakuna chay kaspikunapa wayunkunata mikusupa mana tukuyniyukta kawsankasapa. Kada killa chay kaspikuna wayuchakun. Kada wata chunka ishkay kuti wayuchakun. Chay kaspikunapa pankankuna tukuy llaktakunamanta unkudu runakunata alliyachinkasapa. ³ Chay mushuk llaktapi Tata Dios manana ni pita kastigankasapanachu. Chay llaktapi Tata Diospa tiyarinanka Oveja Wawanpa tiyarinanka kanka. Chaypina tukuy payta sirvikeninkuna kuyankasapa. ⁴ Tata Diosta uya uya kawankasapa. Paypa shutin urkunkunapi killkadu kanka. ⁵ Chay llaktapika manana tuta tiyankanachu. Chaypi kawsak runakuna mana lamparata nima intita munankasapanachu sinchi kamachikuk Tata Dios paykunapa lusninkuna kaptin. Chaymanta tukuy paykunaka mana tukuyniyukta kamachikunkasapa.

Jesukristu Juanta willarkan utka shamunanta.

⁶ Chaymanta chay angelka ñuka Juanta willawarkan: “Kuskata mana llullakushpa rimani. Chayrayku willaptini kasunayki tiyan. Kamachikuk Tata Dios chay ñawpa yachachikuk runakunata rimananta yachachirkan. Kikin Tata Diosllami ñukata kachamuwashka tukuy payta sirvik runakunata kawachinaynipa imakunatami utkana ruranka nishpa.”

⁷ Chashna chay angel willawaptin Jesukristu willawarkan: “Ñukaka utkana shamusha. Runakuna kay librupi killkashkaykita kasushpankuna sukaman kushikunkasapa.”

⁸ Ñuka Juan kikini uyarishkaynita kawashkaynita killkashkani. Chayta uyarishkayni kawashkayniwasha chay kawachiwak angelpa ñawpakinipi kunkurirkanki kuyanaynipa. ⁹ Chaypina pay willawarkan: “Ama kuyawaychu. Ñukapish kanshinami Tata Diosta sirvik kani. Tata Diospa rimananta yachachikukmasikunashina tukuy kay librupi killkadukunata kasukuk runakunashina ñukapish Tata Diosta sirvikmi kani. Chayrayku ama ñukata kuyawaychu. Tata Diosllata kuyay.”

¹⁰ Chaymanta chay angelka willawarkan: “Tata Dios tukuy kay librupi killkashkaykita utkana ruranka. Chayrayku kay killkadu rimanata mana pakashpa allita yachachikuy. ¹¹ Kay rimanata mana kasukuk runakuna mana allikunallata rurashpa kawsachunsapa. Chaymanta uchallikushpa kawsak runakuna uchallikuyllapi katichunsapa. Tukuy allita rurashpa kawsak runakuna allillata rurashpa kawsachunsapa. Chaymanta Tata Diosta kasuk runakuna Tata Diosllata kasushpa kawsachunsapa.”

¹² Chashna chay angel willawaptin Jesukristu willawarkan: “Ariya. Utkana shamusha tukuy runakunata rurashkankunatashina premyunkunata kunaynipasapa. ¹³ Ñukaka A letrashina kashpayni tukuy layata kallarini. Chaymanta Z letrashina kashpayni tukuy layata tukuchani. Ñukaka mana kallarinayukmi kani. Mana tukuyniyukta kawsasha.”

¹⁴ Ñukata kreyiwak runakuna uchankunamanta perdonadu kashpa chuya chuya takshadu llachapayukshina kashpa sukanan kushikunkasapa. Paykunaka atipankasapa chay allima llaktapa punkunta yaykuya. Chayta yaykushpa mana tukuyniyukta kawsachikuk kaspi wayunkunata mikunkasapa.

¹⁵ Chay allima llaktapika mana millanapa laya mana alli rurakkuna nima ñakakukkuna nima chikan warmiwan uchallikushpa kawsakkuna nima chikan ullkuwan uchallikushpa kawsak warmikuná nima runamasinta wafluchikkuna nima ruradu dioskunata kuyakkuna nima llullachikushpalla kawsak runakuna nima llulla likidu runakuna yaykunkasapachu.”

¹⁶ Chaymanta Jesukristu willawarkan: “Ñuka Jesusmi chay angelninita kachamushkani tukuy kay rimanaynita kanta yachachishunaykipa. Kan-pish tukuy kreyiwak runakunata yachachiysapa. Ñukaka chay ñawpa kamachikuk Davidpa ayllunmanta miraknin kashpayni tukuy runakunapa sinchi kamachikuknini kani. Ñukaka chay pakarinan llipyak luserushina kani.”

¹⁷ Chayppina Tata Diospa Espiritunka chay Oveja Wawanpa novianwan payta willansapa: “¡Utkana shamuy!”

Chaymanta tukuy kay librupi killkaduta uyarik runakunapish payta willaychi: “¡Shamuyna!”

Chaymanta Tata Diosta kasunayashpaykichi yakunayak runakunashina kashpaykichi shamuychi kay mana chaniyuk kawsachikuk yakuta upyak. Chashna chay yakuta upyashpaykichi mana tukuyniyukta Tata Dioswan kawsankichi.

¹⁸ Ñuka Juan tukuy kay librupi killkashkaynita uyarik runakunata sinchita willani: Ama kay killkadu librupi rimanata imatami Tata Dios ruranayanan nishpa mirachiychichu. Mirachiptikichika Tata Dios kay librupi killkadu kastigukunawan kastigashunkichi. ¹⁹ Chaymanta ama kay killkashkayni librumbanta imatami Tata Dios ruranayanan nishpa niman suk rimanata surkuychichu. Killkashkaynita surkuptikichika Tata Dios chay yachachishkayni mana tukuyniyukta kawsachikuk kaspipa wayunta kichushunkichi. Nima chay yachachishkayni allima llaktapi yaykuchishunkichichu.

²⁰ Chaymanta tukuy kay librupi killkashkaynita yachachiwak Jesukristu rima: “Ariya utkana shamuni.”

Chaymanta ñuka Juan Señor Jesusta willani: “Ariya, utkana shamuy.”

²¹ Señorninchi Jesukristu tukuy kankunata allita yanapashuchunnikichi.

Tata Dios tukuy rimashkanta rurachun.